

DYUS YUWE U'SESA

El Nuevo Testamento

en páez



DYUS YUWE U'SESA

El Nuevo Testamento
en páez de Colombia

Las ilustraciones en las páginas 3, 7, 18, 33, 46, 62, 66, 68, 70, 83, 91, 97, 106, 108, 111, 112, 114, 121, 127, 130, 140, 148, 162, 182, 184, 185, 188, 195, 202, 213, 219, 224, 235, 237, 238, 243, 246, 251, 260, 262, 270, 278, 279, 287, 293, 302, y 305 se usan por cortesía de
©1978, David C. Cook Publishing Co.

Primera edición

© 1980, Sociedad Bíblica Internacional

Segunda edición

© 2011, Wycliffe Bible Translators, Inc.

www.ScriptureEarth.org



Creative Commons (Atribución - No Comercial - No Derivadas 3.0)
<http://creativecommons.org/licenses/by-nc-nd/3.0>

ÍNDICE

	página
Dyus Yuwe San Mateo Fi'jni	San Mateo (Mt) 1
Dyus Yuwe San Marcos Fi'jni.	San Marcos (Mr). 71
Dyus Yuwe San Lucas Fi'jni.	San Lucas (Lc) 116
Dyus Yuwe San Juan Fi'jni	San Juan (Jn). 190
Jesus Jycaajnisawe'sh Dyus Yuwe's Pta'shni	Hechos (Hch) 245
San Pablo Carta Roma Chjambtewe'sh Jii	Romanos (Rm) 309
San Pablo Carta Nyafyte Fi'jni Corinto Chjambtewe'sh Jii	1 Corintios (1 Co). 337
San Pablo Carta E'su Fi'jni Corinto Chjambtewe'sh Jii	2 Corintios (2 Co). 364
San Pablo Carta Galacia Quiwesuwe'sh Jii	Gálatas (Gál) 381
San Pablo Carta Efeso Chjambtewe'sh Jii	Efesios (Ef). 391
San Pablo Carta Filipo Chjambtewe'sh Jii	Filipenses (Plp). 400
San Pablo Carta Colosas Chjambtewe'sh Jii.	Colosenses (Col). 407
San Pablo Carta Nyafyte Fi'jni Tesalonica Chjambtewe'sh Jii	1 Tesalonicenses (1 Te) . . 413
San Pablo Carta E'su Fi'jni Tesalonica Chjambtewe'sh Jii	2 Tesalonicenses (2 Te) . . 419
San Pablo Carta Nyafyte Fi'jni Timoteo Jii	1 Timoteo (1 Ti). 423
San Pablo Carta E'su Fi'jni Timoteo Jii	2 Timoteo (2 Ti). 431
San Pablo Carta Tito Jii.	Tito (Tit) 437
San Pablo Carta Filemón Jii.	Filemón (Flm) 441
Carta Hebreowe'sh Jii	Hebreos (Heb) 443
Santiago Carta.	Santiago (Stg). 463
San Pedro Carta Nyafyte Fi'jni.	1 Pedro (1 Pe) 470
San Pedro Carta E'su Fi'jni	2 Pedro (2 Pe) 478
San Juan Carta Nyafytewe'sh	1 Juan (1 Jn) 483
San Juan Carta E'stewe'sh.	2 Juan (2 Jn) 490
San Juan Carta Nmejtewe'sh.	3 Juan (3 Jn) 492
San Judas Carta.	Judas (Jud) 494
Jesucristo Vyaawa'ja's Caajiyu'jni.	Apocalipsis (Ap). 497
Mapas	528

DYUS YUWE SAN MATEO FI'JNI

Jesucristo ji'j nyafiiteywe'shtyi pta'shni
(Lc. 3.23-38)

1 ¹ Jesucristo ji'j nyafiiteywe'sh quimteva tyāatycu pta'shi' ayte'.
Jesucristo' Abrahan David ji'cj yu'. ² Abrahana' Isaac neycu yu',
naapcachja' Isaacja', Jacob neycu yu'. Atsa' Jacoba', Judáwe'sh neycu yu'.
³ Juda' Fares vite' Zara neycu yu', atsa' njí'ja' Tamarcu yaase yu'. Faresa'
Esrom neycu yu', naapcachja' Esroma', Aram neycu yu'. ⁴ Arama', Aminadab
neycu yu', naapcachja' Aminadaba' Naason neycu yu'. Atsa' Naasona',
Salmón neycu yu'. ⁵ Salmona' Booz neycu yu', naapcachja' njí'ja' Rahabcu
yaase yu'. Booza' Obed neycu yu', atsa' njí'ja' Rutcu yu'. Obedá' Isaí neycu
yu', ⁶ naapcachja' Isaí', jycaajsa David neycu yu'. Atsa' jycaajsa Davida',
Salomón neycu yu', atsa' Salomón njí'ja' Urias nyu yu'c nyafíi tyāac yu'.
⁷ Salomona' Roboam neycu yu', naapcachja' Roboama', Abias neycu yu'.
Atsa' Abiasa', Asa neycu yu'. ⁸ Atsa' Asa', Josafat neycu yu', naapcachja'
Josafatja', Joram neycu yu'. Jorama', Uzias neycu yu'. ⁹ Uziasa' Jotam
neycu yu', naapcachja' Jotama', Acáz neycu yu'. Atsa' Acaza' Ezequías
neycu yu'. ¹⁰ Ezequiasa' Manasés neycu yu', atsa' Manasesa' Amón neycu
yu', naapcachja' Amona' Josías neycu yu'. ¹¹ Josiasa' Jeconiaswe'sh neycu
yu'. Tyāa ensuty Israelwe'sha' Babilonia quiwen jyūna u'jni yuu. ¹² Atsa'
Jeconiasa' Salatiel neycu yu', naapcachja' Salatiela', Zorobabel neycu yu'.
¹³ Zorobabela' Abiud neycu yu', atsa' Abiuda' Eliaquim neycu yu'. Eliaquima',
Azor neycu yu'. ¹⁴ Azora' Sadoc neycu yu', atsa' Sadocja', Aquim neycu yu',
naapcachja' Aquima' Eliud neycu yu'. ¹⁵ Eliuda' Eleazar neycu yu', atsa'
Eleazara' Matán neycu yu', naapcachja' Matana', Jacob neycu yu'. ¹⁶ Jacoba'
Jose neycu yu', naapcachja' Jose' Maria nmi'c yu', Cristo Jesus yaasesa njí'j.
¹⁷ Abrahan ji'jty isate', catorce ney u'juetstec Davida' upyjna ūsu'. Atsa'
David ji'jty isate', qui' vite catorce ney u'juetstety Israelwe'sha' Babilonia
quiwen jyūna u'jni yuu. Tyāajū qui' isani qui' vite catorce ney u'juetstec
Cristo' upyjna ūsu'.

Jesucristo upyni*(Lc. 2.1-7)*

¹⁸Jesucristo upyni' na'wēc yuu: Jesus nji'j Maria' José yacj imi'ya' puuty we'wenic ji'pju'. Nava ij fi'nzemey, nasa ji'pjuc Dyus Espiritu caavya'ja'jni. ¹⁹Tyajy nmi' Josea' tyāawe'sh leytyi cytey nwēese'jna fi'nzesac yu'. Nava Maria nasa ji'pjuni yu's cjuēswe'shtyi pāatyji'cjmée, paatste tyuteeya'vac yu' nasa jiyunimeete. ²⁰Sa' tyā'wē yajcyna ūsiyna, csha'wte Dyus angel vyaarra na'jīc:

—José, David ji'j, iindy nyu yuuwa'jsa Maria's jypa'gaya' wa'lnu, na'wē nasa ji'pja' nava tyā' Dyus Espiritu caavya'ja'jni'. ²¹Maria nchi'c āaga vyaate', tyā'sa' Jesus yasene'nga. Tyā'wē cysusni yuuna, tyāa pa'gatey tyajy nasa pcaltewe'shtyi nwe'wewa'jsa' jīnac we'we.

²²Tyā'wē yuuc, nava tyāniitey Dyus yuwe pta'shsa's Dyusí caaūusutje'tje' na'wēc we'we tyāa cytey yuucajnrrāac tyā'wē yuu. ²³Tyā' na'wēc we'we:

Teech cna'sa' teech nchi'c ji'pjuna.

Tyā' Emanuel cysusni yuuna jīc.

Tyāa Emanuel jīnisa': Dyusa' cue'sh yacj ūsa' jīni'.

²⁴Tyājū' Josea' deenijū yajcyrra', Dyus angel we'weni's nwēese'jrra Maria tyajy nyu yuuwa'jsa's nvijtme'. ²⁵Nava ptam na'wē ij yu' fi'nzemeeta', María nchi'c āaga yuupcach. Sa' Maria nchi'c āaga yuute', tyā'sa' Jesus yasec qui'p.

Sec cāanijuwe'sh Jesusa's wechaya' pa'jni

2 ¹Jesusa' Belen chjambtec upy, Judea quiwete. Tyān ensu tyāa quiwesu jycaajsa' Herodescu yu'. Naapcachja' Jerusalen chjambte manz pitstjē'j pa'jty sec cāani quiwejuwe'sh estrellaty jiisa. ²Sa' na'jīnaty pējy:

—¿Mtee ūsna judiwe'shtyi jycaajwa'jsa āchj u'se upysa? Cue'sha' tyajy upyni's pta'shsa estrella's uytja'w sec cāani quiweju, tyāasatja'w wechaya' yuwé'.

³Tyā'jīte', Herodesa' wala cuj yajcycu, tyā'wēy Jerusalen chjambte nasava jyucaysa. ⁴Tyājū' jycaajsa' sacerdote npiitstjē'jwe'sh vite' ley caapiya'jsawe'sh jyucaysaty pa'yarra' paapējycu:

—Cristo' ¿mteega upywa'jsa yu'? jīte', pta'shtyi:

⁵—Judea quiwete Belen chjambtec upywa'jsa yu'. Tyajīc Dyus yuwe pta'shsa' na'jīna fi'j:

⁶Judá quiwete Belen chjamb tyā'wē maa chjambteva jytjaacue ājmeecuesame'.

Tyāa pa'gatey Belen chjambuj teech npiitstjē'jsa casejrra Andy nasa Israelwe'shtyi jype'jwa'jsa' jī'c.

⁷Tyā'jīte', Herodesa' estrella's uysaaty paatste pa'yarra pējycu:

—¿Macue tyach yuutsna estrella vyaani? jīna wala ew paapējyrrac

⁸Belenna caaj na'jīna neewe'werra:

—Cyte me'jwe, sa' wala ew paapēyine'cue tyāa luuch ma'wēsateva. Sa' ew jiyurra', andya's pta'shine'cue, atsa' andyva wechaya' u'jue'nja jīte',



(San Mateo 2.1)

⁹estrella's uysaawe'sha' u'jty. Naapcachja' sec cãani quiweju estrella uyne'ta tyãa estrella' tyãawe'sh yatste vyaana u'jrra mteene' luuch ũsu' tyãa cajcuete pa'jrrac cytee yuju. ¹⁰Tyã'wē estrella qui' vyaate', wala wechaty, ¹¹sa' yatte u'carra luucha's uytyi nji'j yacj. Sa' peejyũcuerra' luucha's wechaty. Tyã'wē yũurraty tyãawe'sh peeswa'j jyũrra u'jni's pjaanderra pees: vyuu bej, incienso vite' mirra. ¹²Tyã'wē yũunijũ' cus csha'wte pta'shnity yuu Herodes tashna qui' shawendcajmén. Atsa' vite dyi'jsuty shawendna u'j.

Egipto quiwen ũpjna u'jni

¹³Estrella's uysaawe'sh u'jniũ', José csha'wte', Dyus angel vyaarra na'jic: —Quiiterra me'j ũpjna Egipto quiwen luuchcuē's pe'jrra pety nji'j yã'jrra. Sa' cytee ũsune'nga andy qui' pta'shpcach. Tyã'wēme', Herodesa' luuchcuē's icjya' pacueya'va' jite', ¹⁴Jose' cusrráa pe'jna Egipto quiwen u'cj. ¹⁵Sa' cyteety ũsu' Herodes uupcach. Dyus yuwe pta'shsa we'werra': Egiptoju pa'yatj Andy Nchi'ca's jic tyãa cytey yuucajnrráac tyã'wē yũu.

¹⁶Estrella's uysaawe'sh tyã'wē Herodesa's weechsa na'wē vite dyi'jsu u'jni's jiyurra', seena' wala ũusachac. Sa' luuchtyi quicje'cj Belen chjambtewe'sh vite' peecu'jsuwe'sh yã'jrra jyuca, luuch e'nz añu ji'pjsate cãjpcach. Estrella's uysaawe'sha' macue tyach yã'j yuutsteva pta'shne'ta tyã'sna jiyurrac tyã'wē e'nz añu ji'pjsate cãjpcach quicje'jna ũsu' Herodesa'. ¹⁷Dyus yuwe pta'shsa Jeremias na'jina fi'jni cytey yuuc:

¹⁸Teech ajte Ramá yaasesate ptjũusec

Seena' pembeena ñus we'weni.

Tyā' Raquelcu tyā'wē ũ'ne' tyajy luuch pa'gate,

Sa' quishi'tsme!, tyā'wēty icjni yuu naa pa'ga jī'c.

¹⁹Egipto quiwete ũsrra José csha'wte!, Dyus angel vyaarra na'jīc
Herodes uunijū'!

²⁰—Āchja' luucha's icj wēesava uuyā'jty, atsa' pe'jrra shawendna me'j
Israel quiwení jīte!, ²¹Jose' shawendna u'cj Israel quiwen luuch pety njī'j
yā'jrra. ²²Nava Herodes pa'gate nchi'c Arquelao Judeate jycaajna ũste
jiyurra', ũucjcu cytee pa'jya' yu!. Sa' csha'wte! pta'shnic yuu, tyāasac
Galilea quiwen u'j. ²³Cytee pa'jrra', teech chjamb Nasaret yaasesatec u'p-
ya' u'j. Nyafiitey Dyus yuwe pta'shsawe'sh we'werra', Jesusa' Nasareno
ya'cysusuna jī'ty tyā'jīni cytey yuucajnrráac tyā'wē yūu.

Juan Bautista nasa u'pnimée quiwesu Dyus yuwe's pta'shni

(Mr. 1.1-8; Lc. 3.1-9, 15-17; Jn. 1.19-28)

3 ¹Tyāa ensu' Juan Bautista' Dyus yuwe's pta'shna pa'cj Judea
quiwesu nasa u'pnimeesu. ²Sa' na'jī'c:

—Pcaltiyi nvijtrra Dyus tashte mishawendwe. Tyā'wēme!, Dyus
jycaajwa'j ena' ājyā'cj jī'c.

³Naa Juana'scu we'wena fi'j Dyus yuwe pta'shsa Isaiasa' na'jīna:

Nasa u'pnimée quiwesu sus we'weni ptjūusec:

Dyus pa'jwa'ja's mpjeu'jwe,

Dyi'ja's cu'le pjaandena jī'c.

⁴Juana' camello cjas atyj atjrra cja'tycu jytundu!. Sa' tyajy ũ'nisa yu!, cjā'sh
wala chji'ndy miltiyi yu!. ⁵Cytee wēse'jya' pa'jty Jerusalenuwe'sh vite! Judea
quiwesuwe'sh jyuca vite! Jordan yu'wala utyasuwe'shva. ⁶Sa' tyā'wē pcalsatja'w
jīna Dyusa's perdon pējyna pa'jsaty! Juana' Jordan yu'walate bautisaī'c.

⁷Nava fariseowe'sh vite! saduceowe'sh tyā'wē tjengya' yujte uyrra',
Juana' na'jī'c:

—I'cue'sha' ul weesweesa jī'ji'cue tyāa pa'ga castigo seena'sa yuja!, atsa' tyajū
iyuwa'ja's ;quimga pta'sh? ⁸Tyā'wē castigo seena'saju iyuwa'ja's jiyuyā'jrra', ewrráa
yūuna mfi'nzewe, cyaj maava ew fi'nzeni's uysa! Naawe'sha' pcaltiyi nvijtrra Dyus
luuch yuj yuuta sūjutyna. ⁹Tyā'jīte!, i'cue'sha' na'wē iwejch yaacynuwe: Cue'sha'
Abrahan jī'tja'w na' pcalsameetja'w sūjna yaacywa'j jī'pjmée i'cue. Na'jī'tj na!: Naa
cuet yujtyva Abrahan jī'j vit-ya' ājana Dyusa!. ¹⁰Tyā'wē ew fi'nzemeete!, ama' ij
yā'j ũsa' fytūutashtyi spē'tjya!. Maa fytūutashva ew yūnsameetyi' spē'tjrra ipyte
cambwa'jrráa yuuna. ¹¹Andya' i'cue'shtyi' yu'terráatj bautisaī' pcaltiyi nvijtrra Dyus
tashte shawendsaty!. Nava andy e'suj vite yuja' tyā' Dyus Espiritu ipy na'wēsate
bautisaīna. Tyā' andyte jytjaacue ājawa'jsa!, atsa' andya' tyajy pelgatyirráa yujtyva
ūsya' seelpimeesatj. ¹²Tyā' scuutyj cweejya'jini plaatu's cusete at yā'jrra ũsa' na'
scuutyja's tamaju tyundena sūupī'jna. Tyā'wē yūurra scuutyja's jyaawuuna. Nava
tama yu'sa' cambuna ipy bagachte yujva ũchjawa'jmeesate jī'c.

Jesusa' bautisāyini
(Mr. 1.9-11; Lc. 3.21-22)

¹³Naapcachja' Jesusa' Galilea quiweju yujrra Jordan yu'wala pucate Juan ūsnite pa'cj, Juan yu'te bautisāycajn. ¹⁴Nava Juana' Jesusa's bautisāy wēemeerra na'jīc:

—Wejy yuuva indy andya's bautisāywa'jsang, sa' ¿ma'wēnga andya's pi'qui' indya's bautisāycajn? jīte', ¹⁵Jesusa' na'wēc pas:

—Dyus jytjāasni's cytey yuuní wejy ewna jīte', Juana' cytey nwēese'cj. ¹⁶Atsa' Jesusa' yu'te ya'bautisāyrra casejetspcachja', cielu' pjaatec, atsa' Jesusa' uycu Dyus Espiritu tumb chijme na'wēsa tyajy cajcuete quījatste. ¹⁷Atsa' we'weniva ptjūusec cieluju na'jīna:

—Naafí Andy Nchi'c wala wendynisa'. Tyāa pa'ga wala wechana ūstju jīc.

Echtjē'j Jesusa's īshii wēeni
(Mr. 1.12-13; Lc. 4.1-13)

4 ¹Tyajū' Dyus Espiritu' Jesusa's pe'jna u'cj nasa u'pnimée quiwesu, cyteea' echtjē'j īshii wēeni fi'nzeya'. ²Sa' cuarenta en cuarenta cus quījva ū'mée u'prra', Jesusa' wēc. ³Atsa' echtjē'ja' Jesus tashte utyaarra na'jīnac we'we ewmée vit wēerra:

—Dyus Nchi'c dyijrra', naa cuettyi pan myuucaa jīte', Jesusa' na'wēc pas:

⁴—Dyus librute na'jī'c: Nasa' pan yacjrráa yu' ītyi fi'nzemeetyna, naasáa jyuca Dyus we'weni yacj yuurráa ītyi fi'nzetyna jīc.

⁵Tyajū' echtjē'ja' Jesusa's pe'jna u'cj Jerusalen chjambna, sa' cyteea' dyuus yatte ēete caateca'jrra, ⁶na'wēc jycaaj:

—Dyus Nchi'c dyijrra', ay ēejū mūpj. Tyāa pa'gateg Dyus librute na'wēc we'we':

Dyusa' tyajy angeleswe'shtyi jycaajana indya's nwe'wecajn.

Atsa' tyāawe'sha' cusete jypa'gatyna,

lindy chinda cuette cpā'yuucajmen jīna fi'jni' jīte',

⁷Jesusa' na'wēc pas:

—Vite ajte Dyus librute' na'wēc we'we':

Indyna jype'jsa Dyusa's jycaajwa'j ji'pjmeeng jīna fi'jni' jīc.

⁸Tyajū' echtjē'ja' qui' pe'jna u'cj vits walate, sa' tyāajū maa quiwesu chjambtyiva seena' zhichcuesa's caavya'jac. ⁹Sa' na'jīc:

—Andya's peejyūcuerra neewe'wene'nga atsa' andya' na'sa' jyuca indya's ūsu'nja jīte', ¹⁰Jesus pasrra':

—Echtjē'j, andy tashu mtyuté, tyāa pa'gateg Dyus librute na'jī'c:

Indyna jype'jsa Dyusrrá's neewe'wewa'ja', sa' tyāarrá's selpiwa'ja' jīna fi'jni' jīte',

¹¹echtjē'ja' Jesus tashu tyuteec, atsa' Dyus angeleswe'sha' pu'chya' pa'ljty.

Galilea quiwesu Jesus mjiiya' tacjni

(Mr. 1.14-15; Lc. 4.14-15)

¹² Juan Bautista' cyuupjni ūsa' jini's Jesusa' jiyurra', Galilea quiwen u'cj. ¹³ Nava Nasaret chjambte yu' yujumée, Capernaum chjambtec u'p-ya' u'j. Tyāa chjamba' Zabulón vite' Neftalí quiwe tyāa ja'ndasuc ūsu' icj pucaga. ¹⁴ Tyā'wē yūuc nava Dyus yuwe pta'shsa Isaías fi'jni cytey yuucajnrráac tyā'wē yūu. Tyā' na'jīnac fi'j:

¹⁵ Zabulón Neftalí tyāawe'sh quiwesu u'psa,
Vite' icj pucasu dyi'j u'jna ūsa' tyāa ja'ndasu u'psa,
Vite' Jordan yu'cuteju, sec cāani ju'nguwe'sh,
Vite' Galilea quiwesu judiu ji'jmeesawe'sh

¹⁶ Tyāa nasa' chji'ndyte ūssa na'wē ūsrava,
Eena'sa's uytyi.
Sa' uuní na'wērráa yā'j ūsteva,
Eena'sa' cweetjcu ji'c.

¹⁷ Tyajū' Jesusa' Dyus yuwe's pta'shya' tacjcu:

—I'cue'sha' pcaltiyi nvijtrra Dyus tashte mishawendwe. Tyā'wēme', Dyus jycaajwa'j ena' ājyā'cj ji'c.

Wendy uwesáa pajnsaty Jesus pa'yani

(Mr. 1.16-20; Lc. 5.1-11)

¹⁸ Jesusa' Galilea icj pucasu u'juetsrra', e'nz pyacjtyi uycu, Andres vite nyacja's Simon Pedro ji'ty tyāawe'shtyi. Tyāawe'sha' wendy uwesaaty yu', tyāasaty wendy ucje's icjte acjna ūsu'. ¹⁹ Atsa' Jesusa' na'jīc:

—Andy yacj myujwe, atsa' Dyus jīi nasaa pcjacjwa'jsa vitu'nja i'cue'shtyi'. ²⁰ Tyā'jītspcachja', wendy ucjety nvijtrra tyāa yacj u'jty.

²¹ Atsa' Jesusa' tyāajū wejcuē u'jnarráa, vite e'nz pyacjtyi uycu, Zebedeo nchi'cwe'sh Jacobo vite' Juan tyāawe'shtyi. Tyāawe'sha' barcote ney yacjtyi u'p yu', wendy ucje's pā'cjna. Atsa' Jesusa' pa'yac.

²² Naapcachja' barco vite' tyāawe'sh neyna nvijtna'va Jesus yacj u'jty.

Nasa seena' wala cujsaty Jesus caapiya'jni

(Lc. 6.17-19)

²³ Jesusa' Galilea quiwe jyucac pecūj, judiwe'sh pcjaacjeni yat-su Dyus jycaajwa'j yuwe ewsa's pta'shna, tyā'wēy nasa quīj weete ātsa'satyva jyuca nuycatyjic. ²⁴ Tyajū' Siria quiwesuwe'sh jyuca jiyuty Jesus tyā'wē yūuni's. Tyāa pa'gaty fiyfiy ātsa'satyva jyuca jyūna pa'j, aca ji'pjsa vite' ech iiyamunisa vite' wēechpa'jsa vite' ēseyā' ājasameetyva jyuca. Tyā'wēsатыcу Jesusa' nuycatyji. ²⁵ Tyajū' Jesus yacj pi'cyna u'jyua' nasa wala utyaaty, Galileajuwe'sh vite' Decapolis quiwesuwe'sh vite' Jerusalenuwe'sh vite' Judea quiwesuwe'sh vite' Jordan yu'cutejuwe'sh.

Tjá'j vitste Jesus caapiya'jni

5 ¹Nasa wala kuj casejte uyrra', Jesusa' tyajy tyjityjnisawe'shtyi tjá'tjec pe'jna u'j. Atsa' tyāawe'sha' tyajy tashte utyaate', ²na'wēc caapiya'jya' tacj:

Quim wechana fi'nzewa'jsatyqui
(Lc. 6.20-23)

³Wala yuj wecha yuja' Dyusa's peejyrra pacuesáa yacja', tyāa pa'gatey tyā'wē yūusa' Dyus jycaajna ūsnite u'caya' ājawa'jsata' naa pa'ga.

⁴Wala yuj wecha yuja' ewmeete fi'nzeni's jiyurra ū'nena Dyusa's yaacysa yacja', tyāa pa'gatey tyā'wē yūusa' Dyus cviisha'jni yuuwa'jsata' naa pa'ga.



(San Mateo 5.2)

⁵Wala yuj wecha yuja' wa'lmée Dyus tashte utyasáa yacja', tyāa pa'gately tyā'wē yūsá' naa quiwe jyuca tyāawe'sh jīrrarráa yuuna pa'jwa'jsa' naa pa'ga.

⁶Wala yuj wecha yuja' Dyus dyi'pte ew fi'nzewa'ja's yuurráa ūusuj jyuca yajcyrra pacuesáa yacja', tyāa pa'gately tyā'wē yūsaa'tyi' Dyusa' pu'chjina.

⁷Wala yuj wecha yuja' vitety peeygājna fi'nzesa yacja', tyāa pa'gately tyā'wē yūsá' Dyus peeygāanity fi'nze' naa pa'ga.

⁸Wala yuj wecha yuja' ūuste quīj pcala's yujva ca'ga'jmée fi'nzesa yacja', tyāa pa'gately tyā'wē yūsá' Dyusa's uyya' ājawa'jsata' naa pa'ga.

⁹Wala yuj wecha yuja' puimée fi'nzewa'ja's pacuesáa yacja', tyāa pa'gately tyā'wē yūsá' Dyus luuchta' naa pa'ga.

¹⁰Wala yuj wecha yuja' Dyus yacj fi'nzepa'ga yajtsena fi'nzesa yacja', tyāa pa'gately tyā'wē yūuni fi'nzerrava Dyus jycaajna ūsnite u'cawa'jsata' naa pa'ga.

¹¹I'cue'sha' wala yuj wechana mfi'nzewe, andyna nwēese'pja'garráa nasa' wēeshuna pcyuuna quījquijva ewmée nuywe'wetsteva. ¹²Tyāa pa'gately cielute' wala yuj jypa'gawa'j ji'pji'cue naa pa'ga. Dyus yuwe pta'shsa tyāniiteywe'shtyi tyā'wēty pcyuu na' āchjva tyā'wēyrráa yuutyna, nava ūusmée wechana mfi'nzewe.

Naa quiwete nenga na'wē pēetjajna eena' cweetjwa'jsa

(Mr. 9.50; Lc. 14.34-35)

¹³I'cue'sha' nenga na'wē naa quiwete pēetjewa'jsa i'cue. Nava nenga' shūucājrra', ¿ma'wē pēetjajecy? Quīj yūuwa'j yujva selpimeena, naasáa pujmbrra nasaa wacji'cji'jwa'jrráa yuuna.

¹⁴I'cue'sha' naa quiwete eena' cweetjsa i'cue. Teech chjamb tjā'j vitsga ūssa' ¿nasa uynimée ūsma'c? ¹⁵Lampara's apjrra tyajja' tyā'wē ya'pqui'ta'tsme', wejyva āatec ya'tyaja', yatte jyuca cweetjajna. ¹⁶Tyā'wēy i'cue'shva eena' mcweetjwe nasaa dyi'pte, cyaj i'cue'sh ew fi'nzeni's uyrra', Dyus ewsa ūsyuju'ga jīna we'wetyna i'cue'sh Tata cielute ūssa's.

Moises leya's Jesus āate caapiya'jni

¹⁷Moises ley vite' Dyus yuwe pta'shsawe'sh caapiya'jni tyāaty nwēese'jya'méene' yuwé' sūjna yaacynuwe andya's. Tyā'wē yūuya' yuwe'tsmeetj, wejyva tyāa leya's jytjaacue ew āate caapiyu'jya'tj yuwé'. ¹⁸Isatj pta'shi', cielu pety quiwe yā'jrra scjēwpcach tyāa leytyi' le'chcuerráa yujva e'scjē nvijtmée jyuca nwēese'jwa'tja'. ¹⁹Tyāa pa'ga maava tyāa ley jycaajnity wala le'chcuēesa quijteva selpiwaljmeesa na'wē tjengte tyāaty' nvijtrra, nasatyva tyā'wē yūuya' ūírráa caapiya'jana na', tyā'wē yūsá' Dyus jycaajna ūsnite le'chcuerráa seelpisa' jīni yuuna. Nava tyāa leytyi' le'chcuerráa yujva nvijtmée jyuca nwēese'jrra vitetyva tyā'wēy nwēese'jya' caapiya'jsa', Dyus jycaajna ūsnite wala seelpisa' jīni yuuna. ²⁰Na'j'i'tj na': i'cue'sha' caapiya'jsawe'sh vite' fariseowe'sh fi'nzenite jytjaacue ew fi'nzemeerra', bagachte yujva Dyus jycaajna ūsnite u'caya' ājameene'cue.

Üuschawa'jme'
(Lc. 12.57-59)

²¹I'cue'sh yatsgawe'shtyi na'jîna caapiya'jni's iiwêse'jne'cue: Nasa icjwa'jme'. Tyä'wême', nasa icjsatyi's maatyva castigäywa'j yuuna jî'ty. ²²Nava andya' na'wê'tj jycaaja': Nasa yu's icjmeerrava, peecy yacjtjê'ja's üuscha yaacypa'garráa tyāava yuuwesa castigäywa'j yuuna. Meerrava peecy yacjtjê'ja's vāa atsewe'wena atsa' tyā'sa' cjuēswe'sh tashte jyūna u'jni yuuna. Sa' peecy yacjtjê'ja's wēeshute', tyā'sa' castigo infiernote acjwa'j yuuna. ²³Tyā'wê Dyusna peeswa'j ofrenda's jyūna pa'jrra altalte acjme'y yaaquív'nga iindy yacjtjê'j indya's atseni's, ²⁴sa' tyāa ofrenda's altal pucate nvijtna'va u'juene'nga iindy yacjtjê'ja's perdon pējyja'. Tyā'wê yūurra tyāa ofrenda's altalte acjene'nga.

²⁵Maava indya's atsesa pāatyjî'cjrra cjuēs tashna jyūna u'juetste', cjuēs tashte pa'jme'y dyi'cja mpuutywe'we cjuēs tashte jyūna u'cjamen. Tyā'wême' cjuēsa' policiawe'shtyi ducjte', tyāawe'sha' carcelte tyajatyna. ²⁶Andya' isatj we'we', tyājüyā'ja' casejya' ājameene'nga vvyu nmej jî'pjuni's ducjmeerra yu'.

Ptamsa vite yacj pcal yuuwa'jme'

²⁷I'cue'sha' iiwêse'jne'cue na'jîna nyafiitey caapiya'jni's: Ptamsayā'ja' vite yacj pcal yuuwa'jme' jîni's. ²⁸Nava andya' na'wê'tj jycaaja': Vite yacj yu' pcal yuumeerrava, teech u'ya's ewmēe yajcyrra tjengni yacjrrāa, pcal yā'cj yu' tyajy üuste.

²⁹Yafya' indya's pcalte cweete'pjchāj yuutste', cutyi'jrra mwāataj. Wejyva teech yafyrrā's iviiturra', cacue jyuca yu' infiernote acjni yuunimēe wejy ewa'. ³⁰Meerra' patsu cuse tyā'wê pcalte cweete'pjchāj yuutste', spē'tjrra mwāataj. Wejyva teech cuserrā's iviiturra', cacue jyuca yu' infiernote acjni yuunimēe wejy ewa'.

Ptamusa' tyuteewa'jme'
(Mt. 19.9; Mr. 10.11-12; Lc. 16.18)

³¹Tyā'wēy nyafiitey na'jîna pta'shni'sva iiwêse'jne'cue: Maava nyu yacj tyuteetsrra', tyāa tyuteni's etste fil'jrra nviitwa'ja' jînaty caapiya'ja'. ³²Nava andya' na'wê'tj jycaaja': Nyua' vite yacj pcal yūuterrāa nmi'a' tyuteeya' ājana. Tyā'wême', pcal yūusameete peecyrrāa nmi'a' tyuteerra', vite yacj pcalte weteewa'ja's dyl'j pjaandesa yuuna. Tyāa pa'ga maa pitstjê'jva tyāa u'y nviitnisa yacj ptamuurra', tyāava pcaltec wetesá yuuna pa'ja'.

Jurāywa'jme'

³³I'cue'sh yatsgawe'shtyi na'wê caapiya'jni'sva iiwêse'jne'cue: Dyus yase's cysusrra jurāyni's īshiimēe cytey yuuwa'ja' jî'ty. ³⁴Nava andya' na'wê'tj jycaaja': Cytey yuune'jmeerra', ma'wēsarrāa yujtyva cysusna jurāywa'jme'. Cielu's cysusna jurāynuwe, tyā' Dyus jycaajna üsni' naa pa'ga. ³⁵Sa' quiwe'sva cysusna jurāynuwe, tyāa quiwe' dyuus chinda tyaaajwa'j vitnisa' naa pa'ga. Sa'

Jerusalennava cysusna jurāynuwe, tyāa chjamba' jycaajsa chjamba' naa pa'ga.
³⁶Sa' peecy dyictje's cysusnava jurāynuwe, tyāa pa'gatey indya' quijte yujva
 seelpimeesang Dyus dyi'pte naa pa'ga. Tyāasa teeche dycjasrrāa yujnava chijme vit-
 ya' ājawa'jsameeng, sa' cūchva vit-ya' ājameene'nga. ³⁷Jurāywa'j peejyme', isasa's
 teeche jwendrrāa mwe'wewe, jīrra' jii īitj jīna, jīimeerra' jīimeetj jīna. Tyā'wēme',
 īshiina we'wenisa' echtjēj cwe'we'jni'.

Iindeewewa'jme'

(Lc. 6.29-30)

³⁸I'cue'sha' iiwēse'jne'cue na'jīna nyafiitey caapiya'jni's: Iindy yafya's cpā'vitte',
 ca'tuva tyā'wēy myūu. Sa' iindy quij'tja's chcajndete', ca'tuva tyā'wēy myūu jī'ty.
³⁹Nava andya' na'wētj jycaaja': Indyna ewmēe yūusa's ca'tuja' iindeewenu.
 Tyā'wē yūumēe, iindy dyi'pga pejtyate', ca'tu ju'nguwe'shnava petyacajn mes.
⁴⁰Meerrava indya's pāatyji'cjrra iindy cmiisa's cusa'jatste', jycaatsni atynava
 mes jyūna u'cjan. ⁴¹Teeche ta'ngute pa'j tu'srra nvijt-ya' u'jwa'ja's jycaatje', e'nz
 ta'ngute pa'j nvijt-ya' me'j. ⁴²Maava quijrrāava indya's tjāaste', mes. Sa' pqui'tje',
 wa'lwa'jme' jī'pjrra'.

Atsesaty peeygāawa'ja'

(Lc. 6.27-28, 32-36)

⁴³Nyafiitey na'jīna caapiya'jni'sva iiwēse'jne'cue: Nasaty'i mpeeygāj, nava
 atsesa yuuty'i peeygāanu jī'ty. ⁴⁴Nava andya' na'wētj jycaaja': I'cue'shtyi
 atsesaty'i mpeeygājwe, sa' cysewna ewmēe we'wesaty'i ca'tu' ewrrāa
 mwe'wewe. Atsesaty'i ew yūuna mfi'nzewe. Wēeshuna pcyuusaty'i tyāawe'sh
 pa'gate Dyusa's mneewe'wewe nwe'wecajn. ⁴⁵Tyā'wē yūurrarrāa i'cue'sh Tata
 cielute ūssa luuchrra tyā'wē yuune'cue. Tyā' maa nasatyva seca's caacweetje'je',
 ewsa ma'c yuu meerra' ewmeesa ma'c yuu nava jyucaysaty. Sa' tyā'wēy nusnava
 caja'c, ew yūusa ma'c yuu meerra' ewmēe yūusa ma'c yuu nava jyucaysaty.
⁴⁶Tyā'wē i'cue'shtyi peeygāasarrāaty ca'tuva peeygājrra', ew yūusatja'w jī'ya'
 ājama'cue? Macue nasa ewmeesa gobierno jīi vyu pcjacysawe'shva tyā'wē
 yūuwa'jrrāa yu'sa' āja'ty atsa'. ⁴⁷I'cue'sh yacjtjē'jwe'shrrāaty wechate', ¿quij ew
 yūuni yaasena? Tyā'wē yūuwa'j yu'sa' Dyusna jīimeesava cyteytyi yū'. ⁴⁸I'cue'sh
 Tata cielute ūssa' maa yacjva jyuca ewsa' naa pa'ga i'cue'shva tyā'wēy mfi'nzewe.

Jypa'yacy ew yūuwa'ja'

6 ¹I'cue'sh ew yūuni's nasa uyrra ew we'we jytjāasrra mjīini's wala
 mpa'yajcywe. Tyā'wē ew we'we jytjāasrrarrāa ew yūuna fi'nzete', iindy
 Tata cielute ūssa' quij yujva dewemeena. ²Tyāa pa'ga peejysaty quijrrāava
 peesu'tsrra', nasa uycajn sūjrra nasa cshavyte tyā'wē yūunu. Ātterrāa ew
 we'wesawe'shrrāaty tyā'wē yū' judiuwe'sh pcjaacjeni yat-su vite' cllicjunsu,
 nasa' uyrra' ew yuj yū'c jīna tuutje'j jytjāasrraty tyāawe'sha' tyā'wē yū'. Nava
 andya' isatj we'we: Tyā'wē yūurra', nasaa pwe'sh tuutje'jnirrāaty fi'nze'.

³Nava peejsaty quijrráava peesu'tsrra', quim yujva jiyunimeete paatste tyā'wē myūu. ⁴Atsa' paatste tyā'wē yūutste iindy Tata uyrra', indya's deweena.

Dyus yacj na'wē puuty we'wewa'ja'

(Lc. 11.2-4)

⁵I'cue'sha' Dyus yacj puuty we'wetsrra', āatterráa ew we'wesawe'sh na'wē yūunuwe. Tyāawe'sha' judiwe'sh pcjaacjeni yat-su vite' clliicjunsu yujurraty Dyus yacj puuty we'wena pecūju' nasa uycajn sūjrra. Isatj we'we', tyā'wē yūurra' nasaa tuutje'jnirráaty fi'nze'. ⁶Nava indya' Dyus yacj puuty we'wetsrra', yat dyiite u'carra vitya's apjrra quim yujva uynimeete mpuutywe'we. Atsa' tyā'wē paatste puuty we'wete', iindy Tata cielute ūssa' deweena.

⁷Dyus yacj puuty we'wetsrra', lllisasáa na'wē tyā'snaífirráa cuj us peenana ūswa'jme'. Dyusa's jiimeesarráaty tyā'wē yū', wala we'wete', Dyusa' wēse'jena sūjrra. ⁸Tyāawe'sh na'wēy yūunuwe. Tyā'wē yūumeeteva, i'cue'sh Tata' jiiyā'ja' i'cue'sh peejini's pējyumeyna. ⁹Tyāa pa'ga i'cue'sha' na'wērráa Dyus yacj puuty we'wena na'jine'cue:

Cue'sh Tata cielute ūssa

Indya' bagachteva jytujtje nes yuune'nga.

¹⁰Iindy jycaajwa'j ena'srráatja'w ūytjasu',

Naa quiwete indy ma'wēne'nga jytjáasu' tyā'snarráa cytey tee yuu cielute na'wēy.

¹¹Cue'sh ū'wa'j een isa peejini's meen pees.

¹²Cue'sh ewmée yūuni's meen peltunaī, cue'shva ma'wēta'w peltunāy cue'shtyi ewmée yūusaty tyā'wēy.

¹³Ewmeete wetecajmén, meen nwe'we.

Tyāa pa'gatey indy yuurráa quijteva jyuca ājawa'jsang, sa' bagachteva indy yuurráa jycaajna nes yuuwa'jsang.

¹⁴Tyā'wē i'cue'shva ewmée yūusaty peltunāyte', i'cue'sh Tata cielute ūssava peltunaīna i'cue'shtyi. ¹⁵Nava ewmée yūusaty peltunaīmeete', i'cue'sh Tatava peltunaīmeena i'cue'shtyi.

Dyus yacj puuty we'weya' yūunani's caapiya'jni

¹⁶I'cue'sha' yūunatsrra', maa nasava uycajn sūjrra āate caavya'ja'jwa'jme'. Āatterráa ewtja'w jisarráaty tyā'wē yū' nasa jiyucajn. Isatj we'we': Tyā'wē yūurra' nasaa tuutje'jnirráaty fi'nze'. ¹⁷Nava indy tyā'wē yūunatsrra', dyl'pna pchjī'chrra dycjasnava ew mquind, ¹⁸cyaj indy yūunani's āate caavya'ja'jmeete', nasa jiyumeetyna, naasáa iindy Tata yuurráa jiyurra indya's deweena.

Cielute ji'pjuwa'jrrá's mpa'pchuwe

(Lc. 12.33-34)

¹⁹Naa quiwete quijquijva ji'pjuwa'ja's pa'pchunuwe. Tyā'wēme', wes ū'we'ty, atsa' inzva suwu'ty. Naapcachja' peswé' pa'jrra ji'pjuni's cutyi'ji'ty.

²⁰ Wejyva cielute ji'pjuwa'jrrá's wala mpa'pchuwe. Cyteea' wesva ũ'meena, atsa' inzva suwmeena, pesweeva cutyi'l'meena. ²¹ Tyāa pa'gatey mtee jyaawni ji'pjrra', cyte yuurráac wejy jytjaacue yajcyna ya'fi'nze'.

Yafya' cacue's ewte caafi'nze'jsata'

(Lc. 11.34-36)

²² Yafya' cacue's ewte caafi'nze'jsata'. Tyā'wē iindy yafya' ewsarrá's tjengsate', iindy cacue' ewte shiingmée fi'nzena. ²³ Nava iindy yafya' ewmeesarrá's tjengsate', iindy cacue' jyua ewmeete chji'ndyterráa fi'nzena. Tyā'wē eena'te ew caafi'nze'jwa'jsa yuu ewmeete chji'ndytewe'sha'srráa tjengsate', bagachte yujva eena'te fi'nzewa'ja's ya'ji'pjumeena.

Dyusna yajcyna vite' naa quiwete ji'pjuni'sva yajcyna fi'nzeni

(Lc. 16.13)

²⁴ Quim yujva e'nz patrontyi selpiiya' ajameena. Tyā'wē viterrá's wendyna fi'nzerra', vite patron yu'sa' atsena. Sa' teeche jycajnirrá's cytey yuurra', vite patron jycajni yu'sa' cytey yuuya' ajameena. Tyā'wēy naa quiwete ji'pjuni's pa'pchuna Dyusnava selpiina yuuya' ya'aja'tsme'.

Cue'sh peejini's Dyusa' jyua pu'chjina

(Lc. 12.22-31)

²⁵ Na'wētj yu'cypeje': I'cue'sha' quij yujva cuj yajcymée mfi'nzewe, ¿quij ũ'wecytja'w? sa' ¿quij atjecytja'w? sūjna. Tyāa pa'gatey ũ'nisate jytjaacue peejysa ityi fi'nzeni's ji'pjyā'ji'cue, sa' atjnisate jytjaacue peejysa cacue'sva ji'pjyā'ji'cue naa pa'ga. ²⁶ Mtjengwe ēesu fyuusa vichacuety. Tyāawe'sha' uja'tsmeeta', sa' ũ' pcjacje'tsvameeta', sa' tee jwendte jyaawu'tsvameeta'. Tyā'wēteva i'cue'sh Tata cielute ũssa' tyāa vichacuetyi' peejymeec sā'ji'. I'cue'sha' tyāa vichacuate jytjaacue pa'gasa i'cue, atsa' wejy tyā'wē sā'jina. ²⁷ Tyā'wē wala pa'pchurra' ¿i'cue'sh maarrá' peena medio metro tjaacue walaaya' aja'cue'?

²⁸ ¿Quijya'rráacue tyacue pa'pchu' i'cue'sh atjwalj roparrá's? Mtjengwe quite tashtyi. Tyāawe'sha' mji'tsmeeta', sa' cjasva pundu'tsmeeta', nava ma'wēta zhichcue walá'. ²⁹ Na'ji'tj na': Jycajsa Salomon yujva tyāa quite tash na'wē yu' zhichcue iijyūme' macue wala ji'pjsarrava. ³⁰ Tyā'wē quite tasha' achji' yu' zhichcue ũsrrava, cuscusa' ipyte cambwal'jrráac yu', nava tyā'wēsa'sva Dyusa' wala zhichcue pjeu'ju'c na' i'cue'shtyi' wejy tjaacue ew pjeu'juna. Tyāa sūjya' aja'tsmeene'cue. ³¹ Tyāa pa'ga i'cue'sha' quij yujva cuj yajcymée mfi'nzewe, ¿quij ũ'wecytja'w? sa' ¿quij atjecytja'w? sūjna. ³² Dyusna jiimeesarráaty tyā'wē cuj yajcyna fi'nze'. Nava i'cue'sha' cielute Tata ji'pji'cue tyā' jyua jiia' i'cue'sh peejini's. ³³ Tyāa pa'ga i'cue'sha' Dyus yacj fi'nzewa'ja's cjuē'y wejy tjaacue mpa'pchuwe, tyajūyā'ja' quijva tjēymée vyaana. ³⁴ Achja' jiyui'cue na' cuscuscjēwe'sha's ũytjasna pa'pchunuwe. Tyā'wēme', cuscuscjē' pa'pchuwalj tjaacue tjēysa paljana een isa fiyfiysa.

Jiimeerra' nuywe'wewa'jme'*(Lc. 6.37-38, 41-42)*

7 ¹Ma'wēsateva jiimeerra', ewmeesata' jīna nuywe'wewa'jme', Dyus dyl'pte i'cue'shva ewmeesa yuuya'mée. ²Tyā'wēme', vitesaty nuywe'wete', Dyusa' i'cue'shtyiva ewmeesata' jīra castigaīna nuywe'wepa'ga. I'cue'sh ma'wē juuna' yūute', Dyusva tyā'wēyrrāa juuna' castigaīna. ³Lindy yacjtjē'j yafyte cytā' le'chcuēesa cjeerra ūste ŷma'wē uyuqui'ng iindy yafyte yu' fytū pe'la yuu walasa cjeerra ūste tyā's cjuē'y cutyi'jmeerra'? ⁴Sa' ŷma'wē iindy yacjtjē'ja's cytā' le'chcuēesa iindy yafyte ji'pjngu tyā'sa' cutyi'jitj jīna we'wequi'ng, tyā'wē iindy yafyte yu' fytū pe'la walasa's ji'pjrra'? ⁵Āacjerrāa ew we'wena u'jusa, iindy yafyte fytū pe'la walasa's cjuē'y mcutyij'. Tyā'wē yūurra iindy yacjtjē'j yafyte cytā' le'chcuēsa's ew uyrra cutyi'jya' ājane'nga.

⁶Dyus yuwe's alcuty ūswa'jme', sa' cuchityva ūswa'jme'. Tyā'wēme', jyuca wa'cji'cji'jrra ūsachayā'jrra', ūssa i'cue'shtyi fīrrāa wa'cyya' cūjutyna.

Dyusa's pēyni vityte tu'cacana*(Lc. 11.9-13; 6.31)*

⁷Dyusa's mpējywe, atsa' ūsuna, sa' pacuerra', uyuune'cue. Vityte mtu'cacawe, atsa' pjaandena. ⁸Tyā'wē maava pēysa' jypa'gana, atsa' pacuesá' uyuuna. Vityte tu'cacate', pjaandeni yuuna.

⁹I'cue'sh pwe'sh maarra' i'cue'sh luuch pan tjāaste', ŷcueta's ūsma'cue? ¹⁰Meerra' wendy tjāaste', ŷula's ūsma'cue? ¹¹I'cue'sha' Dyus dyl'pte ewmeesarrava, i'cue'sh luuchtyi' ewsarrāa i'cue peesu', atsa' i'cue'sh Tata cielute ūssa' wejy tjaacue ewsa's peesuna tjāassatyi'.

¹²Bagachteva i'cue'shtyi maa nasava ewrrāa yūuna fi'nze jytjāasrra', i'cue'shva tyā'wēy maa nasatyva ewrrāa yūuna mfi'nzewe. Tyāa pa'gatey Moises ley vite' Dyus yuwe pta'shsawe'sh fi'jniva tyā'wērrarrāaty jycaaja'.

Vity pteenzsa*(Lc. 13.24)*

¹³Vity pteenzte me'cawe. Tyā'wēme', vituwa'tje u'cawa'j vitya' wala tape', atsa' dyl'jva tyā'wēy tape'. Cyteea' wala cujsa u'cana ūsta'.

¹⁴Naapcachja' vitumée Dyus tashte pa'jwa'j vitya' pteenza', atsa' dyl'jva tyā'wēy pteenza'. Cytee yu' cujmeerrāa u'cana ūsta'.

Nasa ma'wē yuutsteva mpa'yajcywe jiyuya'*(Lc. 6.43-44)*

¹⁵Dyus jycaajnisatja'w jīna īshiisatyi' mpa'yajcywe. Tyāawe'sha' i'cue'sh tashte yu' piishāa cacue yacjtyi vya', nava ūuste yu' yu'cj ech weeswée na'wēsata'.

¹⁶I'cue'sha' tyāawe'sh fi'nzeni's jiyune'cue. Miiyajcywe: Uva's tsjütsj tashte ya'unde'tsme', sa' breva's cjāas tashte ya'unde'tsme'. ¹⁷Tyā'wē fytūu tash ewsa'

ewsarráac yĩnu!, atsa! fytũu tash ewmeesa' ewmeesaíírráac yĩnu!. ¹⁸Fytũu tash ewsa' ù' ewmeesa's yũnya' ājameena. Tyā'wēy fytũu tash ewmeesa' ù' ewsa's yũnya' ājameena. ¹⁹Maa fytũu tashva ewmēe yũnsa's spē'tjrra ipyte ya'cambu'c. ²⁰Tyāa pa'ga tyāawe'sh fi'nzeni's uyrra jiyune'cue ma'wēsateva.

Jyucaysa yu' cielute u'cameetyna
(Lc. 13.25-27)

²¹Yuwejurráa andya's ew we'wesa jyuca yu' cielute Dyus jycaajna ūsnite u'cawa'jsameeta', naasáa andy Tata jytjāasni's cytey yuusarráa cielute u'cawa'jsata'. ²²Tyāasa cielute u'cawa'j en ājte', wala yuj maava andya's na'jĩtyna: Cue'shtyi jype'jsa mwēese'j: Cue'sha' iindy yuwe's pta'shtja'w, sa' iindy yase's cysusrra echtjē'jtyva cutyi'tja'w, sa' quim yujva ājanimeesa'sva caavya'ja'tja'w manz usva jĩtyna. ²³Nava andya' na'jĩna pasu'nja: Bagachte yujva andy jype'jnisa yu'tsmeei'cue, naa pa'ga i'cue'shtyi' jiimeetj. Ewmēe yũuna fi'nzesa' andy tashtewe'sh mee'cue.

Dyusa's nwēese'jsa vite' Dyusa's nwēese'jsamée
(Lc. 6.47-49; Mr. 1.22)

²⁴Maava andy jycaajni's wēse'jrra cytey yuusa', yat tyajya' jiisa na'wēsa yuuna: Tyāa yata's cuette caachinda'jrra tyajte', ²⁵nus pa'jna, wejya wala quiitena, yu' walaana yuurrava, yata's suwme', cuette caachinda'jrra tyaaajnipa'ga. ²⁶Nava maava andy jycaajni's wēse'jrra cytey yuusame', yat tyajya' jiimeesa na'wēsa yuuna: Tyāa yata's cuetmuseterráa tyajte', ²⁷nus pa'jna, wejya wala quiitena, yu' walaana yuute', tyāa yata' weterra jyuca suweec jĩc.

²⁸Tyājũ Jesus we'wena jyā'tje', nasa' wala cuj yajcyna neeyũuty tyajy caapiya'jni's wēse'jrra, ²⁹tyā'wē leya's caapiya'jsawe'sh na'wēmēe, nwēese'jwa'ja's ūucjnus we'wena caapiya'pja'ga.

Teech pitstjē'j wā'jy weete ātsa'sa's Jesus nuycatyjini
(Mr. 1.40-45; Lc. 5.12-16)

8 ¹Jesusa' tjā'j vitsu quĩjte', nasa iiméj wala cuj pcjaacjety. ²Atsa' teech pitstjē'j wā'jy wee seena' canzhsate ātsa'sa Jesus tashte utyaarra peejyũcuerra na'jĩnac pytjaa we'we:

—Andya's peeygājrra' nuycatyjine'nga naa weeju jĩte', ³Jesusa' na'jĩnac cuseju jya'ndy:

—Ajtsemée peeygāanisang, naa pa'ga catyjirra mneeyũu jĩtspcachja', tyāa wā'jy weeju catyjirrac neeyũu. ⁴Atsa' Jesusa' na'wēc jycaaj:

—Maa yujtyva pta'shmeene'nga, naasáa sacerdote yuurráana iindy cacue's tywesya' me'j. Sa' Moises ma'wēga jycaaja' tyā'srráa cytey yuune'nga, cyaj nasa jyucaysa jiyutyna indy ew catyjirra neeyũuteva jĩc.

Soldau cpiitan jype'jnisa's Jesus nuycatyjini
(Lc. 7.1-10)

5Tyajū' Jesusa' Capernaum chjambte pa'tje', soldau cpiitan romanowe'sh utyaarra' pytjaa we'wec na'jīna:

6—Andy yatte jype'jnisa uuya' yā'j ūsa' ēseya' ājameerra jīte', Jesus pasrra':

7—Andya' u'jrra nuycatyji'nja jīc. 8Atsa' cpiitana' na'wēc pas:

—Andya' iindy dyl'pte quījte yujva seelpimeesatj. Tyāasatj andy yatte iindy pa'jīni's tjaame', naasāa chjāchjana jīna mwe'we atsrrāa andy jype'jnisa' catyjina. 9Andyva ma'wētca walasa jycaajnyti' nwēese'je', sa' andyna nwēese'jsa soldauwe'sh iijype'tj tyāawe'shtyi teeche'sa's me'j jīte', andy jycaajni's cytey yu'c. Sa' vite's pa'yate', tyāava cytey nwēese'je'c. Sa' andyna selpisa's quīj jycaatjeva cytey yu'c jīc.

10Tyā'wē we'weni's Jesusa' wēse'jrra', wala cuj yajcycu, sa' na'jīnac we'we tyāa yacj yuusatyi':

—Isatj we'we', Israelwe'sh jyucaysa mteewe'sh yujva tyā'wē andy we'weterrāa catyjina sūjsa yu' iuymeetj naa pitstjē'j na'wēsa yu'. 11Na'jī'tj na', judiu jī'jmeerrava wala yuj pa'jatyna sec cāanijūwe'sh vite' sec cjēenijūwe'sh majūwe'shva jyuca, sa' Abrahan, Isaac, Jacob tyāawe'sh yacj ū'ya' cachjiityna cielute Dyus jycaajna ūsnite. 12Naapcachja' cytee ūswa'lsata' jīnisa yu', cutyi'jrra chji'ndy walate acjni yuutyna. Cytee' seena' yuj pembeena qui'tjtyi csuusu'jutyna ūucjna jīc. 13Sa' Jesusa' qui' we'wec cpiitana's:

—Yatna me'j, atsa' indy ma'wēne'nga jytjāasu' tyā' cytey yuuna jītspcachja', tyāa cpiitan jype'jnisa' catyjinic yuu.

Pedro nyu njī'ja's Jesus nuycatyjini
(Mr. 1.29-31; Lc. 4.38-39)

14Tyajū' Jesusa' Pedro yatnac u'j, sa' cyteea' Pedro nyu njī'ja' cacuesecte uuya' ūstec uy. 15Atsa' cusete jya'ndycu, naapcachja' cacueseca' ūchjac. Tyajū' tyāa u'ya' quiittera selpiia' casejc. 16Sa' tyāa en jyuca chji'ndytste', Jesus tashte wala jyūna pa'jty ech iiyamunisaty. Atsa' tee dyl'j we'weni yacjrrāa tyāa echtyi' ūusuj cutyi'cj, sa' ātsa'sa jyucaysaty nuycatyjic. 17Nyafii Dyus yuwe pta'shsa Isaiasa' na'jīnac we'we:

Tyāa'ic cue'sh chjāchjamée fi'nzeni vite' cue'sh ātsa'na fi'nzeni's jyuca tyujnde jī'c tyā'jīni cytey yuucajnrrāac tyā'wē yūu.

Jesus yacj fi'nze wēesa
(Lc. 9.57-62)

18Tyā'wē nasa wala pcjaacjete', Jesusa' icj cuten u'jue'nja'w jīnac we'we. 19Tyā'jīte', ley caapiya'jsa teeche'sa Jesus tashte utyaarra', na'jīc:

—Indy yacj yuu wēetj indy mtee u'juetsteva jīte', 20Jesus pasrra':

—Yu'cj niimal yujva deewa'j cagy ji'pjta', tyā'wēy vichacueva yat ji'pjta'. Nava Dyus Nchi'c Nasa Yuusa' mtee yujva tyajy dyictjerráa yuja'sva cjcjwa'j ji'pjme'.

²¹ Naapcachja' Jesusna nwēese'jsa teechsa' na'jīnac we'we:

—Andya's mcaaj andy tata cjuē'yna pendaawa'j ji'pjtu jīte', ²² Jesus pasrra':

—Uusaawe'sha' peecy uusáa pwe'sh ya'pendaatyna. Atsa' indya' andy yacj tyutemée myuj jīc.

Marte wejya wala's Jesus cyuuju'jni

(Mr. 4.35-41; Lc. 8.22-25)

²³ Tyajū' Jesusa' barcote cjēec atsa' tyāa yacj u'jusawe'sha' pi'cyna u'jty.

²⁴ Tyā'wē icjite u'juetspcachja', wejyaa wala sējc, atsa' yu'tūchjasa' barco's apjya'vac yu'. Nava Jesusa' deenic yu'. ²⁵ Atsa' tyāa yacj u'jusawe'sha' fitytyi na'jīna:

—Cue'shtyi jype'jsa, meen nwe'we. Tyā'wēme', icj dyiicjē cjējetstja'w jīte', ²⁶ na'wēc pas:

—¿Quijya'cue tyacue wala ūucju'? ¿I'cue'sha' Dyusna yajcyya' yu' ew jiimeevá'cue? jīrra', quiitterra wejya vite' icj tyāaty we'wec, atsa' jyuca yujuc.

²⁷ Tyā'wē yūute', barcote u'jsawe'sha' wala cuj yajcyrra na'jīnaty we'we:

—Naa pitstjē'ja' ¿quimna atsqi'ity wejya icj tyā'wēsa yujva nwēese'je'? jī'ty.

Gadara quiwetewe'sh ech iiyamunisa

(Mr. 5.1-20; Lc. 8.26-39)

²⁸ Tyajū' Jesusa' icj cuteju Gadara quiwete pesatje', e'nz pitstjē'j uusáa pendani cagyju casejrra Jesus tashte utyaaty. Tyāa e'nzsa' ech iiyamunisaty yu', tyāasaty iiméj seena' weeswée yu', tyāa pa'ga tyāa dyl'jsu quim yujva scjēwya' aja'tsmeeta'. ²⁹ Tyāa ech iiyamunisa' na'jīnaty sus we'we:

—Dyus Nchi'c Jesus, cue'sh űuste űswa'j en ajmeyna, ¿ñuste acjya' yuwe'vá'nga? jī'ty.

³⁰ Cysū tjā'jsu cuchi wala űsu'ty apjna. ³¹ Atsa' tyāa echa' Jesusa's pytjaa we'wety:

—Cue'shtyi neeutsrra', tyāa cuchi űussu cjēeya' u'cjan mcaaj.

³² Tyā'jīte', Jesusa' cytey yuucaacj. Atsa' tyāa echa' nasa űusuj casejrra tyāa cuchi űustety cjēe. Tyā'wē yūute', tyāa cuchi' peñacjē pelurra icjcjē cjēerra jyuca uuty. ³³ Atsa' cysū cuchi tjengsa' űucjrra wuwuurráa chjambna u'jrra pta'shtyi quīj yūuni'sva jyuca. Sa' tyāa e'nz pitstjē'j ech iiyamunisawe'shtyi quīj yūuteva jyucaty pta'sh. ³⁴ Tyajū' chjambte nasa jyuca tjengya' u'jty Jesus űsnite. Sa' uyrra' Jesusa's tyāawe'sh quiweju casejna u'cjaajty.

Ėseya' ājasame's Jesus nuycatyjini

(Mr. 2.1-12; Lc. 5.17-26)

9 ¹ Tyajū' Jesusa' barcote cjēerra shawendrra tyajy chjambtey qui' pa'cj.

² Atsa' cyteea' teech pitstjē'j Ėseya' ājasame'styi yacjna pa'j. Tyā'wē yacjna pa'jsawe'sha' Jesusa' nuycatyjyujuna sūjni's jiyurra, ātsa'sa's na'wēc we'we Jesusa':

—Chjächja myajcy. Iindy pcala' peltunāyni yā'jty neeyūu jīte!, ³ley caapiya'lsawe'sh maafi yu' na'wēty yajcy: Naa pitstjē'ja' Dyusa's iiveech we'wena ājawa'jmeea'scu we'we' sūju'ty. ⁴Nava tyāawe'sh yaacyni's Jesus jiyurra', na'jīnac we'we:

—¿Quīj yuutecue tyā'wē ewmēe yaaqui'? ⁵¿Maa tjēymeesacy? Iindy pcala' peltunāyni yā'jty neeyūu ħjīniá'? Meerra': Quiiterra me'j ħjīniá'? ⁶Macue tjēysateva Dyus Nchi'c Nasa Yuusa' naa quiwete pcaltiyi peltunāyya' ājawa'jsa' naa pa'ga caajiyu'j ya'vatj āchja'.

Tyajū' ēseyā' ājasame's na'wēc we'we:

—Quiiterra, iindy deeni's tu'srra yatna me'j jīte!, ⁷tyāā ēseyā' ājasameea' quiitena'va u'cj tyajy yatna. ⁸Tyā'wē yūuni's nasa uyrra', ūucjtyi. Sa' Dyusna wechana tuutje'jty tyā'wē chjächjawa'ja's Dyusa' peesne' sūjrra.

Mateo's Jesus pa'yani
(Mr. 2.13-17; Lc. 5.27-32)

⁹Jesusa' tyajū u'jrra', teeche pitstjē'j Mateo yaasesa tyā'wē gobierno jīi vyu pcjacjna u'pte uyrra', na'wēc we'we:

—Andy yacj myuj jīna.

Atsa' Mateo' quiiterra Jesus yacj u'cj.

¹⁰Tyajū' Jesusa' ū'ya' yatte u'cac, atsa' gobierno jīi vyu pcjacjsawe'sh vite' pcalsawe'shva wala cuj u'caty vite' Jesus yacj u'jusawe'sh yā'jrra. ¹¹Atsa' tyā'wē yūuni's fariseowe'sh uyrra' pējytyi Jesus yacj u'jusawe'shtyi na'jīna:

—¿Ma'wērraga i'cue'shtyi caapiya'jsa' gobierno jīi vyu pcjacjsawe'sh vite' pcalsawe'sh yacj ū'wé'? ¹²jīni's Jesus wēse'jrra', na'wēc we'we:

—Yu'tse'jsa's jypeejymeeta' aca ji'pjmēe wēt ūssa', naasāā ātsa'sa yuurráa yu'tse'jsa's jypeejyta'. ¹³Mpiyawe Dyus librute na'wē fi'jni ūsa' tyā'sna: Tajcy icjrra Dyusa's wechana cambni yu'sa' jypeejymeetj. Andya' vitety peeygāanirrá'stju jytjāasu' jī'c. Andya' nasa ewsaty pacueya' quījmeetj, naasāā pcalsaty pacueya'rráatj quīj, cyaj ewmēe yūuna fi'nzeni's nvijtrra Dyus tashte shawenduutyna.

Yūunani's Jesusa's pēyni
(Mr. 2.18-22; Lc. 5.33-39)

¹⁴Tyajū' Juan Bautista yacj u'jusawe'sha' Jesus tashte utyaarra na'wēty pējy:

—¿Quīj yuupa'gatca'w cue'sh vite' fariseowe'sh tyacue wala yūuna', naapcachja' indy yacj u'jusawe'sh yu' yūuna'tsmeeta'? jīte!, ¹⁵Jesusa' na'wēc pas:

—Miiyajcywe: ħbodate pi'cynisa' ū'mēe űusna ūswa'jsatymañ novio' tyāawe'sh yacj nee ūsiite'? Naasāā novio's tyāawe'sh tashuj tyujndete yuurráa yūunaatyna.

¹⁶Ropa iishsate tela u'sesa yacj ya'pā'cje'tsme'. Tyā'wēme', tela u'sesa' jwee'irráac sunde' iishsa's, atsa' sutenisa' jwee'irráa wala suteena. ¹⁷Tyā'wēy beca u'se aajnisa's slun iishsate ya'awu'tsme'. Tyā'wēme', beca u'sesa slun



(San Mateo 9.9)

iishsa's sunde'c, atsa' beca yacj slun yacj e'nzfi vitu'ty. Tyaa pa'ga beca u'sesa's slun u'sesate awwa'ja'. Tyā'wē yu', maa yujva vitumeetyna.

Jairo niisa vite' Jesus atyjte jya'ndysa
(Mr. 5.21-43; Lc. 8.40-56)

¹⁸ Jesus tyā'wē we'wena ūspcachja', judiu pcjaacjenite npiitstjē'jsa' Jesus tashte peejyūcuerra na'wēc we'we:

—Andy niisa' uuyā'cj. Nava indy yujrra cuseju jya'ndyvatsa', ityi yuuna jīte',
¹⁹ Jesusa' quiitena'va tyāa yacj u'cj, tyāa yacj u'jusawe'sh yā'jrra. ²⁰ Tyā'wē u'juetspcachja', teech u'y doce añu cacue yu'te ātsa'na u'jusa Jesus e'ste paatste cūjrra, atyj vitste cpaajya'ndycu. ²¹ Atyj vitsterrāava jya'ndyvatsa', catyji'nja sūjrrac tyā'wē yūu. ²² Nava Jesusa' jiyurra tyāa u'ya's tjengrra na'wēc we'we:

—Ūucjnuwe, wejyva catyjini i'cue neeyũu, tyã'wẽ catyji'nja sũjrrane'cue tyã'wẽ yũu naa pa'ga jĩte', tyãa dundtey catyjirrac neeyũu.

²³Tyajũ' Jesusa' tyãa npiitstjẽ'jsa yatte pa'jrra uycu pendaatste ñusna tucawa'jsa músicu jyuca pjeu'jrra ũste. Atsa' nasa' ñusna wala ũ'nena ũste', ²⁴na'wẽc jycaaj:

—Ayjyu mcaasejwe. Luucha' uunime', deenirráa ũsa' jĩte', nasa' npeevyshijcaty. ²⁵Nava Jesusa' nasaty casejcaajrra dyiite u'cana'va, tyãa luucha's pu'quisutspcachja', quiitec. ²⁶Atsa' tyã'wẽ yũuni's tyãa quiwesu jyuca tuutje'jnic yuu.

E'nz pitstjẽ'j uyya' ājasameety Jesus nuycatyjini

²⁷Tyajũ' Jesus casejna u'juetste', uyya' ājasamée e'nztyi sus we'wena yuwẽ':

—David Nchi'c, cue'shtyi mpeeygāj jĩna.

²⁸Tyajũ' Jesusa' yatte u'cate', tyãa uyya' ājasameewe'sha' utyaana cūjty. Atsa' Jesusa' na'wẽc pējy:

—¿Uywa'ja's ũsuna sũju'cue' i'cue'sha'? jĩte', tyãawe'sh pasrra':

—Tyãa sũju'fitja'w jĩty. ²⁹Atsa' Jesusa' tyãawe'sh yafyte jya'ndycu na'jĩna:

—I'cue'sh jytjãasni' cytey yuuna jĩtspcachja', ³⁰tyãawe'sh yafya' ewuuty. Atsa' Jesusa' wala neewe'wec na'jĩna:

—Quim yujtyva pta'shmeene'cue jĩteva, ³¹tyajũ casejna' tyãa quiwesu jyuca pta'shtyi Jesus tyã'wẽ yũuni's.

We'weya' ājasame's Jesus nuycatyjini

³²Tyãawe'sh casejna u'juetspcachja', Jesus tashte vite pitstjẽ'j nuypa'jty, we'weya' ājasamée ech iiyamunisa's. ³³Atsa' Jesusa' tyãa echa's ũusuj cutyi'tje', tyãa pitstjẽ'ja' we'weya' ājac. Tyã'wẽ yũute', nasa' wala cuj yajcytyi na'jĩna:

—Israel quiwete bagachte yujva na'wẽsa yu' iuumeetja'w jĩ'ty. ³⁴Nava fariseowe'sh yu' na'wẽty we'we:

—Naa pitstjẽ'ja' echttyi nasa ũusuj cutyi'ji'c, nava echtjẽ'j pu'chterraac tyã'wẽ yũ' jĩ'ty.

Mjĩisa yu' cujmeeta'

³⁵Jesusa' chjamb wasu chjamb le'chcuesu judiuwe'sh pcjaacjeni yat iisa caapiya'jñac pecũju'. Sa' Dyus jycaajwa'ja'sva pta'shna vite' wee ma'wẽsate nasa ātsa'satyva nuycatyjina quĩ acatyva jyuca caycase'je'c. ³⁶Sa' Jesusa' tyãa nasaty tjengrra', tyãawe'shtyi peeygāj tyã'wẽ ñusna chjāchjameecuẽ piisháa namu ji'pjmee'sa na'wẽ ũspa'ga. ³⁷Sa' tyãa yacj u'jusawe'shtyi na'wẽc we'we:

—Isatj we'we', mjĩia' seena' wala', nava mjĩisa yu' cuj meeta'. ³⁸Tyãa pa'ga mjĩi namu's mpējywe mjĩiwa'jsa caacjan jĩc.

Doce nasa Jesus tyjityjni
(Mr. 3.13-19; Lc. 6.12-16)

10 ¹Tyajũ' Jesusa' tyāa yacj u'jusa docesaty pa'yarra na'wẽ yũuya' ājawa'ja'scu ũs: echtyi nasa ũusuj cutyil'jna quīj weete ātsa'satyva nuycatyjina, quīj aca ji'pjteva jyuca yu'tse'jya' ājawa'ja'scu ũs.

²Tyāa docesawe'sha' na'wẽty yaase yu': Nyafytewe'sha' Simoncu yu', tyā'sa' Pedro jĩ'ty. Vite' tyajy nyacj Andres. Vite' Zebedeo nchi'ctyi yu', Jacobo Juan pyacjsa. ³Vite' Felipe, Bartolomé, Tomás, vite' Mateo gobierno jii vvy pcjacjsa. Vite' Alfeo nchi'c Jacobo, vite' Lebeo tyā'snaírráa Tadeo jĩ'ty. ⁴Vite' Simoncu yu', cananista nasa. Vite' Judas Iscariote, Jesusa's atsesawe'sh cusete ducjwa'jsa.

Docesaty Dyus yuwe's pta'shya' caajni
(Mr. 6.7-13; Lc. 9.1-6)

⁵Tyāa yacj u'jusa docesaty Jesusa' na'wẽc neewe'werra caaj:

—Judiu jil'mée vite nasa quiwesu' u'jnuwe, sa' Samaria quiwesu chjamb ũstyna cysũva u'jnuwe, ⁶wejyva Israel jil'j piishacuẽ na'wẽ jypumbana ũsta' cysũrráa me'jwe. ⁷Sa' pta'shine'cue Dyus jycaajwa'j ena' ājyā'cj jina. ⁸Ātsa'satyva nuycatyjine'cue, uusaatyva qui' ĩtyi vitune'cue, wā'jy wee canzh jil'pjsatyva nuycatyjine'cue. Echtyiva nasaa ũusuj cutyil'jine'cue. I'cue'sh tyā'wẽ ājawa'ja's vyupa'gamée i'cue jypa'ga na', nuycatyjipa'ga vvy pějymeene'cue.

⁹Quīj vvy yujva jyũmée me'jwe. ¹⁰Ya'ja, spaatu, cjāambu tyāarráa yujtyva jyũmée me'jwe, naasáa tee ch cmiisarráa jyũrra me'jwe, tyāa pa'gatey mjĩisa' puutsni fi'nzewa'jsa'.

¹¹I'cue'sha' chjamb wala meerra' chjamb le'chcuesu mtee pa'jrrava, cytee paandejene'cue nasa ewsa tashsu, vite ajte u'jwa'j en ājpcach. ¹²Yatte pa'jrra, ewrráa we'wena wechana pa'jane'cue. ¹³Tyāa yatte nasa ew jypa'gate', Dyus yacj wechana fi'nzewa'ja's pta'shine'cue. Nava tyā'wẽ yũumeete', pta'shmeene'cue. ¹⁴Sa' i'cue'shtyi jypa'gamée, pta'shni'sva wẽse'jya' wa'lte', yatte ma'c yuu meerra' chjambte ma'c yuu nava tyajũ casejetsrra', i'cue'sh chindate quiwe tujnda's sacueecuerra casejene'cue cyaj yuuwesa yuutyna. ¹⁵Isatj we'we', Dyus castigāywa'j en ājte', tyā'wẽ yũusa nasa' seena' yuj ya'castigaĩtyna, Sodoma Gomorra chjambsu nasate jytjaacue.

I'cue'shtyi atsewa'j en pa'jana

¹⁶Mwēese'jwe, andya' i'cue'shtyi piishacuẽ na'wẽ cajatstju yu'cj ech cshavysu. Atsa' i'cue'sha' icjwe'shte ul na'wẽ jypa'yacy mfi'nzewe, nava iindeewewa'j yu'sa' jil'pjímée tumb chijme na'wẽ myuuwe. ¹⁷Mpa'yajcywe, tyā'wẽme' nasa' i'cue'shtyi uwerra cjuẽswe'sh tashte ducjetyna, sa' judiuwe'sh pcjaacjeni yat-suva pāpatyna. ¹⁸Cysũrráa cuutya'jmée ne'jue'sh tashsu vite' jycaajsa tashte yujva pe'jna ul'jni yuune'cue, andy yuwe's pta'shpa'ga. Tyā'wẽ yũuteva, cysũva tyāawe'sh dyil'pte

tuutjel'jeírráa ne'cue andya's vite! judiu jil'jmeesa dyi'pteve. ¹⁹Tyā'wē cjuēswe'sh tashsu cuutya'tje!, cuj yaacynuwe, āchja' ħma'wē pasucytja'w? sūjna. Tyāa pa'gatey tyā'wē yūutspcachja!, Dyusa! i'cue'shtyi caaūusutje'jena ma'wē paswa'ja'sva. ²⁰I'cue'sh ūus yaacyniju we'wemeene'cue; Dyus Espiritu i'cue'shtyi cwe'we'jena.

²¹Peecy nwe'shírráa tyāawe'sh nyacjtyi ajtserra quicje'jetyna. Atsa! neywe'sha! peecy nchi'ctyi ajtserra quicje'jetyna, naapcachja' nchi'cwe'sha! neywe'shtyi ajtserra quicje'jetyna. ²²Andyna nwēese'pja'ga naa quiwete nasa jyucay i'cue'shtyi atsetyna. Tyā'wēteva, ūucjmée chjāchja uu entepcach fi'nzesa! tyāawe'sh ūusa! Dyus nwe'weni yuutyna. ²³Tyā'wē ajtserra icjya! pacueetspcachja!, tyāa chjambuj casejrra vite ajte me'jwe. Isatj we'we!, i'cue'sh tyā'wē Israelwe'sh chjambu jyuca pecūjmeyna, Dyus Nchi'c Nasa Yuusa! quíjjana.

²⁴Piyasa! maa yujva caapiya'jsate jytjaacueemeeta!. Tyā'wē selpisa! patronte jytjaacuesame!. ²⁵Caapiya'jsa ma'wē pcyuuni yuute!, piyasaava tyā'wēy űuswa'ja's jypa'gawa'jsata!. Atsa! selpisaava patron ma'wē pcyuuni yuute!, tyāava tyā'wēy űuswa'ja's jypa'gawa'jsa!. Yat namu's Echtjē'j jina cysusrra!, tyajy jype'jnisa yuutyi! wejy tyā'jina we'wetyna.

Quimna wejy ūucjwa'jcy

(Lc. 12.2-9)

²⁶Tyā'wē yūuteva, nasatyi! ūucjnuwe. Andy we'weni! quíj yujva tyā'wē paatste yu! neeyūuwa'jsame!, sa! quíj yujva tyā'wē sūtjrra jiyunimée yu! neeyūumeena.

²⁷Andya! i'cue'shrráatytyu we'we!, nava tyāa we'weni's nasa ma'wēsatyva jyuca āate mwe'wewe. Sa! naa ja'ndate ayterrāa we'weni's msuuva jyuca mwe'wewe.

²⁸Cacuerrá's icjsa's ūucjwa'jme!. Tyāawe'sha! ūus yu'sa! icjya! ājameetyna.

Wejyva cacue pety ūus yā'jrra infiernote caajya! ājawa'jsa's wejy ūucjwa'ja!.

²⁹E'nz vichacuety teech centavote ħtyweyu'tsyujmeetyna! vacy? Tyā'wē pa'gameecuesarrava, maa yujva quiwecjē wete'tsmeeta!, i'cue'sh Tata! tyā'wē jytjāasmeete yu!. ³⁰I'cue'sh dyictjete dycjas yujva jyuca isani ūsta!.

³¹Ūucjnuwe, i'cue'sha! tyāa vichacuete jytjaacue pa'gasai'cue.

³²Maava ūucjmée andy ju'ngu we'wesatyi!, andyva andy Tata cielute ūsa! tyajy tashte tyāawe'sh ju'ngu we'we'nja. ³³Nava maava nasaty ūucjrra andya's jiimeetj jina íshijana tyā'sa! andyva tyā'wēyrrāa jiimeetj jina we'we'nja andy Tata cielute ūsa! tyajy tashte.

Jesusa! nasaty caapi'jsa na'wē yuuni

(Lc. 12.51-53; 14.26-27)

³⁴Naa quiwete yajtsemée fi'nzewa'ja's nvijt-ya! quíjmeetj, űuste yajtsena fi'nzewa'ja's nvijt-ya'tj quíj. ³⁵Andyna nwēese'pja'garrāa neya! nchi'ca's atsena, naapcachja! njí'ja! niisa's atsena, atsa! suegra! ncuēmyu's atsena.

³⁶Tyā'wē andyna nwēese'pja'ga peecy yattewe'shírráa yaatseni fi'nzetyna.

³⁷Maava andy yu's yajcymée naasáa ney vite! njí'j tyāawe'shrráaty jytjaacue yaacysa!, andya's selpiia! ājameetyna. Tyā'wēy maava andy yu's yajcymée naasáa

nchi'c vite' niisa tyāawe'shrráaty jytjaacue yaacysa' andya's selpiia' ājameetyna.
³⁸Macue tjēysa uuwa'lma'c pal' nava tyāaty' yajcymée fi'nzesame' andy tashte
 selpiia' ājameena. ³⁹Naa quiwete peecy ityi fi'nzewa'ljrrá's ya'nwe'wesa', cielute
 fi'nzewa'l' tjaacue ewsa yu'sa' iviituna. Naapcachja' andyna nwēese'pja'ga naa
 quiwete ityi fi'nzeni's yajcymée iviitusa' cielute ityi fi'nzewa'l' yu'sa' iviitumeena.

Dyus peesni's jypa'gawa'jsa

(Mr. 9.41)

⁴⁰Maava i'cue'shtyi wa'lmée jypa'gasa', andynava jypa'gasarra tyā'wē
 yuuna. Sa' andyna jypa'garra', andyna jycaajsanava jypa'gasa yuuna.
⁴¹Dyus yuwe pta'shsa tyāawe'sha' Dyus jycaajnisata', atsa' maava
 tyāawe'shtyi wa'lmée ew jypa'gasa', Dyus peesni's jypa'gawa'jsata',
 Dyus yuwe pta'shsaty peesni's írráa. Sa' nasa ewsaty jypa'gasa' ewsarra
 tyā'wē yuuna, sa' nasa ewsaty dewenisa's írráa jypa'gana. ⁴²Isatj we'we':
 Andyna nwēese'jsa macue wala ājmeecuesateva tyā'sna yu'finzerráava
 yussa' dewenisa yuuna.

Juan Bautista yuwee caajnis

(Lc. 7.18-35)

11 ¹Jesusa' ma'wē yūuwa'ja'sva tyāa yacj u'jusa docesaty pta'shna
 jyā'ljrra', tyajū casejna u'cj tyāa quiwesu chjamb le'chcuesu
 caapiya'l'ja'. ²Atsa' Jesus tyā'wē yūuni's Juan Bautista cyuupjni ūsra
 jiyurra', tyajy jype'l'nisaty Jesus tashna caacj ³na'l'jina pējyya':

—Cristo naa quiwete quíiwa'jsa ūsu'c indya' ¿tyāa dyijngá', meerra' vite
 ūytjasuvá'nja'w? jíte', ⁴Jesusa' na'wēc pas:

—U'ljrra Juana's pta'shine'cue andy na'wē yūuna fi'nze'tj tyā'sa' yafyju
 uyi'cue sa' caapiya'l'ni'sva wēse'ji'cue tyā'sna: ⁵uyya' ājasameeva uyu'ty,
 lengsava catyjirra lengmeety neeyū', wā'ly wee canzh ji'pjsava catyjinity
 neeyū', wēse'jya' ājasameeva wēse'jya' āja'ty, uuniisava qui' ityi yu'ty, sa' naa
 quiwete pytjaacuēsa yuutyi' Dyus tashte pal'jwa'ja's pta'shnic yuu jīne'cue.
⁶Atsa' andya's cuj yajcyna jypumbasamée yacj yu' wala yuj wecha yuja'.

⁷Tyajū' tyāa pēysa Jesus tashu u'tje', Jesusa' Juan ma'wēsateva pta'shcu
 cytee wēse'jsa nasaty' na'l'jina:

—Nasa u'pnimée quiwete', i'cue'sha' ¿quíjñacue tjengya' u'l'? ¿Cjīj
 tash wejyate ēse'sesa's vá'cue tjengya' u'l'? ⁸Cyte' ¿quīj ūsqui sūjrracue
 tjengya' u'l'? Meerra' ¿teech pitstjē'l' ropa zhichcuesa atjrra u'pna sūjrra
 vá'cue tjengya' u'l'? I'cue'sha' peecy jii i'cue tyā'wē ropa zhichcuesa atjsa'
 jycaajsawe'sh yat-surráaty u'pu'. ⁹Cyte' ¿quimnacue uy? Dyus yuwe
 pta'shsa's vá'cue uy. Isa tyā'sna yuj uyne'cue, nava Dyus yuwe pta'shsa
 maateva jytjaacuesas i'cue uy. ¹⁰Tyā'sna we'werrac Dyus libroute na'l'jī':

Andya' yuwee pta'shsa cajaststju iindy yatste,
 iindy pal'jwa'ja's pjeu'cjan jīna fi'jni'.

¹¹ Isatj we'we', naa quiwete maa nasa yujva Juan Bautistate jytjaacue walasa yu' casejnimeeta' ächpcach. Macue tyä'wēteva, ächj naa ensuwe'sh maateva jytjaacue le'chcuēesarrava Dyus jycaajnite u'casa' Juan Bautistate jytjaacue walasata'.

¹² Juan Bautista pa'ljnījūjy Dyus jycaajni ena' atseni ūsa' ächpcach, tyāa pa'gaty caacnayujya'mée chjächja puina fi'nze'. ¹³ Nava Dyus jycaajwa'j ena's Moises ley vite' Dyus yuwe pta'shsa tyāawe'sha' tyagachjūity pta'sh Juan Bautista pa'pjcach. ¹⁴ I'cue'sha' jiyu wēerra', jypa'yacy mwēese'jwe: na'wē Dyus yuwe pta'shsawe'sh we'werra', Dyus jycaajwa'j en äjatspcachja', Elias pa'jana jī'ty tyāac yu' Juan Bautista'.

¹⁵ Na'wē pta'shya'vatj tyā'sna wēse'jwa'jsa ūsra', mwēese'jwe. ¹⁶ Naa ensu nasaty' ħma'wē caaja'nda'tje wejy ewqui? Nava tyāawe'sha' luuch le'chcuē na'wēsata': luuchrrāaty plaasasu pweesa'jya' cachrra', tyāawe'sh namicuty na'jina sus we'we': ¹⁷ Zhichcuetja'w cuvī', nava cu'ju'tsmeei'cue. Sa' űus űustja'w memu', nava ű'ne'tsmeei'cue jīnaty we'we'. ¹⁸ Tyā'wēsarra i'cue Juan Bautista's na'wē we'we': Ech jī'pjrrac tyā'wē ű'we'tsmée, sa' vinova tundi'tsme' jina i'cue atsewe'we'. ¹⁹ Tyāa e'su Dyus Nchi'c Nasa Yuusāa pa'jrra tyā'wē ű'na tundyna yuute', na'wēi'cue atsewe'we': Wala pū'we', sa' tyā'wēycu wala tundi'. Pcalsawe'sh vite' gobierno jīi vyu pcjacjsawe'sh yacj namicu' jina i'cue atsewe'we'. I'cue'sha' jiimeerrai'cue tyā'jī'. Nava maava jiyuwa'jsa yuutyi' Dyusa' caajiyu'juna andy ma'wēsateva jīc.

Chjamb nwēese'jsamée yacj űucjūucjsa

(Lc. 10.13-15)

²⁰ Tyajū' Jesusa' juuna'c we'we maa chjambsurrajne' wejy wala tyā'wē quim yujva äjanimeesa's caavya'ja'jna űsu' cysūuwe'sh nasaty. Tyāa nasa' pcaltyi nvijtrra Dyus tashte shawendmeene'ta naa pa'ga na'jīc:

²¹ —Corazín chjambte nasa vite' Betsaida chjambte nasa tyāawe'sh yacja' wala yuj seena' űucjūucja'. Tyā'wē Tiro chjambte nasa vite' Sidon chjambte nasa tyāawe'sh cshavysu tyā'wē quim yujva äjanimeesa's caavya'ja'jvatsa', tyāawe'sha' pcaltyi nvijtrra Dyus tashte shawendni yā'j yuutyna. ²² Nava na'jī'tj na': Dyus castigāywalj en äjte', Tiro chjambte nasa vite' Sidon chjambtewe'shte jytjaacue tyāawe'sha' ya'castigaĩtyna. ²³ Atsa' Capernaum chjambte nasa i'cue'sh yu' cielute u'cawa'jsa yujne'tca'w ħsūju'cue'? Tyā'wēmée wejy infiernoterrāa ű'jwa'jsa i'cue. Tyā'wē Sodoma chjambte quim yujva äjanimeesa's caavya'ja'jvatsa', tyāa chjamba' ächpcach űs yuuna. ²⁴ Tyāa pa'ga na'jī'tj na': Dyus castigāywalj en äjte', Sodoma quiwesu nasate jytjaacue i'cue'sha' ya'castigaĩne'cue jīc.

Jesus tashte jycaaseya' pa'yani

(Lc. 10.21-22)

²⁵ Tyāa ensu' Jesusa' na'jīnac Dyus yacj puuty we'we:

—Tata, cielute vite' naa quiwete jycaajsa indya' tyacue wala quĩjteva jyuca jiisawe'sh yuutyi' caajiyu'jmeerrava, pytjaa äjmeecuesa yuutyi'

caajiyu'jng, tyāa pa'gatj tyacue wala wechá' indya's. ²⁶Indya' tyā'wēng yūu, iindy jytjāasni' tyā'wēne' yu' naa pa'ga.

²⁷Andy Tata' quijnava jyuca andyrrarráanac ducj. Nava Dyus Nchi'c ma'wēsateva quim yujva ew yu' jiimeeta', naasáa andy Tata yuurráa jiia'. Tyā'wēy quim yujva ew yu' jiimeeta' andy Tata's, naasáa Nchi'c yuurráa ew jiia' Neyas'. Tyāasac maava jiyu wēesa yuutyi' Nchi'ca' caajiyu'ju' Ney quimteva. ²⁸Maava ūuste wētmée wajtyna fi'nzesa' andy tashte myujwe jyucaysa, atsa' andya' wechana tjēymée fi'nzewa'ja's ūsu'nja. ²⁹Andy jycaajni's wal'mée jypa'garra, andy na'wēy fi'nzeya' mpiyawē, tyāa pa'gatey andya' juuna'meecue ūusuj jyuca peeygājnati jycaaja'. Tyāa pa'ga wechana tjēymée fi'nzewa'ja's ji'pjune'cue. ³⁰Andy jycaajni' walame', sa' nwēese'jwa'jva tjēymeesata' jīc.

Jycaase enteva scuutyjtyi chuctenderra ū'ni

(Mr. 2.23-28; Lc. 6.1-5)

12 ¹Tyāa ensu' Jesusa' scuutyj ejsuc scjēuuts yu' sapatu jycaase ente. Atsa' tyāa yacj u'jusawe'sha' wēerra scuutyjtyi chuctenderra ū'ty. ²Tyā'wē yūute', fariseowe'sh uyrra' na'wēty we'we Jesusa's:

—¿Uyu'ngá' indy yacj u'jusawe'sha' na'wē yuutsta' mjīi enmée jycaase enteva? jīte', ³Jesusa' na'wēc pta'sh:

—I'cue'sha' jīlīeeymeevá'cue? Teech ente' Davida' tyāa yacj u'jusawe'sh yacj wēerra' na'wēc yūu. ⁴Dyus yatte u'carra', cytee pantyi ū'c tyāatyī' quim yujva ū'wa'j ji'pjmeeta' naasáa sacerdote yuurráaty ū'wa'jsa yu'. ⁵I'cue'sha' Moises leyteva jīlīeeymeevá'cue? Cyte pta'shrra', dyus yatte sacerdotewe'sha' jycaase'tsmeeta' macue jycaase enteva jī'c. Tyā'wē jycaase ente jycaasemeete', pcalna jūju'tsmeecue'? ⁶I'cue'sha' mjiyuwe: Ayte' dyus yatte jytjaacue jytujtjesa ūsa'. ⁷I'cue'sha' jiyu'tsmeevá'cue Dyus librute na'jī'c. Vitety peeygāanirrá'stju andya' jytjāasu', tajcy icjrra altalte cambni's peejymeetj jī'c. Tyā'jīni's jiyuvatsa', cue'shtyi' ūusachana atsewe'wemeene'cue, tyā'wērráa yūunisa' pcalme' naa pa'ga. ⁸Tyāa pa'gatey sapatu jycaase enteva Dyus Nchi'c Nasa Yuusáa jycaajwa'j ji'pja' jīc.

Teech pitstjē'j tyajy cuse undynisa

(Mr. 3.1-6; Lc. 6.6-11)

⁹Jesusa' tyajū u'jrra', judiuwe'sh pcjaacjeni yattec u'ca. ¹⁰Cyteea' teech pitstjē'j teech cuse undynisa quēese'jya' ājasameec u'p yu'. Atsa' Jesusa's ewmée vit wēerra na'wēty pējy:

—Jycaase enteva nuycatyjite jēwmañ? jīte', ¹¹Jesusa' na'wēc pas:

—I'cue'sh teech piisháa ji'pjte' tyāa piishá' jycaase ente ewmeecjē cjēete', ¿u'jrra cutyi'jmeema'cue jycaase enteva? ¹²Nasa' piishaate jytjaacue pa'gasa', atsa' wejy tyā'wē ew yūuwa'ja' macue jycaase enteva.

¹³Tyā'wē pasrra tyāa pitstjē'ja's na'wēc we'we:

—Cuse's mculle'j jīte', tyā'wēy yuuc, naapcachja' tyajy cuse' ewuuc ca'tuwe'sh na'wēy. ¹⁴Atsa' fariseowe'sha' casejrra Jesusa's icjya' puuty we'wety.

Jesus ma'wēsateva nyafiitey pta'shni

¹⁵ Tyā'wē yūutste Jesus jiyurra', tyajū casejna u'cj, atsa' nasa wala u'jty tyāa yacj. Jesusa' ātsa'sa ma'wēsatyva jyucac nuycatyji, ¹⁶ nava quim ujtyva pta'shcaajme' nuycatyjisa quimteva. ¹⁷ Dyus yuwe pta'shsa Isaias we'weni cytey yuucajnrrāac tyā'wē neewe'we. Isaiasa' na'jīc:

¹⁸ Andyna selpiwa'jsa naa pitstjē'ja'stju tyjityj.

Tyāasa peeygājna wechana ūstju,

Sa' andy Espiritu's ūsu'nja,

Atsa' andy ew yūuwa'ja's pta'shina maa nasatyva jyuca.

¹⁹ Tyā' puiivameena, sa' āate susnava fi'nzemeena.

Tyāa pa'ga tyajy we'weni' quīj yujva ptjūusemeena cliicjunsu.

²⁰ Macue pytjaa ājmeecuesateva tyā' ajtsemeena,

Sa' chjāchja fi'nzewa'ja's ji'pjmeeyā'tjeva, tyā' iviitumeena,

Naa quiwete zhichcue tyajy jycaajwa'j en ājpcach.

²¹ Atsa' nasa' ma'wēsava jyuca tyā'srrāana ūytjasutyna jī'c.

Dyus Espiritu's atsewe'weni

(Mr. 3.19-30; Lc. 11.14-23; 12.10)

²² Tyajū' Jesus tashte jyūna pa'jty uyya' ājasamée we'weya'va ājasamée ech iiyamunisa's. Atsa' Jesusa' nuycatyjite', tyāa pitstjē'ja' uyya' ājac, sa' we'weya'va ājac. ²³ Tyā'wē yūute', nasa jyucaysa ūucj yajcyna na'wēty cuj jwend we'we':

—Naa pitstjē'ja' David Nchi'c īna jī'ty. ²⁴ Tyā'jīni's fariseowe'sh wēse'jrra', na'jīty:

—Naa pitstjē'ja' echtyi nasaa ūusuj cutyi'ji'c nava echtjē'j pu'chterrāac tyā'wē āja' jī'ty.

²⁵ Tyā'wē yajcyna ūste Jesus jiyurra', na'wēc we'we:

—Maa quiweteva gobierno' peecy nasatyīrrāa ajtserra puiirra', chjāchjameena. Tyā'wēy chjamb ma'c yuu meerra' teech yattewe'sh ma'ty yuu nava puuty yajtsena puiirra', puuty ptsuutyna. ²⁶ Tyā'wēy echtjē'jva tyajy jycaajnisa ech yacjīrrāa puiirra', chjāchjamée puuty ptsuutyna. ²⁷ I'cue'sh andyna we'werra', echtjē'j pu'chterrāac echtyi cutyi'ji' jīna i'cue we'we'. Atsa' tyā'wē dyijte', tyā'wē i'cue'sh yacj u'jusawe'shva echtyi cutyi'jya' āja'ty jī'i'cue atsa' tyā'wē ājawa'ja's ¿quimqui'c ūs? Tyā'wē i'cue'sh yacj fi'nzesaīva āate caajiyu'ju'ty i'cue'sh jypumbani's. ²⁸ Andya' echtyi cutyi'ji'tj Dyus Espiritu pu'chte'. Nava i'cue'shtyi Dyusrrarrāa jycaajwa'j en ājne' tyāa pa'ga ne'tca tyā'wē yū'.

²⁹ Maava pitstjē'j chjāchjasa iiyamuni's cusa'jya' u'jrra', tyāa pitstjē'j chjāchjasa cjuē'yna tundmeerra yu', cusa'jya' ājameena. Tyā's cjuē'yna tundrra yuurrāa cusa'jya' ājana.

³⁰ Andy ju'ngu yuusame' atsesarra tyā'wē yuutyna. Sa' andya's pu'chsame', yupsarra tyā'wē yuutyna. ³¹ Na'jī'tj na', nasa quījva

ewmée yūuni quíjva Dyusna ewmée nuywe'weteva tyāatyí' jyuca ya'peltunaína. Nava Dyus Espiritu's atsewe'wete', bagachte yujva peltunāywa'jmée yuuna. ³² Sa' maava Dyus Nchi'c Nasa Yuusa's ewmée nuywe'wesa's peltunāywa'j yuuna. Nava Dyus Espiritu's ewmée nuywe'wesa yuurráana peltunāywa'jmée yuuna naa quiwete cieluteva.

Ma'wē fi'nzeni'sva uyrrac ya'jiyu'

(Lc. 6.43-45)

³³ Fytūu tash ewsa' ewcu yūnu'. Nava fytūu tash ewmeesa' ewmeec yūnu'. Fytūu tash ma'wēsateva yūnte yuurráac ya'jiyu'. ³⁴ Ewmeesa luuch i'cue'sha' ġma'wē ew we'weya' ājaqui'cue, ūuste yuu ewmeesa ji'pjrra'? Tyāa pa'gatey ūuste yaacyni'scu ya'we'we'. ³⁵ Nasa ewsa' ewsarrá'scu we'we', tyajy ūuste' ewsarrá's ji'pjna naa pa'ga. Naapcachja' nasa ewmeesa' ewmeesarrá'scu we'we', tyajy ūuste' ewmeesarrá's ji'pjna naa pa'ga. ³⁶ Andya' na'jī'tj na': Dyus castigāywa'j ente' jyuca pta'shi ji'pjutyna quíjva jyuca ewmée we'weni's. ³⁷ Indy ma'wē we'weni'sva jyuca paapēyni yuuna, tyajū yuuwema'ng yuu meerra' yuuwemeema'ng yuu nava ya'jiyuuna.

Nasa ewmeesa' cieluju quíjrráava caavya'ja'cjaajni

(Mr. 8.12; Lc. 11.29-32)

³⁸ Tyajū' fariseowe'sh vite' ley caapiya'jsawe'sh Jesusa's na'jīnaty pējy: —Tyā'wē quim yujva ājanimeesa's cue'shtyi mcaavya'ja' jīte', ³⁹ Jesus pasrra! —Nasa ewmeesa ishiisawe'sha' quim yujva ājanimeesa'styi caavya'ja'cjaajni. Nava tyā'wē yūumée Dyus yuwe pta'shsa Jonas fi'nzenirráana ya'pta'shina. ⁴⁰ Jonasva ma'wēga wendy tutyjte tecj en tecj cus u'pu', tyā'wēy Dyus Nchi'c Nasa Yuusaava tecj en tecj cus quiwe dyiiga ūsuna. ⁴¹ Dyus castigāywa'j en ājte', Ninive chjambtewe'sha' naa ensuwe'shtyi' ewmeete nviitutyna, tyāa pa'gatey Jonas Dyus yuwe's pta'shishpcachja', Ninivetewe'sha' pcaltyi nvijtrra wa'lmée Dyus tashte utyaaty. Atsa' ayte' Jonas na'wēsarráamée jytjaacuesa ūsa', nava tyāa yu'sa' wa'lu'ty. ⁴² Tyā'wēy Dyus castigāywa'j en ājte', jyul'j quiwete jycaajsa u'ya' naa ensuwe'shtyi' ewmeete nviituna, tyāa pa'gatey tyā'wē jyul'j quiwejuva tyāa u'ya' yuwe'c Salomon pta'shnirrá'sva wa'lmée wēse'jya'. Atsa' ayte' Salomonte jytjaacuesa ūsa', nava tyāa yu'sa' wa'lu'ty.

Echa' nasa ūuste qui' shawendni

(Lc. 11.24-26)

⁴³ Echa' nasa ūusuj casejrra quiwe ujdysu pecūjna u'jurrava u'pwa'j uymeerra: ⁴⁴ Shawendu'nja casejtj tyāa yatnay sūju'c. Tyajū' shawendna pa'jrra', tyāa pitstjē'ja's uyuuna yata's ma'wē ew pjeu'jrra pandrra tyaaajni ūs yuucy tyā'wē. ⁴⁵ Tyajū' u'jrra vite siete ech tyāate jytjaacue ewmeesaty jyūna pa'jrra tyāa pitstjē'j ūuste jyuca cējetyna, atsa' tyāa pitstjē'ja' iiméj jytjaacue ewmeesa yuuna. Tyā'wē yuual'j en pa'jana naa nasa ewmeesaty' jīc.

Jesus nji'j vite' tyajy nyacjwe'sh

(Mr. 3.31-35; Lc. 8.19-21)

⁴⁶Jesus tyã'wě nasaty we'wena ūsiyna, nji'j vite' nyacjwe'sh tyāa yacj we'weya' pa'jrra ecate ūsu'ty. ⁴⁷Atsa' cyte ūssa teeche'sa' Jesusa's pta'shcu:

—Iindy mama iindy nyacjwe'sh indy yacj puuty we'weya' pa'jrra ay ecate ūsta' jīte!, ⁴⁸Jesusa' na'wēc we'we pta'shsa's:

—Andy mama andy nyacjwe'sha' quimteva jiimeevá'cue jīrra', ⁴⁹tyāa yacj u'jusawe'shtyi cuseju vijyarra:

—Naawe'shrrāa andy mama, andy nyacjwe'shta'. ⁵⁰Tyāa pa'gatey maava andy Tata cielute ūsa' tyajy jytjāasni's cytey yuusaarrāa tyā'wě andy nyacj, andy npe'sh, andy mama na'wēsata' jīc.

Scuutyj uujsa's caaja'nda'jni

(Mr. 4.1-9; Lc. 8.4-8)

13 ¹Tyāa enteyírrāa Jesusa' yatuj casejrra ičjwala pucate ūsya'c u'j. ²Atsa' tyajy ūsnite wala nasa pcjaacjete!, Jesusa' barcotec cjee. Atsa' nasa yu' ičj pucatee neeyūuty. ³Tyajūc wala caapiya'j ejemplo caaja'nda'jrra na'jīna:

—Scuutyj uujsa' u'jya' casejc. ⁴Atsa' ujna u'juetste!, msuufi yu' dyi'jsuty ūshi scuutyj fiwa!. Atsa' vichacue pa'jrra scuutyj fiwtyi ū'ty. ⁵Vite ajsu' cuet cajcuesuty ūshi, quiwe wejcuerrāa ji'pjsu. Atsa' cysū ūshisa' wala dund buchaty quiwe walameene'ta ya'fijmb tyāa pa'ga. ⁶Nava sec achaate' jyuca u'jndytyi, iijewtseya' ajameene'ta naa pa'ga. ⁷Vite scuutyj fiwa' tsjūtsj cshavysuty ūshi, atsa' tsjūtsj cjuē'y walaarra', scuutyja's apjrra iviituty. ⁸Nava vite ajsu' quiwe wala ewsu ūshity, sa' wala yūnty. Maa tashīi yu' cien, vite' sesenta, vite' treinta ñiñ tyā'wēty tsut. ⁹Na'wē pta'shni's jiyuwa'jsa ūsrra', jiyune'cue jīc.

Quīj yūupa'ga ejemplo yacjrrāa caaja'nda'jrra pta'shni

(Mr. 4.10-12; Lc. 8.9-10)

¹⁰Tyajū' tyāa yacj u'jusawe'sha' Jesus tashte utyaarra na'wēty pējy:

—¿Quījya'nga ejemplo caaja'nda'jrrarrāa nasaty pta'shi'? jīte!, ¹¹na'wēc pas Jesusa':

—Dyus jycaajni ensu ma'wē yūuwa'ja'sva quim yujva jiyunimeesa's i'cue'sh yuutyi's caajiyu'jwa'ja!. Nava vite yuutyi's caajiyu'jwa'jme!. ¹²Tyāa pa'gatey jiyuwa'jsa's jweeírrāa āate ya'caajiyu'juna, wala jiyucajn. Nava jiyuwa'jmeesa's ya'caajiyu'jmeena, wejyva le'chcuerrāava jiivāa yuuna tyā's yujnava cusa'jni yuuna. ¹³Tyāa pa'gatj ejemplo caaja'nda'jrrarrāa we'we!. Tyā'wē yuucajni tyāawe'sha' uyrrava, uysamée na'wē jiyu'tsmeeta!, sa' wēse'jrrava wēse'jsamée na'wē nwēese'je'tsmeeta!. ¹⁴Tyāawe'sh fi'nzewa'ja's Dyus yuwe pta'shsa Isaias we'weni' cytey yuuc. Tyā' na'wēc we'we:

I'cue'sha' wēse'jevá'cue, nava jiyumeene'cue.

Uyuvá'cue, nava tyāana sūjmeene'cue.

15 Tyāa pa'gatey tyāa nasa ũusa' jyuca ewmeesarrāa yuuna pa'jni'.

Tyāa pa'gaty wēse'jya' wa'lu',

Sa' tyāawe'sh yafyju uycajmén,

Tyāawe'sh tjū'wējuva wēse'cjamen,

Yafya' jyuca apjanita' tyāawe'sh ũuste ew jiyuajmén.

Tyāa pa'gaty andy tashte pa'ja'tsmée andy nuycatyijcajn jī'c.

16 Nava i'cue'sh yacja' wala yuj wecha yuja' i'cue'sh yafyju yuu uyi'cue, sa' i'cue'sh tjū'wēju yuu wēse'ji'cue naa pa'ga. 17 Isatj we'we', maanzcuēesava Dyus yuwe pta'shsa vite' nasa ewsa nyafiwe'shva uy wēety i'cue'sh uyna ũsi'cue tyā'sna, nava uymeeta'. Wēse'j wēety i'cue'sh wēse'jna ũsi'cue tyā'sna, nava wēse'jmeeta'.

Ejemplo yacj caapiya'jni's āate pta'shni

(Mr. 4.13-20; Lc. 8.11-15)

18 Āchja' mjiyuwe scuutyj uujsa's caaja'nda'jrra pta'shni's. 19 Naa quiwete Dyus jycaajwa'ja's pta'shni's wēse'jrrava jiyusame', scuutyj fiw dyi'jsu ũshisāa na'wēsata': Nasa' Dyus yuwe's wēse'tjeva, echtjē'ja' pa'jrra ũusuj cutyi'jina. 20 Scuutyj fiw cuet cajcuesu ũshisa' Dyus yuwe's wala wechana jypa'gasa na'wēsata'. 21 Nava Dyus yuwe's achamée chjāchja yaacysa' chjāchja'tsmeeta'. Tyā'wē Dyus yuwe's jypa'gapa'ga, pcyuwa'j en pa'tjerrāa jyuca fiycaja'ty. 22 Scuutyj fiw tsjütsj cshavysu ũshisa' Dyus yuwe's wēse'jrrava naa quiwetewe'shrrā's wejy wala yajcyna ji'pjunisarrā's pa'pchusa na'wēsata'. Atsa' tyā'wēsarrā's wejy wala yajcyte', tyāarrāa jyuca cnayu'c Dyus yuwe yu'sa' caapechcana'jna. 23 Nava scuutyj fiw quiwe ewte ũshisa' Dyus yuwe's wēse'jrra cytey yuusāa na'wēsata': Scuutyj spiigava ma'wēga cien vite' sesenta vite' treinta ñiñ ji'pju', tyā'wēycu tyāawe'sh ũuste Dyus yuwe' wala pena' jīc.

Jyütj ewmeesa scuutyj cshavyte buchasa

24 Jesusa' vite ejemplo na'wēc caaja'nda'jrra pta'sh:

—Naa quiwete Dyus jycaajni ente Dyus yuwe ewsarrā's pta'shteve, na'wē yuuna: Teech mjiisa' tyajy quiwete fiw ewsa'scu uj. 25 Nava jyucaysa dejetspcachja', uutjash namu's atsesa pa'jrra ũ'nimeesa'scu scuutyj cshavyte ujrra ulj. 26 Atsa' scuutyj buchatspcachja', tyāa cshavyte jyütj tash ũ'nimeesava vyaac. 27 Tyā'wē yūute', selpisaawe'sha' na'jīnaty namu's pta'shya' ulj: Indya' fiw ewsarrā'sngu uj, atsa' naa jyütj tash ewmeesa' ¿ma'wē yūurraga bucha? jīte', 28 namu' na'wēc pas: Maa atsesa ujne'ta jīc. Tyajū' selpisaawe'sha' pējytyi: ¿Tyāa jyütj tash ewmeesa's cjumbeya' uljmtja'w? jīte', 29 namu' na'wēc we'we: Cuch yuunuwe. Tyā'wēme', pety scuutyj tash yā'jrra ya'cjumbeetyna. 30 Manvijtwe, peecy walaatyna, scuutyj wacawa'j en ājpcach. Tyāa ente andya' jycaaja'nja mjiisatyī', atsa' jyütj tash ewmeesa cjuē'yna jyuca cjumberra tundutyna cambwa'j. Tyā'wē yūurra scuutyja's andy yatte jyaawuutyna jīc.

Mostasa fiwa's caaja'nda'jnisa

(Mr. 4.30-32; Lc. 13.18-19)

³¹ Jesusa' na'wēc pta'sh vite ejemplo caaja'nda'jrra:

—Naa quiwete Dyus jycaajya' tacjni ena' na'wēsa': Teech mjīisa' mostasa fiwa's quiwete ujc. ³² Tyāa fiwa' maa maa fiwteva tjaacue le'chcuēesa'. Nava buchayā'jrra', maa ū'tashteva jytjaacuec walá'. Atsa' tyā'wē seena' walaate', vichacue yujva pa'jrra cul'tasu yaatu'ty jīc.

Levadura's caaja'nda'jnisa

(Lc. 13.20-21)

³³ Vite ejemplo caaja'nda'jrra na'wēc pta'sh:

—Naa quiwete Dyus jycaajni ena' na'wē yūuwa'jsa': Teech u'y panu'jutsrra', tecj libra scuutyj ū'wete levadura's ca'ndte ma'wē jyuca pēetjyecy tyā'wē yūuwa'jsa' jīc.

Ejemplo yacj caapiya'jwa'ja's pta'shni

(Mr. 4.33-34)

³⁴ Jesusa' ejemplo caaja'nda'jrra yuurráac pta'shi' nasa jyucaysaty. Ejemplo caaja'nda'jmée yu', pta'shi'tsme'. ³⁵ Tyā'wē yūuwa'ja's Dyus yuwe pta'shsa na'jīna fi'cj tyāac cytey yuu. Na'wēc fi'j:

Quim yujtyva caajiyu'jnimeesa ūsyā'jty yu' naa quiwe's vitiyna tyā'sna pta'shi'nja ejemplo caaja'nda'jrra yuurráa jīnac fi'j.

Jyūtj tash ewmeesa's āate caajiyu'jnisa

³⁶ Tyajū' Jesusa' nasa tashuj tyuteerra yattec u'ca, atsa' tyāa yacj u'jusawe'sha' utyaarra na'wēty pējy:

—Jyūtj tash ewmeesa's caaja'nda'jna we'weni's āate mcaajiyu'j jīte', ³⁷ Jesusa' pta'shcu:

—Fiw ewsana uujsa' Dyus Nchi'c Nasa Yuusá'. ³⁸ Atsa' uutjash jīnisa' naa quiwe'. Fiw ewsā jīna we'we'tj tyāa yu' nasa Dyus jycaajnite ūswa'lsatytyu tyā'jī'. Sa' echtjē'j nasa yuutyi' jyūtj tash ewmeesa jī'tj.

³⁹ Atsa' jyūtj tash ewmeesa's uujsa yu', echtjē'jīrrá'. Scuutyj wacawa'j en jī'tj tyāa yu' naa quiwe ptsuwa'ja'stju tyā'jī'. Atsa' ū'a's pcjacjsa', Dyus angeleswe'shta'. ⁴⁰ Jyūtj tash ewmeesa's ma'wēta pcjacjrra ipyte ambu' chjavycajn, tyā'wēy yūuni yuuna naa quiwe ptsuute'.

⁴¹ Dyus Nchi'c Nasa Yuusá' angeleswe'shtyi cajana tyā'wē ewmée yūuna vitety pcalte cweete'jna ūssawe'shtyi tyajy jycaajna ūsnijū cutyi'jrra ⁴² ipy walate acjacajn. Cyteea' seena' yuj pembeetyna qui'tjtyi csuusu'jna. ⁴³ Naapcachja' Dyus jytjāasni's cytey yuusa' sec na'wē eena' cweetjetyna Tata cielute jycaajna ūsnite. I'cue'sha' jiyuwa'jsa ūsrra', jiyune'cue.

Iiméj pa'gasa's sūtjrra tyaaajnis

⁴⁴Naa quiwete Dyus jycaajna ūsni ena' iiméj seena' pa'gasa's quiwe dyyite sūtjrra tyaaajni na'wēsa': Teech pitstjē'jva ma'wē tyā'wē pa'gasa's uyrra', āchjī yu' jyūna u'jya' ājameerra cyteyrrāa wejy ew sūtjrra tyajacy, sa' wala wechana u'jrra tyajy ji'pjuni's jyuca tyweyrra tyāa vyuju quiwe's weyuucy mteene' ewsa's sūtjrra tyaj tyāa quiwe's tyā'wēysa'.

Perla iiméj pa'gasa's uyni

⁴⁵Naa quiwete Dyus jycaajna ūsni ena' na'wēsa': Perla zhichcuesa's weysaava ma'wē pacuerra ⁴⁶teech perla iiméj pa'gasa's uyrra', tyajy ji'pjuni's jyuca tyweyrra tyāa vyuju perla's weyuucy tyā'wēysa'.

Wendy ucje yacj caaja'nda'jrra caapiya'jni

⁴⁷Naa quiwete Dyus jycaajna ūsni ente' na'wē yūuwa'ja': Wendy ucje'sva ma'wē icjwalacjē acjte', wendy ma'wēsatyva jyuca pcjacjcy. ⁴⁸Atsa' wendy uwesá' ucje's tujmete cuty'jrra wendytyi tyjityjya' cachrra ewsa's canastate āshrra', ewmeesaty' icjwalacjē āshityqui ⁴⁹tyā'wēy yuutyna Dyus angeleswe'sha' naa quiwe ptsuwa'j en ājte'. Sa' tyāawe'sha' ewmeesaty' ewsa cshavyuj tyjityjrra ipy walate acjetyna. ⁵⁰Cyteea' seena' yuj pembeetyna qui'tjtyi csuusujna.

Nyaffi caapiya'jni'sva jiisa u'sesa'sva jiisawe'sh

⁵¹Tyā'wē caapiya'jni's Jesusa' na'jīnac pējy:

—¿I'cue'sha' jyuca jiyucue' na'wē pta'shni's? jīte', tyāawe'sha':

—Jiyuūtja'w jīnaty pas.

⁵²Atsa' Jesusa' na'wēc we'we:

—Dyus jycaajwa'j ena's jiyusa' ley caapiya'jsava ma'wē nyaffi caapiya'jni's piyarra caapiya'jni u'sesa'sva jypa'garra wala jiisa yuucy tyā'wēy e'nz jwend jiisa yuutyna jīc.

Jesusa' Nasaretna u'jni

(Mr. 6.1-6; Lc. 4.16-30)

⁵³Naa ejemploty Jesusa' pta'shna jyā'jrra', tyajū u'cj tyajy quiwen.

⁵⁴Cyteea' judiuwe'sh pcjaacjenitec caapiya'jna ūsu'. Atsa' nasa' cuj yajcyna na'jī'ty:

—Naa pitstjē'ja' zmteequi'c tyacue wala piya tyā'wē ājaya'? ¿Ma'wē yūurraga tyā'wē quim yujva ājanimeesa's caavya'ja'ja'? ⁵⁵Naafi ¿carpintero nchi'c meená', atsa' njī'ja' Maria meená'? Atsa' tyajy nyacjwe'sha' Jacobo, Jose, Simon, vite' Judas tyāawe'shta', ⁵⁶atsa' tyajy npe'shwe'shva ayte cue'sh yacj ūsta'. ¿Majūqui'c piya na'wē quījnava jyuca ājawa'ja's? ⁵⁷Tyā'wē jīity yu', tyāa pa'gaty Jesus we'weni's cytey yuumée. Nava Jesusa' na'wēc we'we:

—Dyus yuwe pta'shsa' peecy quiwesu vite' peecy yattewe'sh weechni yuurráa fi'nzetya maava jírra', ⁵⁸ quim yujva ájanimeesa's jwee yu' caavya'ja'jme', tyáawe'sha' tyajy we'weni's cytey nwēese'jmeeta' naa pa'ga.

Juan Bautista uuníi
(Mr. 6.14-29; Lc. 9.7-9)

14 ¹ Tyāa ensu' Herodesa' Galilea quiwetec ne'jue'sh yu', sa' Jesus quíjquíjva ew yūuni's jiyurra', ² tyāa yacj ūssawe'shtyi na'wēc we'we: —Tyāa pitstjē'ja' Juan Bautistane' qui' ityi yuu. Tyāasane' tyā'wē quim yujva ájanimeesa'sva caavya'ja'jya' āja' jīc.

³ Herodesa' Juan Bautista's na'wē yūurraga icj: Juana's tundrra carcelte ctyaaja'cja, nava Herodes nyacj Felipe nyu Herodias pa'garráane' tyā'wē carcelte ctyaaja'j. ⁴ Tyāa ensu' Juan Bautista' Herodesa's we'werra':

—Íindy yacjtjē'j nyua's cusa'jrra iindy nyu na'wē jype'jwa'j jī'pjmeeng jīte', ⁵ Herodesa' Juana's icje'nja sūjne'. Nava nasa jyucaysa Juan ju'ngurrarráane'ta ūsu', Juana' Dyus yuwe pta'shsapa'ga. Tyāa pa'gane' ūucjrra icjmēe carcelterrāa tyaj. ⁶ Nava teech ente' Herodesa' tyajy upyni en añu ājte fiesta vitte', Herodias niisa' nasa pi'cynisa dyi'pte wala zhichcue cu'jya' casejne'. Tyāa pa'ga Herodesa' iiméj wala wecharra, ⁷ quíj pējyteva jyuca ūsu'nja jīnane' puuty we'we tyāa cna'sa's. ⁸ Tyajū' nī'j yu'cypejte', tyāa cna'sa' na'wēga pējy Herodesa's:

—Juan Bautista dyictjea's plaatute acjrra ūsune'nga jīte', ⁹ ne'jue'sh Herodesa' wala nūsrrava, tyā'wē yā'jne' quíj pējyteva ūsya' puuty we'we nasa pi'cynisa dyi'pte, tyāa pa'ga cytey yūuya' neeyūuyā'jrra', ¹⁰ Juan dyictjea's spē'tjcaajne' carcelte. ¹¹ Atsa' dyictjea's plaatute acjrra ūste', tyāa cna'sa yu' nī'ja'sne' ducj.

¹² Tyā'wē yūute', Juan Bautista yacj pi'cyna u'jusawe'sha' pa'jrra uuníi cacue's jyūna u'jrra pendaane'ta. Sa' u'jrra Jesusa's pta'shne'ta.

Cinco mil nasaty Jesus sājīni
(Mr. 6.30-44; Lc. 9.10-17; Jn. 6.1-14)

¹³ Tyā'wē Herodesa' Juan Bautista's icjcu jīni's Jesusa' jiyurra', barcote cjēerra u'cj teech ajte quim yujva u'pnimeesate pa'jya'. Nava Jesus mtee pa'jya' u'tjeva jiyurra nasa' chjambu casejrra Jesus pa'jwa'tje pacuena u'ljty chindarrāa. ¹⁴ Atsa' Jesusa' barcoju casejetsrra' uycu nasa wala cuj ūste, sa' tyāawe'shtyi peeygājrra nuycatyjic ātsa'saty pe'jrra nuypa'jnisatyi'. ¹⁵ Tyajū' cusna quíjatste', tyāa yacj u'jusawe'sha' Jesus tashte utyaarra na'wēty we'we:

—Cusutsyā'ja', naapcachja' aysu' quim yujva u'pnimeesa'. Atsa' nasatyī' mcaaj chjambu pa'jrra quíjrrāava weyrra ū'cajn jīte', ¹⁶ Jesusa' na'wēc pas:

—Tyāawe'sha' ū' weyya' u'jwa'j peejymeena. I'cue'sh mpuutswe jīte', ¹⁷ na'wēty pas:

—Cue'sha' quíjva wala yu' jī'pjmeetja'w. Tajts pan e'nz wendyrrāa jī'pjta'w jīte', ¹⁸ Jesusa':

—Tyāatyī' mneejyūjwe jīnac jycaaj.

¹⁹Tyajũ' nasaty cachcaacj tyacsũ. Sa' tajts pan e'nz wendytyi jypa'garra, cielute pagayrra Dyusa's wecharra pantyi pe'ltendec. Tyã'wẽ yũurrac tyãa yacj u'jusawe'shtyi ũs, atsa' tyãawe'sha' ũsu'styi nasaty.
²⁰Atsa' jyucaysa ũrra tyicte!, doce canastate utaty quijyasaaty pcjacj.
²¹Ũ'sawe'sha' cinco mil pitstjẽ'jty yu', u'ywe'sh vite' luuchwe'shtyi yu'

Ícj cajcuega Jesus u'juni
(Mr. 6.45-52; Jn. 6.16-21)

²²Tyajũ' Jesusa' tyãa yacj u'jusawe'shtyi barcote yatste caacj, sa' tyãa yu' cytee neeyũuc nasa tyuteena u'jsaty wechana. ²³Tyajũ' nasa jyuca tyuteena u'tje', tjã'j vitsna u'cj tyãarrãa Dyus yacj puuty we'weya'. Jyuca chji'ndyni yã'tjeva, Jesusa' cytee nee ũs'fírrãac yu'. ²⁴Naapcachja' barco' ícj pyãjũy u'juetscu yu'. Atsa' wejyaa wala quitterra, dyi'puj sějrra barco's yupcu. ²⁵Atsa' cjicjyna sějya'vate!, Jesusa' utyaana cũjc ícj cajcuega chindarrãa. ²⁶Atsa' ícj cajcuega tyã'wẽ yujte uyrra', barcote u'jsawe'sha' ũucjna na'jĩnaty sus we'we:

—Echa'stja'w uy jĩte!, ²⁷Jesusa' na'wẽc we'we:

—Ũucjnuwe, andytju jĩte!, ²⁸Pedro we'werra' na'jĩc:

—Andytju jĩ'ng na' tyãa dyijrra', andyva tyã'wẽy ícj cajcuesu chindarrãa yujya' ajacajn mcaaj jĩte!, ²⁹Jesusa':

—Tyã'wẽrra' myuj jĩnac we'we.

Atsa' Pedro' barcojũ sa'jrra, Jesus tashte pa'j u'jya' u'juetscu yu' ícj cajcuesu. ³⁰Nava wejya seena' chjãchja ũste!, ũucjcu. Sa' tyã'wẽ ũucjpa'garrãa ícj dyiicjẽ cjějetsrra', suscu we'we:

—Meen nwe'we jĩtspcachja', ³¹Jesusa' pu'quisrra na'jĩc:

—¿Quĩjya'nga Dyusa's yu' yajcymée, ũucjwa'jrrã's yajcy? jĩrra',

³²Jesusa' barcote Pedro yacj cjějetspcachja', wejyaa wala' jyuca yujuc.

³³Atsa' barcote ũssa' Jesus tashte peejyũcuerra na'wẽty we'we:

—Isa, indya' Dyus Nchi'c yuj yu'nga jĩty.

Genesarettewe'shtyi Jesus nuycatyjini
(Mr. 6.53-56)

³⁴Ícjuy ctejcarra', Genesaret quiwete pa'jty. ³⁵Atsa' cysũ nasa' Jesus pa'jni's jiyurra tyãa quiwesu nasaty jyuca pta'shte!, nasa' átsa'saty jyuca Jesus tashte nuypa'jty, ³⁶na'jĩna pytjaa we'wena:

—Iindy atyj vitsterrãava macjya'ndyi'j jĩrra, tyã'wẽ jya'ndysa' jyuca catyjirraty neeyũ'.

Nasa's ewmée vit-sa
(Mr. 7.1-23)

15 ¹Fariseowe'sh vite' ley caapiya'jsa tyãawe'sha' Jerusalen chjambu pa'jrra', maafi yu' na'jĩnaty Jesus tashte utyãa:



(San Mateo 14.30)

2—Indy yacj u'ljusawe'sha' ¿quij yūurrata yatsgawe'sh caapiya'jnityi' cytey yu'tsmée, tyā'wē cusecjē yu' caajmée ū'wé'?

3Tyā'jīte', Jesusva pējycu na'jīna:

—I'cue'shva ¿quij yūurracue i'cue'sh yatsgawe'sh caapiya'jnirrā's nwēese'jrra' Dyus jycaajni yu'sa' cytey yu'tsmée? 4Dyusa' na'wēc jycaaja': Iindy tata iindy mama tyāawe'shtyi' peeygājna pu'chwa'ja'. Atsa' tyā'wē yūumée neywe'shtyi atsewe'wesa' uu ena's ji'pjuna jī'c. 5Nava i'cue'sha' yatsga caapiya'jnirrā's nwēese'jrra Dyus jycaajni yu'sa' cytey yuumée ūsi'cue. 6I'cue'sh yatsgawe'sha' na'wēty caapiya'ja': Maa nasava neywe'shtyi peeygājna pu'chmée, andy ji'pjuni i'cue'shtyi pu'chwa'ja's Dyusna ducje'nja jīna we'werrarrāa, neywe'shtyi' pu'chmeeteva ewa' jī'ty.

7Yuwejurráa ew we'werra', ũuste yu' ewmeerráa yaacysai'cue, atsa' Dyus yuwe pta'shsa Isaiasa' isa yuj Dyus we'weni's na'jína fi'jne':

8 Naa nasa' yuweju yu' andya's yaaqui'tja'w jírrava, ũusuj yu' andya's yaaqui'tsmeeta'.

9 Naa quiwete nasaa caapiya'jnirrás cytey yuuna ũsrara, tyā'wē Dyus jyaajni'stja'w cytey yu' jīte', cyul yujna jī'c.

10 Tyajū' nasaty pa'yarra na'wēc we'we Jesusa':

—Jiyuya' mwēese'jwe. 11 Quīj ũ'va tutyjterrāa cjēesa yu', nasaty ewmeesa vitu'tsme', naasáa ũusuj ewmēe yaacynisa yuurráac nasaty ewmeesa vitu'.

12 Tyajū' Jesus yacj u'jusawe'sha' utyaarra na'wēty we'we:

—Indy tyā'wē we'wete', fariseowe'sha' ũusachanaty neeyūu jīte',

13 Jesus pasrra':

—Quīj tashva andy Tata cielute ũssa uujnisamée yu'sa' cjumbeni yuuwa'ja'. 14 Atsa' ũucjnuwe. Tyāawe'sha' yafy ji'pjmeesa, yafy ji'pjmeesa nwe'shtyi pe'jna u'jusarráata'. Tyā'wē yafy ji'pjmeesa yafy ji'pjmeesa nwe'shtyi pe'jna u'jurra', e'nzfi cafycjē cjējetyna.

15 Tyā'jīte', Pedro' Jesusa's na'jīnac pēy:

—Ejemplo caaja'nda'jrra we'weni's āate mpeeta'sh jīte', 16 Jesusa' na'jīnac we'we:

—¿I'cue'shva jiyu'tsmeevá'cue? 17 Quīj ũ'va tutyjcjerrāac u'jue', sa' tyajū qui' caseje'c. 18 Nava ũusuj yaacynisa yuurráac nasa's ewmeesa vitu'. 19 Tyāa pa'gatey ũusujc caseje' ewmēe yaacynisa, nasaty icj wēenisa, ptamrrava vitesa yacj fi'nzeni, ma'wēsa yacjva pcal yuuna fi'nzeni, pesweeni, išhiina ewmēe nuywe'weni, Dyusna atsewe'weni. 20 Tyā'wē yaacynisaty nasa's ewmeesa vitu'. Nava cusecjē yu' caajmēe ũ'nisarrāa yu', nasaty ewmēe vitu'tsme'.

Teech u'y judiu ji'jmeesa Jesusa's jypa'gasa

(Mr. 7.24-30)

21 Jesusa' tyajū casejrra u'cj Tiro vite' Sidon quiwen. 22 Atsa' teech u'y Canaanuwe'sh tyāa quiwete pa'jrra u'psa' Jesus tashte pa'cj pytjaa we'wena:

—David ji'j, ũ'cue's meen peeygāj. ũ'cue niisa's ech iiyamute', iimēj wala pytjaa yuuna ũsa' jīteva, 23 Jesusa' ma'wērrāa yujva pasme'. Atsa' Jesus yacj u'jusawe'sha' Jesusa's we'wety na'jína:

—Cue'sh e'ste cuch susna yuucajmen yatna mcaaj jīte', 24 Jesusa' na'jīnac pas:

—Piishacuē na'wē vituna ũssa Israelwe'shrráatycu pacueya' caaj Dyusa' jīteva, 25 tyāa u'ya' shuuna' yuumēe utyaana cūjrra tyajy tashte peejyūcuc:

—ũ'cue's meen pu'ch jīna. 26 Atsa' Jesusa' na'jīnac we'we:

—Luuch ũ'wa'ja's cusa'jrra alcuty ũswa'jme' 27 jīteva, tyāa u'y pasrra':

—Isa yuj we'we'ng. Nava alcu' pejca ũ'we'ty mesa tashsu pan pe'la ũshisarráatyva jīte', 28 Jesus we'werra':

—Dyusa' pu'chyuujuna sūjwa'j yuurrá's i'cue yaaqui', tyāa pa'ga i'cue pēyni' cytey yuuna jītspcachja', tyāa dundtey tyāa u'y niisa' catyjinic neeyūu.

Maanzcuēe ātsa'satyva Jesus nuycatyjinī

²⁹Jesusa' tyajū casejrra Galilea ĩcj pucasuc u'j. Sa' tǵǵ'j vitstec tejca.
³⁰Atsa' nasa wala pa'jty tyajy tashte ātsa'saty pe'jrra, lengsa, uyya' ājasamée, we'weya' ājasamée, ēseya' ājasameety. Atsa' tyā'wē wala cuj ātsa'saty Jesus tashte nuypa'tje', tyā' nuycatyjic. ³¹Tyā'wē we'weya' ājasameeva we'weya' ājaty, atsa' ēseya' ājasameeva catyjity, atsa' lengsava ew u'jya' ājaty, naapcachja' uyya' ājasameeva uyya' ājaty. Atsa' nasa' wala cuj yajcyna Israelwe'sh Dyusa's wala wechaty.

Cuatro mil nasaty Jesus sǵǵ'jini

(Mr. 8.1-10)

³²Tyajū' Jesusa' tyāa yacj u'jusawe'shtyi pa'yarra na'wēc we'we:
 —Naa nasa' ayte andy yacj tecj en yā'j ūsta', sa' quǵj yujva ū'wa'j ji'pjmeeta', tyāa pa'gatj peeygāja', sa' puutsmée yu' caajme'nja. Tyā'wēme' dyi'tje u'jya' chjāchjameetyna jīte', ³³na'wēty pas:
 —Nava ¿quǵjte tyacue wala ū' uyuucytja'w nasa tyāanzcuēesa ū'wa'j? Ayte' quim yujva u'p quiweme' atsa' jīte', ³⁴Jesusa' pējyju:
 —I'cue'sha' ¿manz pan ji'pjcue? jīte', tyāawe'sh pasrra':
 —Siete pan, wendy cujmeecuērrāa ji'ptja'w jīnaty pas.
³⁵Atsa' nasaty' quiwesu cachcaajrra', ³⁶siete pan vite' wendytyi jypa'gana'va Dyusa's wechac. Tyā'wē yūurrac pe'ltenderra tyāa yacj u'jusawe'shtyi ūs, atsa' tyāawe'sha' nasaty ūsu'styi. ³⁷Jyucaysa ū'rra tyicte', quiyyaasa's pcjactyi, atsa' siete canastate utac neeyūu.
³⁸Ū'sawe'sha' cuatro mil ājty yu', nava u'y vite' luuch tyāawe'sh yuutyi' isaniméec cyanz yu'. ³⁹Tyā'wē yūurra Jesusa' nasaty caajrra', tyāa yu' barcote cǵēerra Magdala quiwencu u'j.

Fariseo vite' saduceowe'sh cieluju quǵjrrāava caavya'ja'cjaajni

(Mr. 8.11-13; Lc. 12.54-56)

16 ¹Fariseowe'sh vite' saduceowe'shva pa'jrra', Jesus ewmée yūuteva cpajcyya' sūjrra pējtyti:

—Cieluju quǵjrrāava mcaavya'ja'j jīna.

²Nava Jesus pasrra' na'jic:

—Cusna sec cǵējetste', cuscusa' secuuna, ew cusutsa' jī'i'cue. ³Sa' cusí we'werra', āchja' en ewmée yuuna, tāapjrrāa ūsa' jī'i'cue. Yuwejurrāa ew we'werra', ūuste yu' ewmeerrāa yaacysa, en ma'wē yūuwa'ja'sva jiyu'i'cue i'cue'sha'. Nava naa ensu na'wē seena'sa vyaatsa' tyāa yu'sa' jiyuya' āja'tsmeei'cue quǵj yūuya' tyā'wē yūutsteva. ⁴Naa nasa ewmeesa' cieluju seena'sa's caavya'ja'j jytjāasu'ty. Nava peena yu' caavya'ja'jmeete ewna, naasāa Jonasa' ma'wēga yuu tyā'srrāana ya'pta'shina jīna we'werrarrāa nvijtrra u'cj.

Fariseowe'sh caapiya'jni's levadura yacj caaja'nda'jni
(Mr. 8.14-21)

⁵Jesus yacj u'jusawe'sha' ícjwala cuten u'juetsrrava, pechcanarra pan yu' jyũmeeta u'lj. ⁶Cytee pal'jrra', Jesusa' na'wēc we'we:

—Mpa'yajcywe, fariseo vite' saduceowe'sh levadura ewmeesa's jíte', ⁷tyāawe'sha' na'wēty puuty paapēyi':

—Pan jyũmeetja'w atsa' cyajne' tyā'wē we'we' jĩ'ty.

⁸Tyā'wē we'weni's Jesus jiyurra' na'jĩc:

—¿Maa sũjrracue pan ji'pjmeetja'w jĩna we'wé'? Pan ji'pjmeeteva, Dyusa' tjěymée sã'jĩna sũjwa'lj yu'sa' ji'pjmeevá'cue. ⁹Andya' na'wē tajts pan yacjrráa cinco mil nasaty tjěyméetj sã'jĩ atsa' quijyaasa's manz canasta pcjacjrrava tyā'sa' yaaquitsmeevá'cue. ¹⁰Vite ente' tyā'wēy siete pan yacjrráa cuatro mil nasaty tjěyméetj sã'jĩ atsa' quijyaasa's manz canasta pcjacjrrava yaaquitsmeevá'cue. ¹¹I'cue'sha' jiyumeevá'cue andya' pana's we'werra tyā'wē mpa'yajcywe fariseo vite' saduceowe'sh levadura ewmeesa's jĩ'tsmeetj.

¹²Tyajũ' jiyuty Jesusa' tyā'wē pante ca'ndnisa levadura's we'wemée, fariseo vite' saduceowe'sh caapiya'jni's we'werra tyā'jĩni's.

Pedro' jiyuc Jesusa' Dyus tashu yuusaateva
(Mr. 8.27-30; Lc. 9.18-21)

¹³Jycaajsa Filipino vitni chjamb Cesarea ja'ndasu pa'jrra', Jesusa' na'jĩnac pějy tyāa yacj u'jusawe'shtyi:

—Dyus Nchi'c Nasa Yuusa's ¿quimna jĩnata we'we' nasa'? jíte',

¹⁴na'wēty pta'sh:

—Maaí yu' Juan Bautistana jĩ'ty. Vite we'wesa' Eliasna jĩ'ty. Atsa' vite we'wesa' Jeremiasna meerra' vite casejne' Dyus yuwe pta'shsa jĩ'ty jĩna pta'shte', ¹⁵Jesus pějyrra':

—I'cue'sha' ¿quimna jĩ'cue? jíte', ¹⁶Simon Pedro' na'wēc pas:

—Indya' Dyus ítyisa Nchi'cngu, tyajy tashu yuusa jíte', ¹⁷Jesusa' pascu na'jĩna:

—Jonas nchi'c Simon, indy yacja' wala wecha yuja'. Indya's naa quiwete pitstjē'lj caajiyu'jmeeta'. Andy Tata cielute ũssa yuuc caajiyu'lj andya' Dyus ítyisa Nchi'cteva. ¹⁸Indya' Pedro yaaseng atsa' indyva ma'wēnga andya's ew jiyu tyā'wēy maava ew jiyuwa'ja's indy yacj nviitu'nja. Atsa' tyā'wē ew jiyunijũ' echtjē'lj yujva cnaymeena Dyus luuchtyi'. ¹⁹Dyus jycaajna ũsnite pa'jwa'lj dyi'ja's pjandewa'ja's indya's ũsu'nja, atsa' indya' maatyva we'werra': Pcaltyi' Dyusa' peltunaĩna jíte', peltunāyni yũutyna. Nava peltunaĩmeena jíte', peltunāynimée neeyũutyna jĩc.

²⁰Tyajũ' Pedrowe'shtyi neewe'wec, Jesusa' Dyus tashu yuusa yuj yu'ga jĩna maa yujtyva pta'shcajmén.

Jesusa' tyajy uuwa'ja's pta'shni

(Mr. 8.31-9.1; Lc. 9.22-27)

²¹ Tyāa entec Jesusa' nyafyrraj pta'sh tyāa yacj u'ljusawe'shtyi na'jīna:

—Jerusalenna u'ljwa'j ji'ptju. Cyteea' wala pcyuuni yu'nja judiu ntjē'jsawe'sh vite' sacerdote npiistjē'jwe'sh vite' Dyus leya's caapiya'ljsa tyāawe'sh cusete. Tyāawe'sha' icjetyna, nava tecj ente' qui' ityi yu'nja jīna pta'shte', ²² Pedro' Jesusa's fiite pe'ljna u'jrra na'wēc yu'cypej:

—Indya's tyā'wē yūuwa'j yu'sa' Dyusa' jytjāasmeevatsa', ewna jīte', ²³ Jesusa' yu'tjengrra na'wēc we'we Pedro's:

—Echtjē'j, andy tashuj mtyuté. Indya' suw wēenarrāa ūsngu. Dyus jytjāasni yu'sa' cytey yuumée, naa quiwega nasaa yaacynirrá'sngu cytey yuu wēje'.

²⁴ Tyajū' Jesusa' tyāa yacj u'ljusawe'shtyi qui' we'wec:

—Maava andy yacj yuu wēerra', peecy cacue jytjāasni's quījna jyuca nvijtrra yuurāa andy yacj yujya' ājanecue, macue pytjaa yuwa'j seena'sa ma'c yuu nava tyā'sa' ūucjmée. ²⁵ Tyā'wēme', naa quiwete peecy ityi fi'nzewa'jrrá's ya'nwe'wesa', Dyus yacj fi'nzewa'j yu'sa' iviituna. Nava andy yacj fi'nzepa'garrāa naa quiwete ityi fi'nzeni's yajcymée iviitusa', Dyus yacj fi'nzewa'j yu'sa' iviitumeena.

²⁶ Macue naa quiwetewe'sh yu'sa' jyuca cnayrrava peecy ūus yu's iviitute', ¿quījterrá' selpiima'c? Peecy ūusa's iviituyā'tje', ¿quimrra' nwe'wema'c?

²⁷ Jypa'yacymeete', Dyus Nchi'c Nasa Yuusa' qui' quījana Ney eena' cweetjni pyājte tyajy angesewe'sh yacj, atsa' ma'wērraj yūusaarrava teechna na'wērraj jypa'gatyna. ²⁸ Isatj we'we', ayte ūssa maafī yu' nee uumey yuune'cue tyā'wē Dyus Nchi'c Nasa Yuusa' jycaajya' pa'jni's jīnac pta'sh.

Jesusa' zhichcue yu'ptjejrta vyaani

(Mr. 9.2-13; Lc. 9.28-36)

17 ¹ Seis en scjēwniite', Jesusa' pe'ljna u'cj Pedro vite' pyacjsa Jacobo Juan tyāawe'shtyi teech vits walate. ² Sa' cytee pa'jrra', tyāawe'sh dyi'pte Jesusa' wala zhichcue yu'ptjejrta vya. Tyajy dyi'pa' sec na'wēc eena' cji'cjl', atsa' tyajy atjni ropa' seena' zhichcue chijme yuuc. ³ Naapcachja' Moises vite' Elias tyāawe'sha' Jesus yacj puuty we'wenaty vyaa. ⁴ Tyā'wē uyrra', Jesusna na'wēc we'we Pedro':

—Ayte' cue'sh ūswa'j wala ewa'. Atsa' indy ewna jīte', tecj wa'cuē tyaja'nja'w, vite' iindy jīi vite' Moises jīi vite' Elias jīi.

⁵ Tyā'jīna Pedro' we'wena ūsiyna, tāapj seena' zhichcue chijmesa cūjrra apjcu. Atsa' tyāa tāapjte na'jīnac we'weni ptjūuse:

—Na' andy Nchi'c wala wendynisa', tyāa pa'ga wala wechana ūstju. Tyā'sa' nwēese'jna cytey myuuwe jīni's ⁶ Pedrowe'sha' wēse'jrra', wala ūucjrra quiwega pquipja wetety. ⁷ Atsa' Jesusa' tyāawe'shtyi jya'ndyrra na'wēc we'we:

—Ūucjmée mquitate jīte', ⁸ quiiterra' Moiseswe'shtyi' uymeeyā'tja', naasāa Jesusrrāa yā'cj ūs yu'.

⁹Tyajū' tǵǵ'ju sa'jna u'juetsrra', Jesusa' na'jīnac jycaaj:

—Quim uyjtyva pta'shmeene'cue tyā'wē uyni's, Dyus Nchi'c Nasa Yuusáa uurrava qui' ityi yuupcach jīte', ¹⁰Pedrowe'sha' Jesusna na'wēty pējy:

—Dyus leya's caapiya'jsawe'sh pta'shrra', Elias cjuē'y yatste pa'jana jī'ty, sa' ǵma'wē yuua'lsacy atsqui'ty tyā'jī'? jīte', ¹¹Jesusa' na'wēc pta'sh:

—Isa, Elias cjuē'y yuj yatste pa'jwa'jsa yu'c, atsa' isa yuj pta'shi'ne'ta. ¹²Andya' na'jī'tj na', Eliasa' yatste pa'jyujc. Tyā'wēteva nasa' jiyumeerra, tyā'sa' quījquījva yūuty. Atsa' Dyus Nchi'c Nasa Yuusáava wala pcyuuni yuuna tyāawe'sh cusetey jīc. ¹³Atsa' Pedrowe'sha' jiyuty Jesusa' Juan Bautistana yajcyrra we'wetsteva.

Teech luuch wēechpa'jsa's Jesus nuycatyjini

(Mr. 9.14-29; Lc. 9.37-43)

¹⁴Tyajū' tyāawe'sha' shawendna quījatste', nasa wala pcjaacjena ūsu'ty. Atsa' teech pitstjē'j Jesus tashte peejyūcuena cūjrra', na'wēc pytjaa we'we:

¹⁵—Andy nchi'ca's meen peeygāj, wēechpa'jrra iiméj seena' pytjaa yuuna ūsa'. Maa enteya' ipycjēva cjēje'c, sa' yu'cjēva cjēje'c. ¹⁶Atsa' indy yacj u'jusawe'sh tashte jyūna cūjteva, nuycatyjia' ājameeta' jīte', ¹⁷Jesusa' na'jīnac pas:

—Dyusa' pu'chjina sūjwa'j yu'sa' ji'pjmeesata' naa nasa'. ǵBagachpcach i'cue'sh yacj pu'chna ūs ya'vatca? ǵBagachpcach ājamée fi'nze ya'vacue? Luucha's ayte mneejyūjwe jīte', ¹⁸jyūna cūjutspcachja', Jesusa' echa's juuna' we'werra cutyi'cj luuch ūusu, atsa' tyāa dundtey catyjinic neeyūu.

¹⁹Jesus yacj u'jusawe'sha' Jesusa'srráa fii pa'yarra, na'jīnaty pējy:

—Cue'sha' ǵquīj yūurracytja'w echa's cutyi'jya' ājamée? jīte', ²⁰Jesusa' pta'shcu:

—Dyusa' pu'chjina sūjwa'j yuurrá's yaacypa'gamée i'cue ājamée. Isatj we'we', Dyusa' pu'chjina sūjwa'ja's mostasa fiw na'wē le'chcuēsarráava ji'pjvatsa', naa vits wala's we'weni yacjrráa fiite qui'pya' ājane'cue. Dyusa' pu'chjina sūjwa'j yuurrá's yajcyvatsa', i'cue'sh yacja' quīj yujva tjēysameena. ²¹Na'wēsa echa' tjēymée yu' casejmeena, wala yūunaana Dyus yacj puuty we'wete yuurráa casejena jīc.

Jesusa' tyajy uuwa'ja's qui' pta'shni

(Mr. 9.30-32; Lc. 9.43-45)

²²Tyajū' Galilea quiwete ūsrra', Jesusa' tyāa yacj u'jusawe'shtyi' pta'shcu:

—Dyus Nchi'c Nasa Yuusa's nasa ewmeesa cusetey ducjni yuua'wa'ja'. ²³Atsa' icjetyna, nava tecj ente' qui' ityi yuuna jīna pta'shte', tyāawe'sha' wala nūsty.

Dyuus yatpa'ga vyy ducjni

²⁴Jesusa' tyāa yacj u'jusawe'sh yacj Capernaum chjambte pa'tje', dyuus yattewe'sh vyyu pcjacsa'we'sha' Pedro's tjengya' u'jrra na'wēty pējy:

—I'cue'shtyi caapiya'jsa' ǵducjetsmeevá' dyuus yattewe'sh vyyu's? jīte', ²⁵Pedro we'werra':

—Ducje'fīc jīnac pas. Sa' Pedro' Jesus ūsni yatte cūjutspcachja', Jesusa' na'jīnac we'we:

—Simon, indya' ¿maa sūju'nga? Naa quiwete jycaajsawe'sha' vyu caapcjacie'jrra', ¿quimtyi pēywa'ja' jī'ta? ¿Jycaajsa ji'l'we'shva ducje'ta', meerra' tyāa ji'jmée ecajuwe'shrráa vá'nta ducje'? jīte!, ²⁶Pedro! na'wēc pas:

—Ecajuwe'shrráaty ducje' jīc. Atsa' Jesusa' na'wēc we'we:

—Tyā'wēyā'tje!, jycaajsa ji'l'we'sha' ducjwa'jsameeta'. ²⁷Nava quim yujtyva caaūuscha'jya'mée indya' u'jrra ícjwalate wendy yūjnza's acjene'nga, sa' nyafyte wendy cāasa's caawayi'jrra uyuune'nga teeche vyu ji'pjna. Tyāa yacj ducjene'nga andy pa'gate vite' iindy pa'gate yā'jrra jīc.

Quim wejy jytjaacue jytujtesacy

(Mr. 9.33-37; Lc. 9.46-48)

18 ¹Tyāa ensu' Jesus yacj u'jusa docesawe'sha' tyajy tashte utyaarra na'wēty pējy:

—Naa quiwete Dyus jycaajya' quīi ente' ¿maa wejy jytjaacue walasacytja'w? jīte!, ²Jesusa' teeche luuchcuē's pa'yarra tyāawe'sh cshavyte tyajrra ³na'wēc we'we:

—Isatj we'we!, i'cue'sha' iwejch yaacyni's nvijtrra naa luuch na'wē yuumeerra yu!, Dyus jycaajna ūsnite u'caya' ājameene'cue. ⁴Tyā'wē quijteva ājmeecuesa naa luuch na'wē yuusa yuurráa, Dyus jycaajna ūsnite' maateva jytjaacue walasa yuuna. ⁵Maa nasava andyna jypa'gatsrra ma'wē wechana jypa'gaty tyā'wēy wechana naa luuchcuē na'wēsaty jypa'gana tyā' andyna jypa'gasa yuuna.

Pcalte cweete'jya'mée jypa'yacywa'ja'

(Mr. 9.42-48; Lc. 17.1-2)

⁶Andyna jypa'gasa ājmeecuesaty maava pcalte cweete'jsa's tyijcjtē scuutyj ū'cjni cueta's tundrra ícj wala dyiicjē acjvatsrráa, wejy ewna. ⁷Naa quiwete ewmeesa' bagachteva nes yuutyna. Nava naa quiwete ewmeesa yacja' seena' yuj ūucjūucja'. Sa' maava tyā'wē pcalte cweete'jena tyāa yu' wej yujva iyumeena.

⁸Tyāa pa'ga iindy cuse ma'c yuu meerra' iindy chinda ma'c yuu nava tyā'wē pcalte cweete'jpchāj yuutste!, tyā'sa' spē'tjrra mwāataj. Tyā'wē ptsuwa'jmée ipy walate e'nz cuse e'nz chinda ji'pj acjni yuu na'wē!, wejyva psumée ūtyi fi'nzewa'tje chinda ji'pjmée lengcuerráava cytee u'cani wejy ewa!. ⁹Iindy yafy tyā'wē pcalte cweete'jpchāj yuutste!, cutyi'jrra mwāataj. Infierno ipyte e'nz yafy ji'pj ūs na'wē!, wejyva psumée ūtyi fi'nzewa'tje teeche yafy yacjrráava u'cani wejy ewa!.

Piisháa vitusa yacj caaja'nda'jni

(Lc. 15.3-7)

¹⁰Naawe'sh ājmeecuesa maa yujtyva atsenuwe. Na'jī'tj na': naawe'shtyi pi'cyna u'jusa angeleswe'sha' cielute andy Tata tashte nes yuusaata!.

¹¹Tyā'wēme!, Dyus Nchi'c Nasa Yuusa' vitusaty nwe'weya'c quīj.

¹²I'cue'shvatsrráava ¿na'wē yūumeema'cue? Cien piisháa ji'pjrra!, teeche'sa' vitute!, noventa y nuevesaty vitssū nvijtrra piisháa vitusa's

pacueya' ¿u'jmeema'cue? ¹³Sa' uyrra', vite vitusamée noventa y nuevesate jytjaacue peeygājna wechaane'cue. ¹⁴Tyā'wēy i'cue'sh Tata cielute ūssava teechrráa yujva vitu jytjāasu'tsme' naawe'sh ājmeecuesateva.

Peecy yacjtjē'ja's manz us peltunāywa'j yuucy
(Lc. 17.3)

¹⁵Lindy yacjtjē'j indya's ewmée yūute', tyā'srráan pa'yarra mcaajiyu'j ewmée yūuni's. Lindy we'weni's nwēese'jeváana atsa' iindy yacjtjē'j yacj cytee yuwe ewuune'nga. ¹⁶Nava nwēese'jmeeváana atsa' testigo teech meerra' e'nz tyajrra tyāawe'sh dyi'pte we'wene'nga, cyaj tyāa e'nz testigosa' jiyutyna iindy yuwe ewuuya' pa'pchuni's. ¹⁷Tyāa e'nz testigo dyi'pte nwēese'jmeete', dyuus yatte jycaajsawe'shtyi mpeeta'sh. Atsa' tyāawe'shtyiva nwēese'jmeerra', yacjtjē'j na'wémée Dyusna jiimeesa na'wērráa nviitni yuuna.

¹⁸Isatj we'we': I'cue'sha' yuwetyi's naa quiwete pjeu'tje', cieluteva Dyus dyi'pte pjeu'jni yuutyna. Nava i'cue'sha' yuwetyi's pjeu'jmeete', cieluteva Dyus dyi'pte pjeu'jnimée yuutyna.

¹⁹Na'j'tj na': I'cue'sh qui'j yūune'jrrava e'nzsarráava tyā'wē yuute ewna jīna puuty we'werra, Dyusa's pi'quine'cue ma'wē yuuwa'ja'sva atsa' andy Tata cielute ūssa' cytey yuuna. ²⁰Tyāa pa'gatey e'nz ma'ty yuu meerra' tecj ma'ty yuu nava andya's yajcyna pcjaacjerra ūste', andya' tyāawe'sh cshavyte ūswa'jsatj jīc.

²¹Tyājū' Pedro' Jesus tashte utyaarra', na'jīnac pēy:

—Yacjtjē'j andya's ewmée yūusa's ¿manz us peltunāywa'j yuucy, meerra' sietepcachrráa ewmañ? jīte', ²²Jesusa' na'wēc pta'sh:

—Sietepcachrráa ewna jīya'vameetj. Sietesarrarráa setenta ājpcach peltunāywa'ja' jīc.

Selpisáa peltunāyya' wa'lsa yacj caaja'nda'jni

²³Tyāa pa'gatey Dyus jycaajwa'j en ājte', na'wē yuuna: Teech jycaajsa' tyā'sna selpisaawe'sh yuultyi pēyitscu yu'. ²⁴Yuulsaty teechsa na'wērraj pējyna u'juetspcachja', teech jyūna cūjty iiméj seena' wala yuulsana. ²⁵Tyāa selpisa' qui'j yacj yujva dewewa'j jī'pjmeec yu'. Atsa' patrona' tyāa yuulsa's tyweycaacj tyajy nyu, tyajy luuch, tyajy jī'pjuni yā'jrra jyuca tyāa yuula's dewewa'j. ²⁶Tyājū' selpisa' patron tashte peejyūcuerra pytjaa we'wec: Andya's meen peeygāj. Tyāa yuula's jyuca ducje'nja jīte', ²⁷patrona' peeygājna yuula's peltunāyrra ewte nvijtcu. ²⁸Nava tyāa peltunāynisa' casejna u'jrra', vite selpisáa tyā'sna walameecuē yuulsa'scu uy, sa' tyijcjtē uwerra icjetscu yu': Andyna yuulngu tyā'sna mducj jīna. ²⁹Tyājū' tyāa yuulusa' peejyūcuerra na'jīnac pytjaa we'we: Andya's meen peeygāj, jyuca ducje'nja jīteva, ³⁰cytey yuumée wejyva carcelna jyūna u'jrra cytee tyajc tyāa yuula's ducjpcach. ³¹Tyā'wē yuutste vite selpisaawe'sh uyrra', wala ñustyi. Sa' u'jrra pta'shtyi tyā'wē ewmée yūusáa patrona's. ³²Atsa' patrona' ewmée yūusa's pa'yarra na'wēc we'we:

Selpisáa peetjājwe, andya' iindy yuula's jyuca peltunāytju, pytjaang we'we tyāa pa'ga. ³³Atsa' indyva tyā'wēy indyna yuulusa's peeygājna peltunāywa'j ji'pjngu, andyva ma'wētca peeygāj indya's tyā'wēy jīrra', ³⁴tyāa patrona' wala ūusacharra, castigāycaacj yuula's jyuca ducjpcach.

³⁵Tyā'jīrra', Jesusa' na'wēc pta'sh:

—Teechsa na'wērraj ūusuj jyuca peltunāimeevá'cue i'cue'sh yacjtjē'jwe'shtyi, atsa' andy Tata cielute ūssava tyā'wēy castigaīna i'cue'shtyi' jīc.

Ptamsa tyuteewa'jme's Jesus caapiya'jni

(Mr. 10.1-12; Lc. 16.18)

19 ¹Tyā'wē we'wena jyā'jīrra', Jesusa' Galileaju casejna u'jīrra Judea quiwesu Jordan yu'cutetec pa'j. ²Cyte ūste', nasa wala pa'jty, atsa' nuycatyjic ātsa'saty.

³Naapcachja' fariseowe'sh maafī yu' Jesus tashte utyaana cūjīrra na'wēty pējy, pasya' shiingte' ewmēe vit-ya' sūjīrra:

—Ptamsarrava, nyu quījcuērrāa ājmēe yūuterrāa tyāapa'ga wāatajte ħewmañ? jīte', ⁴Jesusa' na'wēc pas:

—I'cue'sha' ħDyus libroute iilēymeevā'cue? Cytee we'werra': Dyusa' nyafiitey e'nziīty ja'ndarrajc vit pitstjē'j pety u'y yā'jīrra. ⁵Tyāa pa'ga pitstjē'ja' peecy neywe'sh tashu tyuteerra peecy nyu yuūwa'jsa yacj utyaawa'jsa', tyā'wē e'nzrrava teechsarrāa na'wē yuuna pa'jya' jī'c Dyus libroute'. ⁶Tyā'wē yūunijū', e'nzmēe teechrāac yuuna pa'ja'. Tyāa pa'ga Dyus pūpyrra nviitniiū' ptamsayā'ja' tyuteewa'jsameeta'.

⁷Tyā'jīte', na'wēty pējy:

—Tyā'wēte', Moisesa' ħquījya'ga peecy nyu yacj tyuteerra ets vitrra nyu's ūsrra tyuteewa'ja' jīna jycaaja'? jīte', ⁸Jesusa' na'wēc pas:

—I'cue'sh tyā'wē Dyus jycaajni's nwēese'jmeerra nyu yacj tyuteena fi'nzepa'ga iīrrāac Moisesa' tyā'wē yūuwa'ja's nviit. Nava tyā'wē yūuwa'ja's nyafiitey Dyus nviitnisa yu'tsme'. ⁹Andya' na'jī'tj na': Nyu tyā'wē vite pitstjē'j yacj pcal yuuna fi'nzesameete vāa nyu's wāatajīrra vite u'y yacj ptamuuna na' tyā'wē vite yacj ptamuupa'ga pcal canzh yuusāa yuuna. Meerrava nmi' wāataanisa u'y yacj maava ptamuuna na' tyā'wē u'y wāataanisa yacj ptamuupa'ga pcal canzh yuusaaīrrāa yuuna jīte', ¹⁰Jesus yacj u'jusawe'sha' na'wēty we'we:

—Tyā'wēte', ptamumēe fi'nzeni wejy ewna jīty. ¹¹Atsa' Jesusa' na'wēc pas:

—Tyā'wē yuja', nava jyucay yu' ptamumēe fi'nzeya' āja'tsmeeta', naasāa quimnane' Dyusa' ptamumēe fi'nzewa'ja's nviit tyāarrāa ptamumēe fi'nzeya' ājana, vite' ptamumēe Dyusrrāana selpiina fi'nzewa'jsata'.

¹²Na'wēsa yu' ptamumēe fi'nzeya' āja'ty: Maafī yu' ptamumēe fi'nzeya' upysatyna, atsa' vitetyi's naa quiwete pitstjē'jwe'sh iīrrāaty ptamumēe fi'nzewa'ja's vitu', atsa' vite' ptam yuumēe Dyusrrāana selpiina fi'nzewa'jsata'. Ptamumēe fi'nzeya' ājasa', ptamumēe fi'nzetyina jīc.

Luuchcuēty Jesus bendeciyni

(Mr. 10.13-16; Lc. 18.15-17)

¹³Tyājū' Jesus tashte luuchcuē nuyapa'jty, luuch dyictjesu peequinzerra Dyus cusete neewe'wecajn. Nava Jesus yacj u'jusawe'sha' ūuscha we'wety nuyapa'jsaty. ¹⁴Atsa' Jesusa' na'wēc we'we:

—Luuchcuē andy tashte yuusaaty'! cuch yupnuwe, tyāa pa'gatey cielute Dyus jycaajna ūsnisa' naa luuchcuēwe'sh na'wēsa jīi írrá'.

¹⁵Tyā'jírra', luuchcuēwe'sh dyictjesu peequinzerra Dyus cusete neewe'werra', tyājū u'cj.

Pitstacy wala ji'pjsa Jesus yacj puuty we'weni

(Mr. 10.17-31; Lc. 18.18-30)

¹⁶Tyāa e'su' teech pitstacy Jesus tashte pa'jrra na'wēc pējy:

—Caapiya'jsa wala ewsa, mpeeta'sh. ¿Quīj ew yūurra ptsumée ĩtyi fi'nzewa'ja's ji'pjuqui'tj? jīte', ¹⁷Jesus pasrra':

—¿Quīj yuupa'ganga andya's ewsa jī'? Ew yūusa' teech yuurráa ūsa' tyā' Dyusa'. Atsa' ptsumée ĩtyi fi'nzewa'ja's ji'pju wēerra', Dyus jycaajnityi' cytey myuu jīte', ¹⁸pitstacya':

—¿Maatyna? jīna pējyte', Jesusa' pta'shcu:

—Dyusa' na'wēc jycaaja': Nasa icjwa'jme', ptamsayā'ja' vite yacj pcal yuuwa'jme'. Pesweewa'jme'. Vitety íshiina nuywe'wewa'jme'.

¹⁹Neywe'shtyi peeygājna ewrráa yūuna fi'nzewa'ja'. Peequí ma'wēnga ya'peeygāja' tyā'wēy mpeeygāj vite nasatyva jīte', ²⁰pitstacy pasrra':

—Tyāaty' le'chcuējūjy cytey yuunatj waláa, atsa' ¿quīj wejy peejyna? jīte', ²¹Jesus pasrra':

—Dyus jycaajnityi' jyuca cytey nwēese'jsa yuu wēerra', u'jrra iindy ji'pjunityi' jyuca tyweyrra ji'pjmeecuésaty mes. Sa' tyā'wē yūurra' cielute ji'pjsa yuune'nga. Tyā'wē yūurra andy yacj myuj jīte', ²²tyāa pitstacya' tyā'wē wēse'jrra' ūusnac u'j, wala ji'pjsa yu'c tyāa pa'ga.

²³Tyājū' Jesusa' na'wēc we'we tyāa yacj u'jusawe'shtyi:

—Isatj we'we', ji'pjsa yacja' wala yuj tjēya' Dyus jycaajna ūsnite u'cawa'j. ²⁴Na'jī'tj na': camello tyacuesa' ¿ma'wē yūnz cafyga cjēwya' ājacy? Atsa' ji'pjsa yacja' tyāate jytjaacue tjēya' Dyus jycaajna ūsnite u'cawa'j.

²⁵Tyā'jīni's wēse'jrra', Jesus yacj u'jusawe'sha' wala cuj yajcytyi, sa' tyāawe'sh pwe'sh na'wēty puuty ya'paapēyi':

—Tyā'wēte', ¿quimrrá' ewte neeyūuya' ājama'c? jīte', ²⁶Jesus tjengrra' na'wēc we'we:

—Nasa' Dyus yacjmée yu', ewte neeyūuya' ājameeyujtyna. Nava Dyus yacj yu', quīj yujva tjēysa meea'.

²⁷Tyā'jīte', Pedro' na'wēc pējy:

—Cue'sha' indy yacj yujya' cue'sh ji'pjuni's jyuca nvijttja'w, sa' ¿quij jypa'gacytja'w? jite', ²⁸Jesusa' na'ljinac pta'sh:

—Isatj we'we', naa quiwete pcalsa's jyuca yu'ptjejrira ewsarrarráa yuuwa'j en ájte', Dyus Nchi'c Nasa Yuusá' pa'jrira jycaajya' tacjetspcachja', andy yacj yuusáa i'cue'sh docesava andy yacj jycaajsa yuune'cue Israel ji'l docesaty. ²⁹Maava jyucaysa tyá'wē andy yacj yujya'rráa tyāawe'sh yat, quiwe, nyacjwe'sh, npe'shwe'sh, neywe'sh, nyu, nchi'cwe'sh, niisawe'sh tyāaty jyuca nviit-sa' tyāa nviitnisate jytjaacue wala jypa'gatyna, sa' ptsumée ityi fi'nzewa'ja'sva jypa'gatyna. ³⁰Nava jypa'yacymeete', macue yatstewe'shrrava, nmejtewe'sh yuutyna; naapcachja' nmejtewe'sh yu', yatstewe'sh yuutyna jic.

Mjiisa yacj caaja'nda'jrira Jesus caapiya'jni

20 ¹Dyus jycaajni ente mjiisa' na'wē yūuni yuutyna: Teech mjii namu' cusí casejrira mjiisa pacueya' u'cj, uutjashte uva undewa'jsa. ²Sa' mjiiwa'jsa yacj puuty we'wec teen mjiini's áj ducjya'. Tyá'wē yūurra mjii ejn caacj. ³Sa' cusí las nueve yuutspcachja', qui' casejc, sa' vite quij mjiiva ji'pjmée plaasasu u'ljusaty uyrra', ⁴tyāaty' na'wēc we'we: Me'jwe mjiiya' andy mjii ejte, teen uta mjiinite áj ducje'nja jite', tyāawe'sha' u'ljty mjiiya'. ⁵Tyajū' mjii namu' ēepyāj wala qui' casejc, sa' cusutste las tresteva qui' casejc, tyāatyva tyá'wēy mjiiya' caacj. ⁶Tyajū' cusutste las cincote plaasasu qui' casejrira', vite uycu quij mjiiva ji'pjmée u'ljusaty. Tyāawe'shtyiva na'wēc we'we: I'cue'sha' ¿quij yūurra mjii ji'pjmée u'ljucue teen uta? jite', ⁷tyāawe'sha' na'wēty pas: Quimva mjiiya' pa'yameeta' jite', mjii namu' caacj tyajy mjii ejte: U'jrira andy mjii ejte mjiine'cue atsa' andya' wala ew ducje'nja jic. ⁸Tyajū' jyuca custe', mjii namu' pa'yac cytee cmāaji'jsa's na'ljina: Mjiisaty' pa'yarra mducj, nava nmej mjiiya' pa'lsaty cjuē'y nyafyte ducjrira teen uta mjiisaty' nmejte ducjna jyā'jane'nga jite', ⁹cytey yuuc. Atsa' cusutste las cincote mjiiya' pa'jsa cjuē'y utyaarra teehsa na'wērraj jypa'gaty teen uta mjiinite ájrrarráa. ¹⁰Tyajū' cusí mjiiya' pa'jsa': Cue'sha' jytjaacue jypa'ga'nja'w sūjna ūsrrava, tyacueírráa jypa'garra' ¹¹ūscha we'wety mjii namu's na'ljina: ¹²Naawe'sha' nmej pa'jrira naasáa teech ora yuurráaty mjii. Nava ducjni yu'sa' cue'sh nacueírráaty jypa'ga. Naapcachja' cue'sh yu' teen utatja'w mjii, secte yaachana wantáyna jite', ¹³mjii namu' na'ljinac pas: Namicu, indy yacj ewmée yūutsmeetj. Andya' teen uta mjiini's áj ducje'nja jina indy yacj puuty we'wete', ewna ¿jimeengá'? ¹⁴Tyāasa iindy mjiini's áj ducjni's jypa'garra me'j. Indyna nacuetj ducj tyacuerrarráa ducjetstju nmej mjiiya' pa'lsatyva. ¹⁵Nava andy ji'sa' ma'wē yūuwechteva cytey yu'nja. Meerra' andy ew yūuni's indya' ¿atse'vá'nga? jic mjii namu'. ¹⁶Tyá'wē yūuwa'jsata' nmejtewe'sha' yatstewe'sh yuutyna, naapcachja' yatstewe'sha' nmejtewe'sh yuutyna. Tyāa pa'gatey pa'yanisa yu' wala cujta', nava tyjityjnisa yu' cujmeeta' jic.

Jesusa' tyajy uuwa'ja's qui' pta'shni

(Mr. 10.32-34; Lc. 18.31-34)

¹⁷Jesusa' Jerusalen dyi'tje u'juetsrra', tyāa yacj u'jusawe'sh docesaty fiite pe'ljna u'jrra na'ljinac pta'sh:

¹⁸—I'cue'sha' jii i'cue Jerusalenna u'juetstja'w. Cyteea' Dyus Nchi'c Nasa Yuusa's uwerra ducjni yuuna sacerdote npiitstjē'j vite' ley caapiya'jsawe'sh cusete. Atsa' tyāawe'sha' icjwa'j vitrra ¹⁹judiu ji'jmée vite nasaty ducjetyna, tyāawe'sha' weechna pāpana cluuscjē qui'prra icjajn. Nava tecj ente' qui' ityi yuuna jīc.

Jacobowe'sh njī'j Jesusa's pēyni

(Mr. 10.35-45)

²⁰Tyajū' Jacobo Juan njī'j Zebedeo nyua' tyāa e'nz nchi'csa yacj Jesus tashte peejyūcuenā utyaaty, tyāawe'sh pēyni's Jesusa' cytey yuucajn. ²¹Atsa' Jesusa':

—¿Quījcue yūu jytjāasu'? jīte', Jacobowe'sh njī'ja' na'wēc we'we:

—Indya' naa quiwete jycaajya' quījrra', ū'cue luuch naa e'nzsaty iindy pucacjē pdyi'p cachwa'ja's ūsune'nga jīte', Jesus we'werra':

²²—I'cue'sha' jiimeerrai'cue tyā'wē pēyi'. Andy na'wēy pytjaa yuurra uuwa'ja's ūucjmée jypa'gaya' ¿ājama'cue i'cue'sha'? jīte':

—Āja'nja'w jīnaty pas.

²³Atsa' Jesusa' pta'shcu:

—Isa, i'cue'sha' andy na'wēy pytjaa yuurra uuwa'ja's ji'pjuyujune'cue. Nava tyā'wē andy pucacjē pdyi'p cachwa'j yu'sa' andy ūsu'tsmeetj. Tyā'sa' naasāa andy Tata yuurraā ūsuna quiim jīi pjeu'jrra ji'pjna tyā'sna jīc.

²⁴Atsa' diezawe'sha' ūusachaty Jacobowe'sh tyā'wē pēyni's wēse'jrra.

²⁵Nava Jesusa' pa'yarra na'wēc we'we:

—I'cue'sha' peecy jii i'cue, naa quiwete jycaajsa' tyāawe'sh nasaty juuna'ty jycaaja', atsa' tyā'wēy npiitstjē'jsava tyāawe'sh jype'jnisaty juuna'ty jycaaja'.

²⁶Nava i'cue'sh yu' tyā'wē juuna' jycaajwa'jsamée i'cue, wejy yuuva i'cue'sha' walasa yuu wēerra', vitesa cusete selpisāa yuuwa'j ji'pjī'cue. ²⁷Atsa' i'cue'sh maava tyā'wē vitesaty jycaajsa yuu wēerra', vitee jycaajni fi'nzewa'ja'. ²⁸Tyāa pa'gatey Dyus Nchi'c Nasa Yuusāa yujva tyā'sna selpii jytjāasya' quījme', wejyva nasaty nwe'wena selpiiya' quījrrac ya'ducj nuste uuya' jīc.

E'nz pitstjē'j uyya' ājasameety Jesus nuycatyjni

(Mr. 10.46-52; Lc. 18.35-43)

²⁹Tyajū' Jerico chjambuj casejna u'juetste', nasa' iimej wala yuwe'ty Jesus e'ste. ³⁰Tyāa dyi'tje e'nztyi cachrra u'p yu' uyya' ājasamée. Sa' Jesus scjēwni's wēse'jrra' sustyi we'we:

—David ji'j, cue'shtyi meen peeegāj jīte', ³¹nasa' ūuscha we'wety shuuna' yuucajn. Nava tyāawe'sha' jwee'irráaty sus we'we:

—David ji'j, cue'shtyi meen peeygāj jīna.
³²Atsa' Jesusa' yujurra tyāa uyya' ājasameetyi' pa'yarra na'wēc pējy:
 —¿Quījcue yūu jytjāasu'? jīte', ³³tyāawe'sh pasrra':
 —Cue'sh yafytyitja'w pjaande jytjāasu' jīte', ³⁴Jesusa' peeygājrra
 tyāawe'sh yafysu jya'ndyitspcachja', tyāa dundtey uyya' ājarra Jesus yacj
 u'jty.

Jesus Jerusalente u'cani

(Mr. 11.1-11; Lc. 19.28-40; Jn. 12.12-19)

21 ¹Jerusalente utyaana pa'jatsrra', Betfagé chjambcuēte cjuē'y
 pa'jty. Tyāa chjambcuē' Olivos vits utyagac ūsu'. Tyajū' Jesusa'
 tyāa yacj u'jusawe'sh e'nzsaty na'jīnac caaj:

²—Ay dyi'pga chjambcuē ūsa' cytee me'jwe, sa' cyteea' uyuune'cue
 burru luuch nji'jsa tundni ūsna tyā'sa' jyūcjwenderra jyūne'cue.

³Jyūna yujte uyrra' pēyivāatyna atsa' cue'shtyi jype'jsa' peejya', nava
 tyachmeyna caashwendu'juna jīne'cue.

⁴Dyus yuwe pta'shsa we'weni' cytey yuuc. Tyā' na'jīnac fi'j:

⁵Sion chjambte nasaty na'jīna pta'shine'cue:

Mtjengwe, i'cue'shtyi jycaajsa yuja',

Pytjaacuesa na'wē tjengna, burru luuchte a'jrra,

Atsa' tyāa burru nji'ja' ctū'se'jnisa' jīna fi'jni'.

⁶Tyajū' tyāawe'sha' u'jrra Jesus ma'wē jycaatje', cytey yuuty. ⁷Sa' burru
 nji'ja's jyūna pa'jty luuch yā'jrra. Tyajū' burru luuch castyaja'jnimeesa's
 tyāawe'sh atyjtyi pustyi, atsa' Jesusa' tyāate a'cj. ⁸Nasa wala cuj pi'cyna
 u'jsawe'sh yu', tyāawe'sh atyjtyi dyi'jsuty pusna u'jue' Jesus scjēwwa'jsu.
 Maaí yu' ējya spē'tjrra tyā'wētyi dyi'jsu pusna u'jue'. ⁹Atsa' nasa' yatste
 u'jsa vite' e'ste yuusa tyāawe'sh jyucaysa na'jīnaty sus we'wena u'jue':

—Dyus caajnisala wala yuj jytujtjesa yuja' jycaajsa David ji'j. Dyusa's
 wechaaga wala ew yūupa'ga jī'ty.

¹⁰Tyajū' Jesusa' Jerusalente u'cate', cytee nasa jyucaysa seena' wala
 sustyi na'jīna paapējyna:

—Na' ¿quimna? jīte', ¹¹pta'shtyi na'jīna:

—Naaí Dyus yuwe pta'shsa Jesusa', Galilea quiwesu Nasaret
 chjambtewe'sh jī'ty.

Dyuus yatte tyweysaaty Jesus cashishni

(Mr. 11.15-19; Lc. 19.45-48; Jn. 2.13-22)

¹²Tyā'wē yūuni e'su' Jesusa' dyuus yatte u'carra jyuca eca cashishcu
 cytee tyweyna qui' weyna ūssaty. Sa' vyu yu'ptjejna ūsni mesa vite' tumb
 chijme tyweyna u'pnityva jyuca pūshcu. ¹³Sa' na'wēc we'we:

—Dyus libroute' na'wēc we'we': Andy yata' Dyus yacj puuty we'wena ūswa'jrrá'
 jī'c. Nava i'cue'sha' peswée pcjaacjena ūsni cafy na'wērráa vitrra ji'pji'cue jīc.



(San Mateo 21.9)

¹⁴ Cytee dyuus yatte maafi yu' Jesus tashte utyaaty, uyya' ajasamée, chinda lengsa, atsa' tyāawe'shtyi' nuycatyjic. ¹⁵ Nava sacerdote npiitstjē'jwe'sh vite' ley caapiya'jsawe'sh tyāawe'sha' ūsachaty, tyā'wē quim yujva ājanimeesa's caavya'ja'tje' cytee dyuus yatte ūssa luucha' sus we'werra' jycaajsa David ji'ja's wala wecha'tja'w jīna susni's wēse'jrra.

¹⁶ Sa' Jesusa's pējytyi:

—Na'wē we'wena ūsta' tyā'sa' ¿wēse'je'nga'? jīte', Jesusa' pascu:

—Wēse'je'fītj. Nava i'cue'sha' ¿iilēeymeecue'? tyā'wē yūuwa'ja's Dyus libroute na'jīnac we'we':

Luuch le'chcuē vite' chu'chsava tyā'wē zhichcue tuutje'jwa'ja'sngu vit jī'c.

¹⁷ Tyajū' Jesusa' cytee nvijtrra u'cj chjambu casejna sa' Betania chjambtec pe'te.

Higuera fytūu tash yūnsame's Jesus atsewe'weni

(Mr. 11.12-14; 20-26)

¹⁸ Cuscuscjē' Jesusa' chjambna qui' shawendna u'juetsrra', wēc. ¹⁹ Sa' dyi'j pucate higuera fytūu tash ūste uyrra', tjengya' utyaac. Nava quij yūn yujva uyme', etsrrác ji'pj yu'. Atsa' tyāa fytūu tasha's na'wēc we'we:

—Āchja' peena yu' yūnmeene'nga jītspcachja', naa dundtey fytūu tasha' ujnndycu. ²⁰ Tyāa yacj u'jusawe'sha' tyā'wē uyrra', wala cuj yajcyna na'wēty pējy Jesusa's:

—Fytūu tasha' ¿quij yūurraga tyacue wala dund ujnndy? jīte', ²¹ Jesusa' na'wēc pas:

—Isatj we'we': Cuj jwend yajcymée Dyusa' pasyujuna sūjwa'jrrá's yajcyrra', andy vittju tyā'wērráamée, na'wē yūuya'va ājane'cue: Naa vits wala ayjyu u'jrra ícj walate tee cjēe jīne'cue, atsa' cytey yuuna.

²² I'cue'sha' quij pējyrrava Dyus yacj puuty we'wene'cue Dyusa' pasuna sūjna, sa' tyā'wē yūurra' jypa'gane'cue jīc.

Dyuus yatte Jesus juuna' yūuni's pēyni

(Mr. 11.27-33; Lc. 20.1-8)

²³ Tyajū' Jesusa' dyuus yatte u'carra caapiya'jatspcachja', sacerdote npiitstjē'jwe'sh vite' judiu ntjē'jsawe'sh cūjrra' na'wēty pējy:

—¿Quij yūupa'ganga tyā'wē dyuus yatte jyuca suw? ¿Quimga jycaaj tyā'wē yūuwa'ja's? jīte', ²⁴ na'wēc pas:

—Andyva i'cue'shtyi pējy ya'vatj, atsa' andy pēyni's pasya' ājate', andyva pta'shi'nja quim jycaatje tyā'wē yūurrava. ²⁵ Juana's ¿quimga jycaaj yu'te bautisāycajn? ¿Dyus vá' jycaaj, meerra' naa quiwete pitstjē'jwe'sh váa ne'ta jycaaj? jīte', tyāawe'sh pwe'sh puuty ya'paapēyi'ty:

—Dyusne' jycaaj jīna paste', tyā'wēte' ¿mjīitecue nwēese'jmée? jīna.

²⁶ Atsa' naa quiwega nasa jycaajnine' yu' jīya'va ājame'nja'w. Tyā'wēme',

nasa jyucaysa Juan ju'ngurrarráaty we'we', Dyus jycaajnine' yu' jīna tyāatyja'w ūucju' jīnaty puuty we'we. ²⁷Sa' ājameerra', Jesusa's na'wērráaty pas:

—Jiimeetja'w jīna. Atsa' Jesusva tyā'wēyrráac pas:

—Andyva pta'shme'nja quim jycaatje tyā'wē yūurrava jīc.

E'nz nchi'csaty caaja'nda'jrra caapiya'jni

²⁸Tyajū' Jesusa' na'wēc we'we:

—I'cue'sha' ūus miijajcywe, na'wē caaja'nda'jrra pējyja'vatj: Teech pitstjē'ja' e'nz nchi'ccu ji'pju', sa' teeche'sa' na'wēc jycaaj: Āchja' andy mjīi ejte uva ujnđeya' me'j jīte', ²⁹nchi'c pasrra': U'j wēemeetj jīrrava, ūus yajcyna u'prra', mjīiya' u'cj. ³⁰Tyajū' neya' vite nchi'ca'sva tyā'wēy jycaaj. Atsa' tyā' na'wēc pas: Ewna, u'jue'nja jīrrava u'jme'. ³¹Āchja' i'cue'shtyi ¿ma'wēga tjengu'? ¿Maasaga ney jytjāasni's cytey yuu? jīte', tyāawe'sh pasrra': Nyafyte jycaajnis nchi'c jīty. Atsa' Jesusa' na'wēc we'we:

—Isatj we'we', gobierno jīi vyu pcjacjsawe'sh vite' u'ywe'sh pcal yuuna fi'nzesa tyāawe'sh cjuē'y Dyus jycaajnite u'catyna, naapcachja' i'cue'sha' u'caya' ājamée ūsi'cue. ³²Tyāa pa'gatey Juan Bautista' caapiya'jna pa'cj ptsumée ityi fi'nzewa'ja's. Tyā'wēteva, i'cue'sha' jypa'gameei'cue. Naapcachja' gobierno jīi vyu pcjacjsawe'sh vite' u'ywe'sh pcal yuuna fi'nzesa tyā'wēsa yu' jypa'gaty. Nava i'cue'sha' yafyju uyrrava pcaltyi nvijtrra Dyus tashte shawendmeei'cue.

Mjīisawe'sh patron nchi'ca's icjni yacj caaja'nda'jni

(Mr. 12.1-12; Lc. 20.9-19)

³³Vite ejemplo na'sna mwēese'jwe: Teech quiwe namu' uutjash vitcu, sa' peecu'j upjrra teeche ajte uva's cu'swa'j tyajc, sa' ēete tejcarra jyuca tjengwa'j yatva tyajc. Tyā'wē yūurra tyāa quiwe's mjīisaty pqui'jrra jyu'j dyi'cj u'j. ³⁴Uva tjē'jwa'j en ājte', tyā'sna selpisaaty caajc quiwee pqui'jnipa'ga pējyja'. ³⁵Nava quiwee pqui'jsawe'sha' tyāa selpisaaty uwerra maai' yuutyi' pāpana vitety icjna vitetyi' cuet wāatatajnaty yūu. ³⁶Tyā'wē yūute', quiwe namu' jwee'írráac cuj caajna ūsu' selpisaaty. Nava quiwee pqui'jsawe'sha' jyucaytyi tyā'wērrarráaty yūu.

³⁷Tyajū' nmejte' tyajy nchi'c yuunac caaj: Andy nchi'ca's cuch tyā'wē yūumeeváatyna sūjrra. ³⁸Nava quiwee pqui'jsawe'sha' nchi'ca's uyrra', tyāawe'sh pwe'sh na'wēty puuty we'we': Ney uute' naa tyā'wē quiwe's iiyamuwa'jsa', atsa' tyā'sa' icjega quiwe' cue'sh jīi yuucajn jī'ty. ³⁹Tyā'jīyā'jrra', uwerra tyāa quiwe'jū cutyi'jrra icjtyi.

⁴⁰Tyā'wē pta'shrra', Jesusa' na'jīnac pējy:

—Tyā'wē yūute', quiwe namu' pa'jrra', ¿quīj yūucy quiwee pqui'jsawe'shtyi'? jīte', ⁴¹na'wēty pas:

—Tyāa ewmeesatyi' peeygājmée icjrra tyāa quiwe's vitety pqui'jina quiwee pa'ga namu's wa'lmée ducjwa'lsaty jity.

⁴²Atsa' Jesusa' na'wēc we'we:

—I'cue'sha' ħbagachte yujva iilēeymeevá'cue Dyus librute na'jina fi'jni's?

Yat tyaajsawe'sha': Naa cueta's selpime' jirra wāatajty.

Nava tyāa íc yat macuesanava chjāchja neewewa'jsa yuuna pa'j.

Tyā'wē neewewa'jsa yuuna pa'jwa'ja's Dyuscu vitrra nvijt.

Tyāa pa'ga cue'sh yacja' wala wecha yuja' ħji'tsmeena'?

⁴³Tyā'wē atsepa'ga írráatj na'jī': Dyus jycaajni's i'cue'shtyi cusa'jrra vite nasaty ūsni yuuna, quiwe namu's pqui'pja'ga wa'lmée ducjajn. ⁴⁴Sa' maava tyāa cuet cajcuega wetesa' jyuca chcateteena, meerrava tyāa cuet nasa cajcucjē weterra' jyuca cu'china jic.

⁴⁵Atsa' sacerdote npiitstjē'jwe'sh vite' fariseowe'sha' jiyuty tyāawe'shtyi írráa we'werra tyā'jīni's. ⁴⁶Sa' tund wēerrava ūucjtyi, tyā'wē nasa' Jesus ju'ngurrarráaty ūs yu', Dyus yuwe pta'shsa' jina tyāa pa'ga.

Boda fiesta yacj caaja'nda'jrra caapiya'jni

22

¹Jesusa' vite ejemplo caaja'nda'jrrac pta'sh na'jina:

²—Dyus jycaajni ente' na'wē yūuna: Teech jycaajsa' tyajy nchi'ca's caamba'jrra fiesta vitcu. ³Sa' tyāa jycaajsa' selpisaaty jycaacj pi'cynisaty pa'yacajn. Nava tyāawe'sha' wa'lrta yuwe'tsmeeta'. ⁴Tyā'wēteva, qui' jycaacj vite selpisaaty na'jina: Pi'cynisaty' yuucajane'cue. Ū'wa'ja's jyuca pjeu'jniyā'j ji'ptju, tajcy caaniishi'jnisaty quiicje'tj, atsa' myujwe boda fiestate jī'c jīne'cue. ⁵Tyā'wē cytey yuuteva, pi'cynisawe'sha' nwēese'jmée wejyva tyāawe'sh uutjashsu vite' tyāawe'sh vyu cnaynisurráaty u'j. ⁶Atsa' vite yu' selpisaaty uwerra wala pāpaty icjpcach. ⁷Tyā'wē yūute', jycaajsa' seena' wala ūusachac, sa' tyajy soldauwe'shtyi caacj tyāa nasa icjsaty ca'tuva icjrra tyāawe'sh chjamba's jyuca cambcajn. ⁸Tyājū' jycaajsa' na'wēc we'we tyā'sna selpisaaty: Boda fiestate ū'wa'j jyuca pjeu'jniyā'j ūsa', nava pi'cynisawe'sha' wa'lrta pa'jmeeta'. ⁹Atsa' āchja' me'jwe cllicjunsuwe'shtyi pi'cyya' maatyva jyuca boda fiestate yuucajn. ¹⁰Tyā'jīte', selpisaawe'sha' cllicjunsu u'jrra maatyva jyuca pcjacjtyi ewsa ma'c yuu meerra' ewmeesa ma'c yuu nava jyuca. Atsa' fiesta yatte jyuca nasa utaty.

¹¹Tyājū' jycaajsa' pi'cynisaty tjengya' u'carra', uycu teech pitstjē'j tyā'wē boda fiestate atjni ropa yacjmée u'pte. ¹²Sa' na'wēc we'we: Namicu, indya' ħqui'jya'nga ayte u'ca', boda fiestate atjni ropa ji'pjmeerra'? Tyā'jīte', tyāa pitstjē'ja' pasmée shuuna'c neeyūu. ¹³Atsa' jycaajsa' mesate puutsutssaty na'jīnac jycaaj: Naa pitstjē'ja's uwerra mtundwe chinda pety cuse yā'jrra, sa' ecaju cutyi'jrra chji'ndy walate macjwe, cyte' qui'tjtyi csuusul'jna ū'nena ūucjajn. ¹⁴Tyāa pa'gatey wala yuj pa'yateva, jyucay yu' utyaawa'jsameeta' jic.

Gobierno's ducjwa'ja'sva pëyni*(Mr. 12.13-17; Lc. 20.20-26)*

¹⁵Tyajü' fariseowe'sha' u'lrra tyäawe'sh pwe'sh puuty we'wety Jesusa's ewmeete nviit wëerra. ¹⁶Tyā'wë yūurra' tyäawe'sh ju'ngu ūssa vite' Herodes nasa tyäawe'shtyi' caajty Jesusa's na'jina pëycajn:

—Caapiya'jsa, indya's jiitja'w, quijteva isasarráanang we'we'. Sa' Dyus tashite pa'jwa'j dyi'ja'sva ew yuurráang caapiya'ja'. Nasaa jycaajna yu'cypejnity nwëese'je'tsmeeng, tyāa pa'gatey indya' nasa ewsa na'wë tjengsaty jiyumey ju'ngu yu'tsmeeng. ¹⁷Indya' ¿ma'jiqui'ng? Jycaajsa Cesara's vyu ducjte ¿ewmañ? Meerra' ¿ducjmeete vāa ewna? jite', ¹⁸Jesusa' na'wëc pas tyäawe'sh ewmëe yaacyni's jiyurra':

—Andy dyi'pterrāa ew we'werra', ūuste yu' ewmëe yaacysawe'sh, ¿quijya'cue andya's ewmeete nviit wëerra tyā'wë pëyí'? ¹⁹Ducjwa'j vyu's mneejyūjwe jite', teech vyu's jyūna cūjty. ²⁰Atsa' Jesusa' tjengrra' na'wëc pëjy:

—¿Quiim dyi'pa's qui'pnina, sa' quiim yase's fi'jnina naa vyute'? jite':

²¹—Cesar dyi'pa's ji'pja', sa' tyajy yase's fi'jni' jīnaty pas. Tyajü' Jesusa' na'wëc jycaaj:

—Cesar jī's Cesara's ducjwa'ja', sa' Dyus jī's Dyusna ducjwa'ja' jite', ²²paapëysawe'sha' wala cuj yajcyna neeyūuty, sa' tyajü u'ljty.

Uusaawe'sh qui' ityi yuuwa'ja'sva pëyni*(Mr. 12.18-27; Lc. 20.27-40)*

²³Tyāa entey saduceowe'sh maaíi yu' Jesusa's tjengya' pa'jty. Nasa' uuyā'jrra' peena yu' ityi yuuwa'jsameeta' jīna we'wesaty yu' tyāa saduceowe'sha'. Tyāasa na'wëty paapëjy:

²⁴—Caapiya'jsa, meen peeta'sh. Moises we'werra': Maa pitstjē'jva luuch ji'pjumey nyu's nvijtrra uute', uusāa nyacja' tyāa u'y neeyūsāa yacj cambawa'jsa', atsa' tyāate luucha' uusāa nchi'c na'wë neeyūuna jī'c. ²⁵Atsa' cue'sha' jiitja'w siete pitstjē'j pyacjtyi u'pu'. Atsa' nyafytewe'sha' cambarrava luuch ji'pjumey uuc, tyajy nyua's nyacj e'stewe'sh jīi nvijtrra. ²⁶Atsa' nyacj e'stewe'shva tyā'wëyrrāa nyacj tecjtewe'sh jīi nvijtrrac uu, sa' tyā'wërrarrāaty yūu siete pyacjsay. ²⁷Atsa' nmejte' tyāa u'yva uuc. ²⁸Tyā'wë uurrava qui' ityi yuu ente', ¿maa yacj isa nyu yuuwa'jsacy? tyā'wë cyanz pyacjsatyíi tyāa u'yrrarrāa iimi'sa' na' jite', ²⁹Jesusa' na'wëc pta'sh:

—I'cue'sha' Dyus libroute fi'jni ūsa' tyā' isa yujna sūju'tsmeei'cue, sa' Dyusa' quijya'va jyuca ājana sūju'tsvameei'cue. Tyāasa jypumbana ūsi'cue. ³⁰Uusaawe'sha' qui' ityi yuurra' peena yu' cambana fi'nzewa'jsameeta'. Tyāawe'sha' cielute ūssa Dyus angeleswe'sh na'wësarrāa yā'tja'. ³¹Nava uurra qui' ityi yuuwa'ja's i'cue'sha'

iilëeymeevá'cue Dyusíiva na'wēc we'we: ³²Abrahan, Isaac, Jacob tyāawe'sh Dyustju andya' jī'c. Uurrava qui' ityi yuusaawe'sh Dyustju jirrac tyā'jī'.

³³Tyā'wē wēse'jrra', wala cuj yajcyna neeyūuty tyā'wē zhichcue Jesus caapiya'pja'ga.

Dyus ley maateva jytjaacuesa
(Mr. 12.28-34)

³⁴Jesus tyā'wē saduceowe'shtyi shuuna' vitni's fariseowe'sh jiyurra', pcjaacjety. ³⁵Sa' Dyus ley caapiya'jsa teechsa' Jesus tashte utyaac pējyya' ewmēe pasteva jiyu wēerra. Sa' na'wēc pējy:

³⁶—Dyus leya' maateva jytjaacuesa' ¿maana? jīte', ³⁷Jesus pasrra':

—Dyusa's ūusuj jyuca yajcyrra tyāa yuurrāana selpiina fi'nzewa'ja' bagachte yujva tyutemēe uu entepcach. ³⁸Naa tyā'wē jytjaacuesa'.

³⁹E'stewe'sha' tyā'wēydyi'a': Peequí ma'wēnga ya'peeygāja', tyā'wēy mpeeygāj vite nasatyva. ⁴⁰Dyus jycaajni naa e'nzsarrāa Moises leytyi jyuca ājsata', tyā'wēy Dyus yuwe pta'shsawe'sh caapiya'jnityva jyuca jīc.

Dyus tashu yuusa' ¿quiim nchi'cqui? jīna Jesus pēyni
(Mr. 12.35-37; Lc. 20.41-44)

⁴¹Fariseowe'sh pcjaacjerra cytee nee ūsiyna, ⁴²Jesusa' na'wēc pējy:

—Cristo' ¿quimna sūju'cue i'cue'sha'? ¿Quiim nchi'cna sūju'cue? jīte', tyāawe'sh pasrra':

—David nchi'cna sūju'tja'w jīte', ⁴³Jesusa' na'wēc we'we:

—Tyā'wēte', ¿ma'wērraga Davida's Dyus Espiritu caayaqui'tje' Cristo's we'werra' na'jī:

⁴⁴Andyna jype'jsa Cristo's Dyusa' na'jīc:

Andy pucate patsu ju'ngte mcaach,

Indyna atsesaty indyrrarrāana nwēese'jwa'ja's vitna jyā'pjcach jīc.

⁴⁵Tyā'wē Davidíiva Cristo's we'werra': Andyna jype'jsa jīnac cysusu' atsa' Cristo' ¿ma'wērra David nchi'c yuucy? jīte', ⁴⁶quim yujva teech yuwerrāava pasya' ājameeta', sa' tyajūyā'ja' peena yu' pējymeeta' quim yujva.

Fariseo vite' ley caapiya'jsawe'shtyi yuuwesa Jesus nviitni
(Mr. 12.38-40; Lc. 11.37-54; 20.45-47)

23 ¹Tyājū' Jesusa' na'jīnac we'we tyāa yacj u'jusawe'sh pety vite nasa yā'jrra:

²—Ley caapiya'jsa vite' fariseowe'sh tyāawe'sha' Moises leya's wala ew jiisa tyāa leya's nwēese'jwa'ja's jycaajsatja'w sūju'ty. ³Tyā'wēyā'tje', i'cue'sha' mwēese'jwe ley ewsa ma'wē jycaatje' tyāa yu'sa' jyuca. Nava tyāawe'sh na'wē yu' yūuna fi'nzenuwe. Tyāawe'sha' nasa yuutyi' leya's

nwēese'jwa'ja's jycaajrrava tyāawe'sh yu' leya's nwēese'je'tsmeeta'.
 4Tū'swa'j iiméj wala dujsa pjeu'ju'ty tyā'sa' quim yujva chjāchjameena.
 Tyā'wēsa'styi nasaty ctū'se'je', nava tyāawe'sh yu' le'chcuē cuseterrāa
 yujva at pu'chji'tsmeeta'. 5Maava uycajn sūjrra iiwech iiwech yajcyna
 āate yu' quījva yu'ty Dyusna yaaquitstja'w jīna. Tyāasaty Dyus jycaajni's
 etste fi'jrra cajate acjrra dyictjeuy vite' cusesu tundrra fi'nze'. Sa' nasa
 jiyuni fi'nzeya' sūjrra atjni ropava tjaacue jyu'jsa iijyūrraty fi'nze'. 6Fiesta
 yat-su pi'cyni u'jrra', cachni wejy ewsarrāanaty pacue' iiwech yajcyna.
 Sa' judiuwe'sh pcjaacjenisuva tyā'wēytyi yu'. 7Clliecjunsu msuuva nasaty
 wala ewrrāa we'wena wechaa jytjāasnaty pecūju', caapiya'jsa jīna cysus
 jytjāasna.

8Nava i'cue'sha' tyā'wē caapiya'jsa jīna cysus jytjāasna fi'nzenuwe.
 Tyāa pa'gatey i'cue'sha' caapiya'jsamée maa yacjva jyuca pyacjsarrāai'cue,
 naasāa caapiya'jsa' teeche yuurráa ji'pji'cue tyā' Dyus caajni Cristo'.
 9I'cue'sha' naa quiwetewe'shtyi' quim yujnava tata jīna cysusnuwe, tyāa
 pa'gatey teeche Tata yuurráa ji'pji'cue tyā' cielute ūsa'. 10Sa' npiitstjē'j
 jype'jsa jīna cysus jytjāasnava fi'nzenuwe, tyāa pa'gatey Npiitstjē'j
 jype'jsa' teeche yuurráa ji'pji'cue tyā' Cristo'. 11Maatyva selpiina fi'nzerra
 yuurráa jytujtjesa yuune'cue. 12Tyā'wēme', maava peequfírrāa walasatj
 sūjna iiwech iiwech yaacysa' ājmeecuēsa yuuna, nava ājmeecuesatj sūjna
 fi'nzesa' walasa yuuna.

13Ley caapiya'jsa vite' fariseowe'sh āaterrāa ew we'werra' ūuste
 yu' ewmeerrāa yaacysa, i'cue'sh yacja' seena' yuj ūucjūucja', tyā'wē
 Dyus jycaajnite u'cawa'ja's apja'i'cue maava u'cacajmén. Sa' vitesaty
 ca'ga'jmeerra', i'cue'shrrāa yujva u'catsmeel'cue, tyāa pa'ga ūucjūucja'.

14Ley caapiya'jsa vite' fariseowe'sh āaterrāa ew we'werra' ūuste yu'
 ewmeerrāa yaacysa, i'cue'sh yacja' seena' yuj ūucjūucja'. Viudawe'sh
 yattyi cusa'jrra tyāa cusa'jnity caapechcana'jya' sūjrra wala jyu'j
 lisa'i'cue. Tyā'wē yūupa'ga i'cue'sha' jytjaacue Dyus castigāyni yuune'cue.

15Ley caapiya'jsa vite' fariseowe'sh āaterrāa ew we'werra' ūuste yu'
 ewmeerrāa yaacysa, i'cue'sh yacja' seena' yuj ūucjūucja'. Mtee mteeva
 pecūju'i'cue nasaty i'cue'sh ju'ngu tupjy wēerra i'cue'sh caapiya'jni's
 pta'shna. Nava nasaty cnayrra', tyāa nasaty' i'cue'sh ūswa'j infiernotey
 nviit-sa i'cue yu'.

16I'cue'sh yacja' seena' yuj ūucjūucja', jiimeerra na'jīna i'cue caapiya'ja'
 naa pa'ga: Puuty we'weni's cytey yu'nja jīrra dyuus yata'srrāa cysusna
 jurāyni's cytey yuumeeteva, quīj yuumeena. Nava dyuus yatte vyuu beja's
 cysusna jurāyni's yuurrá' cytey yuuwa'j yuja' jī'i'cue. 17Jiimée luucu
 we'wesa, Dyus dyi'pte' ¿quīj wejy jytjaacue ewsacy, vyuu beja' meerra'
 dyuus yata'? E'nzí ¿Dyus jīirrarrāa meetyna'? 18Tyā'wē na'jī'i'cue:
 Dyuus yatte altala'srrāa cysusna jurāynisa's cytey yuumeeteva, quījva
 yuumeena. Nava altalte cambwa'ja's cysusna jurāynisa's yuurrá' cytey

yuuwaj' yuja' jī'i'cue. ¹⁹Jiimée luucu we'wesa, Dyus dyi'pte' ¿quǐj wejy jytjaacue ewsacy, dyuus yatte altala' meerra' altalte cambnisa'? E'nzǐi ¿Dyus jiirrarráa meetyna'? ²⁰Maava dyuus yatte altala's cysusna jurāysa' tyā'srráana cysussa yu'tsme!. Altalte cambnisa'sva jyucac cysussa yu'. ²¹Tyā'wēy maava dyuus yata's cysusna jurāysa' tyā'srráana cysussa yu'tsme!. Cytee ūssa Dyus ityisa's cysussac yu'. ²²Tyā'wēy cielu's cysusna jurāysa' cielurráana cysussa yu'tsme!. Dyus jycaajna ūsni's jyucac cysussa yu' pety Dyus yā'jrra.

²³Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūucjūucja'. I'cue'sh ūsterráa yajcyrra caapiya'jrra', putatyjá' ma'c yuu meerra' me'sucue ma'c yuu comino ma'c yuu tyā'wēsaty diez ets ujderra' teech etsa's cutyi'ji'cue Dyus jī' jīna. Nava Dyus ley jycaajrra': Dyus dyi'pte ew fi'nzena, vite nasaty peeygājna, Dyusa's ūusuj jyuca yajcyna tyā'wē yūuwa'ja' jī'c tyāa isa jycaajni yu's cytey yu'tsmeei'cue. Nava na'wē Dyus jī' jī'i'cue tyāa yu's nviitwa'j yu'me!. ²⁴Jiimée caapiya'jsa, fish le'chcuesa yuutyi' a'tsja'i'cue, nava camello walasa yu'sa' uymeerra jycjēje'i'cue.

²⁵Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūucjūucja'. Vaso ma'c yuu meerra' plaatu ma'c yuu tyā'wēsaty ecaju yu' wala ew pcji'cji'i'cue, nava dyiicjē yu' vite jīity pesweerra ambnisarráa uta ji'pjta'. ²⁶Fariseo jiyu'tsmeeng. Dyiicjē cjuē'y pcji'cywa'ja' vaso vite' plaatuty, cyaj ecajuva jyuca ate yuuna.

²⁷Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūucjūucja'. Uusáa pendani's cajcucjē pchiime'tje', zhichcuc vya'. Nava dyiite yu' uusáa dyi'tjrráa utac canzh putana ūsu!. ²⁸I'cue'sha' tyā'wēysa i'cue. Āacjē yu' nasaa dyi'pte wala ew na'wē tjengu'i'cue. Nava ūste yu' canzh ewmée yaacynisarráa uta ūsa'.

²⁹Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūucjūucja'. I'cue'sha' ewcuē pjeu'jna nes yu' Dyus yuwe pta'shsa vite' nasa ewsa tyāawe'shtyi pendani' cafysu. ³⁰Sa' na'jī'i'cue: Cue'sh yatsgawe'sh fi'nzeni ente cue'sh ūsvatsa', cue'sha' icjwa'jme'ntca'w yu' Dyus yuwe pta'shsatyī' jī'i'cue. ³¹I'cue'sha' Dyus yuwe pta'shsawe'shtyi icjsa nwe'shi'cue, tyāasa i'cue tyāa icjsawe'shtyi' cue'sh jī'j yatsgawe'sh jīna we'we'. ³²I'cue'sh yatsgawe'sh quǐjne'ta yūusa yu', atsa' i'cue'shva tyā'wēy yūuna nes yuune'cue.

³³Ul weeswée seena'sa jī'j, ¿ma'wē yūurra infiernote castigāywa'tje paljmée yuquī'cue? ³⁴Tyā'wēsa yā'ji'cue na' i'cue'sha' maafityi' cluscjē quipna icjna, vitetyi's judiuwe'sh pcjaacjeni yatsu pāpana, vitetyi's ajtserra chjamb iisa icjya' pacuena nes yuucajn andya' caajya'vatj Dyus yuwe pta'shsa vite' quǐjteva wala jiisa vite' caapiya'jsa tyāawe'shtyi.

³⁵Tyā'wē Abela's icjniñüjy nasa ewsaty icjya' tacjrra Berequias nchi'c Zacariasa's Dyus altal pucate icji'cue tyāa entepcach icjnisaty i'cue'shrrarráa yuuwesa yuune'cue. ³⁶Isatj we'we' nyafiitey icjnisaty's nasa naa ensuwe'sh tyā'wē yuuwesa yuutyna.

Jesusa' Jerusalena's tjengrra ũ'neni

(Lc. 13.34-35)

³⁷Jerusalente nasa, i'cue'sha' Dyus jycaajnisat tyajy yuwe's pta'shsawe'shtyi icje'i'cue, maaíityi' cuet wāatatajna. Manz usva pcjacjrra nwe'we wēetj i'cue'sh luuchtyi, atallva ma'wēga luuchcuētyi's fyuu cu'ta dyyiite āshi' tyā'wēy, nava wa'li'cue. ³⁸Mwēese'jwe: i'cue'sh ũsni' tjengnimée neeyūuna. ³⁹Na'jī'tj na': peena yu' andya's uymeene'cue, Dyus tashu yuusa wala ewsa yuja' jīna we'wewa'j en ājpcach.

Dyuus yat ptsuwa'ja's Jesus pta'shni

(Mr. 13.1-2; Lc. 21.5-6)

24

¹Dyuus yatu casejrra Jesusa' u'juetspcachja', tyāa yacj u'jusawe'sha' utyaarra we'wety dyuus yata's pta'shna. ²Atsa' Jesusa' na'wēc pas:

—Tyā'wē yuj seena' zhichcue wala'. Nava na'jī'tj na': jyuca ptsuuna, atsa' tyāa yattewe'sh teeche cuetrráa yujva quēese'jnimeesa yu' neeyūumeena jīc.

Naa quiwe ptsuwa'j en ājatste seena'sa vyaawa'j

(Mr. 13.3-23; Lc. 21.7-24; 17.22-24)

³Tyajū' Olivos vitsnaty u'j. Cytee pa'jrra Jesus cachrra u'pte', tyāa yacj u'jusawe'sh maafi yu' na'jīnaty we'we paatste:

—Meen peeta'sh, ¿bagach tyā'wē jyuca ptsuucy? Sa' iindy quīwa'j en vite' naa quiwe ptsuwa'j en ājatste', ¿quīj seena'sa vyaacy? jīte', ⁴Jesusa' pta'shcu:

—Mpa'yajcywe, i'cue'shtyi caypumba'jwe'shte. ⁵Tyā'wēme', wala pa'jatyna andy yase's cysusna na'jīna: Dyus caajnisat Cristotj jītyina, sa' tyā'wē yūurra wala caypumba'jatyna išhiina. ⁶I'cue'sha' wēse'jene'cue guerra msuu msuuva u'pa' jīni. Tyā'wē yūuteva i'cue'sha' ũucjnuwe, tyā' nmej en yu' me'. ⁷Gobierno' vite quiwete gobierno yacj puiityna, naapcachja' puuty jyul' quiweju pwe'shva puiityna. Tyā'wē mtee mteeva jyuca guerra quiiteena. Sa' wēje enva pa'jana, wee seena'sava pa'jana, ejndva seena'sa u'juetyina mtee mteeva. ⁸Tyā'wē seena'sa pa'jrrava tyāa yu' nyafyte űusya' tacjnisarráa yuuna.

⁹Tyajū' i'cue'shtyi uwerra ducjetyna pāpana icjcajn, sa' naa quiwete mteewe'shva jyucaysa atsetyna andy jycaajni's nwēese'pja'garráa.

¹⁰Tyā'wē yūute', maanzcuēesava Dyus tashu tyuteetyina, sa' puuty

yajtsena vitesa uwerra icjwa'ja's vitutyna. ¹¹ Wala îshiisa vyaatyna, andya' Dyus caajni yujtj jîna nasa maanzcuêesatyva îshijjatyna. ¹² Sa' ewmée yûuna fi'nzewa'jrrâa tyacue wala pa'tje', puuty ya'peeygâjna fi'nzewa'j yu'sa' iiviitutyna maanzcuêesava. ¹³ Nava uu entepcach Dyus yacj tyutemée fi'nzesa' ewte neeyûutyna. ¹⁴ Naapcachja' Dyus jycaajwa'ja's pta'shnisa' maa quiweteva jyuca pta'shni yuuna mteewe'shva jyuca jiyucajn. Tyâ'wê yûunijû nmej ensa pa'jana.

¹⁵ Na'wê yûuwa'ja's jypa'yacy lêeyrra jii mfi'nzewe Dyus yuwe pta'shsa Daniela' pta'shna fi'cj dyuus yatte canzh ewmée yûuna pa'jwa'ja's. Atsa' tyâ'wê seena' canzhsa pa'jrra dyuus yatte u'catste uyrra', ¹⁶ Judea quiwesuwe'shva jyuca ûpjna u'juene'cue vits walasu ûsya'. ¹⁷ Sa' êe yat-su ûssava sa'jrra quijrrâanava cutyi'jwa'j en ji'pjumeetyna. ¹⁸ Tyâ'wêy mjii ejsu u'jusava tyajy atya's nicyya' yatna u'jwa'j enrâa yujva ji'pjumeetyna. ¹⁹ Tyâa ente' u'ywe'sh nasa ji'pjsa meerrava luuch âpâcuê ji'pjsawe'sha' wala yuj pytjaa yuutyna. ²⁰ I'cue'sha' Dyusa's mpêjywe tyâ'wê nus ente meerrava jycaase ente ûpjna u'jwa'j yuucajmên. ²¹ Tyâ'wê tyâa ente' seena' yuj wala ñuswa'j yuuna. Naa quiwe's pjeu'jiyna bagachte yujva tyâ'wêsa yu' iiu'pume', sa' tyâ'wêsa scjêwniijûyâ'ja' peena yu' u'pumeena tyâ'wêysa yu'. ²² Dyusa' en tyâ'wê seena'sa's tyachmée vitmeete yu', quim yujva îtyi neeyûumeetyna. Nava tyajy nasa tyjityjnisaty peeygâjrra, en tyâ'wê seena'sa's tyachmeerrâa vituna.

²³ Maava i'cue'shtyi we'werra', mtjengwe Cristo ayte ûsa' jityna, meerrava cytee ûsa' jityna, nava tyâ'jîni's nwêese'jnuwe. ²⁴ Tyâa pa'gatey wala îshiisa pa'jatyna, andya' Dyus yuwe pta'shsatj sa' Dyus caajnis Cristotj jityna, tyâ'wê quim yujva âjanimeesa's caavya'ja'jatyna caypumba'j wêerra. Tyâ'wê yûurra maa'ityi' caypumba'jatyna Dyus tyjityjnisa yujtyva. ²⁵ Tyâ'wê yûuwa'ja's pta'shyâ'tj i'cue'shtyi dyiicjêy. ²⁶ Tyâa pa'ga nwêese'jmeene'cue macue tyâ'wê cytee ûsa' nasa u'pnimeete jîteva meerra' ay dyiite ûsa' jityna. ²⁷ Tyâa pa'gatey Dyus Nchi'c Nasa Yuusâa quîi ente', cpi'shva ma'wêga sec cāanijû cwejnerra' sec cjeenijûva vya' tyâ'wêyrrâa yuuna naa dundte jyucaysa dyi'pte. ²⁸ Cacue uuniisa mcaa ûsteva cytee pcjaacjetyna mēewēja' ũya'.

Dyus Nchi'c Nasa Yuusâa seena' zhichcue vyaana
(Mr. 13.24-37; Lc. 21.25-33; 17.26-30, 34-36)

²⁹ Tyâ'wê seena' ñuswa'j en scjêuutspcachja', seca' chji'ndyina, atsa' a'te' cweetjmeena. Naapcachja' estrella ûshityna, êe walasu quîj seena'sava jyuca quêese'jni yuutyna. ³⁰ Tyâ'wê yûunijû', Dyus Nchi'c Nasa Yuusâa quîiwa'ja's caajiyu'jsa vyaana cieluju, atsa' naa quiwete nasa maanzcuêesava ũ'netyna Dyus Nchi'c Nasa Yuusâa tyâ'wê cieluju tâapj pyâjite seena' zhichcue vyaana yujte uyrra. ³¹ Sa' tyajy angeleswe'shtyi

jycaajana seena' sus tujcarra tyajy tyjityjnisaty'i' pcjajcajn naa quiwetewe'sh mtee mteewe'shva jyucaysaty.

³²Naa ejemplo's pechcananuwe: higuera fytüu tasha' ets umburra qui' u'se yeetsutste uyrra', yūnya'vateva jiyu'i'cue. ³³Tyā'wēy na'wē seena'sa vyaatste uyrra', jii mfi'nzewe, ptsuwa'l en utyaatste tyā'wē yuuna. ³⁴Isatj we'we', naa ensu nasa' uumey tyā'wē seena'saty uyuune'cue. ³⁵Cielu naa quiwe jyuca scjēuutyna, nava andy we'weni yu' cytey yuumey yu' scjēwmeetyna.

³⁶Nava quīj ente quīj orate tyā'wē yūuwa'l yu'sa' quim yujva jiimeeta', cielute angeleswe'sh Dyus Nchi'c tyāawe'sh yujva, naasáa Dyus yuurráa jiia'.

³⁷Noe enteva ma'wēga yuu tyā'wēyrráa yuuna, Dyus Nchi'c Nasa Yuusáa quīi enteva. ³⁸Tyāa ensu nasa' ícj utameyna yu' wala wechana ūsu'ty ū'na tundyna cambana Noe arcate u'capcach. ³⁹Sa' Dyus castigo's jiimée ūsīi, ícj utate jyuca ptsuutsyā'jrrarráaty jiyu, tyā'wēyrráa jiyumeetyna Dyus Nchi'c Nasa Yuusáa quīi enteva. ⁴⁰Tyāa ente' e'nz pitstjē'l mjiina ij ūsutyna, atsa' teechna's jyūna u'jni yuuna, nava vite's nviitni yuuna. ⁴¹Tyā'wēy e'nz u'y ij ū'cjna ūsutyna, atsa' teechna's jyūna u'jni yuuna, nava vite's nviitni yuuna.

⁴²I'cue'sha' jypa'yacy meswe. Tyā'wēme', quīj ente quīj orate Dyus Nchi'c quīiwa'lsateva jiimeei'cue. ⁴³Nava jypa'yacy meswe. Yat namuva ma'wē peswée quīj orate yujteva jiyurra' dejmée jypa'yacy ūytjasna u'pucy yatte pesweecajmén, tyā'wēy myūuwe. ⁴⁴Tyāa pa'ga i'cue'shva jyuca pjeu'jrra meswe. Tyā'wēme', yajcymée ūsiyna Dyus Nchi'c Nasa Yuusa' quījrráa yuuna.

Selpisáa ewsa vite' ewmeesa

(Lc. 12.41-48)

⁴⁵Selpisáa ¿maa ewqui patron neewe'werra nvijtte cyte yattewe'shtyi cwēejel'mée sāl'jīwa'jsa? ⁴⁶Patron neewe'werra nviitni's jyuca cytey yuuna ūste patrona' tjengna pa'tje', tyāa selpisáa yacja' wala yuj wecha yujna. ⁴⁷Isatj we'we': tyā'wē yūusa's patrona' tyajy jī'pjuni's jyuca neewe'werra nviituna. ⁴⁸Nava selpisáa ewmeesa' patron pa'jya' jytjēeyuuna sūjrra ⁴⁹cyte vite selpisaaty pcyuuna tūusaawe'sh yacj tundyna ū'na yūuna ūste', ⁵⁰yajcymée ūsiyna patrona' quīj ente quīj orateva pa'jrráa yuuna. ⁵¹Sa' seena' wala űus űus castigaina tyā'wē yuwejurráa ew we'werra' ūuste yu' ewmeerráa yaacsawe'shtyi na'wēy. Tyajūyā'ja' tyāa selpisáa ewmeesa' seena' wala pembeena qui'tjtyi csuusu'jna.

Diez cna'sa yacj caaja'nda'jni

25

¹Dyus jycaajwa'l en ájte', na'wē yuuna: Diez cna'sava ma'wēta lampara aceite awniisa's atraa boda yatna u'l novio's jypa'gaya',

tyā'wēy yuutyna. ²Tyāa cna'sawe'sh tajtssa' jypa'yacymeerra pjeu'jmeety u'lj, sa' vite tajtssa' jypa'yacyrra jyuca pjeu'jrraty u'lj. ³Tajtssa' ew ūs yajcymeerra', lampara yu'sa' jyūrra u'ljrrava aceite yu' jyūmeety u'lj ptsuute qui' awwa'j. ⁴Nava vite tajtssa' aceite jyūratty u'lj lamparatewe'sh ptsuute' qui' awwa'j. ⁵Novio pa'jya' jytjēyūute', tyāawe'shtyi wala deewēe yuute' dejty. ⁶Tyājū' cuspyāj yuutste', ptjūusec na'jīna sus we'weni: Novio yujyā'ja', atsa' jypa'gaya' myujwe jīni. ⁷Naapcachja' cna'sawe'sh cyanzīi quiiterra lampara's pjeu'jty. ⁸Atsa' tajtssa jypa'yacymée u'jsawe'sha' vite tajtssaty aceite tjāastyi: Le'chcuērráava peesune'cue. Tyā'wēme', cue'sh pqui'tanisa' ūchjatsa' jīnaty we'we. ⁹Nava cna'sawe'sh jypa'yacy pjeu'jrra u'jsa' na'wēty pas: Ūsme'nja'w. Tyā'wēme', cue'sh jīi yujva ājmée ji'ptja'w, atsa' i'cue'shtyi ūswa'j yu' wejy ājmeena. Wejy yuuva me'jwe weyya' jī'ty. ¹⁰Tyā'wē tajtssa jypa'yacymeerra aceite weyya' u'juetspcachja', ptamusá novio' pa'cj. Atsa' jypa'yacy ūytjāssawe'sha' boda yatte novio yacj u'catspcachja', vitya's apjtyi. ¹¹Tyāa e'suyā'jty vite cna'sawe'sh cūjrra: Meen pjaande jīna we'we. ¹²Nava pasrra': Isa, andya' i'cue'shtyi' jiimeetj jīc.

¹³I'cue'sha' jypa'yajcy meswe. Tyā'wēme', quīj ente quīj orate Dyus Nchi'c Nasa Yuusáa pa'jwa'ja's jiimeei'cue.

Mjīiya' ājawa'jsaty vyu's neewe'werra u'jni yacj caaja'nda'jni

¹⁴Teech pitstjē'jva ma'wēga vite quiwen u'juetsrra', tyā'sna selpisaawe'shtyi pa'yarra tyajy vyu's neewe'werra ūsrra u'lj, tyā'wē yūuna Dyus jycaajwa'j en ājte'.

¹⁵Tyāa pitstjē'ja' selpisáa teechna's vyu tajts milcu ūs, sa' vite's e'nz milcu ūs, sa' vite's teech milcu ūs, teechna na'wērraj macuesa's shiingmée iijyūya' ājawa'jsateva tyacuerráac ūsrra u'lj. ¹⁶Teech selpisáa tajts mil vyu jypa'gasa', tyāa vyu's cmāaji'jrra qui' vite tajts mil íic āj cnay. ¹⁷Tyā'wēy e'nz mil jypa'gasava qui' vite e'nz mil íic āj cnay. ¹⁸Nava teech milrráa jypa'gasa' patron vyu's cafil'jrra quiwetec pendáa.

¹⁹Patrona' wala tyachte qui' shawendna pa'jrra', tyāa selpisaawe'shtyi vyu ūsni's qui' pējycu. ²⁰Nyafyte' tajts mil vyu jypa'gasa' cjuē'y utyaana cūjrra qui' vite tajts mil íic āj caashwendu'j na'jīna patrona's: Indya' tajts milngu ūs, atsa' qui' vite tajts mil íitj cnay cmāaji'jrra jīte', ²¹patrona' na'wēc we'we: Indya' vyu'sa' psuwmeeng wala ew cmāaji'j. Tyā'wē le'chcuērráasanava psuwmée cmāaji'pja'ga, wejy walasanava neewe'werra iindy cusete nviitu'nja. Āchja' me'ca andy yacj wechana ūsya' jīc.

²²Tyājū' vite selpisáa e'nz mil jypa'gasava cūjc na'jīna patrona's: Indya' e'nz milrráng ūs, nava tyā'sa' cmāaji'jrra qui' vite e'nz mil íitj āj cnay jīte', ²³patrona' na'wēc pas: Indya' vyu'sa' psuwmeeng wala ew cmāaji'j. Tyā'wē le'chcuērráasanava psuwmée ewngu cmāaji'pja'ga āchja' tyāate jytjaacue walasanava nviitu'nja iindy cusete. Me'ca andy yacj wechana

ũsya' jĩc. ²⁴ Tyajũ' teech milrráa jypa'gasava cūjc patrona's na'ljĩna: Indya' wala weesweeteva jiitj, sa' iindy uutjashmeesuva jyucang pcjacie' quiŷva ujmeerrava. ²⁵ Tyāa pa'ga ũucjrra iindy vyyu's jyaawtju quiwete pendaarra. Nava āchja' ducjetstju indy macuene'nga ũs tyā'sa' jĩte', ²⁶ patrona' na'wēc pas: Indya' seelpimée watycuēng. Andya' tyā'wē juuna'rra quiŷva ujmeerrava vite jiity pcjacjsateva jiitj jĩ'ng na', ²⁷ ĩmjĩtenga andy vyyu's bancoga jyaawmēe tyāate jytjaacuecuē nuypejnarra caashwendu'jya'? jĩrra', ²⁸ cytee ũssaty na'wēc jycaaj: Tyāa pitstjē'j vyyu mil ji'pjsa's cusa'jrra diez mil ji'pjsa's meswe. ²⁹ Tyāa pa'gatey ji'pjsa's jweeĩrráa jytjaacue ũswa'ja' wala ji'pjucajn. Nava ji'pjmeesa's jyuca cusa'jwa'ja' le'chcuerráa ji'pjuni'sva. ³⁰ Sa' tyāa pitstjē'j seelpimeesa's uwerra ecaju chji'ndy walate macjwe. Cyte' seena' yuj pembeena qui'tjtyi csuusu'jna ũswa'ja' jĩc.

Naa quiwetewe'shtyi jyuca ewsaty fii tyundeni

³¹ Dyus Nchi'c Nasa Yuusa' jycaajsa yuurra angeleswe'sh cshavyte quiŷrra tyajy jycaajwa'tje cachjiina. ³² Tyajũ' nasa' naa quiwete mtee mteewe'shva jyuca pcjaacjetyna tyajy tashte, atsa' teechsa na'wērraj tyjityjrra tyundena, piisháa-tjengsava ma'wēga fii tyundé' piisháa vite' caplaty tyā'wēy. ³³ Sa' piishaaty' patsu ju'ngu tyajrra', caplaty' jembu ju'ngu tyajana. ³⁴ Tyā'wē yuurra jycaajsa' we'wena patsu ju'ngu ũssaty' na'ljĩna: Andy Tata peeygāanisa, i'cue'sha' myujwe tyā'wē naa quiwe's vityina i'cue'sh jycaajwa'j pjeu'jni ũsa' tyā'sna jypa'gaya'. ³⁵ Tyāa pa'gatey i'cue'sha' andya's sāl'ji i'cue wēena u'jute'. Sa' yū'wēena u'jute', yusi'cue. Nasa ecajuwe'sh na'wē u'jute', deewa'j pqui'ji'cue. ³⁶ Atjwa'j ropa ji'pjmée u'jute', ropa ũsi'cue. Uuya' ũste', tjengya' pa'ji'cue. Carcelte ũste', cyteeva tjengya' pa'ji'cue jĩte', ³⁷ nasa ew yūusa' na'ljĩtyna: Indya' ĳbagach wēena u'jutetca'w uyrna ũ' puuts? ĳBagach yū'wēena u'jutetca'w tundywa'j ũs? ³⁸ Indya' ĳbagach tyā'wē ecajuwe'sh na'wē u'jute uyrratca'w deewa'j pqui'j? ĳBagach tyā'wē ropa ji'pjmée u'jutetca'w ropava ũs? ³⁹ ĳBagach ātsa'na ũstetca'w tjengya' pa'j? ĳBagach carcelte ũstetca'w cyteeva tjengya' pa'j? jĩtyna. ⁴⁰ Atsa' jycaajsa' na'wē pasuna: Isatj we'we', andy yacjtjē'jwe'sh macue wala pytjaa ājmeecuesarrava ayte ũsta' tyāaty tyā'wē yūusa' andyna pu'chsarra i'cue tyā'wē yūu jĩna.

⁴¹ Tyajũ' jembu ju'ngu ũssaty' jycaajsa' na'ljĩna we'wena: Andy tashu mtyuteewe, i'cue'sha' ewmeetewe'sh yāl'ji'cue. Tyāa pa'ga echtjē'j jĩi echtjē'j angeleswe'sh jĩi pjeu'jni ũsa' infierno ipy wala cytee mel'jwe jĩna jycaajana. ⁴² Tyā'wē andy wēena u'juteva, puutsmeei'cue. Yū'wēena u'juteva tundywa'j ũsmeei'cue. ⁴³ Nasa ecajuwe'sh na'wē u'juteva, deewa'j pqui'jmeei'cue. Ropa ji'pjmée u'juteva, atjwa'j ũsmeei'cue. Ātsa'na ũsteva, tjengya' pa'jmeei'cue. Sa' carcelte ũsteva, cyteeva tjengya' pa'jmeei'cue jĩte', ⁴⁴ tyāawe'sha' na'wē pasutyna: Indya' ĳbagach wēena u'jutetca'w puutsmée? ĳBagach yū'wēena u'jutetca'w tundywa'j ũsmée? ĳBagach

ecajuwe'sh na'wẽ u'jutetca'w deewa'l pquij'mée? ¿Bagach ropa ji'pjmée u'jutetca'w atjwa'l ũsmée? ¿Bagach ätsa'na ũstetca'w tjengya' pa'jmée? ¿Bagach carcelte ũstetca'w cyteeva tjengya' pa'jmée? jityna. ⁴⁵Atsa' jycaajsa' na'wẽ pasuna: Isatj we'we', naa nasa pytjaa äjmeecuēsaty quijte yujva pu'chmeei'cue na' andyna pu'chsameerrai'cue tyā'wẽ yuu jina. ⁴⁶Tyāa pa'ga ew yūusame' infierno ipy ptsuwa'jmeete cjēeya' u'juetyna, naapcachja' ew yūusawe'sha' bagachteva ptsuwa'jmée ityi fi'nzewa'ja's ji'pjutyna.

Jesusa's icjwa'ja's puuty we'weni
(Mr. 14.1-2; Lc. 22.1-2; Jn. 11.45-53)

26 ¹Jesusa' tyā'wẽ pta'shna jyā'jrra', tyāa yacj u'ljusawe'shtyi na'jīnac we'we:

²—I'cue'sha' jii i'cue Pascua fiesta äjya' e'nz enrrāa yā'j peejya', atsa' tyāa ente' Dyus Nchi'c Nasa Yuusa's uwerra ducjni yuuna cluuscjē a'cyrra icjcajn jic.

³Tyāa entey sacerdote npiitstjē'jwe'sh, ley caapiya'jsawe'sh, judiu ntjē'jsawe'sha' pcjaacjety sacerdote npiitstjē'j Caifas yat patyute, ⁴sa' tyāawe'sh pwe'sh puuty we'wety nasa jiyunimeete paatste Jesusa's uwerra icjya'. ⁵Tyāasaty fiesta ente yu' tyā'wẽ icjya'mée puuty we'we nasa wala suscajmen.

Aceite pa'gasa's teech u'y Jesus dyictjecjē awni
(Mr. 14.3-9; Jn. 12.1-8)

⁶Tyāa ensu' Jesusa' Betania chjambte Simon wā'jy weeju catyjisa yattēc ũsu'. ⁷Atsa' teech u'y utyaana cūjc aceite wēt putasa's frascote uta awniisa wala pa'gasa's atrra. Sa' Jesus cachrra u'pte', tyajy dyictjecjēc jyuca aw.

⁸Tyā'wẽ yūuni's Jesus yacj u'ljusawe'sh uyrra', na'jīnaty ũuscha we'we:

—¿Tyacue yuja' wala psuwmañ? ⁹Tyā'wẽ yūupcachte wejyva pa'gate tyweyrra tyāa vyu's puuplesaty peesvatsne' wejy ew yu' jite', ¹⁰Jesus wēse'jrra' na'wēc we'we:

—¿Quijcue cuch susu' naa u'ya's? Na'wẽ yūunisa' psuwnisame'.

¹¹Puuplesa' bagachteva i'cue'sh yacj nes yuutyna. Nava andya' i'cue'sh yacj nes yuuwa'jsameetj. ¹²Naa u'y andy cacuecjē aceite wēt putasa's awcu, nava andy uute pendaawa'ja's pjeu'jnarrāac tyā'wẽ yūu. ¹³Isatj we'we': Naa quiwete mtee mteeva Dyus yuwe's pta'shna pecūjsa' naa u'y tyā'wẽ yūuni'sva ja'nda pta'shni yuuna pechcanamée jic.

Jesusa's preesu'jwa'ja's Judas ũus yaacyni
(Mr. 14.10-11; Lc. 22.3-6)

¹⁴Tyājū' Jesus yacj u'ljusa docesatewe'sh Judas Iscariote yaasesa' sacerdote npiitstjē'jwe'sh yacj puuty we'weya' u'jrra' ¹⁵tyāawe'shtyi na'jic:

—Jesusna uwerra ducjte' ¿manz deweequi'cue? jíte', tyāawe'sha' treinta vyuty deweya' neeyūu. ¹⁶Tyājū' Jesusa's ma'wē yūurra tyāawe'sh cusete ducjya' ājawa'ja's wala pacuec.

Jesusa' docesawe'sh yacj nmej ū'ni

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Pan levadura ji'pjmée ū'ni fiesta en ājatste', Jesus yacj u'jusawe'sha' tyajy tashte utyaarra na'wēty pējy:

—Pascuate ū'wa'ja's ¿mteenga pjeu'j jytjāasu'? jíte', ¹⁸na'wēc jycaaj:

—Jerusalenna me'jwe, cytee teech pitstjē'ja's jii i'cue tyā'sna na'jīne'cue: Cue'shtyi caapiya'jsa' na'jīnac yuwe caaj: Andy uuwa'j en utyaac, atsa' iindy yatte Pascua's yu'scjēwya'vatj andy yacj u'jusawe'sh yacj jīne'cue jíte', ¹⁹tyāa yacj u'jusawe'sha' Jesus jycaajni's cytey yuuty, sa' ū'wa'ja's pjeu'jty.

²⁰Tyājū' jyuca chji'ndyitste', Jesusa' docesawe'sh yacj cachcu mesate ū'ya'. ²¹Sa' ū'na u'prra', na'wēc we'we:

—Isatj we'we', i'cue'sh yacj u'jusa teechsa' andya's atsesawe'sh cusete ducjya'va' jíte', ²²tyāawe'sha' wala ñusrra paapējytyi teech teecharraj:

—¿Andy ma'tj? jīna. ²³Atsa' Jesusa' pta'shcu:

—Maa tyā'wē andy yacj ja'ndarra'j cuse's acjena plaatucjē tyāa tyā'wē andya's atsesawe'sh cusete ducjwa'jsa'. ²⁴Dyus Nchi'c Nasa Yuusa' ma'wē uuwa'jsateva Dyus librute pta'shi'c tyā'sa' cytey yuuya'va'. Nava andya's atsesawe'sh cusete ducjsa' jiseena' yuj ñuste cjējena! Tyāa pitstjē'ja' naa quiwete wejy yuuva upymeevatsne' wejy ew yu' jíte', ²⁵Judasa' pējyacu:

—Meerra' ¿andyvá'ntcacy? jíte', Jesus pasrra':

—Indyifing jīc.

²⁶Ū'na u'prra', Jesusa' pana's jypa'gana'va Dyusa's wecharra pe'ltendec, sa' tyāa yacj u'jusawe'shtyi ū'su'scu na'jīna:

—Mē'we, naa pana' andy cacue na'wēsa' jīrra', ²⁷vaso'sva jypa'gana'va Dyusa's wecharra tyāawe'shtyi ū'scu na'jīna:

—Jyucaysa mtundywe naa vasotewe'sha's. ²⁸Naa vasotewe'sha' andy ee na'wēsa'. Dyusa' maanzcuēesa pcaltyiva cjūcjrna nwe'wewa'ja's vitcu, nava andy eea's pcawrra yuurráac tyā'wē nwe'wewa'ja's vit.

²⁹Nava na'jī'tj na': āchjūyā'ja' peena yu' tundyme'nja naa uva yu'a's, naasáa andy Tata jycaajwa'j enterráa yā'j qui' i'cue'sh yacj pcjaacjerra tundi'nja jīc.

Pedro īshiiwa'ja's Jesus pta'shni

(Mr. 14.26-31; Lc. 22.31-34; Jn. 13.36-38)

³⁰Tyājū' Dyusna wechana memna jyā'jrra', u'jty Olivos tjā'j vitsna.

³¹Atsa' cytee pa'jrra', Jesusa' na'jīnac we'we:

—Naa custe! i'cue'sh jyucaysa andyrráana nvijtrra tyuteene'cue. Tyāa pa'gatey tyā'wē yūuwa'ja's Dyus librute na'jī'c: Piisháa-tjengsa's icjte', piishá' jyuca ūpjuutyna jī'c. ³²Nava andya' uurrava qui' ityi yuurra' i'cue'sh yatste u'jue'nja Galilean jīte', ³³Pedro' na'wēc pas:

—Macue vite yu' indyrráana nvijtrra tyuteeteva, andy yu' tyā'wē yūume'nja jīte', ³⁴Jesus pasrra':

—Isatj we'we', naa custe atall we'wemeyna indya' Jesusa's jiimeetj jīna tecj us ishijane'nga jīte', ³⁵Pedro' na'wēc we'we:

—Macue indy yacj ja'ndatey uuwa'jma'c casej, nava indya's jiimeetj jīna yu' īshiime'nja.

Atsa' tyāa yacj u'jusawe'sh jyucaysa tyā'wērrarráaty we'we.

Jesusa' Getsemanite Dyus yacj puuty we'weni
(Mr. 14.32-42; Lc. 22.39-46)

³⁶Tyajū' Jesusa' tyāa yacj u'jusawe'sh yacj Getsemaní yaasesate pa'jrra', na'wēc we'we:

—Ayte mcaachwe, naapcachja' andya' Tata yacj puuty we'weya' u'juetstju jīrra', ³⁷Pedro vite' Zebedeo nchi'c e'nzsaty pe'jrrac u'j. Sa' ūuste wala ñus ūusutjete', na'jīc:

³⁸—Tyacue wala pytjaa yuurra uuwa'ja's yajcyte', wala ñus yuja'. Atsa' i'cue'sha' aytee neeyūurra dejmēe jypa'yacy me'pwe andy na'wēy jīrra', ³⁹Jesusa' jyu'jmēe u'jrrarráa tycaa pquipja weterra Dyus yacj puuty we'wec na'jīna:

—Tata, indya's ewuwechte', andya's meen nwe'we tyacue wala pytjaa yuuwa'ja's jypa'gacajmen. Nava andy jytjāasni yu'sa' cytey yuumeerrava, iindy jytjāasnirrá's cytey meen yūu.

⁴⁰Tyajū' Jesusa' qui' shawendcu Pedrowe'sh tashtey, sa' dejna ūste uyrra' na'wēc we'we Pedro's:

—Andy yacj jypa'yacy dejmēe ūsya' ājameevá'cue teeche orarráava.

⁴¹Ewmeete weteya'mēe jypa'yacy dejmēe me'pwe Dyus yacj puuty we'wena. I'cue'sha' ūusuj yu' chjāchjai'cue yaaqui', nava i'cue'sh cacue yu' chjāchjatsme' cytey yuuya'.

⁴²Tyajū' Jesusa' qui'quin u'jrra', na'jīnac Dyus yacj puuty we'we:

—Tata, tyacue wala pytjaa yuuwa'ja's yu'ptjeja' ewuwechmeete', iindy jytjāasni cytey yuuvatsrráa ewna jīrra', ⁴³Pedrowe'sh tashte qui' shawendrra', tyāawe'sh yafy chjāchjameete qui' dejna ūstec uy.

⁴⁴Sa' nyafii na'wēyrráa we'werra tecj usva qui' u'cj, Dyus yacj puuty we'weya'. ⁴⁵Tyā'wē yūurrac Pedrowe'sh tashna shawendna cūjrra', na'wē we'we:

—Āchj yuurrá' mdejujūiwe jycaaseya'. Dyus Nchi'c Nasa Yuusa's pcalsawe'sh cusete ducjwa'j en ājc. ⁴⁶Atsa' quiiterra u'juega. Andya's atsesawe'sh cusete ducjwa'jsa' yujyā'ja' jīc.

Jesusa's preesu'jni

(Mr. 14.43-50; Lc. 22.47-53; Jn. 18.2-11)

⁴⁷Jesus cytee we'wena nee ũsiyna, Judasa' pa'cj. Tyā' docesatewe'shírráac yu'. Atsa' tyāa yacj nasa wala cuj pa'jty cchill vite' fytũ atrra. Tyāawe'sha' sacerdote npiitstjē'jwe'sh vite' judiu ntjē'jsawe'sh jycaajnisaty yu'. ⁴⁸Judasa' na'jīnaga yu'cywe'werra pe'jna yuwé' Jesusa's tundcajn:

—Ma'sna dyi'pte andy wecha'nja tyā'sna tundrra jyūna u'juene'cue jīnaga we'we.

⁴⁹Tyāasac Jesus tashte utyaarra na'wē we'we:

—Cue'shtyi jype'jsa jīna'va wechac.

⁵⁰Atsa' Jesusa' na'jīc:

—Namicu, ¿quījya' yujnga? jītspcachja', tundtyi jyūna u'jya'.

⁵¹Tyā'wē tundutspcachja', Jesus yacj pi'cyna u'jusa teeche'sa' cchilla's jycuutyi'jrra sacerdote npiitstjē'ja's selpisáa tjū'wē's spē'tjcu. ⁵²Atsa' Jesusa' we'wec:

—Iindy cchilla's mjaaw. Tyā'wēme', jyucay maava cchilluj puiisa', cchillteyrráa uuwa'jsata'. ⁵³Andy Tata's maanzcuēe angeleswe'shva



(San Mateo 26.52)

andyna nwe'wewa'jsa pějyte', cytey yuuna sũju'tsmeevá'nga. ⁵⁴Tyã'wẽ pějyte', cytey yuuyujuna, nava Dyus libroute' nyafiitey pta'shni yã'cj yu' áchj na'wẽ tundutsta' tyã' cytey yuucajn, atsa' nwe'wewa'jsa pějyme'nja.

⁵⁵Tyã'jĩrra' tundsatycu we'we:

—Andya' pesweetjas i'cue andya's tundya' cchill pety fytũ atrra pa'j. Andya' caapiya'jya' een isatj dyuus yatte i'cue'sh cshavyte nes yu'. Nava tyagachjĩ yu' tundmeei'cue. ⁵⁶Nava Dyus yuwe pta'shsawe'sh fi'jrra nviitni cytey yuucajnrráa tyã'wẽ yuutsa' jíc. Naapcachja' Jesus yacj u'jusawe'sha' tyã'srráana nvijtrra jyuca ñpjna u'jty.

Caifas tashte Jesusa's cuutya'jni

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷Atsa' Jesusa's tundrra jyũna u'jty sacerdote npiitstjẽ'j Caifas tashte. Cyteea' ley caapiya'jsa vite' judiu ntjẽ'jsawe'sh tyãawe'shtyi pcjaacjerra ũs yu'. ⁵⁸Atsa' Pedro' e'ste jyul' neeyũurrac yujna ũsu', sacerdote npiitstjẽ'j yat patyute u'capcach, sa' cytee policiawe'sh yacj cachrra neeyũuc quĩj yũuteva uyya'.

⁵⁹Naapcachja' sacerdotewe'sh, judiu ntjẽ'jsawe'sh vite' jyucay cytee pcjaacjerra ũssawe'sha' Jesusa's quicije'jya' sũjrra quĩjrráava ĩshiwa'jsa pacue'ty. ⁶⁰Macue nasa maanzcuẽesa quĩjrráava pta'shna cũjteva, ĩshiinirrác caseje'. Nava nmejte' e'nz nasa ĩshiisa cũjrra na'wẽty pta'sh:

⁶¹—Naa pitstjẽ'ja' na'jĩ'c: Andya' naa dyuus yata's petyrra tecj ente' qui' tyaja'nja jĩ'c jĩna pta'shte', ⁶²sacerdote npiitstjẽ'ja' quiiterra Jesusa's na'wẽc we'we:

—¿Quĩj yũurranga ma'wẽrráava pasu'tsmée? Meerra' ¿isa yuj tyã'jivá'nta? jĩteva, ⁶³Jesusa' pasme'. Atsa' sacerdote npiitstjẽ'ja' na'wẽc we'we:

—Dyus ĩtyisa dyi'pte jurãyrra isasarrá's mpeeta'sh. Indya' ¿Cristo Dyus Nchi'c dyijngá'? jĩte', ⁶⁴Jesus pasrra':

—Indya' isang we'we'. Andya' i'cue'shtyi na'jĩ'tj na': Dyus Nchi'c Nasa Yuusa's uyuune'cue Dyus pucate cachrra u'pte sa' cieluju tãapj pyãjte quĩjatsteva uyuune'cue jĩte', ⁶⁵sacerdote npiitstjẽ'ja' ũusacharra peecy atjni ropa's sundec na'jĩna:

—Naa pitstjẽ'ja' tyajy yuweju yuu atsewe'wec Dyusa's, atsa' ¿quĩjya'rráa testigo jwee pejiicytja'w? Tyajy atsewe'weni's i'cue'shĩiva wẽse'ji'cue. ⁶⁶Sa' áchja' ¿maa sũju'cue? jĩte', tyãawe'sha' na'wẽty pas:

—Tyã' yuuwesa', tyãa pa'ga icjwa'j yuuna jĩty.

⁶⁷Tyajũ' Jesus dyi'pte fyne'sh avytjetjrra uyiity, atsa' vite' dyi'ptety uca'ca na'jĩna:

⁶⁸—Indya' Cristo dyijrra', mjiyu quimga dyi'pte ujca.

Jesusa's jiimeetj jīna Pedro we'weni
(Mr. 14.66-72; Lc. 22.56-62; Jn. 18.15-18, 25-27)

⁶⁹Tyā'wē yuutspcachja', Pedro' ecaju patyutec cachrra u'pu'. Atsa' teech cna'sa selpisáa utyaana cūjrna na'wēc we'we:

—Indyva Jesus Galileajuwe'sh yacj u'jusang jīte', ⁷⁰Pedro' jyucaysa dyi'pte:

—I'cue we'weni's jiimeetj jīnac īshii.

⁷¹Tyājū' Pedro' vityte casejna u'juetspcachja', vite cna'sa selpisaava uyrra' cytee ūssaty na'wēc pta'sh:

—Naa pitstjē'jva Nasarettewe'sh Jesus yacj u'jute uytju jīte', ⁷²Pedro' qui' īshiic jurāyna:

—Tyāa pitstjē'ja's andya' jiimeetj jīc.

⁷³Tyachmeynarrāa cytee ūssawe'sh Pedro tashte utyaarra na'wēty we'we:

—Isa, īshiimée indyva tyāawe'sh yacj u'jusang. Tyā'wērraíi iindy we'weni' peendame' jīte', ⁷⁴qui' jurāyrra na'wēc we'we:

—Tyāa pitstjē'ja's jiimeetj, isa Dyus uyte.

Tyā'jīna ūspcachja', atall we'wec. ⁷⁵Atsa' Pedro' yajcyu Jesus na'jīna we'weni's: Atall we'wemeyna, indya' tecj us īshiiiane'nga jiimeetj jīni's. Tyā's yajcyrra', Pedro' eca casejrra seena' wala űusna ű'nec.

Jesusa's Pilato cusete ducjni
(Mr. 15.1; Lc. 23.1-2; Jn. 18.28-32)

27 ¹Tyājū' cjicjyna sējetste', sacerdote npitstjē'jwe'sh vite' judiu ntjē'jsawe'sh tyāawe'sha' puuty we'wety Jesusa's quicjel'jya'. ²Sa' tundrra jyūna u'jty ne'jue'sh Poncio Pilato tashte cuutya'jya'.

Judas uuní

³Jesusna cuuwe'jsa Judasa' Jesusa's icjwa'j vitni's jiyurra', iiméj wala űuscu. Tyā'wē yūumeevatsa' ewne' yu' sūjrna treinta vyutyi' caashwendu'jya' u'cj sacerdotewe'sh vite' judiu ntjē'jsawe'sh tashna na'jīna:

⁴—Andya' ājmeetj yūu, tyā'wē pitstjē'j quījteva yuuwemeesa's icjajc cuuwe'pja'ga jīte', tyāawe'sha' na'wēty pas:

—Cue'sha' ¿jiitca'wá'? Tyā'wē yūusa indy jiine'nga jīrra jypa'gameete', ⁵Judasa' tyāa vyu's dyuus yatte wāatajna'va u'jrra ya'jytjujccu.

⁶Tyā'wē yūute', sacerdotewe'sha' tyāa vyu's pcjacjrra na'wēty puuty we'we:

—Naa vyu's ofrenda cajate acjya' ājame'nja'w. Tyā'wēme', nasa's quicjel'jni vyua' naa pa'ga jīrra', ⁷tyāa vyuju mityj umsáa quiwe'styi wey, nasa ecajuwe'sh pa'jrra uusaaty pendaawa'j. ⁸Tyāa pa'ga āchpcach

tyāa quiwe' ee pcawnisa quiwe' jī'ty. ⁹Atsa' Dyus yuwe pta'shsa Jeremias we'weni cytey yuuc. Tyā' na'wēc we'we: Israelwe'sh macuetenel'ta tyweyya' puuty we'we tyāa treinta vyu's jypa'garraty ¹⁰mityj umsāa quiwe's wey, Dyusa' andya's jycaacj quiwe weycajn tyā'sa' cytey yuuty jīnac fi'j.

Jesusa's Pilato pēyni

(Mr. 15.2-5; Lc. 23.3-5; Jn. 18.33-38)

¹¹Jesusa' ne'jue'sh tashte jyūna u'jnic yuu, atsa' tyā' na'jīnac pējy:

—Indy vāa tyā'wē judiuwe'shtyi jycaajsane'nga jīte', Jesus pasrra':

—Indya' isang we'we'. Andya' tyā'wēsafītj jīc.

¹²Tyājū' sacerdotewe'sh vite' judiu ntjē'jsa tyāawe'sha' Jesusa's ewmeesang jīna we'wete', Jesusa' pasu'tsme'. ¹³Atsa' Pilato' na'wēc we'we:

—Indya's na'wēty quījteva jyuca ewmeesa' jīna yuwe ūsu' atsa' wēse'jetsmeevá'nga jīteva, ¹⁴Jesusa' quījva pasme'.

Jesusa's icjwa'j vitni

(Mr. 15.6-20; Lc. 23.13-25; Jn. 18.38-19.16)

Tyā'wē pasmeete', ne'jue'sha' ma'wē yūuya'rrāa yujva ājameerra', na'wē yūuya'c yajcy. ¹⁵Fiesta ensu' ne'jue'sha' teech preesu tyjweete'c ma'sna nasa pēyityna tyā'sna. ¹⁶Atsa' tyāa fiesta ensu' teech preesu jyutjtjesa ūsu'c Barabas yaasesa. ¹⁷Cyajc Pilato' na'jīna pējy tyāawe'sh pcjaacjerra ūssaty:

—I'cue'sha' ¿quimnacue tyjweete jyjtāasu'? ¿Barabasna', meerra' Cristo jī'i'cue tyā'sna vāa caatyjweete'je'nja?

¹⁸Tyā'wē Jesusa's ajtserra tyajy tashte ducjteva jiyurrac tyā'jī.

¹⁹Pilato' jycaajna u'pnite u'pte', tyajy nyua' na'jīnaga yuwe caaj: Tyāa pitstjē'j yuuwemeesa yacja' cuch yuumeena. Tyā'wēme', āchj cus iiméj seena' ūucjūucj csha'wtju tyāa pitstjē'j ma'wē yūuwa'jsateva.

²⁰Tyā'jīna pta'shtevea, sacerdotewe'sh vite' judiu ntjē'jsa tyāawe'sha' nasaty cnaytyi yu'cywe'werra, tyā'wē Barabasa's tyjweeterra Jesusa's quicje'jwa'ja's pēycajn. ²¹Tyā'wēteva, ne'jue'sha' qui' pējycu na'jīna:

—Naa e'nzsaty' i'cue'sha' ¿ma'snacue caatyjweete'j jyjtāasu'? jīte', tyāawe'sha' na'wēty pas:

—Barabasna metyjwete jīte', ²²Pilato we'werra':

—Barabasa's tyjweeterra', naa Jesusa's Cristo jī'i'cue tyā'sa' ¿quīj yūutca? jīte', jyucaysa pasrra':

—Cluuste mcaafyutsu'j jī'ty.

²³Atsa' Pilato' na'wēc pējy:

—¿Quījga ewmée yūu? jīte', tyāawe'sha' qui' sus we'werra':

—Cluuste mcaafyutsu'j jī'ty.



(San Mateo 27.29)

²⁴Tyājū' Pilato' quījva yūuya' ājanimeeterrāa nasa' jweefirrāa seena' wala suste', yu' jyūucaajrra nasaa dyi'pte tyajy cusety cweechac na'jīna:

—Naa pitstjē'j quījteva yuuwemeesa's icjni's andya' yuuwemeesatj. Tyā'sa' i'cue'sh pasune'cue jīte', ²⁵nasa jyucaysa we'werra':

—Tyā'sa' cue'sh luuch yā'jrra jyuca paswa'jsatja'w jī'ty. ²⁶Tyājū' Pilato' caatyjweete'cj Barabasa's, nava Jesusa's caapechucue'jrra cluuste fyutscajn ducju.

²⁷Tyā'wē yūute', soldauwe'sha' ne'jue'sh u'pnite ca'ga'jrra, soldauwe'sh jyucaysaty pa'yarra Jesusa's jyuca cytandrraty yuju. ²⁸Tyājū' csūupi'jrra atyj bejsaty caatje'j. ²⁹Sa' tsjūtsja's corona na'wē vitrra dyictjete quil'ptyi. Patsu cuseju yu', fytūu zunzcuēty caatu'j. Tyā'wē yūurraty tyajy tashte peejyūcue:

—Judiuwe'shtyi jycaasatj jī'ne'nga jīna weechna. ³⁰Sa' fyne'sh avytjetjna fytū's cusa'jrra, dyictjegaty pecue'cue. ³¹Tyā'wē Jesusa's

weechna jyā'jrra', tyāa atyj bejsa's csūupi'jrra Jesus ropa's qui' caatje'jty. Tyā'wē yūurraty cluuscjē fyutsya' jyūna ulj.

Jesusa's cluuste fyutsni

(Mr. 15.21-32; Lc. 23.26-43; Jn. 19.17-27)

³² Tyajū casejna ul'juetsrra', teech pitstjē'j Cirenejūwe'sh Simon yaasesa yacjtyi pu'jycjēw. Sa' Jesus yacjni cluusa's tyā'snaty cyaacje'j.

³³ Tyā'wē yūurraty pa'j teech ajte Golgota yaasesate. Tyāa yu' Uusá Dyictjē Dyi'tjrráasa jīni'. ³⁴ Cyteea' vinote yaasa's awrraty Jesusa's yus wēe. Nava tyā'sa' yuwete isarrarráa tundyme'.

³⁵ Cluuscjē a'cyrra', soldauwe'sha' suerte caajty Jesus atjni ropa's maa soldau cnayteva jiyuya'. Dyus yuwe pta'shsa' na'jīnac we'we tyā' cytey yuuc: Suerte caajrra andy ropa's tyundeendety tyāawe'sh pwe'sh jīnac we'we. ³⁶ Tyā'wē yūurraty cytee tjengna cach. ³⁷ Sa' tyajy dyictjē cacuey fi'jrra qui'ptyi quīj yūsate icjrrava na'jīna pta'shna: Naaí Jesus Judiwe'shtyi Jycaajsa' jīnac fi'jni yu'.

³⁸ Sa' Jesus pucacjē pdyi'ptyi e'nz pesweety qui'pni yuu cluuscjē. ³⁹ Atsa' cluus tashuy uycjēwsa' na'jīnaty wēeshu' dyictjeety caawūjna:

⁴⁰ —Dyuus yata's pētyrra tecj ente' qui' quiissatjē'j, indya' ya'menwe'we. Dyus Nchi'c dyijrra', cluusuj msal' jī'ty.

⁴¹ Tyā'wēy sacerdotewe'sh, ley caapiya'jsawe'sh, fariseowe'sh, vite' judiu ntjē'jsawe'sh tyāawe'sh pwe'sh na'jīnaty weech we'we:

⁴² —Vite yuutyi' nwe'wec, nava peequí yu' ya'nwe'weya' āja'tsme'. Israelwe'shtyi Jycaajsa dyijrra', cluusuj sa'jana ats yuurráa ishijja'tsmeega sūju'nja'w. ⁴³ Dyus Nchi'ctju jī'c na' Dyusnane' neewe'we', atsa' tyā'sa' āchjī Dyusa' nwe'wena, nwe'weya' ājarra yu' jī'ty. ⁴⁴ Atsa' cluuscjē fyutsni qui'pnisa peswée yujva wēeshu pu'chji'ty.

Jesus uuní

(Mr. 15.33-41; Lc. 23.44-49; Jn. 19.28-30)

⁴⁵ Tyajū ēēpyāj walajūjy chji'ndyrra cusutste las trestepcachcu chji'ndy naa quiwete jyuca. ⁴⁶ Atsa' las tres ājatspcachja', Jesusa' na'jīnac sus we'we:

—Eli, Eli, ¿lama sabactani?—tyā' na'jīni': Andy Dyusngu sa' ¿mjīi pa'ganga andya's tjengmée nvijt? jīni'.

⁴⁷ Atsa' cytee ūssa' tyā'jīni's wēse'jrra', na'wēty we'we:

—Dyus yuwe pta'shsa Eliasa's pa'yatsa' jī'ty.

⁴⁸ Naapcachja' teehsa' wuwuuna ul'jrra esponja's vino puste acjrra fyttū vitste qui'prra yuwete utyac chanzhacajn. ⁴⁹ Nava vite yu' na'jī'ty:

—Cuch yuunu. Aan Elias pa'jana nwe'weya' jī'ty.

⁵⁰ Tyajū' Jesusa' qui' seena' sus we'werra' uuc. ⁵¹ Naapcachja' dyuus yatte tyundenisa liensu pesatj a'cynisa' puupyājcjē sutec cute ēeju



(San Mateo 27.48)

quiwete quīj. Naapcachja' ejndva chjächja u'tje', peña yujva upety, ⁵²atsa' uusaawe'sh pendarí cafyva pjaatete', Dyusna jypa'garra uusaawe'sha' qui' ityi yuuty. ⁵³Atsa' Jesus uurrava qui' ityi yuunijū' tyāawe'sha' pendarí cafyu casejrra Jerusamente u'cate', maanzcuēesava uytyi.

⁵⁴Tyājū' cytee Jesusna jypa'yacy tjengna üssawe'sh vite' soldau cpiitan tyāawe'sha' wala üucjtyi ejnd u'jna vite' quījva seena' yūuni's uyrra. Sa' na'wēty we'we:

—Isa, naa pitstjē'ja' Dyus Nchi'c yuj yu'ga jī'ty.

⁵⁵Cyteea' cuj u'ytyi ūsu' jyu'ju tjengna, tyāawe'sha' Jesusna selpiina u'jusaty yu' Galileajūy yuusa. ⁵⁶Tyāawe'sh cshavyte' Maria Magdalena, vite Maria Jacobo Jose njī'j, vite' Zebedeo nyu tyāawe'shtyi yu'.

Jesusa's pendarí

(Mr. 15.42-47; Lc. 23.50-56; Jn. 19.38-42)

⁵⁷Cusna quījatste', teech pitstjē'j wala ji'pjsa Jose yaasesa Arimatea chjambuwe'shcu pa'j. Tyāava Jesus yacj u'jusac yu'. ⁵⁸Tyāa pitstjē'ja' Pilato tashte u'jrra', Jesus cacue's

pējycu, atsa' Pilato' yuwe caacj tee ducj jīna. ⁵⁹Tyājū' Josea' Jesus cacue's spajcyrra liensu finusatec yap. ⁶⁰Sa' cuet peñate u'se cafi'jrra ji'pju'c peecy cacue's pendaawa'j tycaa cjicjrra', u'cani cafyte yu' cuet walasaju apjrrac u'j. ⁶¹Cytee tyā'wē yūutste', pendarí cafy dyi'puj utyaty tjengna u'pu' Maria Magdalena vite Mariava.

Jesusa's pendarí cafyte tjengsa

⁶²Jycaasena fi'nzeyā' jyuca pjeu'jna jyā'jnijū cuscuscjē' sacerdote npiitstjē'jwe'sh vite' fariseo tyāawe'sha' Pilato tashte u'jrra na'wēty we'we:

⁶³—¿Wēse'ngá!, ne'jue'sh? Tyāa ñishijtjē'ja! nee ñtyi u'jurra!, uurrava tecj ente' qui' ñtyi yu'nja jñi'stja'w yajcy. ⁶⁴Tyāa pa'ga mcaaj pendaní cafyte wala ew apjcajn tecj entepcach. Tyā'wē yūumeete!, tyāa yacj u'jusawe'sha' cus pa'jrra cacue's pesweetyna, sa' e'suyā'ja! na'jīna we'wetyna nasaty: Uurrava qui' ñtyi yuuga jityna. Atsa' tyā'wē yūurra ñshiini' nyaffi ñshiinite tjaacuesa yuuna jite!, ⁶⁵Pilato' na'wēc we'we:

—Soldauwe'sh cytee ũsta' tyāaty pe'jrra me'jwe, sa' pendaní cafyte wala ew mapjwe. I'cue'shtyi ma'wē wejy ew tjengte!, tyā'wē myūuwe.

⁶⁶Tyā'jite!, u'jrra pendaní cafyte wala ew apjrra tyāa apjni cajcuete sello qui'ptyi, sa' jypa'yacy tjengna ũswa'jsa soldauwe'sh tyajty.

Jesus qui' ñtyi yuuni

(Mr. 16.1-8; Lc. 24.1-12; Jn. 20.1-10)

28 ¹Jycaase en scjēwniijū cuscuscjē mjiuwal' en āanite wala cusfitey Maria Magdalena vite Maria yacj tyāawe'sha' u'jty pendaní cafyte tjengya'. ²Naapcachja' ejnd seena' chjāchja u'cj, tyā'wē Dyus angel cieluju quijrra pendaní cafyte apjni cueta's quiispa'ga. Sa' tyāa yu' tyāa cuet cajcuete cachrra ³cpì'sh cueneni na'wēc cjicjyna u'p yu', atsa' tyajy atjni ropa' seena' zhichcue chijme yu'ty. ⁴Atsa' soldauwe'sha' tyā'wēsa's uyrra', ũucjnite jyuca yayarra uuní na'wēty wete. ⁵Atsa' tyāa u'ywe'shtyi' Dyus angela' na'wēc we'we:

—Ūucjnuwe, andya' jijtj, Jesusna cluuste fyutsty tyā'sna i'cue'sha' tjengya' yuji'cue. ⁶Nava ayte' meeyā'ja'. Uunijū qui' ñtyi yuurra u'cj ma'wēga pta'sh tyā' cytey yuuc. Mcaane'ta cjicj tycaa myujwe tjengya'. ⁷Sa' wala dund me'jwe, tyāa yacj u'jusawe'shtyi na'wē pta'shya': Uurrava qui' ñtyi yuurra Galilea quiwen u'juetsa' i'cue'sh yatste. Cytee puuty uyuune'cue jīna pta'shine'cue. Tyā'wē pta'shwa'tj jì'pju i'cue'shtyi jīc Dyus angela'.

⁸Tyajū' u'ywe'sha' wala dund wuwuuna u'jty Jesus yacj u'jusawe'shtyi pta'shya' ũucjnava ũuste wēt wēt yajcyna. ⁹Naapcachja' Jesusa' tyāawe'sh u'juetste dyi'tje vyaarra wechana cūjc. Atsa' tyāawe'sha' Jesus tashte peejyūcuerra tyajy chindaty psha'ndrra wechaty. ¹⁰Atsa' Jesusa' na'jīc:

—Ūucjmée me'jwe, sa' andy yacjtjē'jwe'shtyi pta'shine'cue Galilea quiwen u'jrra cytee andya's puuty uyuune'cue jīnac pta'shcaaj.

Jesus ñtyi yuuni's soldauwe'sh pta'shni

¹¹U'ywe'sh tyā'wē u'juetspcachja', pendaniite tjengna ũssa soldauwe'sh maafí yu' u'jty Jerusalente sacerdotewe'shtyi pta'shya' quij yūuni'sva jyuca. ¹²Tyajū' sacerdotewe'sha' judiu ntjē'jsawe'sh tashte u'jrra puuty we'wety. Tyā'wē yūurra soldauwe'shtyi' wala vvy ducjtyi. ¹³Sa' na'wēty we'wecaaj: Cuspyāj cue'sh deenite Jesus yacj u'jusawe'sh pa'jrra uuní cacue's pesweeta jīne'cue i'cue'sha'. ¹⁴Atsa' tyā'wē yuj dejne'ta sūjrra

ne'jue'sha' i'cue'shtyi ewmeete nviit wējeváana, nava cue'sh u'jrra tyāa yacj puuty we'we'nja'w i'cue'sh ju'ngu tyā'wē yūucajmén.

¹⁵ Tyā'wē cwe'we'tje!, soldauwe'sha' vyu's jypa'garra cytey yuuty. Atsa' tyāasaty judiuiwe'sha' āchpcach tyā'wērráa pta'shi'.

Jesusa' tyāa yacj u'jusawe'shtyi neewe'werra nviitni
(Mr. 16.14-18; Lc. 24.36-49; Jn. 20.19-23)

¹⁶ Tyā'wē yūuyā'tje!, Jesus yacj u'jusa oncesawe'sha' Galilean u'jty, tjā'j vitste mteene' Jesus pta'sh cytee. ¹⁷ Sa' Jesusa's uyrra', peejyücuerra wechaty, nava vitefi yu' tyāamée váana sūjna cujty yaaqui'. ¹⁸ Tyajū' Jesusa' tyāawe'sh tashte utyaarra na'wēc we'we:

—Cielute vite! naa quiweteve andynarrarráac neewe'weni yuu jycaajwa'ja's. ¹⁹ Tyāasatj i'cue'shtyi jycaaja': Me'jwe Dyus yuwe's pta'shya' maa quiweteve nasa jyucaysaty. Tyā'wē yūurra' yu'te bautisaïne'cue, Dyus vite' Dyus Nchi'c vite' Dyus Espiritu tyāawe'shtyi neewe'werra. ²⁰ Sa' Dyusa's nwēese'jwa'ja's caapiya'jane'cue quijteva jyuca, andy ma'wētea i'cue'shtyi jycaaj tyā'wēy. Mjiyuwe, āchjüyā'ja' een isa bagachteva i'cue'sh yacj nes yuuya'vatj naa quiwe ptsuupcach jic.



(San Mateo 28.20)

DYUS YUWE SAN MARCOS FI'JNI

Juan Bautista nasa u'pnimée quiwesu Dyus yuwe's pta'shni
(Mt. 3.1-12; Lc. 3.1-9, 15-17; Jn. 1.19-28)

- 1** ¹Dyus Nchi'c Jesucristo fi'nzeni's pta'shnisa na'wēc tacj: ²Tyāniitey Dyus yuwe pta'shsa Isaiasa' na'jīnaga fi'j Dyus we'weni's: Teech andy yuwe pta'shsa's cajatstju iindy yatste, iindy dyi'ja's pjeu'cjan. ³Nasa u'pnimée quiwesu sus we'wenic ptjūuse' na'jīna: Dyus pa'jwa'ja's mpjeu'jwe, dyi'ja's cu'le pjaandena jī'c.
- ⁴Tyā'wē Isaias we'weni cytey yuuwa'j ājte', Juana' nasa u'pnimée quiwesu vyaac nasaty bautisāyna. Sa' na'jīnac pta'shi':
—Pcaltyi nvijtrra Dyus tashte mishawendwe, yu'te ya'bautisāyna, cyaj i'cue'shtyi' Dyusa' peltunaīna.
- ⁵Juan we'weni's wēsē'jya' pa'jty Judea quiwesuwe'sh vite' Jerusalenuwe'shva. Sa' pcalsatja'w jīna Dyusa's perdon pējyna pa'jsatyi' Juana' Jordan yu'walate bautisaī'c.
- ⁶Juana' camelto cjas atyj atjrra cja'tycu jytundu', sa' tyajy ū'nisa yu' cjā'sh wala chji'ndy miltyi yu'. ⁷Sa' Dyus yuwe's na'jīnac pta'shi' nasaty:
—Andy e'suj teech yuja' tyā' andyte jytjaacue ājāwa'jsa'. Andya' tyajy pelgatyī wesrrāa uyjtyva cijimbya' ājāwa'jmeesatj. ⁸Andya' i'cue'shtyi' yu' yacjrrāatj bautisāyya' ājā', naapcachja' tyā' i'cue'sh ūuste Dyus Espiritu's cyu'acje'jya' ājāwa'jsa' jī'c.

Jesus ya'bautisāyni
(Mt. 3.13-17; Lc. 3.21-22)

⁹Tyān ensu' Jesusa' Nasaret chjambu casejc Galilea quiweju. Sa' Juan tashte pa'tje', Jordan yu'walate bautisāycu. ¹⁰Atsa' yul'ju casejetsrra', uycu cielu pjaateetste. Naapcachja' Espiritu' tumb chijme na'wēsa tyajy cajcucējē quījatstec uy. ¹¹Sa' cieluju teech na'jīna we'weniva ptjūusec:
—Indya' andy Nchi'c wala wendynisang. Iindypa'ga wala wechana ūstju jīc.

Echtjē'j Jesusa's īshii wēeni*(Mt. 4.1-11; Lc. 4.1-13)*

¹² Tyāa dundtey Espiritu' Jesusa's pe'jna u'cj nasa u'pnimée quiwesu.
¹³ Atsa' Jesusa' cuarenta encu cytee u'pu' yu'cj niimal cshavyte.
 Cytee u'pte', echtjē'ja' pa'cj ewmée vit wēerra. Atsa' tyāa e'su' Dyus
 angeleswe'shva pa'ljty pu'chya'.

Galilea quiwesu Jesus mjīiya' tacjni*(Mt. 4.12-17; Lc. 4.14-15)*

¹⁴ Juana's carcelte cyuupjni e'su', Jesusa' Galilea quiwen u'cj Dyus
 jycaajwa'ja's pta'shya'. ¹⁵ Sa' na'jīnac pta'sh:

—Ena' ājātsa'. Dyus jycaajwa'j ena' utya ūsa'. Atsa' i'cue'sha' pcaltiyi
 nvijtrra Dyus tashte mishawendwe, sa' Dyus yuwe ewte nviitwa'jsa's
 ūuste myu'acjwe jī'c.

Wendy uwesāa pajnzsaty Jesus pa'yani*(Mt. 4.18-22; Lc. 5.1-11)*

¹⁶ Tyāa e'su' Jesusa' Galilea īcj wala pucasu u'juetsrra', uycu pyacjsaty
 Simon Andreswe'shtyi. Tyāawe'sha' wendy uwesaaty yu', tyāasaty wendy
 ucje's īcj walate acjna ūsu'. ¹⁷ Atsa' Jesusa' pa'yac:

—Andy yacj myujwe, atsa' i'cue'shtyi' Dyus jīi nasaa pcjacjwa'jsa vitu'nja.
¹⁸ Tyā'jītspcachja', tyāawe'sha' wendy ucje's nvijtna' Jesus yacj u'jty.

¹⁹ Tyajū' Jesusa' qui' u'jrra', Zebedeo nchi'cwe'sh pyacjsatycu uy, Jacobo
 Juanwe'shtyi. Tyāawe'sha' wendy ucje's pā'cjnaty u'p yu' barcote. ²⁰ Atsa'
 pa'yac. Naapcachja' tyāawe'sha' ney Zebedeo's vite pu'chsa yacj barcote
 nvijtna', Jesus yacj u'jty.

Ech iiyamunisa*(Lc. 4.31-37)*

²¹ Tyajū' Capernaum chjambte pa'jrra', Jesusa' caapiya'jya' tacjcu
 sapatu jycaase ensu judiuwe'sh pcjaacjenite. ²² Atsa' Jesus caapiya'jni's
 wēsē'jrra', nasa' wala cuj yajcyna neeyūuty, tyā'wē leya's caapiya'jsawe'sh
 na'wēmée, nwēese'jwa'ja's ūucjnus we'wena caapiya'pja'ga.

²³ Tyāa pcjaacjeni yatte teech pitstjē'j ech iiyamunisac ūsu', sa' na'jīnac
 sus we'we:

²⁴ —Jesus, Nasaretjuwe'sh, cue'shtyi' ¿quīj ya'vanga? ¿Iviituya' vá'nga
 yuwé'? Indy quimteva jīitj. Indya' Dyus caajnisang jīte', ²⁵ Jesusa' na'jīnac
 ūuscha we'we tyāa echa's:

—Shuuna' myūu, sa' naa pitstjē'j ūusu mcaasej jīna jycaatje', ²⁶ tyāa
 echa' nasa's caywēchpa'jna juuna' cweeyi'jrra casejc. ²⁷ Tyā'wē yūute',
 nasa' jyucaysa ūucjrra na'wēty puuty paapēyi':

—Naa pitstjêl'ja' ¿quimna? Tyajy we'weni' ¿quijtyqui atsqi'ty ech yujva nwêesêl'je'? jî'ty.

²⁸ Jesus tyã'wê yûuni's wala dund jiyuty Galilea quiwesuwe'sh jyuca.

Pedro nyu njî'ja's Jesus nuycatyjini

(Mt. 8.14-15; Lc. 4.38-39)

²⁹Tyajû' judiuwe'sh pcjaacjeni yatu casejrra', Simon Andreswe'sh yatnac u'l, Jacobo Juan yacj. ³⁰Atsa' cytee yu' Simon nyu njî'ja' cacuesectec âtsâ'na ûsu'. Atsa' Jesusa's pta'shtyi tyã'wê âtsâ'sa ûsa' jîna. ³¹Tyajû' Jesusa' cûjrra cuseju pu'quiscu, naapcachja' dundtey cacueseca' ûchjac. Tyajû' quiiterra selpiiya' casejc.

Jyuca chji'ndyitste maanzcuêesatyva nuycatyjini

(Mt. 8.16-17; Lc. 4.40-41)

³²Tyajû' chji'ndyna quijatste', jyuca âtsâ'saty Jesus tashte nuypal'ty vite' ech luucu vitnisatyva. ³³Atsa' chjambte nasa' jyuca cûjty vityte tjengya'.

³⁴Tyajû' Jesusa' nuycatyjic fiyfiy wee ji'pjsatyva, sa' ech luucu vit-satyva wala cutyi'cj nasaa ûusu. Tyãa echa' Jesus quimteva jiity yu' nava cwe'we'jme'.

Galileasu Dyus yuwe's Jesus pta'shni

(Lc. 4.42-44)

³⁵Tyã'wê yûuni cjiiciitste nee chji'ndyitey, Jesusa' Dyus yacj puuty we'weya' u'cj chjamb ecaju. ³⁶Atsa' Simona' vite yacj Jesusna pacueya' u'cj. ³⁷Sa' uyrra' pta'shcu:

—Jyucaysa indya's jypeejyta' jîteva, ³⁸Jesus pasrra':

—Ay utyasuwe'sh viteva peejyta' Dyus yuwe ewsa's, atsa' cysû u'juega. Tyã'wê pta'shna pecûjya' îrráatj naa quiwete quij jîc.

³⁹Sa' ech iiyamurra luucu vit-saty nasaa ûusu cutyi'l'jna Galilea quiwesu jyuca pecûjc Dyus yuwe's pta'shna, vite' judiuwe'sh pcjaacjenisuva.

Teech pitstjêl'j wâl'jy weete âtsâ'sa's Jesus nuycatyjini

(Mt. 8.1-4; Lc. 5.12-16)

⁴⁰Tyân ensu' teech pitstjêl'j wâl'jy wee seena' canzhsate âtsâ'sa Jesus tashte peejyûcuerra na'l'jîc:

—Andya's nuycatyjivá'nga ajtsemeerra' jîna pytjaa we'wete', ⁴¹Jesusa' peejgâjna cuseju jya'ndyrra':

—Ajtseme'nja, naa pa'ga catyjirra mneeyûu jîtspcachja', ⁴²tyãa wâl'jy weeju catyjirrac neeyûu.

⁴³Tyajû' Jesusa' tyãa pitstjêl'ja's wala neewe'werra caacj na'l'jîna:

⁴⁴—Andy we'wenityi' jypa'yacyrra, maa yujtyva pta'shmeene'nga, naasáa sacerdoterrá's iindy cacue's tywesya' me'l. Sa' tyãa weeju catyjipa'ga Dyusna peesune'nga Moises ma'wêga jycaaj tyã'wêy, cyaj nasa jyucaysa jiyutyna indy ew catyjirra neeyûuteva jînac neewe'we. ⁴⁵Nava tyãa pitstjêl'ja' nasa jyucaysaty pta'shcu, Jesus ma'wê yûuni'sva jyuca. Tyãa pa'garráa Jesusa'

maa chjambte yujva äate pa'jya' äjämeerra', chjamb ecaju nasa meesurráac u'ju'. Macue tyä'wë yūuteva, tyajy tashte yu' majūwe'shva pa'jna nestyi yu'.

Esëya' äjasame's Jesus nuycatyjini

(Mt. 9.1-8; Lc. 5.17-26)

2 ¹Manz en scjēwniijū' Jesusa' qui'quin pa'cj Capernaum chjambte. Atsa' nasa jiyuty Jesusa' pa'jrra teech yatte ūsa' jini's. ²Tyāasaty naa dundte nasa wala pcjaacjerra yat vityte jyuca uta, atsa' Jesusa' Dyus yuwe's pta'shcu. ³Naapcachja' pajnz pitstjē'jsa teech ēsëya' äjäsameea's yacjrraty Jesus tashte nuypa'j. ⁴Nava nasaa cshavyte Jesus tashte cuutya'jya' äjämeerra', yat cajcueju pjaanderraty Jesus ūsniçjē nuyquij aandasga cjicjrra. ⁵Tyajū' ätsā'sa's nuypa'jsawe'sha' Jesusa' nuycatyjiyujuna sūjni's jiyurra', tyāa ätsā'sa's we'wec Jesusa':

—Indy pcala' peltunāyni yā'jty neeyūu jite', ⁶Dyus leya's caapiya'jsawe'sh wēsē'jna u'psa maafī yu' na'wēty yajcy:

⁷—¿Ma'wērraga naa pitstjē'ja' tyä'wë we'we'? Dyus yuurraa pcaltyi peltunāyya' äjawa'jsa', atsa' jweeju yu' ¿quimrrá' peltunāyya' äjäma'c? Atsa' Dyusa's iweech we'wena ūsa' sūjū'ty. ⁸Nava Jesusa' tyāawe'sh yaacyni's jiyurra na'jic:

—¿Quij yuutecue tyä'wë yaaqui'? ⁹¿Maa tjēymeesacy? Indy pcala' peltunāyni yā'jty neeyūu ¿jiniá'? Meerra': Quiittera iindy deeni's tu'srra me'j ¿jiniá'? ¹⁰Macue tjēysateva Dyus Nchi'c Nasa Yuusa' naa quiwete pcaltyi peltunāyya' äjawa'jsa' naa pa'ga caajiyu'jya'vatj ächja'. Tyajū' ätsā'sa's na'jic: ¹¹Indya'stju we'we': Quiittera iindy deeni's tu'srra yatna me'j jitspcachja', ¹²ätsā'sa' dundtey quiitena'va tyajy deeni's tu'srra u'cj, nasa tjengna ūsiyna.

Tyajū' jyucaysa wala cuj yajcyna Dyusna wechana na'jī'ty:

—Bagach yujva na'wë yūuni yu's iuymetja'w jī'ty.

Mateo's Jesus pa'yani

(Mt. 9.9-13; Lc. 5.27-32)

¹³Tyāa e'su' Jesusa' qui' u'cj icj wala pucan. Atsa' tyajy tashte nasa wala pcjaacjete', Dyus yuwe's caapiya'cj. ¹⁴Tyāajū qui' u'jrra', Alfeo nchi'c Leviascu uy, gobierno jii vyu pcjacjna u'pte. Sa':

—Andy yacj myuj jīna pa'yatspcachja', Levias quiitena' Jesus yacj u'cj.

¹⁵Tyajū' Jesusa' tyāa yacj u'jusawe'sh yacj Levi yatte ū'ya' u'cate', gobierno jii vyu pcjacjsawe'sh vite' pcalsawe'shva wala cujsa pcjaacjerra' Jesus yacj mesate ū'ya' cachtyi. ¹⁶Atsa' Dyus leya's caapiya'jsawe'sh vite' fariseowe'sha' Jesusa' nasa tyä'wësa cshavyte u'pte uyrra', pējytyi Jesus yacj u'jusawe'shtyi:

—I'cue'shtyi caapiya'jsa ¿ma'wērraga gobierno jii vyu pcjacjsawe'sh vite' pcalsawe'sh yacj ū'wé'? jite', ¹⁷tyä'wë pēyitste Jesus wēsē'jrra' na'jic:

—Yu'tse'jsa's jypeejymeeta' aca ji'pjmée wēt ūssa', naasáa ätsā'sa yuurraa yu'tse'jsa's jypeejyta'. Andya' naa quiwete nasa ewsaty pacueya' quijmeetj, pcalsaty pacueya'rraatj quij jic.

Yüunani's Jesusa's pëyni
(Mt. 9.14-17; Lc. 5.33-39)

¹⁸Teech ente', Juan yacj u'Jusa vite' fariseowe'sh yacj u'Jusa tyã'wẽ yüunaana üste', nasa' paapëjytyi Jesusa's:

—¿Juan yacj u'Jusa vite' fariseowe'sh yacj u'Jusawe'sha' yüuna'ty, atsa' indy yacj u'Jusawe'sh yu' ¿quij yuurrata yüuna'tsmée? jîte', ¹⁹Jesusa' na'wẽc caaja'nda'jna pas:

—¿Noviowe'sh cambia ente pi'cynisa' yüunaaya' äjãma'ty? novio tyãawe'sh yacj nee üsiite'. Cambani fiesta ptsumeyte', yüunaaya' äjãmeetyna. ²⁰Nava novio' tyãawe'sh tashu tyuteewa'j en pa'jana, tyäjü isa yüunaatyna.

²¹Ropa iish suteniite, tela u'sesa yacj ya'pã'cje'tsme'. Tyã'wẽme', tela u'sesa' jweefirráac sunde' iishsa's. ²²Tyã'wẽy beca u'se aajnisa's slun iishsate ya'awu'tsme'. Tyã'wẽme', beca u'sesa' slun iishsa's sunde'c, atsa' beca yacj slun yacj e'nzíi vitu'ty. Tyãa pa'ga beca u'sesa's slun u'sesate awwa'ja' jïc.

Jycaase enteva scuutyjtyi chuctenderra ü'ni
(Mt. 12.1-8; Lc. 6.1-5)

²³Teech sapatu jycaase ente', Jesusa' scuutyj ejsuc scjẽw. Atsa' tyãa yacj u'Jusawe'sha' scuutyjtyi chuctenderra ü'ty. ²⁴Atsa' fariseowe'sha' na'wẽty pëjy:

—¿Uyu'ngá' indy yacj u'Jusawe'sha' ma'wẽrrata mjii en meeteva tyã'wẽ yũ'? jîte', ²⁵Jesusa' na'wẽc pas:

—I'cue'sha' Dyus librute iilëymeevá'cue Davida' ¿quijga yuu? tyãa yacj pi'cyna u'Jusawe'sh yacj teech ente' wẽerra'. ²⁶Sacerdote npiitstjẽ'j Abiatar ente' dyuus yatte u'carra, cytee pantyi ü'c, sa' tyãa yacj u'Jusatyva üsu'scu. Tyãa pana' naasáa sacerdotewe'shrráa ü'wa'tje jiirrava tyã'wẽc yüu.

²⁷I'cue'sha' mjiyuwe: Jycaase ena' nasaty selpiwa'jsa firrá', nava suwwa'jsa yu' me'. ²⁸Tyãa pa'ga Dyus Nchi'c Nasa Yuusa' jycaajwa'j ji'pja' macue sapatu jycaase enteva jïc.

Teech pitstjẽ'j tyajy cuse undynisa
(Mt. 12.9-14; Lc. 6.6-11)

3 ¹Vite sapatu ente' Jesusa' qui'quin judiuwe'sh pcjaacjeni yatte u'cac. Atsa' cyte' teech pitstjẽ'j teech cuse undynisa quëese'jya' äjãsameec u'p yu'. ²Atsa' fariseowe'sha' Jesusa's peetjengu'naty üsu', sapatu jycaase ente nuycatyjite' päatyjĩ'cya' sũjrra.

³Tyajũ' Jesusa' tyãa pitstjẽ'ja's pa'yarra nasaa pyäjte cyuuju'jrra', ⁴na'wẽc paapëjy vite cytee üssaty:

—Sapatu jycaase enteva pu'chte ¿ewmañ? meerra' ¿pu'chwa'jmeemañ? Nasa's nwe'wete ¿ewmañ? meerra' nwe'wemeete ¿ewmañ? jíte', tyāawe'sha' pasmée shuuna'ty neeyūu.

⁵Tyā'wē fariseowe'sha' Jesusa we'weni's jypa'gaya' wa'lte', Jesusa' tyāawe'shtyi ūuscha tjengrra na'jīnac we'we tyāa pitstjē'j cuse undynisa's:

—Cuse's mcu'le'j jītspcachja', tyajy cuse' ewuuc.

⁶Tyajū' fariseowe'sha' Jesusa's icjya' puuty we'weya' u'jty Herodes ju'ngsawe'sh yacj.

Nasa wala cuj pejnaty ícj pucasu

⁷Naapcachja' Jesusa' tyāa yacj u'jusawe'sh yacj u'cj ícj wala pucan. Atsa' Galileaju nasa wala cuj u'jty Jesus e'stey. ⁸Tyā'wē Jesus quíjquijva ew yūuni's nasa jiyurra', majūwe'shva Jesus tashte pa'jty tjengya', Judeajuwe'sh, Jerusalenuwe'sh, Idumeajuwe'sh, Jordan yu'wala cutejuwe'sh, vite' Tiro, Sidon chjamb peecu'juwe'shva. ⁹⁻¹⁰Nasa tyā'wē wala pa'tje', maanzcuēe ātsā'satyva nuycatyjic, atsa' jyucaysa Jesusa's cpaa'jya'ndyrra catyji wēesa tyajy tashterrarrāa utyaarra acaachpchájty yuuna ūsu'. Tyāa pa'gac Jesusa' tyāa yacj u'jusawe'shtyi jycaaj teech barco ij ji'pjucajn acaachjitste cytee cjēewa'j. ¹¹Atsa' ech iyamunisawe'sha' Jesusa's uyrra, tyajy tashte pee'yūcuena na'jīnaty we'we':

—Indya' Dyus Nchi'cngu jíte', ¹²Jesusa' tyāawe'shtyi' wala juuna' we'wec quimteva āate caajiyu'cjamen.

Doce nasa Jesus tyjityjni

(Mt. 10.1-4; Lc. 6.12-16)

¹³Tyāa e'su' Jesusa' tjā'tje u'cj cuj nasaty pi'cyrra.

¹⁴Atsa' cytee cājrra', doce nasaty tyjityjcu tyāa yacj u'juwa'jsa, tyāawe'shtyi' Dyus yuwe's pta'shya' caajya'. ¹⁵Tyā'wē tyjityjrra', ātsā'satyva nuycatyjina ech luucu vit-satyva ūusu cutyi'jya' ājāwa'ja's ūscu.

¹⁶Tyāa doce nasa' na'wē yaaseta': Simon, tyā'sa' Pedro yasec qui'p.

¹⁷Vite' Zebedeo nchi'cwe'sh pyacjsa Jacobo Juanwe'shtyi yu'. Tyāa pyacjtyi' Boanerges jīnaty cysuusu', nasa juuna'sa pa'ga. ¹⁸Vite' Andrés, Felipe, Bartolomé, Mateo, Tomás, Alfeo nchi'c Jacobo, Tadeo, vite' Simón cananista nasa, ¹⁹vite' Judas Iscariote, Jesusa's atsesawe'sh cusete ducjwa'jsa.

Jesusa' tjā'ju shawendrra', teech yattec u'ca, tyajy tyjityjnisawe'sh yacj.

Dyus Espiritu's atsewe'weni

(Mt. 12.22-32; Lc. 11.14-23; 12.10)

²⁰Tyā'wēy nasa iiméj wala cuj pcjaacjete', ū'wa'j en yujva ji'pjumeeta'.

²¹Tyajū' Jesus nwe'sha' tyā'wē yūuni's jiyurra', Jesusa' luucu yuune' sūjrra pe'jna u'jya' pa'jty. ²²Atsa' Dyus leya's caapiya'jsawe'shva Jerusalenu pa'jrra' na'jī'ty:

—Naa pitstjē'ja' echtjē'ja's yuu ũuste ji'pja'. Tyā'wērraīc echtyi nasaa ũusuj cutyi'jya' ājā' jīte', ²³Jesusa' nasaty pa'yarra na'wēc pta'sh jiyucajn:

—¿Ma'wērra echtjē'ja' echtjē'ja's írráa cutyi'jya' ājā'cy? ²⁴Maa quiwetevea gobierno' peecy nasaty írráa ajtserra puiirra', chjächjameena. ²⁵Tyā'wēy teech yattewe'shva puuty yajtsena puiirra', ptsuutyna puuty uuna. ²⁶Atsa' tyā'wēy echtjē'ja' tyajy jycaajnis ech yacj írráa puiirra', chjächjamée puuty ptsuutyna.

²⁷Quim yujva ewterraj yu' ncuusa'jya' ājāmeetyna, yat namu cjuē'ya's tundmeerra yu'. Atsa' tyā'wē tundrra yuurráa ncuusa'jya' ājātyna.

²⁸I'cue'sha' mpa'yajcywe: Nasa naa quiwete quijva ewmée yūuni quijva Dyusna ewmée nuywe'weteve tyāaty' jyuca ya'peltunaína. ²⁹Nava Dyus Espiritu's atsewe'wete', bagachte yujva peltunāynimée yuuna, uu quiwen caajwa'jrráa nviituna jíc. ³⁰Nasa we'werra': Echtjē'ja's ũuste ji'pja' jīpa'gac tyā'wē pta'sh Jesusa'.

Jesus njī'j vite' tyajy nyacjwe'sh

(Mt. 12.46-50; Lc. 8.19-21)

³¹Naapcachja' pa'jty Jesus njī'j vite' nyacjwe'sh jyuca. Sa' ecate cūjrra, Jesusa's pa'yacaajty. ³²Atsa' Jesus yacj dyiite u'psa' pta'shtyi na'jīna:

—Íindy mama iindy nyacjwe'sh pa'jrra ecate ũsta', sa' indya'styi yuucaja' jīte', ³³Jesusa' na'wēc pas:

—¿Quimtyicue andy mama andy nyacjwe'sh jīna we'wé'? ³⁴Sa' tyā'wē pta'shsaty tjengrra' na'jīc:

—Andy mama andy nyacjwe'sha' naata'. ³⁵Dyus jycaajni's nwēese'jna cytey yuusáa yuurráa, andy nyacj, andy npe'sh, andy mama na'wēsata' jíc.

Scuutyj uujsa's caaja'nda'jni

(Mt. 13.1-9; Lc. 8.4-8)

4 ¹Jesusa' qui'quin ícj wala pucate caapiya'jya' casejte', nasa iiméj wala cuj pcjaacjerra utaatste', Jesusa' barcote cjēerrac pta'sh. Atsa' nasa yu' ícj wala pucate neeyūuty wēsē'jna. ²Tyājū' quījquijva pta'shcu ejemplo yacj caaja'nda'jna. Sa' na'wēc caapiya'j:

³—Mwēesē'jwe: Scuutyj uujsa' ujsa' casejc. ⁴Atsa' mteefi yu' dyi'jsu āasu neeyūute', vichacue ũ'ty. ⁵Vite ajsu' cuet cajcuesuty neeyūu quiwe petsrráa ji'pjsu. Sa' quiwe jwetmée ya'fijmbrra' dundtyi bucha. ⁶Nava sec achaate' jyuca ujdycu, wetse dyiimeene' ji'pju' naa pa'ga. ⁷Vite ajsu' tsjütsj cshavysuty ũshi, atsa' tsjütsj walaarra jyuca apjtel, tsutmeeta'. ⁸Vite ajsu' quiwe ewsatēc ũshi, sa' bucharra wala ew tsuttyi. Maa tashí yu' treinta, vite' sesenta, vite' cien ñiñtyi tsut.

⁹Na'wē pta'shtju tyā'sa' jiyuwa'jsa ũsrra', jiyune'cue jíc.

¹⁰Tyājū' nasa cujsa yu' u'tje, Jesusrráac neeyūu, doce tyjityjnisawe'sh vite nasa yacj. Atsa' tyāawe'sha' paapējtytyi tyāa ejemplo's ma'jīniteva jiyuya'. ¹¹Atsa' Jesusa' pta'shcu:

—Dyus jycaajni ensu ma'wē yūuwa'ja'sva quim yujva jiyunimeesa's i'cue'sh yuutyi's caajiyu'jwa'ja'. Nava jiyuwa'jmeesatyi's ejemplo

yacjrráa pta'shwa'ja', ¹²cyaj uyrrava, uysamée na'wërráa neeyũutyna, sa' wësê'jrrava, wësê'jsamée na'wërráa neeyũurra Dyus tashte shawendmeetyna, atsa' tyāawe'shtyi' Dyusa' peltunaĩmeena.

¹³Tyajũ' na'wëc āate caajiyu'j:

—I'cue'sha' naa ejemplo's jiyu'tsmeevā'cue. Tyā'wërra' ¿ma'wë vite ejemplotyva jiyu'qui'cue? ¹⁴Scuutyj uujsa' Dyus yuwe's pta'shsa na'wësa'. ¹⁵Maa nasafĩ yu' scuutyj fiw dyi'jsu ũshisáa na'wësata': Dyus yuwe's wësê'jrra ũuste jypa'gateva, echtjê'j pa'jrra tyāa yuwe's ũusu cutyi'jina. ¹⁶Vite nasa' scuutyj fiw cuet cajcuesu ũshisáa na'wësata': Dyus yuwe's āchjĩ yu' wechanaty jypa'ga'. ¹⁷Nava ũusuj jyuca yajcyrra jypa'gameerra', Dyus yuwe's ajtserra pcyuua'lj en pa'tjerráa tyachmeyna wete'ty. ¹⁸Atsa' vite nasa' scuutyj fiw tsjũtsj cshavysu ũshisáa na'wësata': tyāawe'sha' Dyus yuwe's wësê'tjeva, ¹⁹naa quiwete quĩjquĩjva ji'pju wēenisarráa ũuste jyuca cjēerra Dyus yuwe yu'sa' caapechcana'juna. ²⁰Nava maa nasafĩ yu' scuutyj fiw quiwe ewsate ũshirra ma'wëta maa'ĩ yu' treinta, vite' sesenta vite' cien ñiñ pejna, tyā'wë Dyus yuwe ũuste penawa'jsa'.

Āate jiyuwa'j yu' neeyũuwa'jsamée

(Lc. 8.16-18)

²¹Tyajũ' vite ejemplo na'wëc pta'sh:

—Lampara's pqui'tarra ¿caja dyiite meerra' atũu dyiite sũtjnisatyná'? Tyā'wë yũumée, lampara's āatec ya'tyaja', eena' cweetjcajn. ²²Macue sũtteva, uynimée yu' quĩj yujva neeyũumeena. Sa' tyā'wëy macue ũusterráa yaacynisa'sva jiyunimée yu' neeyũumeena. ²³Jiyuwa'jsa ũsrra', jypa'yacy mwēesê'jwe jĩrra', ²⁴na'wëc pta'sh:

—Andy caapiya'jni's jypa'yacy mwēesê'jwe. I'cue'sh wa'lmée wësê'tje', Dyusa' jytjaacue caajiyu'juna. ²⁵Dyus yuwe's jiyuwa'jsa's caajiyu'jni yuuna. Nava Dyus yuwe's jiyuwa'jmeesa's caajiyu'jnimée yuuna jíc.

Dyus naa quiwete jycaajya' pa'jnisá

²⁶Jesusa' vite ejemplo pta'shcu:

—Dyus naa quiwete jycaajya' pa'jnisá' na'wësa': Teech pitstjê'j mjĩisa' fiwa's quiwete ujrrarráa ²⁷u'jue'c sa' tyachcu tjengya' pa'jatsmée. Atsa' uujnisá' bucharra wala'c, nava uujsa yu' jiimeec yu' ma'wë buchana walaatsteva. ²⁸Fiwa' quiwete ujyā'tje', peecyrráa bucha'c quĩjva yuumeeteva, nyafyte' tash cjuē'y wala'c, tyā'wë yuurrac spiiga caseje', tyāa e'su'c ñiñ caseje', ²⁹atsa' tjê'j ente', pcjacya' caseje'ty.

Mostasa fiwa's caaja'nda'jnisá

(Mt. 13.31-32; Lc. 13.18-19)

³⁰Vite ejemploc pta'sh Jesusa':

—Dyus naa quiwete jycaajya' tacjnisá's ¿quĩj yacj caaja'nda'ja'cytja'w ats jiyu'qui'cue? ³¹Mostasa fiw na'wësa' atsa' tyāa yacj caaja'nda'ja'nja'w.

Tyāa fiwa' maa maa fiwteva tjaacue musecuēta', ³²nava quiwete uɟā'tje', maa ējyā tashteva jytjaacuec walāa, seena' wala chjā'py casejna. Atsa' vichacue yujva tyāa ējyā cshavysu yaat-ya' ājā'ty. Naa quiwete Dyus jycaajya' tacjnisa' tyā'wēysa'.

Ejemplo yacj caapiya'jwa'ja's pta'shni

(Mt. 13.34-35)

³³Jesusa' Dyus yuwe's tyā'wēc pta'shi' wala cuj ejemplo cutyi'jna, jiyuwa'jsa' jiyuya' ājācajn. ³⁴Ejemplo ji'pjmée yu' caapiya'ja'tsme'. Nava tyāa yacj u'jusawe'sh yuutyi's quīj ejemplo'sva jyuca cjiyu'jrrac nviitu'.

Marte wejya wala's Jesus cyuuju'jni

(Mt. 8.23-27; Lc. 8.22-25)

³⁵Tyāa entey chji'ndyna quījatste', Jesusa' na'jīc tyāa yacj u'jusawe'shtyi': —U'juega īcj wala cuten jīte', ³⁶nasaty nvijtna' Jesusa's pe'jna u'jty tyāawe'sh cjeerra u'pni barcote. Atsa' vite barcova ijtey u'jty.

³⁷īcj wala pyājūy u'juetspcachja', wejyaa wala quiittera barco's īcj dyiicjē acjya'vac yu', yu'a's barcote yuutarra. ³⁸Naapcachja' Jesusa' deenic yu', barco e'ste cachrra dyictje's peendyiquiga cjcjrra. Atsa' tyāa yacj u'jusawe'sha' Jesusa's fitytyi na'jīna:

—īcj dyiicjē cjejetstja'w atsa' ¿cue'shtyi' peeygāja'tsmeenga'? jīte', ³⁹Jesusa' quiittera, wejya's we'wec yujucajn pety īcj yā'jrra. Naapcachja' wejya yujute', īcjva yujuc.

⁴⁰Tyājū' Jesusa' tyāa yacj u'jusawe'shtyi' na'jīc: ¿Quīj yuurracue Dyus yu's yajcymée tyacue wala ūucjū'? jīc.

⁴¹Tyā'wē wejya yujva nwēese'tje', tyāawe'sha' wala cuj yajcyna neeyūuty na'jīna:

—Naa pitstjē'ja' ¿quim yujcy, atsqi'ty wejya īcj tyā'wēsa yujva nwēesē'jé'? jī'ty.

Gadara quiwetewe'sh ech iyamunisa

(Mt. 8.28-34; Lc. 8.26-39)

5 ¹Tyājū' īcj wala cute Gadara quiwete pa'jty. ²Atsa' Jesus barcoju casejtspcachja', teech pitstjē'j ech iyamunisa uusāa pendani cafyu casejrra Jesus tashte utyaac. ³Tyāa pitstjē'ja' uusāa pendani cafysuc u'psa yu', atsa' tyā'sa' quim yujva tsam cadenaju tundrra jype'jya' ājā'tsmeeta'. ⁴Chinda pety cuse yā'jrra maanzcuēe usva tundteva, nuywejimée cchuctenderra pūshi'. Atsa' quim yujva ājā'tsmeeta' tundrra jype'jya' yu'. ⁵En ma'c yuu cus ma'c yuu nava vitssu vite' uusāa pendani cafysu weynac pecūjū' cuet-su cpā'yuuna. ⁶Nava Jesusa's jyu'tje uyrra', wuwuuna u'jrra tyajy tashte peejyūcuc ⁷sus we'wena:

—¿Andya's quīj yūuya'vanga? Jesus, Dyus ītyīsa Nchi'c. Dyus pa'ga andya's peeygājrra tyacue seena' wala ñuste yu' caajnu jīc. ⁸Jesusa' ech luucu vit-sa's we'werra': Naa pitstjē'j ūusu mcaasej jīpa'gac tyā'jī'.

⁹Tyājū' Jesusa' pējycu:

—¿Quíj yaasenga? jíte!, pta'shcu:

—Legion yaasetj, wala cútja'w naa pa'ga jíc. ¹⁰Sa' tyāa ech luucu vit-sa' wala pytjaa we'wec tyāa quiwejú cutyí'cjamén.

¹¹Tyajú' cysú vits ja'ndasú wala cuchi úsu'ty apjna. ¹²Atsa' ech luucu vit-sa' na'jínaty pytjaa we'we:

—Cuchi úuste cjēeya' u'cjan cue'shtyi mcaaj jíte!, ¹³Jesusa' tyāa ech luucu vit-saty cuchi úuste u'caya' caacj.

Tyajú' tyāa ech luucu vit-sa cuchi úuste cjēete!, cuchi' luucu yuurra peñacjē pelurra yu'terrarráa cjēerra jyuca uuty. Tyāa cuchi' dos mil ájty yu'!

¹⁴Tyā'wē yūute!, cuchi tjengsa úucjrta wala dund pta'shya' u'jty chjambsu vite' chjamb ecaju jyuca. Atsa' nasa' wala pa'jty tjengya', quíj yūuteva uyya!. ¹⁵Sa' Jesus úsnite pa'jrta uyty tyāa pitstjēlj ech luucu vitnisa' wēt yāl'ropa ji'pj u'pte. Tyā'wē uyrra wala úucjtyi.

¹⁶Tyajú' ma'wē yūurra ech luucu vitnisa catyjini vite' quíj yūurra cuchi uuni'sva uysaawe'sha' jyuca pta'shtyi nasa tjengya' pa'jsaty's. ¹⁷Tyajú' nasa' Jesusa's úuscha we'wety tyāawe'sh quiwejú u'cjan.

¹⁸Atsa' Jesusa' qui' shawendya' barcote cjējetspcachja', ech luucu vitnījū catyjisa' wala pytjaa we'wec pe'jrta u'cjan. ¹⁹Nava Jesusa' pe'jna u'jmée na'wēc jycaaj:

—lindy yatna me'j, sa' iindy nwe'shtyi pta'shine'nga indya's Dyus peeygájrta ma'wē ew yūuni'sva.

²⁰Tyajú' tyāa pitstjē'ja' u'jrta, Decapolis chjambsu jyuca pta'shcu Jesus ma'wē yūurra nuycatyjini'sva. Atsa' nasa' wala cuj yaaqui'ty jyucaysa.

Jairo niisa vite' Jesus atyjte jya'ndysa

(Mt. 9.18-26; Lc. 8.40-56)

²¹Tyajú' Jesusa' ícj wala cutejú barcote cjēerra pesajrra cytee úste!, nasa wala pa'jty tyajy úsnite. ²²Atsa' judiuwe'sh pcjaacjenite npitstjē'jsa Jairo yaasesa' Jesus tashte peejyúcuerra ²³na'wēc pytjaa we'we:

—Andy niisacué' uutsyál'ja', atsa' uucajmén myuj jya'ndyya' iindy cuseju jíte!, ²⁴tyāa yacj u'cj Jesusa'. Atsa' nasa iiméj wala pejnarra, dyi'tje zuuna'rráaty u'juets yu'. ²⁵Atsa' tyāa nasa cshavyte teeche u'y cacue yu' vyaate doce añuyál' átsā'na u'jusac casej. ²⁶Sa' tyāa átsā'sa' wala pytjaa yuusa yu'c yu'tse'jsaty paapējyna. Sa' macue yu'tse weyna tyajy ji'pjuni jyuca ptsuuteva, quíj yujva yu'tse yuumée jwee'írráac jytaacuena u'juets yu'.

²⁷Tyajú' tyāa u'ya' Jesus quíj yūusaateva jiyurra' paatste e'su cūjrta, cpaajya'ndycu tyajy atyjcjē. ²⁸Tyā'wē Jesus atyjcjē cpaajya'ndyrrarráa catyji'nja sūjrrac tyā'wē yūu. ²⁹Sa' tyā'wē jya'ndyitspcachja', cacue yu' vyaame!, atsa' tyāa dundtey tyajy cacuete wēt yā'cj yajcy.

³⁰Tyajú' Jesusa' teeche átsā'sa tyajy atyjcjē jya'ndyrra catyjini's jiyuc, sa' nasaa cshavyte u'juetsíi yu'tjengrra', na'jíc:

—¿Quimga andy atyjcjē jya'ndy? jíte!, ³¹Pedrowe'sha' na'wēty pas:

—Nasaa cshavyte zuuna'rráa u'juetsngu sa' ¿ma'wēnga quimga jya'ndy jīna we'wé'? jīteva, ³²Jesusa' nasaa cshavysu tjengu'ngcu quim jya'ndyteva uyya'.

³³Tyajū' tyāa u'ya' tyā'wē naa dundte ew catyjini's īshiimée pta'shna ūucjna Jesus tashte yayan cūjrra peejyūcuc. ³⁴Atsa' Jesusa' na'wēc we'we:

—I'cue' ūusuj jyuca yajcyrrane'cue catyjia' sūjrra andy tashte utyāa, tyāa pa'ga catyjini i'cue neeyūu. Āchja' ātsā'mée wēt me'jwe wechana jīc.

³⁵Jesusa' tyā'wē we'wena nee ūsiyna, Jairo yatu yuusa cūjrra' Jairo's pta'shtyi:

—Iindy niisacuē' uuyā'cj, atsa' cuch pa'pchunu caapiya'jsa's pel'jna u'jya' jīte', ³⁶Jesusa' wēsē'jrra, Jairo's cviisha'cj na'jīna:

—Ñusnu. Andy ewuwa'ja'srráa myajcy jīrra', ³⁷Jesusa' vite yuutyi's pel'mée, pyacjsa Jacobo Juan vite' Pedro tyāawe'shrráatycu pel'jrra u'j. ³⁸Sa' Jairo yatte pa'jrra', uycu nasa wala ū'nena ūste. ³⁹Sa' dyiite u'carra we'wec:

—¿Quījya'cue tyacue wala ū'né'? Luucha' uunime', Ī'neerráa deeni' jīte', ⁴⁰nasa' Jesusa's npeevyshijcaty. Atsa' Jesusa' nasaty jyuca eca cutyi'jrra, tyāa luuch neywe'sh vite' tyāa yacj yuusa tecjsa tyāawe'sh yacj uusáa ūsnite utyaarra, ⁴¹cuseju pu'quisrra na'wēc we'we:

—Talita cumi—tyā' na'jīni'. Ijcha'stju we'we' mquitech jīni'. ⁴²Tyā'jītspcachja' tyāa uusá' quiiterra u'juya' ājāc. Atsa' Jesus tyā'wē uusá's qui' ĩtyī vitte uyrra', wala cuj yajcytyi. ⁴³Tyajū' Jesusa' wala neewe'wec maa yujtyva pta'shcajmén, sa' tyāa luucha's puutscaaj. Tyāa luucha' doce añu jī'pjsac yu'.

Jesusa' Nasaretna u'jni

(Mt. 13.53-58; Lc. 4.16-30)

6 ¹Jesusa' tyāa chjambu casejrra', tyajy u'pni chjamb Nasaretnac shawendna u'j tyāa yacj u'jusawe'sh yacj. ²Sa' sapatu jycaase ente' judiuwe'sh pcjaacjenitec caapiya'jna ūsu', atsa' nasa jyucaysa wēsē'jrra', cuj yajcyna na'jīty:

—Naa pitstjē'ja' ¿mteega tyacue wala quījya'va piya? ¿Quim caapiya'tjequi'c tyacue wala quījquīj yūuya'va ājā'? ³Naaīi cue'sh jiyunisa carpintero' Maria nchi'c. Sa' tyajy nyacjtyiva jīitja'w, Jacobo, Jose, Judas, Simon tyāawe'shta'. Atsa' tyajy npe'shwe'shva naa chjambtey u'pta'. Tyā'wē cue'sh jiyunisa' jīrraty Jesus caapiya'jni's nwēesē'jya' wa'l.

⁴Tyajū' Jesusa' na'wēc we'we tyāa nasaty:

—Mteewe'shva Dyus yuwe pta'shsa yu'sa' wa'lmeety jypa'ga'. Nava peecy quiwetewe'sh yu' jypa'ga'tsmeeta' vite' peecy nwe'sh, peecy yattewe'sh.

⁵Tyā'jīrra' cyteea' manzcuerráa nycatyjirrarráa jwee yu' quījva yūume'.

⁶Sa' Jesusa' ñusnac neeyūu, tyā'wē tyajy quiwetewe'sh nwēesē'jmeete.

Tyajū' Jesusa' vite chjambsuc pta'shya' casej.

Docesaty Dyus yuwe's pta'shya' caajni

(Mt. 10.5-15; Lc. 9.1-6)

⁷Sa' tyāa yacj u'jusa docesaty pa'yarra', ech luucu vit-saty nasa ūusu cutyi'jya' ājāwa'ja's ūsrra', e'nz e'nzcu caaj. ⁸Nava cjāamburrá's atrra quīj yujva tu'sméec

u'cjaaj, ya'ja, vyu, caame tyā'wēsaty. ⁹Sa' pelgatyirráa paatrra teech cmiisa yacjrráac u'cjaaj. ¹⁰Sa' na'wē yūuwa'ja'scu pta'sh: Maa yatte paandejya' pa'jyā'jrra', cyteerráa paandejna ūsune'cue tyajū qui' casejna u'pjcach. ¹¹Sa' mteefi yu' i'cue'sh pta'shni's wēsē'j wēemeerra yat pqui'jmeete', tyāajū casejene'cue i'cue'sh chindate quiwe tujnda's sacueecuerra, cyaj yuuwesa yuutyna. Isatj we'we': Dyus castigāywa'j en ājte', tyāawe'sha' Sodoma Gomorra chjambtewe'shte jytjaacue castigo's cnayutyna tyā'wē i'cue'shtyi jypa'gaya' wa'lpa'ga.

¹²Tyā'wē Jesus jycaajte', tyāawe'sha' casejty Dyus yuwe's pta'shna, pcaltyi nvijtrra Dyus tashte mishawendwe jīna. ¹³Sa' ech luucu vit-satyva nasa ūusu cutyi'jna maanzcuē ātsā'satyva aceite dyictjecjē awna nuycatyjity.

Juan Bautista uuní
(Mt. 14.1-12; Lc. 9.7-9)

¹⁴Tyā'wē Jesus quījquijva ew yūuni's ne'jue'sh Herodes jiyurra':

—Juan Bautistane' uurrava qui' ityī yuu, tyāasane' quījquij yūuya'va āja' jite', ¹⁵vite nasa we'werra':

—Naa pitstjē'ja' Dyus yuwe pta'shsa Eliasna jī'ty. Naapcachja' vite we'werra':

—Tyāniiteyva ma'wēta Dyus yuwe pta'shsa caseje', tyā'wēysana jīnaty ūsu'.

¹⁶Nasa tyā'wē we'wete', Herodesva we'werra':

—Juan Bautista tyijc'a's na'wē caaspē'tje'tj tyāane' qui' ityī yuurra quiite jīc.

¹⁷Herodesa' Juana's na'wē yuurraga quiicjē'j: Herodesa' Juana's cadenaju tundrra carcelte ctyaaja'cju'ga, Herodias ajtserra ewmēe yuwe ūspa'ga. Tyāa Herodiasa' Felipe nyuuc yu', atsa' Felipe yu' Herodes nyacjīrráac yu'. Nava Herodesa' Felipe nyu Herodiasa's cusa'jrra tyajy nyu na'wēc jype'j. ¹⁸Tyāa pa'ga cu'ga Juana' Herodesa's na'jīna yu'cypej: lindy yacjtjē'j nyu's cusa'jrra' iindy nyu na'wē jype'jni' ewme' jīni's ¹⁹Herodias jiyurra', Juana's ajtserra icj wēerrava ājā'tsmee'cu'ga. ²⁰Juana's Herodias icjya' ājācajmén, Herodesa' carceltecu'ga ctyaaja'j nwe'wena. Juana' Dyus dyi'pte quījte yujva jypumbamēe wala ew fi'nzesateva Herodesa' jīine' yu', tyāasane' ūucjrra nwe'we, sa' Juan pta'shni's Herodesa' cytey yuutsmeerrava wa'lmeecu'ga wechana wēsē'je'.

²¹Herodesa' tyajy upyni en aña āa iisac fiesta vitu'. Tyāasac teech ente' fiesta qui'p tyajy jycaajni npiitstjē'jsa vite' Galileate jytujtjesaty pi'cyrra. Tyāa fiestatene' Herodiasa' Juana's ewmēe yūuwa'ja's uy. ²²Tyajū' Herodias niisa' tyāa fiestate pa'jrra' wala zhichcue cu'jne' pi'cynasa dyi'pte. Atsa' ne'jue'sh Herodes uyrra' na'jīcu'ga tyāa cna'sa's:

—Ijcha quīj pējyteva, andya' ūsu'nja. ²³Dyus uyte, icha pēyni's quījna ūsurrā'nja, meerra' andy jycaajna ūsni quiwe's pējyyujteva pyājn tyujnderra ūsu'nja jite', ²⁴tyāa cna'sa' casejna u'jrra, tyajy nji'ja'scu'ga paapējy:

—¿Quīj pēyi'quiti'j? jīna. Atsa' nji'j pasrra':

—Juan Bautista dyictjea's mpēychi jīnacu'ga jycaaj. ²⁵Tyajū' tyāa cna'sa' Herodes tashte qui' cūjrra':

—Āchjī Juan Bautista dyictjea's plaatute acjrra maj jīte', ²⁶ ne'jue'sh Herodesa': Quij pējyteva ūsu'nja jīna nasaa dyi'pte jurāyā'jrre', īshīiya' ājāmeecu'ga. ²⁷ Tyajū' Herodesa' dundtey teech soldau's caacju'ga Juan dyictjea's nicyya'. ²⁸ Atsa' tyāa soldau' carcelna u'jrre', Juan tyjicja's spē'tjrre, plaatute acjrre jyūna cūjcu'ga tyāa cna'sa's ūsya'. Atsa' tyāa yu' jypa'garra', tyajy nji'ja'scu'ga ducj. ²⁹ Tyā'wē yūute', Juan yacj u'jusawe'sh jiyurra', tyāa uuni cacue's quīsrra pendaacu'ta. Tyā'wē yūuni'sne' Herodesa' yajcy.

Cinco mil nasaty Jesus sā'jīni

Mt. 14.13-21; Lc. 9.10-17; Jn. 6.1-14)

³⁰ Tyā'wē e'nz e'nz jycaajnisawe'sha' Jesus tashte qui' shawendna pa'jrre', tyāawe'sh ma'wē caapiya'jna quījrre yūurrava Jesusa's jyuca pta'shtyi. ³¹ Tyā'wē nasa tyacue wala pa'jna ūste', tyāawe'sha' ū'wa'j en yujva uyméety fi'nzena ūsu'. Tyāa pa'gac Jesus we'werra':

—Mejcawe, dundte jycaaseya' nasaa yatmeesu jī'.

³² Tyajū' Jesusa' tyāa yacj u'jusawe'shrrāty pe'jrre, barcote cjēerra u'cj, nasaa yatmeesu pa'jrre jycaaseya'. ³³ Tyā'wē Jesus u'juetste nasa wala uyrra', mtee pa'jya' u'juetsteva jiyuty. Tyāasaty tyāawe'sh cjuē'y yatste pa'j Jesus pa'jwa'tje maa chjambuwe'shva wuwuurraa u'jrre. ³⁴ Atsa' Jesus barcoju casejtsrra', uycu nasa wala cuj pcjaacjena ūste. Sa' tyāawe'shtyi's



(San Marcos 6.34)

peeygâjc tyã'wẽ piisháa namu ji'pjmeesa na'wẽ tyãawe'shrráa ũste. Tyajũ' Dyus yuwe's wala caapiya'cj.

³⁵ Cytee caapiya'jna ũsiyna cusutste', tyãa yacj u'jusawe'sha' tyajy tashte utyaarra na'wẽty we'we:

—Aysu nasaa yatmeete ũsiyna, cusutsa'. ³⁶ Atsa' nasaty'i mcaaj, cyaj yat-su meerrava chjambcuẽ utyasu ũsta' cysũ pa'jrra ũ'wa'j weyuutyna. Tyã'wẽme' ayte' quíjva ji'pjmeeta' jíte', ³⁷ Jesus pasrra':

—I'cue'sh mpuutswe jínac jycaaj.

Atsa' tyãawe'sha' na'wẽty pas:

—Cue'sha' doscientos peso pan weyya' u'jrra puutsuvá'nja'w jíte', ³⁸ Jesusa' pějycu:

—¿Manz pan ji'pjcue? Me'jwe tjengya' jína.

Atsa' pan uyrra', pta'shtyi:

—Tajts pan, e'nz wendyrráatja'w uy jína.

³⁹ Tyajũ' Jesusa' nasaty'i tyacsũ cachcaacj fiifii tyuteerra. ⁴⁰ Atsa' cien ãj vite' cincuenta cyanztyi fiifii tyuteerra cach. ⁴¹ Naapcachja' Jesusa' tajts pan e'nz wendytyi uwerra, cielute pagayrra Dyusa's wechana'va pantyi pe'ltenderra tyãa yacj u'jusawe'shtyi' ũscu, nasaty jyuca ũsu'scajn. Sa' wendytyiva tyã'wẽycu ũsu's jyucaysaty. ⁴² Tyã'wẽ yũute', jyucaysa ũ'rra tyictyi neeyũ. ⁴³ Tyajũ' tyãa pan vite' wendy pe'ltendenisa neeyũute' pcjacjrra', doce canastate utaty pcjacj. ⁴⁴ Atsa' nasa yu' pitstjẽ'jrráaty isani cinco mil ãjty yu'.

Ícj cajcuega Jesus u'juni (Mt. 14.22-27; Jn 6.16-21)

⁴⁵ Tyajũ' Jesusa' tyãa yacj u'jusawe'shtyi barcote caateca'jrra yatste caacj Betsaidan. Tyã'wẽ yũurra' tyãa yu' cytee neeyũuc nasa tyuteena u'jsaty wechana. ⁴⁶ Sa' nasa jyuca tyuteena u'juetspcachja', Dyus yacj puuty we'weya' u'cj tjã'tje.

⁴⁷ Jyuca chji'ndyna jyã'jatste', barco' ícj pyãjũy u'juetscu yu', Nava Jesus yu', ícj cutetee ũsírráac yu'. ⁴⁸ Sa' cjicjyna sějjetste', Jesusa' uycu Betsaidan u'jsawe'shtyi's wejya yupte, barco's caajya' chjãchjamée ícjsu u'jute.

Tyajũ', Jesusa' tyãawe'shtyi cpajcyya' ícjsu u'jrra, tyãawe'sh pucasu utya sějrra, barco's pjyajtsna scjẽuutscu yu'. ⁴⁹ Atsa' barcote u'jsawe'sha' tyã'wẽ ícjsu u'juetste uyrra', echa'stja'w uy sũjrra sustyi pembée. ⁵⁰ Tyã'sa' jyucaysaty uyrra ũucj. Naapcachja' Jesusa' we'wec:

—Ŭucjnuwe. Andytju jína.

⁵¹ Tyajũ' Jesusa' barcote cjějetspcachja', wejya' yujuc. Atsa' tyãawe'sha' iiméj wala ũucj yajcyna cuj we'wenaty neeyũ. ⁵² Tyã'wẽ Dyus Nchi'crra quíjya'va ãjãwa'jsarrac cujmée pan yacj nasa tyaanzcuẽesaty sã'jĩ' sũjwa'j yu'sa' ji'pjmeene'ta yu', tyãasaty tyacue wala cuj yajcyna neeyũ.

Genesarettewe'shtyi Jesus nuycatyjini
(Mt. 14.34-36)

⁵³Tyajū' Genesaret quiwete pesajrra', barco's ĩcj pucatety tundrra tyaj. ⁵⁴Atsa' barcoju sa'jatspcachja', tyāa quiwesuwe'sh nasa' jiyuty Jesus pa'jni's. ⁵⁵Sa' tyāa quiwesu ātsā'saty jyuca pcjacjrra yacjna pa'jty Jesus mtee ũsteva. ⁵⁶Tyajū' Jesusa' chjambna ma'c u'j, meerra' yat-su ma'c pa'jya' u'j, meerra' dyl'tje ma'c u'juets yuu nava tyajy scjēwwa'jsuty ātsā'saty cjicje'. Tyā'wē yūurraty scjēuutste' wala pytjaa we'we', tyajy atyj vitsterrāava ātsā'saty cja'ndyl'cjan. Atsa' maava tyajy atyj vitsterrāava jya'ndysa', jyuca catyjirraty neeyū'.

Nasa's ewmēe vit-sa
(Mt. 15.1-20)

7 ¹Tyajū' fariseowe'sh vite' Dyus leya's caapiya'jsawe'shva Jerusalenu pa'jrra Jesus tashte utyaaty tjengya'. ²Atsa' Jesus yacj u'jusawe'sha' cusecjē' yu' caajmēe ũ'wetste uyrra', atsewe'wety fariseowe'sha'.

³(Yatsgawe'sh ma'wē jycaatje' Judiuwe'sha' jyucaysa na'wē cuj jwend yūuwa'ja'styi nwēesēljē' ewmeesa pēetjecajmén jīrra: ⁴Mercaujū pa'jrra', cusecjē' yu' caajwa'ja' jī'ty. Sa' vaso, mityj, quījva iijyūni tsam yuutyi' jyuca cajcucjē' yu' caajrra iijyūwa'ja' jīnaty caapiya'ja'.)

⁵Tyāasaty fariseowe'sh vite' Dyus leya's caapiya'jsawe'sha' na'jīna Jesusa's pējy: —Indy yacj u'jusawe'sha' ¿quīj yūurrata yatsgawe'sh caapiya'jnityi' cytey yu'tsmēe, cusecjē' yu' caajmēe ũ'wē'? jīte', ⁶Jesusa' na'wēc pas:

—I'cue'sha' yuwejurrāa ew we'werra', ũuste yu' ewmēerrāa yaacysai'cue atsa' Isaiasa' isa yuj Dyus we'weni's na'jīna fil'jne':

Naa nasa' yuweju yu' andya's yaaqui'tja'w jīrrava,

Ūusuj yu' andya's yaaqui'tsmeeta'.

⁷Naa quiwete nasaa caapiya'jnirrá's cytey yuuna ũsrra,

Tyā'wē Dyus jycaajni'stja'w cytey yu' jīte', cyul yujna jīna Dyus we'weni'scu fil'j Isaiasa'.

⁸I'cue'sha' Dyus jycaajni yu'sa' nvijtrra, naa quiwega nasaa caapiya'jnirrá's i'cue nwēesēljna wala ew qui'su' na'wē yūuna: vaso, mityj, quījquījtyva tyā'wē i'cue qui'su' yu' caajna.

⁹Na'jī'tj na': i'cue'sha' naa quiwega nasaa caapiya'jnirrá's nwēesēljna qui'srra', Dyus jycaajni yu'sa' nvijti'cue. ¹⁰I'cue'sh na'wē yūuni's myajcywe vacy: Moisesa' na'jīnac fil': lindy tata iindy mama tyāawe'shtyi' peeygājna pu'chwa'ja' jī'c. Atsa' tyā'wē yūumēe, neywe'shtyi atsewe'wesa' uu ena's jil'pjuna jī'c. ¹¹⁻¹³I'cue'sh yatsgawe'sha' na'wēty caapiya'ja': Maa nasava neywe'shtyi peeygājna pu'chmēe, andy jil'pjuni i'cue'shtyi pu'chwa'ja's Dyusna ducje'nja jīna we'werrarrāa, neywe'shtyi' pu'chmeeteva ewa' jī'ty. Nava i'cue'sha' tyā'wē yatsgawe'sh caapiya'jnirrá's cytey nwēesēljrra', Dyus jycaajni yu'sa' cytey yu'tsmeei'cue, naasāa Dyus jycaajnimeerrāaty i'cue quījquījna jyuca cytey yu'.

¹⁴Jesusa' qui'quin nasaty we'werra' na'ljíc:

—Mwéesē'jwe jyucaysa, ew jiyuya': ¹⁵Quīj ũ'va tutyjterrāa cjēesa yu', nasaty ewmeesa vitu'tsme!. Naasāa ũusuj ewmée yaacynisa yuurráac nasaty ewmeesa vitu'. ¹⁶Atsa' maava jiyuwa'jsa ũsrra', jiyune'cue jírrac nvijt.

¹⁷Tyajū' Jesusa' nasaty tyuteerra' yattec u'ca. Atsa' tyāa yacj u'jusawe'sha' jiyumeerra' pējytyi tyā'wē pta'shni's. ¹⁸Atsa' Jesusa' na'wēc we'wena pta'sh:

—¿I'cue'shva jiyu'tsmeevácue? Quīj ũ'va tutyjterrāa cjēerra', nasaty ewméesa yu' vitmeena sūju'tsmeevácue. ¹⁹Tyāa pa'gately quīj ũ'va ũuste yu' u'camée tutyjterrāa cjēerra', tyajū qui' caseje'c jíc.

Jesusa' tyā'wē we'werra': ũ'nisa yu' quījva jyuca ewsarrarráata' jírrac tyāljí'.

²⁰Nava ũusuj ewmée yaacynisa yuurráac nasa's ewmeesa vitu'. ²¹Tyāa pa'gately, canzh yaacyni, ptamsarrava vite yacj canzh yuuna fi'nzeni, canzh yuuni, nasa icjni, ²²pesweeni, vite jī's cusa'jrra ji'pju wēni, ptjāaweni, ishīini, vitety ajtsena fi'nzeni, wēeshuni, canzh we'wena fi'nzeni, iivejch iivejch yajcyna fi'nzeni, quījteva ewmeerrāa yūuna fi'nzeni ²³tyā'wē ewmée yaacynisa' ũustewe'shta'. Tyāasaty tyā'wē caaūusutje'jrra, nasa's ewmeesa vitu'.

Teech u'y judiu ji'jmeesa Jesusa's jypa'gasa

(Mt. 15.21-28)

²⁴Jesusa' tyāajū casejrra', Tiro Sidon chjamb ja'ndasuc pecūjya' u'j. Sa' cysū pa'jrra', teech yatte u'carra, quim yujva jiyu jytjāasme!. Nava quim yujva jiyunimeete u'juya' yu' ājāme!. ²⁵⁻²⁶Tyajū' teech u'y Sirofenicia quiwetewe'sha' Jesus pa'jni's jiyurra pa'cj. Sa' tashte peejyūcuerra pytjaa we'wec:

—Niisa ji'pjtju tyā'sa' ech luucu vit-sac iiyamu. Atsa' tyāa echa's nuucutyi'jine'nga ũusu jīna pi'cyte', ²⁷Jesus pasrra na'ljíc:

—Mūytjaswe, luuch cjuē'y ũ'cajn. Tyā'wē luuch ũ'wa'ja's cusa'jrra alcuty ũswa'jme' jīte', ²⁸tyāa u'y pasrra':

—Isa yuj we'we'ng, tyā'wē yuja!. Nava alcu' mesa dyiisu ũsrra', pejca ũ'wē'ty luuch ũ' pe'yarráatyva jīte', ²⁹Jesus pasrra':

—Isa, tyā'wē yuja!. Atsa' me'jwe, i'cue jytjāasni's uyuune'cue, ech luucu vit-sa' i'cue niisa ũusu casejyā'cj jīte', ³⁰tyāa u'ya' yatna shawendrra uycu, echa' ũusu casejte' wēt yālj camaga ũste.

Teech pitstjē'j wēse'jya' we'weya'va ājasame's Jesus nuycatyjini

³¹Jesusa' qui'quin Tiro quiwejū casejrra, Sidon chjambuy vite' Decapolis quiwey uycjēwna u'jrra, Galilea ícj walatec pa'j. ³²Cyteea' teech pitstjē'j wēsē'jya' we'weya'va ājasame'styi Jesus tashte nuypa'jrra pytjaa we'we nuycatyjicajn. ³³Atsa' Jesusa' tyāa ātsā'sa's nasameete fii pe'jna u'jrra, tjū'wē cifyte pdyi'p jya'ndyna'va, tyajy fyne'sha's cuse vitste cuutsje'jna', tjuneteva jya'ndycu. ³⁴Sa' ũusdyi'na cielute pagayrra:

—¡Efata!—jíc, tee pjaate jírrac tyāljí'.

³⁵Tyã'jĩtspcachja', tjũ'wẽ cafya' pjaatety, atsa' tjuneva ewuute', ew we'weya' ãjãc. ³⁶Tyajũ' tyãa nasaty! Jesusa' wala neewe'wec, tyã'wẽ yũuni's quim yujtyva pta'shcajmén. Tyã'wẽ ew neewe'weteve, jweefirrãaty mtee mteeva pta'shna jyã'j. ³⁷Tyã'wẽ yũute', nasa jyucaysa wala cuj jwend yaaqui'ty na'jĩna:

—Ãtsã' ma'wẽsatyva jyucac pu'chji'. Wẽsẽ'jya' ãjãsameetyva cwẽesẽ'je'cj, sa' we'weya' ãjãsameetyva cwe'we'je'cj ji'ty.

Cuatro mil nasaty Jesus sã'jĩni

(Mt. 15.32-39)

8 ¹Tyãa entey nasa iiméj wala cuj pcjaacjerra quij yujva ù'wa'j ji'pjmeete', Jesusa' tyãa yacj u'jusawe'shtyi pa'yarra na'jic:

²—Naa nasa' tecj en yã'j andy yacj ùsta', nava quij yujva ù'wa'j ji'pjmeeta' atsa' andya' peeygãja'tj. ³Quij yujva puutsmée yatna caatje', maafi yu' jyu'juwe'shta' na' wẽerra dyl'tje chjãchjameetyna jite', ⁴tyãa yacj u'jusawe'sh pasrra':

—¿Ma'wẽ puutsya' ya'ãjãcy, aysũ' nasaa yattrãa yujva meeta' atsa'? jite', ⁵Jesus pẽjyrra':

—I'cue'sha' ¿manz pan ji'pjcue? jite':

—Sieterrãa ji'ptja'w jĩnaty pas.

⁶Tyajũ' Jesusa' nasaty quiwesu cachcaajrra', siete pantyi jypa'garra Dyusna wechana'va, pe'ltenderra tyãa yacj u'jusawe'shtyi ùsu'scu, nasa tyanzcuẽesaty puutscajn. Atsa' tyãawe'sha' cytey yuuty. ⁷Sa' wendyva ji'pju'ty cujmeecue, atsa' Jesusa' Dyusna wechana'va, tyãa wendyty tyundeendecaaj. ⁸Atsa' jyucaysa tyictyi ù'. Tyãa ù' quijyaate' siete canastate utaty pcjacj. ⁹Tyãa ente tyã'wẽ ù'sa' cuatro mil ãjty yu'. Tyajũ' Jesusa' nasaty caajna'va, ¹⁰tyãa yu' barcote cjëec tyãa yacj u'jusawe'sh yacj Dalmanuta quiwen u'jya'.

Fariseowe'sh cieluju quijrrãava caavya'ja'cjaajni

(Mt. 16.1-4; Lc. 12.54-56)

¹¹Cytee pa'tje', fariseowe'shva pa'jrra Jesus yacj puuty we'wety. Sa' ma'wẽ yũuteva jiyuya' Jesusa's pẽjtyti:

—Cieluju quijrrãava mcaavya'ja'j jĩna.

¹²Tyã'jite', Jesusa' wala ñus yajcyna na'jic:

—Naa nasa' ¿quijya'qui'ty tyã'wẽ cieluju caavya'ja'j jytjãasu'? Isa yu' tyãa nasaty! quijva caavya'jal'nimée wejy ewna jic. ¹³Tyã'jĩrra', nasaty nvijtna' qui'quin barcote cjëena'va icj cuten u'cj.

Fariseowe'sh caapiya'jni's levadura yacj caaja'nda'jni

(Mt. 16.5-12)

¹⁴Sa' pechcanarra ù'wa'j yu' ji'pjmée barcote u'juetsrraty yajcy. Naasáa teech panrrãaty ji'pj yu'. ¹⁵Tyajũ' Jesusa' na'wẽc jypa'yacy caaj:

—Mpa'yajcywe, Herodes vite' fariseowe'sh levadura ewmeesa's jite',

¹⁶Jesus yacj u'jusawe'sha' tyãawe'sh pwe'sh na'jĩnaty puuty we'we:

—Pan ji'pjmeetja'w, tyāa pa'gane' tyā'jī' jīty. ¹⁷Atsa' Jesus wēsē'jrra na'jīc:

—¿Maa sūjrracue tyā'wē pan ji'pjmeetja'w jīna we'wé'? ¿Āchpcach jiyu'tsmeevá'cue, pan ji'pjmeeteva tjēymée sāl'jīni's yaaqui'tsmeevá'cue? ¿I'cue'sh ūuste cjeje'tsmeevá'? ¹⁸I'cue'sha' yafyju yu' uyrrava, jiyuya' yu' ājā'tsmeevá'cue, sa' andya' quījnavā tjēymée ājāni's yaaqui'tsmeevá'cue. ¹⁹Miiyajcywe vacy: Tajts pantyi tyundeenderra cinco mil nasaty puutste', ¿manz canastacue pcjacj quijyasaatyī'? jīte', tyāawe'sh pasrra':

—Doce canastatja'w pcjacj jīty.

²⁰—Atsa' siete pantyi tyundeenderra cuatro mil nasaty puutste', ¿manz canastacue pcjacj quijyasaatyī'? jīte', tyāawe'sh pasrra':

—Siete canastate utatja'w pcjacj jīty.

²¹Atsa' Jesus we'werra':

—Tyā'wē tjēymée yūunisatyī' yaaqui'tsmeevá'cue sane'cue tyā'wē ū'wa'j pan ji'pjmeetja'w jīna we'we'.

Teech pitstjē'j uyya' ājāsame's Jesus nuycatyjini

²²Tyājū' Jesusa' Betsaida chjambte pa'tje', cyteea' teech pitstjē'j uyya' ājāsame'styi nuypa'j, nuycatyjicajn pytjaa we'wena. ²³Atsa' Jesusa' tyāa uyya' ājāsamée cusete pu'quisrra, chjamb eca pe'jna u'jrra', yafyte fyne'sh shūshna'va yafyte jya'ndycu. Tyā'wē yūurra pējycu:

—¿Ma'wērrá' uyu'ngá'? jīte', tjengu'ngrra':

²⁴—Nasa' fytūu tash na'wērráaty vya', nava ēsē'se'ty jīc.

²⁵Tyājū' Jesusa' qui'quin tyajy cuseju yafyte jya'ndycu, atsa' yafya' pjaatete' ew uyya' ājāc.

²⁶Tyājū' Jesusa' neewe'wec:

—Chjamsu u'cameene'nga, sa' maa yujtyva pta'shmeene'nga iindy yafytyi quim pjaandeteva jīnac yatna caaj.

Pedro' jiyuc Jesusa' Dyus tashu yuusateva

(Mt. 16.13-20; Lc. 9.18-21)

²⁷Jesusa' tyāajū qui' u'cj tyāa yacj u'jusawe'sh yacj casejrra. Sa' Filipino vitni chjamb Cesarea ja'ndasuc pecūjya' u'juets yu'. Tyājū' dyi'tje u'juetsíi tyāawe'shtyi pējycu na'jīna:

—Andya's ¿quimna jī'ta nasa'? jīte', ²⁸tyāawe'sh pasrra':

—Maaíi yu': Juan Bautistana jī'ty. Atsa' vite we'werra': Eliasna jī'ty. Atsa' vite we'wesa': Tyāniiteyva ma'wēta Dyus yuwe pta'shsa caseje' tyā'wēysana jī'ty jīte', ²⁹Jesusa' na'jīnac pējy:

—Atsa' i'cue'sha' ¿quimna sūju'cue?

Tyā'wē pējyte', Pedro pasrra':

—Indya' Cristo, Dyus tashu yuusang jīte', ³⁰Jesusa' maa yujtyva pta'shcaajme'.

Jesusa' tyajy uuwa'ja's pta'shni
(Mt. 16.21-28; Lc. 9.22-27)

³¹ Tyajü' Jesusa' pta'shcu:

—Dyus Nchi'c Nasa Yuusa' wala pcyuuni pa'ga yuuna, sa' judiu ntjê'jsawe'sh vite' sacerdote npiitstjê'jwe'sh vite' Dyus leya's caapiya'jsawe'sh ajtserra quicje'jetyna. Atsa' uurrava tecj ente' qui' ityî yuuna jïc.

³² Jesusa' tyä'wêc ew äate pta'sh. Atsa' Pedro' Jesusa's fiite pe'jna u'jrra, yu'cypejc. ³³ Tyä'wê yu'cypejte', Jesusa' vitety yu'tjengrra', Pedro's na'jînac pas:

—Echtjê'j, andy tashu mtyuté. Indya' Dyus jytjâasni yu'sa' cytey yuumée, naa quiwete nasaa yaacynirrá'sngu cytey yuu wêjê' jîrra',

³⁴ Jesusa' tyäa yacj yuusawe'shtyi pa'yarra na'jïc:

—Maa nasava andy yacj yuu wêerra', peecy cacue jytjâasni's quîjîna jyuca nvijtrra yuurraa andy yacj yujya' äjâne'cue, macue tjêysa uuwa'j ma'c pa'j nava tyä'sa' yajcymée. ³⁵ Nava naa quiwete ityî fi'nzewa'jrrá's ya'nwe'wesa', Dyus yacj fi'nzewa'j yu'sa' iviituna. Naapcachja' Dyus yuwe's nwêesê'jrra andy yacj fi'nzepa'ga naa quiwete ityî fi'nzeni's yajcymée iviitusa', Dyus yacj fi'nzewa'j yu'sa' iviitumeena. ³⁶ Macue naa quiwetewe'sh yu'sa' jyuca cnayrrava peecy üus yu's iviitute', ¿quijterrá' selpiima'c? ³⁷ Peecy üusa's iviituyä'tje', ¿quimrra' nwe'wema'c? ³⁸ Maa nasava andya's jypa'gaya' wa'lîna andy pta'shnityva wa'lutyna nasa ewmeesa atsewe'wete atsa' tyä'wê yûusa's Dyus Nchi'c Nasa Yuusaava Dyus angeleswe'sh yacj eena' cweetjna quijrra' jypa'gaya' wa'luna jïc.

9 ¹ Tyajü' qui'quin we'werra' na'jïc Jesusa':

—Isatj we'we', ayte üssa maaîi yu' uumey uyuune'cue Dyus naa quiwete jycaajya' quîîni's jïc.

Jesusa' zhichcue yu'ptjejrra vyaani
(Mt. 17.1-13; Lc. 9.28-36)

² Tyajü' seis en scjêwniite', Jesusa' tjâ'j walate pe'jna u'cj Pedro Jacobo Juan tyäawe'sh tecjsarráaty. Cytee pa'tje', Jesus cacue' fiycu zhichcue yu'ptjej tyäawe'sh yafyte. ³ Tyajy atjni ropa' yândy na'wêc zhichcue chijme yuu; naa quiwete maa yujva tyä'wê zhichcue chijme yu' tjetjya' äjâmeetyna.

⁴ Naapcachja' Pedrowe'sh yafyte vyaaty Elias vite' Moises. Tyäawe'sha' Jesus yacjtyi puuty we'wena üsu'. ⁵ Atsa' Pedro' tyä'wê uyrra', Jesusa's na'jïc:

—Ayte' cue'sh üswa'j wala ewa'. Atsa' tecj wa' tyajaga, teeche'sa' iindy jîi, vite' Moises jîi, vite' Elias jîi jïc. ⁶ Pedrowe'sha' wechaniite üucjsa na'wêty neeyûu, tyâasac Pedro' wechaniite tyä'wê we'we.

⁷ Tyajü' tâapj quijrra apjcu, atsa' tâapj dyiiju na'wêc we'weni ptjûuse:

—Na' andy Nchi'c wala wendynisa', atsa' tyä'sa' nwêesê'jna cytey myuuwe jîtspcachja' ⁸ Pedrowe'sha' tjengu'ngrava, Moiseswe'shtyi uymeeta', naasáa Jesusrráa yâ'j üstety uy.

⁹ Atsa' tjâ'ju u'juetsrra', Jesusa' Pedrowe'shtyi' wala neewe'wec:

—Ächjîi yu' maa yujtyva pta'shmeene'cue tyä'wē uyni's, naasáa Dyus Nchi'c Nasa Yuusáa uurrava qui' ityī yuunijū pta'shine'cue.

¹⁰Tyā'wē neewe'weni's cytey nwēesē'jty quim yujtyva tuutje'jmée. Nava tyāawe'sh pwe'sh yu' puuty paapēyī'ty: Uuyā'jrra', ¿ma'wē qui' ityī yuucy? jīna.

¹¹Tyajū' na'wē caapiya'jni'styi Jesusa's paapējy:

—Dyus leya's caapiya'jsawe'sha' Elias cjuē'y yatste pa'jana jī'ty sa' ¿ma'wē yuuwa'jsacy atsqui'ty tyā'jī'? jīte', ¹²Jesusa' na'wēc pta'sh:

—Isa, Elias cjuē'y yuj yatste pa'jrra jyuca pjeu'jwa'jsa yu'c atsa' isa yuj pta'shi'ne'ta. Tyā'wēy Dyus Nchi'c Nasa Yuusa's we'werra': wala pytjaa yuuna nasa ajtserra pcyuuni jīna Dyus librute fi'jni ūsa' tyāava isa yuja'. ¹³Eliasa' pa'jana jī'ty atsa' Eliasa' pa'jyujc, nava tyā'sa' quījquijva yūuty Dyus librute ma'wē fi'jni ūsna tyā'wēy.

Teech luuch wēechpa'jsa's Jesus nuycatyjini

(Mt. 17.14-21; Lc. 9.37-43)

¹⁴Tyajū' Jesusa' vitesa neeyūuty cytee shawendna quijatste', nasa wala pcjaacjena ūsu'ty. Atsa' Dyus leya's caapiya'jsawe'sh yu' tyāawe'sh yacjtyi wala we'wena ūsu'. ¹⁵Naapcachja' Jesus yujteva jiimée ūsiyna, Jesus pa'jatsyā'tje uyrra', nasa' jyucaysa ūucj yajcynaty wechaya' utyāa. ¹⁶Tyajū' Dyus leya's caapiya'jsawe'shtyi' Jesusa' pējycu:

—¿Quīj yūupa'ga tyacue weech we'wena ūscue? jīte', ¹⁷tyāa nasa wala cshavyte teehsa' Jesusa's na'jīnac pta'sh:

—Andy nchi'ca's ech luucu vit-sa iiyamute' we'weya' ājā'tsme' tyā'snatj ayte nuypa'j. ¹⁸Tyāa luucha' mtee ūsteva ech luucu vit yā'tje', qui'tjtyi csuusu'jna yuwesu bu'chrráac sējna weté'. Tyā'wē yūuna wala tallitsa'. Atsa' indy yacj u'ljusawe'shtyi' pi'cyā'tj nuycatyjicajn, nava ājāmeeta' jīte', ¹⁹Jesus pasrra':

—Dyusa' pu'chjina sūjwa'j yu'sa' ji'pjmeesata' naa nasa'. ¿Bagachpcach i'cue'sh yacj pu'chna ūs ya'vatca? ¿Bagachpcach ājāmée fi'nze ya'vacue? Tyāa luucha's mneejyūjwe ayte jīte', nuycūjty Jesus tashte. ²⁰Atsa' ech luucu vit-sa' tyāa luucha's caywēchpa'ja'tje', quiwesu wetec yuwesu bu'chrráa sējna.

²¹Tyajū' Jesusa' luuch neya's pējycu:

—Tyā'wē ātsā'ni ¿macue tyach yuutsna? jīte':

—Le'chíic tyā'wē yu'. ²²Sa' maa entey yu' tyachmeynac wēechpa'jrra ipyte cjēena yu'cjēva cjēena uupchāj yuuna u'ju'. Atsa' cyajtj indy yacj ewupchājte', ma'wērráava pu'chjine'nga peeygājrra jīna pi'qui' jīte':

²³—Indy yuu tyā'wē Dyusa' pu'chjina sūjte yu', quījva jyuca cytey yuuna tyā'wē yaacysa's jīte', ²⁴luuch neya' suscu we'wena pytjaa pi'cy:

—Dyusa' pu'chyujuna sūju'tj, sa' andy ūuste tyā'wē yaacywa'ja's jweeírráa wala meen caajiyu'j jīc.

²⁵Tyajū' Jesusa' nasa wala cuj pcjaacjena utaatste uyrra', ech luucu vit-sa's na'jīnac we'we:



(Marcos 9.26)

—Ech luucu vit-sa cwe'we'je'tsmeeng, sa' wēsē'jwe'shte tjū'wētyva apjngu, nava āchja' andy we'weni's nwēesē'jrra ūusu mcaasej, peena yu' u'cameene'nga jīte', ²⁶ ech luucu vit-sa' tyāa luucha's sus cweeyi'jna caywēchpa'ja'jrra casejc. Atsa' tyāa luucha' uuníi na'wēc wetena neeyūu. Cyajty nasa we'werra':

—Āchja' pejca uuc jīna we'we'.

²⁷Nava Jesusa' cuseju pu'quiscu, atsa' tyāa luucha' quiitec.

²⁸Jesusa' tyāajū u'jrra', teech yattec u'ca. Atsa' tyāa yacj u'jusawe'sha' pējytyi:

—Cue'sha' ¿quij yūurracytja'w echa's cutyi'jya' ājāmée? jīte', ²⁹Jesusa' pta'shcu:

—Na'wēsa echa' tjēymée yu' casejmeena, wala yūunaana Dyus yacj puuty we'wete yuurrāa casejena jīc.

Jesusa' tyajy uuwa'ja's qui' pta'shni

(Mt. 17. 22-23; Lc. 9.43-45)

³⁰⁻³¹Tyajū qui' u'jrra', Galilea quiwencu u'j. Sa' cyteea' tyāa yacj u'jusawe'shtyic caapiya'jwa'j ji'pju' naa pa'ga quim yujva jiyu jytjāasme'. Sa' dyi'tje u'juetsrra', na'wēc tyajy uuwa'ja's pta'sh:

—Dyus Nchi'c Nasa Yuusá's nasa ewmeesa cusete ducjni yuuwa'ja', atsa' tyāawe'sha' icjetyna. Atsa' uurrava, tecj ente' qui' ityī yuuna jīteva, ³²tyāa yacj u'jusawe'sha' jiyumeeta', nava pējyya' yu' ūucjtyi.

Quim wejy jytjaacue jytujtjesacy

(Mt. 18.1-5; Lc. 9.46-48)

³³ Sa' Capernaum chjambte teech yatte pa'jrra', tyāa yacj u'jusawe'shtyi paapējyycu na'jīna:

—I'cue'sha' dyi'tje yujrra', ¿quījcue puuty we'we'? jīteva, ³⁴ tyāawe'sha' tjaamerra pasmeeta' tyā'wē dyi'tje yujrra', ¿maa wejy jytjaacue walasacytja'w? jīna puuty we'werrava.

³⁵ Tyājū' Jesusa' docesaty pa'yarra cachrra pta'shcu:

—Maateva jytjaacue walasa yuu wēerra', iiweych yajcymée maatyva jyuca selpiirra yuurráa jytjaacue walasa yuuna. ³⁶ Tyā'jīrra' teech luuchcuē's tyāawe'sh cshavyte tyajrra cuse te yacjrra na'wēc we'we:

³⁷ —Maa nasava andyna wa'lmée jypa'gasa' andy na'wēy luuch na'wēcuesatyva ajtsemée jypa'gatyna. Tyā'wē yūusa' andyna jypa'gasarra tyā'wē yuutyna. Sa' andyna jypa'gasa' andyrráana jypa'gamée, andyna caajsa'sva jypa'gasa yuutyna jīc.

Cue'shtyi atsesamée yu' cue'sh yacj fi'nzesatyna

(Mt. 10.42; Lc. 9.49-50)

³⁸ Tyājū' Juana' na'wēc pta'sh:

—Indy ¿ma'jiqui'ng? Cue'sha' teech pitstjē'j uytja'w tyā' ech luucu vit-saty nasaa ūusu cutyi'ji'c Jesuscū jycaaja' jīna we'werra. Nava tyā'sa' jwee yu' tyā'wē yūucaajmeetja'w cue'sh yacj u'jusame' naa pa'ga jīte', ³⁹ Jesus pasrra':

—Tyā'wē yūunuwe, tyāa pa'gatey andy yase's cysuusrra ech luucu vit-saty nasaa ūusu cutyi'jsa' andya's atsewe'wemeena quim yujva. ⁴⁰ Maava cue'shtyi atsewe'wesamée yu', cue'shtyi pu'chsa írráatyna. ⁴¹ Na'jī'tj na': I'cue'sha' Dyus luuchi'cue naapa'ga maava i'cue'shtyi peeygājna teech tasa yu'rráava yusuna tyā'sa' dwení yuuna.

Pcalte cweete'jya'mée jypa'yacywa'ja'

(Mt. 18.6-9; Lc. 17.1-2)

⁴² —Mpa'yajcywe, tyā'wēme' luuchcuē andya's yaacysaty pcalte cweete'jena tyā'sa' tyijc te scuutyj ū'cjni cueta's tundrra ícj wala dyiicjē acjvatsrráa, wejy ewna. ⁴³ Meerrava iindy cuse tyā'wē pcalte indya's cweete'jetste', mespē'tj. E'nz cuse yacj uu quiwete cjēe na'wē', wejyva teech cuserráa ji'prrava ptsumée ityī fi'nzewa'tje u'cani wejy ewa'. Tyā'wēme' uu quiwete ipy wala seena'sa bagachte yujva ūchjawa'jsame'. ⁴⁴ Cyteea' bagachte yujva wesa' chjavyna ptsuwa'jsameeta', atsa' ipy seena'sava ūchjawa'jsame'. ⁴⁵ Tyā'wēy iindy chindava pcalte cweete'jetste', tyā'sva mespē'tj. E'nz chinda yacj uu quiwete cjēe na'wē', wejyva teech chindarráa ji'prrava ptsumée ityī fi'nzewa'tje u'cani wejy ewna. Tyā'wēme' infiernote ipya' bagachte yujva ūchjawa'jsame'. ⁴⁶ Cyteea' bagachte yujva wesa' chjavyna ptsuwa'jsameeta',

atsa' ipy seena'sava ũchjawa'jsame'. ⁴⁷Tyā'wēy iindy yafyva pcalte cweete'jpchāy yuutste', mcuutyi'j. E'nz yafy yacj infiernote cjēe na'wē', wejyva teech yafy yacjrrāava Dyus jycaajna ũsnite u'cani wejy ewna. ⁴⁸Tyā'wēme' cyteea' bagachte yujva wesa' chjavyna ptsuwa'jsameeta', atsa' ipy seena'sava ũchjawa'jsame'. ⁴⁹Tyāa pa'gately tyāa ipya' caaptu'ju'jwa'jsame'.

⁵⁰Nenga' wala seelpisa'. Nava shūucājte', ¿ma'wē cselpi'jya' ewuutyqui? I'cue'sha' nenga na'wēy selpiina mfi'nzewe, jyucaysa yacj ewrrāa.

Ptamsa tyuteewa'jme's Jesus caapiya'jni

(Mt. 19.1-12; Lc. 16.18)

10 ¹Jesusa' Capernaum chjambu casejrra', Judea quiwen vite' Jordan yu'wala cutencu ul'j cysū pecūjya'. Sa' Jordan yu'wala cuteju ũste', wala nasa pcjaacjety tyajy ũsnite. Atsa' cyteeva caapiya'ja'cj vite ajsū na'wēy.

²Naapcachja' fariseowe'sha' Jesus tashte utyaarra' na'wēty paapējy, pasya' shiingte' ewmēe vit-ya' sūjrra:

—Ptamsarrava, nyu's wāatājte ¿ewmañ? jīte', ³Jesus pasrra':

—Jiimeevá'cue Moises jycaajni's jīna pējyte', ⁴tyāawe'sh pasrra':

—Moises jycaajrra', nyu's wāatājya' ewuwechte', nyu canzh yuuna fi'nzeni's etste fi'jrra ducjrrac tyuteecaja' jīte', ⁵Jesus pasrra':

—Moisesa' tyā'wē yūuwa'ja's nvijt yujc, nava peecy nyu quījva yūumeeteva wāatājna fi'nzepa'ga fīrrāac tyā'wē yūuwa'ja's nvijt, peecyrāa yu' wāatājya' ājācajmén. ⁶Nava Dyusa' nyafiitey naa quiwe's pjeu'jīi e'nzīty ja'ndarrajc vit pitstjē'j pety u'ly yā'jrra. ⁷Atsa' tyāa pa'ga pitstjē'ja' peecy neywe'sh tashu tyuteewa'jsa', nyu yuwa'jsa yacj utyaaya', ⁸tyā'wē e'nzrrava, teechsarrāa na'wē yuuna pa'jya'. Atsa' tyā'wē yūuniijū' e'nzmēe teechrrāac yuuna pa'ja'. ⁹Tyāa pa'ga Dyus pūpyrra nviitni ptamsayā'tyi' quim yujva tyujndeya' ājāwa'jsameeta' jīc.

¹⁰Tyājū' Jesusa' teech yatte u'cate', tyāa yacj u'jusawe'sha' tyā'wē pta'shni's qui' pējytyi. ¹¹Atsa' Jesusa' pta'shcu:

—Maa pitstjē'jva peecy nyu's wāatājrra vite yacj ptamuurra', pcalte weteena, peecy nyu's wāatājrra vite yacj ptamuupa'ga. ¹²Atsa' u'lyva tyā'wēy nmi'a's wāatājrra vite yacj ptamuurra', tyāava pcalteyrāa weteena peecy nmi'a's wāatājrra vite yacj ptamuupa'ga jīc.

Luuchcuēty Jesus bendeciñy

(Mt. 19.13-15; Lc. 18.15-17)

¹³Tyāa e'su' Jesus tashte luuchcuēty nuypa'jty Dyus cusete neewe'wecajn. Atsa' Jesus yacj u'jusawe'sha' yuptyi luuchcuēty nuypa'jsaty. ¹⁴Tyā'wē yūute', Jesusa' na'jīnac ũuscha we'we:

—Luuchcuē andy tashte yuusaaty' cuch yupnuwe, tyāa pa'gately Dyus jycaajna ũsnisa' naa luuchcuēwe'sh na'wēsa jīi fīrrā'. ¹⁵Na'jī'tj na': maava luuchcuē na'wē Dyus jycaajwa'j ena's wa'lmēe jypa'gameerra yu',

bagachte yujva Dyus tashte u'caya' ājāmeetyna. ¹⁶ Tyā'jīna'va luuchcuēty yacjna' dyictjesu peequinzerra Dyus cusete neewe'wec.

Pitstacy wala ji'pjsa Jesus yacj puuty we'weni

(Mt. 19.16-30; Lc. 18.18-30)

¹⁷ Tyajū' Jesusa' vite ajn u'juetste', teech pitstacy dyl'tje wuwuuna cūjrra', Jesus tashte peejyūcuc na'wē paapējyna:

—Caapiya'jsa wala ewsa mpeeta'sh. Andya' ¿ma'wē yūurra ptsuwa'jmée ityi fi'nzewa'ja's ji'pjuquiti'tj? jīte', ¹⁸ Jesus pasrra':

—¿Quīj yuupa'ganga andya's ewsa ji'? Naa quiwete' teech nasarrāa yujva ewsa yu' meeta'. Dyus yuurraa ewsa ūsa'. ¹⁹ Indya' jiine'nga Dyus jycaajni na'wēsatiyi': Ptamsa' vite yacj pcal yuuwa'jme', nasa icjwa'jme', pesweewa'jme', vitety iishiina nuywe'wewa'jme', vītee jūity cusa'jwa'jme'. Neywe'shtyi peeygājna ewrrāa yūuna fi'nzewa'ja' jīte', ²⁰ tyāa pitstacy tyā'wē wēsē'jrra' na'wēc pas:

—Tyā'wē jycaajnisatiyi' le'chcuējūjy jyuca cytey yuunatj walāa jīte', ²¹ Jesusa' tyāa pitstacya's peeygājna tjengrra' na'jīc:

—Na'wē yūuwa'jrrāa peejya': līndy ji'pjuni's jyuca tyweyrra, puuple ji'pjmeesaty peesya' me'j. Tyā'wē yūurra', cielute ji'pjsa yuune'nga. Tyā'wē yūurra andy yacj myuj, macue seena' űussa pa'tjeva tyāaty' yajcymée jīte', ²² tyāa pitstacya' wala ji'pjsa yu'c, sa' tyā'wē wēsē'jrra', wala űusna u'cj.

²³ Tyajū' Jesusa' nasaty tjengrra' pta'shcu tyāa yacj u'jusawe'shtyi:

—Maava wala ji'pjsa yacja' Dyus jycaajna űsnite u'cawa'j wala yuj tjēya' jīte', ²⁴ tyāa yacj u'jusawe'sh wēsē'jrra', jiyumée cuj jwend yajcynaty neeyūu. Atsa' Jesusa' āatec pta'sh:

—Naa quiwete ji'pjuni'rrā's jytjaacue yaacysa yacja' wala yuj tjēya' Dyus jycaajnite u'cawa'ja'. ²⁵ Maava wala ji'pjsa' Dyus jycaajnite wala tjēy u'catyna. Atsa' tyā'wē tjēysa's yajcyte yu', camello yujva tjēymée vāa yūnz cāfyga u'caya' ājātyna jīc. ²⁶ Tyā'wē wēsē'jrra', wala cuj yajcyna na'wēty puuty paapēyi':

—Tyā'wēte', ji'pjsa' ¿quimrrā' cielute u'caya' ājama'ty? jīte', ²⁷ Jesusa' tyāawe'shtyi tjengrra' na'wēc we'we:

—Naa quiwete nasa' Dyus űsnite u'ca wēerra tyāawe'sh cacuejurrāa pa'pchurra' ājāmeetyna. Nava Dyusna pi'cyrra yu', tjēymée ājātyna. Dyus yacja' quīj yujva tjēysa meea'.

²⁸ Tyajū' Pedro' na'wēc we'we:

—Cue'sha' indy yacj yujya', cue'sh ji'pjuni's jyuca nvijttja'w quījnavā jīte', ²⁹ Jesusa' na'wēc pta'sh:

—Andya' isatj we'we! Dyus yuwe ewsa's jypa'garra andy yacj fi'nze wēerra', quījnavā jyuca nviitutyna yat, quiwe, nyacjwe'sh, npe'shwe'sh, neywe'sh, nyu, nchi'cwe'sh, niisawe'sh tyā'wēsaty. ³⁰ Atsa' tyā'wē yūusa' macue yajtsena fi'nzerrava tyāawe'sh nviitniite puutejca jytjaacue wala uyuutyna naa quiwetey: yat, quiwe, nyacjwe'sh, npe'shwe'sh, njī'jwe'sh, nchi'cwe'sh, niisawe'sh tyā'wēysaty. Sa' vite quiwete', psumée ityi

fi'nzewa'ja's jypa'gatyna. ³¹Nava jypa'yacymeete', macue yatstewe'shrrava, nmejtewe'sh yuutyna; naapcachja' nmejtewe'sh yu', yatstewe'sh yuutyna jïc.

Jesusa' tyajy uuwa'ja's qui' pta'shni

(Mt. 20.17-19; Lc. 18.31-34)

³²Jesusa' Jerusamente pa'jya' u'juetscu yu', atsa' tyāa yacj u'jusawe'sha' ũucjrra e'stety u'jue' Jesusa's yatste acjrra. Tyajũ' Jesusa' docesarraaty fiite pa'yarra pta'shcu tyā'sa' quij yũuya'vateva:

³³—I'cue'sha' jii yā'ji'cue Jerusamente pa'jya' u'juetstja'w. Atsa' cyte' Dyus Nchi'c Nasa Yuusa's uwerra ducjni yuuna Dyus leya's caapiya'jsawe'sh vite' sacerdote npiitstjē'jwe'sh cusete. Atsa' tyāawe'sha' icjwal' vitrra judiu jil'mée vite nasaty ducjetyna icjcajn. ³⁴Atsa' tyāa nasa' npeevyshijcana pechujcuena fyne'sh avytjetjna tyā'wē yũurra icjetyna. Nava tecj ente' qui' ityĩ yuuna jïc.

Jacobowe'sh njĩ'j Jesusa's pēyni

(Mt. 20.20-28)

³⁵Tyajũ' Zebedeo nchi'cwe'sh Jacobo vite' Juan tyāawe'sha' Jesus tashte utyaarra na'wēty pējy:

—Cue'sha' indya'stja'w pēyi' cue'sh pēyni's cytey yuucajn jite',

³⁶Jesusa' pējycu:

—¿Quijcue yũu jytjāasu'? jĩna.

³⁷Atsa' tyāawe'sh e'nzsa' na'wēty pējy:

—Indya' naa quiwete jycaajya' quijrra', cue'sh e'nzsaty iindy pucacjē pdyi'p cachwa'ja's ũsune'nga jĩnaty pējy. ³⁸Atsa' Jesus pasrra':

—I'cue'sha' jiimeerra i'cue tyā'wē pēyi'. I'cue'sha' andy na'wēy pytjaa yuurra uuwa'ja's ũucjmée jypa'gaya' ¿ājama'cue? jĩna pējyte', ³⁹tyāawe'sha':

—Āja'nja'w jĩnaty pas.

Atsa' Jesusa' na'wēc pta'sh:

—Isa, i'cue'sha' andy na'wēy pytjaa yuurra uuwa'ja's ũucjmée jipjuyujune'cue. ⁴⁰Nava andy pucacjē pdyi'p cachwa'ja's andy ũsu'tsmeetj pēysaty. Tyā'sa' tyān ente quim jypa'gawa'jsa yuuna tyā'srrāa ũsni yuuna jïc.

⁴¹Atsa' vite diezsawe'sh tyā'wē Jacobowe'sh pēyni's wēsē'jrra' ũusachaty tyāawe'shtyi'. ⁴²Tyā'wē yũute', Jesusa' pa'yarra na'wēc yu'cypej:

—I'cue'sha' miiyajcywe: Naa quiwete jycaajsa walasa' nasaty jyuca jycaaja'ty juuna'rrāa yuuna cjaawāshi'jna. ⁴³Nava i'cue'sha' tyā'wēy yuuwaljsamee'cue. Macue jytjaacuesarrava, wejyva vitety selpiina mfi'nzewe. ⁴⁴I'cue'sha' walasa yuu wēerra', vitee jycaajni selpisāa myuuwe. ⁴⁵Tyāa pa'gatey Dyus Nchi'c Nasa Yuusāa yujva tyā'sna selpí

jytjáasya' quíjme!, wejyva maanzcuêe nasatyva nwe'wena selpiiya'
quíjrrac ya'ducj ñuste uuya'.

Teech pitstjê'j uyya' ájásame's Jesus nuycatyjini
(Mt. 20.29-34; Lc. 18.35-43)

⁴⁶Tyajü' Jericote pa'jrra', Jesusa' tyāa yacj u'jusawe'sh vite' cujsa yacj
chjambu casejna u'juetste', teech pitstjê'j uyya' ájásameec dyi'j pucate
lmushnu tjāasna u'pu'. Tyā' Bartimeoc yaase yu', Timeo nchi'c. ⁴⁷Sa' Jesus
Nasaretjuwe'sh utyaatste wēsē'jrra', na'jīnac sus we'wena u'pu':

—Jesus, David ji'j, andya's meen peeygāj jīna.

⁴⁸Atsa' nasa yu':

—Shuuna' myuu, cuchngu susu' jīteva, jweeírráac sus we'we:

—David ji'j, andya's meen peeygāj jīna.

⁴⁹Tyajü' Jesusa' tundte yujurra, pa'yacaacj. Atsa' pa'yaty na'jīna:

—Quiitterra ūucjmée myuj, Jesusa' indya's pa'yatsa' jītspcachja', ⁵⁰tyajy
atyja's nvijrra ūpjrrac quiitterra Jesus tashte utyāa.

⁵¹Tyajü' Jesusa' ¿quíjnga yūu jytjáasu'? jīna pējyte', tyāa uyya' ájásamée pasrra':

—Andya' uyya' ājā wējē'tj jīc.

⁵²Atsa' Jesus we'werra':

—Caayu'u'juna sūjrrane'nga andya's pi'cy tyāa pa'ga āchja' uyna
mneeyūu jītspcachja' uyya' ājāc, sa' Jesus e'stey u'c'j pi'cyna.

Jesus Jerusalente u'cani
(Mt. 21.1-11; Lc. 19.28-40; Jn. 12.12-19)

11 ¹Tyajü' Jesusa' Jerusalenna u'juetsrra', e'nz chjambcuē Betania
Betfagé utyatec pa'j. Tyāa chjamba' Olivos vits dyi'pgaty neeyū'.
Atsa' cytee pa'jrra' tyāa yacj u'jusawe'sh e'nzsaty yatste caacj na'jīna:

²—Chjamb le'chcuē vya'c cytee me'jwe. Sa' cytee pa'jrra', teech
burru quim yujva a'jnimeesa tundni ūsna tyā'sna jyūcjwenderra jyūna
yuweene'cue. ³Tyā'wē yūutste quim pēyiváatyna atsa' cue'shtyi jype'jsac
nicyya' caaj nava qui' caashwendu'juna jīne'cue. ⁴Tyā'jīte', tyāawe'sha'
u'jrra burru's uytyi vity pucate dyi'j ju'ngu tundni ūste. Atsa' jyūna
u'jya' jyūcjwendetsty yu'. ⁵Naapcachja' cytee tjengna ūssa' we'wety:

—Burru's ¿quíj yūuya' jyūcjwendetscue? jīna.

⁶Tyajü' Jesus ma'wēne' cwe'wel'j tyā'wēy tyāawe'sha' pasterráa jyūna caajty.
⁷Tyajü' tyāa burru's Jesus tashte nuycūjrra', tyāawe'sh atyjtyi tpengu'ngrra pustyi,
atsa' Jesusa' al'jrra u'c'j. ⁸Naapcachja' vite yu' Jesus u'jwal'j dyi'jsu yatstety tyāawe'sh
atyjtyi pusna u'jue', atsa' vite' ējyā spē'tjrraty tyā'wēy dyi'jsu pusna u'jue' yatssu.

⁹Naapcachja' yatste u'jsa vite' e'ste yuusa tyāawe'sha' na'jīnaty weyna u'jue':

—Dyus caajnisala wala yuj jytujtjesa yuja'. ¹⁰Wala yuj ew jycaajana,
cue'sh yatsgawe'sh David na'wēy. Dyusa's wechaaga wala ew yūupa'ga
jī'ty. ¹¹Jesusa' tyā'wēc Jerusalente u'ca dyuus yatte pa'j. Sa' dyuus yatte

quij ũsteva jyuca tjengrrarráa qui' casejna u'cj Betania chjambnay doce tyāa yacj u'jusawe'sh yacj, cusutsyā'cj yu' naa pa'ga.

Higuera fytūu tash yūnsame's Jesus atsewe'weni
(Mt. 21.18-19)

¹² Tyajū' cuscuscjē' Jesusa' Betania chjambu qui' casejrra' wēec. ¹³ Sa' higuera-tash wala yejtssa ũste uyrra', tjengya' u'cj yūn ji'pjavāana sūjrra. Nava yūnmée etsrrāac ji'pj yu', yūn en meec yu' naa pa'ga. ¹⁴ Tyajū' Jesusa' na'jīnac we'we tyāa fytūu tasha's:

—Naa fytūu tashte yūnni's quim yujva ũmeetyna peena yu' jīna we'wetste', tyāa yacj u'jusawe'sha' wēsē'jnaty ũsu'.

Dyuus yatte tyweysaaty Jesus cashishni
(Mt. 21.12-17; Lc. 19.45-48; Jn. 2.13-22)

¹⁵ Tyajū' Jesusa' Jerusalen chjambte qui' shawendna pa'jrra', dyuus yatte u'carra cytee quijquijva tyweyna qui' weyna ũssaty eca cashishcu, vyu yu'ptjejsa mesa vite' tumb chijme tyweysa cachni panguty jyuca pūshna. ¹⁶ Sa' cytee quijquijva tu'srra pa'jsaty caacūju'jme'. ¹⁷ Tyajū' na'jīnac yu'cypej:



(Marcos 11.15)

—Dyus libroute' na'wẽ fil'jni ũsa': Andy yata' Dyus yacj puuty we'wena ũswa'j yatrãrã' nasa majũwe'shva jĩ'c. Nava i'cue'sha' peswée pcjaacjena ũsni cafy na'wẽrrãa vitra jil'pji'cue jĩte', ¹⁸Dyus leya's caapiya'jsawe'sh vite' sacerdote npiitstjẽ'jwe'sh wẽsẽ'jrra', ma'wẽrrãava yũurra icjya' ãjãwa'ja's pacuety. Nava isa icjya' yu' ũucjtyi, nasa tjaacue cujsa yu' Jesus caapiya'jni's nwẽesẽ'jsarrarrãa ũspa'ga. ¹⁹Tyajũ' jyuca chji'ndyitste', Jesusa' tyãa chjambuj casejna u'cj.

Higuera fytũu tash undyni

(Mt. 21.20-22)

²⁰Cuscuscjẽ cusĩ cyuy jycjẽuutsrra', higuera fytũu tasha' wetsete pa'j undyni ũstety uy. ²¹Atsa' Pedro' Jesus we'weni's yajcyrra na'jĩc:

—Mtjeng naa higuera fytũu tasha's jũ'na we'werra': naa fytũu tashte yũnni's quim yujva ũ'meetyna peena yu' jĩnang we'we tyãa fytũu tasha' jyuca ujnɔyga jĩte', ²²Jesusa' na'wẽc pas:

—I'cue'sha' quĩj pẽyitsrrava, cuj jwend yajcymée Dyusa' cytey yuuna sũjnarrãa mpẽjywe. ²³Andya' isatj we'we': maava Dyusa's tyã'wẽ ũusuj jyuca yajcyna, naa vits wala ayjyu u'jrra icj walate mel'j cjẽeya' jĩtyna atsa' cytey yuuna. ²⁴Cytey yuuwa'ja's andya' jiirratj tyã'wẽ i'cue'shtyi' Dyus yacj puuty we'wecaja' pẽyni's jypa'gayã'tja'w sũjna. ²⁵Sa' Dyus yacj puuty we'wena ũsĩ yaaquívá'cue vitesa yacj ãjmée yũuni's. Sa' tyã'wẽ yajcyrra', tyãa yacj peltunãyya' u'juene'cue, cyaj i'cue'sh Tata cielutewe'shva i'cue'sh pcaltyi peltunaĩna. ²⁶Nava i'cue'sh tyã'wẽ vitesa yacj ãjmée yũuni's peltunaĩmeete', i'cue'sh Tata cielutewe'shva i'cue'sh pcaltyi' peltunaĩmeena jĩc.

Dyuus yatte Jesus juuna' yũuni's pẽyni

(Mt. 21.23-27; Lc. 20.1-8)

²⁷Tyajũ' Jerusالente shawendna pa'jrra, dyuus yat-su u'jute', sacerdote npiitstjẽ'jwe'sh vite' Dyus leya's caapiya'jsawe'sh vite' judiu ntjẽ'jsawe'sh Jesus tashte utyaarra', ²⁸na'jĩnaty pẽjy:

—Indya' ¿quimnga sanga dyuus yatte tyã'wẽ juuna' yũu? ¿Quimnga tyã'wẽ yũuya' jycaaj? jĩte', ²⁹Jesus pasrra':

—Andyva i'cue'shtyi' pẽjy ya'vatj atsa' andy pẽyni's pasune'cue. Tyã'wẽ yũ' andyva pta'shi'nja quim jycaatje tyã'wẽ yũurrava. ³⁰Sa' pẽjycu na'jĩna:

—Juan Bautista's ¿quimnga jycaaj bautisãyya'? ¿Dyusá', meerra' naa quiwega pitstjẽ'já'? Mpaaswe jĩnac pẽjy.

³¹Tyajũ' tyãawe'sh pwe'sh na'jĩnaty puuty we'we':

—Dyusne' jycaaj jĩ'nja'w atsa' tyã'wẽte' ¿mjĩya'cue Juan pta'shni's jypa'gamée? jĩna pasuna. ³²Meerra' naa quiwetewe'shne'ta jycaaj jĩvatsva, cyul yujna, nasa jyucaysa Juana's we'werra': Dyus jycaajnis'a' jĩ'ty. ³³Tyã'jĩna ũucj we'werrarrãa:

—Cue'sha' jiimeetja'w jīnarráaty Jesusa's pas.

Atsa' Jesusa' na'jīc:

—Andyva pta'shme'nja quim jycaatje tyā'wē yūurrava jīc.

Mjīisawe'sh patron nchi'ca's icjni yacj caaja'nda'jni

(Mt. 21.33-46; Lc. 20.9-19)

12 ¹Tyājū' Jesusa' naa ejemplo yacjcu caaja'nda'jna pta'sh:
—Teech pitstjē'ja' tyajj quiwete uva wala ujrra, ctandyí jyuca upjcu, sa' uva ee tjengwa'j yatva tyajrra uva tjē'tje ūjnderra cu'swa'j yatva fii tyajc. Tyā'wē yūurrac tyāa quiwete mjīiwa'lsaty ew neewe'wena nvijtrra jyu'j quiwen u'j. ²Tyājū' uva tjē'jwa'j en ājte', tyā'sna selpisāa teece caacj cytee mjīisaty pējyya' tyāa jīi yuuwa'ja's. ³Nava tyāa quiwete mjīisawe'sha' pējyna pa'jsa's uwerra wala pcyuuty, sa' quīj yujva ducjmeety caaj. ⁴Atsa' quiwe namu' vite selpisāa qui' caacj tyā'snava wala wēeshuna cuet wāatātājna dyictjesu cpā'vittyi. ⁵Tyājū' quiwe namu' qui' caacj vite selpisāa, atsa' tyā'sa' icjtyi. Tyāa e'su' maanzcuēe selpisaava caacj, atsa' tyāawe'shtyi' maaíi yuutyi' cpā'vitna, vitetyi' icjtyi.

⁶Tyā'wē yūute', teece nchi'c wala wendynisa jī'pjuc tyā'snac nmejte caaj, andy nchi'ca's pejca nwēesē'jetyna sūjna. ⁷Nava tyāa quiwete mjīisawe'sha' tyāa nchi'ca's uyrra': Naa nchi'c tyā'wē naa quiwe's uwewa'lsana, atsa' tyā'sa' icjrra quiwe's cue'sh iyyamu'nja'w jīnaty puuty we'we. ⁸Sa' tyāa nchi'ca's uwerra icjrra uuníi cacue's tyāa quiweju cutyi'jty jīnac pta'sh.

⁹Tyā'wē pta'shrra Jesusa' pējyuc:

—Tyā'wē yūute', cytee quiwe namu' ¿quīj yūucy? Tyāa shawendna pa'jrra, cytee mjīisatyi'ls icjrra quiwe's vitety ūsuna sūju'tj jīc.

¹⁰Dyus librate na'wē fil'jni ūsa' tyā'sa' iilēeymeevá'cue i'cue'sha':

Yat tyaa'jsawe'sha': Naa cueta' seelpime' jīrra wāatājty.

Nava tyāa'ic yat macuesanava chjāchja neewewa'jsa yuuna pa'j.

¹¹Tyā'wē neewewa'jsa yuuna pa'jwa'ja's Dyuscu vitrra nvijt,

Tyāa pa'ga cue'sh yacja' wala wecha yuja' ¿jī'tsmeena'?

¹²Tyājū' Dyus leya's caapiya'jsawe'sh vite' sacerdote npiitstjē'ljwe'sha' tyāa ejemplo' tyāawe'shtyi we'weniteva jiyurra', Jesusa's uwerra tund wēety. Nava nasaty ūucjrra tundmēe u'jty.

Gobierno's ducjwa'ja'sva pēyni

(Mt. 22.15-22; Lc. 20.20-26)

¹³Tyājū' fariseowe'sh vite' Herodes nasa tyāawe'shtyi pa'yarraty manz caaj Jesus tashte, quīj ewmēe we'weteve cpajcyya'. ¹⁴Atsa' tyāawe'sha' na'wēty paapējy Jesusa's:

—Indya's cue'sha' jīitja'w. Indya' isasarrá'sngu we'we', Dyus tashte pa'jwa'j dyi'ja's caapiya'jna. Sa' nasaa jycaajna yu'cypejnyty nwēese'je'tsmeeng, tyāa pa'gatey indya' nasa ewsa na'wē tjengsaty jiyumey ju'ngu yu'tsmeeng. Indy ¿ma'ljīqui'ng? Jycaajsa Cesara's vyu

ducjte ¿ewmañ? Meerra' ducjmeete vaa ¿ewna? jīna pējyte', ¹⁵ Jesusa' tyāawe'sh ūuste ewmēe yajcyrra tyā'wē pēyni's jiyurra', na'wēc pas:

—¿Quijya'cue andya's ewmeete nviit wēerra tyā'wē pēyí? Vyu's mneejyūjwe vacy, tjengya'vatj jīte', ¹⁶ teech vyu's jyūna cūjty, atsa' tjengrra' na'jīc:

—Ayte' ¿quiim dyi'pa's qui'pnina, sa' quiim yase's fi'jnina? jīte', tyāawe'sh pasrra':

—Cesar dyi'pa's qui'prra Cesar yase's fi'jni' jīty.

¹⁷Atsa' Jesusa' na'wēc jycaaj:

—Cesar jī's Cesara's ducjwa'ja', sa' Dyus jī's Dyusa's ducjwa'ja' jīte', paapēysawe'sha' pasya' ājāmēe cuj yajcynaty neeyūu.

Uusaawe'sh qui' ityi yuua'ja'sva pēyni

(Mt. 22.23-33; Lc. 20.27-40)

¹⁸Tyājū' saduceowe'shtyi paapējyja' cūj Jesus tashte. Tyāawe'sha' uusaawe'sha' peena yu' ityi yuumeetyna sūjna yaacysaty yu'. Sa' Jesus tashte cūjrra', pējytyi:

¹⁹—Indya' jiine'nga, Moisesa' na'wēc fi'jrra nvijt: Maa pitstjē'jva nyu ji'pjrrava, luuch ji'pjumey uute', uusáa nyacja' tyāa neeyūsáa u'y yacj cambana atsa' tyāate luuch nyafytewe'sha' uusáa nchi'c na'wē neeyūuna jīnac fi'j.

²⁰Cue'sha' jīitja'w siete pitstjē'j pyacjtyi u'p yu'. Sa' nyacj ntjē'jsa' iiyuurra luuch ji'pjumey uuc. ²¹Atsa' nyacj e'stewe'sha' tyāa u'y neeyūsáa yacj cambarrava, tyāava luuch ji'pjumey uuc. Sa' tecjtewe'sh nyacjva tyāa u'y neeyūsas' fírráac cambia. Nava tyāava tyā'wēyrráac yuu. ²²Atsa' sietesay teech u'y sarrarráana cambana jyā'jrrava, tyā'wērrarráaty yuu. Nmejte' tyāa u'yva uuc. ²³Atsa' uusaawe'sh qui' ityi yuu ente', tyāa u'ya' ¿maa yacj isa nyu yuua'jsacy cielute'? jīnaty paapējy. ²⁴Atsa' Jesusa' na'wēc pta'sh:

—I'cue'sha' Dyus libru's jiimeei'cue, sa' Dyus tashte ma'wē fi'nzewa'ja'sva jiimeerra' jypumbana ūsi'cue. ²⁵Nava uusaawe'sha' qui' ityi yuurra', nyu ji'pjuwa'jsa meeta'. Cyte' caaptamu'jna ūsquiweme', tyāa pa'gatey cielute' tyāawe'sha' angeleswe'sh na'wēsarráa yā'tja'. ²⁶I'cue'sha' jypumbanuwe: Uusaawe'sha' qui' ityi yuua'jsa yujta'. I'cue'shíiva Moises librute iilēeyne'cue: Cyte' tsjūtsj yu'cj bejna ūsni pyājū na'wēc Dyusa' we'we: Andya' Abrahan, Isaac, Jacob tyāawe'sh Dyustju jīc. ²⁷Dyusa' uusaawe'sh Dyusme', tyā' ityīsawe'sh Dyusa'. Atsa' i'cue'sha' wala jypumbana ūsi'cue jīc.

Dyus ley maateva jytjaacuesa

(Mt. 22.34-40)

²⁸Tyā'wē pāapējyte', Jesus shiingmēe pasutste wēsē'jna ūsu'c Dyus ley caapiya'jsa teeche'sa'. Sa' tyāava na'wēc pējy:

—Dyus leya' maateva jytjaacuesa' ¿maana? jīte', ²⁹Jesusa' pta'shcu:

—Dyus ley maateva jytjaacuesa' nyafytewe'sha' na'wē: Israelwe'sh, mwēesē'jwe: Cue'shtyi taqui'sa Dyusa' teech yuurrá'. ³⁰Tyā'sa' ūusuj jyuca yajcyrra tyāa yuurráana selpiina fi'nzewa'ja' bagachte yujva

tyutemée uu entepcach. ³¹Atsa' e'stewe'sha' tyā'wēydyi'a': Peequí ma'wēnga ya'peeygāja', tyā'wēy mpeeygāj vite nasatyva. Naa ley e'nzsa maateva jytjaacuesata' jīte', ³²Dyus leya's caapiya'jsa pasrra':

—Ew yuj pta'shngu. Dyusa' teechrráa yuj ūsa', atsa' vite Dyus yu' meeta'. ³³Sa' tyā'wē ūsuj jyuca yajcyrra tyāa yuurráana bagachte yujva tyutemée selpiina fi'nzerra, tyā'wēy ma'wē peequí ya'peeygāja'cy tyā'wē vite nasatyva peeygājna fi'nzeni' Dyusna peesna maanzcuée niimalva altalte cambnite jytjaacue ewsa' jīc.

³⁴Tyajū' Dyus leya's caapiya'jsa tyā'wē jypa'yacy paste', Jesusa' na'jīc:

—Dyus jycaajnite u'caya' utya ūsngu jīc.

Atsa' tyajūyā'ja' vite yu' peena pējymeeta'.

Dyus tashu yuusa' ¿quiim nchi'cqui? jīna Jesus pēyni

(Mt. 22.41-46; Lc. 20.41-44)

³⁵Tyajū' Jesusa' dyuus yatte nasaty caapiya'jna na'wēc pta'sh:

—Dyus ley caapiya'jsawe'sha' ¿ma'wētequi'ty Cristo' David nchi'ca' jīna pta'shi'? ³⁶Naapcachja' Dyus Espiritu caayaqui'tje' Davida' Cristo's we'werra' na'jīc:

Andyna jype'jsa Cristo's Dyusa' na'jīc:

Andy pucate patsu ju'ngte mcaach,

Indyna atsesaty indyrrarráana nwēese'jwa'ja's vitna jyā'pjcach jīc.

³⁷Atsa' Cristo' ¿ma'wērra David nchi'c yuucy? David íiva Cristo's we'werra': Andyna jype'jsa jīc. Tyā'wē Jesus pta'shte', nasa tyanzcuēesay wala wechana wēsē'je'ty.

Ley caapiya'jsawe'shtyi yuuwesa Jesus nviitni

(Mt. 23.1-36; Lc. 11.37-54; 20.45-47)

³⁸Tyajū' Jesusa' na'wē yu'cypejncac caapiya'j:

—Dyus ley caapiya'jsawe'shtyi' jypa'yacy me'juwe. Tyāawe'sha' ropa jyu'jsa atjrraty nasaty wechaa jytjāasna pecūju' msuuva. ³⁹Sa' judiuwe'sh pcjaacjenisuva cachni wejy ewsarráanaty pacué', vite' sāl'jīya' pi'cyni yat-suva tyā'wētyi yu'. ⁴⁰Sa' viudawe'sh quīj ji'pjuni'sva jyuca cusa'jrraty tyāa pesweni's caapechcana'jya' wala jyu'j we'wena lisá'. Tyā'wē yūupa'ga tyāawe'sha' wejy jytjaacue Dyus castigāyni yuutyna jīc.

Viuda ofrenda acjni

(Lc. 21.1-4)

⁴¹Sa' Jesusa' dyuus yatte vyu āshni dyi'pte cachrra tjengnac u'pu' ofrenda āshya' cūusaty. Atsa' maafí yu' vyu wala ji'pjsa' seena' wala acjety. ⁴²Naapcachja' teech u'y viuda puuplesa cūjrra', e'nz vyuu mushcuērráac acj. ⁴³Atsa' Jesusa' tyāa yacj u'jusawe'shtyi pa'yarra na'wēc pta'sh:

—Naa u'y viuda' quij yujva ji'pjmeesarrava maa maateva jytjaacuec acj.
 44 Vite yu' acje'ty, nava tyāawe'sh peejinimée quijyasarráanaty acje'. Nava
 naa u'ya' quij yujva ji'pjmeesarrava tyajy ũ' weywa'ja's jyucac acj jīnac
 pta'sh.

Dyuus yat ptsuwa'ja's Jesus pta'shni

(Mt. 24.1-2; Lc. 21.5-6)

13 ¹Tyajū' Jesusa' dyuus yatu casejetste', tyāa yacj u'jusa teeche'sa'
 na'jīnac we'we:

—Mtjeng, naa yata' na'wē seena' wala tyaa'jni' cuet zhichcuesa yacj
 jīte', ²Jesus pasra':

—Naa yat wala's vá'nga tjengu', atsa' tyā'wē yuja'. Nava jyuca ptsuuna,
 atsa' teech cuetrráa yujva quēese'jnimeesa yu' neeyūumeena jīc.

Naa quiwe ptsuwa'j en ājatste seena'sa vyaawa'j

(Mt. 24.3-28; Lc. 21.7-24; 17.22-24)

³Sa' tyajū casejrra', Olivos tjā'j dyuus yat dyi'ptec neeyū' cyteety
 u'j. Cytee pa'jrra Jesusa' cachrra u'pte', Pedro, Jacobo, Juan, Andres
 tyāawe'sha' na'wēty paatste pējy:

4—Bagach tyā'wē dyuus yata' ptsuwa'jsacy tyā'sa' pta'shvatsa',
 sūju'tja'w. Sa' tyā'wē yuua'j en ājātste', ¿quijrra yuucy? tyā'snatja'w jiyu
 wējē' jīte', ⁵Jesusa' pta'shcu:

—Mpa'yajcywe caypumba'jwe'shte. ⁶Tyā'wēme', wala casejetyna:
 Andyíi Cristotj jīna. Tyā'wē yūurra maaíi yuutyi' wala caypumba'jatyna.

⁷Sa' i'cue'sha' wēsē'jene'cue guerra u'pa' sa' aysuva guerra pa'jana
 jīni's, nava ũucjmeene'cue. Tyā'wē cytey yuuyujuna, nava nmej en
 meea'. ⁸Atsa' gobierno' vite quiwete gobierno yacj puuty puiityna.
 Naapcachja' puuty jyu'j quiwe'jū pwe'shva puuty puiityna. Mtee mteeva
 seena' ejnd u'juena. Seenā' wējē enva pa'jana. Sa' nasava wala susutyna
 gobiernoty atsewe'wena. Nava pytjaa ũuswa'j en tacjnarráa tyā'wē
 yuuna.

⁹Nava i'cue'sha' jypa'yacy meswe. Tyā'wēme' judiu ntjē'jsawe'sh
 cusete i'cue'shtyi ducjrra, tyāawe'sh pcjaacjenite nuypa'jrra pcyuutyna.
 Sa' i'cue'sha' andyna selpiiya' utyaapa'ga ajtserra ne'jue'sh tashsu
 vite' jycaajsa tashsu cuutya'jni yuune'cue. Tyā'wē cysū pa'jrra',
 jycaajsa'wē'shtyiva pta'shya' ājāne'cue andy caapiya'jni's. ¹⁰Nmej en
 utyaatste', Dyus yuwe ewte nviitwa'jsa's mtee mteeva jyuca pta'shni
 yuuna.

¹¹Tyā'wē i'cue'shtyi' jycaajsa cusete ducjya' jyūna u'tje', ¿ma'wē
 pasucytja'w? sūjna cuj yaacynuwe ũucjna. Dyusa' tyāa dundte
 caaūusutje'jena tyā'srráa mwe'wewe, tyāa pa'gatey i'cue'sh
 we'wewa'jsamee'cue. Dyus Espiritu i'cue'sh ũuste caayaqui'jwa'jsa'

i'cue'sh we'wewa'ja's, atsa' tyā'srráa we'wewa'jsai'cue. ¹²Naa quiwete nasa' peecy nyacjtyi ajtserra quicjel'jetyna, atsa' neywe'shva peecy nchi'ctyi ajtserra quicjel'jetyna. Tyā'wēy nchi'cwe'shva neywe'shtyi ajtserra quicjel'jetyna. ¹³I'cue'sha' andyna selpiipa'garráa naa quiwetewe'sh jyuca yaatseni fi'nzene'cue. Nava uu entepcach Dyus yacj tyutemée fi'nzerra', ewte neeyūne'cue.

¹⁴Na'wē fi'jni's jiyuya' jypa'yacy mlēeywe: Dyus yuwe pta'shsa Daniela' fi'cj dyuus yatte canzh ewmée yuuna pa'jwa'ja's. Atsa' tyā'wē cytey yuutste uyrra', Judea quiwete ūssa nasa' chjamb peecu'j yu'cjsurrarráa ūpjna casejene'cue. ¹⁵Atsa' tyā'wē seena' yuutsyā'tje', ēe yat-su u'psa ūpjna sa'jrrava, quij yujva cutyi'jwa'j en ji'pjumeetyna. ¹⁶Tyā'wēy mjii ejsu u'jusava tyajy atyjrrá'sva yatuj cutyi'jya' pa'jwa'j en ji'pjumeetyna. ¹⁷Tyāa ensu' nasa ji'pjsa vite' luuch āpācuē ji'pjsa' wala yuj űus pytjaa yuutyna. ¹⁸I'cue'sha' Dyusna mpi'cywe, tyā'wē ūpjwa'j ena' nus ente yuucajmén. ¹⁹Tyā'wēme' iimėj seena' wala űuswa'j en yuuna. Naa quiwe's Dyus pjeu'jiyna, bagachte yujva űuswa'j en tyā'wēsa yu' u'pu'tsme', sa' tyāa scjēwniijūyā'ja' bagachte yujva tyā'wēy űussa yu' u'pumeena. ²⁰Cue'shtyi taqui'sa Dyusa' tyā'wē seena' űuswa'j ena's tyachmée vitmeete yu', naa quiwete nasa quim yujva ityi neeyūumeetyna. Nava tyā'wē seena' űuswa'j en u'puwa'ja's Dyusa' tyachmeec vit tyajy nasa tyjityjnisaty peeygajrra.

²¹Tyājū' maaí yu' i'cue'shtyi na'jityna: Myujwe tjengya', Cristo' ayte ūsa' jityna. Meerrava: Me'jwe tjengya', Cristo' cytee ūsa' jiteva, i'cue'sha' cytey yuunuwe. ²²Tyāa ensu' wala ishīsa casejrra: Cristotja'w jityna, naapcachja' vite': Cue'sha' Dyus yuwe pta'shsatja'w jīna pecūjutyna, caypumba'j wēerra quijquijva caavya'ja'jna. Jypa'yacymeete', Dyus tyjityjnisa yujtyva caypumba'jatyna. ²³Atsa' tyā'wē yūuwe'shte, andya' dyiicjēy pta'shittstu i'cue'sh jypa'yacy ūscajn.

Dyus Nchi'c Nasa Yuusáa seena' zhichcue vyaana

(Mt. 24.29-35, 42-44; Lc. 21.25-36)

²⁴Nava tyā'wē űusni en scjēwniijū', seca' chji'ndyina, atsa' a'teva cweetjmeena. ²⁵Naapcachja' estrella' cielujū ūshityna, atsa' quijquijva seena' walasa ēe walate ūstyna tyāava jyuca quēese'jni yuutyna. ²⁶Tyā'wē yūunijū', Dyus Nchi'c Nasa Yuusa's uyuutyna tāapj pyājte seena' zhichcue cweetjna quijatste. ²⁷Sa' quijrra' tyajy angeleswe'shtyi jycaajana tyajy nasa tyjityjnisa mtee mteeva ūstyna tyāaty jyuca pcjaccajn.

²⁸Naa ejemplo's pechcananuwe: higuera fytūu tash u'se yeetsutste uyrra', jiyu'i'cue yūnya'vateva. ²⁹Tyā'wēy na'wē pta'shtju tyāaty uyrra', jii mfi'nzewe nmej ena' utyaatsna sūjna. ³⁰Isatj we'we': tyā'wē seena' űuswa'j ena's uyuutyna naa ensu nasa uume'y. ³¹Cielu naa quiwe jyuca scjēuutyna, nava andy we'weni' jyuca cytey yuume'y yu' scjēwmeetyna.

³²Nava tyā'wē Dyus Nchi'c quīj orate quīiwa'jsateva, tyāa en yu'sa' quim yujva jiimeeta' cielute Dyus angeleswe'shva jiimeeta', atsa' Dyus Nchi'c íi yujva jiime', naasáa Dyus yuurráa jiia'.

³³Tyāa pa'ga i'cue'sha' wala jypa'yacy meswe, Dyusna yuurráa neewe'wena. Tyā'wēme' jiimeei'cue bagach quīiwa'jsateva. ³⁴Tyā' na'wē yuuna: Teech pitstjē'j jyu'j quiwen u'juetsrra', yatu casejmey selpisaaty teehsa na'wērraj mjii ūsrra cytee jypa'yacy ūscajn teech tjengwa'jsa tyajana. ³⁵Tyā'wēy i'cue'shva wala jypa'yacy meswe. Tyā'wēme' jiimeei'cue chji'ndyitste ma'c yuu, meerra' cuspyāj atall we'wetste ma'c yuu, meerra' cusíi ma'c yuu nava pa'jrráa yuuna. ³⁶Tyā'wēme' yajcymée ūsiyna, naa dundte pa'jrráa váa yuuna. ³⁷I'cue'shrráaty pta'shmée, jyucaysatyty pta'shi' jypa'yacy ūscajn.

Jesusa's icjwa'ja's puuty we'weni
(Mt. 26.1-5; Lc. 22.1-2; Jn. 11.45-53)

14 ¹Pascua's ū'ni vite' pan levadura ji'pjmée ū'ni fiesta tyāa e'nz fiesta ājya' e'nz enrráac peeju yu'. Tyāa ente Dyus leya's caapiya'jsawe'sh vite' sacerdote npiitstjē'jwe'sha' puuty we'wety ma'wē yūurra quimva jiyunimeete Jesusa's quicijē'jya' ājāwa'ja's. ²—Nava fiesta entemée quicijē'je'nja'w. Tyā'wēme', nasa wala susutyna jīnaty puuty we'we.

Wēt putasá pa'gasa's teech u'y Jesus dyictjecjē awni
(Mt. 26.6-13; Jn. 12.1-8)

³Naapcachja' Jesusa' Betaniate Simon wā'jy weeju catyjiisa yattec u'p yu'. Atsa' cytee u'pte', teech u'y wēt putasá quīj yujva ca'ndnimeesa wala pa'gasa's attrrac cūj. Sa' frasco's ujnrra Jesus dyictjecjēc aw. ⁴Atsa' cytee ūssa' maaíi yu' ūusachaty tyāawe'sh pwe'sh na'jīna:

—¿Quīj yūupa'garráaga naa wēt putasá tyacue pa'gasa's cyul psuwú'? ⁵Wejy yuuva trescientos pesote tyweyrra puuplety pu'chya' ewne' yu' jīnaty tyāa u'ya's ajtsena wēeshūu.

⁶Atsa' Jesusa' na'jīnac we'we:

—¿Quījya'cue wēeshú'? Cuch yuunuwe. Na'wē yūuc tyā' cyul vituni yuume'. ⁷Puuplety peesvats ewne' yu' jī'i'cue na' puuplesatyí' bagachteva peesya' ājāne'cue, i'cue'sh yacj nes yuutyna naa pa'ga. Nava andya' i'cue'sh yacj nes yuuya'vameetj. ⁸Andy uute andy cacuete shūshwa'ja's ma'wērráava yūuc andy uumeyna. ⁹Isatj we'we', naa quiwete mtee mteeva Dyus yuwe's pta'shna pecūjsa', naa u'y tyā'wē yūuni'sva ja'nda pta'shni yuuna pechcanamée jīc.

Jesusa's preesu'jwa'ja's Judas ducjya' neeyūuni
(Mt. 26.14-16; Lc. 22.3-6)

¹⁰Tyajū' tyāa yacj u'jusa teehsa Judas Iscariote' sacerdote npiitstjē'jwe'sh cusete Jesusa's ducjya' puuty we'weya' u'cj. ¹¹Atsa'

tyāawe'sha' wala wechana vyu ducjya' neeyũuty. Tyajũ' Judasa' ¿ma'wẽ yũurra Jesusa's atsesawe'sh cusete ducjequitj? sũjna wala yajcyu.

Jesusa' docesawe'sh yacj nmej ũ'ni

(Mt. 26. 17-29. Lc. 22.7-23; Jn. 13.21-30; 1 Co. 11.23-26)

¹² Pan levadura ji'pjmée ũ'ni fiesta en ājātste', Pascual'jwa'j piishaaty icje' tyāa ente' tyāa yacj u'jusawe'sha' Jesusa's pējytyi:

—¿Pascuatewe'sha's ũ'ya' mtee pjeu'jya' caajya'vanga? jĩte', ¹³ tyāa yacj u'jusawe'sh e'nzsaty na'wēc jycaaj:

—Me'jwe Jerusalenna. Sa' cytee teech pitstjē'j yuyuune'cue yu' mityja's yacjrra u'juetste. Sa' e'stey u'juene'cue, ¹⁴ atsa' tyāa mtee u'cate', i'cue'shva cytee u'carra yat namu's pēyine'cue: ¿Mtee piesa ũsuqui'ng Pascuatewe'sha's pjeu'jrra andy yacj u'jusawe'sh yacj ũ'wa'ja's? jĩnac cue'shtyi jype'jsa' yuwe caaj jĩne'cue. ¹⁵ Atsa' tyā' pta'shina ēe yatte teech piesa walasa pjeu'jniyā'jsa. Cytee Pascuate ũ'wa'ja's pjeu'june'cue.

¹⁶ Tyā'wẽ jycaatje', tyāawe'sha' chjambna u'jrra' Jesus ma'wẽ jycaajni's jyuca cytey uyrra', Pascuate ũ'wa'ja's pjeu'jty.

¹⁷ Jyuca chji'ndyitste', Jesusva cytee pa'cj tyāa yacj u'jusawe'sh yacj.

¹⁸ Sa' mesate ũ'na u'prra', na'jĩc:

—Isatj we'we', ayte andy yacj ũ'na u'psa teehsa' andya's atsesawe'sh cusete ducjya'va' jĩte', ¹⁹ jyucaysa ñus we'wena puuty ya'paapēyĩty:

—Meerra' ¿andy vāa tyā'wẽ atsesawe'sh cusete ducjwa'jsane'tca? jĩnaty jyucaysa tyā'wẽrrarraa we'we'.

²⁰ Atsa' Jesusa' pta'shcu:

—Andy yacj u'jusa teehsa' maa tyā'wẽ andy yacj ja'ndarra'j cuse's plaatucjē acjena tyāa andya's atsesawe'sh cusete ducjwa'jsa'. ²¹ Dyus Nchi'c Nasa Yuusa' ma'wẽ uuwa'jsateva Dyus librute pta'shi'c tyā'sa' cytey yuuyujuna. Nava andya's atsesawe'sh cusete ducjsa' seena' yuj ñuste cjējena. Tyāa pitstjē'ja' wejy yuuva naa quiwete casejmeevatsne' wejy ew yu' jĩnac we'we.

²² Nee ũ'na u'pĩi, Jesusa' pana's jypa'garra Dyusna wechana'va pe'ltenderra ũsu'scu na'jĩna:

—Mē'we, naa pana' andy cacue na'wēsa' jĩrra', ²³ vaso'sva jypa'garra Dyusna wechana'va jyucaysaty tundycaatje', jyucaysa tundtyi tyāa vasotewe'sha's. ²⁴ Atsa' Jesusa' na'wēc we'we:

—Naa vasotewe'sha' andy ee na'wēsa', maanzcuēesateva āj uwuwa'jsa'. Dyusa' tyā'wēc andy eea's pcawrra yuurrāa i'cue'shtyi nwe'wewa'ja's nvijt u'se pjeu'jrra. ²⁵ Isatj we'we': Āchjūyā'ja' peena yu' tundyme'nja naa uva yu'a's, naasāa Dyus jycaajwa'j ente yuurrāa qui' tundyi'nja.

Pedro ĩshiiwa'ja's Jesus pta'shni

(Mt. 26.30-35; Lc. 22.31-34; Jn. 13.36-38)

²⁶ Tyajũ' Dyusna wechana memrra', Olivos vitsna u'jty.



(MRK 14.25)

²⁷Cytee pa'jrra', Jesusa' na'wēc pta'sh:

—Dyus librate we'werra': piisháa-tjengsa's icjte', piishá' jyuca ūpjuutyna jī'c tyāa pa'ga naa custe' i'cue'sha' andy tashu jyuca ūpjuune'cue. ²⁸Tyā'wē yuuteva, andya' qui' ityī yuurra i'cue'sh yatste u'jue'nja Galilean jīte', ²⁹Pedro pasrra':

—Vite yu' macue ūucjrra ūpjteva, andy yu' tyā'wē yūume'nja jīc.

³⁰Atsa' Jesusa' na'wēc pta'sh:

—Indya's isatj we'we', naa custe atall e'nz us we'wemeyna, tecj us īshījats yuune'nga andya's jiimeetj jīna. ³¹Tyā'jīteva, Pedro' jweefirráac chjāchja we'we':

—Macue indy yacj ij uune'jrrava, indya's jiimeetj jīna yu' īshīime'nja jīte', jyucaysa tyā'wērrarráaty we'we.

Jesusa' Getsemanite Dyus yacj puuty we'weni

(Mt. 26.36-46; Lc. 22.39-46)

³²Tyājū' teech ajte pa'jty, Getsemaní yaasesate. Sa' Jesusa' tyāa yacj u'jusawe'shtyi:

—Ayte me'pwe, naapcachja' andya' Dyus yacj puuty we'weya' u'juetstju jirra', ³³Pedro, Jacobo, Juan tyāawe'shrráaty pe'jrra u'cj. Tyajū' Jesusa' wala ñus yajcyrra', ³⁴na'ljīnac pta'sh:

—Tyacue wala pytjaa yuurra uuwa'ja's yajcyte', wala ñus yuja'. Atsa' i'cue'sha' ayte dejmée me'pwe jirra', ³⁵jyu'jmeecuē u'jrra quiwega pquipja weterra Dyusna pējyca tyā'wē seena' yuurra uuwa'ja's yu'ptjejcajn na'ljīna: ³⁶Tata, indy yacja' quīj yujva tjēysa yu' meea'. Atsa' tyā'wē seena' ñuste uuwa'jū meen nwe'we. Nava andy jytjāasni's cytey yuumeerrava, iindy jytjāasnirrá's cytey meen yūu jīc.

³⁷Tyajū' Jesusa' tyāa tecjsaty tjengya' cūjrra', dejna ūstec uy. Sa' Pedro's we'wec:

—Dejmée u'pcaatje', ¿teech orarráava ityī u'pmée dejvá'nga?

³⁸Ewmeete weteya'mée, Dyus yacj puuty we'wena me'pwe dejmée. I'cue'sha' ūusuj yu' chjāchjai'cue yaaqui', nava cacue yu' chjāchjatsme' cytey yuuya'.

³⁹Tyajū' qui'quin Jesusa' u'jrra', tyā'wēyrráac we'wena Dyus yacj puuty we'we'. ⁴⁰Sa' tjengya' qui' shawendrra', tyā'wēy deeni ūstec uyna cūj, tyāawe'sh yafya' dee wēerra chjāchjatsmeene'ta naa pa'ga. Tyā'wē Jesus uyna cūjte, ma'wē pasya' yujva ājā'tsmeeta'.

⁴¹Tyajū' tecj usva tyāawe'shtyi tjengna cūjrra', Jesusa' na'ljīc:

—Āchj yuurrá' jycaaseya' mdejyujīwe. Nava āchja' pejca en ājc, Dyus Nchi'c Nasa Yuusa's ewmeesawe'sh cusete ducjwa'j. ⁴²Tyā'wēyā'ja' atsa' quiittera mejcawe. Andya's atsesawe'sh cusete ducjwa'jsa' yujyā'ja' jīc.

Jesusa's preesu'jni

(Mt. 26.47-56; Lc. 22.47-53; Jn. 18.2-11)

⁴³Cytee we'wena nee ūsiyna, Judasa' cūjc. Tyāa yu' Jesus yacj u'jusa docesatewe'shírráac yu', atsa' tyāa Judas yacj nasa wala cūjty cchill fytū tyā'wē attrra. Tyāawe'sh yu' Dyus leya's caapiya'jsawe'sh vite' sacerdote npiitstjē'jwe'sh vite' judiu ntjē'jsawe'sh jycaajnity yu'. ⁴⁴Judasa' Jesusna uwewa'jsaty na'wēcu'ga yu'cywe'werra pe'jna yuwé': Ma'sna dyi'pte wecha'nja tyā'sna i'cue'sha' tundrra jyūna u'juene'cue jīnaga yu'cywe'we.

⁴⁵Tyajū' Jesus tashte utyaana cūjrra':

—Cue'shtyi jype'jsa jirra wechac. ⁴⁶Naapcachja' nasa' Jesusa's tundtyi jyūna u'jya'.

⁴⁷Tyā'wē Jesusa's tundutste', Jesus yacj u'jusa teechsa' cchilla's jycuutyi'jrra sacerdote npiitstjē'jna selpisáa tjū'wē's spē'tjcu.

⁴⁸⁻⁴⁹Tyajū' Jesusa' nasaty' na'ljīc:

—Andya' een isatj dyuus yatte caapiya'jna ūsu' i'cue'sh cshavyte. Nava tyagachjīi yu' tundmeerra', āchj yu' peswéetjasi'cue cchill pety fytū attrra pa'j, tundrra jyūna u'jya'. Nava Dyus librute fil'jni ūsa' tyāa cytey yuucajn tyā'wē yuutsa' jīnac we'we.



(Marcos 14.46)

⁵⁰ Tyajū' Jesus yacj u'jusawe'sha' tyā'srráana nvijtrra jyuca ūpjna u'jty.

Teech pitstacy iyuna u'jni

⁵¹ Naapcachja' teech pitstacy dee pa'chni yacjrráac Jesus e'stey u'juets yu', atsa' tyā'snava tundutstyí yu'. ⁵² Nava dee pa'chni's nvijtrra, iyuna u'cj süpyrráa.

Judiu ntjē'jsawe'sh tashte Jesusa's cuutya'jni

(Mt. 26.57-68; Lc. 22.54-55; 63-71; Jn. 18.12-14, 19-24)

⁵³ Tyajū' Jesusa's sacerdote npiitstjē'j tashte nuypa'jty. Atsa' cyte' sacerdotewe'sh, judiu ntjē'jsawe'sh Dyus leya's caapiya'jsawe'sh jyucay pcjaacjety. ⁵⁴ Atsa' Pedro' Jesus e'ste jyucj neeyūuna u'jna ūsu', sacerdote npiitstjē'j yat patyute pa'pjcach. Sa' patyute neeyūuc policiawe'sh yacj ipy bajchna. ⁵⁵ Naapcachja' sacerdotewe'sh vite' judiu ntjē'jsawe'sh jyucay pcjaacjerra, Jesus ewmée yūuni's pacuety, ewmée yūuni's cpajcyrra quii'cjē'jya' sūjrra. Nava uymeeta'. ⁵⁶ Tyā'wē uymeeteva maafi yu': Jesusa' yuuwesa yuja' jīna yuwe ūsuty. Nava tyāawe'sh pta'shni' isamée fiyfiyrráac caseje'. ⁵⁷ Tyā'wēteva maafi yu' na'wēty we'weya' yajcy:

58—Jesus we'werra': Naa dyuus yat nasaa tyaa'jni's pētyrra, tecj ente' qui' vite tyaja'nja nasa vitnimeesa jīna we'weni's cue'sha' iiwēsē'tja'w jīnaty pāatyjī'cje'.

59Macue tyā'wē we'wete'va, tyā'ava isamée firráac caseje'.

60Tyajū' sacerdote npiitstjē'ja' quiittera', Jesusa's na'wēc we'we:

—Na'wēty pāatyjī'cje' ħtyā'sa' ma'wērráava pasya'vameengá'? Meerra' ħisa yuj tyā'jīv'nta? jite'va, 61Jesusa' tee'ch yuwerráa yujva pasme'. Atsa' sacerdote npiitstjē'ja' qui'quin pējy'cu:

—ħIndya' Cristo, Dyus Nchi'c dyijngá'? jite', 62Jesus pasrra':

—Tyā'wē'itj. Atsa' i'cue'sha' uyuune'cue Dyus Nchi'c Nasa Yuusa' Dyus pucate cachrra u'pte. Sa' cieluju tāapjte quījasteva uyuune'cue jīc.

63Tyajū' sacerdote npiitstjē'ja' peecy atj'ni rop'a's ūuscha sunderra na'wēc we'we:

—ħQuījya'rráa testigo jwee pejiicytja'w? 64I'cue'sh wēsē'jna ūste na'wēc Dyusa's atsewe'we. Atsa' i'cue'sha' ħmaa sūjū'cue? jite', jyucaysa pasrra':

—Tyā'sa' icjterrāa ewna jity.

65Tyajū' vite yu' dyi'pte fyne'sh avytjetjna dyi'pa's apjrraty uca'cana na'jī':

—Mjiyu vacy ħquimga indya's uca'ca'? jīnaty npeevyshica'. Atsa' policiawe'shva tyā'wētyty dyi'pte uca'ca'.

Jesusa's jiimeetj jīna Pedro we'weni

(Mt. 26.69-75; Lc. 22.56-62; Jn. 18.15-18, 25-29)

66Pedro' patyute ūste', tee'ch u'y sacerdote npiitstjē'ja's selpisáa cūjrra',

67Pedro's uycu tyā'wē ipy bajchna u'pte. Sa' dyi'pte ew tjengrra, na'jīnac we'we:

—Indyva Nasaretjuwe'sh Jesus yacj u'jusang jite', 68Pedro' īshīic:

—Andya' tyā'sa' jiimeetj quimnane'cue we'we na'sva jīrra', casejna u'jrra ecajuc ūsu'. Naapcachja' atall we'wec. 69Atsa' tyāa u'ya' Pedro's qui' uyrra' cytee ūssaty' na'jīnac pta'sh:

—Naa pitstjē'ja' pejca Jesus yacj yuj u'jusa' jīnac we'we. 70Nava Pedro yu' qui'quin īshīic. Atsa' tyāa e'su' cytee ūssava Pedro's na'jīnaty we'we:

—Isa, indya' tyāa yacj yuj u'jusang. Galileajuwe'shrra īng tyājū nasa na'wē we'we' jite', 71Pedro' ūuscha we'wena jurāy'cu:

—Isa Dyus uyte, i'cue'sh cysuusu'i'cue tyāa pitstjē'ja's jiimeetj jītspcachja', 72atalla' e'nz us we'wec. Tyajū' Pedro' Jesus we'weni's yajycy: Atall e'nz us we'wemeyna, indya' tecj us īshīijats yā'j yuune'nga andya's jiimeetj jīni's. Atsa' Jesus we'weni cytey yuute', Pedro' wala ū'nec.

Jesusa's Pilato cusete ducjni

(Mt. 27.1-2, 11-14; Lc. 23.1-5; Jn. 18.28-38)

15 1Tyajū' cjicjyna sējētste', sacerdotewe'sh judiu ntjē'jsawe'sh, Dyus leya's caapiya'jsawe'sh yā'jrra walasa pwe'sh pcjaacjerra Jesusa's tundrra jyūna u'jty Pilato tashte cuutya'jya'. 2Atsa' Pilato' Jesusa's na'jīnac pējy:

—ħIndy vāa judiuwe'shtyi jycaajsane'nga? jite', Jesusa' pascu:

—Tyā'wē itj. Isa yuj we'weng jīc.

³Tyajū' sacerdotewe'sha' Jesusa' quijteva jyuca ewmeesa' jīnaty yuwe ūsu'. ⁴Atsa' Pilato' qui' we'wec Jesusa's:

—Mwēesē'j, indya's na'wēty quijteva jyuca ewmeesa' jīna yuwe ūsu', atsa' ¿ma'wērráava pasya'vameengá'? jīte', ⁵Jesusa' teeche yuwerráa yujva we'weme', atsa' Pilato' cuje yajcyna neeyūu.

Jesusa's icjwa'j vitni

(Mt. 27.15-31; Lc. 23.13-25; Jn. 18.38-19.16)

⁶Pilato' Pascua fiesta iisa teeche preesu tyjweete'c nasaa pēyni's. ⁷Tyāa ensu' cyte preesu ūsu'c Barabás yaasesa. Tyāa pitstjē'ja' vite nasa yacj pcjaacjerra gobierno yacj puí quiisrra nasaty wala quicje'jsa npiitstjē'cj yu'. Tyāa pa'gac preesu ūsu'. ⁸Tyajū' cytee nasa pa'jsa', Pilato's pējytyi fiesta iisa ma'wēne' yū' tyā'sa' āchva tyā'wēy yūucajn. ⁹Atsa' Pilato' pējyju:

—I'cue'sha' ¿judiuwe'shtyi jycaajsa'scue tyjweete jytjāasu'á'? jīc.

¹⁰Nava Pilato yu' sacerdote ne'jue'sha' Jesusa's ajtserra ducjteva jiirrac tyā'wē we'we. ¹¹Nava sacerdotewe'sha' nasa jyucaysaty yu'cywe'wety, wejyva Barabasna mityjwete jīcajn. ¹²Atsa' Pilato' pējyju:

—I'cue'sh we'werra', Judiuwe'shtyi Jycaajsa jī'i'cue ¿tyā'sa' quijcue yūu jytjāasu'? jīte', ¹³tyāawe'sh sus we'wena pasrra':

—Tyā'sa' cluuscjē mcaafyutsu'j jīty.

¹⁴Tyajū' Pilato' pējyju:

—Tyā'wē yūucajna' naa pitstjē'ja' ¿quijga ewmēe yūu? jīteva, tyāawe'sh yu':

—Cluuscjē mcaafyutsu'j jīnarráaty sus we'we'.

¹⁵Atsa' Pilato' nasa yacj ew neeyūu wēerra, Barabasa's tyjweetecaacj, sa' Jesus yu'sa' caapechucue'jrra cluuscjē fyutscajn ducju.

¹⁶Tyajū' soldauwe'sha' Jesusa's jyūna u'jty tyāawe'sh ūsni patyute. Sa' soldauwe'sh jyucaysaty cyteerrarráaty pa'ya. ¹⁷Cjīrraty Jesusa's jycaajsa ropa na'wēsa caapā'chi'jrra, dyictjete yu' tsjütsj corona vitrra caaficje'j.

¹⁸Tyajū' na'wē sus weyna:

—Judiuwe'shtyi jycaajsatj jī'ne'nga jīnaty weech we'we.

¹⁹Sa' dyictjega fytūu zunzsaju pecue'cuena, fyne'sh avytjetjnaty tyajy tashte peejyūcue'. ²⁰Tyā'wē yūuna jyā'jrra', jycaajsa ropa na'wēsa's csūupi'jrra, tyajy ropa's qui' caatje'jty. Tyā'wē yūurraty cluuscjē fyutsya' jyūna u'j.

Jesusa's cluuste fyutsni

(Mt. 27.32-44; Lc. 23.26-43; Jn. 19.17-27)

²¹Atsa' chjambu casejna u'juetste', teeche pitstjē'j Simon yaasesa's puuty uyrra soldauwe'sha' tyā'snaty Jesus yacjni cluusa's cyaacje'jrra pe'jna u'j. Tyāa Simon yu' Alejandro Rufowe'sh neycu yu', Cirene quiwetewe'sh.



(Marcos 15.13)

22 Tyajū' Jesusa's teech ajte Golgota yaasesatety pe'jna u'j. Tyāa Golgota yu' Uusāa Dyictjé Dyit'jrráasa jīni'. 23 Cytee pa'jrra', vinote yaasa ca'ndarraty yus wēe, nava Jesusa' tundyme'.

24 Tyajū' cluuscjē fyutsrra', soldauwe'sha' Jesus ropatyi's tyundeenderra suerte caajty tyajy caatsni atyja's maa soldau cnayteva jiyuya'.

25 Cusí las nuevetety Jesusa's cluuscjē fyuts. 26 Sa' qui'j yūusate tyā'wē cluuscjē fyutsrrava pta'shna fi'jrra qui'ptyi cluus vitste: Judiwe'shtyi Jycaajsa' jīna. 27 E'nz nasa seena' yuuwesa yu'ty tyāawe'sh yacjtyi Jesusa's pdyi'p cluuscjē fyuts. 28 Atsa' Dyus librute fi'jni' cytey yuuc: Nasa ewmeesatjas yuuwesa yacjcu qui'pni yuu jīna fi'jni'.

29 Tyajū' cluus tashuy uycjēwsa' dyictjety caawūjnaty weech we'we':


—Dyuus yata's indya' pētyrra tecj ente' qui' quiusu'nja ǰjī'tsmeengá'?

30 Tyā'wē ājāwa'jsarra' ǰmjīitenga cluusuj peequíi iyurra sa'ja'tsmée? jī'ty.

31 Atsa' Dyus leya's caapiya'jsawe'sh, vite' sacerdotewe'shva na'jīnaty weech we'we':

—Vite yuutyi' nwe'werrava, peequíi yu' ya'nwe'weya' ājā'tsme'.

32 Israelwe'shtyi jycaajsa Cristotj jī'c na' tyā'wē dyijrra', āchjfi cue'sh uyna ūste cluusuj sa'jana ats yuurráa tyā'wē dyij yu'ga sūjū'nja'w jī'ty. Tyā'wēy tyāa yacj cluuscjē fyutsni u'psawe'shva Jesusa's wēeshu'ty.



(Marcos 15.27)

Jesus uunii

(Mt. 27.45-56; Lc. 23.44-49; Jn. 19.28-30)

³³Tyajũ! ěpyāj wala āanite!, naa quiwete jyuca chji'ndyuc cusutste las trestepcach. ³⁴Tyā'wē chji'ndyni las tres ājātspcachja!, Jesusa! na'jīnac sus we'we:

—Eloi, Eloi ħlama sabactani? jīc. Tyā': Andy Dyusngu sa! ħmjī pa'ganga andyrrāana nvijt? jīni!.

³⁵Atsa! nasa cytee wēsē'jna ūssa! Eliasa's pa'yatsa! jīty. ³⁶Naapcachja! teechna! wuwuuna u'jrra, vino pussate esponja's acjrra fytūute atsjrra Jesus yuwete utyac chanzhacajn. Sa! na'jīc:

—Shuuna! tjengna meswe, aan Eliasa! cluusuj spajcyya! pa'jana jīc.

³⁷Tyajũ! Jesusa! qui'quin sus we'wenitee uuna cājc. ³⁸Naapcachja! dyuus yatte tyundenisa liensu pesatj a'cynisa! peecyrrāa sutec puupyājcjē cute ěju quiwete quīj. ³⁹Atsa! cluus dyi'pte ūssa soldau cpiitana! Jesus tyā'wē sus we'werra uutste uyrra!, na'wēc we'we:

—Naa pitstjē'ja! isa Dyus Nchi'c yuj yu'ga jīc.

⁴⁰Tyā'wēy u'ywe'shva jyu'ju tjengna ūsu'ty. Atsa! tyāawe'sh cshavyte!, Salomé, vite! Maria Magdalena vite! Maria Jacobo Josewe'sh njī'j tyāawe'shtyi yu!. (Tyāa Jacobo's nuuchsa! jī'ty). ⁴¹Naa tecj u'ysa! Jesusa's selpiina u'jusaty yu! Galilea quiwesu. Nava tyāawe'shrrāmée, vite u'ywe'shva Jesus yacj ij Jerusalente pa'jsaty ūsu!.

Jesusa's pendani*(Mt. 27.57-61; Lc. 23.50-56; Jn. 19.38-42)*

⁴² Jycaasewa'lj en äjätste', quijnava jyuca pjeu'jrraty nviitu'. ⁴³ Tyāa pa'gac cusutste' José Arimateajūwe'sha' Pilato tashte ūucjmée utyāa Jesus cacue's pējyya'. Tyāa José yu' judiu ne'jue'shsa írráac yu', sa' Dyus jycaajwa'lj ena' dund äjvatsa' sūjna yaacysac yu'. ⁴⁴ Tyā'wē Jesusa' uuyā'cj jīni's jiyurra', Pilato' wala cuj yajcyrra soldau cpiitana's pa'yac pējyya' tyā'wē Jesus uundyijteva jiyuya'. ⁴⁵ Tyajū' cpiitana': Jesusa' uuyā'cj jīna pta'shte', Pilato' Jesus cacue's jyūna u'cjaacj. ⁴⁶ Atsa' Josea' Jesus cacue's spajcyrra, liensu finusa weyrre cyteec yap. Sa' jyūna u'jrra cuet cafy u'se pjandenisa ji'pjuc tycaa cjcjrra, u'cani cafyte yu' cuet walasajuc apj. ⁴⁷ Tyā'wē yūutste', Maria Magdalena vite Maria José njī'j tyāawe'sha' Jesus cacue's mcaa cjcjetsteva uytyi.

Jesus qui' ityi yuuni*(Mt. 28.1-10; Lc. 24.1-12; Jn. 20.1-10)*

16 ¹ Tyajū' jycaase en scjēwniite', Maria Magdalena vite' Maria Jacobo njī'j, vite' Salomé tyāawe'sha' wēt putasá weytyi Jesus cacuete shūshya' u'jya'.

² Tyajū' cuscuscjē wala cusí u'jty, sa' sec cājatste' pendaní cafyte pa'jty. ³ Sa' cytee pa'jatsrra', na'jīnaty tyāawe'sh pwe'sh we'we':

—¿Quim pendaní cafyte apjnisa cuet wala's quiusucy? jī'ty. ⁴ Tyajū' pendaní cafyte tjengrra', apjnisa cuet wala' quisrra pucate qui'pni u'ptety uy. ⁵ Atsa' pendaní cafyte u'carra', teech pitstacy ropa chijmesa jy'jusa atjrra patsu ju'ngu cachrra u'pte uyrra', wala ūucjtyi. ⁶ Nava tyāa pitstacya' na'wēc pta'sh:

—Ūucjnuwe. I'cue'sha' Jesus Nasaretjuwe'sha's cluuscjē fyutsni uuc tyā'snai'cue pacué'. Nava tyā' ityi yuuyā'cj, tyāasa ayga meeyā'ja'. Atsa' cjcjniga mtjengwe vacy, quijva meea' jīrra' caacj na'jīna: ⁷ Tyāa yacj u'jusawe'sh vite' Pedro tyāawe'shtyi na'jīne'cue: Jesusa' i'cue'sh yatste u'juetsa' Galilean, atsa' cytee tyā'sa' uyuune'cue ma'wēga uumeeyva pta'sh tyā'sa' cytey yuuna jīcaatje', ⁸ tyāawe'sha' pendaní cafyu wala ūucjna ūpjna u'jrra, cuj yaacynite vitesa yuutyi' dyi'tje quim yujtyva pta'shmeety u'j.

Maria Magdalena's Jesus vyaani*(Jn. 20.11-18)*

⁹ Tyā'wē jycaase en scjēwnijū' Jesusa' qui' ityi yuurra', Maria Magdalena cjuē'lyna vyaac, na'wē siete ech luucu vit-saty cutyi'cj tyā'sna. ¹⁰ Atsa' tyāa u'ya' Jesus yacj u'jusawe'sh tashna u'jrra, pta'shcu. Tyāawe'sha' ūnsrra ū'nenaty u'p yu'. ¹¹ Sa' Jesusa' ityi yuuga atsa' ū'cue' uytju jīna pta'shteve, wej yujva tyā'wē yūune' sūjū'tsmeeta' tyāawe'sha'.



(Marcos 16.4)

Jesus fiy yuurra vyaani

(Lc. 24.13-35)

¹²Tyāa entey Jesusa' qui' vyaac fiy yuurra, tyāa yacj u'jusawe'sh e'nzsa dyi'tje u'juetste. ¹³Atsa' tyāawe'shva qui' shawendrri, Jesusa's tyā'wē uytja'w jīna vitety pta'shteve, tyā'wē uyne'ta sūjū'tsmeeta'.

Jesusa' tyāa yacj u'jusawe'shtyi neewe'werra nviitni

(Mt. 28.16-20; Lc. 24.36-49; Jn. 20.19-23)

¹⁴Tyā'wē pta'shna jyā'jatspcachja', tyāa yacj u'jusa oncesa mesate cahrri u'pte qui' vyaarra', na'jīc:

—¿Quīj yuurracue andya'sa' qui' ītyī yuune' sūjū'tsmée? Andy pta'shni's ūuste yu'acjya' ājā'tsmeei'cue, sa' ītyī yuute uysāa pta'shteve tyā'wē uyne'ta sūjū'tsmeei'cue.

¹⁵Tyājū' na'jīnac jycaaj:

—Me'jwe, Dyus yuwe's pta'shya' nasa jyucaysaty maa quiwete mteeva jyuca. ¹⁶Atsa' maava andya's ūusuj jyuca yajcyna jypa'garra yu'te ya'bautisaīna tyā' nwe'weni yuuna. Nava andya's ūusuj jyuca yajcyna jypa'gasame' Dyus castigo's cnayuuna. ¹⁷Andya's ūusuj jyuca yajcyna jypa'gasa' na'wē yūuya' ājātyana: Andy pu'chte', ech luucu vit-satyva nasaa ūusuj cutyi'jityna. Sa' yuwe fysajuva we'wetyna. ¹⁸Ul wesweetyva

cuseju uweetyna. Sa' macue veneno's tundyteva, quĩj yujva cãatsã'jmeena cacuete. Sa' ãtsã'sa cacuete peequiinzerra, Dyus yacj puuty we'wete', catyjityna jĩc.

Jesus cielun u'jni

(Lc. 24.50-53)

¹⁹Tyã'wẽ yu'cypejni e'su', cue'shtyi jype'jsa Jesusa' cielun pe'jna u'jni yuurra, Dyus pucate cachcu patsu ju'ngte. ²⁰Atsa' tyãa yacj u'jusawe'sha' u'jrra', Dyus yuwe's mtee mteeva pta'shtyi. Tyã'wẽ cue'shtyi jype'jsa pu'chte', quĩjquĩj yũuya'va ya'ãjãc, tyãa pa'gaty tyajy we'weni' isasa yujna sũjwa'ja's ji'pju'.

DYUS YUWE SAN LUCAS FI'JNI

Teofilo's neewe'wena fi'jni

1 ¹⁻⁴Andy namicu Teófilo, indya's cjiyu'jna fi'jatstju cue'sh ensu na'wě yuuc tyā'sna. Tyā'sa' tyā'wě yūuya' tacjetsíyna, Cristo yacj u'jusawe'sha' ma'wěrrajne'ta ew uy tyā'wěytyi tyāawe'sha' cue'shtyi pta'sh, atsa' tyā'sa' maava tyā'wěyta ew pta'shna fi'jrra nviit wěe. Tyāa pa'ga andyva ma'wěrrajne' yūu tyā'sa' wala ew jypa'yacy paapējyrra indyna pta'shna fi'jatstju, cyaj isa yuj pta'shi'ne'ta sūjūne'nga.

Juan Bautista upywa'ja's pta'shni

⁵Judea quiwete ne'jue'sh Herodes ensu', teech sacerdote Zacarias yaasesac u'pu'. Tyāa yu', sacerdote ne'jue'sh Abias ji'cj yu'. Atsa' tyajy nyu Elisabet yu', Aarón ji'cj yu'. ⁶Ptamí Dyus jycaajnytyi' nwēesē'jsaty yu', tyāa pa'ga Dyus dyi'pte ew fi'nzesaty yu'. ⁷Nava tyāawe'sha' luuch ji'pjmeety yu', Elisabetja' luuch ji'pjuwa'jsameene' yu' naa pa'ga. Cjirrava wala tjē'cjue yā'j yu'ty.

⁸Zacarias yacj ūssawe'shtyi dyuus yatte selpiwa'j en ājte', na'wēc yuu: ⁹Dyuus yat altalte wēt putasá incienso's cambya' u'cawa'jsa quimteva jiyuya', sacerdotewe'sha' suerte na'wěsa cutyi'jty. Atsa' cyteea' Zacariascu casej. ¹⁰Tyājū' Zacarias' Dyus altalte wēt putas'a's cambutste', nasa pa'jsa' jyucaysa ecajurráaty Dyus yacj puuty we'wena ūsu'. ¹¹Naapcachja' Zacarias'a's vyaac Dyus jycaajni teech angel altal pucate patsu ju'ngte. ¹²Atsa' Zacarias' tyā's uyrra', cuj yajcyna wala ūucjcu. ¹³Nava tyāa angel yu' na'jīc:

—Zacarias, ūucjnu. Iindy pytjaa we'weni's Dyus pasrra cytey yuutsa', atsa' iindy nyu Elisabetja' luuch ji'pjuna. Tyāa luucha's Juan yasene'nga. ¹⁴Tyā'wě yuute', indya' wala wechana neeyūune'nga, atsa' maava tyā'wěrrarráa wechaatyna tyajy upyni's jiyurra', ¹⁵tyāa pa'gatey tyāa luucha' Dyus dyi'pte walasa yuuwa'jsa'. Tyāasa quījva ctū'ju'jwa'jsa yu'sa' tundymeena, naasáa Dyus Espiritu yuurráana ūuste jyuca ji'pjuna nji'j tutyju yuu casejme. ¹⁶Sa' Israel quiwesuwe'shtyi maanzcuēesatyva taqui'sa Dyus tashtey qui' cuutya'jana. ¹⁷Tyāa Juana' Dyus Nchi'c yatste pecūjuna, sa' Dyus yuwe pta'shsa Elias Espiritu quījteva ājawa'jsa's

ji'pju'c tyā'sna írráa ji'pjuna. Tyāasa neywe'shtyi luuch yacj caapui'jmée caafi'nzel'jena, sa' nwēesē'jsameetyva nwēesē'jya' caapiya'jana. Tyā'wē yūuna nasaty pjeu'juna Dyus Nchi'ca's jypa'gacajn jite', ¹⁸Zacarias'a' na'jīnac pējy:

—Cue'sha' ptamfi wala tjē'jyā'tja'w, atsa' ¿ma'wē yūurra iindy tyā'jīni' cytey yuune'tjeva ew jii neeyūuqui'tj? jīc. ¹⁹Atsa' Dyus angela' pta'shcu:

—Andya' Dyusna selpiina fi'nzesa Gabrieltju. Tyāa pa'gac andya's jycaaj, indya's naa yuwe ewsa's pta'shcain. ²⁰Nava andy pta'shni's tyā'wē dyij yuuna sūjmeeng naa pa'ga āchjīi we'weya' ewumée neeyūune'nga iindy nchi'c upypcach jīc.

²¹Dyuus yat dyiite tyā'wē jytjēeyūute', ecaju nasa yu' Zacarias'a's ūytjasnaty ūsu', ¿quij yuurraqui'c tyacue jytjēeyūu? sūjna. ²²Tyājū' Zacarias'a' casejrra', we'weya' ājāmeerra', cuseju vijyarrarráac cjiyu'ju'. Atsa' tyā'wē yūute', dyuus yat dyiite quija' uyyujne' sūjū'ty nasa yu'. Sa' Zacarias'a' tyā'wēesa neeyūuc.

²³Dyuus yatte selpiina jyā'jrra', Zacarias'a' tyajy yatna u'cj. ²⁴Tyāa ensu' Zacarias nyu Elisabetja' nasa ji'pj neeyūurra', tyajy yatu casejmeec u'pu' tajts a'tepcach, naa sūjna: ²⁵Āchja' ū'cue Dyusa' na'wēc yūu, atsa' nasa' ū'cue's peena yu' atsewe'wemeetyna sūjna.

Jesus upywa'ja's pta'shni

²⁶Elisabetja' nasa ji'pj neeyūuni seis a'teju', Dyusa' angel Gabriela's Galileasu teech chjamb Nasaret yaasesatec caaj, ²⁷teech cna'sa Maria yaasesa yatte pa'jrra' yuwe pta'shcain. Tyāa cna'sa yu', teech pitstjē'j Jose yaasesa yacj iimi'ya' puuty we'werrac u'p yu'. Tyāa Jose' jycaajsa David ji'cj yu'. ²⁸Atsa' Dyus angela' Maria u'pnite pa'jrra' na'jīc:

—Dyusa' ijcha yacj ūsa', naa pa'ga Dyus bendiciona's maa maa u'yteva jytjaacue jypa'garra u'pi'cha. Tyāasa wechana me'pchi ewrráa jīte', ²⁹Maria' Dyus angel we'weni's wēsē'jrra tjengrra', cujc yajcy ¿ma'wētequi'c tyā'jī'? sūjna. ³⁰Atsa' Dyus angela' na'jīc:

—Maria, ūucjnuch, Dyus peeygāanisa i'cha. ³¹Tyāa pa'ga āchjīi teech luuch pijts ji'pj neeyūurra tyā'sa' Jesus yasene'chca. ³²Tyāa luucha' jytujtje walasa yuuwaj'sa'. Tyāasa cielute Dyus Nchi'c ya'cysusuna. Atsa' tyā'sa' Dyusa' jycaajwa'jsa vituna, yatsgatjē'j David na'wēysa. ³³Cyaj Israelwe'shtyi quiwey jycaajana, nava tyajy jycaajni' bagachte yujva ptsumeena jīc.

³⁴Tyājū' Maria' tyāa angela's pējyuc:

—¿Ma'wē tyā'wē yuja' yūucy? Ū'cue' cna'sa nmi' ji'pjmeetj atsyuja' jīte', ³⁵angela' na'wēc pta'sh:

—Dyus Espiritu' icha cacue's tyāarrarráa jyuca iiyamuna. Tyā'wē yuuniterráa nasa vyaana. Tyāa pa'ga luuch upysa' Dyus jīi yuuna, sa' Dyus Nchi'c ya'cysusuna. ³⁶Tyā'wēy icha pucacjē nyacj Elisabetja' luuch pijts ji'pjuya'va', tjē'cjuē yā'jrrava. Bagach yujva nasa ji'pjusameerrava, āchja' seis a'te yā'j yuutsa' nasa ji'pjuni. ³⁷Dyus yacja' quij yujva tjēysa yu' meea' jīna pta'shte', ³⁸Maria pasrra':

—Tyā'wē', ũ'cue' Dyusna selpisáa ne'tca, atsa' ũ'cue's Dyusa' cytey yuuna na'wēng pta'sh tyā'sa' jīc.

Tyajū' Dyus angela' Maria tashu tyuteena u'cj.

Elisabet tashna Maria u'jni

³⁹Tyāa ensuy Maria' jytjēeyūumée u'cj Judea tjā'jsu teeche chjamb ũsu'c cytee pa'jya'. ⁴⁰Sa' Zacarias yatte pa'jrra', Maria' Elisabetja's wechac. ⁴¹Maria wechana we'weni's wēsē'jetspcachja', Elisabet nasa tutyjtewe'sha' ēšēc. Naapcachja' Dyus Espiritu' Elisabet ũuste jyuca caajiyu'cj. ⁴²Atsa' Elisabetja' Maria's na'jīnac sus we'we:

—Dyusa' ijcha's maa maa u'yteva jytjaacuec bendecīy, sa' tyā'wēycu icha nchi'ca'sva bendecīy. ⁴³Atsa' ũ'cue' ¿quijte seelpitca atsga ũ'cue's Nwe'wesa njī'ja' tjengya' pa'jā'? ⁴⁴Icha wechana we'weni's wēsē'jetspcachja', ũ'cue luuch tutyjtewe'sha' ēšēc wechana. ⁴⁵Dyus we'weni' cytey yuuna sūjpa'ga, cytey yuuya'va' atsa' wechana mfi'nzech jīc. ⁴⁶Atsa' Maria we'werra':

Ū'cue' ũusuj jyucatj Dyusa's wechā'.

⁴⁷Sa' ũ'cue Dyus nwe'wesa's ũuste pechcanameetj wechana fi'nze'.

⁴⁸Tyā'wē macue pytjaa ājmeecuēteva, Dyusa' peeygājrra tyā'sna selpiwa'jsa vitcu.

Atsa' āchjūyā'ja' ũ'cue's Dyus tyjityjnisac yu' jīna nes yuutyna maa nasava jyuca.

⁴⁹Tyā'wē yaacycajnīrrāac Dyus tyacue walasa ũ'cue's tyacue ew yūu. Tyā' wala peeygāasa'.

⁵⁰Tyāasa maava tyā'sna nwēesē'jsatyī' bagachteva peeygājna nes yuuna.

⁵¹Dyusa' quījquīnava jyucac vit, sa' ũuste iwejch yaacysatyva cpaasu'jme'.

⁵²Jycaajsatyva tyāawe'sh jycaajnijū cutyi'cj,

Sa' quījteva ājmée pytjaacuēsatyī' walasac vit.

⁵³Quījva jī'pjmée peejiina fi'nzesatyī' tyāawe'sh peejiini's jyucac ũs.

Sa' wala jī'pjsa yuutyī'sa' quījva jī'pjmeec nvijt.

⁵⁴Tyā's selpisáa Israel nasatyī' pu'chcu,

Sa' peeygājna fi'nzewa'ja's pechcaname'.

⁵⁵Ma'wēne' cue'sh yatsgawe'sh Abrahanwe'shtyi bagachteva ew yūuya' neeyūu, tyā'sa' cyteycu yuu jīc.

⁵⁶Tyajū' Maria' Elisabet yacj tecj a'te u'pprac tyajy yatnay qui' shawendna u'j.

Juan Bautista upyni

⁵⁷Tyāa ensu' Elisabet ātsā'walj ājte', luuch pijts jī'pjuc. ⁵⁸Atsa' Elisabet nwe'sh vite' namicuwe'shva jiyurra', wechaya' u'jty Dyusa' Elisabetja's tyā'wē ew yūupa'ga.

⁵⁹Tyajū' teeche qui'sute', luucha's circuncidāyya' u'jty. Sa' ney yase Zacariastyi qui'p wēe. ⁶⁰Nava njī'j we'werra':

—Tyā'wēmée wejyva Juan yasewa'ja' jīte', pi'cyna u'jsawe'sh pasrra':

61 —I'cue nwe'sha' maa yujva Juan yaasesa meety yu' atsa' ¿ma'wētecue Juan yase qui'p wējē'? jī'ty.

62 Tyajū' neya's pējtyi ma'wē yasewa'tjeva. 63 Atsa' neya' Juan yasewa'ja' jīnac fi'jrra ūs. Tyā'wē yūute', jyucaysa cujty yajcyna neeyūu.

64 Tyāa dundtey Zacarias qui' we'weya' ewuurra', Dyusa's seena' wala wechac. 65 Tyā'wē yūute', cysū utyasū u'psa' wala ūucj we'wena neeyūuty. Atsa' Judea tjā'jsuwe'shva tyā'wē yūuni's jyuca jiyuty puuty ya'pta'shna. 66 Tyā'wē jiyurra', na'wēty yajcyna puuty paapēyī':

—Isa, tyāa luucha' Dyus bendecīynisane' yu' sa' ¿ma'wē yūuwa'jsacy? jī'ty.

Zacarias's Dyus Espiritu cwe'we'jni

67 Tyajū' Juan ney Zacarias's Dyus Espiritu tyajy ūuste cwe'we'tje', na'jīnac āate pta'sh:

68 Israelwe'shtyi jype'jsa Dyusa' quījteva jyuca ewsa'.

Cue'sha' tyajy nasatja'w, atsa' nwe'weya' quījrra', ewte nvijtcu.

69 Dyusna selpisāa David jī'tjewe'sh teeche caacj quījteva jyuca nwe'weya' ājāwa'jsa.

70 Nyafiitey Dyus yuwe pta'shsawe'sh yacjva na'wēc puuty we'we nwe'weya' caajwa'ja's:

71 Cue'shtyi atsesawe'sh cuseju nwe'werra ewte nviitu'nja,

72 Sa' cue'sh yatsgawe'shtyiva peeygājna, tyā'wē andy puuty we'weni yuutyi' le'chcuērrāa yujva pechcaname'nja jī'c.

73 Sa' cue'sh yatsgawe'sh Abraham yacjva tyā'wēycu na'wē puuty we'wena jurāy:

74 Cue'shtyi atsesawe'sh cuseju nwe'werra ewte nviitu'nja, atsa' ūucjmée mselpiwe,

75 Andy yuurráana nwēesē'jna uu entepcach jī'c.

76 Atsa' andy nchi'ccuē indya' Dyus ītyīsa yuwee pta'shsa yuurra, cue'shtyi Nwe'wesa pa'jwa'ja's pjeu'jna pecūjune'nga yatste.

77 Cyaj nasa' pcalpa'ga peltunāywa'ja's maava jiyurra, ewte neeyūuwa'ja's jī'pjutyna.

78 Cue'sh Dyusa' peeygājrra, cielujuy sec na'wē caacweetje'cj,

79 Chji'ndyte uu ente na'wē yā'j ūsteva, wēt eena'te nvijt-ya'.

Sa' cue'shtyiva jypumbamée ewte caafi'nze'jya'c tyā'wē yūu jīnac we'we Zacarias'.

80 Tyajū' Juana' walaana u'cj Dyus yuwe's jiyuna, sa' nasa u'pnimée quiwesuc u'p-ya' u'j, Israelwe'shtyi pta'shya' casejwa'j en ājpcach.

Jesus upyni

(Mt. 1.18-25)

2 ¹Tyān ensu' Romate jycaajsa Augusto Cesara' tyajy jycaajni quiwesu nyafyrraj nasaty jyuca etste āshcain jycaacj, ²Siriate u'psa nel'jue'sh Cirenio

yaasesa's. ³Atsa' jyucaysaty u'l'wa'l' ji'pju' tyāawe'sh upyni chjambte, etste āshcajn. ⁴Tyāa pa'gac Jose' Nasaret chjamb Galilea quiweju casejna u'l' Judea quiwen Belen chjamb David upynite, Jose' David ji'cj yu' naa pa'ga. ⁵Belenna u'l'juetsrra', tyajy nyu yuuwa'jsa Maria yacju u'l'. Nava Maria' nasac ji'pj yu'. ⁶Atsa' Belente ūsŷyna, Maria's ātsā'wa'l' en ājte', ⁷cytee ji'pjuc nyafy nchi'ccuē's. Sa' paandeewa'l' yat ājmeete', claa sāl'jini yattec luuchcuē's yaprra cji'cj.

Dyus angel piishāa-tjengsawe'shtyi we'weni

⁸Belen utyasu cusva dejméety piishāa-tjengsa u'p yu'. ⁹Naapcachja' Dyus angel teech vyaac tyāawe'sh u'pnisu jyuca eena' cweetjna. Atsa' tyāawe'sha' wala ūucjtyi. ¹⁰Nava Dyus angela' na'wēc we'we:

—Ūucjnuwe, yuwe ewsa jyūna yujtj, tyā'sa' maava jyuca wala wechaatyna. ¹¹Āchja' David chjambte teech upycu i'cue'shtyi nwe'wewa'jsa tyā' Dyus caajni Cristo'. ¹²Atsa' tjengya' u'l'jrra', uyuune'cue luuchcuē's yaprra claa sāl'jini yatga cji'cjni ūste jitspcachja', ¹³tyāa dundtey tyāa angel yacj wala cuj angel cielujūwe'sh vyaaty, Dyusna wechana:

¹⁴¡Dyus ēe walatewe'sha' seena' yuj ew yuuc!

Naa quiwete nasa wētwwēt fi'nzewa'ja's ūscu peeygājrra jī'ty.

¹⁵Tyājū' angesewe'sha' cielun qui' shawendna u'l'juetspcachja', piishāa-tjengsawe'sha' puuty we'wety:

—Belenna u'l'juega Dyus pta'shni's tjengya' quīj yūuteva uyu'nja'w jīna.

¹⁶Tyājū' wala dund u'l'jty Belenna, sa' Mariawe'shtyi' uytyi tyā'wē luuchcuē's claa sāl'jini yatga cji'cjrra u'pte. ¹⁷Sa' luucha's uyrra', Dyus angel ma'wē we'weni'sva jyuca pta'shtyi Mariawe'shtyi. ¹⁸Tyājū' vitetyva tyā'wērrarrāa pta'shte', wala cuj we'wena neeyūuty. ¹⁹Nava Maria yu', tyā'wē yūuni's jyuca pechcanamée ūusterrāac yajcyna fi'nze'.

²⁰Tyājū' piishāa-tjengsawe'sha' Dyus angel ma'wē pta'shteva tyā' cytey yuuteva uyrra', Dyusa's wala wechana shawendna u'l'jty.

Jesus le'chcuēyna Dyus yatna jyūna u'l'jni

²¹Upynijū teech qui'sute' luuchcuē's circuncidāyya' u'l'jrra tyāa entey JESUS yasety, Maria nasa ji'pjumeyna Dyus angel ma'wēne' yase's pta'sh tyā'wētyi yase.

²²Moises leya' nasate ātsā'saty ma'wēne' qui'scaja' atsa' Maria' tyāa entyi cytey yuurra', Jose yacj luuchcuē's Jerusalen chjambna jyūna u'l'jty, dyuus yatte Dyusna wechana neewe'weya'. ²³Dyus leyte we'werra': Nyafyte pitscuē yūute', Dyus jīi nviitwa'ja' jī'c tyāa pa'gaty Dyusna neewe'weya' u'l'. ²⁴Vite ajte Dyus leyte we'werra': e'nz tumb chijme meerrava tumb luuch jyūna u'l'jrra dyuus yatte icjwa'ja' jī'c atsa' tyā'wēy yūuya' u'l'jty.

²⁵Tyān ensu' Jerusalen chjambte' teech pitstjēlj Simeon yaasesac u'pu'. Tyāa pitstjēlj'ja' Dyusna yuurráac neewe'wena fi'nzesa yu', ħbagach Israelwe'shtyi



(San Lucas 2.7)

nwe'wewa'jsa paljacy? sūjna ūytjāsna. Atsa' Dyus Espiritu' Simeona's caajiyu'cj
 26 Nwe'wewa'jsa Dyus caajni Cristo's uumey uywa'ja's. 27 Sa' Dyus Espiritu'
 Simeona's caayaquil'cj dyuus yatna u'jwa'ja's, atsa' u'jrra' uycu tyā'wē Jesus
 nji'jwe'sha' Dyus ley jycaajni's cytey yuuya' Jesusa's nuypaljatste. 28 Atsa'
 Simeona' tyāa luuchcuē's yacjrra na'jīnac Dyusna wecha:

29 Indya' andy yacj puuty we'weni's cytey yuung na' āchjā' andy
 uuwa'ja's ūsune'nga wechana uucajn.

30 Nwe'wesa's nasa jyucaysa dyi'pte caang.

³¹ Atsa' tyā'sa' andy yafyju yuu uytju.

³² Tyāaí Israel nasa meetyva eena' cweetjwa'jsa' na' Israelwe'sh yuutyi' jweefírráa wechwecha caayaqui'jwa'jsa' jī'c.

³³ Simeona' tyāa luuchcuē's tyā'wē we'wete', Jose ptamwe'sha' cujty yajcyna neeyūu. ³⁴ Atsa' Simeona' bendecíyrra', Jesus njī'j Maria's pta'shcu: —Mwēesē'ch, naa luuchcuē' Israelwe'shtyi wala cchjāachja'jwa'jsa' nava tyā'sna jiyusamée yu' wala jypumbawa'jsata'. Mpa'yajcye vacy tyā'sa' wala atsetyna. ³⁵ Atsa' maarraj tyā'wē atsewa'jsatyna atsa' maarraj tyā'wē jypa'gawa'jsateva tyā'wē yūunisa icha ūusuy we'tju yājāni na'wē yuuna jīc.

³⁶ Cyteea' Fanuel niisa, Aser ji'cj ūsu' wala tjē'cjuēsa Ana yaasesa. Tyā' Dyusna selpisaac yu' sa' wala cna'satey iimi'c nava siete añute' nmi'a' uuc. ³⁷ Āchja' nmi' uuni ochenta y cuatro añu', nava dyuus yatte pu'vitumée een isac Dyusna selpiina, orāyna nes yu'. ³⁸ Sa' Ana' utyaana cūjrra, Dyusna wecharra' pta'shcu Israelwe'shtyi nwe'wewa'jsa's ūytjāsna ūssawe'shtyi's: Naa luuch tyā'wē yūuwa'jsa' jīna.

Nasaretna shawendni

³⁹ Tyajū' Dyus jycaajni leya's cytey yuurra', Galilea quiwesu tyāawe'sh chjamb Nasaretnay Maria Josewe'sha' shawendtyi. ⁴⁰ Atsa' luuchcuē' walaana u'cj Dyus yuwe's jweefírráa piyana, tyā'sa' Dyusí pu'chji'ne' naa pa'ga.

Jesus doce añu ji'pjrra Jerusalenna u'jni

⁴¹ Jesus njī'jwe'sha' añu iisaty Jerusalen chjambna Pascua fiestan u'jue'. ⁴² Sa' Jesus doce añu ji'pjpcachja', Jerusalen chjambna fiestate qui' u'jty, ma'wēne'ta añu iisa u'jue' tyā'wēy. ⁴³ Atsa' fiesta ptsuute', Maria Jose yacj shawendna u'jty. Sa' tyāawe'sh jiyunimeete Jesusa' Jerusalentee neeyūuc. ⁴⁴ Nava njī'jwe'sh yu', Jesusa' nasa wala cshavyte yujna sūjnarráaty teen uta dyi'tje u'j. ⁴⁵ Tyajū' nwe'sh cshavysu jyuca pacuerrava uymeerra', Jerusalen chjambnay pacueya' shawendtyi. ⁴⁶ Sa' tecj ensu' dyuus yatte ley caapiya'jsawe'sh cshavyte wēsē'jna paapējyna u'ptety uy. ⁴⁷ Tyā'wē luuchcuērráarrava tyacue wala leya's jiirra ew paste', jyucaysa cytee wēsē'jna ūssa' wala cuj yaaqui'ty. ⁴⁸ Tyajū' njī'jwe'sh uyrra', cujty yajcy sa' njī'ja' na'jīc:

—Indya' ¿quījya'nga pta'shmée tyā'wē neeyūu? Cue'sha' wala ñusna pacuetja'w jīte', ⁴⁹ Jesus pasrra':

—Andya' Andy Tata jytjāasnírrá's selpiina u'ptju atsa' ¿quījya'cue andya's pacué'? jīte', ⁵⁰ tyajy pasni'sa' jiyuya' ājāmeeta'.

⁵¹ Tyajū' Jesusa' neywe'sh yacj Nasaretnay shawendna u'jrra tyāawe'shtyi nwēesē'jñac fi'nze. Atsa' tyajy njī'ja' ma'wē we'weni'sva jiyumeerrava tyajy ūuste pechcana yu' meec yajcyna fi'nze'. ⁵² Tyajū'

Jesusa' walaana u'cj Dyus yuwe's jweefirraa piyana, sa' Dyus dyi'pte ew yuurrac fi'nze, nasaa dyi'pteva tyā'wēy.

Juan Bautista nasa u'pnimée quiwesu Dyus yuwe's pta'shni
(Mt. 3.1-12; Mr. 1.1-8; Jn. 1.19-28)

3 ¹Tiberio Cesar Romate jycaajna u'pni quince añusu' Poncio Pilato' Judeate ne'jue'shcu yu' atsa' Herodesa' Galileate ne'jue'shcu yu'. Naapcachja' tyajy nyacj Felipe' Iturea vite' Traconitete ne'jue'shcu yu'. Atsa' Lisaniasa' Abiliniate ne'jue'shcu yu'. ²Naapcachja' sacerdote npiitstjēj'jewe'sh yu' Anas vite' Caifas tyāawe'shtyi yu'. Tyān ensuc Dyusa' tyajy yuwe's nasa u'pnimeesu pta'shya' u'cjan pa'ya Zacarias nchi'c Juana's. ³Atsa' Juana' Jordan yu'wala utyasu msuu msuuva jyuca pecūjc nasaty pta'shna:

—I'cue'sh pcaltyi nvijtrra Dyus tashte shawendrra yu'te mcjēewe ya'bautisāyna, i'cue'shtyi Dyus peltunāycajn jī'c. ⁴Dyus yuwe pta'shsa Isaias na'jīna fi'jni' cytey yuuc:

Nasa u'pnimée quiwesu sus we'wenic ptjūuse' na'jīna:

Dyus pa'jwa'ja's mpjeu'jwe,

Tyā' tjēymée pa'cjan.

⁵Quiwe cafy u'psuva jyuca yuutawa'j yuuna,
Sa' tjā'j wala vite' vits ma'c yuu nava jyuca uucue'jni yuutyna.
Dyi'j ta'ngusava cu'le'jni yuutyna.
Dyi'j ewmeesa's pjeu'jni yuutyna.

⁶Atsa' nasa jyucaysa uyuutyna nwe'wewa'jsa Dyus caajnisas jīna fi'jni'.

⁷Juan tashte ya'bautisāyya' pa'jsatyī' na'jīnac we'we:

—I'cue'sha' ul weesweesa ji'ji'cue, tyāa pa'ga castigo seena'sa yuja' atsa' tyajū iyuwa'ja's ¿quimga pta'sh? ⁸Tyā'wē castigo seena'saju iyuwa'ja's jiyuyā'jrra', ewrrāa yūuna mfi'nzewe, cyaj maava uysa': Naawe'sha' pcaltyi nvijtrra Dyus tashte shawend yujta sūjūtyna. Tyā'jīte', cue'sha' Abrahan ji'tja'w sūjna iiwejech yajcyna fi'nzewa'jme'. Na'jī'tj na': I'cue'shrrāmée naa cuet yujtyva Abrahan ji'j vit-ya' ājāna Dyusa'. ⁹Tyā'wē ewrrāa yūuna fi'nzemeete', ama' ij yā'j ūsa' fytūu tashtyi spē'tjya'. Maa fytūu tashva ew yūnmeena atsa' spē'tjrra ipyte cambwa'jrrāa yuuna jīnac yu'cypej.

¹⁰Tyā'jīte' nasa' paapējtyi:

—¿Quijrra yūuna ewrrāa fi'nzecytja'w? jīte', ¹¹Juan pasrra':

—E'nz atyj ji'pjrra', ji'pjmeesa'sa' teeche ūswa'ja'. Atsa' ū'niva jytjaacue ji'pjrra', vite ji'pjmeesa's puutswa'ja' jīc.

¹²Tyā'wēy gobierno jīi vyu pcjacjsawe'shva yu'te ya'bautisāyya' utyaarra', Juana's na'wēty paapējy:

—Mpeeta'sh, cue'sha' ¿ma'wē yūuna fi'nzecytja'w? jīte', ¹³Juan pasrra':

—Ley macuene' vyu's pēycaja' tyā'srrāana mpējywe, īshīrra tjaacue pējmée jīc.

¹⁴Tyajū' soldauwe'shva maaí yū' tyā'wēy pējtyi:

—Cue'sha' ħma'wē yūuna fi'nzeczytja'w? jīte', tyāawe'shtyiva pta'shcu Juana':

—Maa nasa yujtyva juuna' we'werra tyāawe'sh jīity cusa'jnuwe quīj yujnava. Sa' quīj yujva yuuwemeeteve īshīrra pāatyjī'cjna fi'nzenuwe. Sa' i'cue'shtyi macue deweteve tyāa yacjrrāa wechana mfi'nzewe.

¹⁵Tyā'wē we'wena ūste', nasa wēsē'ljsa yu' wala yajcyna ūsu'ty: Meerra' ħnaa vāa Cristona? sūjna. ¹⁶Atsa' Juana' jyucaysaty pta'shcu:

—Andya' bautisāyna naasāa yu'terrāatj acje'. Nava andy e'suj vite yuja', tyā' Dyus Espiritu ipy na'wēsa's i'cue'sh ūste cyu'acje'lja' ājāwa'ljsa'. Atsa' andya' tyaj pelgatyī wesrrāa yujtyva cijimbya' ājāwa'lmeesatj. ¹⁷Tyā' yujya' scuutyj cweejya'ljni plaatu's cuse te at yā'jrra ūsa'. Sa' cweejya'ljrra scuutyja's jyaawuuna, nava tama'sa' ipy bagachte yujva ūchjawa'lmeesate cambuna jīc.

¹⁸Tyā'wēc wala cuj jwend yu'cypejna Dyus yuwe's pta'shi' Juana'.

¹⁹Sa' ne'ljue'sh Herodesa'sva yu'cypejc tyā'wē nyacj Felipe nyu Herodiasa's cusa'ljrra, tyāa yacj nyu na'wē fi'nzerra vite' quījva ewmeerrāac yūuna ūsu'. Atsa' tyāa pa'gac tyā'wē yūuwa'ljme' jīna yu'cypej Juana'. ²⁰Nava Herodesa' nwēesē'ljepcachte jwee'fīrrāac tjaacue ewmēe yūu, Juana's carcelte caacyuupja'ljna.

Jesus ya'bautisāyni (Mt. 3.13-17; Mr. 1.9-11)

²¹Tyā'wē yūumeyna Juana' nasaty yu'te bautisāyna ūste', Jesusva pa'ljrra yu'te ya'bautisāycu. Sa' oraītpcachja', cielu' pjaatec. ²²Atsa' Dyus Espiritu' Jesus cajcuete tumb chijme na'wēsac vyaana quīj. Naapcachja' cieluju na'wē we'wenic ptjūuse:

—Indya' andy Nchi'c wala wendynisang, atsa' iindypa'ga wala wechana ūstju jīni.

Jesucristo ji'j nyafiiteywe'shtyi pta'shni (Mt. 1.1-17)

²³Jesusa' treinta aṇu ji'pjrrac Dyus yuwe's pta'shya' tacj. Jesusa' Jose nchi'ca' jīnisac yu'. Josea', Eli nchi'ccu yu'. ²⁴Elia', Matat nchi'ccu yu'. Matatja', Levi nchi'ccu yu'. Levia', Melqui nchi'ccu yu'. Melquia', Jana nchi'ccu yu'. Jana', Jose nchi'ccu yu'. ²⁵Josea', Matatias nchi'ccu yu'. Matatiasa', Amos nchi'ccu yu'.

Amosa', Nahum nchi'ccu yu'. Nahuma', Esli nchi'ccu yu'. Esli', Nagai nchi'ccu yu'.

²⁶Nagaia', Maat nchi'ccu yu'. Maatja', Matatias nchi'ccu yu'. Matatiasa', Semei nchi'ccu yu'.

Semei', Jose nchi'ccu yu'. Josea', Juda nchi'ccu yu'. ²⁷Juda', Joana nchi'ccu yu'.

Joana', Resa nchi'ccu yu'. Resa', Zorobabel nchi'ccu yu'. Zorobabela',

Salatiel nchi'ccu yu'. Salatiela', Neri nchi'ccu yu'. ²⁸Neri', Melqui nchi'ccu yu'.

Melquia', Adi nchi'ccu yu'. Adi', Cosam nchi'ccu yu'. Cosama', Elmodam nchi'ccu yu'.

Elmodama', Er nchi'ccu yu'. ²⁹Era', Josue nchi'ccu yu'. Josue', Eliezer nchi'ccu yu'.

Eliezera', Jorim nchi'ccu yu'. Jorima', Matat nchi'ccu yu'. ³⁰Matatja', Levi nchi'ccu yu'.

Levia', Simeon nchi'ccu yu'. Simeona', Juda nchi'ccu yu'. Juda', Jose nchi'ccu yu'.

Josea', Jonan nchi'ccu yu'. Jonana', Eliaquim nchi'ccu yu'.

³¹Eliaquima', Melea nchi'ccu yu'. Melea', Mainan nchi'ccu yu'. Mainana', Matata

nchi'ccu yu'. Matata', Natan nchi'ccu yu'. ³²Natana', David nchi'ccu yu'. Davida', Isaí nchi'ccu yu'. Isaía', Obed nchi'ccu yu'. Obeda', Booz nchi'ccu yu'. Booza', Salmon nchi'ccu yu'. Salmona', Naason nchi'ccu yu'. ³³Naasona', Aminadab nchi'ccu yu'. Aminadaba', Aram nchi'ccu yu'. Arama', Esrom nchi'ccu yu'. Esroma', Fares nchi'ccu yu'. Faresa', Juda nchi'ccu yu'. ³⁴Juda', Jacob nchi'ccu yu'. Jacoba', Isaac nchi'ccu yu'. Isaacja', Abrahan nchi'ccu yu'. Abrahana', Tare nchi'ccu yu'. Tare', Nacor nchi'ccu yu'. ³⁵Nacora', Serug nchi'ccu yu'. Seruga', Ragau nchi'ccu yu'. Ragaua', Peleg nchi'ccu yu'. Pelega', Heber nchi'ccu yu'. Hebera', Sala nchi'ccu yu'. ³⁶Sala', Cainan nchi'ccu yu'. Cainana', Arfaxad nchi'ccu yu'. Arfaxada', Sem nchi'ccu yu'. Sema', Noe nchi'ccu yu'. Noe', Lamec nchi'ccu yu'. ³⁷Lamecja', Matusalen nchi'ccu yu'. Matusalena', Enoc nchi'ccu yu'. Enocja', Jared nchi'ccu yu'. Jareda', Mahalaleel nchi'ccu yu'. Mahalaleela', Cainan nchi'ccu yu'. ³⁸Cainana', Enos nchi'ccu yu'. Enosa', Set nchi'ccu yu'. Setja', Adan nchi'ccu yu'. Adan yu', Dyus cuseju yuu pjeul'nisac yu'.

Echtjê'j Jesusa's îshii wëeni

(Mt. 4.1-11; Mr. 1.12-13)

4 ¹Dyus Espiritu Jesusa's jype'jya' jyucate vyaanijû', Jesusa' Jordan yu'walaju casejc, atsa' Espiritu' pe'jna u'cj nasa u'pnimeesu. ²Cyteea' cuarenta en quîj yujva û'mée u'prra', wëec. Atsa' echtjê'ja' pa'cj ewmée vit wëerra. ³Sa' pa'jrra na'jîc:

—Dyus Nchi'c dyijrra', naa cueta's pan myuucacj jîte', ⁴Jesus pasrra':

—Nasa' pan yacjrráa yu' îtyî fi'nzemeetyna, naasáa jyuca Dyus we'weni yacj yuurráa îtyî fi'nzetyna jîna fi'jni ūsa' Dyus librute' jînac pas.

⁵Tyajû' echtjê'ja' teech tjâ'tje Jesusa's pe'jna u'jrra', tyâa vitsu mtee mtee chjamb walatyva caavya'ja'jrra, ⁶na'jîc:

—Naa chjambtyi pety quiwe quîjquîjtyva jyuca indyrrarrá's ūsu'nja. Na' jyuca andy cuseterrarráa ducjnisata' atsa' maava andy wendynisa yu'sa' ūsurrá'nja. ⁷Indyva andy tashte peejyūcuerra neewe'wene'nga atsa', jyuca iindy jîirrraráa yuutyna jîte', ⁸Jesus pasrra':

—Indyna jype'jsa Dyusrrá's neewe'wewa'ja', sa' tyâarrá's selpiwa'ja' jî'c Dyus librute atsa' echtjê'j andy tashu me'j jîc.

⁹Tyâa e'su', echtjê'ja' Jesusa's Jerusalenna pe'jna u'jrra, dyuus yat êete caateca'jrra' na'jîc:

—Dyus Nchi'c dyijrra', cute ayjyu mûpj quiwecjê.

¹⁰Tyâa pa'gatey Dyus librute we'werra': Tyajy angeleswe'shtyi jycaajana indya's nwe'wecajn. ¹¹Atsa' angeleswe'sha' cuseste jypa'gatyna, iindy chinda cuette cpâ'yūucajmén jîte',

¹²Jesus pasrra':

—Dyus librute': Indyna jype'jsa Dyusa's jycaajwa'j ji'pjmeeng ji'c jîna paste',

¹³echtjê'ja' âjámée yâ'jrra', Jesusa's nvijtrra u'cj sa' manz en yu' vyaame'.

Galilea quiwesu Jesus mjiiya' tacjni

(Mt. 4.12-17; Mr. 1.14-15)

¹⁴Tyajũ' Jesusa' Dyus Espiritu jype'jni qui' Galileate shawendna pa'tje', tyāa quiwesu nasa' jyuca Jesusrrarrá'styi we'we' quĩjquĩva yũ'c jina. ¹⁵Tyajũ' Jesusa' judiwe'sh pcjaacjenisu Dyus yuwe's caapiya'tje', jyucaysa wala wechana tuutje'je'ty.

Jesusa' Nasaretna u'jni

(Mt. 13.53-58; Mr. 6.1-6)

¹⁶Tyajũ' Jesusa' Nasaretnac u'j, tyajy walaní chjambna. Sa' cyte pa'jrra', sapatu jycaase ensu' ma'wēne' yũ' tyā'wēy, judiwe'sh pcjaacjenite u'carra yujuc Dyus libru's lēeyya'. ¹⁷Atsa' Dyus yuwe pta'shsa Isaías libru'styi ũs. Atsa' na'wē fi'jnicjēc libru's pjaande:

¹⁸Dyus Espiritu' andy yacj ũsa',

Tyāasac andya's tyjityj yuwe ewsa's puuplety pta'shcajn.

Ūste ñusna u'psatycu cviisha'jya' andya's caaj,

Yuuwesa preesuty nwe'wewa'ja'scu pta'shya' caaj,

Sa' uysameetyi' caauyu'jna,

Pcyuunisatyi' nwe'werra,

¹⁹Jyucasa wechana neeyũuwa'j añu āani's pta'shya'c caaj jini's lēeyrra', ²⁰Jesusa' libru's apjrra, judiwe'sh pcjaacjenite pu'chsa's ducjna'va, cachcu. Atsa' jyucaysa judiwe'sh pcjaacjenite ũssa' iviitumeety Jesusa's tjengna neeyũu ũytjāsna. ²¹Atsa' Jesusa' na'jīnac pta'sh:

—Na'wē fi'jnisa's wēsē'ji'cue tyā' āchjā' cytey yuuwa'j en ājc jīc.


²²Tyajũ' jyucaysa Jesusa's ewrráaty we'wena cuj yajcyna neeyũu, tyā'wē zhichcue pta'shte'. Sa' puuty paapēyi'ty:

—Naa pitstjē'ja' ¿Jose nchi'c meená'? jīte', ²³Jesus pasrra':

—Isa yuuva i'cue'sha' andya's naa sũjũ'ne'cue: Yu'tse'jsa, indyí mya'yu'tse'j. Sa' na'jīya'vane'cue: Capernaumte quĩjquĩva ew yũuc jini's wēsē'je'tja'w tyāaty' tyā'wēy myũu ayte iindy quiweteva jīya'vane'cue jīrra', ²⁴qui' we'wec:

—Isatj we'we': Dyus yuwe pta'shsa' peecy quiwesu' weechni yuurráa fi'nzetyna maava. ²⁵Dyus yuwe pta'shsa Elias ensu Israel quiwesu' wala cuj viuda ũsu'ty, na'wē tecj añu y medio nus pa'jmeete', wala wējē pa'cj tyāa ensu. ²⁶Nava Dyusa' Elias's cyanzcuē viuda tashsu jyuca yu' caajmēe, naasáa Sidon chjamb wala pucasu Sareptate teech viuda tashte yuurráac caaj. ²⁷Tyā'wēy Israel quiwesu' wā'jy weete wala ātsā'sa ũsu'ty, Dyus yuwe pta'shsa Eliseo ensu. Nava maa yujtyva nuycatyjimēe, naasáa Naaman Siria quiwetewe'sh yuurrá'scu nuycatyji jīte', ²⁸wēsē'jrra', judiwe'sh pcjaacjenite u'psa' wala ũusachana, ²⁹quiiterra Jesusa's chjambuj cutyi'jty. Tyāa chjamb Nasaret yu', tjāl'j vitsgac ũsu', atsa' tyāa peña vitsujty ucapajcyya'va yu'.

³⁰Nava Jesusa' tyāawe'sh cshavysu uymeyna scjēwrra u'cj.



(San Lucas 4.19)

Ech iiyamunisa

(Mr. 1.21-28)

³¹ Tyajū' Jesusa' Galileate Capernaum chjambte pa'jrra', sapatu jycaase ensu' Dyus yuwe's pta'shna ūsu'c. ³² Atsa' nasa' wala kuj yajcyna wēsē'je'ty, tyā'wē Dyusa's nwēese'jwa'ja's ūucjnus pta'shpa'ga. ³³ Atsa' cyte judiuwe'sh pcjaacjenite teeche pitstjē'j u'pu'c, ech iiyamunisa. Tyā' suscu na'jīna we'we:

³⁴ —Jesus Nasaretjuwe'sh, cue'shtyi' ¿quījnga yūu wējē'? Cuch yuunu. Meerra' ¿iviituya'vangá'? Indy quimteva jiitj. Indya' Dyus caajnisang jīte', ³⁵ Jesusa' tyāa ech luucu vit-sa's juuna'c na'jīna we'we:

—Shuuna' myuu, sa' naa pitstjē'j ūusuj mcaasej jīte', tyāa echa' tyāa pitstjē'ja's nasaa cshavysu pētyrra tyajy ūusuj casejc quīj yujva cpā'vitmēe.

³⁶ Tyā'wē yūute', jyucaysa ūucjrra tyāawe'sh pwe'sh na'jīnaty puuty we'we:

—Jesusa' ¿quimqui saqui'c tyā'wē juuna' jycaajna we'weterráa ech yujva nwēese'jrra' caseje'? jī'ty.

³⁷ Atsa' Jesus tyā'wē yūuni's msuuva jyucaty wala tuutje'je' tyāa ja'ndasu.

Pedro nyu njĩ'ja's Jesus nuycatyjini*(Mt. 8.14-15; Mr. 1.29-31)*

³⁸Tyajũ' Jesusa' judiuwe'sh pcjaacjenijũ casejrra', Simon yattéc pa'j. Atsa' Simon nyu njĩ'ja' wala cacuesecte ätsã'na ũsu'c. Tyajũ' Jesusa's pytjaa we'wena pta'shtyi. ³⁹Atsa' Jesusa' ätsã'sa tashte cũjrra cacuesec ũchjacajn we'wec. Naapcachja' cacueseca' ũchjate', quiiterra selpiiya' casejc.

Jyuca chji'ndyitste maanzcuēesatyva nuycatyjini*(Mt. 8.16-17; Mr. 1.32-34)*

⁴⁰Tyajũ' sec cjējēstte', nasa quĩquĩj weeterraj ätsã'satyva jyuca Jesus tashte nuyapa'jty. Atsa' ätsã'sa cacuesu cuseju jya'ndyrrarráa jyuca nuycatyjic. ⁴¹Tyāa ätsã'sawe'sh maafi yu' ech luucu vit-sa's ũuste ji'pjteva tyāa echva sujs na'jĩna casejty:

—Indya' Dyus Nchi'cngu jĩna. Tyāawe'sha' Dyus Nchi'cteva jiity yu'. Nava Jesusa' juuna' we'werra jwee yu' cwe'we'jme'.

Galileasu Dyus yuwe's Jesus pta'shni*(Mr. 1.35-39)*

⁴²Cjiciitste', Jesusa' chjamb eca jyul' lajcysuc casej. Nava nasa' cyteeva pacuena pa'jty, vite ajsu u'cjamén neevishaya'. ⁴³Nava Jesusa' na'wēc pta'sh tyāawe'shtyi':

—Dyus jycaajwa'j yuwe's pta'shwa'j ji'ptju vite chjambsuva. Tyā'wē yũuya' íírráa caajnisatj jĩc.

⁴⁴Tyāasac Galilea quiwesu judiuwe'sh pcjaacjenisu Dyus yuwe's pta'shna pecũj.

Wendy ucjete wendy seena' wala cjēeni*(Mt. 4.18-22; Mr. 1.16-20)*

5 ¹Teech ente' Jesusa' Genesaret ícj pucate ũste', nasa' cytee zuuna'rráaty utana pa'j Dyus yuwe's wēsē'j wēerra. ²Tyajũ' Jesusa' e'nz barco ícj pucasu namu ji'pjmée ũstec uy, namu wendy-uwesaawe'sh yu' casejrra, wendy ucjety tjetjnaty ũs yu'. ³Atsa' Jesusa' teech barco Simon jĩite cjēerra', yu'te wejcuē u'jrrac, cytee cachrra, Dyus yuwe's pta'sh nasaty. ⁴Sa' Dyus yuwe's pta'shna jyā'jrra', Simona's na'jĩc:

—Barco's ícj wala pyājte pa'j jyũna u'jrra tycjēe ucje's macj wendy uweya' jĩte', ⁵Simon pasrra':

—Cue'sha' teech cus utatja'w mjĩina pe'te, nava teech wendyrráa yujva uwemeetja'w. Nava iindy jycaajni's cytey yu'nja jĩrra', ⁶cytey yuute', wendy wala cuj cjēety, atsa' ucje' suteetscu yu'. ⁷Tyajũ' vite barcote ũssaty pu'chya' yuucajn cuseju pa'yaty. Atsa' tyāawe'shva cũjrra', cashish pu'chrra tyāawe'sh jĩiteva äshtyi. Nava e'nz barcotey utarra dujuaate', ícj dyiicjē cjēeya'vaty yu'. ⁸Tyā'wē yuute', Simon Pedro' Jesus tashte peejyũcuerra na'jĩc:

—Andya' pcalsatj atsa' andy tashu mtyutéé jïc.

⁹Cyaanzcuêe wendy cjêete', Simon Pedro' wala ùucjrrac tyã'jî', atsa' nasa cytee ùssava tyã'wëtyi ùucj. ¹⁰Zebedeo nchi'cwe'sh Jacobo Juan tyãawe'sha' Simon yacj wendy uwe pu'chna u'jusaty yu' sa' tyãawe'shva tyã'wëtyi wala ùucj. Nava Jesusa' Simona's na'jïc:

—Ùucjnu, âchjÿyã'ja' peena yu' wendy uwen u'jumée nasaty Dyus jii pcjacjsa yuune'nga jîte', ¹¹barcoty ïcj pucatee jyuca nvijtna'va Jesus yacj u'jty.

Teech pitstjê'j wã'jy weete âtsã'sa's Jesus nuycatyjini

(Mt. 8.1-4; Mr. 1.40-45)

¹²Jesusa' teech chjambte ùste', teech pitstjê'j wã'jy wee seena' canzh ji'pjsac pa'j. Sa' Jesusa's uyna'va, quíitsjurra peejyücuec na'jîna:

—Andya's nuycatyjivá'nga ajtsemeerra' jîte', ¹³Jesusa' cuseju jya'ndyna'va, na'jïc:

—Ajtseme'nja, naa pa'ga catyjirra mneeyüu jïtspcachja', tyãa wã'jy weeju catyjirrac neeyüu. ¹⁴Atsa' Jesusa' na'wêc jycaaj:

—Maa yujtyva pta'shmeene'nga, naasáa sacerdoterrá's iindy cacue's tywesya' me'j. Sa' tyãa weeju catyjipa'ga Dyusna peesune'nga Moises ma'wêga jycaaj tyã'wëy, cyaj nasa jyucaysa jiyutyna indy ew catyjirra neeyüuteva jînac jycaaj.

¹⁵Tuutje'cjameeteva, nasa' jweeírráaty Jesus ew yûuni's tuutje'je'. Atsa' wêse'jya' wala pcjaacje'ty, âtsã'satyva quíj weejuva nuycatyjicajn. ¹⁶Nava Jesusa' nasa u'pnimeesu u'jrrac, Dyus yacj puuty we'we'.

Ësëya' âjasame's Jesus nuycatyjini

(Mt. 9.1-8; Mr. 2.1-12)

¹⁷Jesusa' teech chjambte Dyus yuwe's pta'shna ùste', cyteea' fariseowe'sh vite' Dyus leya's caapiya'jsawe'shva Galileaju Judeaju vite' Jerusalenu tyajüwe'sh pa'jrraty cysü cachrra u'pu'. Atsa' Dyus pu'chni yacja' Jesusa' âtsã'satyva nuycatyjîc. ¹⁸Tyajü' ësëya' âjásamee's yacjrra nuypa'jty. Sa' Jesus tashte pa'j nuycûj wëety. ¹⁹Nava nasa wala ùste', u'caya' âjámeerra yat êete tejcaraty tycjê nuyquíj âtsã'sa's Jesus ùsniçjê. ²⁰Tyajü' âtsã'sa's yacjsawe'sha' Jesusa' nuycatyjyujuna sÿjni's jiyurra', âtsã'sa's na'jïc:

—Iindy pcala' peltunäyni yã'jty neeyüu jîte', ²¹Dyus leya's caapiya'jsawe'sh vite' fariseowe'sha' ùuste na'wëty yajcyna u'pu': Naa pitstjê'ja' ¿quiimna saga Dyusa's iiweech we'wé'? Dyus yuurráa pcalty peltunäyya' âjawa'jsa', atsa' jweeju yu' ¿quimrrá' peltunäyya' âjāma'c? sÿjü'ty.

²²Atsa' Jesusa' tyãawe'sh ùuste yaacyni's jiyurra' na'jïc:

²³—¿Quij yûutecue tyã'wë yaaquí'? ¿Maa tjëymesacy? Iindy pcala' peltunäyni yã'jty neeyüu ¿jîniá'? Meerra': Quiiterra me'j ¿jîniá'? ²⁴Tyã'wë



(San Lucas 5.18)

tjēysateva Dyus Nchi'c Nasa Yuusá! naa quiwete pcaltyi peltunāyya' ājāwa'jsa! naa pa'ga caajiyu'jya'vatj āchja' jīrra', tyajū' tyāa ēšēya' ājāsameea's we'wec:

—Indya'stju we'we!: Quiittera iindy deeni's tu'srra yatna me'j jīte',
 25 dundtey tyāa ātsā'sa! quiitena' tyajy deeni's tu'srra yatna u'cj, Dyusna wechana tuutje'jna. 26 Jyucaysa cytee ūssa' wala cuj yajcyna we'wena, Dyusrrāanaty wechana tuutje'je' sa' tyā'wē ūucjnava na'jī'ty:

—Bagach yujva tyā'wē yūunisa yu'sa' iuumeetja'w jī'ty.

Mateo's Jesus pa'yani
 (Mt. 9.9-13; Mr. 2.13-17)

27 Tyāa scjēwa', Jesusa' casejrra', gobierno jīi vyu pcjacjsa Levi yaasesa's vyu pcjacjnite cachrra u'pte uyrra':

—Andy yacj myuj jīte', ²⁸Levia' quiitena'va quījnavá jyuca nvijtrra Jesus yacj u'cj.

²⁹Tyāa e'su', Levía' tyajy yatte fiesta wala ewsa vitcu Jesusa's pi'cyrra'. Atsa' cyte' gobierno jīi vyu pcjacjsawe'sh wala cujsa vite' nasa ma'wēsava Jesus yacj ij mesate cachtyi. ³⁰Atsa' fariseowe'sh vite' ley caapiya'jsawe'sha' Jesus yacj u'jusawe'shtyi' na'wēty atsewe'we:

—I'cue'sha' ¿ma'wētecue tyā'wē gobierno jīi vyu pcjacjsawe'sh yacj vite' pcalsawe'sh yacj ū'wē'? jīte', ³¹Jesus pasrra':

—Yu'tse'jsa's jypeejymeeta' aca ji'pjmée wēt ūssa', naasáa ātsā'sa yuurráa yu'tse'jsa's jypeejyta'. ³²Andya' nasa ewsaty pacueya' quījmeetj, naasáa pcalsaty pacueya'rráatj quīj, cyaj ewmée yūuna fi'nzeni's nvijtrra Dyus tashte shawenduutyna jīc.

Yūunani's Jesusa's pēyni

(Mt. 9.14-17; Mr. 2.18-22)

³³Tyājū' tyāawe'sha' Jesusa's na'wēty paapējy:

—¿Ma'wērrata Juan yacj u'jusa vite' fariseowe'sh yacj u'jusa tyāawe'sha' tajtatey yūunaana Dyus yacj puuty we'wena fi'nze'? Naapcachja' indy yacj u'jusawe'sh yu' yūunameety fi'nze' jīte', ³⁴Jesus pasrra':

—I'cue'sha' ¿ptamu en fiestate', pi'cynisatyi' caayūuna'jya' ājāma'cue, novio tyāawe'sh yacj nee ūsiite'? ³⁵Nava novio' tyāawe'sh tashu tyuteewa'j en pa'jana, tyājū isa yūunaatyna jīrra', ³⁶naa ejemplo's caaja'nda'jnc pta'sh:

—Ropa īish suteniite, tela u'sesa yacj ya'pā'cje'tsme'. Tyā'wēme' tela u'sesa' jweefirráac sunde' īishsa's. ³⁷Sa' tyā'wēy beca u'se aajni'sa's slun īishsate ya'awu'tsme'. Tyā'wēme' beca u'sesa' slun īishsa's sunde'c, atsa' beca yacj slun yacj e'nzīi vitu'ty. ³⁸Tyāa pa'ga beca u'sesa's slun u'sesate awwa'ja'. Tyā'wē yu', maa yujva vitumeetyna. ³⁹Atsa' maava beca jyaawni'sa's tundysa', beca u'sesa's yu' tundyya' wa'lu'c, jyaawni'sarráa jytjaacue ewa' jīrra.

Jycaase enteva scuutyjtyi chuctenderra ū'ni

(Mt. 12.1-8; Mr. 2.23-28)

6 ¹Teech sapatu jycaase ente', Jesusa' scuutyj ejsu u'juetste', tyāa yacj u'jusawe'sha' scuutyjtyi ūjndena nīnītyi sūupijrra ū'ty. ²Atsa' fariseowe'sh maafi yu' pējytyi:

—I'cue'sha' ¿mjīpa'gacue mjīi en meeteva tyā'wē yū'? jīte', ³Jesusa' na'wēc pas:

—I'cue'sha' Dyus librote iilēeymeevá'cue' Davida' ¿quījga yūu? tyāa yacj pi'cyna u'jusawe'sh yacj teeche ente' wēerra', ⁴dyuus yatte u'carra cytee pantyi ū'c, sa' tyāa yacj u'jusawe'shtyiva ūsu'scu. Tyāa pana' naasáa sacerdotewe'shrráa ū'wa'tje jiirrava tyā'wēc yūu. ⁵Atsa' Dyus Nchi'c Nasa Yuusaava macue sapatu jycaase enteva jycaajwa'j ji'pja' jīc.

Teech pitstjē'j patsu cuse undynisa

(Mt. 12.9-14; Mr. 3.1-6)

⁶Vite sapatu jycaase ensu', Jesusa' judiuwe'sh pcjaacjenite u'carra, Dyus yuwe's pta'shya' tacjcu. Atsa' cyte' teech pitstjē'j patsu cuse undynisac u'p yu'. ⁷Atsa' Dyus leya's caapiya'jsawe'sh vite' fariseowe'sha' Jesusa's peetjengu'naty ūsu' tyā'wē sapatu jycaase enteva nuycatyjite' pāatyjī'cjya' sūjrra. ⁸Nava Jesusa' peetjengu'sawe'sh tyā'wē ūs yaacyni's jiyurra', na'jīc tyāa pitstjē'j cuse undynisa's:

—Quiiterra, nasaa pyājte myuju jīte', tyāa pitstjē'ja' nasaa pyājtec yuju.

⁹Atsa' Jesusa' nasa cyte ūssaty na'jīc:

—I'cue'sh ¿ma'jīqui'cue? Sapatu jycaase enteva, pu'chte ¿ewmañ? meerra' ¿pu'chwa'jmeemañ? Nasa's nwe'wete ¿ewmañ? meerra' nwe'wemeete ¿ewmañ? jīrra', ¹⁰Jesusa' nasaty tjengrra', tyāa ātsā'sa's na'wēc jycaaj:

—Cuse's mcu'le'j jītspcachja' tyā'wēy yūute', tyajy cuse' ewuuc. ¹¹Nava vitesa yu' wala ūsachaty, sa' puuty paapēyi'ty: Jesusa's ¿ma'wē yūurra ewmeete nviitucytja'w? jīna.

Docesaty Dyus yuwe's pta'shya' caajni

(Mt. 10.1-4; Mr. 3.13-19)

¹²Tyān ensuy Jesusa' Dyusna pējyya' u'cj tjā'tje sa' teech cus utac Dyusna pējyna pe'te. ¹³Sa' cji'cyjna sējte', tyā'sna pi'cyna u'jusa cujsaty pa'yarra', doce nasa tyjityjcu tyajy jycaaj'waj'. ¹⁴Tyāawe'sha' naarrajty yu': Simon, tyā'sa' Pedro yasec qui'p. Vite' nyacj Andres, tyajū' Jacobo, Juan, Felipe, Bartolomé, ¹⁵Mateo, Tomas, Alfeo nchi'c Jacobo, Simon cananista nasa, ¹⁶Jacobo nyacj Judas, vite' Judas Iscariote, Jesusa's atsesawe'sh cuse te ducjwa'jsa.

Nasa seena' wala cujsaty Jesus caapiya'jni

(Mt. 4.23-25)

¹⁷Jesusa' tyāa yacj u'jusawe'sh yacj tjā'j vitsu jysa'jna quījrra', teech ajte tyactec yuju nasa wala cujsawe'sh yacj. Tyāa nasa' Judea quiwesuwe'sh, Jerusalen chjambuwe'sh, vite' īcj wala pucasu Tiro Sidon chjambuwe'shtyi Jesus pta'shni's wēsē'jya' pa'j, atsa' vite' ātsā'sa Jesus nuycatyjicajntyi pa'j. ¹⁸Sa' ech luucu vit-saty ūuste ji'pjsava Jesus cutyi'tje', catyjirraty neeyū'. ¹⁹Atsa' nasa jyucaysa cyte ūssa' Jesusa's jya'ndyya' wala pa'pchu'ty, tyā'wē jya'ndyrrarráa maava catyjitstety uyu', tyāasaty tyā'wēy yūu wējē'.

Wechana fi'nzewa'jsa vite' nūste pa'jwa'jsa

(Mt. 5.1-12)

²⁰Tyajū' Jesusa' tyāa yacj u'jusawe'shtyi tjengrra', na'jīc:

—I'cue'sha' quījva ji'pjmeerrava cuj yajcymée wechana mfi'nzewe, tyāa pa'gatey Dyus jycaajna ūsni' i'cue'sh jī' naa pa'ga.

²¹I'cue'sha' áchjíi yu' wēena ũsrrava wechana meswe, tyāa pa'gatey wala sã'jĩni yuune'cue.

I'cue'sha' áchjíi yu' ñusna ũsrrava wechana meswe, tyāa pa'gatey shijcana fi'nzewa'ja's jypa'gawa'jsai'cue.

²²I'cue'sha' Dyus Nchi'c Nasa Yuusa's nwēesē'pja'ga ewmeesatjas i'cue'sh yasety atsewe'wena tyāawe'sh tashu cutyi'jna tyā'wē yūutsteva, wechana mfi'nzewe. ²³Tyāniitey Dyus yuwe pta'shsawe'shtyiva tyā'wēty pcyuu na' áchva tyā'wēyrráa yuutyna. Nava ñusmēe wechana mfi'nzewe, tyāa pa'gatey cielute peesni's jypa'gawa'j ji'pji'cue.

²⁴Nava ji'pjsawe'sh áchjii wechana fi'nzeni ptsunijü', wala yuj ñuste pa'jane'cue.

²⁵I'cue'sha' áchjii' wēt tyicna ũsi'cue, nava e'su pytjaa yuj wējēne'cue. I'cue'sha' áchjii' shijcana ũsi'cue, nava e'su ñusna ũ'nene'cue.

²⁶I'cue'sh yu', áchjii yu' maa maa nasava ewrráa tuutje'jni fi'nzerrava, e'su ñuste neeyūune'cue. Nyafiiteyva Dyus yuwe's pta'shsatja'w jina ishĩina u'jusatyi' tyā'wēty ewsata' jina tuutje'je'.

Atsesaty peeygāawa'ja'

(Mt. 5.38-48; 7.12)

²⁷Nava ayte wēsē'jna ũssa i'cue'shtyi' na'wētj jycaaja': Puíi jypacuesatyi' mpeeygājwe. Atsesatyi' ew yūuna mfi'nzewe. ²⁸Ewmēe nuywe'wesatyi's ca'tu' ewrráa mwe'wewe. Wēeshusatyi' tyāawe'sh pa'gate Dyusa's mneewe'wewe. ²⁹Indya's pucacuetga pejtyate', ca'tuwe'sha'sva petyacajn mes. Maa' atyja's cusa'jatsyā'tje', puiimēe cmiisa yujnava mes. ³⁰Pe'wsa's mes, sa' iindy ji's cusa'jrra', ducjmeeteve pāatyji'cjna pēynu. ³¹Maa nasava i'cue'shtyi ewrráa yūuna fi'nze jytjāasrra', i'cue'shva tyā'wēy maa nasatyva ewrráa yūuna mfi'nzewe. ³²I'cue'shtyi peeygāasarráaty ca'tuva peeygājrra', ew yūusatja'w ¿jiya' ājāma'cue? Macue nasa ewmeesarrava tyā'wē peeygāasarráaty peeygājya' yu' ājā'ty atsa'. ³³I'cue'shtyi ew yūusarráaty ca'tuva ew yūurra', i'cue'sha' ew yūusatja'w ¿jiya' ājāma'cue? Macue pcalsarrava tyā'wē ew yūusarráaty ew yūuya' yu' ājā'ty. ³⁴Sa' i'cue'shtyi qui' caashwendu'jya' ājāwa'jsarrá's pqui'jrra', i'cue'sha' pu'chsatja'w ¿jiya' ājāma'cue? Macue nasa ewmeesarrava, tyā'wē caashwendu'jya' ājāwa'jsarráaty pqui'jya' yu' ājā'ty. ³⁵Wejyva i'cue'sha' puíi jypacuesaaty peeygājna fi'nze ji'pji'cue, sa' pqui'jrrava jytjaacue caashwendu'juna sūjmēe mfi'nzewe. Tyā'wē ew yūusaaty' Dyusa' wala deweena, atsa' i'cue'sha' cielute Dyus luuch yuune'cue, tyāa pa'gatey Dyus cielutewe'sha' tyā'sna yaacysamēe macue ewmeesateva ca'tu' ewrráa yūuna ũsa'. ³⁶I'cue'sha' peeygāasa myuuwe, i'cue'sh Tatava ma'wē peeygāasana tyā'wēy.

Jiimeerra' nuywe'wewa'jme'

(Mt. 7.1-5)

³⁷Ma'wēsateva jiimeerra', ewmeesata' jina we'wewa'jme', tyā'wē yūupa'ga i'cue'shva Dyus dyi'pte ewmeesa yuuya'mēe. Vitety nuywe'wewa'jme', ca'tuva nuywe'wecajmén. Ājmēe yūusaaty peltunāywa'ja', Dyusva i'cue'shtyi

peltunāycajn. ³⁸Vitety peeswa'ja', ca'tuva i'cue'shtyi Dyusa' peescajn. Macue isarra vitety peeste', ca'tuva i'cue'shtyi Dyusa' tyāa isanitey ew uta pu'quisu'sna zuuna' āshrra peesnisa's jypa'gane'cue.

³⁹Teech ejemplo caaja'nda'jrra' na'wēc pta'sh:

—¿Yafy ji'pjmeesa' viteva tyā'wēysa's dyi'tje pe'jna u'jya' ājāma'c? ¿E'nzfi cafycjē cjēemeema'ty? ⁴⁰Piyasá' caapiya'jsate jytjaacuesame'. Nava maava jyuca piyan jyā'jrra yuurráa, caapiya'jsa na'wēy yuuna. ⁴¹¿Ma'wērra iindy yacjtjē'j yafyte cytā' le'chcuēesa cjēerra ūsteva, uyya' ājāqui'ng? iindy yafyte yu' fytū pe'la yuu walasa cjēerra ūste'. ⁴²¿Ma'wērra iindy yacjtjē'ja's pēyiqui'ng: iindy yafyte cytā'a's cutyi'ji'nja jīna? iindy yafyte yu', fytū pe'la walasa cjēerra u'pteva tyāa yu'sa' uymeerra'. Āacjērráa ew we'wena u'jusatjē'j, iindy yafyte fytū pe'la walasa cjuē'yna mcuutyi'j, sa' tyā'wē yūurrarráa iindy yacjtjē'j yafyte cytā' le'chcuēsa's cutyi'jya' ājāne'nga.

Nasa ma'wē yūutsteva mpa'yajcywe jiyuya'

(Mt. 7.17-20; 12.34-35)

⁴³Fytūu tash ewsa', ewsa'írráac yūnu', nava fytūu tash ewmeesa', ewmeesa írráac yūnu'. ⁴⁴Fytūu tash ma'wēsateva yūntec isa ew ya'jiyu'. Brevla's cjāas tashte ya'unde'tsme', sa' uva's tsjūtsj tashte ya'unde'tsme'. ⁴⁵Nasa ewsa' ewrráaty we'we', ewsa's ūuste ji'pina tyāa pa'ga. Nava nasa ewmeesa', canzhrráaty we'we', tyāa pa'gatey ūuste yuu, canzhsa u'pna atsa' we'wenisa' ūusujne' caseje' naa pa'ga.

Dyusa's nwēese'jsa vite' Dyusa's nwēese'jsamée

(Mt. 7.24-27)

⁴⁶I'cue'sha' andya's Jype'jsa jī'i'cue sa' ¿quīj yuurracue andy jycaajni's cytey yu'tsmée? ⁴⁷Maa nasava andy tashte utyaarra', andy we'weni's nwēesē'jrra jycaajni's cytey yūusa' tyā' na'wēsa': ⁴⁸Teech pitstjē'ja' yu'wala pucate cuet walate caachinda'jrra yat tyajc. Tyajū' yu' walaarra', cysū afijmbna scjēwrrava yata's quēesē'jme', cuette caachinda'jrra tyaaajnipa'ga. ⁴⁹Nava maa nasava andy we'weni's wēsē'jrrava, andy jycaajni's cytey yuumeena tyā' teech pitstjē'ja' yu'wala pucate yata's cuetmuse cajcueterráa tyaaajni na'wēsa'. Yu' walaarra', tūchjarra tyāa yata's pētyrra jyuca suwcu.

Soldau cpiitan jype'jnisa's Jesus nuycatyjini

(Mt. 8.5-13)

7 ¹Tyajū' Jesusa' nasaty Dyus yuwe's pta'shna jyā'jrra', Capernaum chjambna u'cj. ²Tyāa chjambte' teech cpiitan ūsu'c romanowe'sh. Sa' tyāa cpiitana' teech selpisáa ji'pju'c wala peeygāanisa. Nava wala ātsā'rra uuya'vayā'cj yu'. ³Tyajū' cpiitana' Jesusa' ma'wēsatyva nuycatyji'c jīni's wēsē'jrra', judiuwe'sh pcjaacjenite npiitstjē'jsaty jycaacj Jesusa's pytjaa we'weya', tyā'sna selpisa's nuycatyjiya' yuucajn. ⁴Atsa' tyāawe'sha' Jesusa's utyaarra', na'jīnaty pytjaa pi'cyna we'we:

—Tyāa cpiitana'sa' indy pu'chvatsa' ewna sūjū'tja'w. ⁵Tyā' cue'shtyi peeygājrra pcjaacjewa'j yat yujva ctyaaja'cj naa pa'ga jīte', ⁶Jesusa' tyāawe'sh pe'jni u'cj. Nava yat utya pa'jatsterrāa, cpiitana' tyajy namicuty caacja Jesusa's na'jīcajn:

—Andya' wala ājmeecuesatj atsa' wejy yuuva andy yatte u'caya' yujmēe tee yuu. ⁷Andya' tyā'wē ājmeecuesarra īrrāatj indya's andy yuu pacueya' yujya' tjaame. Atsa' wejy yuuva tyājūrrāa yuwejurrāa mwe'we atsrrāa andya's selpisa' catyjina. ⁸Andyva jwee npiitstjē'jsa jycaajni's nwēesē'jna ūstju, nava jweeju andy jycaajnisā soldau jī'ptju. Sa' tyāawe'shtyi' teehsa's me'j jīte', andy jycaajni's cytey yu'c. Sa' vite's pa'yate', tyāava cytey nwēesē'je'c. Sa' andya's selpisa's quīj jycaatjeva, cytey yu'c jīnac yuwecaaj.

⁹Tyajū' na'wē cpiitan yuwe caajni's Jesus wēsē'jrra', cuj yajcynac neeyūu. Sa' e'ste yuusaty tjengrra' na'jīc:

—Isatj we'we', Israelwe'sh mteewe'sh yujva tyā'wē andy we'weterrāa catyjina sūjsa yu' iuymetj naa cpiitan na'wēsa yu' jīc. ¹⁰Tyajū' jycaajnisawe'sha' yatnay shawendrra', cpiitan jype'jnisa' catyjyā'j u'ptety uy.

Viuda nchi'ca's Jesus ītyi vitni

¹¹Tyāa e'su', Jesusa' teech chjamb Nain yaasesatec pa'jya' u'j, tyāa yacj u'jusawe'sh vite nasa cujsa yacj. ¹²Sa' chjambte u'catste', teech uusá's pendaaya' nasa wala cuj u'juetstec uy. Tyāa uusá' viuda nchi'c tyāarrāasac yu'. ¹³Atsa' Jesus uyrra', tyāa viuda's peeygājrra cviisha'jna:

—Ū'nenuch jīnac we'we.

¹⁴Sa' Jesusa' utyaarra, taula's jya'ndycu. Atsa' yacjrra u'jsa', nee yujuty. Naapcachja' Jesusa' uusá's na'jīc:

—Pitstacy, mquīte jī'tj indya's jīte', ¹⁵uusá' cachrra we'wec. Atsa' Jesusa' njī'ja's ducju. ¹⁶Na'wē yūuni's nasa uyrra', jyucaysa wala ūucjrrava, tyā'wēytyi Dyusa's wala wechana na'jī':

—Dyus jycaajni wala yujsa cue'sh cshavyte vyaac jī'ty. Sa' qui' we'werra':

—Dyusa' tyajy nasaty pu'chya' quīj c jī'ty.

¹⁷Tyajū' Jesus tyā'wē yūuni's nasa jyuca jiyuty Nain chjamb peecu'jsuwe'sh vite' Judea quiwesuwe'shva jyuca.

Jesus tashna caajnisawe'sh

(Mt. 11.2-19)

¹⁸Jesus tyā'wē yūuni's Juan Bautista' jyuca jiyuc Juan yacj u'jusawe'sh pta'shte'. Sa' tyāa yacj u'jusa e'nzsaty pa'yarra', ¹⁹Jesus tashna caacj paapējyja':

—Indya' ħisa Cristo naa quiwete quīiwa'jsa ūsu'c tyāa dyijngá', meerra' vite ūytjasuvá'nja'w? jīnac pēycaaj. ²⁰Atsa' e'nz jycaajnisā Jesus tashte pa'jrra' tyā'wēy pējytyi:

—Juan Bautista' cue'shtyi' caacj indya's paapējyja': ¿Cristo naa quiwete qui'wal'jsa ūsu'c tyāa dyi'ngá', meerra' vite ūytjasuvá'nja'w? jīnaty pējy.

²¹ Sa' tyā'wē paapēysawe'sh pa'jatste', Jesusa' nasa wala quījquīj wee canzh'sate ātsā'satyva nuycatyjic, ech luucu vit-saty ūuste ji'pjsa vite' uyya' ājāsamée maanzcuēesatyva jyuca nuycatyjic. ²² Sa' Jesusa' paapēysawe'shtyi' na'wēc pas:

—I'cue'sh ma'wēne'cue wēsē'jna uy tyā'wēy pta'shine'cue Juana's na'jīna: Uyya' ājāsameeva uyu'ty. Atsa' lengsava catyjirra lengmeety neeyū'. Wā'jy wee canzh ji'pjsava catyjinity neeyū'. Atsa' wēsē'jya' ājāsameeva wēsē'jya' ājā'ty. Uuniisava qui' ityī yu'ty. Sa' naa quiwete pytjaacuēsa yuutyi' Dyus tashte pa'jwa'ja's pta'shnic yuu. ²³ Atsa' andya's cuj yajcyna jypumbasame', wechana fi'nzesa yuuna jīnac pta'shcaaj.

²⁴ Juan yuwe caajnisawe'sh u'tje', Jesusa' Juan ma'wēsateva pta'shcu na'jīna:

—Nasa u'pnimée quiwesu' i'cue'sha' ¿qui'ja'scue tjengya' u'j? ¿Cjīij tash wejyate ēsē'sesa's vá'cue tjengya' u'j? ²⁵ ¿Cjīmeerra' teech pitstjē'j ropa zhichcuesa atjrra u'pna sūjrra vá'cue tjengya' u'j? I'cue'sha' jii i'cue tyā'wē ropa zhichcuesa atjrra wēt wechana fi'nzesa' jycaajni yat-surráaty u'pu'. ²⁶ ¿Quim yuunacue tjengya' u'j? ¿Dyus yuwe pta'shsa's vá'cue tjengya' u'j? Isa tyā'wē dyij yuurra' Dyus yuwe pta'shsate teech jytjaacue walasa's ne'cue uy. ²⁷ Juana's we'werrac Dyus libroute na'wē pta'shi':

Andy yuwee pta'shsa's iindy yatste cajatstju,

Iindy pa'jwa'ja's pjeu'cjan jīna fi'jni'.

²⁸ Na'jī'tj na': naa quiwete Dyus yuwe pta'shsate maa maateva jytjaacuesa' Juan Bautistac yu'. Tyā'wēteva, maava macue ājmeecuesarrava Dyus jycaajnite u'casa yu', Juante jytjaacuesa yuutyna jīte', ²⁹ Juan bautisāynisa nasa jyucaysa vite' gobierno jīi vyyu pcjacsa tyāawe'sh wēsē'jrra', Dyusa' maa yacjva jyuca ewsana sūjnaty neeyūu. ³⁰ Nava fariseowe'sh vite' ley caapiya'jsawe'sh Juan bautisāynimeesa yu', tyāawe'shtyi Dyus ew yūu wēeni yu'sa' jypa'gamée ajtsety. ³¹ Atsa' Jesusa' na'jīc:

—Naa ensu nasaty' ¿quiim yacj caaja'nda'jaqui'tj? ¿Quiim na'wēta yu'? ³² Luuch le'chcuē na'wēty yu'. Tyāawe'shrráaty plaasasu pweesa'jya' cachrra, vite luuchtyi sus pa'yana na'jī': Zhichcuetja'w tujcana cuví' nava cu'ju'tsmeei'cue. Sa' űus űustja'w memu', nava űne'tsmeei'cue jī'ty. Tyā'wēsata' naa entewe'sha'. ³³ I'cue'sha' Juan Bautista's ech luucu vit-sa's ji'pina tyāasac pan űmée vinova tundyi'tsmée jī'i'cue, tyā'wē quījva űmée tundypa'gameerráa. ³⁴ Nava Dyus Nchi'c Nasa Yūsáa quījrra', űwe'tj, tundyi'tj, ats yu': Naa tjē'ja' wala pū'we', wala tundysa'. Gobierno jīi vyyu pcjacsaawe'sh vite' pcalsawe'sh yacj namicu' jī'i'cue. ³⁵ I'cue'sha' jiimeerrai'cue tyā'jī'. Nava maava jiyuwal'jsa yuutyi' Dyusa' caajiyu'juna andy ma'wēsateva jīc.

Simon yatte Jesus pa'jni

³⁶ Teech fariseo' Jesusa's pi'cyu sāl'jīya', atsa' Jesusa' tyāa fariseo yatna u'jrra', mesate cachcu űya'. ³⁷ Naapcachja' teech u'y iiméj canzh ewmée

yũuna u'ljusa tyāa chjambtey u'psa jiyuc Jesusa' fariseo yatte ũ'ya' u'jni's. Sa' teeche frasco aceite wēt putasana atrra fariseo yatte pa'cj. ³⁸ Sa' ũ'nena utyaana cūjrra', yafy yu'ju Jesus chindaty pcji'cyu. Cjĩrrac tyajy dycjasju andyil'jrra wechá'. Sa' aceite wēt putasa's Jesus chindacjẽ awcu. ³⁹ Tyā'wẽ yũuni's fariseo Jesusa's pi'cysatjẽ'j uyrra', na'wẽc yajcy: Naa pitstjẽ'j isa Dyus yuwe's pta'shsa dyijvatsa', jiyuna naa u'ya' pcalsa ewmeesarra tyā'wẽ chindaty pcji'cyna aceite awna u'pteva sũjũ'c. ⁴⁰ Atsa' Jesusa' na'jĩc:

—Simon, indya's na'wẽ we'wewa'j ji'ptju jĩte', fariseo pasrra':

—Mwe'we jĩte', ⁴¹ Jesusa' na'jĩc:

—Teeche pitstjẽ'ja's e'nz nasaty yuul yu' vyy pqui'jrra. Teechsa' quinientos pesoc yuul yu'. Atsa' vite' cincuenta pesoc yuul yu'. ⁴² Atsa' e'nzĩi tyāawe'sh yuultyi ducjya' ājāmeete', vyyu pqui'jsa' tyāawe'shtyi' peltunāycu. Atsa' ¿maa sũjũqui'ng tyāa yuulusa e'nzsaty maaqui'c wejy tjaacue wecha pqui'jsa's? jĩte', ⁴³ Simon pasrra':

—Wala yuulusane' wejy tjaacue wecha jĩte', Jesusa':

—Isa yuj we'we'ng, jĩc.

⁴⁴ Tyajũ' Jesusa' tyāa u'ya's tjengrra' Simona's na'jĩc:

—Andya' iindy yatte pa'tjeva, yu' ũsmeeng andy chindaty pcji'cwa'j. Nava naa u'ya's mtjeng, tyajy yafy yu'juc pcji'cji' sa' tyajy dycjasjuc andyil'j. ⁴⁵ Andya's wechameeng. Nava naa u'ya' ayte u'cafin nviitnime' andy chindaty wechana. ⁴⁶ Andy jycuetcjẽ aceite awmeeng. Nava naa u'ya' aceite wēt putasaac aw andy chindacjẽ. ⁴⁷ Na'jĩ'tj na', pcal iiměj wala canzhsateva peltunāyni neeyũusa' tyā'wẽycu wala wendyna utyá' peltunāysa's. Nava walamée peltunāynisa' jwee yu' wechana utya'tsme'.

⁴⁸ Tyajũ' tyāa u'ya's we'werra':

—I'cue' peltunāyni yā'ji'cue jĩc.

⁴⁹ Atsa' pi'cynasa Jesus yacj ũ'na u'psa' tyāawe'sh pwe'sh na'wěty puuty we'we':

—Naa pitstjẽ'ja' ¿quiimqui saqui'c pcalsa yujtyva peltunaĩ'? jĩ'ty.

⁵⁰ Atsa' Jesusa' na'wẽc we'we tyāa u'ya's:

—Andy peltunaĩna sũjrrane'cue andy tashte utyāa naa pa'ga ewte yā'ji'cue neeyũu na' āchja' wēt wech wecha me'jwe jĩc.

U'ywe'sh Jesusa's pi'cyna u'ljusa

8 ¹ Tyāa e'su' Jesusa' maanzcuẽe chjambsuva pecũjc Dyus jycaajwa'j ena's pta'shna tyāa yacj u'ljusawe'sh docesa yacj, chjamb le'chcuẽsu walasuva tyā'wẽy. ² Vite' u'ywe'shva pi'cyna u'lju'ty na'wẽ echtyi cutyi'jna quĩj weete ātsā'satyva nuycatyjic tyā'wẽ yuuniisa, atsa' tyāa cshavyte teeche Maria Magdalena yaasesa tyajy ũusuj siete echtyi cutyi'cj tyāac yu'. ³ Vite' Herodesa's pu'chsa Chusa nyu Juanac yaasesa yu', vite' Susanac yaasesa yu'. Cuj u'ysaty Jesusa's pu'chna u'ljusa yu' tyāawe'sh ji'pjuni quĩjcue yacjrráava.

Scuutyj uujsa's caaja'nda'jni*(Mt. 13.1-9; Mr. 4.1-9)*

4Tyajū' chjambuwe'sh wala nasa casejty, Jesusa's tjengya'. Atsa' nasa tyaanzcuēe pcjaacjete', Jesusa' ejemplo yacjcu pta'sh na'ljina:

5—Scuutyj uujsa' uujsa' casejc. Atsa' msuuíi yu' manz ñiñ dyl'jsu āasu neeyūute', nasa waacjil'cjl'jitste, vichacueva fiwrra ū'ty. 6Atsa' msuuíi yu', cuet-suty ūshi. Nava bucharrava quiwe ew ji'pjmeete', tupjaameerra jyuca ujnadyti. 7Msuuíi yu', tsjūtsj cshavysuty ūshi. Atsa' tsjūtsjva ja'nda bucharra' scuutyja's apjrra iviituty. 8Sa' vite ajsu' quiwe ewsatec ūshi. Tyāa yu' walaarra teech tashrrāa cien ñiñtyi ji'pju.

Tyajū' Jesusa' sujscu na'ljina we'we:

—Jiyuwa'jsa ūsrra', jiyune'cue jīc.

9Tyajū' tyāa yacj u'jusawe'sha' Jesusa's pējtyty tyāa ejemplo's ma'ljiniteva jiyuya'. 10Atsa' Jesus pasrra' na'ljīc:

—Dyus jycaajni ensu ma'wē yūuwa'ja'sva quim yujva jiyunimeesa's i'cue'sh yuutyi's āate caajiyu'ju'nja. Nava vite yuutyi' ejemplo yacjrrāatj pta'shi', cyaj macue uyrava, uysamēe na'wērrāa neeyūutyna. Sa' pta'shni's wēsēljrrava, jiyumēe neeyūutyna.

11Naa ejemplo' na'wēsa': Scuutyj fiwa' Dyus yuwe jīni'. 12Atsa' manz ñiñ dyl'jsu ūshisá', nasa Dyus yuwe's wēsē'tjeva echtjē'ja' cutyi'ljina wēsēljrra yu'acjni's jīni'. Tyā'wē Dyus yuwe's ūusuj cutyi'tje', tyāawe'sh ūusa' vituna. 13Atsa' manz ñiñ cuet-su ūshisá', nasa Dyus yuwe's jypa'garra manz en yu' wechana wēsē'jna fi'nzetya. Nava ūuste ew yu'acjmeerra', tjēysa ūusu en pa'tjerrāa, Dyus tashu qui' tyuteetya jīni'. 14Atsa' manz ñiñ tsjūtsj cshavysu ūshisá', nasa wēsēljrrava, naa quiwetewe'sh ji'pju wēenirrá's yajcyna pa'pchuna ewmeesurrāa wechwecha fi'nzesa jīni'. Sa' Dyus yuwe's pechcanatyna, atsa' cyul firráa yuuna. 15Nava nasa ūus ewsa Dyus yuwe's jypa'yacy wēsēljrra nwēesē'jna Dyus yacjrrāa u'jurra', quíjsuva ewrrāa yūuna fi'nzena, tyā' manz ñiñ yu' quiwe ewsate ūshisāa na'wēta'.

Āate jiyuwa'j yu' neeyūuwa'jsamēe*(Mr. 4.21-25)*

16Lampara's atūu dyyite apjrra tyajya' tyā'wē ya'pqui'tatsme'. Wejyva ēetec ya'tyaja' eena' cweetjcajn, cyaj maava u'casa' eena'te u'cacajn. 17Macue paatste sūtjnisarrava, quīj yujva āate vyaamēe yu' neeyūuwa'jme'. Sa' macue ūusterrāa yaacynisa'sva, quim yujva āate jiyunimēe yu' neeyūuwa'jme'.

18Tyā'wēyā'tje', ew mwēesēljwe. Maava wa'lmēe wēsē'tje', jytjaacue caajiyu'juna Dyusa'. Nava wēsē'jya' wa'lsa's, caajiyu'jnimēe yuuna. Jyuca cusa'jni yuuna.

Jesus nji'j vite' tyajy nyacjwe'sh

(Mt. 12.46-50; Mr. 3.31-35)

¹⁹Tyajũ' Jesus ũsnite pa'ljty nji'j vite' nyacjwe'sh. Nava nasa wala ũste', Jesus tashte utyaaya' ajameeta'. ²⁰Atsa' cytee ũssa teeche'sa' Jesusa's pta'shcu na'ljina:

—Iindy mama, iindy nyacjwe'sh, iindy npe'shwe'sh indya's tjengya' pa'ljrra ecate ũsta', sa' indya's peejyta' jite', ²¹Jesus pasrra':

—Dyus yuwe's wēsēljrra' cytey yuutyna tyā'wē yuusaarrāa, andy mama, andy nyacj, andy npe'shwe'sh na'wēsata' jic.

Marte wejya wala's Jesus cyuuju'jni

(Mt. 8.23-27; Mr. 4.35-41)

²²Teech ente' Jesusa' tyāa yacj u'jusawe'sh yacj barcote cjēerra':

—Vite ajn icj cuten u'juega jirra' u'ljty.

²³Nava icj pyājy u'juetspcachja' Jesusa' dejc. Naapcachja' wejyaa wala seena' quiitterra, yu'a's barcote yuutatscu yu'. Atsa' barco' icj dyiicjē cjēeya'vac yu'. ²⁴Tyajũ' Jesusa's fitytyi na'ljina:

—Cue'shtyi jype'jsa mquiite, icj dyiicjē cjējētstja'w jite', Jesus quiitterra' wejyaa wala pety icj yā'ljrra yujucaatje', jyuca yujuc, atsa' quij yujvamēe ewrrāac neeyūu. ²⁵Tyajũ' tyāa yacj u'jusawe'shtyi' na'ljic:

—¿Mjiirracue Dyusa' pu'chjina sūjna yajcymēe? jite', tyāa yacj u'jusawe'sha' ũucjrra tyāawe'sh pwe'shrrāaty na'ljina puuty we'we':

—Naa pitstjē'ja' ¿quimqui atsqi'ty wejyaa wala icj tyā'wēsa yujva nwēese'je'? jī'ty.

Gadara quiwetewe'sh ech iiyamunisa

(Mt. 8.28-34; Mr. 5.1-20)

²⁶Tyajũ' pejca Gadara quiwete pesajty Galilea icj cuteju. ²⁷Atsa' Jesusa' tyāa quiwete pa'jatste', cyte' teeche chjambuwe'sh pitstjē'j casejc Jesus yacj puuty uyya'. Tyāa pitstjē'ja' wala tyachyā'j ech luucu vitni u'ju'c. Sa' ropa atjmēe yatteva u'psameec yu', naasāa uusāa pendani cuet cafysurrāac u'psa yu'. ²⁸Sa' Jesusa's uyrra', tashte peejyūcuerra', na'ljinac sujs we'we':

—Jesus, Dyus ityisa Nchi'c, andya'sa' ¿quījnga yūu wējē'? Andya's nūste ũswa'tje acjajmēn pytjaatj we'we' jic.

²⁹Jesusa' tyāa ech luucu vit-sa's ũusu casej cajatscu yu', tyāa pa'gac tyā'wē we'we'. Tyāa echa' ũuste cjēerra nasa's luucu vitpa'gaty, cadenaju cuse pety chinda yā'ljrra tund wēe. Nava quij yujnava weji'meec chuctende'. Tyā'wē yuurrac tyāa ech luucu vit-sa' nasa u'pnimeesu jyūna u'ljue' tyāa pitstjē'ja's.

³⁰Tyajũ' Jesusa' tyāa echa's pējycu:

—¿Quīj yaasenga? jite':

—Legion yaasetj jīnac pas.



(San Lucas 8.25)

Tyāa pitstjē'j ūuste wala cuj ech cjēerra ūsu'ty, tyāasac legion yaasetj jīna pas. ³¹ Sa' tyāa ech luucu vit-sa' Jesusa's pytjaa we'wety cāfy wala seena' ūucjūucsjacjē acjajmén. ³² Sa' cysū tjā'jsū cuchi wala ūsu'ty apjna, atsa' tyāa cuchi ūussu cjēeya' u'jwa'ja'styi Jesusa's pējy pytjaa we'wena. Atsa' Jesusa' cuchi ūussu cjēeya' u'cjaacj. ³³ Tyajū' tyāa ech luucu vit-sa tyāa pitstjē'j ūusu casejrra, cuchi ūussu cjēete', tyāa cuchi' peñacjē pelurra, icj walacjē cjēerra jyuca uuty. ³⁴ Atsa' cuchi tjengsa' tyā'wē yūute uyrra', ūucjrra pta'shya' wala dund u'jty chjambna vite' chjamb peecu'jsuva jyuca. ³⁵ Atsa' quīj yūuteva uyya' nasa' tjengya' pa'jty. Sa' Jesus ūsnite cūjrra', uytyi ech luucu vit-sa' tyāa pitstjē'j ūusu jyuca casejte', Jesus tashte wēt yā'j ropa atjrra cachrra u'pte. Sa' wala ūucjtyi. ³⁶ Atsa' tyāa pitstjē'j ech luucu vitnisa' ma'wē yūurra catyjiteva uysa' cytee tjengya' pa'jsaty pta'shtyi. ³⁷ Tyāa pa'garrāa Gadara quiwesuwe'sh jyucaysa ūucjrra Jesusa's tyāa quiweju casejna u'cjaajty. Tyā'jyā'tje', Jesusa' barcode cjēerra qui' shawendcu. ³⁸ Atsa' tyāa pitstjē'j luucu vitnijū catyjisa' Jesusa's pytjaa we'wec pe'jrra u'cjan. Nava Jesusa' tyajy yatnac u'cjaaj na'jīna:

³⁹—lindy yatna shawendna me'j, sa' mtuutje'j indya's Dyus na'wē ew yūuni's jīte', tyāa pitstjē'j u'jrra', chjambu jyuca pta'shcu Jesus ma'wē ew yūuni'sva jyuca.

Jairo niisa vite' Jesus atyjte jya'ndysa

(Mt. 9.18-26; Mr. 5.21-43)

⁴⁰Tyajü' Jesusa' Galilea quiwetey qui' shawendna pesatje', nasa üytjäsna üssa' wala wechana jypa'gaty. ⁴¹Cyte' teech pitstjêl' judiuwe'sh pcjaacjenite npiitstjêl'jsa Jairo yaasesac pa'j. Sa' tyāa pitstjêl'ja' Jesus tashte peejyücuerra', pytjaa we'wec tyajy yatna yuucajn. ⁴²Cytee yu' tyajy niisa teechrráasa doce añu jil'pjsa ätsä'rra uuwa'tjerráa yā'cj üs yu' naa pa'ga. Atsa' Jesusa' u'juetste', tyāa yacj u'l'jsa nasa wala cuj dyi'tje utarráaty u'l'jna üsu'. ⁴³Tyāa nasa cuj cshavyte teech u'y doce añu yā'l' cacue yu' vyaate ätsä'sac casej. Sa' tyāa u'ya' tyajy vyu's jyuca pembac yu'tsejsaty dewena, nanva maa yujva nuycatyjiya' äjāmeeta'. ⁴⁴Atsa' tyāa u'ya' Jesus e'ste utyaarra, atyj vitscê cpaajya'ndycu, naapcachja' tyāa dundtey cacue yu'a' yujuc.

⁴⁵Tyajü' Jesusa' paapējyuc:

—¿Quimga andya's jya'ndy? jīna.

Atsa' jyucaysa: Maa yujva jya'ndymetja'w jīte', Pedro vite' tyāa yacj u'l'jsa' na'l'jity:

—Nasaa cshavyte zuuna'rráa u'l'jna üsngu sayuja' ¿ma'wēnga quimga jya'ndy jīna pēyí? jīte', ⁴⁶Jesus pasrra':

—Teechsa andya's jya'ndyyujc, tyā'wē andya's jya'ndypa'garráa ätsä'rrava catyjirrac neeyüu andy pu'chte jīc.

⁴⁷Atsa' tyāa u'y ma'wē yūuni'sva Jesusa' jiyute', tyajy tashte üucjna yayana cūjrra peejyücuec. Sa' nasaa dyi'pte jyuca pta'shcu ätsä'rra Jesus atyjte jya'ndyrra' tyāa dundtey catyjirra neeyüuni's. ⁴⁸Tyajü' Jesus we'werra':

—Catyji'nja sūjrrane'cue andy tashte tyā'wē yūuya' yuwé' tyāa pa'ga ächja' catyji'cue neeyüu na' wechana me'jwe jīc.

⁴⁹Cytee nee Jesus we'wena üsýyna, judiuwe'sh pcjaacjenite npiitstjêl'jsa Jairo yatu yuusa teech pa'l'jrra', Jairo's pta'shcu:

—lindy niisa' uuyā'cj, atsa' Jesusa's cuch pe'jna yuunu jīte', ⁵⁰Jesus wēsē'l'jrra':

—Ñusnu, andyrrá's myajcy atsrráa iindy niisa' catyjina jīc.

⁵¹Tyajü' Jairo yatte pa'l'jrra', vite yuutyi' ca'ga'jmée, naasáa Pedro, Jacobo, Juan, vite' cna'sa neywe'shtyirráac ca'ga'l'. ⁵²Cyte' ñus we'wena ü'nenaty üsu'. Nava Jesus we'werra':

—Ü'nenuwe, tyāa cna'sa' uunime', naasáa deenirrá' jīte', ⁵³cytee üssa' npeevyshijcaty, uuní üste tyā'jīpa'ga. ⁵⁴Tyajü' Jesusa' uuniisa's cuseju pu'quisna' sujscu we'we:

—Cna'sa, mquiitech jīna.

⁵⁵Naapcachja', dundtey ityī yuurra quiitec, atsa' Jesusa' puutscaacj.

⁵⁶Atsa' neywe'sha' wala cuj yajcyna wechana tjengtyi. Nava Jesusa' maa yujtyva pta'shcaajme' tyā'wē uuniiteva ityī vitni's.

Docesaty Dyus yuwe's pta'shya' caajni*(Mt. 10.5-15; Mr. 6.7-13)*

9 ¹Jesusa' tyāa yacj u'ljusa docesaty cyteerraj pa'yarra' quīj weete ātsā'satyva nuycatyjiya' ājāwa'ja's ūscu, ech luucu vit-satyva nasa ūusu cutyi'cjan. ²Tyā'wē yuurac caaj Dyus jycaajwa'j ena's pta'shna ātsā'satyva nuycatyjicajn. ³Sa' na'wēc yu'cypej:

—Dyi'tje quīj yujva jyūmēe me'jwe cjāambu, ya'ja, vyu, caame tyā'wēsaty. Cmiisa yujva e'nz yu' jyūrra u'jnuwe. ⁴Maa yatte paandejya' pa'jyā'jrra', cyteerrāa paandejna ūsune'cue tyajū qui' casejna u'pjcach. ⁵Maa chjambteya' i'cue'shtyi jypa'gameete', i'cue'sh chindate quiwe tujnda's sacueecuerra casejene'cue, cyaj Dyus yuwe's macue jypa'gameerrava, yuuwesa yuutyna jīnac yu'cypej.

⁶Tyajū' tyāawe'sha' casejrra', chjamb le'chsū mtee mteeva jyuca Dyus yuwe's pta'shna ātsā'satyva nuycatyjinaty pecūj.

Juan Bautista uuní*(Mt. 14.1-12; Mr. 6.14-29)*

⁷Tyajū' ne'jue'sh Herodesa' Jesus quījquījva ew yūuni's jiyurra', wala cuj yajcyu, tyā'wē maafi yu' Juan Bautistane' uurrava qui' ityī yuu jī'ty tyāa pa'ga. ⁸Atsa' vite yu', Dyus yuwe's pta'shsa Eliasne' qui' vyaa jī'ty. Naapcachja' vite we'werra': Dyus yuwe pta'shsawe'sh jwee yatsgaywe'shne' qui' ityī yuu jī'ty. ⁹Nava Herodes yu' na'jī'c:

—Andyíitj Juan Bautista tyjicja's caaspē'tje'j tyāana. Tyāameerra' jwee yu' ¿quimrraj tyacue quījquījva yūuya' ājācy? jī'c.

Tyāasac Herodesa' tyacue uy wējē' Jesusa's.

Cinco mil nasaty Jesus sājīni*(Mt. 14.13-21; Mr. 6.30-44; Jn. 6.1-14)*

¹⁰Jesus caajnisawe'sha' qui' shawendna pa'jrra', tyāawe'sh quījrrajne'ta yūu tyā'sna pta'shtyi Jesusa's. Tyajū' Jesusa' tyāawe'shrrāaty fiite pe'jna u'cj Betsaida chjamb ja'ndasu nasa u'pnimeesu. ¹¹Nava nasa' jiyurra', tyāawe'shva Jesus e'stey u'jty. Atsa' Jesusa' jypa'garra', Dyus ma'wē jycaajwa'ja'sva pta'shcu sa' ātsā'satyva nuycatyjic.

¹²Tyajū' cusutste', Jesus yacj u'ljusawe'sh docesa' na'jīty Jesus tashte utyaarra:

—Nasaty' mcaaj, chjambsu paandee yat-su ū' weyrra ū'cajn. Tyā'wēme' ayte' nasa yat utyameesū ūstja'w jīte', ¹³Jesus pasrra':

—I'cue'shīiva mpuutswe jīc. Atsa' tyāawe'sh pasrra':

—Tajts pan, e'nz wendyrrāa jī'ptja'w. Cue'sha' chjambna weyya' u'ljmeete yu', ājmeena naanzcuēesaty puutswa'j jīty.

¹⁴Nasa yu', pitstjē'jrráa cinco mil ājty yu'. Nava Jesusa' tyāa yacj u'jusawe'shtyi' na'jīc:

—Cincuenta tyujnderra fiifii tyacsu mcaachi'jwe jīte',
¹⁵tyāawe'sha' tyā'wēy nasaty jyucay caycachji'ty. ¹⁶Tyajū' Jesusa' tajts pan e'nz wendytyi jypa'gana'va cielute pagayrra, Dyusna wechana orāyacu. Sa' pe'ltenderra tyāa yacj u'jusawe'shtyi ūscu, nasa jyucaysaty ūsu'scain. ¹⁷Tyajū' jyucaysa ū'rra tyicte', quijyasaaty doce canastate utaty pcjacj.

Pedro' jiyuc Jesusa' Dyus tashu yuusaateva

(Mt. 16.13-19; Mr. 8.27-29)

¹⁸Teech ente Jesusa' tyāa yacj u'jusawe'sh yacjrráa fii tyuteena u'jrra Dyusna orāyna u'prra', tyāawe'shtyi pējyuc:

—Nasa' andya'sa' ¿quimna jī'ta? jīte', ¹⁹tyāawe'sh pasrra':

—Maaf': Juan Bautistana jī'ty. Vite': Eliasna jī'ty. Atsa' vite yu': Dyus yuwe pta'shsa tyāniiteywe'sh uuniirrava ityī yuusaana jī'ty jīte', ²⁰Jesus pējyrra':

—Tyajū' i'cue'sha' andya'sa' ¿quimna sūjū'cue? jīte', Pedro pasrra':

—Indya' Cristo, Dyus tashu yuusang jīc. ²¹Tyajū' wala neewe'wec Jesusa' Dyus tashu yuusa Cristo' jīna maa yujtyva pta'shcajmén.

Jesusa' tyajy uuwa'ja's pta'shni

(Mt. 16.20-28; Mr. 8.30-9.1)

²²Tyajū' na'wēc pta'sh:

—Dyus Nchi'c Nasa Yuusá' wala pcyuuni yuuwa'ja's jypa'gawa'j pejca peejyyuja', tyāa pa'ga judiu ntjē'jsawe'sh vite' sacerdote npiitstjē'jwe'sh vite' Dyus leya's caapiya'jsawe'sh ajtserra icjetyna. Nava uurrava tecj ente' qui' ityī yuuna jīnac pta'sh.

²³Tyajū' jyucaysaty na'jīc:

—Maava andy yacj yuu wēerra', peecy cacue jytjāasni's quījnava jyuca nvijtrra yuurráa andy yacj yujya' ājāne'cue, macue pytjaa yuuwa'j seena'sa een isa ma'c pa'jnava tyā'sa' ūucjmée. ²⁴Maa nasava naa quiwete ityī fi'nzewa'jrrá's ya'nwe'wesa' Dyus yacj fi'nzewa'j yu'sa' iviituna. Nava maa nasava andy yacj fi'nzepa'garráa naa quiwete ityī fi'nzeni's yajcymée iviitusa', Dyus yacj fi'nzewa'j yu'sa' iviitumeena. ²⁵Nasa' naa quiwetewe'shrrá's jyuca cnayrra', tyajy ūus yu's iviitute', ¿quijte selpiicy, peecy ūus yu's nwe'wemeete'?

²⁶Maa nasava andya's jypa'gaya' wa'lina andy pta'shnityva wa'lutyna atsa' Dyus Nchi'c Nasa Yuusaava andy Tata eena' cweetjniite Dyus angeleswe'sh yacj jycaajya' quījrra', tyā'wē yūusatyi' jypa'gaya' wa'luna. ²⁷Isatj we'we', ayte ūssa uuméy uyuune'cue Dyus jycaajya' quīini's jīc.

Jesusa' zhichcue yu'ptjejrta vyaani*(Mt. 17.1-8; Mr. 9.2-8)*

²⁸Tyā'wē we'weni teech qui'su scjēwniite', Jesusa' tjā'tje orāyya' u'cj Pedro, Jacobo, Juan tyāawe'sh yacj. ²⁹Jesusa' orāyna u'piyna, tyajy dyi'pa' fiycu zhichcue yu'ptje, atsa' tyajy atjni ropava tyā'wētyi chijme cuejnesa yuu. ³⁰Tyājū' tyāa yacja' e'nz pitstjē'jty puuty we'wena vyaa, teechna' Moises vite' Elias tyāawe'shtyi yu'. ³¹Jyuca zhichcue eena' cweetjni pyājte Jesus ma'wē nūs pytjaa yuurra Jerusalente uuwa'ja'styi we'we'. ³²Pedrowe'sha' wala dee wēerrava, dejmēe u'prra' uytyi, Jesus eena' cweetjni vite e'nzsa tyāa yacj ūssaty. ³³Tyājū' tyāa e'nz pitstjē'jwe'sha' Jesusa's tyuteena u'juetste', Pedro' na'jic: —Ayte' cue'sh ūswa'j wala ewa', atsa' tecj wa' tyajaga, teechna' iindy jii, vite' Moises jii, vite' Elias jii jic.

Nava Pedro' ūus yuu yajcymēy we'wesarrāac yu'. ³⁴Naapcachja' tāapj quijna'va, jyuca apjcu. Atsa' wala ūucjtyi tāapj dyiite neeyūurra. ³⁵Tyājū' tāapj dyiiju na'wēc we'we:

—Na' andy Nchi'c wala wendynisa', atsa' tyā'sa' nwēesē'jna cytey myuuwe jinic ptjūuse.

³⁶Tyā'wē we'wenijū', Jesusrrāa yā'j ūstety uy. Sa' tyāawe'sha' shuuna'ty neeyūu, sa' tyān ensu' quim yujtyva pta'shmeeta' tyā'wē uyni's.

Teech luuch wēechpa'jsa's Jesus nuycatyjini*(Mt. 17.14-21; Mr. 9.14-29)*

³⁷Sa' cuscus encjē', tjā'ju quijjatste', nasa wala cuj Jesusa's pu'tjengya' casejty. ³⁸Atsa' teech pitstjē'ja' nasaa cshavyte ūssa' sus we'werra':

—Andy nchi'c teechnāa jip'tju tyā'sa' meen tjeng. ³⁹Tyā'sa' ech luucu vit-sa uwerra caywēchpa'ja'jna cweeyi'jna wala pcyu'c sa' tyjwete wējē'tsme'. Tyā'wē yūute', yuwesu bu'chrrāac sējē'. ⁴⁰Indy yacj u'jusawe'shtyi' pytjaa we'weyā'tj, tyāa echa's andy nchi'c ūusu cutyi'cjan. Nava tyāawe'sha' ājāmeeta' jite', ⁴¹Jesus pasrra':

—Dyusa' pu'chjina sūjwa'j yu'sa' jipjmeesata' naa nasa'. ¿Bagachpcach i'cue'sh yacj pu'chna ūs ya'vatca? ¿Bagachpcach ājāmēe fi'nze ya'vacue? Mneejyūj iindy nchi'ca's jite', ⁴²tyāa pitstacya' Jesus tashte utyaana cūjūtspcachja', tyāa ech luucu vit-sa' caywēchpa'ja'jrta pētycu. Nava Jesusa' juuna' we'werra ech luucu vit-sa's ūusu cutyi'tje', tyāa pitstacya' ew catyjic atsa' Jesusa' neya's ducju.

⁴³Atsa' Dyus tyacue wala ew yūute', jyucaysa wala cuj yajcytyi.

Jesusa' tyajy uuwa'ja's qui' pta'shni*(Mt. 17.22-23; Mr. 9.30-32)*

Na'wē yūuni's nasa wala cuj yajcyna ūspcachja', Jesusa' tyāa yacj u'jusawe'shtyi' na'wēc we'we:

⁴⁴—Na'sa' ew wēsē'jrta pechcananuwe: Dyus Nchi'c Nasa Yuusá's nasa ewmeesa cusete ducjni yuuwa'ja' jiteva, ⁴⁵tyāa yacj u'jusawe'sh yu'

jiyuya' ājāmeeta', tyāawe'sh jiyuwa'lmeene' yu' naa pa'ga. Sa' tyā'wērrava pējy yu' meeta' ūucjrra.

Quim wejy jytjaacue jytujtjesacy

(Mt. 18.1-5; Mr. 9.33-37)

⁴⁶Tyajū' Jesus yacj u'ljusawe'sha' tyāawe'sh pwe'sh puuty paapēyi'ty: —Ayte' cue'sh pwe'sh ħmaa wejy jytjaacue walasacytja'w? jīna. ⁴⁷Nava quīj yajcyrra tyā'wē puuty we'wetsteva Jesusa' jiyurra', teeĥ luuchcuē's tyajy pucate tyajrra' na'ljīc:

⁴⁸—Andya's wendysa' maava naa luuch na'wēsaty ajtsemée jypa'gasa', andya's jypa'gasa' yuutyna. Sa' andya's jypa'gasa', andya's jycaajsanava jypa'gasa' yuutyna. I'cue'sh pwe'sh maa tyā'wē ājmeecuesa na'wē yajcyna fi'nzena tyāa yuurraa jytjaacue walasa yuuna jīc.

Cue'shtyi atsesamée yu' cue'sh yacj fi'nzesatyna

(Mr. 9.38-40)

⁴⁹Tyajū' Juan we'werra':

—Cue'shtyi jype'jsa mwēese'j. Teeĥ pitstjē'j iindy yase's cysusrra ech luucu vit-sa's nasaa ūusu cutyl'jitste cue'sha' uyrra', tyā'wē yūunu jīnatja'w we'we, cue'sh yacj u'ljusaameec yu' naa pa'ga jīte', ⁵⁰Jesus pasrra':

—Maava cue'shtyi atsewe'wesamée yu' cue'shtyi pu'chsa írráatyna, atsa' tyāawe'shtyi' cuch tyā'wē yuunuwe jīc.

Juanwe'sh cieluju ipy caaquīj'j wēeni

⁵¹Tyajū' Jesus cielun u'ljwa'j en utyaatste', ūucjmée Jerusalen ĥjambna u'lja' casejc. ⁵²Sa' u'ljuetsrra', yatste yuwe caacj, atsa' tyāawe'sha' Samaria quiwete teeĥ ĥjambtety deewa'j yat pacueya' u'j. ⁵³Nava tyāa ĥjambtewe'sha' Jesus Jerusalenna u'ljuetste uyrra', jypa'ga wēemeeta'.

⁵⁴Tyajū' tyā'wē yūute', Jacobo, Juanwe'sha' Jesusa's na'ljīty:

—Cue'sha' cieluju ipy caaquīj'jrra tyāa nasatyi' pemba jytjāasvatsa', cue'sha' cytey yu'nja'w Dyus yuwe pta'shsa Eliasva ma'wēga yūu tyā'wēy jīte', ⁵⁵Jesusa' tjengrra' na'ljinac yu'cypej:

—I'cue'sha' jiyu'tsmeel'cue ma'wē yūuwa'ja'sva. ⁵⁶Dyus Nchi'c Nasa Yuurrava, andya' nasaty pembaya' yuwe'tsmeetj, naasáa nwe'werra ewte nvijt-ya'rráatj quīj jīc.

Tyajū' vite ĥjambnaty u'j.

Jesus yacj fi'nze wēesa

(Mt. 8.19-22)

⁵⁷Tyāawe'sh dyi'tje u'ljuetste', teeĥ pitstjē'j Jesusa's na'ljīc:

—Jype'jsa, indy yacj yuu wēetj, indy mtee u'ljuetsteva jīte', ⁵⁸Jesus pasrra':

—Yu'cj niimal yujva deewa'j cagy ji'pjta', atsa' vichacuēva yat ji'pjta'. Nava Dyus Nchi'c Nasa Yuusa' mtee yujva tyajy dyictjerráa yuja'sva cjcjwa'j ji'pjme' jïc.

⁵⁹Tyajú' Jesusa' vite's pa'yac:

—Andy yacj myuj jīna.

Atsa' tyāa pasrra':

—Jype'jsa, mütyjās, andy tata cjuē'yna pendaaya' u'juetstju jite', ⁶⁰Jesus pasrra':

—Uusaawe'sha' peecy uusāa pwe'sh ya'pendaatyna. Atsa' indya' Dyus jycaajwa'j ena'srráa pta'shya' me'j jïc.

⁶¹Tyajú' vite' na'jïc:

—Jype'jsa, andya' indy yacj yuu wēetj, nava andy yattewe'sh cjuē'lytyi neewe'weya' u'juetstju jite', ⁶²Jesus pasrra':

—Maava mjīa's tacjrrarráa e'su yu' tjengsa' selpimeena Dyus ma'wē jycaajwa'ja'sva pta'shya' jïc.

Setenta nasaty Jesus caajni

10 ¹Tyāa e'su' vite setenta tyjityjrra, e'nz e'nzcu yatste caaj, tyajy pa'jwa'j chjamsu mteeva jyuca. ²Sa' na'jïc:

—Isa mjīiwa'ja' wala yuj ūsa', nava mjīisa yu' cujmeeta'. Atsa' mjīi namu's pytjaa we'wena mpējywe nasa mjīiwa'jsa tyajy mjīitewe'sh. ³I'cue'sha' jypa'yacy me'jwe, piishacuēty alum cshavysu na'wē cajaststju naa pa'ga. ⁴Ya'ja, vyu, pelgatyi tyā'wēsa jyūmēe me'jwe. Sa' dyi'tje nasa pul'jycjēw yujrrava wechana jytjēyuumene'cue. ⁵Quiim yatte pa'jrrava, ewrráa we'wena wechana pa'jane'cue. ⁶Atsa' tyāa yattewe'sh atsesameerra', tyā'wē wechana pa'jni's ewrráa jypa'gatyna. Nava jypa'gameete', tyajú qui' u'juene'cue. ⁷Sa' mtee ew jypa'gatyna, tyāa yatte paandejene'cue, tyāawe'sh quīj sāljīni'sva ū'na, tyāa pa'gatey mjīisa' ū'wa'ja's jypa'gawa'j ji'pja'. Atsa' i'cue'sha' yat iisa paandejna pecūjnuwe. ⁸Maa chjambtewe'sh i'cue'shtyi jypa'gate', cytee ūsune'cue quīj puutsteva wa'lmēe jypa'gana. ⁹Sa' cytee ātsā'satyva nuycatyjirra na'wē pta'shine'cue: Dyus jycaajna pa'jwa'j ena' i'cue'sh yacj utya ūsa'. ¹⁰Nava maa chjambteva i'cue'shtyi jypa'gameete', tyāa chjambte jyuca na'jīne'cue: ¹¹I'cue'sha' jypa'gameerrava yuuwesa yuucajn i'cue'sh chjambte cytā'tujnd yujnava sacueecuerra u'juetstja'w cue'sh chindate uweni's. Sa' macue jypa'gameerrava, jiyurra neeyūutsi'cue: i'cue'shtyi Dyus jycaajna pa'jwa'j ena' utya ūsa' jīne'cue. ¹²Na'jī'tj na': Dyus castigāywa'j ente', tyāa chjambtewe'sha' Sodoma chjambtewe'shte jytjaacue ñus ya'castigaĩtyna.

Chjamb nwēese'jsamēe yacj ūucjūcjsa

(Mt. 11.20-24)

¹³Corazín chjambte nasa, Betsaidatewe'sh yā'jrra, seena' yuj ñuste neeyūuwa'ji'cue. Ayte i'cue'sh dyi'pte na'wētj ātsā'saty nuycatyjina uusáaty fityna yūu na' Tiro vite' Sidon chjambteva tyā'wēy yūuavsa', tyāawe'sha' pcaltiyi nvijtrra Dyus tashte shawendni tyachyā'j yuuna. ¹⁴Dyus

castigãywa'j ente', Tiro vite' Sidon chjambte nasate jytjaacue i'cue'sha' ñus castigo's cnayuune'cue. ¹⁵Atsa' Capernaum chjambtewe'sha' cielute ul'jwa'jsatj sũjna i'cue yaaqui', nava infiernote cjẽeya' ul'jwa'jsai'cue.

¹⁶Tyãa chjambtyi' tyã'wẽ we'werra', setentasawe'shtyi' na'jĩc:

—Maa nasava i'cue'sh pta'shni's wẽsẽ'jrra', andya'sva nwẽesẽ'jsa yuutyna. Sa' maava i'cue'shtyi atsesa', andya'sva atsesa yuutyna. Sa' andya's atsesa' andyrrãana ajtsemée andya's caajsanava atsesa yuutyna jĩnac jycaaj.

Setentasawe'sh qui' shawendni

¹⁷Tyajũ' setentasawe'sha' wala wechana qui' shawendtyi na'jĩna:

—Ech luucu vit-sa yujva indy pu'chte', cue'shtyi' nwẽesẽ'je'ty jĩna pta'shte', ¹⁸Jesusa' na'jĩc:

—Isa yuj pta'shi'i'cue andya' uytju echtjẽ'ja' cieluju cpi'sh cuejneni na'wẽ wetena quĩjatste. ¹⁹I'cue'sh tyã'wẽ yũucajn fĩrráatj andya' quĩjteva jyuca ajãwa'ja's ũs, ul weeswée usmity quĩjquĩj ech seena'sava i'cue'shtyi cpã'vit-ya' ajãcajmén. ²⁰Nava ech luucu vit-sa i'cue'shtyi nwẽesẽ'pja'garráa yu', wechwecha yaacynuwe. Naasáa cielute i'cue'sh yase fi'jni ũsa' tyãa pa'ga yuurráa wechwecha myajcywe jĩra', ²¹Jesusa' tyajy ũuste wala wechac tyã'wẽ Dyus Espiritu pu'chpa'ga. Sa' na'jĩc:

Jesus ũuste wala wechwecha yaacyni

(Mt. 11.25-27; 13.16-17)

—Tata, indya's wala wecha'tj, indya' cielute vite' naa quiwete jyuca Namung. Tyãasang naa quiwete wala jytujtesa yuutyi's caajiyu'jmeerrava, ajmeecuesa yuutyi's jiyuwa'ja's ũsngu. Iindy jytjãasni' tyã'wẽne' yu' atsa' tyã'sa' cytey yuung.

²²Andy Tata' quĩjquĩjteva jiyuwa'ja's andyrrarrá'scu ducj. Tyãa pa'ga quim yujva jiyu'tsmeeta' Dyus Nchi'ca's, naasáa Ney yuurráa jiia'. Tyã'wẽy Tata'sva quim yujva jiyu'tsmeeta', naasáa Nchi'c yuurráa jiia', sa' maatyva Nchi'c fi' cjiyu'tjerráa jiyuya' ajãtyna andy Tata's.


²³Tyã'jĩra' tyãa yacj ul'jusawe'shtyi tjengrra', na'jĩc tyãawe'shrráaty:

—Achj i'cue'sh uyna ũsi'cue tyã'sna tyãawe'sh yafyju uysá' wala yuj wechawa'j ji'pita'. Tyãa pa'gatey achj i'cue'sh uyna ũsi'cue tyã'sa' ²⁴nyafiitey Dyus yuwe pta'shsawe'sh vite' jycaajsawe'shva wala yuj uy wẽety, nava uyya' ajãmeeta'. Tyã'wẽy zhichcue pta'shni's achj i'cue'sh wẽsẽ'jna ũsi'cue tyã'snava wala yuj wẽsẽ'j wẽety, nava wẽsẽ'jya' ajãmeeta' jĩc.

Teech Samaritano ew yũusa

²⁵Tyajũ' ley caapiya'jsa teechna Jesus tashte utyaarra', ewmée vit wẽerra na'wẽc paapẽjy:

—Andya' ¿ma'wẽ yũurra psumée ityĩ fi'nzewa'ja's ji'pjuqui'tj? jĩte', ²⁶Jesus pasrra':



(San Lucas 10.27)

—Dyus leyte' ¿ma'wē fi'jni ūsna atsnga lēeyrra jiyu'tsmée? jīte', ²⁷ley caapiya'jsa' na'wēc pas:

—Indyna jype'jsa Dyusa's ūusuj jyuca yajcyrra bagachte yujva peena yu' tyuteeya'mée utyaarra tyāa yuurrá's selpiina mfi'nze. Sa' indy ma'wēnga ya'peeygāja', tyā'wēy vite nasatyva mpeeygāj jī'c jīte', ²⁸Jesus we'werra':

—Ew yuj pasngu. Tyā'sa' cytey yuurra', ptsumée ityi fi'nzewa'ja's ji'pjune'nga jīc.

²⁹Nava ley caapiya'jsa yu', tyajy yuweteyrrāa ewmeete neeyūuyā'jrra', na'wēc pējy:

—Tyāa vite nasa jī'c tyāa yu' ¿quimtyna? jīte', ³⁰Jesus pasrra' na'wēc cuentul':

—Teech pitstjē'j Jerusalenu casejrra' Jericon u'jni dyil'jcjē u'juetste', peswée dyi'tje yupya' casejty. Sa' quījquījne' jyūna u'juets yu', tyā's jyuca peswēety. Sa' cpā'vitrra', uuwa'jrrāa yā'ljty nviyt. ³¹Peswée u'jni tyachmeyna, teech sacerdote quījrra' uycu tyāa cpā'vitnisa's, nava pu'chmée dyil'j scjēwcu. ³²Tyā'wēy Levi jil'tjeweshva quījrra' uycu, nava tyāava pu'chmée dyil'j scjēwcu. ³³Tyājū' teech pitstjē'j Samariatewe'sh tyāa dyil'cjēy quījrra', cpā'vitnisa's uyrra', wala peeygāj. ³⁴Sa' cpā'yūusa tashte utyaarra', cpā'su aceite vino yacj awna yu'tsel'c. Tyājū' tyajy a'jni jimbate yacjrra cal'ja'c, sa' paandee yatna pe'jna u'jrra, cyte' quījquījva peejymeec sā'jī. ³⁵Cuscuus encjē', tyāa Samariatewe'sha' u'juetsrra', e'nz yvu cutyi'jrra, yat namu's dewec. Sa' na'wēc neewe'we: Naa pitstjē'j cpā'vitnisa's meen sā'jī. Meerra' vvu nviitutstju tyāa ājmeevāana nava qui' shawendna pa'jrra, ducje'nja tyāa yuuluni's jīc. ³⁶Jesusa' tyā'wē pta'shrra na'wēc pējy:

—Indy ũus myajcy. Tyāa tecjtewe'sha' ¿maasaga ew yūusana' tjengu' jīte', ³⁷ley caapiya'jsa pasrra':

—Cpā'vitnisa's peeygāasa jīte', Jesus pasrra':

—Indyva tyā'wēy pu'chna peeygājna me'ju jīnac jycaaj.

Maria Martawe'sh yatte Jesus pa'jni

³⁸Tyājū' Jesusa' teech chjamb le'chcuētec pa'jya' u'j. Tyāa chjambte teech u'y Marta yaasesa' tyajy yatte jypa'gac. ³⁹Sa' Marta' teech nyacjcu jī'pju' Maria yaasesa. Atsa' Maria yu', Jesus pta'shnirrá's wēsē'jya' tyajy tashte cachcu. ⁴⁰Naapcachja' Marta yu', mjīinirrá's wala pa'pchuna ũsrra', Jesusa's utyaarra na'jīc:

—¿Uyu'tsmeengá' na'wē ũ'cuerráa wala mjīina ũste', ũ'cue nyacj yu' pu'chjitsme'. Atsa' mpu'chcaaj jīte', ⁴¹Jesus pasrra':

—Marta, i'cue' wala yuj cuj jwend mjīina tundumée ũsi'cue. ⁴²Nava jytjaacue peejysa yu' teech jwend yuurrá'. Atsa' Maria' wejy jytjaacue peejysa's wēsē'je'tsa' tyā'sa' quim yujva cusa'jmeetyna jīnac we'we.

Dyus yacj na'wē puuty we'wewa'ja'

(Mt. 6.9-15; 7.7-11)

11 ¹Teech ente' Jesusa' Dyusna orāynac u'pu' teech ajte, sa' orāyna jyā'tje', tyāa yacj u'jusa teechsa' na'jīc:

—Cue'shtyi mcaapiya'j, Dyus yacj puuty we'wena orāyya', Juanva ma'wēga tyāa yacj u'jusawe'shtyi' caapiya'ja' tyā'wēy jīte', ²Jesus pasrra':

—Dyus yacj puuty we'wena oraĩtsrra', na'jīne'cue:

Cue'sh Tata cielute ũssa,

Indya' bagachteva wala jytujtjesang.

Lindy jycaajwa'j ena'srráatja'w ũytjasu'.

Naa quiwete indy ma'wēne'nga jytjāasu' tyāa yu' jyuca cytey tee yuu cielute na'wēy.

³Āchj cue'sh ũ'wa'ja's meen pees.

⁴Cue'sh ewmée yūuni's meen peltunaĩ, cue'shva peltunāytja'w cue'shtyi ewmée yūusaty tyāa pa'ga.

Ewmeete wetecajmén meen nwe'we jīna oraĩne'cue.

⁵Tyājū' na'jīnac we'we:

—I'cue'sha' namicu yatte cuspyāj u'jrra': Namicu, tecj pan mpeequi'j.

⁶Dyi'j u'jsa andy namicuc yatte pa'j, atsa' quīj yujva jī'pjmeetj puutswa'j, ¿jīmeema'cue quījva jī'pjmeerra'? ⁷Atsa' dyiiju passa' na'jīna: Andy luuch deeni yā'tja', atsa' cuch susnu. Naapcachja' vityva apjni yā'j ũsa', atsa' quīj yujva ũsya' ewume'nja jīrrava, ⁸jwee cuch susna nes yuucajmén quiiterra quīj pējyteva jyuca ũsuna. Na'jī'tj na': Namicu pa'garráa cuspyāj quiiterra ew yūumée naasáa cuch suscajménrráa tyā'wē yūuna. ⁹Tyāa pa'gatj andya' i'cue'shtyi Dyusna pēycaja' atsa' tyā' ũsuna. Quīj peejini'sva

pacuerra' uyuune'cue. Vityte pa'yate' pjaandena. ¹⁰Na'jĩ'tj na': maava Dyusna pēysa', jypa'gana. Atsa' pacuesa', uyuuna. Atsa' vityte tu'cacate', pjaandena.

¹¹Ūs miyajcywe: i'cue'sh luuch pan pējyte', ¿cueta's ūsma'cue? Meerra' wendy pējyte', ¿ula's ūsma'cue? ¹²Meerrava zits pējyte', ¿usmitya's ūsma'cue? ¹³I'cue'sha' Dyus dyi'pte ewmeesarrava, i'cue'sh luuchtyi' ewsarráa i'cue peesu'. Atsa' i'cue'sh Tata cielutewe'sha' wejy jytjaacue ewsa Dyus Espiritu's peesuna pēysatyi's jíc.

Dyus Espiritu's atsewe'weni

(Mt. 12.22-30; Mr. 3.19-27)

¹⁴Jesusa' ech luucu vit-sa cwe'we'jsame's pitstjē'j ūusuj cutyi'tje', tyāa echa' ūusuj casejc, atsa' tyāa pitstjē'ja' we'weya' ājac. Tyā'wē yūute', nasa' wala cuj yajcyna neeyūuty. ¹⁵Nava vite yu', na'jīnaty we'we':

—Echtjē'j pu'chterraác naa pitstjē'ja' ech luucu vit-satyva nasaa ūusuj cutyi'ji' jī'ty.

¹⁶Naapcachja' vite yu' Jesus quīj yūuteva jiyuya' sūjrra cielujū seena'sa mcaavya'ja'j jīte', ¹⁷Jesusa' tyāawe'sh ewmēe ūus yaacyni's jiyurra', cytey yuumēe na'wērráac we'we':

—Maa gobiernova peecy nasa yacjīrráa puiirra', tyāawe'sh pwe'shírráa jyuca ptsuutyna. Maa yattewe'shva tyāawe'sh pwe'shírráa puuty puiirra', tyāawe'sh pwe'shírráa jyuca ptsuutyna. ¹⁸Tyā'wēy echtjē'jva tyāawe'sh pwe'shírráa puuty puiirra', puuty ptsuutyna. Andya'sa' echtjē'j pu'chterraác ech luucu vit-satyva nasa ūusu cutyi'jya' ājā' jī'i'cue tyāa pa'gatj tyā'jī'. ¹⁹Tyā'wē dyijte', i'cue'sh yacj u'jusatyva echtjē'jīrráane' pu'chji' ech luucu vit-saty cutyi'jya'. Ew yajcyvats yu', i'cue'sh yacj u'jusafírráa i'cue'sh jypumbani's cjiyu'jwa'jsata'. ²⁰Andya's echtjē'j pu'chmēe, Dyus pu'chtetj ech luucu vit-saty nasaa ūusuj cutyi'ji'. Isa ew jiyuvats yu', i'cue'shtyi Dyus jycaajwal'j en ājc tyāa pa'ga tyā'wē yūutstju.

²¹Teech pitstjē'j chjāchjasa' quījquījva tyajy ji'pjuni's iviituya'mēe sūjrra puiiwal'j tū'srra yatte yupu'c ca'ga'jya'mēe. ²²Nava vite wejy jytjaacue chjāchjasa pa'jrra', tyāa yupsa's cnayrra puiiwal'ja'sva cusa'jna yuurra ji'pjunityi's tyāac iiyamu.

²³Andy ju'ngumēe ūssa', andya's atsesata'. Atsa' andy yacj pcjac pu'chsame' neeusarra tyā'wē yuuna.

Echa' nasa ūuste qui' shawendni

(Mt. 12.43-45)

²⁴Ech luucu vit-sa' nasa ūusu casejrra', nasa u'pnimeesuc jycaasewa'j pacuena u'ju'. Nava uymeerra' naa sūju'c: Andy casejni yatnay shawendna u'jue'nja sūjrra ²⁵qui' shawendte' tyāa nasa ūus yu' yata's ew pandrra

tyaajni na'wẽ ũstec uyna pa'ja'. ²⁶ Sa' u'jrra vite siete ech tyãate jytjaacue ewmeesaty nuypa'jrra, tyãa nasa ũuste pejca u'caty. Atsa' tyãa nasa' jytjaacuec ewmeesa yuuna pa'ja'.

Quim wejy tjaacue wechawa'jsatyqui

²⁷ Jesusa' tyã'wẽ pta'shitsu'pachja', teech u'y nasaa chavyte na'jĩnac sus we'we:

—Indyna cchu'chusa mama yacja' seena' yuj wala wecha yujna jĩte',

²⁸ Jesus pasrra':

—Tyã'wẽme!, wejyva Dyus we'weni's wẽsẽ'jrra', tyajy jycaajnyityi's cytey yuusáa yacjrráa seena' wala wecha yuja' jĩc.

Nasa ewmeesa' cieluju quĩjrráava caavya'ja'cjaajni

(Mt. 12.38-42; Mr. 8.12)

²⁹ Tyajũ' nasa' Jesus we'weni's wẽsẽ'jya' tyajy tashte pcjaacjesatyi' na'jĩnac we'we:

—Nasa ewmeesa naa ensuwe'sha' quĩjrráava seena'sa caavya'ja'cjaajty. Nava quĩj yujva jwee yu' caavya'ja'jmée, naasáa Dyus yuwe pta'shsa Jonas ma'wẽsaga yu' tyã'srráana cjiyu'tje ewna. ³⁰ Jonasva ma'wẽga Nínive chjambte nasa ewmeesaty cjiyu'lj, tyã'wẽy Dyus Nchi'c Nasa Yuusaava naa ensu nasa ewmeesaty cjiyu'lja'. ³¹ Naa ensu nasaty Dyus castigäywa'j en äjte', tyãniitey jyu'lj quiwete jycaajsa u'ytjẽ'ja' ächga nasaty' ewmeete nviituna. Tyãa u'ya' tyacue jyu'juwe'sh yujrrava, wa'lméec Salomon pta'shnirrá'sva wẽsẽ'jya' pa'j. Naapcachja' ächj yu' Salomonte jytjaacuesa ayte ũsa' nava wa'lu'ty naa pa'ga tyãa u'ya' ewmeete nviituna. ³² Tyã'wẽy Nínive chjambtewe'shva Dyus castigäywa'j en äjte', naa ensu nasaty ewmeete nviitutyna. Tyãawe'sha' Jonas pta'shnirrá'sva wẽsẽ'jrra', tyãawe'sh pcaltyi nvijtrra Dyus tashte shawendtyi. Naapcachja' ächj yu' Jonaste jytjaacuesa ayte ũsa' nava wa'lu'ty naa pa'ga Nínive chjambtewe'sha' ewmeete nviitutyna.

Yafya' cacue's ewte caafi'nzeljsata'

(Mt. 5.15; 6.22-23)

³³ Lampara's atũu dyyite apjrra tyajya' tyã'wẽ ya'pqui'tatsme', wejyva èetec ya'tyaja' eena' cweetjcajn, cyaj maava u'casa' eena'te u'cacajn.

³⁴ Peecy cacuete yafya' lampara na'wẽsata'. Atsa' iindy yafya' suwenimée ewrra' iindy cacuete jyuca eena' cweetjna nes yuuna. Nava iindy yafy ewmée suweniite', iindy cacue' jyuca chji'ndyterráa neeyũuna.

³⁵ Iindy cacuete quĩjte yujva chji'ndysamée jyuca eena'sarráa ũste', jyuca ew uyuune'nga, lamparava ma'wẽga ew eena' cweetje' tyã'wẽ.

³⁶ Nava mpa'yajcy. Tyã'wẽme!, eena' cji'cjysa ji'pjngu tyãa cweetjmeete', chji'ndyterráa neeyũune'nga.

Fariseo vite' ley caapiya'jsawe'shtyi yuuwesa Jesus nviitni
(Mt. 23.1-36; Mr. 12.38-40; Lc. 20.45-47)

³⁷Tyajū! Jesusa' tyā'wē we'wena jyā'tje!, teech fariseo tyajy yatte sāl'jīya' pi'cycu. Atsa' Jesusa' u'jrra ū'ya' cachcu. ³⁸Tyajū! tyāa fariseo' naasūjc: Naa pitsjtē'ja' wala yuj fiy yu'c cusecē yu' caajmēe ū'ya' cachcu sūjū'c. ³⁹Atsa' Jesusa' na'jīc:

—Fariseowe'sh i'cue'sha' plaatu vaso ma'c yuu nava tyāa yuutyi' ecacjē yu' pcji'cji'i'cue. Nava i'cue'sh ūus dyiite yu', pesweena quījquījva ewmeerrāa yūunisarrāa jyuca uta ūsa'. ⁴⁰I'cue'sha' jiimeevá'cue: Dyusa' cacuecē āacjēwe'shrrā's uyrra', ūustewe'sh yu's uyu'tsmeene' ¿sūjū'vá'cue? ⁴¹Tyā'wē quījva ji'pjmeesaty ūusuj jyuca peeygājna lmushnu peesvatsa', āacjērrāa yaatesa yuumeene'cue.

⁴²Fariseowe'sh, i'cue'sh yacja' seena' yuj ūucjūucja', i'cue'sha' putatyjā!, me'sucue, quījquījva uutjashte ūsna tyāa yu'sa' jyuca diesmo ducjrava, Dyus yu'sa' ūusu jyuca wendyna nwēese'jna fi'nze'tsmeei'cue naa pa'ga seena' yuj ūucjūucja'. Diesmo's ducjwa'j yuja', nava Dyusna nwēese'jni wejy jytjaacue ewa'.

⁴³Fariseowe'sh, i'cue'sh yacj seena' yuj ūucjūucja', i'cue'sha' judiwe'sh pcjaacjenisu cachni wejy ewsarrāana i'cue pacué!, sa' chjambsu msuuva ewcuerrāa wecha jytjāasna i'cue pecūju' naa pa'ga seena' yuj ūucjūucja'.

⁴⁴Ley caapiya'jsawe'sh vite' fariseowe'sh, i'cue'sh yacja' seena' yuj ūucjūucja', i'cue'sha' āajurrāa ew we'werra', ūus dyiiju yu' ewmeerrāa yajcyna fi'nzepa'ga. I'cue'sha' uusāa pendani cafya's apnisa na'wēi'cue. Tyāa cafya's apite!, nasa' ma'wē dyiiga quīj ūsteva jiimēe cajcuesu scjēuucy tyā'wērrāa i'cue jiyunimeete fi'nze' jīte!, ⁴⁵ley caapiya'jsa pasrra':

—Cue'shtying atsewe'we' jīteva, ⁴⁶Jesusa' qui' we'werra':

—Ley caapiya'jsawe'sh, i'cue'sh yacja' seena' yuj ūucjūucja', i'cue'shva viterrāaty tyā'wē quim yujva ājāwa'jmēe tjēysa's ūsrra', i'cue'sh yu', ma'wēcūerrāa yujva pu'chjitsmeei'cue naa pa'ga.

⁴⁷Tyā'wēy i'cue'sh jil'j yatsgawe'sh tyā'wē Dyus yuwe pta'shsaty icjrra pendaate!, i'cue'sh yu' tyāa pendani's zhichcue vitnai'cue pjeu'ju'. ⁴⁸Sa' tyā'wē yūurra', cue'sh jil'j yatsgawe'sh ew yuj yuuty jīrrane'cue tyāawe'sh icjrra pendani's zhichcue vitna pjeu'ju' naapa'ga i'cue'sh yacja' seena' yuj ūucjūucja'.

⁴⁹Cyajī Dyusa' tyā'wē yūuni's we'werrac na'jī!: Andy yuwee pta'shsa tyāniitey ensuva caja'nja, sa' naa ensuva caja'nja. Nava maa'ītyi' icjetyna, sa' vite yuutyi' wala ajtsena pcyuutyna jī'c. ⁵⁰Naa ensu nasa' jyucaysa castigo's cnayuutyna, ⁵¹tyā'wē Abela's icjniūjy Dyus yuwe pta'shsaty icjrra Zacarias's icjni entepcach ee pcawpa'ga. Tyāa Zacarias yu'sa' dyuus yat patyute altal utyatety icj. Tyāa pa'ga naa ensu nasaty Dyusa' castigaīna, tyā'wē Dyus caajnisaty icjpa'ga.

⁵²Ley caapiya'jsawe'sh, i'cue'sh yacja' seena' yuj ūucjūucja', i'cue'sha' tyacue wala leya's jiisatja'w jīrrava, vite yuutyi's caapiya'ja'tsmeei'cue. Tyāasa vite jiyu wēesaty i'cue'sha' yupnarrāa ūsi'cue jīte!, ⁵³ley

caapiya'jsawe'sh vite' fariseowe'sha' wala ñusacharra quijrráava wala paapējytyi, ⁵⁴quijterráava ewmée paste' pāatyjī'cjya' sūjrra.

Fariseowe'sh yacj jypa'yacy fi'nze caajni

12 ¹Tyājū' nasa iiméj seena' wala pcjaacjerra jyuca utate', Jesusa' tyāa yacj u'jusawe'sh cjuē'ytyi na'wēc we'we:

—Fariseowe'sh ewmée yūuna fi'nzeni's mpa'yajcywe. Tyā'wēme' tyāawe'sha' āajurrāa ew we'werra', ñus dyiite yu', ewmeerrāaty yaaqui'.

²Nava macue paatste sūtjnissarrava quij yujva āate vyaamée yu' neeyūumeena, sa' macue ñusterrāa yaacynisava quij yujva jiyunimée yu' neeyūumeena. ³Tyāa pa'ga i'cue'sha' quim yujva wēsē'jnimeete vá'cue we'we' nava jyuca ptjūsena. Meerra' i'cue'sh ñusterrāa vá'cue ewmée ajcy, nava maanzcuēe yat-suva jyuca caajiyu'jni yuuna.

Quimna wejy ñucjwa'jcy

(Mt. 10.28-31)

⁴Āchja', andy namicu i'cue'shtyi na'jī'tj: Cacuerrá's icjsatyī' ñucjnuwe. Tyāawe'sha' cacuerrá's icjrra', jwee yu' quijva yūuya' ājāmeetyna. ⁵Nava pta'shitstju quimna ñucjwa'tjeva: Naa quiwete ityī' u'juni's cusa'jrra', ñusa's infiernote caajwa'jsarrá's ñucjna mfi'nzewe. Tyā'srrāa ñucjwa'ja'.

⁶Tajts vichacuēty e'nz centavoterrāac ya'tyweyú'. Nava macue pa'gameesateva Dyusa' teechrāa yujnava pechcanaméec tjengna fi'nze'. ⁷I'cue'sh jycuette dycjas yujva jyuca isani ũsta'. Atsa' i'cue'sh yu' maanzcuēe vichacuēteva jy'tjaacue pa'gasai'cue. Tyāasa ñucjmée mfi'nzewe.

Jesus quimteva tjaamemée pta'shni

(Mt. 10.32-33; 12.32; 10.19-20)

⁸I'cue'shtyi na'jītstju: maava naa quiwete nasaa dyi'pte tjaamemée Cristo jīitj jīna āate pta'shsatyī', andyva Dyus Nchi'c Nasa Yuusa' tyā'wēy Dyus angeleswe'sh dyi'pte tjaamemée: Na' andy nasata' jīna pta'shi'nja.

⁹Nava maava naa quiwete nasaa dyi'pte tjaamerra Cristo's jiimeetj jīna īshījana atsa' andyva Dyus angeleswe'sh dyi'pte tyā'sa' jiimeetj jī'nja.

¹⁰Maava Dyus Nchi'c Nasa Yuusa's macue atsewe'weteva, ya'peltunaīna. Nava Dyus Espiritu's atsewe'wete', bagachte yujva peltunāynimée yuuna.

¹¹Na'jī'tj na': i'cue'shtyi judiuwe'sh pcjaacjenisu meerra' cjuēswe'sh tashte cuutya'tjeva, ñucjnuwe cuj yajcyna quij we'wequi'tj sūjna. ¹²Tyāa pa'gatey Dyus Espiritu' ma'wē we'wewa'ja'sva caaūsutje'jena tyāa dundte jīc.

Teech ji'pjsa ũ'a's jyaawya' yaacyni

¹³Tyājū' teech pitstjē'j nasaa cshavyte ũssa' Jesusa's na'jīc:

—Andy yacjtjē'ja's meen we'we, tatawe'sh ji'pjuni's pyājn andy jīi tyundeecajn jīte', ¹⁴Jesus pasrra':

—¿Quimga andya'sa' tyundeendewa'jsa meerrava cjuēs na'wēsa qui'p? jirra', ¹⁵na'wēc we'we:

—Mpa'yajcywe, naa quiwete ji'pjunirrá's yaacynisa's. Tyā'wēme' naa quiwete qui'jqui'va ji'pjurrarráa tyā'wē ityī ya'fi'nze'tsme'.

¹⁶Tyajū' Jesusa' na'wēc ejemplo pta'sh:

—Teech pitstjē'j wala ji'pjsa u'pu'c. Tyajy quiwete uutjash wala yūncu. ¹⁷Atsa' tyāa ji'pjsa' yajcyya' cachcu: ¿Ma'wē yūuqui'tj? Mtee yujva andy ū'a's jyuca jyaawya' ājānimeetj sūjū'c. ¹⁸Sa' yajcyu: Jiiyā'tj ma'wē yūuwa'ja'sva. Ū' jyaaw yattyi pētyya'vatj, vite wejy walasa tyajya'. Sa' qui'jqui' ū'va tjē'tje' vite' qui'j ji'pjunityva cytee jyaawu'nja. ¹⁹Tyajū' andy ūuste na'jī'nja: Wala qui'jva jyaawni ji'pjngu, wala cuj añu selpiwa'j. Āchja' mjīimée caasena qui'jva ū'na wechwecha miyajcy sūjū'c. ²⁰Nava Dyusa' na'jīc: Ājmeeng yaaqui'. Naa custe uuya'vang. Atsa' iindy ji'pjuni jyaawni' ¿quiim jīi yuuwa'jtyna? jīc. ²¹Jesus we'werra': Tyā'wēc ya'yu' naa quiwete ji'pjunirrá's nuywalaana ūsrra', Dyus dyi'pte yu' puuplec neeyū' jīc.

Cue'sh peejini's Dyusa' jyuca pu'chjina

(Mt. 6.25-34)

²²Jesusa' tyāa yacj u'jusawe'shtyi' na'wēc yu'cypej:

—I'cue'sha' ¿qui'jte ū'wa'j uyuucytja'w? Sa' ropava ¿qui'jte uyuucytja'w? sūjna pa'pchunuwe. ²³Tyā'wē yuucajmení ityī fi'nzenisa' ū'nite jytjaacue ewsa', atsa' tyā'wēy cacueva ropate jytjaacue ewsa'. ²⁴Vichacuēty mtjengwe vacy. Tyāawe'sha' uja'tsvameeta', sa' ū' jyaaw yatva tyajrra ū' pcjacie'tsvameeta'. Nava Dyusa' tyāawe'shtyi' sāl'jī'c na' i'cue'sh yuutyi's wejy tyā'wē sāl'jīna vichacuēte jytjaacuesai'cue naa pa'ga. ²⁵I'cue'sha' ¿maarrá' iiméj wala pa'pchurra peena medio metro tjaacue walaaya' ājama'cue? ²⁶Tyā'wē ājameerra', ¿qui'jya'rráacue naa quiwetewe'shrráaty tyacue wala pa'pchu'?

²⁷Quitety mtjengwe, ropa uyya' mjīimeerrava ma'wēta zhichcue walá'. Isatj we'we': Jycaajsa Salomon tyacue ji'pjsa yujrrava tyāa quite na'wē yu' zhichcuesa ropa atjme'. ²⁸Quite' teech en fi'nzena', cuscuscjē' ipyte cambwa'jrráa yā'tjeva tyā'wēc zhichcue pjeu'j. Dyusa' tyā'wēy i'cue'sh yuutyi's wejy ropa ewsa ūsna nes yuuna na's i'cue Dyusa' tyā'wē yuuna sūjū'tsmée. ²⁹Tyā'wē yā'tje', ū'wa'j ¿qui'jte uyuucytja'w? sūjna pa'pchuna fi'nzenuwe. ³⁰Naa quiwete nasarráaty cacuete peejinirráana yajcyna fi'nze'. Nava i'cue'sha' cielute Tata ji'pji'cue tyā' jyuca jiiyā'ja' i'cue'sh qui'j peejini'sva. ³¹Tyāa pa'ga wejyva Dyus jycaajnitewe'sha's cjuē'yna wejy tjaacue mpa'pchuwe. Naa quiwetewe'shtyi' wejy pa'pchumeeteva, pejca yuj ūsni yuuna.

Cielute ji'pjuwa'jrrá's mpa'pchuwe

(Mt. 6.19-21)

³²I'cue'sha' cujmeecue i'cue nava ūucjnuwe, tyāa pa'gategy i'cue'sh Tata cielutewe'sha' i'cue'shtyi' peeygājrra tyajy jycaajna ūsni's i'cue'shtyi'

ũsya'va'. ³³ Ji'pjunisa's tyweyrra jypeejysaty mpeeswe. Vyu jyaawni suwewa'jmeesa mvitwe. I'cue'sh ji'pjuni cielutewe'sha' ptsumeena, cyteea' quij peswée yujva u'cameena, sa' chicarráa yujva suwmeena. ³⁴ Mtee jyaawni ji'pjrra', cyte yuurráac wejy jytjaacue yajcyna ya'fi'nze'.

Jypa'yacy ũytjasna ũsni

³⁵ Jyuca pjeu'jrra lamparaty pqui'tarra ũytjasna meswe. ³⁶ Patrona' boda yatu shawendna pa'jrra', vityte tu'cacatpcachja', selpisaawe'sha' dundtey vitya's pjaandeya' jypa'yacy ũytjasna ũssa na'wē myuuwe. ³⁷ Jypa'yacy ũste patron pa'tje', selpisaawe'sh yacja' wala yuj wecha yujna. Isatj we'we': Tyā'wē jypa'yacy ũssaty' patrona' pjeu'jrra mesate caachi'jina puutsya'. ³⁸ Cuspyāj ma'c yuu meerra' cjiciitste ma'c yuu nava jypa'yacy ũste pa'tje', selpisaawe'sh yacja' wala yuj wecha yujna. ³⁹ ũus miyajcywe vacy: Maa yat namuva peswée quij orate tyajy yatte pa'jwa'ja's jiyuvatsa', dejmée jypa'yacy ũsrra' ca'ga'jmeena tyajy yatte pesweewe'shte. ⁴⁰ I'cue'shva tyā'wēy pjeu'jrra jypa'yacy meswe. Tyā'wēme', yajcymée ũsiyna, Dyus Nchi'c Nasa Yuusá' quijrráa yuuna jic.

Selpisáa ewsa vite' ewmeesa

(Mt. 24.45-51)

⁴¹ Tyajū' Pedro' na'wēc pējy:

—Naa ejemplo' ¿cue'sh jiirráa váana meerra' jyucaysaty vá'nga pta'shi'? jíte', ⁴² Jesusa' na'wēc pta'sh:

—Maa patronva yultumu nwēesē'jsa ewsa's neewe'werra nviituna, tyajy yatte mjīisaty sāl'jīna nes yuucajn. ⁴³ Atsa' patron jycaajni's cytey yuuna ũste patron pa'tje', tyāa selpisáa yacja' wala yuj wecha yujna. ⁴⁴ Isatj we'we': Tyā'wē yūusa's patrona' tyajy ji'pjuni's quijquijnava jyuca tyāa yultumurrarrá's neewe'werra tjengcajn nviituna. ⁴⁵ Nava tyāa yultumu': Andy patron dund pa'jmeena sūjrra cytee mjīisaty pcyuuya' quiittera, tyāa yu' tundyna tūuya' quiitena. ⁴⁶ Naapcachja' tyajy patrona' shawenduuna tyā'wē yultumu' patron pa'jwa'ja's jiimeerra' ũytjasmée ũsiyna. Sa' wala seena' castigaína, nwēesē'jsameewe'shtyi ma'wē castigaicy tyā'wēy.

⁴⁷ Maa selpisaava tyajy patron jytjāasni's jiirrava cytey nwēesē'jsame', wala cujus castigāyni yuuna. ⁴⁸ Nava maa selpisaava patron jycaajni's jiimeerra' ājmée yūuna tyā'sa' cujasmée ya'castigaína. Maanava wala ũsrra', wala ya'pēyina. Atsa' maanava jytjaacue quijnava neewe'werra', jytjaacue ew jype'cjaníi yuuna.

Jesusa' nasaty caapui'jsa na'wē yuuni

(Mt. 10.34-36)

⁴⁹ Naa quiwete ipy pqui'taya' quīisa na'wētj quij, bejnayāl'j ũsvats ma'wē wala wechaaqui'tj. ⁵⁰ Andya' uuwa'jsatj tyāasa wala ñusna u'jutj uuwa'j

en ajpcach. ⁵¹Naa quiwete puiimée wēt caafi'nze!jya!ne! quīj ¿sūjū'vá'cue andya'sa'? Nava tyā'wē yūuya' quījmeetj. Andy pa'gaterráa maa nasafí yu' puuty yajtsena puiina fi'nzetyna. ⁵²Áchjūyā'ja' teeche yattewe'sh tajts nasarrava tecjsa' e'nzsaty ajtsena puuty tyā'wērrarráa puiina fi'nzetyna. ⁵³Neya' nchi'ca's atseyajcyna fi'nzena. Atsa' nchi'ca' neya's tyā'wēy yūuna fi'nzena. Njī'ja' niisa's ajtsena fi'nzena, atsa' niisa' njī'ja's tyā'wēy yūuna fi'nzena. Suegra' ncuēmyu's atsena, naapcachja' ncuēmyu', suegra's atsena.

Naa ensu quīj yūuya'vateva tyāa yu'sa' jiimée fi'nzeni
(Mt. 16.1-14; Mr. 8.11-13)

⁵⁴Tyājū' Jesusa' na'wēc we'we:

—I'cue'sha' sec cjeenijū tāapj quiitena yujte', nus pa'jya'va' jī'i'cue, atsa' cytey yu'c. ⁵⁵Sa' wejyaatste', sec ya'va' jī'i'cue, atsa' cytey yu'c. ⁵⁶¿Ma'wē yuurra nus pa'jna qui' sec ya'vateva jiisatja'w jīna ūuste yu' iwejech i'cue yajcyna fi'nze'? Sa' jiisarra' ¿ma'wētecue naa ensu' quīj yūutsteva tyā's yu' jiyu'tsmée?

Atsesa yacj yuwe's puuty we'weni
(Mt. 5.25-26)

⁵⁷I'cue'sha' ¿mjūitecue ewterraj puuty we'wena yuwe's pjeu'ju'tsmée?
⁵⁸Maava indya's pāatyī'cjte', tyāa yacj cjuēs tashte utyaaya' u'juetsrra', dyi'tje ewterraj puuty we'wena yuwe's mpjeu'jwe, cyaj cjuēs tashte cuutya'lmeena. Tyā'wēme', cjuēsa' indya's policia's ducjena, atsa' policia yu', carcelte cyuupjana. ⁵⁹Na'jī'tj na': Tyājūyā'ja' vvyu nmej jī'pjuni's ducjmeerra yu', carceluj casejmeene'nga jīc.

Pcaltyi nvijtmeerra' maava jyuca vituni

13 ¹Tyāa ensuy nasa maafí yu' Jesusa's na'wēty pta'shna utyāa:

—Galileajuwe'sha' Dyusna wechana neewe'weya' altalte cambwa'l tajcy icjetspcachja', Pilato' tyāawe'shtyi' icjaacaj, atsa' tyāawe'sh eea' tacy ee yacj jyuca ca'nduc jīte', ²Jesusa' na'jīc:

—Galileaju nasaty tyā'wē yūute', tyāa uusaawe'sha' Galileasu nasate jytjaacue pcalsane'ta yu', tyāa pa'gaty tyā'wē uu ena's jī'pju ¿sūjūcué'? ³Na'jī'tj na': Tyāawe'shrráa tjaacue pcalsa yu'tsmeeta'. Atsa' i'cue'shva pcaltyi nvijtrra Dyus tashte shawendmeerra', tyāawe'sh na'wēyrráa uuwa'jsai'cue. ⁴Tyā'wēy dieciocho nasa Siloete torre cajcuecjē wetete' uuty tyāa uusaawe'sha' Jerusalem chjambte u'psawe'shte jytjaacue yuuwesane'ta yu', tyāa pa'gaty tyā'wē uu ena's jī'pju ¿sūjūcué'? ⁵Na'jī'tj na': tyāawe'shrráa tjaacue yuuwesa yu'tsmeeta'. Atsa' i'cue'shva pcaltyi nvijtrra Dyus tashte shawendmeerra', tyāawe'sh na'wēyrráa uuwa'jsai'cue.

Higuera tasha's spě'tj caajni

⁶Jesusa' naa ejemplo'scu pta'sh:

—Teech pitstjě'ja' higuera fytūu tashcu tyajy quiwete ujni ji'pju'. Sa' tjengya' u'cj, yūnváana sūjrra. Nava uyme'. ⁷Tyajū' na'jīc cytee uutjash tjengsa's: Naa fytūu tash yūnuutsváana sūjrra andy tjengya' pa'jna ūsni tecj añuyā'ja', nava teech yūn yujva uynimeetj. Atsa' mespě'tj, ¿mjiya'rráa cyul ūsya'vana? jite!, ⁸uutjash tjengsa pasrra': Menvijt naa añurráava, atsa' quiwe's luupe'jrra shaacue'je'nja. ⁹Atsa' yūnne'jváana. Tyā'wě yūute yūnmeete, caaspě'tje'jene'nga jīc.

Teech u'y cu'le u'juya' ājasame's sapatu ente nuycatyjini

¹⁰Teech sapatu jycaase ente', Jesusa' judiuwe'sh pcjaacjenitec caapiya'jna ūsu'. ¹¹Atsa' cyte' teech u'y dieciocho añuyā'j ātsā'na u'l'jusac ūsu', ech luucu vit-sa pcyuute cu'le u'juya' ājasamée. ¹²Atsa' Jesus uyrra', pa'yac:

—I'cue' naa weeju catyjiyā'ji'cue jīrra', ¹³Jesusa' ātsā'sa cacuete jya'ndycu. Naapcachja' tyāa u'ya' dundtey cu'le'ya' ājārra', seena' wala Dyusa's wechana we'wec. ¹⁴Jesusa' tyā'wě sapatu jycaase enteva ātsā'a's nuycatyjite', judiuwe'sh pcjaacjenite npiitstjě'jsa' ūusacharra nasaty na'jīc:

—Qui'su' seis en ji'pja' mjiwa'j. Atsa' catyji wēerra' vite ensu myujwe. Nava sapatu jycaase ente yu', catyjiya'rráa yu' pa'jnuwe jīnac jycaaj.

¹⁵Atsa' Jesus pasrra':

—Āaterráa ew we'werra' ūuste yu' ewmeerráa yaacysawe'sh mpaaswe: I'cue'sh cla meerrava i'cue'sh jimba tundni ūste', macue jycaase enteva jyūcjwenderra yu' yusya' ¿jyūna u'l'jmeema'cue? ¹⁶Naa u'ya' Abrahan ji'ja' nava echtjě'ja' dieciocho añuc caātsā'jna ji'pju'. Atsa' macue jycaase enteva echtjě'j cuseju cusa'tje ¿ewmeemañ? jite!, ¹⁷Jesusa's atseyaacysawe'sha' wēsē'jrra', tjaamety. Nava nasa jwee cujsa yu' wecha'ty, Jesus tyacue wala ew yūupa'ga.

Mostasa fiwa's caaja'nda'jni

(Mt. 13.31-32; Mr. 4.30-32)

¹⁸Tyajū' Jesusa' na'jīc:

—Dyus jycaajwa'j ena' ¿ma'wěcy sūjū'cue? Tyā'sa' ¿qui'j yacj caaja'nda'jaqui'tj? ¹⁹Nava na'wē': teech pitstjě'j tyajy quiwete mostasa fiwa's ujte', ma'wě seena' walaacy. Atsa' vichacuē yujva tyāa mostasa cu'tasu yaatutyqui tyā'wěsa'.

Levadura's caaja'nda'jnisa

(Mt. 13.33)

²⁰Qui'quin vite ejemplo na'wěsa yacjcu caaja'nda'jna pta'sh Dyus jycaajwa'j ena's:

²¹—Teech u'ya' tecj libra scuutyj ū'wete le'chcue levadura's ca'ndte', ma'wě jyuca pēetjējecy tyā'wěy yuuna jīc.

Vity pteenzsa
(Mt. 7.13-14, 21-23)

²² Jesusa' Jerusalenna u'juetsrra', chjamsu msuuva iicaapiya'cj u'jue'.
²³ Atsa' teeche'sa' na'wēc pejy:

—Dyus tashte ewte neeyūuwa'jsa' ¿cujmeevátyna? jīte', Jesus pasrra':

²⁴ —I'cue'sha' wala yuj mpa'pchuwe vity pteenzte u'caya'. Na'jī'tj na':
Maava wala yuj u'ca wējētyna, nava tjēyteva pa'pchumeerra yu' u'caya'
ājāmeetya. ²⁵ Yat namu' vitya's apjyā'tje', i'cue'sha' ecaju neeyūurra'
vityte tu'cacana na'jīne'cue: Vitya's meen pjaande, cue'sh u'caya'vatja'w
jīne'cue. Nava tyāa pasrra': Andya' jiimeetj i'cue'sha' majūwe'shne'cue
nava jīte', ²⁶ i'cue'sha' na'jīne'cue: Cue'sha' indy yacj tyutemée mteeva
u'jusatja'w. Atsa' indya' cue'sh chjamsuva caapiya'jng jīvā'cue. ²⁷ Nava
tyā' na'wē pasuna: Na'jīyā'tj na', i'cue'shtyi' jiimeetj majūwe'shne'cue nava.
Andy tashu me'jwe, i'cue'sha' jyucay ewmée yūsarrāa i'cue jīna. ²⁸ Atsa'
i'cue'sh yu' eca cutyi'jni neeyūutspcachja', Abrahan, Isaac, Jacob vite' Dyus
yuwe pta'shsa tyāawe'sh yu' Dyus jycaajna ūsnite ūste uyrra', seena' wala
ū'nene'cue qui'tj yujtyva csuusujna. ²⁹ Ecaju neeyūsāa tyā'wē ūscajnī sec
cāanijūwe'sh, sec cjeenijūwe'sh, majū majūwe'shva jyuca pa'jya'vata', Dyus
jycaajna ūsnite u'caya'. ³⁰ Atsa' cytee u'cawa'jsa āchj maafī yu' e'stewe'sh
ūsta' tyāa yu' yatste yuutyna, naapcachja' yatstewe'sh yu' e'ste yuutyna jīc.

Jesusa' Jerusalena's tjengrra ū'neni
(Mt. 23.37-39)

³¹ Tyāa entey manz fariseowe'sh pa'jrra', Jesusa's na'jīty:

—Me'j ayjyu. Tyā'wēme', Herodesa' indya's icjya'va' jīna pta'shte',

³² Jesus pasrra':

—U'jrra na'jīne'cue tyāa tjē'ja's: Āchj yacj cuscus yacj nee mjīiwa'j
ji'pjtu ech luucu vit-saty nasa ūusu cutyi'jna ātsā'satyva nuycatyjina.
Sa' tecj ente' mjīina jyā'ja'nja jī'c jīne'cue. ³³ Andya' nee u'juwa'j en
ji'pjīrrāatj tecj en ājpcach, tyāa pa'gatey Dyus yuwe pta'shsa' Jerusalen
ecaju yu' uuwa'j ji'pjme'.

³⁴ Jerusalentewe'sha' Dyus yuwe pta'shsaty icjna Dyus caajnisatyva
pāpana pcyuui'cue. Nava andya' i'cue'shtyi' maanzcuēe usva pa'yatj
nwe'weya', atallva ma'wēga luuchcuēty fyuu cu'ta dyiite yu'āshi' tyā'wēy
yūuya', nava nwēesē'jmeel'cue. ³⁵ Tyāa pa'ga mpa'yajcywe. I'cue'sh
chjamba' jyuca ptsuuna sa' āchjūyā'ja' andya's peena yu' uymeene'cue,
Dyus caajni jyutytje qui' quīiwa'j en ājpcach jīc.

Tsu'vy weete ātsa'sa's nuycatyjini

14

¹ Teech sapatu jycaase ente' Jesusa' fariseo npiitstjē'j yattec ū'ya'
u'j. Atsa' vite fariseowe'sh yu' peetjengu'naty ūsu'. ² Tyāa yatte'

teech pitstjêl'j tsu'vy weete âtsâ'sac ũsu'. ³Atsa' Jesusa' na'jînac pêjy ley caapiya'jsawe'sh vite' fariseowe'shtyi:

—Sapatu jycaase enteva âtsâ'sa's nuycatyjite ¿ewmañ? jîte',
⁴tyâawe'sha' pasmée shuuna'ty neeyũu. Atsa' Jesusa' tyâa âtsâ'sa's pa'yarra nuycatyjirrac caaj. ⁵Sa' fariseowe'shtyi' na'jîc:

—I'cue'sh jimba meerrava i'cue'sh cla cafyfe cjêerra u'pte', ¿dundtey cutyil'jmeema'cue jycaase enteva?

⁶Tyâ'jîte', wej yujva pasya' âjâmeeta'.

Boda fiestate pi'cyte walasatj sũjna pa'jsa

⁷Fiestate pi'cynisa' cachni ewsarráaty tyjityjitste uyrra', Jesusa' na'wêc yu'cypej:

⁸—Boda fiestate i'cue'shtyi pi'cyte', cachní ewsu yu' cachnuwe. Tyâ'wême' vite i'cue'shte jy'tjaacue jy'tujtjesa váa pa'jana, ⁹atsa' fiesta namu' i'cue'shtyi quiusuna: Ayte' naajy cachwa'jrrá' jîrra. Atsa' wala tjaamena u'juene'cue cachní achamée ewcjê cachya'. ¹⁰Fiestate i'cue'shtyi pi'cyte', wejyva nmej punzacjê mcaachwe, cyaj i'cue'shtyi pi'cysa uyrra': Namicu, ay yatscjê wejy ewcjê myuj cachya' jîte', wala wechana yatscjê cachya' u'juene'cue. ¹¹Maava walasatj sũjna iiwejch iiwejch yaacysa' tjaamewa'jrráa ji'pjuna. Nava âjmeecuesa na'wêrráa yajcyna fi'nzesa' jy'tujtje wálasa yuuna.

¹²Sa' fiesta namu' pi'cysa'sva na'jîc Jesusa':

—Indya' sãljîya' pi'quitsrra', iindy namicuwe'shtyi yacjtjê'jwe'shtyi pucacjê npe'shtyi meerrava utyasuwe'sh vyyu ji'pjsaty pi'cynu. Tyâ'wême' tyâawe'shva caashwendu'ju'tja'w jîna indya's tyâ'wêy sãljîya' pi'quityna.

¹³Atsa' sãljîya' fiesta vitutsrra', wejyva puuple âjmeecuesa lengsa uysamée tyâ'wêsarráaty mpi'cy sãljîya'. ¹⁴Atsa' tyâawe'sha' ca'tu' tyâ'wêy caashwendu'jya' âjâmeetyna indya's. Nava wechana mneeyũu, tyâa pa'gatey Dyusa' indya's deweena Dyus luuch qui' ityĩ yuu ente' jîc.

Fiestate pi'cyte wa'lsa

¹⁵Tyâ'wê pta'shni's wêsêl'jrra', mesate u'psa teehsa' na'wêc we'we Jesusa's:

—Dyus jycaajna ũsnite u'carra ũ'sa yacja' wala yuj wecha yujna jîte',

¹⁶Jesusa' na'wêc cuentul'j:

—Teech pitstjêl'j fiesta wala vitutsrra', nasa seena' wala cuj pi'cycu sãljîya'.

¹⁷Sa' ũ'wal'j ora âjâtste', teech selpisa's pa'yaya' caacj: Ũ'ya' myujwe, jyuca pjeul'jniyãl'j ũsa' jîna pa'yacajn. ¹⁸Nava jyucaysa wa'lrira na'wêrráaty pas: Nyafytewe'sh pasrra': Quiwetj wey, sa' tjengya' u'jue ji'pjtu. Atsa' tee peltunaĩ jîc. ¹⁹Atsa' vite we'werra': Diez novillotj wey, sa' tjengya' u'juetstju. Naa pa'ga tee peltunaĩ jîc. ²⁰Atsa' tecjtewe'sha' na'wêc pas: Áchrráatja'w ptamúu, sa' yujya' tunduume'nja jîc. ²¹Tyajũ' selpisá' shawendna u'jrra tyajy patrona's jyuca pta'shcu. Atsa' patrona' wala ũusacharra tyâ's selpisa's na'jînac jycaaj: Dundtey plaasasu cllicjunsu qui' u'jrra puuple âjmeecuesa lengsa yafy puuple

uysamée tyā'wēsaty pi'cyrra ayte pe'l'jna yuweene'nga jīc. ²²Atsa' selpisá' u'l'rra qui' shawendna pa'l'rra': Iindy jycaajni's cytey yuutj, atsa' pa'l'jty. Nava cachwa'l' yu' nee ūsiyrráata' jīte', ²³patrona' selpisá's na'l'jīc: Achja' chjamb ecaju jyu'juwe'sh vite' dyl'j u'l'satyva pi'cyrra ayte ca'ga'l'jane'cue macue wa'lutsteva āandyijimée, andy yatte utapcach. ²⁴Nava nyafyte pi'cynisa wa'l'tyi tyāawe'sh yuutyi' caapa'ja'l'me'nja andy yatte puutsya' jīc. Tyā'l'jīnac cuentu'l' Jesusa'.

Jesus yacj fi'nzewa'l' tjēya'

²⁵Tyājī' Jesus e'ste nasa wala u'l'juets yu'ty, atsa' tyāawe'shtyi yu'tjengrra na'l'jīc:

²⁶—Maava andy yacj yuusá' tyajy ney, njī'j, nyu, luuch, nyacjwe'sh, npe'shwe'shtyi nvijtrra tyā'wēy iwejch yajcyna fi'nzeni's uu entepcach nvijtmeerra yu', andy yacj fi'nzeya' ājāmeena. ²⁷Sa' macue tjēyte uupchājteva tyāaty' yajcymée, andy yacj yujmeerra yu' andy yacj fi'nzeya' ājāmeena. ²⁸I'cue'sha' yat wálasa tyajya'varra', jyuca jyā'l'jwa'l' quījquījva āj ūstymañ sūjna cachrra ¿yajcymeema'cue? ²⁹Tyā'wē yūumeete', quiwete pyājn pa'l' mjiirrarraā nvijtte', maava uysa' npeevyshicatyna: ³⁰Jyā'l'jya' ājāme' jīna.

³¹Tyā'wēy maa npiitstjē'l'jva vite npiitstjē'l'j yacj puiiya'varra', cachrra ūs yajcymeema'c: Naa diez mil soldau yacjrráa veinte mil soldauty ¿cnayma'tj? sūjna. ³²Sa' ewupchājmeete', vite npiitstjē'l'j utyameyna, yuwe cajana cuch puiimée ewterraj neeyūuya'. ³³Atsa' tyā'wēy i'cue'shva dyicjēy jyuca ūs yajcyrra i'cue'sh ji'pjuni's nvijtmeerra yu', andy yacj fi'nzeya' ājāmeene'cue.

Nenga seelpimeesa

(Mt. 5.13; Mr. 9.50)

³⁴Nenga' selpi'c, nava jyuca shūucājrra' ¿ma'wē selpiicy? ³⁵Quiwete shaacue'l'jwa'l'rráa yujva selpi'tsme', pumbwa'l'rráac yu'. Jiyuwa'l'jsa ūsrra', jiyune'cue jīc.

Piisháa vitusa yacj caaja'nda'l'jni

(Mt. 18.10-14)

15 ¹Gobierno jīi vyu pcjacsawe'sh vite' pcalsawe'sh jyucaysa Jesus pta'shni's wēsē'l'jya' utyaaty. ²Tyāa pa'gaty Dyus ley caapiya'l'sawe'sh vite' fariseowe'sha' Jesusa's na'l'jīna nuywe'we:

—Naa pitstjē'l'ja' wala fiy yu'c, pcalsawe'shtyi jypa'garra tyāawe'sh yacjcu ū'we' jīte', ³Jesusa' naa ejemplo'scu pta'sh:

⁴—I'cue'sha' cien piisháa ji'pjrra', teechsa' vyaameete', vite noventa y nuevasaty cysūu nvijtrra ¿piisháa vitusa's pacueya' u'l'jmeema'cue uypcach? ⁵Sa' piisha's uyrra', yacjrra wala wechana ⁶yatte pa'l'rra, namicuwe'sh vite' cysūu utyasuwe'shtyi pa'yarra: Andy piisháa vitusa's uyyā'tj, atsa' andy yacj ja'nda wecha mpu'chwe jīna ¿pta'shmeema'cue? ⁷Na'l'jī'tj na': Cieluteva tyā'wēy noventa y nueve nasa ewsate jytjaacue

wala wecha yuja' teech nasarráava pcaltyi nvijtrra Dyus tashte shawendte'.

Vyu weteni's caaja'nda'jni

⁸Tyā'wēy teech u'y diez vyu mush ji'pjrra', teechsa wetete', ¿lampara's pqui'tarra yatte jypa'yacy pandna pacuemeema'c uypcach? ⁹Sa' tyāa vyu's uyrra' tyajy namicuwe'sh vite' cysūu utyasuwe'shtyi pa'yarra: Ū'cue vyu wetesa's uytju, atsa' ū'cue yacj ja'nda wecha mpu'chwe jīna ¿pta'shmeema'c? ¹⁰Na'jī'tj na': Dyus angesleswe'shtyiva tyā'wēy wecha yuja' teech nasarráava pcaltyi nvijtrra Dyus tashte shawendte'.

Luuch ney yatu casejni

¹¹Tyājū' Jesusa' vite ejemplo na'wēsac pta'sh:
—Teech pitstjē'j e'nz nchi'ccu ji'pju'. ¹²Atsa' nuuchsa' neya's na'jīc: Tata, iindy ji'pjuni andy jīi yuuwaja's tyujnderra maj jīte', neya' tyujnderra ducju. ¹³Atsa' jypa'gani manz enterrāa tyāa nchi'c nuuchsa' ney ducjni's jyuca pcjacjrra jyu'j quiwen u'cj. Sa' cyteea' ewmēe yūuna jyuca vyu's psuwna pembac. ¹⁴Tyā'wē vyu's psuwna pemaatspcachja', wējē en pa'cj tyāa quiwete. Atsa' tyāa pitstacya' wēeya' yajcyu. ¹⁵Sa' cysū mjīi pacueya' u'cj teech pitstjē'j tashte. Atsa' tyāa pitstjē'j yu' cuchi sā'jīya'c caaj tyajy tulte. ¹⁶Tyājū' tyāa pitstacya' wēerra cuchi ū'pusnava ū' wēc. Nava tyā'wēsarrāa yujnava puutsmeeta' tyāa pitstacya's. ¹⁷Tyājū' ūus yajcyya' cachrra naa sūjc: Andy yu' aye wēerra uuya'vatj, naapcachja' andy tata yatte mjīisa piuna' quīj yujva wēemēe ūstyna maanzcuēerrava. ¹⁸Atsa' andy tata yatna qui' shawendna u'jrra na'jī'nja: Tata, Dyus dyi'pte wala ājmēe yūutj, sa' indya'sva tyā'wēytju wala ājmēe yūu. ¹⁹Sa' nchi'crrava āchja' iindy peeygāawa'jmeeyā'tj. Nava iindy piun na'wērrāava meen jypa'ga jī'nja sūjnac yajcy. ²⁰Tyājū' quiittera ney yatna shawendna u'cj. Atsa' pa'jatste', neya' jiyuc jyu'tje yujyina. Sa' nchi'ca's peeygājrra pu'tjengya' wuwuuna u'jrra, psha'ndrrac wecha. ²¹Tyājū' nchi'ca' na'jīc neya's: Tata, Dyus dyi'pte wala ājmēe yūutj. Sa' indya'sva tyā'wēytju wala ājmēe yūu. Nchi'crrava, āchja' iindy peeygāawa'jmeeyā'tj jīte', ²²neya' selpisaaty pa'yarra na'jīnac jycaaj: Ropa ewsa cutyi'jrra dund mcaatjel'jwe. Sa' sultyjicjava cusete qui'prra spaatuva mpaatjwe. ²³Teech tulu pitstacy niishsa's nicyya' u'jrra miicjwe, fiesta vitrra ū'ya'. ²⁴Andy nchi'ca' uuníi na'wē yā'jrrava qui'quin ityī yuuc, sa' vituna u'jurrava qui' vyaac jīrra', wala wechana fiesta vittyi.

²⁵Naapcachja' nchi'c ntjē'jsa yu' mjīi ejisu u'jrra', shawendna yatte pa'jatsrra', wēsē'cj cu'jna tucani música zhichcuesa's. ²⁶Sa' teech selpisá's pa'yarra pējyuc: Yatte' ¿quīj yūuna ūstyna? jīte', ²⁷selpisá' pta'shcu: Iindy nyacj jyu'j quiwen u'jsa qui' shawendna pa'cj. Tyāa pa'ga iindy tata' tulu niishsa's quicje'jrra fiesta'jatsa' jīte', ²⁸nyacj ntjē'jsa' wala ūusacharra



(San Lucas 15.21)

yatte u'caya' wa'lcu. Atsa' neytjē'ja' casejrra wala pytjaa we'wec u'cacajn.
²⁹Tyajū' tyāa nchi'c yu' na'jīc neya's: Andya' maanzcuēe añu iindy
 tashte bagach yujva wa'lmée selpiina ūsteva jiing. Nava indya' teech
 caplacuērrāa yujva iiusmeeng, andy namicuwe'sh yacj fiesta'cjan. ³⁰Nava
 iindy nchi'c tyacue wala u'y ewmeesa yacj vyyu's psuwna pembasāa yu'sa'

tulu niishsa's icjrrang fiesta'ja' jíte', ³¹ neytjêlj pasrra': Andy nchi'c, isa yuj we'we'ng. Indya' bagachteva andy yacj tyutemée nesngu yu', naa pa'ga andy ji'pjuni' quíjva jyuca iindy jüirrarráata'. ³² Tyā'wē iindy nyacj uuní na'wēyā'jrrava qui'quin ityī yuuc sa' vituna u'jurrava qui' vyaac tyāa pa'ga wechana peja fiesta'jwa'j ji'ptja'w jíc neya'.

Yultumu patron jī's ewmée jype'jsa

16 ¹ Tyajū' Jesusa' na'jīnac cuentul'j tyāa yacj u'jusawe'shtyi: —Teech patron wala ji'pjsa' teech yultumu ji'pju'c. Atsa' tyāa yultumu ewmée yūuni's pta'shtyi: iindy yultumu' iindy ji'pjuni's wala psuwna ūsa' jíte', ² tyāa patrona' tyajy yultumu's pa'yarra na'jíc: Andy ji'pjunityi' wala psuwna ūsa' jī'ty sa' indya' ¿quij yūuna ūsnga? Tyā'wē yā'jrra', indyna neewe'weni andy ji'pjuni's jyuca qui' mducj andyna. Indya' peena yu' andy yultumu selpiia' ājāmeene'nga jíte', ³ yultumu' ūus yajcyay' cachcu: Āchja' ¿quij yūuqui'tj andy mjiia's patron cusa'tje'? Andya' uutjashte mjiia' yu' jiimeetj sa' lmushnu tjāasna u'jute yu' tjaameyujna. ⁴ Atsa' patron tashu casejnijū maava tyāawe'sh yat-su pe'jna sāl'jicajn na'wē yūuya'c yajcy: ⁵ Patrona's yuulsaty teech teechrraj pa'yarra, nyafyte utyaasa's pējycu: Indya' ¿manz yuulnga andy patrona's? jíte', ⁶ Cien tarro aceite yuultju jíc. Atsa' yultumu' na'jíc: iindy yuuluni etsa' ayga ūsa' tyā'sa' dund yuj cjūcjrra, yuula's cincuentarrāa mqui'p jíc. ⁷ Tyajū' vite'scu pējy: Indya' ¿macue yuulnga? jíte', cien arroba scuutyj yuultju jíc. Atsa' yultumu' na'jíc: iindy yuuluní etsa' ayga ūsa' tyā'sa' dund yuj cjūcjrra, yuula's ochentarrāa mqui'p jíc. ⁸ Tyajū' tyāa yultumu ewmeesa' tyā'wē dundtey yūuni's patrona' jiyurra': Ma'wē fi'nzewa'ja'sva dund yuj ūus yaaqui'c jíc. Atsa' naa quiwete nasa pcalsa' Dyus luuchte jy'tjaacuety dund ūus yaaqui' tyāawe'sh ma'wē puuty we'wewa'ja'sva.

⁹ Atsa' andya' i'cue'shtyi' yu'cypeje'tj tyā'wēy yūucajn, naa quiwete ji'pjuni's psuwmée jypa'yacy mcseelpi'jwe namicu vitna. Cyaj naa quiwete ji'pjunisa ptsuuteva, vite quiwe ptsuwa'jmeete i'cue'shtyi jypa'gawa'jsa ji'pjune'cue.

¹⁰ Maava le'chcuerrāa ji'pjrrava jypa'yacy jype'jsa', walasa'sva tyā'wēy jypa'yacy jype'jena. Atsa' maava le'chcuerrāateva jypa'yacymée psuwna jype'jsa', walasa'sva tyā'wēyrrāa jypa'yacymée psuwuuna. ¹¹ Tyā'wē naa quiwete ji'pjuni'srrāa yujva jypa'yacymée psuwna fi'nzetste', i'cue'shtyi' ¿quim neewe'werra nviitucy ptsuwa'jmée ji'pjuwa'ja's? ¹² Peecy jīmée vite jīi yujtyva jypa'yacymée psuwna fi'nzetste', ¿quim ūsucy i'cue'sh jīi yuuwa'ja's?

¹³ Maa selpisāa yujva e'nz patrontyi selpiia' ājāmeena. Tyā'wē viterrá's wendyna fi'nzerra', vite patron yu'sa' atsena. Sa' teechsa jycaajinrrá's cytey yuurra', vite patron jycaajni yu'sa' cytey yuuya' ājāmeena. Tyā'wēy Dyusna selpiina naa quiwete ji'pjuni'sva pa'pchuna e'nz ajtey yajcyna

fi'nzeya' ājāmeena jīte', ¹⁴ fariseowe'sha' naa quiwete ji'pjunirrā's wejy pa'pchuna fi'nzesa wēsēljrra', Jesusa's weech we'wety. ¹⁵ Atsa' Jesusa' na'jīc fariseowe'shtyi':

—I'cue'sha' naa quiwete nasaa dyi'pte yu' wala ewsa na'wē fi'nze'i'cue. Nava Dyusa' i'cue'sh ūus yaacynityi' jyuca jiia'. Naa quiwete nasarrāa i'cue'shtyi' ewсата' jīte', Dyus yu' tyā'jīmeena.

Dyus jycaajni ley scjēwwa'jsamée

¹⁶ Moises ley vite' Dyus yuwe pta'shsawe'sh caapiya'jni' Juan Bautista entepcachtyi' ūsu'. Cyajuc yuwe u'sesa' Dyus jycaajwa'j ena's pta'shni yuu, atsa' maava Dyus jycaajnitewe'sh yuuya' wala pa'pchu'ty. ¹⁷ Macue cielu ptsuuna, quiweva ptsuuna, nava Dyus jycaajni ley yu' wej yujva yu'ptje'jwa'jsame' bagachte yujva jīc.

Ptamsa tyuteewa'jme's Jesus caapiya'jni

(Mt. 19.1-12; Mr. 10.1-12)

¹⁸ Maa pitstjē'jva peecy nyu's wāatājrra vite yacj ptamuurra', tyā' pcal yuuna. Atsa' maa pitstjē'jva tyāa u'y wāatāanisa yacj ptamuurra', tyāava pcal fīrrāa yuuna.

Teech ji'pjsa vite' puuple Lasaro

¹⁹ Tyajū' Jesusa' vite cuentu na'wēsac pta'sh:

—Teech pitstjē'j wala ji'pjsa u'pu'c. Sa' ropa ewsa yuurraa atjrra een isac wala wechana fiesta vitu'. ²⁰ Tyāa ji'pjsa yat vityte teech puuple wā'jyrrāa uta ji'pjsa Lasaro yaasesac quiwete cachrra u'pu'. ²¹ Tyāa puuple yu' wēerra ji'pjsa mesa tashsu quīj ū' pe'larrāava ūshisaty ū'wēn ūytjasna u'pte', alcu' cūjrra tyāa wā'jytyi techi'ty. ²² Nava teech ente' tyāa puuple' uuc. Atsa' angeleswe'sha' jyūna u'jty wēt ūsnite Abrahan yacj ūscajn. Tyāa e'su' ji'pjsava uuc, atsa' tyā'sa' pendaaty. ²³ Atsa' ji'pjsa' uusaawe'sh ūsni cshavyte pytjaa yaachana ūsrra', pesayrra jyu'tje uycu Lasaro yu' Abrahan yacj wēt wechana u'pte. ²⁴ Tyajū' na'jīnac sus we'we: Tata Abrahan, andya's meen peeygāj. Seena' yuj wala pa'ga yuuna ūstju naa ipy wala achate. Atsa' Lasaro's mcaaj tyajy cuse vitsrrāanava yu'te tuupja'jrra andy tjunete tuupja'jya' yuucajn jīte', ²⁵ Abrahan pasrra': Nchi'c, miiyajcy. Indya' nee ītyī u'juy yu', wala yuj wēt wechana fi'nzesa yu'ng. Naapcachja' Lasaro yu' wala pytjaa yuuna ūuste fi'nzec. Nava āchja' ayte wēt wechana ūsa', naapcachja' indya' wala yuj pytjaa yuuna ūsngu. ²⁶ Pytjaang we'we' nava peña tjcafy wala tyujndena ūsa', atsa' ayjyuwe'sh cytee pesaj wēerrava ājāmeetyna, sa' tyajuwe'shva ayte pesajya' ājāmeetyna jīte', ²⁷ chjavysāa pasrra': Tyā'wēyā'tje', Tata Abrahan, indya'stju pytjaa we'we', atsa' Lasaro's meen caaj andy tata yatna, ²⁸ cyte' tajts nyacj ji'ptju tyāawe'shtyi pta'shya' andy ayte nacue wala pytjaa

yuuna ũstju cytee yuucajmén jíte', ²⁹Abrahan pasrra': Tyāawe'sha' Moises vite' Dyus yuwe pta'shsawe'sh fi'jnity ji'pjta' na' tyāaty wēsē'jetyna jíte', ³⁰chjavysáa pasrra': Tata Abrahan, tyā'wē yujta'. Nava maarráava uusaawe'sh cshavyu ityī yuurra tyāawe'shtyi' pta'shya' u'lvatsa', pcaltyi nvijtrra Dyus tashte qui' shawenduutyna jíc. ³¹Atsa' Abrahan pasrra': Moises vite' Dyus yuwe pta'shsa tyāawe'shtyi' nwēesē'jmeeyā'jrra', macue uusaawe'sh cshavyu qui' ityī yuurra pta'shteve, cyul yujna jíc.

Pcalte cweete'jya'mée jypa'yacywa'ja'

(Mt. 18.6-7, 21-22; Mr. 9.42)

17 ¹Jesusa' na'wēc caapiya'j tyāa yacj u'jusawe'shtyi: —Nasaty pcalte cweete'jsa yu' bagachteva nes yuutyna. Nava pcalte cweete'jsa' wala yuj ñus castigo cnayuuna. ²Atsa' tyāa pcalte cweete'jsa's scuutyj ũ'cjni cueta's tyicjcte tundra ĩcj wala dyiicjē wātājvats yuurráa wejy ewna, naa le'chcuesaty pcalte cweete'cjamen. ³Tyā'wē yūuya'mée jypa'yacy me'juwe.

Meerrava indya's vāa ājmée yūuna iindy yacjtjē'j atsa' tyā'sa' myu'cypej. Tyajū' ājmée yūusa': Meen peltunāi jíte', indya' peltunāywa'j ji'pjngu. ⁴Macue teenterráa sietepcach ājmée yūurrava, cyanz usíi indya's perdon pējyya' pa'tje', indya' peltunāywa'j ji'pjngu jíc.

Dyusa's jweeírráa chjächja yaacywa'ja's pēyni

⁵Tyajū' Jesus yacj u'jusawe'sha' na'wēty pējy:

—Dyusráana wejy chjächja yajcyna fi'nzecajn cue'shtyi' meen pu'ch jíte', ⁶Jesus pasrra':

—Dyusa' pu'chjina sūjwa'ja's mostasa ñiñ na'wēcūerráava ji'pjavatsa', naa fytūu tasha's cjumbeterráa ĩcj walate me'j cjēeya' jíte', tyāa fytūu tasha' cytey yuuna jíc.

Selpisa' na'wē yuua'jsa'

⁷I'cue'sha' teech selpisáa ji'pjte', tyā' mjii ejsu u'jurra cusutste pa'tje': Myuj ayte cachrra ũ'ya' ¿jīma'cue? ⁸Tyā'jīmée wejyva na'wē cajane'cue: Andy ũ'wa'j iitse'jrra mesate pjeu'jrra mtyaj. Sa' andy ũ'na jyā'tje, indya' ũ'wene'nga jīne'cue. ⁹Patrona' ¿selpisa's wechama'c tyā'wē cytey yuupa'ga? Wechameena. ¹⁰Tyā'wēy i'cue'sha' Dyusa's selpiwa'jsai'cue na' macue tyajy jycaajni's jyuca cytey yuurrava, wechaa jytjāaswa'jsameei'cue jíc.

Diez pitstjē'j wā'jy weete ātsa'saty nuycatyjini

¹¹Tyajū' Jesusa' Jerusalenna u'juetsrra', Samaria vite' Galilea quiwesuc scjēwna ul'. ¹²Atsa' teech chjambte' diez pitstjē'j wā'jy wee canzh ji'pjsaty Jesusa's puuty uyya' casej. Nava jyu'tjerráa yujurra, ¹³na'jīnaty sus we'we:

—Cue'shtyi meen peeygāj jīte!, ¹⁴ Jesusa' tyāawe'shtyi' na'wēc jycaaj:

—I'cue'sh cacueti sacerdotewe'shtyi tywesya' me'jwe jīna jycaatje', tyāawe'sha' dyi'tje u'juetsty yu', naapcachja' tyāa wā'jy we' naa dundte jyuca wēetcu. ¹⁵ Atsa' teeche'sa' catyjijā'jrra', dyi'juu shawendcu Dyusa's sus we'wena wechana. ¹⁶ Sa' Jesus tashte cūjrra' peejyūcuc: Wech ew yūung jīna. Tyāa pitstjē'j yu' Samariajūwe'shcu yu'. ¹⁷ Atsa' Jesusa' na'jīc:

—¿Diezsafī jyuca catyjimeevá'nta? Vite nueveta yu' ¿mteeta yuu?

¹⁸ ¿Naa pitstjē'j vite ajūwe'shrráa vā' Dyusna wechaya' shawend? jīrra', ¹⁹ tyāa pitstjē'ja's na'jīc:

—Quiiterra me'j. Indya' catyjining neeyūu, tyā'wē Dyusa' nuycatyjina sūjrrane'nga cytey nwēesē'j naa pa'ga jīc.

Dyus Nchi'c Nasa Yuusáa pa'jwa'j en

(Mt. 24.23-28, 36-41)

²⁰ Tyajū' fariseowe'sha' Jesusa's na'jīnaty pējy:

—¿Bagach Dyusa' isa naa quiwete jycaajacy? jīte', Jesus pasrra':

—Dyus naa quiwete jycaajni's yafyju yu' āate ya'uymeena.

²¹ Dyusa' jycaajya' pa'jrra: Achja' ayte ūsa' meerrava cytee ūsa' jīna ya'we'wemeena. Tyāa pa'gatey i'cue'sha' Dyus jycaajni enteyā'j ūsi'cue.

²² Tyajū' tyāa yacj u'jusawe'shtyi na'jīnac yu'cypej:

—I'cue'sha' Dyus Nchi'c Nasa Yuusáa naa quiwete quīini's dund uy wējēne'cue, nava dund yu' uymeene'cue. ²³ I'cue'shtyi' nasa yu' na'jiváatyna: Ayte ūsa' meerra' cytee ūsa' jīteva, u'jmeene'cue sa' nwēesē'jvameene'cue. ²⁴ Cpi'sh cwejnevatsrráa ma'wē naa dundte majūva jyuca vyaacy, tyā'wēyrráa yuuna Dyus Nchi'c Nasa Yuusáa pa'jwa'j en ājite'. ²⁵ Nava tyāa en ājmeyna, Dyus Nchi'c Nasa Yuusa' wala pa'ga yuuna naa ensu nasa yaatseni. ²⁶ Noé ensuva ma'wēga yuu, tyā'wēyrráa yuuna Dyus Nchi'c Nasa Yuusáa pa'jwa'j ensuva. ²⁷ Noé ensu nasa' quīj yujva peejymée ū'na ptamuuna vite' tyāawe'sh niisaty caaimi'a'jnaty ūsu'. Nava Noé barcote u'catspcachja', nus wala pa'jrra icj utate' jyuca uuty. ²⁸ Lot ensuva tyā'wēytyi yūuna ūsu', quīj yujva peejymée ū'na, uutjash vitna, tyweyna, yatva tyā'wēytyi wala tyajna ūsu'. ²⁹ Nava Lot Sodomajū casejetspcachja', cielujū asufre bejna quījrra jyucaysaty cambcu.

³⁰ Tyā'wēyrráa yuuna Dyus Nchi'c Nasa Yuusáa vyaa enteva.

³¹ Tyāa ente' ēeyatte vāa u'psa yuuna, nava sa'jrra quījrráanava dyiiu cutyi'jwa'j enrráa yujva ji'pjumeena. Sa' maaíi yu' chjamb ecaju vāa u'ju yuuna, nava yatna shawendwa'j enrráa yujva uymeena. ³² Lot nyuuva ma'wēga yuu tyā'sna miiyajcywe. ³³ Tyāa ente' maa nasava naa quiwete ityī fi'nzenirrá's yaacysa', Dyus yacj ityī fi'nzewa'j yu'sa' iviituna. Nava maava naa quiwete ityī fi'nzeni's yaacysame', Dyus yacj ityī fi'nzewa'ja's ji'pjuna.

³⁴ Na'jī'tj na': Tyāa custe' teeche camaga e'nz vāa dejna ūs yuutyna. Nava teeche'sa's pejna u'jni yuuna, naapcachja' vite yu' neeyūuna. ³⁵ Tyā'wēy

e'nz u'y váa cyteerraj ũ'cjna ũs yuutyna. Nava teehsa's jyūna u'jni yuuna, naapcachja' vite yu' neeyūuna. ³⁶Meerra' e'nz pitstjē'j váa cyteerraj mjiina ũs yuutyna. Nava teehsa's jyūna u'jni yuuna, naapcachja' vite yu' neeyūuna jīte', ³⁷Jesus yacj u'ljusawe'sha' na'wēty pējy:

—¿Mtee tyā'wē yuucy? jīty. Atsa' Jesus pasrra':

—Cacue cja'ty mcaa uuna ũsteva, mēewējya' āate pcjaacjetyna jīc.

Cjuēs ewmeesa viuda's nwe'weni

18 ¹Dyusa's pechcanamée bagachteva tyāa yacj puuty we'wena nes yuucajn naa ejemplo'scu pta'sh Jesusa':

²—Teech chjambte teech cjuēs u'pu'c, Dyusa's yaacysamée sa' nasatyva peeygāja'tsme'. ³Tyāa chjambte' teech u'y viudac u'pu', sa' cjuēs tashte pāatyji'cjya' u'jna nescu yu': Ũ'cue's meen nwe'we, atsesa wala pcyu'ty jīna. ⁴Maanzcuēe usva pa'tjeva, tyāa cjuēsa' pu'chme', nava na'wēc yajcy: Dyusnava yaaquitsmeetj sa' nasa maa yujtyva peeygāasameetj. ⁵Nava naa viuda' wala cuch tajtatey pa'ja'c atsa' pu'chji'nja peena yu' pa'cjamén jīc.

⁶—Cjuēs ewmeesa yujva tyā'wēc pu'chya' yajcy jīc Jesusa'. ⁷Dyusa' ¿tyā'wēyrrāa pu'chmeema'c tyajy tyjityjnisatyi'? Tyā'wē cus ma'c yuu en ma'c yuu nava pytjaa we'wena nes yuute' pu'chya' jytjēeyuumeena. ⁸Na'jī'tj na': Dyus Nchi'c Nasa Yuusāa naa quiwete shawendna quīi enteva ¿tyā'wē Dyus yacj pu'vitumée neewe'wesa ũsma'ty yuu? jīc.

E'nzsa dyuus yatte Dyus yacj puuty we'weya' u'cani

⁹Jesusa' na'wēc vite ejemplo pta'sh tyā'wē maafi yu' wala ewsatja'w sūjna vite yuutyi' ajtsena fi'nzesawe'shtyi:

¹⁰—E'nz pitstjē'jty dyuus yatte Dyus yacj wechana puuty we'weya' u'ca. Teechsa' fariseo', atsa' vite' gobierno jīi vyu pcjacjsac yu'. ¹¹Fariseo yu' yujurra na'jīnac Dyus yacj puuty we'we': Dyus, indya's wala wecha'tj, andya' vite nasa na'wēmeetj. Tyāawe'sha' pesweeta', ewmée canzhsata'. Sa' nyu ji'pjrrava vite yacj pcal yuusata'. Atsa' andya' tyā'wēsameetj. Naa pitstjē'j ayte ũsa' gobierno jīi vyu pcjacjsa tyā'wēsarrāa yujva meetj. ¹²Sa' qui'sute e'nz us yūuna'tj. Andy cnayni quījquijnava diesmo ducje'tj indya's jīc. ¹³Naapcachja' gobierno jīi vyu pcjacjsa yu' jyu'tjerrāa yujurra cielute yujva pagaymée naasāa tyajy pechuterrāac iicacana Dyusa's na'jī': Dyus, andya's meen peeygāj. Wala yuuwesatj jīnarrāac we'we'. ¹⁴Na'jī'tj na': Gobierno jīi vyu pcjacjsa we'weni's Dyusa' pasne'. Nava fariseo yu' pasnimeene' yatna shawendna u'j. Maava iiweych iiweych yajcyrra we'wesa', jytjaacue ājmeecuesa yuuna. Nava maava ājmeecuesa na'wē yajcyna we'wesa' iiweych yaacysate jytjaacue ewsa yuuna jīc.

Luuchcuēty Jesus bendeciyni*(Mt. 19.13-15; Mr. 10.13-16)*

¹⁵Tyājū' nasa' Jesus tashte tyāawe'sh luuchcuēty nuypa'jty Dyus cusete neewe'wecajn. Atsa' Jesus yacj u'jusawe'sha' ūuscha we'wety luuchcuēty nuypa'jsaty. ¹⁶Nava Jesusa' tyāa yacj u'jusawe'shtyi pa'yarra na'jīc:

—Luuchcuē andy tashte yujte!, cuch yupnuwe, tyāa pa'gatey Dyus jycaajna ūsnisa' naa luuchcuēwe'sh na'wēsa jīi fīrrá'. ¹⁷Isatj we'we', maava luuchcuē na'wē Dyus jycaajwa'j ena's wa'lmée jypa'gameerra yu', bagachte yujva Dyus tashte u'cameetyna jīc.

Pitstacy wala ji'pjsa Jesus yacj puuty we'weni*(Mt. 19.16-30; Mr. 10.17-31)*

¹⁸Tyājū' teeche pitstacy npiitstjē'jsa na'wēc paapējy Jesusa's:

—Indya' wala ewngu quijsuva jyuca, tyāa pa'ga na'wētj paapēyi': ¿Ma'wē yūurra ptsumée ityī fi'nzewa'ja's ji'pjuqui'tj? jīte', ¹⁹Jesusa' na'jīc:

—¿Quīj yuupa'ganga andya's ewsa jī'? Naa quiwete' teechrāa yujva ewsa yu' meeta'? naasāa Dyus yuurāa ewsa ūsa'. ²⁰Ptsumée ityī fi'nzewa'ja's ji'pju wēerra', Dyus jycaajnityi' jīing tyāatyī' cytey myuu. Tyā' naata': Ptamsayā'ja' vite yacj pcal yuuwa'jme'. Nasa icjwa'jme'. Pesweewa'jme'. Vitety ishīina nuywe'wewa'jme'. Neywe'shtyi peeygājna ewrrāa yūuna fi'nzewa'ja' jīte', ²¹tyāa pitstacy pasrra':

—Tyāatyī' le'chcuējūjy jyuca cytey yuunatj walāa jīc.

²²Atsa' Jesus wēsē'jrra' na'wēc jycaaj:

—Tyā'wēteva, nee peeji'. Iindy ji'pjuni's jyuca tyweyrra, puuplesaty peesune'nga. Tyā'wē yūurra', cielute ji'pjsa yuune'nga. Tyā'wē yūurra andy yacj myuj jīte', ²³tyāa pitstacya' wala ūusna neeyūuc, wala ji'pjsa yu'c tyāapa'ga. ²⁴Tyā'wē ūuste', Jesusa' na'jīnac we'we:

—Maava wala ji'pjsa yacja', wala yuj tjēya' Dyus jycaajna ūsnite u'cawa'ja'. ²⁵Atsa' tyā'wē tjēysa's yajcyte yu', camello yujva tjēymée vāa yūnz cāfyga u'caya' ājatyna.

²⁶Tyā'jīte', na'wēty we'we:

—Tyā'wē tjēyte', ¿quim ewte neeyūuya' ājācy? jī'ty. ²⁷Atsa' Jesusa' na'jīc:

—I'cue'shrrāa yu' ājāmeene'cue. Nava Dyus yacj yu', quīj yujva tjēysa meea' jīte', ²⁸Pedro' na'wēc we'we:

—Cue'sha' indy yacj yujya' cue'sh ji'pjuni's jyuca nvijttja'w jīc. ²⁹Atsa' Jesus pasrra' na'jīc:

—Isatj we'we': Dyus jycaajni's nwēesē'jya' maava yat, neywe'sh, nyacjwe'sh, nyu, nchi'cwe'sh tyā'wēsaty nvijtrra', ³⁰naa quiwete nee ūsī tyāa nviitnisate jytjaacue jypa'gatyna, sa' vite quiwete' ptsumée ityī fi'nzewa'ja's ji'pjutyna jīc.



(San Lucas 18.22)

Jesusa' tyajy uuwa'ja's qui' pta'shni

(Mt. 20.17-19; Mr. 10.32-34)

³¹ Jesusa' tyāa yacj u'jusawe'sh docesaty fiite pa'yarra na'wēc pta'sh:
—Āchja' Jerusalente pa'jya' u'juetstja'w, atsa' Dyus yuwe
pta'shsawe'sha' fil'ty Dyus Nchi'c Nasa Yuusá's ma'wē yūuwa'tjeva tyā'
jyuca cytey yuuna. ³² Dyus Nchi'ca's vite nasaty ducj ya'vata', atsa'
tyāawe'sha' npeevyshijcana wēeshuuna fyne'sh avytjetjna yūuya'vata'.
³³ Sa' wala pechujcuena yuurra icjetyna. Nava tecj ente' qui' ityī yuuna
jīteva, ³⁴ tyāa yacj u'jusawe'sha' wej yujva jiyumeeta' sa' tyā'wē cytey
yuutyna sūjū'tsvameeta'.

Teech pitstjē'j Jericotewe'sh uyya' ājasame's Jesus nuycatyjini

(Mt. 20.29-34; Mr. 10.46-52)

³⁵ Tyajū' Jesusa' Jerico chjambte pa'jatste', teech pitstjē'j uysaméec dyl'j
pucate cachrra lmushnu pējyna u'pu'. ³⁶ Sa' nasa wala scjēwna susutste
wēsē'jrra', pējycu:

—¿Quij yuutsna? jīna. ³⁷ Atsa' nasa pasrra':

—Jesus Nasaretjuwe'sh aysu scjēuutsa' jīte', ³⁸ uysame' na'jīnac sus
we'we:

—¡Jesus, David ji'j, andya's meen peeygā! jīna pytjaa we'wete', ³⁹ nasa
yatste u'jsawe'sh yu':

—Shuuna' myuu jĩnaty wēeshu we'we. Nava tyāa yu' jweeírráac sus we'we:

—¿David ji'j, andya's meen peeygāj! jĩna.

⁴⁰Tyājũ' Jesusa' nee yujurra pe'jya' caacj. Sa' utyaana cūjte', na'jic:

⁴¹—¿Quĩnga yũu jytjāasu'? jite':

—Andya' uyya' ājā'tsmeetj, tyāasatj uy wējē' jic.

⁴²Atsa' Jesus we'werra':

—Caayu'u'juna sũjrrane'nga andya's pi'cy, tyāa pa'ga āchja' uyna mneeyũu jĩtspcachja', ⁴³tyāa dundtey uyya' ājāc, sa' Dyusna wala wechana Jesus e'stey u'cj. Tyā'wē uyya' ājāte nasa uyrra', tyāawe'shva tyā'wēytyi Dyusa's wala wecha.

Zaqueo yacj Jesus puuty we'weni

19 ¹Tyājũ' Jesusa' Jerico chjambte pa'jrra', tyāa chjamsu scjēuutsu yu'. ²Atsa' cyte' teeche pitstjē'j wala ji'pjsa Zaqueo yaasesac ũsu'. Tyāa yu' gobierno jĩi vyu pcjacsa npiitstjē'jsac yu'. ³Tyāa Zaqueo' Jesus quimteva jiyuya' puuty uy wēerrava, nasaa wala cshavte' ājāme', tyāa yu' le'chcuēec yu' naa pa'ga. ⁴Sa' yatste wuwuurra, sicómoro fytũu tashtec tejca Jesusa's uyya'. ⁵Atsa' Jesusa' cyuy uycjēuutsrra', fytũu tashte pagayrra Zaqueo's we'wec:

—Dundrrāa tyājũ miisa'j, andya' iindy yatte āchjĩ pa'jwa'j ji'ptju jite', ⁶Zaqueo' dundrrāa sa'jrra, Jesusa's wechanac tyajy yatte jypa'ga. ⁷Tyā'wē yũute' nasa jyucaysa atsewe'wety: Jesusa' tyāa pitstjē'j pcalsa yattac pa'jya' u'j jĩna. ⁸Tyājũ' Zaqueo' yujurra na'jĩnac we'we:

—Andy ji'pjuni's puupyājn tyujnderra puuplety peesu'nja, sa' maaítyi's íshĩrra jytjaacue vá'ntca vyu cusa'j nava cusa'jnite pajnz us jytjaacue caashwendu'ju'nja jite', ⁹Jesusa' na'jic:

—Naa pitstjē'ja' Abraham ji'cj yuu naa pa'ga naa yattewe'sh ewte neeyũuwa'j en pa'cj āchja'. ¹⁰Dyus Nchi'c Nasa Yuusa' tyā'wē vituna ũssaty pacuerra ewte nvijt-ya' írráatj quĩj jic.

Patron vyu's nuypenacajn selpisaaty nviitni

¹¹Jesus we'weni's wēsē'jsa yu', naa sũjnaty ũsu': Jesusa' Jerusalente pa'jatsa' na' āchja' tyāa jycaajsa yuuna sũjnaty ũsu'. ¹²Naa pa'ga na'wēc cuentul'jna pta'sh:

—Teeche pitstjē'j jytujtjesa jyu'j quiwen u'cj, cytee pa'jrra jycaajsa yuurra qui' shawendya'. ¹³Nava u'jmey, diez selpisaaty pa'yarra, cyanzĩty tyacuerrarráac vyu ũsrra na'jĩna neewe'we: Andy shawendna pa'pjcach naa vyu yacj mjĩine'cue nuypejnaya'. Tyā'jĩrrac jycaajsa yuuya' jyu'j quiwen u'j. ¹⁴Nava tyajy quiwete nasa' jycaajsa qui'pni's wa'lrira, na'jĩnaty pātyjĩ'cjya' caaj tyajy e'stey: Naa pitstjē'j cue'shtyi jycaajni's peejymeetja'w jiteva, ¹⁵pejca jycaajsa yuurra qui' shawendcu tyajy

quiweníi. Sa' pa'jrra' selpisaaty vyu ūsne' tyāaty pa'yac, nasa iisa manz nuypejnameva jiyuya'. ¹⁶Atsa' nyafytewe'sh cūjrra' na'jīc: lindy vyu ūsngu tyāate dieztju jytjaacue nuypejna jīte', ¹⁷jycaajsa pasrra': Wala ew selpiing. Tyā'wē walameecuēsa'sva ew jype'pja'ga, diez chjambte jycaajwa'jsa ne'jue'sh qui'pu'nja jīc. ¹⁸Tyajū' viteva utyaarra na'jīc: lindy vyu ūsngu tyāate tajstju jytjaacue nuypejna jīte', ¹⁹jycaajsa pasrra': Indya' tajts chjambte jycaajwa'jsa ne'jue'sh yuune'nga jīc. ²⁰Tyajū' tecjtewe'shva utyaarra na'jīc: lindy vyu ūsngu tyā'sa' pañuelote yaprra jyaawtju. Tyā' ayga ūsa'. ²¹Indya' wala juuna' yu'ng, tyā'wē mjiimeerrava vyu pēyi'ng sa' iindy uutjashmeeteva cytee u'carra jyuca pcjacje'ng. Atsa' ūucjrra iindy vyu'sa' cmāaji'jmeetj jīte', ²²jycaajsa pasrra': Indya' seelpimeeng. lindy yuweteyrrāa ewmeete neeyūtsngu. Andya' juuna'sarra' mjiimeerrava vyu pējyna andy uutjashmeeteva pcjacjsateva jiirra', ²³¿quī yūutenga andy vyu'sa' bancoga jyaawmēe? pejname andy shawendna pa'jrra' jytjaacue cutyi'cjan jīc. ²⁴Sa' tyāa jycaajsa' na'jīnac we'we cytee ūssaty: Tyāa vyu's cusa'jrra diez vyu ji'pjsa's meswe jīte', ²⁵tyāawe'sh pasrra': Tyā' vyu walayā'j ji'pja', atsa' ¿ma'wē tyā'sírrāa ūsucytja'w? jīteva, ²⁶jycaajsa pasrra' na'jīc: Maava jypa'yacy jype'jrra nuypenasa's jytjaacue ūswa'j yuuna. Nava jype'jya' ājāmeerra nuypenasame's jyuca cusa'jwa'j yuuna, le'chcuērrāa ji'pjteva. ²⁷Sa' andya's ajtserra jycaajsa yuucajmēn pāatyji'cjsawe'shtyi' ayte pe'jna cūjrra andy uyna ūste miicjwe jīc.

Jesus Jerusalente u'cani
(Mt. 21.1-11; Mr. 11.1-11; Jn. 12.12-19)

²⁸Tyāa ejemplo's pta'shna jyā'jrra', Jerusalente pa'jya' u'cj. ²⁹Sa' Betfagé vite! Betania chjamb ūsu'ty Olivos vits utyaga cytee pa'jya'rrāa tyāa yacj u'jusa e'nzsaty caacj ³⁰na'jīna:

—Naaga chjamb ūsa' cytee me'jwe. Sa' cytee pa'jatsrra', teech burrucuē yuune'cue quim yujva a'jñimeesa tundni ūsna. Tyā'sa' jyūcjwenderra jyūna yuweene'cue. ³¹Jyūna yujte', maafi yu' pēyivāatyna atsa': Cue'shtyi jype'jsac nicyya' caaj jīne'cue. ³²Atsa' tyā'jīte' u'jrra', Jesus ma'wēne' we'we tyā'wēy uytyi. ³³Tyajū' burru's jyūcjwendetste', namuwe'sha' pējtyti:

—¿Quījya' burru's jyūcjwendetscue? jīte', ³⁴tyāawe'sh pasrra':

—Cue'shtyi jype'jsac nicyya' caaj jīty. ³⁵Sa' Jesus tashte jyūna cūjrra', tyāawe'sh atyjtyi pusrra Jesusa's ca'ja'jty.

³⁶Tyajū' Jesus u'jwa'j dyi'jsu yatstety tyāawe'sh atyjtyi pusna u'jue'.

³⁷Sa' Olivos vits e'scjē u'juetspcachja', Jesus yacj yuusa nasa' Dyusa's wala wechana weyya' tacjtyi tyā'wē Jesusa' quījquījva ew yūuna u'juni's uyrra.

³⁸Sa' na'jīnaty weyi':

—¿Dyus caajni wala yuj ew jycaajwa'jsa yuja! ¿Dyus cielutewe'sha's wechaaga wala ew yūupa'ga! jī'ty.

³⁹Tyajū' nasaa cshavyte yuusa fariseowe'sha' na'jīty:

—Indy e'ste cuch susna yuusaty mwe'we, shuuna' yuucajn jīte', ⁴⁰Jesus pasrra':

—Macue tyāawe'sh yu' shuuna' yuuteva, cueta' Dyusa's tuutje'jetyna jīc.

⁴¹Tyajū' Jerusamente utya pa'jrra', chjamba's tjengrra ū'nec ⁴²na'jīna:

—I'cue'sha' wēt cfi'nze'jwa'jsa's jiyurra naa ente jypa'gavatsa', wala yuj ewna. Nava i'cue'sha' jiimée ūsi'cue na' jypa'gameene'cue. ⁴³Naa pa'ga i'cue'shtyi' űuswa'j en pa'jana, atsa' tyāa ente' chjamba's jyuca yupna ctandyirra ⁴⁴chjamba's quīj yujva nvijtmée jyuca suwuutyna cytee ūssaty icjna. Sa' teeche cuetráa yujva quēese'jnimée yu' neeyūumeena, i'cue'sh cshavyte Dyus quījteva, jypa'gamee'cue naa pa'ga jīc.

Dyuus yatte tyweysaaty Jesus cashishni

(Mt. 21.12-17; Mr. 11.15-19; Jn. 2.13-22)

⁴⁵Tyajū' Jesusa' dyuus yatte u'carra cytee tyweyna ūssaty jyuca eca cashishcu ⁴⁶na'jīna:

—Dyus librote na'wē fi'jni': Andy yata' Dyus yacj puuty we'wena ūswa'j yatrrá' jīna fi'jni'. Nava i'cue'sh yu' peswée pcjaacjena ūsni cagy na'wērráa vitrra ji'pji'cue jīc.

⁴⁷Jesusa' een isac dyuus yatte u'carra caapiya'ja'. Naapcachja' sacerdote npiitstjē'jwe'sh vite' Dyus leya's caapiya'jsawe'sh vite' chjambte ne'jue'sh tyāawe'sh yu': ¿Ma'wē yūurra icjecytja'w? jīnaty puuty we'wena ūsu'.

⁴⁸Nava icjya' yu' ājā'tsmeeta', nasa jyucaysa Jesus ju'ngurrarráaty ūsu' naa pa'ga.

Dyuus yatte Jesus juuna' yūuni's pēyni

(Mt. 21.23-27; Mr. 11.27-33)

20 ¹Teeche ente' Jesusa' dyuus yatte Dyus yuwe ewte nviitwa'jsa's pta'shna ūste', sacerdote npiitstjē'j vite' Dyus leya's caapiya'jsa vite' judiu ntjē'jsa tyāawe'sh pa'jrra' ²na'jīnaty pējy:

—Indya' ¿quim jycaatjenga dyuus yatte tyā'wē juuna' yūu? Quim jycaatje tyā'wē yūurrava mpeeta'sh jīte', ³Jesusa' na'wēc pas:

—Andyva i'cue'shtyi' pējy ya'vatj atsa' tyā'sa' mpaaswe. ⁴Juan Bautista's ¿quimga jycaaj yu'te bautisāycajn? ¿Dyus vá' jycaaj meerra' naa quiwete pitstjē'j jycaajni vá' yu'? jīte', ⁵tyāawe'sh pwe'sh na'jīnaty puuty we'we':

—¿Ma'jīna pasucytja'w? Dyusne' jycaaj jīvatsva, tyā'wē Dyus jycaatje' ¿mjīya'cue Juan pta'shni's jypa'gamée? jīna. ⁶Atsa' naa quiwete nasane'ta

jycaaj jīte', cue'shtyi cuet wāatatajrra icjetyna, nasa' jyucaysa Juana's ew jīita' Dyus yuwe pta'shsateva. Tyāasa cue'shtyi' tyā'wē yūutyna jī'ty.

⁷Tyajū' Jesusa's pasrra':

—Juana's quimne' jycaaj bautisāycajn nava jiimeetja'w jīte', ⁸Jesus pasrra':

—Andyva quim jycaatje tyā'wē yūurrava pta'shme'nja jīc.

Mjīisawe'sh patron nchi'ca's icjni yacj caaja'nda'jni

(Mt. 21.33-44; Mr. 12.1-11)

⁹Tyajū' Jesusa' naa ejemplo'scu pta'sh:

—Teech pitstjē'ja' tyajy quiwete jyuca uva ujrra mjīisaty ew neewe'werra wala tyach u'cj. ¹⁰Sa' uva tjē'jetste', quiwe namu' teech selpisa's caacj quiweepa'ga pējyya'. Nava quiwe's mjīisawe'sha' tyāa selpisa's pāpārra quīj yujva ducjmée caajty. ¹¹Atsa' quiwe namu' vite selpisa's qui' caacj. Nava tyā'snava tyā'wēy iiwēeshuna pāpārra quīj yujva ducjmée neeuty. ¹²Tyajū' quiwe namu' qui' vite selpisa's caacj. Nava quiwe's mjīisawe'sha' tyā'snava cpā'vitrra ducjmée neeuty.

¹³Tyā'wē yūute', nmejte' quiwe namu' na'jīc: Āchja' ¿quīj yūuquī'tj? Meerra' andy nchi'c wendynisa's caja'nja. Atsa' tyā'sa' ūucjrra tyā'wē yūumeevāatyna jīrrac caaj. ¹⁴Atsa' mjīisawe'sha' quiwe namu' nchi'ca's uyrra', tyāawe'sh pwe'sh na'jīnaty puuty we'we: Ney uute', quiwe's naatjē'j iiyamuwa'lsana. Atsa' icjega, cjīrra quiwe's cue'sh iiyamu'nja'w jīrra ¹⁵eca cutyi'jrra icjtyi jīc.

Tyajū' Jesusa' tyā'wē pta'shrra' pējyuc:

—Tyā'wē yūute', quiwe namu' tyāa mjīisawe'shtyi' ¿quīj yūucy?

¹⁶Tyā'wē yūupa'ga quiwe namu' tyāa mjīisawe'shtyi' jyuca icjrra quiwe's vitety ūsuna jīte', tyā'wē pta'shni's wēsē'jrra na'jīty:

—Dyusa' cytee pal' yu' wendymeena jī'ty.

¹⁷Tyā'wē paste', Jesusa' tyāawe'sh dyi'psu tjengrra na'wēc pta'sh:

—Tyā'wē yuune'jmeete', ¿quījya'rrāaqui'c Dyus libroute na'wē we'we':

Yat yaaajsawe'sha': Naa cueta' selpime' jīrra wāatāty,

Nava tyāa fīc yat macuesanava chjāchja neewewa'jsa yuuna pal'.

¹⁸Atsa' maava tyāa cuette iicasa' jyuca chcateteetyna. Meerrava tyāa cuet nasaa cajcucjē weterra', jyuca cu'china jīna fi'jni'.

Gobierno's ducjwa'ja'sva pēyni

(Mt. 21.45-46; 22.15-22; Mr. 12.12-17)

¹⁹Tyajū' sacerdote npiitstjē'j vite' ley caapiya'lsawe'sha' jiyuty tyāa ejemplo' tyāawe'shtyi we'weniteva. Sa' ūusacharra tyāa dundtey Jesusa's tund wēety. Nava Jesus ju'ngusa nasa wala cuj ūste', ūucjrra quījva yūumeeta'. ²⁰Nava quījterrāava ewmeete nvijt-ya' sūjrra tjengsa caajty. Atsa' tyāawe'sha' Jesusa's ew paapēysa na'wē yuj we'wena utyaaty,

jycaajsa's ewmée we'weteva jiyurra' nel'jue'sha's pãatyjĩ'c'ya' sũjrra. ²¹ Sa' na'ljinaty paapẽjy:

—Cue'sha' indya's jii'tja'w. Indya' isasarrá'sngu pta'shi', Dyus tashte pa'ljwa'l dyi'ja's caapiya'ljna. Sa' nasaa jycaajna yu'cypejnyty nwěese'je'tsmeeng, tyāa pa'gatey indya' nasa ewsa na'wě tjengsaty jiyumey ju'ngu yu'tsmeeng. ²² Āchja' na'wětja'w jiyu wējē': Jycaajsa Cesara's vyu ducjte ¿ewmañ? meerra' ducjmeete ¿ewmañ? jite', ²³ ewmée yajcyrra tyā'wě pějyna ũsteva Jesusa' jiyurra na'ljic:

—¿Quĩjya'cue andya's ewmeete nviit wējē'? jĩrra ²⁴ tyāawe'shtyi' teech vyu mush pějy. Sa':

—Naa vyu' ¿quiim dyi'pa's ji'pjna, sa' quiim yase's fi'ljnina? jite', tyāawe'sh pasrra':

—Cesar dyi'pa's ji'pja' sa' tyajy yase's fi'ljni' jity. ²⁵ Atsa' Jesusa' na'wěc jycaaj:

—Cesar ji'sa' Cesara's ducjwa'lja'. Sa' Dyus ji'sa' Dyusna ducjwa'lja' jic.

²⁶ Tyā'wě nasaa dyi'pte isasarráana paste', Jesusa's ewmée vit-ya' ājameerra, cuj yajcyna shuuna'ty neeyũu.

Uusaawe'sh qui' ityi yuua'ja'sva pějny

(Mt. 22.23-33; Mr. 12.18-27)

²⁷ Tyajũ' saduceowe'sh maafi yu' Jesus tashte paapějyya' pa'ljty. Nasa' uuyā'jrra' peena yu' ityi yuumeetyna sũjsaty yu' tyāa saduceowe'sha', tyāasaty na'wě pějy:

²⁸ —Moisesa' na'ljinac fi'jrra nvijt: Maa pitstjē'jva luuch ji'pjumey nyu's nvijrra uute', uusáa nyacja' tyāa u'ya's iyyuuna, atsa' tyāate luucha' uusáa nchi'c na'wě neeyũuna jĩnac fi'j. ²⁹ Atsa' cue'sha' jii'tja'w siete pitstjē'j pyacjtyi u'pu', sa' nyacj ntjē'jsa' iyyuurrava luuch ji'pjumey uuc. ³⁰ Atsa' nyacj e'stewe'shcu iyyuu tyāa u'ya's íírráa. Nava tyāava luuch ji'pjumey uuc. ³¹ Tyajũ' nyacj tecjtewe'shva tyāa u'ya's íírráac iyyuu. Tyāava luuch ji'pjumey uuc. Tyā'wěrrarráaty sietesay tyāa u'yrrarrá's iyyuuna jyā'j. Nava maa yujva luuch ji'pjumey uuty. ³² Atsa' nmejte' tyāa u'yva uuc. ³³ Atsa' uusaawe'sh qui' ityi yuu ente', tyāa u'ya' ¿maa yacj isa nyu yuua'lsacy? jite', ³⁴ Jesus pasrra':

—Naa quiwete nasa' ptamuuna tyāawe'sh luuchtyiva caaptamu'ju'ty.

³⁵ Nava vite quiwete ptsumée ityi fi'nzewa'tje pa'ljya' ājāsa' qui' ityi yuurra' tyāawe'sha' ptamuwa'lsameeta', sa' tyāawe'sh luuchtyiva caaptamu'ljna ũswa'lsameeta', ³⁶ tyāa pa'gatey tyāawe'sha' Dyus angeleswe'sh na'wěsa yā'tja', sa' Dyus luuch yā'tja' na' ityi yuuyā'jrra' peena yu' uua'lsameeta'. ³⁷ Tyā'wě uusaawe'sha' qui' ityi yuua'lsate íírráac Moisesiiva jiyucajn na'wě fi'jrra nvijt tyajy libroute. Cyteea' Dyusa' tsjũtsy yu'cj bejna ũsni pyājũ we'werra': Abrahan, Isaac, Jacob tyāawe'sh Dyustju jic. ³⁸ Dyusa' uusaawe'sh Dyusme', naasáa ityisawe'sh Dyusrrá'. Dyus tashte' maa yujva uumée ityi ũsta' jĩnac pta'sh.

³⁹Tyajū' Dyus leya's caapiya'jsawe'sh we'werra':

—Wala ew pta'shngu jīrra, ⁴⁰peena yu' quijva jwee yu' pějymeeta'.

Dyus tashu yuusa' ¿quiim nchi'cqui? jīna Jesus pēyni

(Mt. 22.41-46; Mr. 12.35-37)

⁴¹Tyajū' Jesusa' na'wēc pējy:

—¿Ma'wēteta Cristo' David nchi'ca' jīna we'we' nasa'? ⁴²Naapcachja' Salmos librote David we'werra yu' na'jī'c:

Andyna jype'jsa Cristo's Dyusa' na'jī'c:

Andy pucate patsu ju'ngte mcaach,

⁴³Indyna atsesaty indyrrarráana nwēese'jwa'ja's vitna jyā'pjcach jīc.

⁴⁴Davida' Cristo's we'werra': Andyna jype'jsa jīc, atsa' Cristo' ¿ma'wē yuurra David nchi'c yuucy?

Fariseo vite' ley caapiya'jsawe'shtyi yuuwesa Jesus nviitni

(Mt. 23.1-36; Mr. 12.38-40; Lc. 11.37-54)

⁴⁵Nasa jyucaysa wēsē'jna ūssa cshavyte Jesusa' tyāa yacj u'jusawe'shtyi na'jīnac we'we:

⁴⁶—Dyus leya's caapiya'jsawe'shtyi' mpa'yajcywe. Tyāawe'sha' ropa jyu'jsa atjrra plaasasu msuuva wecha jytjāasnaty pecūjū'. Sa' judiwe'sh pcjaacjenisuva cachnī wejy zhichcue ewsarráanaty pacué'. Maa yat-su sāl'jiya' pi'cyteva, tyā'wētyi cachwa'j ewsarráana pacué'. ⁴⁷Sa' viudawe'sh yattyiva cusa'ja'ty, quijquij ji'pjuni'sva jyuca. Nava ewsata' sūjcajn wala jyu'j lisa'ty. Tyā'wē yūupa'ga tyāawe'sha' wejy jytjaacue Dyus castigāyni yuutyna jīnac pta'sh.

Viuda ofrenda acjni

(Mr. 12.41-44)

21

¹Wala ji'pjsawe'sh dyuus yatte ofrenda wala āshitstec uy Jesusa'.

²Tyā'wēy teech viuda puuplesava cūjrra', e'nz vyuu mushcuē acetste uyrra' ³na'jīc:

—Isatj we'we', naa viuda puuple' maateva jytjaacuec wala acj. ⁴Vite yu' acjrrava, neeyūsáa peejymeesarráan yā'jty acje'. Nava naa u'ya' quij yujva ji'pjmeesarrava tyajy ū' weywa'ja's jyucac acj jīc.

Dyuus yat ptsuwa'ja's Jesus pta'shni

(Mt. 24.1-2; Mr. 13.1-2)

⁵Tyajū' cytee ūssa maafi yu' dyuus yata's tjengrraty we'wena ūsu': Ofrenda peesni yacj wala yuj zhichcue pjeu'jna tyaa'jni' jīte', Jesusa' na'jīc:

⁶—Āchjī yu' tyā'wē yuj zhichcue tjengna ūsa', nava quij yujva nvijtmée jyuca suwní yuwa'j en pa'jana. Atsa' teech cuetráa yujva quēesē'jnimée yu' neeyūumeetyna naa yattewe'sh jīc.

Naa quiwe ptsuwa'j en ājatste seena'sa vyaawa'j
(Mt. 24.3-28; Mr. 13.3-23)

⁷Tyā'jīte':

—¿Bagach tyā'wē yuucy? meerrava tyā'wē yūuwa'j en ājatste' ¿qui'jrra yuucy? jīna pējyte', ⁸na'wēc pta'sh:

—I'cue'shtyi caypumba'jwe'shte mpa'yajcywe. Tyā'wēme' wala casejetyna Dyus caajnisatja'w jīna na'jīna: Andya' Cristotj, atsa' āchja' nmej en ājc jītya. Nava tyāawe'shtyi' nwēesē'jnuwe. ⁹I'cue'sha' wēsē'jene'cue guerra seena'sa yuja' jīni, nava tyā' nyafytewe'shrráata' atsa' ūucjmeene'cue. Nmej en yu' ājméy tyā'wē yuuna.

¹⁰Tyājū' ma'wē yūuwa'ja'sva jyuca pta'shcu na'jīna:

—Tyān en ājatste', gobierno' vite quiwete gobierno yacj puiityna. Naapcachja' puuty jyuj quiweju pwe'shva puiityna. ¹¹Sa' msuu msuuva seena' ejnd u'juena. Wējēva tyā'wē wala pa'jana. Naapcachja' cacuete wee seena'sava pa'jana. Sa' cieluju quījquījva seena'sarráa vyaatyna. ¹²Nava tyā'wē seena' yūuwa'j en pa'jmeyna, i'cue'shtyi ajtserra preesu'jya' pacueetyna. Sa' judiwe'sh pcjaacjenisuva jyūna u'juetyna: Nasa ewmeesa' jīna. Tyā'wē yūuna carcelteva tyajatyna, i'cue'sha' andyna nwēesē'pja'garráa jycaajsawe'sh tashsu vite' ne'jue'sh tashsuva cuutya'jni yuune'cue. ¹³Tyā'wē yūute', Dyus yuwe's tyāawe'shtyi' pta'shwa'j en ji'pjune'cue. ¹⁴I'cue'sha' tyāawe'shtyi' ¿ma'wē pasucytja'w? sūjna cuj yajcymeene'cue, ¹⁵tyāa pa'gatey andya' i'cue'shtyi atsesawe'shtyi ma'wē paswa'ja'sva caaūusutje'je'nja. Atsa' tyāawe'sha': Īshīja'ng jīya' ājāmeetyna maa yujva. ¹⁶Sa' i'cue'sh nwe'shīi yujva atseni yuune'cue, tatawe'sh, yacjtjēljwe'sh, namicuwe'sh preesu'jutyna. Atsa' maafī yu' icjni yuune'cue. ¹⁷I'cue'sha' andyna nwēesē'pja'ga naa quiwete jyucaysa atseni yuune'cue. ¹⁸Nava i'cue'sh dycjasrráa yujva vitumeetyna teechráa yujva. ¹⁹I'cue'sha' uu entepcach Dyus yacj tyutemée fi'nzerra', Dyus tashte ityī fi'nzewa'ja's ji'pjune'cue.

²⁰Jerusalen chjamba's soldaurrarráa jyuca ctandyiirra ūste uyrra', āchja' naa chjamba' jyuca ptsuwa'jsana sūjna jii ūsune'cue. ²¹Naapcachja' Judeasuwe'sha' ūpjna u'juetyna yu'cjsu, atsa' Jerusalen chjambtewe'shva tyāa chjambu ūpjna casejetyna, vite' chjamb ecajuyā'j ūssa' chjambte u'cameetyna. ²²Tyā'wēme' tyān ensu' castigo seena'sa yuuna Dyus librote ma'wēga pta'shi' tyā' jyuca cytey yuuna. ²³Atsa' tyān ensu' nasa ji'pjsa meerrava luuch āpācuē ji'pjsa' wala yuj pytjaa yuutyna, tyā'wē tyāa nasaty castigo seena'sa pa'tje', naa quiwete wala yuj ūuswa'j yuuna. ²⁴Maafītyi's guerrate icjetyna, sa' vite yuutyi's preesu'jrra jyuj quiwen jyūna u'juetyna. Naapcachja' Jerusalen chjamba's vite nasa u'carra jyuca suwrra cytee macue tyachva ūsutyna.

Dyus Nchi'c Nasa Yuusáa seena' zhichcue vyaana
(Mt. 24.29-35, 42-44; Mr. 13.24-37)

²⁵ Tyā'wē yūunijū' sec a'te estrella tyāasu seena'rráa vyaatyna. Atsa' naa quiwete nasa mtee mteewe'shva jyuca jypumbana iiméj wala ūucjutyna tyā'wē ícj wala seena' yuuna susni's wēsē'jrra. ²⁶ Tyā'wē seena' yuutste', naa quiwete nasa' ūucjrra ūus yu'sva iviitutyna, naapcachja' ēe walate quījquīj ūssava jyuca seena' quēesē'jni yuutyna. ²⁷ Tyājū' Dyus Nchi'c Nasa Yuusa's uyuutyna, tāapj pyājte sec na'wē seena' zhichcue cjicjyna quījatste. ²⁸ Tyā'wē seena' yuuya' tacjetste', i'cue'sha' ūucjmée wechana ūytjasna meswe, jwee yu' jytjēeyuumée nwe'weni yuune'cue jíc.

²⁹ Tyāa e'su' vite ejemplo pta'shcu:

—Mtjengwe higuera fytūu tash meerrava vite fytūu tashtyi. ³⁰ Sa' tyāa fytūu tash yeetsutste uyrra', yūnya'vateva jiyu'i'cue. ³¹ Tyā'wēy andy pta'shni cytey yuutste uyrra', Dyus naa quiwete quīiwa'j en utyaatsna sūjna jii meswe.

³² Isatj we'we': naa ensu nasa uumeyna, tyā'wē cytey yuuna. ³³ Cielu naa quiwe jyuca scjēuutyna, nava andy we'weni' jyuca cytey yuumey yu', scjēwmeetyna.

³⁴ Wala jypa'yacy meswe, ewmée yūuna tūuna quījquījva naa quiwetewe'shrrá's yajcyna fi'nzenuwe. Tyā'wēme' Dyus yu's yajcymée ūsiyna, Dyus quīiwa'j en ājrráa yuuna. ³⁵ Niimalva jiimeerra' ma'wēga yajcyte cjeje', tyā'wēyrráa Dyus quīiwa'j ena' cpaaquina naa quiwete nasa mtee mteewe'shtyiva jyucaysaty. ³⁶ I'cue'shva wala jypa'yacy meswe, na'wē seena' yuuya'va' tyājū iyuya'. Dyus yacj puuty we'wena nes myuuwe bagachteva, sa' tyā'wē yūurra' Dyus Nchi'c Nasa Yuusáa tashte utyaaya' ājāne'cue jíc.

³⁷ Jesusa' en yu' dyuus yattec caapiya'ja', nava cus yu' Olivos vitsnac u'jue'. ³⁸ Atsa' nasa' een isa cuusíity dyuus yatte pa'ja' Jesus caapiya'jni's wēsē'jya'.

Jesusa's icjwa'ja's puuty we'weni
(Mt. 26.1-5, 14-16; Mr. 14.1-2, 10-11; Jn. 11.45-53)

22 ¹ Pan levadura ji'pjmée ū'ni Pascua fiesta ājātsu yu'. ² Atsa' sacerdote npiitstjē'jwe'sh vite' ley caapiya'jsawe'sha': Jesusa's ¿ma'wē yūurra icjecytja'w? jīnaty tyāawe'sh pwe'sh puuty we'wena ūsu'. Nava nasa wala cuj Jesus ju'ngusa ūste', ūucju'ty.

³ Naapcachja' echtjē'ja' Judas Iscariote ūuste u'cac. Tyāa Judas yu', Jesus yacj u'jusa docesatewe'shírráac yu'. ⁴ Tyājū' tyāa Judasa' puuty we'weya' u'cj sacerdote npiitstjē'jwe'sh vite' dyuus yatte tjengsawe'shtyi, Jesusa's tyāawe'sh cusete ducjya'. ⁵ Atsa' tyā'wē puuty we'wete', tyāawe'sha' vyu ducjya' neeyūuty Judasa's. ⁶ Tyājū' Judasa' nasa uynimeete paatste ducjwa'ja's pacuec.

Jesusa' docesawe'sh yacj nmej ũ'ni

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷Tyajũ' pan levadura ji'pjmée ũ'ni fiesta en ājc. Tyāa ente' piishāa luuchtyi icje' Pascuatewe'sh. ⁸Atsa' tyāa ente' Jesusa' na'jīnac jycaaj Pedro Juanwe'shtyi:

—Me'jwe Pascua fiestate ũ'wa'ja's pjeu'jya' jīte', ⁹tyāawe'sha' pējytyi:

—¿Mteenga pjeu'j jytjāasu'? jīte', ¹⁰Jesus pasrra':

—Chjambna u'jrra cytee pa'jatsrra', teeche pitstjē'j uyuune'cue yu' mityja's yacjrra u'juetste. Sa' e'ste u'juene'cue yatte u'capcach. ¹¹Sa' cytee pa'jrra', yat namu's na'jīne'cue: Cue'shtyi jype'jsa' pējyya'c caaj: Pascua fiestate tyāa yacj u'jusawe'sh yacj ũ'wa'j ¿mtee piesa pjeu'jni ũ'sna? jīcāja'c jīne'cue. ¹²Atsa' yat namu' ēe yatte piesa walasa pjeu'jniyā'jsa's pta'shina. Cytee ũ'wa'ja's pjeu'june'cue jīnac jycaaj. ¹³Atsa' Pedrowe'sha' u'jrra', Jesus ma'jīni'sva jyuca cytey uyrra Pascua fiestate ũ'wa'ja's pjeu'jty.

¹⁴Tyajũ' ũ'wa'j ora ājte', Jesusa' tyāa yacj u'jusawe'sh yacj cachcu mesate ũ'ya'. ¹⁵Sa' na'wēc we'we:

—¿Manzcuē usva wala yuj yaaqui'tj, andya's uu en pa'jmeyna, naa Pascua fiestate i'cue'sh yacj nmej ũ'wa'ja's! ¹⁶Na'jī'tj na': āchja' ayte peena yu' naa Pascua fiestatewe'sha's ũ'me'nja, Dyus qui' jycaajya' pa'jwa'j en ājpcach.

¹⁷Tyajũ' vaso's uwerra Dyusna wechana orāyrra', na'jīc:

—Jypa'garra jyucaysa mtundywe naa vasotewe'sha's. ¹⁸Na'jī'tj na': āchja' ayte peena yu' uva yu'a's tundyme'nja, qui' Dyus jycaajya' pa'jwa'j en ājpcach.

¹⁹Tyajũ' pana'sva Dyusna wechana orāyrra', pe'ltenderra tyāawe'shtyi ũ'su'scu na'jīna:

—I'cue'sh pa'gate andy cacue' ducjwa'j yuuya'va', atsa' naa pana' andy cacue na'wēsa'. I'cue'sh pa'gate andy pytjaa yuurra uuni's yajcyna tyā'wē myūuwe bagachteva.

²⁰Ū'na jyā'jrra', vaso's jypa'garra na'wēc we'we:

—Andy eea's pcawrra yuurráac Dyusa' i'cue'shtyi nwe'wewa'ja's u'se pjeu'jrra nvijt. Atsa' naa vasotewe'sha' andy ee na'wēsa'.

²¹Atsa' āchja' andy yacj ũ'na u'pa' ay mesate tyāa pitstjē'ja' andya's atsesawe'sh cusete ducjya'va'. ²²Dyus Nchi'c Nasa Yuusá' āchja' pejca uuya'vayuja'. Andy uuwa'ja's ma'wēne' Dyus nvijt tyā' cytey yuuya'va'. Nava andya's atsesawe'sh cusete ducjsa' jseena' yuj nuste cjējena' jīte', ²³Jesus yacj u'jusa pwe'sh puuty ya'paapēyi'ty na'jīna: Cue'sh cshavytewe'sh ¿quim tyā'wē ducjya'vacy? jī'ty.

Maa wejy jytjaacue walasa yuuwa'ja's pēyni

²⁴Tyajũ' tyāawe'sh pwe'sh na'wē yūuwa'ja'styi puuty ya'paapēyi':

—Ayte cue'sh cshavytewe'sh ¿maa wejy jytjaacue walasacy? jíte',
 25 Jesus pasrra':

—Naa quiwete jycaajsawe'sha' wala juuna'rráa yuuna jycaaja'ty. Tyā'wēteva tyāawe'sh yuutyi's wala ewsata' jī'ty nasa yu'. 26 Nava i'cue'sha' tyā'wē yūuna jycaajwa'jsameei'cue, wejyva i'cue'sha' maafi yu' jytjaacue walasa ūsrrava, nuuchsa na'wē yuuwa'l jī'pji'cue. Atsa' maava jycaajwa'ja's jī'pjsa', selpisáa na'wērráa yuuwa'l jī'pji'cue. 27 ¿Maa wejy jytjaacue walasacy? ¿Puutste mesate ū'ya' cachsá wejy jytjaacue walasamañ, meerra' puutssa vaa wejy jytjaacue walasana? Isa ew yajcyte', mesate ū'ya' cachsá jytjaacue walasana. Nava andya' i'cue'shtyi selpisáa na'wērráa ūstju.

28 Andya' bagachteva ñuste tjēyte fi'nzetsteva i'cue'shva andy yacj ja'nda pytjaa yuuna nesi'cue yu' nvijtmée. 29 Tyāa pa'ga andya' i'cue'shtyi ūsu'nja jycaajwa'ja's, andya'sva ma'wēga andy Tata jycaajwa'ja's ūs tyā'wēy, 30 cyaj andy jycaajna ūsnite pa'jrra', andy yacj ij mesate ū'wene'cue, sa' Israelwe'sh jī'j docesaty jycaajsa yuune'cue.

Pedro īshiiwa'ja's Jesus pta'shni

(Mt. 26.31-35; Mr. 14.27-31; Jn. 13.36-38)

31 Tyajū' Jesusa' Simona's na'wēc pta'sh:

—Simon, indya' wala yuj mpa'yajcy. Tyā'wēme' echtjē'ja' i'cue'shtyi pējycu scuutyj cweejya'jsa na'wē yuuya'. 32 Nava andya' iindy pa'gate Dyusa's neewe'wetj, Dyusrráana yajcyna fi'nzecajn. Atsa' indya' Dyus tashte qui' shawendrra', yacjtjē'l'jwe'shtyi cchjāachja'jane'nga Dyus yacj tyutemée fi'nzewa'ja's jíte', 33 Simon pasrra':

—Andya' carcelna ma'c yuu meerra' uuwa'l ma'c yuu nava andya' quijte yujva tyuteme'nja jíte', 34 Jesus qui' we'werra na'l'jic:

—Pedro, indya's na'l'j'itj na': āchjfi atall we'wemeyna, indya' tecj us īshījatsyā'j yuune'nga andya's jiimeetj jīna.

Jypa'yacy ūs caajni

35 Tyā'wē pta'shrra' Jesusa' na'wēc pējy:

—Andya' teeche ente' i'cue'shtyi' Dyus yuwe pta'shya' caajrra' quij yujva jī'pjmeetj caaj, ya'ja, vyu, pelgaty tyā'wēsaty. Atsa' i'cue'shtyi' dyi'tje ¿quijrrá' peejiigá'? jíte', tyāawe'sh pasrra':

—Cue'shtyi' quij yujva peejime' jīty.

36 Atsa' Jesus we'werra' na'l'jic:

—Āchja' ya'ja ma'c yuu, vyu ma'c yuu, cchill ma'c yuu nava jī'pjsa' jyūrre me'l'jwe. Atsa' cchill jī'pjmeesa' atya's tyweyrra cchill mweywe.

37 Tyā'wēme' Dyus libroute we'werra': Ewmeesatjas yuuwesa yacjcu qui'pni yuu jic naa pa'ga āchja' andya's jyuca tyā'wēy yuuya'vata' jíte', 38 tyāawe'sh we'werra':

—Ayte e'nz cchill yu' ũsta' jíte', Jesus pasrra':

—Tyā'wērra'. Tyāarráa ewtyna jíc.

Jesusa' Getsemanite Dyus yacj puuty we'weni

(Mt. 26.36-46; Mr. 14.32-42)

³⁹Tyajū' Jesusa' ũ'na jyā'jrra', tyajū casejrra', Olivos vitsna qui' u'cj. Atsa' tyāa yacj u'jusawe'shva e'stey u'jty. ⁴⁰Cytee pa'jrra na'jíc:

—Dyus yacj puuty we'wena me'pwe, ewmeete weteya'mée jírra',

⁴¹tyāawe'sh tashu jyu'jmeecuē tyuteena u'jrra peejyūcuerra na'jīnac Dyus yacj puuty we'we:

⁴²—Tata, indya's ewuwechte', seena' ñuste uuwa'ju meen nwe'we. Nava andy jytjāasni's cytey yuumeerrava, iindy jytjāasnirrā's cytey meen yūu jíte', ⁴³Dyus angel cielujūwe'sh cviisha'jna cchjāachja'jya' quīj. ⁴⁴Tyā'wēme' wala yuj pytjaa ñusna Dyus yacj puuty we'wena u'pu'c naa pa'ga pē'ts yujva ee na'wēsac wala pcaw. ⁴⁵Sa' Dyus yacj puuty we'wena jyā'jrra' quiitterra u'cj Pedrowe'shtyi tjengya'. Nava tyāawe'sha' deenity yu', wala ñusrra.

⁴⁶Atsa' cūjrra na'wēc we'we:

—¿Quījya'cue dejé'? Quiitterra Dyus yacj puuty we'wena me'pwe, ewmeete weteya'mée jíc.

Jesusa's preesu'jni

(Mt. 26.47-56; Mr. 14.43-50; Jn. 18.2-11)

⁴⁷Jesusa' cytee we'wena nee ũsiyna, nasa wala cūjty. Atsa' Jesus yacj u'jusa Judas yu' tyāa nasa yatste cūjrra, Jesus tashte utyaac pucacuette wechaya'. ⁴⁸Atsa' Jesusa' na'jíc:

—¿Judas, indya' Dyus Nchi'c Nasa Yuusa's wechani yacj váa cuuwe'jya'vane'nga? jíte', ⁴⁹Jesus yacj u'jusawe'sha' Jesusa's pējtyi:

—¿Tyāa nasatyi's cchill yacj puiimtja'w? jīty. ⁵⁰Tyajū' Jesus yacj u'jusa teechna yu' sacerdote npiitstjē'ja's selpisáa tjū'wē's spē'tjcu patsuwe'shna. ⁵¹Atsa' Jesusa' we'wec:

—Cytee pa'j yu' yūunu jírra', tyāa tjū'wē spē'tjnite jya'ndyrra', qui' caywētu'cj. ⁵²Sa' sacerdote npiitstjē'j vite' dyuus yatte tjengsawe'sh vite' judiu ntjē'jsawe'sh preesu jyūna u'jya' pa'jsaty we'wec:

—Andya' ¿pesweetjas i'cue'sha' cchill pety fytū atrravá'cue andya's preesu jyūna u'jya' yuwé'? ⁵³Andya' i'cue'sh yacj een isatj dyuus yatte ũsu', nava tyagachjīi yu' tundya' utyaameerra', jyuca chji'ndyni naa orate yu' pejca preesu'jya' pa'ji'cue jíc.

Jesusa's jiimeetj jīna Pedro we'weni

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Tyajū' Jesusa's tundrra jyūna u'jty sacerdote npiitstjē'j yatna. Atsa' Pedro' Jesus e'ste jyu'j neeyūurrac u'jna ũsu'. ⁵⁵Cytee pa'jrra' patyute ipy

yutjrraty bajchya' cach. Atsa' Pedrova tyāawe'sh yacj ij bajchya' cachcu.
⁵⁶Atsa' teech u'y selpisá' Pedro tyā'wē ipy pucate bajchna u'pte', dyi'pte ew tjengrra na'jīc:

—Naa pitstjē'jva Jesus yacj u'jusa' jīte', ⁵⁷Pedro' īshīic:

—Andya' jiimeetj tyāa pitstjē'j cysusu'i'cue tyā'sa' jīc.

⁵⁸Tyajū' tyāa e'su' viteva uyrra na'jīc:

—Indyva tyāawe'sh yacj u'jusang jīte', Pedro pasrra':

—Isa, andya' tyāawe'sh yacj u'jusameetj jīc.

⁵⁹Tyāa scjēwni teech orate' vitec na'jīna we'we:

—Īshīimeete, naa pitstjē'ja's uytju Jesus yacj u'jute. Tyāa yacj u'jusarraí, Galileajuwe'sha' jīte', ⁶⁰Pedro pasrra':

—Quījne'nga we'we' na'sva jiyutsmeetj. Tyā'jīna we'wena nee ūsiyna, atall we'wec. ⁶¹Atsa' Jesusa' tupjirra Pedro dyi'pte tjengte', Pedro' yajcycu Jesus we'werra': Āchj atall we'wemeyna, tecj us īshīijatsyā'j yuune'nga jīni's. ⁶²Tyajū' Pedro' eca casejrra seena' wala űusna ű'nec.

Jesusa's npeevyshicani

(Mt. 26.67-68; Mr. 14.65)

⁶³Tyajū' Jesus űpjwe'shte yupna űssa yu' weech we'wenaty pāpā'. ⁶⁴Sa' yafytyi tundrraty dyi'pte uca'ca' na'jīna:

—Aan jiyune'nga quim uca'catsteva.

⁶⁵Tyā'jīnaty wala cuj jwend we'wena wēeshu'.

Judiu ntjē'jsawe'sh tashte Jesusa's cuutya'jni

(Mt. 26.59-66; Mr. 14.55-64; Jn. 18.19-24)

⁶⁶Sa' cjicjyna sējētste', judiu ntjē'jsa sacerdotewe'sh, Dyus leya's caapiya'jsa tyāawe'sh pcjaacjerraty Jesusa's cytee cuutya'jrra pējy:

⁶⁷—Mpeeta'sh, indya' ¿Cristo dyijngá'? jīte', Jesus pasrra':

—Tyā'wēitj jīteva, isane' we'we' sūjmeene'cue. ⁶⁸Sa' i'cue'shtyi andy paapējyvatsva, pasya'vameei'cue. Sa' andya's tyjweteya'vameei'cue.

⁶⁹Nava āchjūyā'ja' Dyus Nchi'c Nasa Yuusá' Dyus ityīsa pucate cachya' u'juena jīc.

⁷⁰Atsa' jyucaysa na'wēty pējy:

—Na'jī'ng na', indya' Dyus Nchi'ctju jīne'nga jīte', Jesus pasrra':

—Tyā'wēitj. I'cue'sha' isa i'cue we'we' jīc. ⁷¹Atsa' tyāawe'sh we'werra':

—¿Quījya' jwee vite testigo peejiicytja'w? Cue'sh tjū'wēju yuutja'w tyajy we'weni's wēsē'j jī'ty.

Jesusa's Pilato cusete ducjni

(Mt. 27.1-2, 11-14; Mr. 15.1-5; Jn. 18.28-38)

23

¹Tyā'wē yūurra' Jesusa's Pilato tashna jyūna u'jty. ²Cytee pa'jrra' na'jīnaty pāatyjī'cj:



(San Lucas 22.66)

—Naa pitstjê'ja' nasaty caypumba'jna ûstetja'w uy, sa' Romate gobierno's ducjwa'lme'. Sa' Dyus tyjityjrra caajnsa andytju jycaajwa'jsa jî'c jîte', ³Pilato' pējycu:

—Indya' ¿judiwe'shtyi jycaajsa dyijngá'? jîte', Jesus pasrra':

—Tyā'wē itj, isang we'we' jîc.

⁴Atsa' Pilato' sacerdote npiitstjê'jwe'sh nasa jyucaysaty na'wēc we'we:

—Naa pitstjê'j yuuwe yuuni's uyu'tsmeetj jîteva, ⁵tyāawe'sh yu' jwee'irráaty sus we'wena na'jî':

—Judeate nasa jyucaysaty jyuca caypumba'jna jyā'jatsa' tyajy we'weni yacj, Galileaju tacjrra āchja' aysuva jyuca pecūjutsa' tyā'wē yūuna jî'ty.

Jesusa's Herodes tashte cuutya'jni

⁶Tyā'wē we'wete Pilato wēsē'jrra', nasaty pējycu:

—Tyāa pitstjê'ja' Galileajūwe'shvéana jîna. ⁷Atsa':

—Tyajūwe'shí'c jîna pta'shte', Galileate ne'ljue'sh Herodes tashnac caaj, tyān ensu' Herodesva Jerusalenteycu ūsu' naa pa'ga. ⁸Atsa' Herodesa' Jesusa's uyrra', wala wechac, tyā'wē Jesusa' quījva yu'c jîni's wēsē'jrra' nyafiic Jesus yacj puuty uy wēena ūsu', cieluju quījrráava caavya'ja'tje' tyāava uyu'nja sūjrra. ⁹Tyajū' Jesusa's quījquījva wala pējycu, nava pasme'. ¹⁰Cyteeva sacerdote npiitstjê'jwe'sh vite' Dyus leya's caapiya'jsawe'sh cūjrra wala juuna' we'wena yuwee ūsty. ¹¹Atsa' Herodesa' tyajy soldauwe'sh yacj Jesusa's weech we'wena ajtserra jycaajsa ropa na'wē zhichcuesa caatje'jrraty npeevyshijcana ūsu'. Tyā'wē yūurrac

Herodesa' Pilato tashtey Jesusa's qui' caaj. ¹²Pilato yacj Herodes yacja' nyaffi yu' iipuiisaty yu', nava tyān ente tyāwē yūurra' yuwe ewuuty.

Jesusa's icjwa'lj vitni

(Mt. 27.15-26; Mr. 15.6-15; Jn. 18.39-19.16)

¹³Tyajū' Pilato' sacerdote npiitstjē'jwe'sh vite' judiu ntjē'jsawe'sh chjambte nasa jyucaysaty caapcjacjē'jrra, ¹⁴na'jīnac we'we:

—I'cue'sha' naa pitstjē'ja' nasaty caypumba'jna ūsa' jīrra andy tashte nuypa'ji'cue. Atsa' andya' i'cue'sh wēsē'jna ūstey jyuca paapējytju. Nava quijte yujva ewmēe yūuni's yu' uymeetj. ¹⁵Atsa' Herodesva ewmēe yūuni's uymeerra', qui'quin caashwendu'cj. I'cue'shīva jiyui'cue naa pitstjē'ja' yuuwesa casejme'. Atsa' ¿ma'wē icjwa'lj yuucy? ¹⁶Tyāa pa'ga icjmēe caapechucue'jrrarrāa caatyjweete'je'nja jīte', ¹⁷⁻¹⁸nasa jyucaysa na'jīnaty sus we'we:

—Naa pitstjē'ja's icjrra Barabasrrā's mityjwete jī'ty. (Pilato' añu iisac tyāa fiestate teeche preesu tyjweeté' nasa wechaacajn naa pa'gaty tyā'jī'.)

¹⁹Tyāa Barabas yu' chjambte gobierno's puí quiisrra nasaty wala quicjē'pja'ga carceltec tyaa'jni ūsu'. ²⁰Tyajū' Pilato' Jesusa's tyjweete wēerra nasaty qui' pējycu. ²¹Nava tyāawe'sh yu' jweefirráaty sus we'we:

—Cluuste pejca mcaafyutsulj yuj jīna.

²²Atsa' Pilato' tecj usva nasaty qui' we'wec na'jīna:

—Naa pitstjē'ja' ¿quijga ewmēe yūu? Andya' macue paapējyrrava, ewmēe yūuni's yu' uymeetj icjcajn yuuva. Tyā'wē yuuwesa casejetsme' atsa' caapechucue'jrrarrāa caatyjweete'je'nja jīteva, ²³tyāawe'sh yu' jweefirráaty sus ūuscha we'wena cluuste fyutscaaj. Sacerdotewe'sh nasa jyucaysa tyā'wē sus we'weni yacjrrāa pejca cnaytyi tyāawe'sh pēyni's. ²⁴Tyajū' Pilato' tyāawe'sh pēyni's cytey yuuc, ²⁵sa' gobierno's puí quiisrra nasaty quicjē'jsa yu'sa' carceluj caacutyi'jrra Jesus yu'sa' tyāawe'sh cusete nvijtcu, quij yūu wēerrava cytey yuucajn.

Jesusa's cluuste fyutsni

(Mt. 27.32-44; Mr. 15.21-32; Jn. 19.17-27)

²⁶Jesusa's cluuste fyutsya' jyūna u'juetsrra', teeche pitstjē'j Cirenejūwe'sh Simon yaasesa chjambte pa'jatste pul'jycjēwrra', cluusa's tyā'sna cyaacjē'jrraty Jesus e'stey pe'jna u'j. ²⁷Tyā'wē yūuya' u'juetste, nasa wala cuj u'juets yu'ty. Tyāa cshavyte u'ywe'shva tyā'wēty wala cujsa ñusrra sus ū'nena u'jna ūsu'. ²⁸Atsa' Jesusa' tyāawe'shtyi yu'tjengrra':

—Jerusalente u'ywe'sh, andya's ñusrra ū'ne na'wē' wejy yuuva i'cue'sh fi'nzewa'ja's yajcyrra mñuswe, i'cue'sh luuch pa'gate. ²⁹Tyā'wēme' naa quiwete ñusu en yuja'. Tyāa en pa'tje', tyāawe'sh luuch pytjaa yuutste



(San Lucas 23.17-18)

uyrra' na'ljityna: Bagach yujva nasa ji'pjurra cchu'chu'jsamée yacja' tyacue ñus yujmeena jityna. ³⁰Tyajū' nasa' ñusna ũucjna vits wala uperra jyuca icj jytjāasutyna, sa' tjā'j le'chcuesatyva tyā'wēy yūu jytjāasutyna. ³¹Fytūu tash buchatsterrāa yujva na'wēty yū' na' fytūu tash ewsa ucawa'j en ājte yu' wejy tyā'wē yūutyna jīc.

³²Jesū yacj icjya' e'nz pitstjē'j wala yuuwesaty jyūna ul'jty. ³³Sa' teech ajte Uusāa dyictjē dyi'tjrrāasa jīnisate pa'jrra', Jesusa's cluuscjē qui'ptyi, tyā'wēy e'nz yuuwesatyva teechsa's patsu, vite's jembu. ³⁴Tyā'wē cluuste fyutsutste', Jesusa' na'jīnac we'we:

—Tata, meen peltunaī andya's atsesawe'shtyi. Tyāawe'sha' jiimeerraty tyā'wē yū' jīc.

Tyajū' soldauwe'sha' suerte caajty, Jesus atjni ropa's maa soldau cnayteva jiyuya'. ³⁵Naapcachja' nasa cujsa cytee tjengna ũssa vite' judiu npiitstjē'jwe'shva Jesusa's weech we'wena npeevyshijcaty na'ljīna:

—Vitetyva nwe'weya' ājā'c na' āchja' peequī cluusuva iyuna, Dyus tyjityjrra caajnisā dyijrra' jī'ty. ³⁶Atsa' soldauwe'shva weech we'wena utyaarra', vino ewmeesa's yus wēena ³⁷na'ljī'ty:

—Indya' judiuwe'shtyi jycaajsa dyijrra', peequī cluusu iyurra msa'j jī'ty.

³⁸Cluus vitste' griego, latin, hebreo yuweju fil'jni na'ljī'c: Naaí Judiuwe'shtyi Jycaajsa' jī'c.

³⁹Tyajü' yuuwesa cluuscjẽ a'cyni u'psa teechna' na'jic Jesusa's iiwẽeshuna:

—Indya' Cristo diyjrra', peequí cluusu iyurra cue'shtyiva meen nwe'we jite', ⁴⁰vite' ca'tu pucacjẽ u'psa yu' na'jĩnac pas:

—Indya' yuuwesarra tyã'wẽ seena' castigãyni u'prrava, Dyusa's ñucju'tsmeevã'nga tyã'wẽ wẽeshu'. ⁴¹Cue'sha' isa yuuwesayujtja'w, tyãa pa'ga castigãyni u'ptja'w. Nava naa pitstjẽ'ja' quijte yujva yuuwesa meec yu' jĩra', ⁴²Jesusa's na'wẽc we'we:

—Iindy jycaajwa'tje pa'jrra', andya's yaaquine'nga jite', ⁴³Jesus pasrra':

—Isatj we'we', Dyus ñsnite achjĩ andy yacj ñsune'nga jic.

Jesus uuní

(Mt. 27.45-56; Mr. 15.33-41; Jn. 19.28-30)

⁴⁴Tyajü' ñepyã yuutspcachja', naa quiwete jyuca chji'ndycu cusutste las trestepcach. ⁴⁵Seca' cweetjme', naapcachja' dyuus yatte tyundenisa liensu pesatj a'cynisa' puupyãjcjẽc sute. ⁴⁶Naapcachja' Jesusa' na'jĩnac sus we'we:

—Tata, iindy cusete andy ñusa's nviitutstju jĩna'va uuc.

⁴⁷Tyã'wẽ yũute', soldau cpiitan uyrra', na'jĩnac Dyusna wecha:

—Isa, naa pitstjẽ'ja' yuuwemeesa yuj yu'ga jic. ⁴⁸Atsa' nasa jyucay cytee ñssava tyã'wẽ yũute uyrra', ¿tyã'wẽ yuja' yuumañ? sũjnaty ñusna ñucjna u'j. ⁴⁹Atsa' Jesusa's jiisawe'sh vite' Galileajũy Jesus yacj yuusa u'ywe'sha' jyu'jurráaty tjengna ñsu' tyã'wẽ yũutste.



(San Lucas 23.43)

Jesusa's pendaní*(Mt. 27.57-61; Mr. 15.42-47; Jn. 19.38-42)*

⁵⁰Cyte' teech pitstjêl' José yaasesa ūsu'c. Tyāa yu' Judea quiwete Arimatea chjambtewe'sh judiu npiitstjêl' walasatewe'shcu yu'. ⁵¹Tyāa Jose' isa bagach Dyus jycaajya' tacjey sūjna ūytjassac yu'. Tyā'wërra'ic vite judiu npiitstjêl'jwe'sh Jesusa's icjya' puuty we'wetste', tyāa yu' wa'l. ⁵²Tyājū' tyāa Jose' Pilato tashte u'jrra Jesus cacue's pējycu. ⁵³Sa' cluusuj spajcyrra liensute yaprra cuet peña u'se pjaandeni quim yujva pendanimeegac cjicj. ⁵⁴Tyā'wë sapatu jycaasewa'l en jyuca ājātsu yu'. ⁵⁵Atsa' u'ywe'sh Galileajūjy Jesus yacj pi'cyna yuusa' tyāawe'shva u'jrra cuet cāfy pendani's uytyi Jesus cacue's mcaa cjicjetsteva. ⁵⁶Sa' yatna shawendna u'jrra, Jesus cacuete shūshwa'l jyuca pjeu'jrraty sapatu jycaase ente qui'sna fi'nze, Dyus jycaajni's cytey nwëesē'jna.

Jesus qui' ityi yuuni*(Mt. 28.1-10; Mr. 16.1-8; Jn. 20.1-10)*

24 ¹Jycaase en scjēwnijū cuscuscjē wala cusí u'ywe'sha' Jesus cacuete shūshwa'l pjeu'jnisa's atra pendaní cuet cāfyna u'jty. Vite u'yva tyāawe'sh yacj ja'nda pi'cyna u'jty. ²Cytee pa'jrra', cāfyte apjnisa cueta's fiite qui'pni u'pte uyrra', ³cāfyte u'caty. Nava Jesus cacue yu'sa' uymeeta'. ⁴Sa' wala ūucjna ma'wë yūuwa'ja's yuuva jiimeety ūsu', naapcachja' e'nz pitstjêl'jty ropa zhichcue zmeena' chijmesa atjrra tyāawe'sh pucate vyaa. ⁵Atsa' wala ūucjrra quiwecjēty quītsju, naapcachja' tyāa pitstjêl'jwe'sha' na'jity:

—Uusaawe'sh cshavyu ityi yuusa's ¿quījya'cue pacué'? ⁶Ayte meeyā'ja'. Uurrava qui' ityi yuuyā'cj. Galileate ūsrra' na'jīnac we'we tyā'sa' miiyajcywe: ⁷Dyus Nchi'c Nasa Yuusa's ewmeesawe'sh cusete ducjni yuuna, atsa' tyāawe'sha' cluuscjē qui'prra icjetyna. Atsa' uurrava tecj ente' qui' ityi quiiteena ¿jīna pta'shmeená'?

⁸Tyā'ljite' Jesus we'weni's yajcytyi. ⁹Sa' pendaniijū shawendna u'jrra ma'wë uyni'sva jyuca pta'shtyi oncesaty, sa' Jesus yacj u'jusa vitesatyva pta'shtyi. ¹⁰Tyā'wë pta'shsa yu' Maria Magdalena, Juana, Jacobo nji'j Maria, vite' u'ywe'sh ja'nda u'jsa tyāawe'shtyi yu'. ¹¹Nava Jesus yacj u'jusawe'sh yuutyi' luucu we'weni na'wërrāane' ptjūuse' tyāa u'ywe'sh pta'shnisa yu', atsa' isane'ta we'we' sūjū'tsmeeta'. ¹²Tyā'wēteva Pedro' wuwuurrac tjengya' u'l pendaní cāfyte, sa' dyiiga cuyrra', liensurrá's putste qui'pni u'pte uyrra': ¿Tyā'wë yuja' yuumañ? sūjna wala cuj yajcyna yatna shawendcu.

Emaus chjambna u'jsaty Jesus vyaani*(Mr. 16.12-13)*

¹³Tyāa entey Jesus yacj u'jusa e'nzsa' Emaus chjambnaty u'juets yu'. Tyāa chjamba' Jerusalenuj once kilometro āj jyu'cjac ūsu'. ¹⁴Tyāa

e'nzsa' jũ'naciē quĩjquĩ yũuni'sva jyuca yajcynaty puuty we'wena u'juets yu'. ¹⁵Tyā'wē dyi'tje we'wena u'juetspcachja', Jesusa' vyaarráa yuurra tyāawe'sh yacj ja'nda u'cj. ¹⁶Tyā'wēteva, tyāawe'sh yu' uyrrava, quimteva jiyumeeta'. ¹⁷Tyajũ' Jesusa' pějycu:

—¿Quĩjcue tyacue puuty we'wena u'jue'? ¿Quĩj yuupa'ga tyā'wē ñusna u'juetscue? jíte', ¹⁸Cleofas yaasesa teehsa' na'ljĩnac pas:

—Jũ'nacjerráa Jerusالente tyā'wē seena' ñus ñus yũunisa's majũwe'shva jyucaty jiyu, atsa' indyrráavá'nga jiyumée neeyũ cytee ũsrrava jíte', ¹⁹Jesusa' pějycu:

—¿Quĩjga yuu? jĩna. Atsa' tyāawe'sha' pta'shtyi jyuca:

—Jesus Nasaretjũwe'sha's seena' ñusñus vitra icjni'stja'w ji'pju. Tyā' Dyus yuwe pta'shsa quĩjquĩ yũuya'va ājasac yu', sa' Dyus dyi'pte vite' nasaa cshavyteva tyā'wēc ewrráa yũuna fi'nzesa yu'. ²⁰Tyā'wēteva sacerdote npiitstjē'jwe'sh vite' cue'sh npiitstjē'jwe'sh yu' tyā'sa' icjwa'jrráa vitra ducjtyi, atsa' cluuste fyutsrra icjtyi. ²¹Cue'sh yu' Israelwe'shtyi nwe'wewa'jsana sũjũ'tja'w, nava cytey yuume'. Tyā'wē ñus yũuni āchja' tecj en yā'j yuutsa'. ²²Atsa' u'ywe'sh cue'sh yacj ij pcjaacjena u'jusa maafĩ yu' pndanĩ cafyte tjengya' u'jrra ²³qui' shawendrra', cue'shtyi cjāawāshi'ty tyāawe'sh pta'shrra': Uusáa cacue yu's uymeerrava, angeswe'shrráaty'tja'w uy, atsa' Jesusa' ityĩ yuuc jĩ'ty jĩnaty cue'shtyi pta'sh tyāa pa'gatja'w ũucj. ²⁴Atsa' cue'sh yacj u'jusa pitstjē'j maafĩ yu' pndanĩ cafyna u'jrra u'ywe'sh ma'wēne'ta pta'sh tyā'wēyrráatja'w uy. Nava Jesus yu'sa' uymeetja'w jĩnaty pta'sh jíte', ²⁵Jesusa' na'wēc we'we:

—Dyus yuwe pta'shsawe'sh we'weni's nacue tyachteva, jiyuya' ājā'tsmée írráai'cue. ²⁶Cristo' cielute u'camey, ¿seena' ñus pytjaa yuuwa'jsa yu'tsmeená'? jĩrra', ²⁷Dyus libroute ma'wē fi'jni'sva jyuca pta'shya' tacjcu, tyā's ma'wē yũuwa'ja'sva Moises we'wenijũjy tacjrra mtee pa'jne'ta Dyus yuwe pta'shsawe'sh fi'jrra nvijt cytee pa'j. ²⁸Sa' tyāawe'sh pa'jwa'j chjambte pa'tje', Jesus yu' u'jnic u'juets yu'. ²⁹Atsa' tyāawe'sha' na'ljĩnaty neevisha:

—Cue'sh yacj ayte me'ca deja'. Tyā'wēme' cusutsyā'ja' na' chji'ndyina jíte', Jesusa' tyāawe'sh yacj u'cac cytee deja'. ³⁰Sa' tyāawe'sh yacj mesate u'prra', Dyusna wechana'va pana's pe'ltenderra tyāawe'shtyi ũsu'scu. ³¹Tyā'wē yũunijũty quimteva jiyu. Naapcachja' Jesus yu' naa dundte tyāawe'sh yafyju vyaame'. ³²Atsa' tyāawe'sh pwe'sh na'ljĩnaty puuty pta'shi':

—Jesusne' yu' atsa' isa yujne' cue'sh ũuste seena' wechwecha ũusutje' dyi'tje yujrra Dyus libroute fi'jni's pta'shitste' jĩ'ty. ³³Sa' tyāa oratey quiitena'va qui' Jerusالen chjambna shawendrra Jesus yacj u'jusa oncesawe'shtyi uyna pa'jty vite nasa yacj pcjaacjerra u'pte. ³⁴Atsa' cytee pcjaacjena u'psa yu' e'nzsa Emausu shawendsaty pta'shtyi na'ljĩna:



(San Lucas 24.30)

—Isa, cue'shtyi jype'jsa' qui' ityĩ yuuyujga atsa' Simonva uyca jite',
³⁵ Emausu shawendna pa'jsava pta'shtyi dyi'tje ma'wẽ puuty uyrra
 we'weni'sva jyuca, sa' pana's tyundendetspcachja' ma'wẽ yũurra
 Jesusteva jiyurrava jyuca pta'shtyi.

Jesusa' tyāa yacj u'jusawe'shtyi neewe'werra nviitni
 (Mt. 28.16-20; Mr. 16.14-18; Jn. 20.19-23)

³⁶ Tyāawe'sha' cytee we'wena u'píyna, Jesusa' tyāawe'sh pyājte
 vyaarrāa yuurra na'jīnac wecha:

—Ūucjmée wechana meswe jite', ³⁷ tyāawe'sh yu': ańimusa's ne'tca'w
 uy sũjrra ūucjutsty yu'. ³⁸ Atsa' Jesus we'werra':

—¿Quĩ yuutecue ūucjú'? Sa' pta'shte', ¿quĩ yuurracue isa yujna
 sũjũ'tsmée? ³⁹ Mtjengwe andy cuse pety andy chinda yā'jrra. Vitemée,
 andytju. Atsa' andya's ew jiyuya' mja'ndywe. Andya' ańimusmeerra',
 dyi'tj ji'pjsatj, sa' cacue'sva ji'pjsatj. I'cue'sh yafyte ma'wẽtca vya' tyāa
 yu'sa' jyuca ji'ptju.

⁴⁰ Tyā'jrra', cuse pety chinda yā'jrra ctjeengu'cj. ⁴¹ Nava tyāawe'sha' cuj
 yajcyna wechaniiterraá Jesusna sũjna yaacywa'j yu'sa' ji'pjumeeta'.

Tyajũ' Jesusa' na'jīc:

—¿I'cue'sha' ū'wa'j quĩjrrāava ji'pjmeecue'? jite', ⁴² wendy cjacjni pe'la
 vite' chji'ndy mil tyā'wesa'styi ūs. ⁴³ Atsa' jypa'garra' tyāawe'sh dyi'ptey
 uyna ūste ū'c. ⁴⁴ Sa' na'jīnac we'we:

—Andyna na'wẽ yũuc tyã'snatj andya' i'cue'sh yacj nee u'juj pta'sh. Moises ley fi'jni vite! Dyus yuwee pta'shsawe'sh librute fi'jni vite! Salmos librute fi'jni ũsta', andya's ma'wẽ yũuwa'ja'sva tyã' jyuca cytey yuuna jĩnatj pta'sh.

⁴⁵Tyajũc Dyus librute fi'jni's isa ew caajiyu'j, ⁴⁶sa' na'jĩc:

—Cristo' uuwa'jsa', nava tecj ente' qui' ĩtyĩ yuuna uusaawe'sh cshavyuj. ⁴⁷Atsa' tyã'wẽ yũuni's Jerusalenu pta'shya' tacjrra maa maa quiwetevea jyuca pta'shityna, cyaj nasa' pcaltyi nvijtrra Dyus tashte shawendte', Cristo' tyãawe'shtyi peltunaĩna jĩna fi'jni ũsa'. ⁴⁸Atsa' i'cue'sha' andy ma'wẽ yũurra qui' ĩtyĩ yuuni's uysaai'cue na' tyã'sa' pta'shwa'j ji'pji'cue. ⁴⁹Nava mwẽesẽ'jwe: andy Tata i'cue'sh jĩ caajya' neeyũuc tyã'sa' caja'nja jypa'gacajn. Nava tyã'sa' jypa'gamey yu', ay Jerusalentee meswe jypa'gapcach jĩc.

Jesus cielun u'jni

(Mr. 16.19-20)

⁵⁰Tyãa e'su' tyãa yacj u'jusawe'shtyi pe'jna u'cj chjamb eca Betaniate pa'j. Sa' cusety quisrra jyucaysaty bendecĩycu. ⁵¹Tyã'wẽ yũutspcachja', cielun pe'jna u'jnic yuu tyãawe'shrráaty nvijtrra. ⁵²Atsa' tyãawe'sha' Jesus yuj yu'ga jĩna wechana Jerusalen chjambnay wala wẽtwẽt yajcyna shawendtyi. ⁵³Sa' pu'vitumeety dyuus yatte Dyusna wechana nes yu'.

DYUS YUWE SAN JUAN FI'JNI

Cristo naa quiwete vyaani

1 ¹Nyafiitey naa quiwe meefin, Cristo' ūsyā'cj yu'. Tyā' Dyus yacjcu ūsu', sa' Dyus írráac yu'. ²Nyafiiteya' tyā'wēc Dyus yacj ūssa yu'. ³Dyusa' tyā'sna neewe'werrac quǐquǐjnava jyuca cviituj. Tyāa pa'ga naa quiwete quǐquǐjva ūssa' jyuca tyajy vitnirrarráata'. Dyus yacj ūssa quǐquǐjnava vitmeevatsa', quǐj yujva mee yuutyna. ⁴Uurra qui' ityi yuuwa'ja's tyāac ji'pju', sa' tyāa írráac nasaty eena'te caafi'nze'jwa'jsa yu'. ⁵Tyāa eena'sa' chji'ndyte cweetjcu, atsa' chji'ndysa' fíchjaya' ājame'. ⁶Tyāa eena'sa's tuutje'jsa' teech pitstjē'j Juan yaasesac yu' Dyus caajni. ⁷Tyā' tyāa eena'te caafi'nze'jwa'jsa's tuutje'jsac yu', maava tyajy tuutje'jni's wēse'jrra Cristo's ūuste jypa'gacajn. ⁸Juan yu' eena'te caafi'nze'jwa'jsa meec yu', naasáa eena'te caafi'nze'jwa'jsa's tuutje'jsarráac yu'. ⁹Naapcachja' nasaty eena'te caafi'nze'jwa'jsa Cristo' naa quiwete vyaatsrráac yu'. ¹⁰Sa' vyaarra' naa quiwete fi'nzena ūsu'c. Tyā'wēteva, naa quiwetewe'sha' jiyumeeta', macue tyajy vitnisarrava. ¹¹Tyajy vitni quiwete vyaateva, tyajy ji'j jínisa' jypa'gameeta'. ¹²Macue tyajy ji'j jínisa jypa'gameeteva, maaí yu' tyā's nwēese'jrra ūuste jypa'gaty. Atsa' tyā'sna jypa'gasaty'i's Dyusa' tyajy luuch yuuwa'ja's ūscu. ¹³Tyāa pa'ga tyāawe'sha' naa quiwete neywe'sh cacueju cacue yacj upyji'ty neywe'sh jytjáasni tyā'wésameeta', tyāawe'sha' Dyus luuch yuuna pa'jsata'. ¹⁴Nyafiitey Dyus yacj ūssa' nasaa cacue's jypa'garra cue'sh yacj ūsu'c, isasarrá's pta'shna peeygājna. Tyāa pa'ga cue'sha' tyajy fi'nzeni wala zhichcuesa's uytja'w, tyāasa jiitja'w Dyus Nchi'c teechrráasateva. ¹⁵Tyā'snac Juana' tuutje'jna na'jīna we'we:
—Andya' na'snatj pta'shi' i'cue'shtyi: Andy e'ste yuja' tyā' andy naa quiwete upymeyna we'shcu yu', tyāa pa'ga andyte jytjaacuesa' jīnac pta'sh. ¹⁶Atsa' cue'sha' tyajy peeygāani macue ne' yu' tyā'sa' jyucatja'w jypa'ga jyucaysa. ¹⁷Nyafí' juuna' jycaajnisaley Moises nvijtcu tyā'srráanatja'w jypa'ga, naapcachja' Jesucristo' isa Dyus peeygāani'scu nuypa'j tyā'snatja'w

jypa'ga. ¹⁸Nava maa yujva Dyusa's iuuymeeta'. Tyā'wēteva Dyus Nchi'c teechrráasa Ney yacj ij ūssa' cue'shtyi' caajiyu'cj Dyus ma'wēsateva.

Jesus quimteva Juan pta'shni

(Mt. 3.11-12; Mr. 1.7-8; Lc. 3.15-17)

¹⁹Jerusalente judiwe'sha' pējyya' caajty sacerdote vite' levitawe'shtyi Juan quimteva jiyuya'. ²⁰Atsa' Juana' āatec pta'sh:

—Andya' Cristomeetj jīna.

²¹Tyājū' qui'quin pējtyti:

—Tyā'wērra' ¿quimnga? ¿Tyāniitey Dyus yuwe pta'shsa Elias vá'nga? jīte', Juan pasrra':

—Tyā'wēmeetj jīc.

Atsa' qui'quin pējtyti:

—Dyus yuwe pta'shsa' pa'jana jī'ty tyāa vá'nga jīte':

—Tyāameetj jīnac pas.

²²Tyājū' qui' pējtyti:

—Tyā'wērra' indya' ¿quimnga? Indya' quīj yūuna fi'nzesarrava mpeeta'sh. Tyā'wēme', cue'shtyi jycaasaty pta'shya' u'jwa'j jī'ptja'w jīte', ²³Juan pasrra':

—Dyus yuwe pta'shsa Isaiasa' na'jīnac we'we: Nasa u'pnimée quiwesu sus we'weni ptjūsena: Dyus pa'jwa'ja's mpjeu'jwe jīna, nava andy tuutje'jna pecūjwa'ja's pta'shnac tyā'jī.

²⁴Juana's paapējyya' pa'jsa' fariseowe'sh caajnisaty yu', ²⁵sa' qui'quin paapējtyti:

—Tyā'wē Cristomeetj, sa' Eliasva meetj, sa' Dyus yuwe pta'shsa pa'jana jī'ty tyāameetj jī'ng sa' ¿quījya'rrāanga nasaty yu'te bautisaī'? jīte', ²⁶Juan pasrra':

—Andya' yu'terrāatj bautisaī'. Nava i'cue'sh cshavyte teech ūsa' tyā'sa' jiimeene'cue. ²⁷Tyā' andy e'su vyaana, nava tyā' andyte jytjaacuesa'. Atsa' andya' tyajy pelgaty tundni wesrrāa yujtyva cijimbya' ājmeecuesatj jīnac pas.

²⁸Juana' Jordan yu'wala cuteju sec cāani ju'ngu Betábara yaasesatec tyā'wē bautisāyna ūsu', atsa' cyteety tyā'wē paapējyya' pa'jna ūsu'.

Cristo Dyus caajni piishacuē

²⁹Cuscuscjē' Juana' Jesus yujte uyrra', na'wēc we'we:

—Mtjengwe, naaí Dyus caajni piishacuē', jyucaysa pcaltyi tyundewa'jsa. ³⁰Atsa' andya' tyā'sna we'werratj tyā'wē pta'sh: Andy e'su teech pitstjē'j vyaana, tyā' andyte jytjaacuesa', tyā' naa quiwete andy upymeyna we'shcu yu' tyāa pa'ga. ³¹Tyā'sa' andyíi yuuva jiimeetj yu' quimteva. Nava Israelwe'sh tyā's jiyucajn yu'terrāava bautisāyna ūsu'tj.

³²Juana' qui'quin we'wec na'jīna:

—Dyus Espiritu's uytju cieluju tumb chijme na'wēsa Jesus cajcucjē quiijatste. ³³Tyā'wēteva, andya' nee jiimée írráatj yu' quimteva. Nava andya's bautisāyya' caajsa' pta'shcu: Espiritu's uyuune'nga teech pitstjē'j cajcuete

quíijatste', atsa' tyāa pitstjē'ja' isa Dyus Espiritu's nasaa ũuste cyu'acje'jsa yuuna jīnac pta'sh. ³⁴Atsa' āchja' uyrra', jiyutj Dyus Nchi'cteva, sa' tyā'snatj tuutje'je'.

Cristo yacj u'jusa nyafytewe'sh

³⁵Vite cuscuscjē' Juana' qui' cytey ũsu'c tyāa yacj u'jusa e'nzsa yā'jrra.

³⁶Sa' Jesus jycjēuuste uyrra', Juana' na'jīc:

—Mtjengwe, naaí Dyus caajni piishacué'.

³⁷Tyā'jīni's wēse'jrra', tyāa e'nzsa' Jesus e'stey u'jty. ³⁸Atsa' Jesusa' yu'tjengrra', tyajy e'ste yuusaty uycu, sa' na'wēc pējy:

—¿Quíjcue pacué'? jīte', tyāawe'sh pasrra':

—Caapiya'jsa, ¿mteenga u'pu'? jīte',

³⁹Jesus pasrra':

—Mejcawe tjengya' jīc. Atsa' tyāawe'sha' u'jrra' jiyuty mtee u'psateva. Sa' tyāa yacj cytee neeyūuty, cusutsyā'cj yu' naa pa'ga.

⁴⁰Juan we'weni's wēse'jrra' Jesus e'stey u'jsa teehsa' Andrescu yaase yu', Simon Pedro nyacj. ⁴¹Atsa' Andresa' tyajy nyacj Simon cjuē'yna nyafyte pta'shya' u'cj:

—Dyus tashu yuusa Cristo jīni's yuutja'w uy jīna.

⁴²Tyājū' Andresa' tyajy nyacj Simona's pe'jna cūjc Jesus ũsnite. Atsa' Jesus uyrra' na'jīc:

—Indya' Jonas nchi'c Simon yaaseng, nava āchja' Cefas yaseni neeyūune'nga. Cefas yu', Pedro jīni'.

Felipe, Natanaelwe'shtyi Jesus pa'yani

⁴³Vite cuscuscjē' Jesusa' Galilea quiwen u'juetsrra', Felipe's uyrra':

—Andy yacj myuj jīnac pi'cy.

⁴⁴Felipe yu', Betsaida chjambte u'psac yu', Andres Pedrowe'shva tyāa chjambteywe'shtyi yu'. ⁴⁵Atsa' Felipe' Natanaela's pta'shya' u'jrra' na'jīc:

—Moisesa' teeh pitstjē'ja' vyaana jīnac fi'j ley librute, atsa' Dyus yuwe pta'shsa tyāniiteywe'shva tyā'snaírráaty tuutje'jna fi'j tyā'stja'w cue'sha' puuty uy. Tyāa pitstjē'ja' Jose nchi'c Jesusa', Nasaret chjambtewe'sha' jīte', ⁴⁶Natanael pasrra':

—Nasarette', ¿maarrá' nasa ewsa casejya' ājama'c? jīte', Felipe pasrra':

—Mejca vacy tjengya' jīc.

⁴⁷Tyājū' Natanael utyaana cūjutste Jesusa' uyrra', na'jīc:

—Naa pitstjē'j yuurra' Israel nwe'sh jypumbasamée nasa ewsa yuj yu'ga.

⁴⁸Tyā'jīte', Natanaela' pējyuc:

—¿Ma'wē yuurranga andya's jiyu? jīte', Jesus pasrra':

—Felipe pa'yameyna, indya's uytju higuera fytūu tashte u'pte jīte',

⁴⁹Natanaela' na'wēc pas:

—Indya' Dyus Nchi'cngu, Israelwe'shtyi jycaajsa jīte', ⁵⁰Jesusa' na'jīc:

—Tyā'wē higuera fytūu tashte u'pte indya's uytju jīterrāa ¿andy quimteva jiyuvá'nga? Tyā'wēyā'jrra', naajūyā'ja' Dyus caavya'ja'jnity wejy walasaty uyuune'nga jīc.

⁵¹ Sa' qui' we'werra':

—Andya' isatj we'we': cielu pjaaterra ũste', Dyus angeleswe'sha' quĩjna tejcana ũste uyuune'cue Dyus Nchi'c Nasa Yuusáa cajcuceljẽ jĩc.

Caná chjambte ptamunisa

2 ¹⁻³ Tecj en scjẽwniite', Galilea quiwesu Caná chjambte ptamusáa ũsu'ty. Atsa' Jesusva pi'cyni pa'jrra ũsu'c, tyāa yacj ij u'jusawe'sh yā'jrra. Jesus njĩ'jva cytee ũsu'c, naapcachja' vino ptsuute', Jesusa's na'jĩnac pta'sh:

—Vino ptsuc jĩc.

⁴ Atsa' Jesusa' na'wẽc pas:

—¿Quĩj yũucajncue andya's tyā'wẽ pta'shi'? andy en yuu ajmeya' jĩte',

⁵ njĩ'ja' cytee selpisaawe'shtyi na'jĩc:

—Tyāa ma'wẽ jycaatje', cytey myũuwe jĩna.

⁶ Cyte' seis quiwe mityj walasaty ũsu'. Tyāa yu' judiawe'sh cjweechawa'j yu' awnisaty yu'. Mityj iisa ochenta meerrava cien litro yu' cjẽesaty yu'. ⁷ Tyajũ' Jesusa' jycaacj cytee selpisaawe'shtyi':

—Naa mityjsu jyuca yu' uta mawwe jĩte', cytey yuuty. ⁸ Tyajũ' Jesusa' na'jĩnac we'we tyāawe'shtyi': Naa mityjte le'chcuẽ pa'cyrra boda namu's me'jwe yusya' jĩte', tyāawe'sha' cytey yuuty. ⁹ Tyajũ' boda namu' tundyrrava, jiyume' yu'a's tyā'wẽ vino vitniteva. Cytee selpisaawe'shrráaty jii yu', yu'a's tyā'wẽ vino vitnisateva. Tyajũ' boda namu' ptamusa's pa'yarra ¹⁰ na'jĩnac we'we:

—Maava vino ewsa's cjuẽ'ytyi nyafyte yusu' pi'cynisaty, tyāa e'suty vino achamée ewsa's yusu'. Nava indya' tyā'wẽ yũumée vino wejy ewsa'sngu nmejte yus jĩc.

¹¹ Jesusa' Galilea quiwesu Caná chjambtec tyā'wẽ quim yujva ajānimeesa's caavya'j. Tyā'wẽ yũurrac tyajy ewuni's cjiyu'j, atsa' tyāa yacj u'jusawe'sha' jiyuty Jesus quimteva.

¹² Tyāa e'su' Jesusa' Capernaum chjambnac u'j, tyajy njĩ'j vite' tyajy nyacjwe'sh, tyāa yacj u'jusawe'sh yā'jrra.

Dyuus yatte tyweyna ũssaty Jesus cashishni

(Mt. 21.12-13; Mr. 11.15-18; Lc. 19.45-56)

¹³ Judiawe'sh fiesta Pascua en ajātste', Jesusa' Jerusalen chjambna u'cj. ¹⁴ Sa' dyuus yatte u'carra', buey, piisháa, tumb chijmety tyweyna ũstec uy, vite' vyuu yu'ptjejna ũssaty. ¹⁵ Sa' Jesusa' tyā'wẽ yũuna ũste uyrra', cja'tya pjeu'jrra eca cashishcu nasa vite' niimaltyi jyuca. Sa' tyā'wẽy vyuu yu'ptjejna ũsni mesatyva jyuca pũshcu pety vuy yā'jrra. ¹⁶ Sa' cytee tumb chijme tyweysaty' na'jĩc:

—Naaty' ayjyu jyuca mcaashishwe. Andy Tata yatte' tyweyna vyuu yu'ptjejna ũswa'jme'.

¹⁷ Tyā'jĩte', Jesus yacj u'jusawe'sha' yajcytyi Dyus librute na'wẽ fi'jni's: Dyuus yatte' ewmée yũuni's wej yujva peejymetj jĩni's.

¹⁸ Tyajũ' judiawe'sha' ũuscha we'wenaty pẽjy:

—Quim jycaatje tyã'wẽ yũurrava, cue'shtyi mpeeta'sh jĩte!, ¹⁹Jesus pasrra':

—Naa dyuus yata's pẽtyteva, andya' tecj ente' qui' quiiysa' ajãwa'jsatj.

²⁰Tyajũ' judiuwe'sha' iiveech we'wena na'jity:

—Naa dyuus yata's cuarenta y seis añutety tyajna jyã'j, atsa' indya' ħtecj enterrãa tyajya' ewuundyijĩma'ng?

²¹Nava Jesusa' tyajy cacue'scu dyuus yata' jĩna we'we!. ²²Atsa' uurra qui' ĩtyi yuute', tyãa yacj u'jusawe'sha' yajcytyi tyã'wẽ we'weni's. Sa' Dyus libru' isane' we'we!, atsa' Jesusva isasa's ĩrrãane' we'we' sũjna ewtyi jiyu.

Jesus nasaa ũus yaacynity jiyuni

²³Judiuwe'sh fiesta ente Jesus Jerusالente ũste!, nasa wala cuj jiyuty Jesusa' Dyus tashu yuusateva, tyã'wẽ quim yujva ajãnimeesa's caavya'ja'pja'ga. ²⁴Nava Jesusa' tyãawe'sh ma'wẽsateva jyuca jiiyã'cj yu', tyãasac tyã'wẽ jiyuty sũju'tsmée. ²⁵Tyãa nasa' tyã'wẽsata' jĩna pta'shi peejy yu'tsme!, tyãa pa'gatey nasaa ũus yaacynity jyuca jiiyã'cj yu' naa pa'ga.

Jesus, Nicodemo yacj puuty we'weni

3 ¹Teech fariseo Nicodemo yaasesa u'pu'c. Tyã' judiu npiitstjẽ'jsatewe'shcu yu!. ²Tyãa pitstjẽ'ja' Jesus tashte cus pa'jrra', na'jĩc: Jiitja'w indya's Dyusne' tyã'wẽ caaj, cue'shtyi caapiya'cjan. Dyus pu'chmeevatsa', quim yujva ajãwa'jsame's caavya'ja'jmeena, indy na'wẽng yu' tyã's jĩte!, ³Jesusa' na'wẽc pas:

—Isatj we'we!, maava qui' upymeerra yu', Dyus jycaajna ũsnite u'caya' ajameena.

⁴Tyã'jĩte!, Nicodemo' na'wẽc pẽjy:

—Nasa ĩshyã'jsa' ma'wẽ qui' upyya' ajacy? Njĩ'j tutyjte qui' u'carra upyya' ajama'c? jĩte!, ⁵Jesusa' pta'shcu:

—Andya' naa cacue upywa'ja's we'we'tsmeetj. Maava Dyus jycaanite u'ca wẽerra', yu'te vite' Dyus Espiritute upywa'ja'stju tyã'jĩ!. ⁶Nasaa cacue' nasaa cacueteyrrãac upyji', naapcachja' Dyus luucha' Dyus Espiritutec upyji!. ⁷Maava qui' upywa'ja' jĩ'tj atsa' fiy yuj tyã'wẽ we'we'c sũjna yaacynu. ⁸Wejya'sva ma'wẽga susni's wẽse'jrrava, majũ yujte qui' maa dyi'j u'juetsteva ya'jiyu'tsmée, tyã'wẽycu Dyus Espiritute upyni's ya'jiyu'tsmée jĩte!, ⁹Nicodemo' jiyuya' ajameerra' qui' pẽjycu:


—ħMa'wẽ tyã'wẽ yuja' qui' ya'upyjicy? jĩte!, ¹⁰Jesus pasrra':

—Indya' Israelwe'shtyi caapiya'jsarrava, na'wẽsa yuutyi' ħjiimeevã'nga?

¹¹Isatj we'we!: Dyus Espiritute upynisa' wejya na'wẽsarrã' tyã' ma'wẽsateva ĩiuytju sa' jiirratj tyã'jĩ!. Nava i'cue'sha' jiyu'tsmeei'cue. ¹²Naa quiwetewe'shtyi we'wena pta'shte jiyumeerra', ħma'wẽ jiyuqui'cue cielutewe'shna pta'shte'?

¹³Maa yujva cielute u'casa yu' meeta', naasãa cielujũ quĩisa yuurrãa cielute u'casa!, Dyus Nchi'c Nasa Yuusãa tyã' cielutewe'sha' naa pa'ga.

¹⁴Dyus Nchi'c Nasa Yuusa's ěecjẽ a'cyrra qui'pni yuuna, Moisesva ma'wẽga nasa u'pnimée quiwete ũsrra' ul weeswe's fytũucjẽ a'cyrra qui'p



(San Juan 3.2)

tyā'wēy, ¹⁵cyaj maava jyucay tyā'sna uyrra ũuste jypa'gasa', bagachte yujva ptsuwa'jmée ĩtyi fi'nzewa'ja's ji'pjutyna vitumée.

Dyusa' nasaty iiméj wala peeygãani

¹⁶Dyusa' naa quiwete nasaty iiméj wala peeygãrra yuurráac tyajy Nchi'c teechrráasanava naa quiwete caaj, cyaj maava tyā'sna ũuste jypa'garra' bagachte yujva ptsumée ĩtyi fi'nzewa'ja's ji'pjucajn vitumée. ¹⁷Dyusa' naa quiwete tyajy Nchi'ca's caajrrava, nasaty ewmeete nvijtya' caajme', wejyva nwe'weya'c caaj. ¹⁸Maava Dyus Nchi'ca's ũuste jypa'gasa', ewteyā'j neeyũutyna. Nava tyā'wē Dyus Nchi'c teechrráasana ũuste jypa'gasame', ewmeeteyā'j neeyũuwa'jsata'. ¹⁹Maava ũuste jypa'gasame', ewmeeteyā'jty nviitni yu', tyā'wē eena'sa naa quiwete quĩjteva, ewmeerráa yũuna ũsrra', chji'ndyterráa wejy fi'nze wēepa'ga. ²⁰Sa' maava jyucay ewmeerráa yũuna ũssa', eena'sa's ajtserra utya'tsmeeta' eena'te,

tyāawe'sh ewmée yūuni āate vyaacajmen. ²¹Nava ew yūuna fi'nzesa yu' eena'sa's utya'ty, tyāawe'sh ew yūuni' Dyus jycaajnisateva āate vyaacajn.

Jesusa's tuutje'jni's wēse'jrra' Juan wechaní

²²Tyāa e'su' Jesusa' Judea quiwen u'cj tyāa yacj u'jusawe'sh yā'jrra. Sa' cyte' manz en ūsu'c nasaty yu'te bautisāyna. ²³Juanva bautisāynac ūsu' teeche ajte Enon yaasesate Salim utyate, tyāa ja'ndasu yu' ūsu'c naa pa'ga. Atsa' Juana' nasa wala cuj yu'te bautisāyacu. ²⁴Carcelte cyupmeynarrāac tyā'wē bautisāy.

²⁵Tyajū' judiawe'sha' Juan yacj u'jusawe'shtyi paapējytyi tyā'wē bautisāyni's. ²⁶Atsa' tyāawe'sha' Juana's pta'shtyi na'ljina:

—Caapiya'jsa, mwēese'j. Sec cāani ju'ngu Jordan yu'wala cutete ūste pta'shngu tyāa pitstjē'jva āchja' bautisāyna ūsa', atsa' nasa jyucay tyāa yacjrrarrāa u'juetsta' jite', ²⁷Juana' na'wēc pas:

—Quim yujva tyā'wē tuutje'jni yuumeena, Dyus jycaajnimeesa yu'. ²⁸I'cue'sha' yatstey andy pta'shni's jiiyā'ji'cue: Andya' Cristomeetj, naasāa tyajy yatste caajnisarrāatj jīni's. ²⁹Naa ejemplo's mjiyuwe: Ptamunte' novio' novia yacjcu u'pu'. Atsa' novio namicu' pucate u'prra' wala wechwecha yaaqui'c novio we'weni's wēse'jrra. Andyva tyā'wēytju wala wechwecha yaaqui', Jesusa's tuutje'jni's wēse'jrra. ³⁰Tyā' jweefírrāa tujtjesa yuuna u'juena, naapcachja' andya' jweefírrāa ājmeecuesa yuuwa'tj.

Jesusa' cielujū quíisa'

³¹Cielujū quíisa' maateva jytjaacue tujtjesa'. Quiwete ūssa' naa quiwetewe'shta', sa' naa quiwetewe'shrrá'styi pta'shi'. Nava cielujū quíisa' maateva jytjaacue tujtjesa'. ³²Tyā'wērra'ic tyajy wēse'jrra uyni's pta'shi', nava quim yujva nwēese'je'tsmeeta' tyajy we'weni's. ³³Nava tyajy pta'shni's maarrāava nwēese'jvatsa', Dyusa' isac pta'shi' sūjna jiyuna pa'jatyna. ³⁴Tyā'wē Dyus jycaajnisā' Dyus cwe'we'jni'scu we'we', tyā'sa' Dyusa' tyajy Espiritu's macueva ūsu'c tyāa pa'ga. ³⁵Neya' Nchi'ca's wendyrra quījnavā jyuca tyajy cusete nvijtju. ³⁶Atsa' maava Dyus Nchi'ca's ūuste jypa'gasa' ptsumée ityi fi'nzewa'ja's jil'pjutyna. Nava Dyus Nchi'ca's nwēese'jsame' ptsumée ityi fi'nzewa'ja's jil'pjumeetyna, naasāa Dyus castigo seena'sarrā's jypa'gawa'jsata'.

Teech u'y Samariatewe'sh yacj Jesus puuty we'weni

4 ¹Tyā'wē Jesus tashte nasa wejy wala utyaate', Jesusa' Juante jytjaacue bautisāyni's fariseowe'sha' jiyuty. ²Isa yu' Jesusa' bautisā'itsme', naasāa tyāa yacj u'jusawe'shrrāaty bautisā'. ³Nava tyā'wē fariseowe'sh jiyuni's Jesus wēse'jrra', Judeajū casejna u'cj, Galilea quiwen. ⁴Nava Galilea quiwen u'juetsrra', Samaria quiwegac cjēwna u'jwa'j jil'pju'. ⁵Sa' Samaria quiwesu' teeche chjamb Sicar yaasesa ūsa' tyāa chjamb peecu'tjec pal'j tyāa yacj u'jusawe'sh yā'jrra. Tyāa Sicar chjamba' Jacob quiwe ūscu tyajy nchi'c Jose's tyāa utyatec neeyū'. ⁶Tyāa quiwete' Jacoba' tyāniitey yu' cutyi'jni cafy

nvijtna ūsu'ne!, atsa! Jesusa! ēepyāj wajtyna u'juetsrra!, cyteec jycaaseya! cach.
 7Naapcachja! teeche u'y Samariasuwe'sha! yu! pa'cyya! pa'tje!, Jesusa! na'ljic:

—Yu! mpeeswe tundywa'j.

8Tyāapcachja! tyāa yacj u'jusawe'sha! chjambna ū! weyya! u'jnity yu!.

9Atsa! tyāa u'ya! na'ljinac pas:

—Indya! judiu nasang, sa! ꝑma'wētenga ū'cue's yu! tjāasu!? ū'cue!
 Samariasuwe'shtju atsyuja! jīc. (Judiuwe'sha! Samariasuwe'shtyi ajtserra
 we'we'tsrrāa yujva meeta!.)

10Tyajū! Jesusa! pta'shcu:

—Dyusa! quīj ūsya'vateva jiyurra tyā'wēy yu! tjāassa! quimteva
 jiyuvatsa!, andya's yu! tjāasune'cue, atsa! andya! yu! ptsuwa'jmeesa's
 peesu'nja jīte!, 11tyāa u'ya! na'wēc pas:

—Naa cafya! wala dyiia!, atsa! indya! yu! pa'cywa'j jī'pmeeng. Sa!
 ꝑma'wēnga ū'cue's yu! ptsuwa'jmeesa's peesu'nja jī'? 12Cue'sh yatsgawe'sh
 Jacobcu naa cafya's pjaande yu! pa'cywa'j, atsa! tyajy nchi'cwe'shva cyteety
 pa'qui! tajcytyi yuswa'j vite! tyāawe'sh tundywa'j yā'jrra. Atsa! indya! ꝑcue'sh
 yatsgawe'sh Jacobte jytjaacue vāa walasane'nga? jīte!, 13Jesus pasrra:

—Jyucay maava ayte yu'a's tundysa! yū'wēena nes yuutyna. 14Nava
 andy peesni yu'a's tundyrra!, bagachte yujva yū'wēemeetyna. Tyāa
 pa'gatey andy peesni yu'a! tyāawe'sh ūuste yu'itsj na'wē nes yuuna,
 ptsuwa'jmée ūtyi fl'nzewa'ja's jī'pjucajn.

15Tyā'jīte! tyāa u'ya! na'ljinac pas:

—Tyā'wēte!, tyāa yu'a's mpees, cyaj yū'wēevame'nja, sa! peena yu! naa
 cafyte pa'cyya! pa'jme'nja.

16Atsa! Jesus we'werra:

—I'cue nmi'a's me'jwe pa'yaya!, sa! tyāa yacj yuweene'cue ayte! jīte!, 17tyāa u'ya!

—Nmi! jī'pmeetj jīnac pas.

Tyajū! Jesusa! na'ljic:

—Nmi! jī'pmeetj jīrra! isa yuj we'wei'cue. 18Tyā'wē nyafīi yu! tajts
 nmi'i'cue jī'pju!, nava āchwe'sha! nmi! me!, atsa! isa yuj we'wei'cue.

19Tyā'wē wēse'jrra!, tyāa u'ya! na'ljinac pas:

—Indya! Dyus yuwe pta'shsaī ne'nga sūju'tj. 20Cue'sh yatsgatjē'jwe'sha! naa
 vitstety Dyusa's neewe'weya! pcjaacje!. Nava judiuwe'sh yu!, Jerusalenterrāa
 Dyusa's neewe'weya! pcjaacjewa'ja! jī'i'cue jīte!, 21Jesus pasrra:

—Ew mjiyuwe: naa vitste meerrava Jerusalenterrāa Dyusa's
 neewe'wewa'jme!. Dyusa's mteeva neewe'wewa'j en ājana. 22Samariatewe'sha!
 Dyusa's ma'wē neewe'wewa'ja'sva jiimeei'cue. Nava judiuwe'sha! jiirratja'w
 Dyusa's neewe'we!, nwe'wesa! judiu nwe'sha! naa pa'ga. 23Dyusa's neewe'wewa'j
 en ājana jī'tj tyāa ena! ājyā'cj. Atsa! maava īshiimée ūusuj jyuca yajcyrra Dyusa's
 ūusterrāa neewe'wesa! ew yuutyna, cue'sh Tata! tyā'wē yūuni'scu jytjāasu! naa
 pa'ga. 24Dyusa! cue'sh na'wēy cacue jī'pme! na! mtee mteeva ūsa!, atsa! tyā'sna
 neewe'wesa! ūusuj jyuca yajcyrra neewe'wewa'ja! jīte!, 25tyāa u'ya! na'wēc pas:

—Ũ'cue' jiiitj Cristo Dyus tashu yujna, atsa' tyāa pa'jrra jyuca ew pta'shina jīte', ²⁶Jesus pasrra':

—I'cue yacj puuty we'wena u'psa andyíi Dyus tashu yuusatj jīc.

²⁷Naapcachja' tyāa yacj u'jusawe'sha' shawendna pa'jty. Sa' Jesusa' tyā'wē tyāa u'y yacj puuty we'wena ūste uyrra', cuj yajcynaty neeyūu. Nava ¿quijya'nga tyāa u'y yacj puuty we'we'? jīna maa yujva paapēyi'tsmeeta'.

²⁸Tyajū' tyāa u'ya' mityja's cytee tyajna' u'cj chjambsu nasaty pta'shya':

²⁹—Naa quiwete ma'wē fi'nzeni'sva teeche pitstjē'j jiyuc tyā'sa' myujwe tjengya'. Tyā' Cristo íina jīna pta'shte', ³⁰chjambtewe'sha' tjengya' u'jty Jesus ūsnite pa'j. ³¹Naapcachja' tyāa yacj u'jusawe'sha' Jesusa's na'jīnaty we'we':

—Indya', ¿wēemeengá'? Pan mē' jīna.

³²Nava Jesusa' na'wēc pas:

—I'cue'sha' jiimeei'cue andy quīj ū'wa'j ji'pjteva.

³³Tyā'jīte', puuty paapēyi'ty tyāawe'sh pwe'sh:

—Meerra' ¿maa nasa puutsya' cūjvá'ntacy? jīna.

³⁴Atsa' Jesusa' na'wēc pta'sh:

—Andy Tata jytjāasrra mjiya' caajni's cytey yuunirráa, andy ū'ni na'wēsa'.

³⁵Ū' tjē'jwa'j pajnz a'tey peeja' ji'i'cue i'cue'sha'. Nava tyā'wēme'. Mjiinisu mtjengwe vacy, jyuca tjē'jniyā'j ūsa', atsa' pcjajwa'jrrāa yā'j peeja'. ³⁶Pcjajna mjiisa' deweni's jypa'gawa'j ji'pja', atsa' tyāa pcjajnis'a' ptsuwa'jmée ityi fi'nzewa'jsata', cyaj uujsa' pcjajsa yacj ja'ndarraj wechwecha yajcyna neeyūutyna e'nzīi. ³⁷Teechsa' uja'c, naapcachja' vite' pcjajc'e'c jīni' isa yuja'. ³⁸I'cue'sha' uujsameei'cue, nava andya' pcjajya' caatj vite nasa uujnisu jīc.

³⁹Tyā'wē tyāa u'y ū'cue ma'wē fi'nzeni'sva jyuca jiyuc jīna pta'shpa'ga, tyāa chjambte nasa cujsa' Jesusa's ūste jypa'gaty. ⁴⁰Sa' Jesus ūsnite tjengya' pa'jrra', Jesusa's wala neevishaty tyāawe'sh yacj cytee pta'shna neeyūucajn. Atsa' e'nz encu cytee fi'nze, Dyus yuwe's pta'shna. ⁴¹Atsa' tyā's wēse'jrra', Jesusa's ūste jypa'gasa' jweeírráaty pejna. ⁴²Sa' tyāa u'ya's na'wēty we'we':

—I'cue pta'shnirrá's jiyumée, cue'sh yuutja'w tyajy we'weni's wēse'jrra jiyu Dyus tashu yuusa Cristoteva, maatyva jyuca nwe'wesa.

⁴³Tyajū' e'nz en scjēwniijū', Jesusa' Samariajū casejna u'cj Galilea quiweníi. ⁴⁴Jesusíi we'werrava: Dyus yuwe pta'shsa' maa yujva peecy quiwetey yu' wendyni fi'nze'tsmeeta' jīc tyāasac Galilean u'j. ⁴⁵Atsa' Galileate pa'tje', cyteewe'sh yu' wala wechana jypa'gaty, Jerusalen fiestan u'jsa' uyne'ta Jesusa' ma'wē yūuteva tyāasaty tyā'wē yūu.

Teech ātsā'sa's Jesus nuycatyjini

⁴⁶Jesusa' Galilea quiwete pa'cj Caná chjambte, yu'a's vino vitcu nyaffi cytee. Atsa' cytey teeche pitstjē'j ūsu'c ne'jue'sha's jycaaj pu'chsa. Tyā' teeche nchi'c wala ātsa'sa ji'pju'c Capernaum chjambte. ⁴⁷Sa' Galileatey Jesus shawendna pa'jni's jiyurra', tyāa pitstjē'ja' puuty uyna cūjrra', na'jīnac pytjaa we'we':

—Andy yatna mejca, andy nchi'ca's nuycatyjiya'. Tyā'wēme!, uutsyā'ja' jīte!, ⁴⁸Jesus pasrra':
 —I'cue'sha' andy ājani's caavya'ja'jmeete yu', andya's jiyumeene'cue quimteva.
⁴⁹Tyā'jīte!, tyāa pitstjē'j yu' na'ljīc:
 —Dund myuj, andy nchi'c uumeyna.
⁵⁰Tyājū' Jesusa' na'ljīc:
 —Yatna shawendna me'j. Iindy nchi'ca' catyjiyā'jrra ūsa'.
 Tyā'jīte!, tyāa pitstjē'ja' Jesusa' isa yuj we'wene' sūjna yatna shawendna u'cj.
⁵¹Sa' yatte pa'jatste!, tyā'sna selpisaawe'sh pu'tjengya' casejrra' na'wēty pta'sh:
 —Iindy nchi'ca' catyjiyā'cj jīna pta'shte!, ⁵²tyāa pitstjē'ja' pējyuc:
 —Andy nchi'c ātsā'sa' ¿ma'wēnga wētcuē' yajcy? jīte!
 —Jū'na la unatec cacuesec ūchja jīnaty pta'sh. ⁵³Atsa' neya' yajcyuc
 tyāa oratey Jesusa': Iindy nchi'ca' catyjiyā'jrra ūsa' jīni's. Tyājū' tyāa
 pitstjē'ja' Jesus quimteva jiyurra' tyajy ūuste jypa'gac, yattewe'shva
 tyā'wēy. ⁵⁴Tyā'wē Judeajū shawendna Galileate pa'jrra ātsa'sa's
 nuycatyjini yacja' e'nz usyā'ja' Jesus ājani's caavya'ja'jni'.

Treinta y ocho año ātsā'na ūssa's Jesus nuycatyjini

5 ¹Tyāa e'su' judiuwe'sh fiesta en ājatscu yu', atsa' Jesusa' Jerusalenna qui' u'cj. ²Tyāa chjambte' iicja'jini yu' ji'pju'ty piishāa ca'ga'jini vity utyate.
 Tyā' Betesda yaase' hebreo yuwete. Ātsa'sa pa'jrra ūswa'j tajts ajtec tyundeni
 yu', yat pwa' na'wēsa. ³Cyte' wala cuj ātsa'sa ūsu'ty, uyya' ājasamée, chinda
 puuplesa, vite! ēseya' ājasamée tyā'wēsaty ūytjasna ūsu', yu' ēsetspcachja'
 cytee cjēeya' sūjna. ⁴Tyā'wē maa enteya' Dyus angel quījrra yu'a's quēese'je'c,
 naapcachja' maa yatste cjējena tyā' jyuca catyjiirrac neeyū' quīj wee ji'pjrrava.
⁵Cyteea' teech pitstjē'j treinta y ocho año ātsa'na ūssac tycaa ūsu'. ⁶Atsa'
 tyā'sna Jesus uyrra' tyacue tyach ātsa'na ūste jiyurra', pējyuc:
 —¿Catyji wēenga'? jīte!, ⁷ātsa'sa pasrra':
 —Yu' ēsetspcachja' yu'te andya's acjwa'jsa quim yujva meeta'. Andy
 cjēe wējetspcachja' vite cjuē'y cjēje'ty jīte!, ⁸Jesusa' na'jīnac jycaaj:
 —Quiiterra iindy pusrra deeni's tū'srra me'j jītspcachja', ⁹naa dundtey
 tyāa pitstjē'ja' catyjiyā'jrrac neeyūu. Sa' tyajy pusrra deeni's tū'srra u'cj.
 Nava judiuwe'sh qui'sni ente tyā'wē dee pusni's tū'srra u'ljuetste uyrra',
¹⁰judiuwe'sha' na'wēty pējy tyāa pitstjē'j catyjiisa's:
 —Āchja' qui'swa'j ena' atsa' tyā'wē tū'srra u'juwa'j ji'pjmeeng jīte!,
¹¹tyāa pitstjē'ja' pasrra na'ljīc:
 —Andyna nuycatyjisafic tyā'wē jycaaj: Iindy pusrra deeni's tū'srra me'j
 jīpa'ga tyā'wē tū'srra u'ljuetstju.
¹²Atsa' judiuwe'sha' qui'quin paapējytyi:
 —Tyā'wē jycaajsa' ¿quimga yu'? jīte!, ¹³tyāa pitstjē'j catyjiisa' jiyuya'
 ājame' quim tyā'wē nuycatyjiteva. Cyteea' nasa wala cuj ūste!, tyāa
 catyjiisa' jiimeec yu' maa dyi'j casejrra Jesusa' u'tjeva.

¹⁴Tyāa e'su' Jesusa' dyuus yatte tyāa pitstjē'j catyjisa's puuty uyrra', na'jīc:
—Āchja' catyjngu neeyūu na', naa weete jytjaacue ñussa pa'cjamen pa'yajcy
mfi'nze, ewmée yūuna u'jumée jīte', ¹⁵tyāa pitstjē'j u'jrra' judiuwe'shtyi pta'shcu:

—Andyna nuycatyjisa' Jesusga yu' jīna. ¹⁶Tyāa pa'gaty judiuwe'sha'
Jesusa's ajtserra icj wēe, qui'sni ente tyā'wē ātsa'sa's nuycatyjipa'ga.

¹⁷Tyājū' Jesusa' judiuwe'shtyi na'wēc we'we:

—Andy Tata' naa enteva mjiina ūsa', tyāa pa'gaty andyva mji'.

¹⁸Tyā'jīte', judiuwe'sha' jweefirráaty Jesusa's icj wēena quiite. Tyā'wē
qui'swa'ja' jīna jycaajni leyrrá's nwēese'jmée andy Tata' Dyusa' jī'c na'
tyāava Dyus na'wēysatj jī'ne' sūjrraty tyā'wē icj wēena quiite.

Dyusa' Nchi'ca's ityi vit-ya' ājawa'ja's ūsni

¹⁹Tyājū' Jesusa' na'wēc pta'sh:

—Isatj we'we', andya' Dyus Nchi'ctju, nava andyrráa yu' mjiiya' ājame'nja.
Andy Tata ma'wē mjiite', tyajy mjiini's tjengrra yuurráatj tyā'wēy mjiiya' āja'.
²⁰Tyāa pa'gaty Tata' andya's peeygājrra tyāa quīj mjiitsrrava jyuca pta'shi'c
andya's. Tyāasa āchj uyi'cue tyāate jweefirráa walasaty caavya'ja'jana, atsa' tyāaty
uyrra' i'cue'sha' cuj yajcyna neeyūune'cue. ²¹Tata' ma'wēga uusaaty ityi vitu',
tyā'wēy andyva ityi vitu'nja maatyva. ²²Āchja' Tata' yuuwesaty castigāywa'ja's
jyuca andyrrarráanac nvijt, tyāasa āchja' yuuwesaty castigāywa'ja's Tata' quim
yujtyva tjengwa'jsame'. ²³Tata'sva ma'wēta nwēese'je', tyā'wēy andynava
jyucaysa nwēese'cjancu tyā'wē yūu. Andyna nwēese'jsame' andyna caajsa
Tata'sva nwēese'jsameerra tyā'wē yuutyna. ²⁴Isatj we'we': Maava andy pta'shni's
jypa'yajcy wēse'jrra andyna caajsa's ūuste jypa'gasa', bagachte yujva ptsumée ityi
fi'nzewa'ja's jī'pjutyna. Tyā'wē yūusa' ewmeete nviitni yuumée, uuwa'ju cutyi'jrra
bagachte yujva ptsumée ityi fi'nzewa'tje nviitnisa yuuna. ²⁵Isatj we'we': Ptsumée
ityi fi'nzewa'j en pa'jana jī'tj tyāa ena' āchjūa'. Atsa' uusaawe'sha' Dyus Nchi'c
we'weni's wēse'jrra cytey yuusá' ityi fi'nzewa'ja's jī'pjutyna. ²⁶Tyāa pa'gaty andy
Tata' ityi vit-ya' ājawa'ja's jī'pja', sa' andynava ūscu tyā'wē ityi vit-ya' ājawa'ja's.
²⁷Sa' yuuwesaty castigāywa'ja'sva andya'sírrác ūs, andya' Dyus Nchi'c Nasa
Yuusatj naa pa'ga. ²⁸Tyā'wē Dyus Nchi'c we'weni ptjūusetel', uusaawe'sha'
pendaniijū casejwa'j en pa'jana jīna pta'shte', fiy yuj we'we'c sūjna yaacynuwe.
²⁹Tyāa en ājte', uusaawe'sha' pendaniijū ityi yuurra casejetyna, ew yūuna fi'nzesa'
ewte u'jya', naapcachja' ewmée yūuna fi'nzesa' ewmeete u'jya' ityi yuutyna.

Jesus quimteva caajiyu'jsa

³⁰Andyrráa yu' quijya'va ājame'nja. Andy Tata jycaatjerráatj yuuwesaty
castigai'. Andy ūuste peecyrráa yajcyrra tyā'wē yu'tsmeetj, tyāasa andy
castigāyni' isasata'. Andyna caajsa ma'wē jytjāaste' tyāarrá'stju cytey yu'.

³¹Andy ma'wēsateva quimva pta'shwa'jsa jī'pjmée peecyrráa tyā'wēsatj jīte', isa
yujna sūjwa'ja's ya'jī'pju'tsme'. ³²Nava tyā'wē ājawa'jsa yuja' jīna andy ju'ngu
we'wesa ūsa', atsa' andya' jiitj tyajy we'weni' isasa yuja'. ³³I'cue'sha' Juan tashte

paapējyja' caaji'cue, atsa' tyā' isa yuj pta'shcu andy quimteva. ³⁴ Andya' naa quiwetewe'sh andy ju'ngu we'weni's peejymetj. Nava i'cue'sha' Juan pta'shni's jiiyā'jrra', tjēymée ewte neeyūuwa'ja's pacuecajnrráatj tyā'jī. ³⁵ Juana' eena'te caafi'nze'jwa'ja's tuutje'jsac yu', atsa' i'cue'sha' wa'lmée i'cue Juan pta'shni's jypa'gana ūsu' manz enrráava. ³⁶ Nava andyna tuutje'jna isa pta'shsa yu' manzva ji'ptju, Juan pta'shnite jytjaacuesa. Andy mjiini' andyna tuutje'jna isa pta'shsata'. Na'wē mjiitj nava andy Tata jycaajinrráatytyu tyā'wē yu', Dyus caajnisá yuj yu'ne' sūjcajn. ³⁷ Tyā'wēy andyna caajsava isac pta'shi' andya's tuutje'jna. Tyā'wēteva, i'cue'sha' bagachte yujva tyajy we'weni's iiwēse'jmeene'cue, sa' tyā'sa' iuiyvameene'cue. ³⁸ Sa' tyajy caapiya'jni'sva i'cue'sh ūste jil'pmeene'cue, tyāasa i'cue jypa'gaya' ājā'tsmée, andya's Tata caatjeva. ³⁹ I'cue'sha' jypa'yajcy i'cue leei', psumée ityi' fi'nzewa'ja's ji'pjuya'. Atsa' tyāa libru' andya's pta'shsafírrá'. ⁴⁰ Macue tyā'wērrava, i'cue'sha' andy tashte utya'tsmeei'cue ityi' fi'nzewa'ja's ji'pjuya'.

⁴¹ Naa quiwete nasa andya's tuutje'jni's jytjāasu'tsmeetj. ⁴² Andya' i'cue'shtyi ew jiiitj, i'cue'sha' Dyusa's wendyi'tsmée i'cue. ⁴³ Tata caatje' yuwe'tj, nava i'cue'sha' andya's jypa'ga'tsmée i'cue. Nava Dyus caajnisamée vite pa'jvatsa', tyāa yu'sa' jypa'game'cue. ⁴⁴ ¿Ma'wē yūurra andya's jypa'gaya' ājaqui'cue, nasaa pwe'sh puuty ew tuutje'jinrráana jytjāasrra, Dyus teechnrāasa tuutje'jni yu'sa' jypa'gameerra'? ⁴⁵ Andy Tata tashte i'cue'shtyi ewmée yuwe ūswa'jsana sūjuvā'cue andya' tyā'wēmeetj. Tyā'wē i'cue'sh ma'wēsateva andy Tata tashte pta'shsa' Moisesírrá', i'cue'sh nacue wala ewrráa we'we'i'cue tyāa. ⁴⁶ Moises we'weni's jiyuvatsa', andya's jypa'game'cue, Moisesa' andynaírráac tuutje'jna fil'j naa pa'ga. ⁴⁷ Nava tyajy fil'jni's jypa'gameerra', ¿ma'wē andy we'weni's jypa'gaya' ājaqui'cue?

Cinco mil nasaty Jesus sāl'jīni

(Mt. 14.13-21; Mr. 6.30-44; Lc. 9.10-17)

6 ¹ Tyāa ensu' Jesusa' Galilea ícj cuten u'cj, tyāa ícja's Tiberias jī'ty. ² Tyā'wē naa quiwete quim yujva vit-ya' ājanimeesa's caavya'ja'jna ātsa'satyva nuychjāchjapa'ga, nasa wala cuj pcjaacjena Jesus e'stey u'jty. ³ Atsa' Jesusa' tjāl'j vitsna u'jrra cytee cachcu tyāa yacj u'jusawe'sh yā'jrra. ⁴ Tyajū' Judiuwe'sh fiesta Pascua en ājatscu yu' tyāa ensu'. ⁵ Atsa' nasa wala pcjaacjena yujte uyrra', Jesusa' Felipe's na'jīnac pējy:

—¿Mtee ū' weyuucytja'w nasa jyucaysaty puutswa'j?

⁶ Nava Jesusa' Felipe ma'jīteva jiyuya'rráac tyā'wē pējy, ma'wē yūuwa'ja'sva jyuca jiiyā'jrrava.

⁷ Atsa' Felipe' na'wēc pas:

—Dos cientos peso pan weyrra jyucaysaty pe'ltenderra peesu'svatsva, ājmeena jīte', ⁸ Jesus yacj u'jusa Simon Pedro nyacj Andresa' na'wēc pta'sh:

⁹ —Ayte teeche cuē e'nz wendy tajts cebada pan ji'pjsa ūsa'. Nava cyanzrráasa yuja' ¿ajma'c? jīte', ¹⁰ Jesusa' tyāa yacj u'jusawe'shtyi': Mcaachi'jwe jyucaysaty jīnac jycaaj. Atsa' cinco mil pitstjē'jsa

cyaanzcuëesay tyacsu cachna scjêwtyi. ¹¹Atsa' Jesusa' pantyi' jypa'garra', Dyusna wechana'va tyãa yacj u'jusawe'shtyi ũsu'scu. Atsa' tyãawe'sha' cyaanzcuëesaytyi puutsna scjêwtyi sumbapcach. Wendynava tyã'wêytyi yũu, macue ũ'rrava tyicpcach.

¹²Tyajũ' jyucaysa tyicna scjêwte', Jesusa' jycaacj tyãa yacj u'jusawe'shtyi':

—Jyuca mepcjacjwe pe'la quiyasaatyì' quĩjva vitucajmen jĩte', ¹³doce canastate utaty pcjacj tyãa tajts cebada pan quiyasaatyì'. ¹⁴Tyã'wê Jesus yuurráa maa yujva ajanimeesa's vitte uyrra', nasa' na'wêty wechana we'we:

—Naa yuurrá' isa Dyus yuwe pta'shsa yuj yu'ga, naa quiwete pa'jana jĩ'ty tyãaga yu' jĩna wecharra', aandijimée jycaajwa'jsa qui'pya'vaty yu'. Atsa' Jesus jiyurra', ¹⁵tyãarráa tyuteena u'cj tjã'j vitste pa'j.

Ícj cajcuega Jesus u'juni
(Mt. 14.22-27; Mr. 6.45-52)

¹⁶Chji'ndyna quĩinite', Jesus yacj u'jusawe'sha' ícj pucate quĩjrra, ¹⁷barcode cjëena'va ícjuy ctejcana u'jty Capernaumte pa'jya'. Tyã'wê jyuca chji'ndyni yã'tjeva Jesusa' shawendna quĩjmeyna, ¹⁸barco ícjuy u'juetspcachja', wejyaa wala quiittera ícja's seena' wala quëese'cj.



(San Juan 6.9)

¹⁹Tyā'wē seena' yuutsteva ĩcj pyājsu jyu'j u'juetsrra', Jesusa's ĩcj cajcuesu uyjte uytyi, sa' wala ũucjtyi. ²⁰Atsa' Jesusa' na'wēc we'we:

—Ũucjnuwe, andytju jĭte', ²¹wala wechana jypa'gaty barcote. Sa' yaacynimeete naa dundtey ĩcj cutete pa'jty.

Nasa' Jesusa's pacuení

²²⁻²⁴Cuscuscjē' Jesusa' cytee meeyā'tje', tyāa yacj u'jusawe'shva meete', nasa' barcote cjēena' u'jty Capernaum chjambna Jesusa's pacueya'. Tyā'wē Jesus yacj u'jusawe'sh teech barcote cjēerra u'tje', Jesus yu' tyāawe'sh yacj u'jmeeteva jiyurraneta pacueya' u'jna ũsu' ĩcj cuteju nasa neeyūusa'. Jesusa' Dyusna wecharra pan puutscu tyāa ja'ndate barco pa'jne'ta Tiberias chjambuj yuusa, atsa' tyāatety cjēerra pacueya' u'j.

Ũ' cielujū quīisa

²⁵Sa' ĩcj cutete pa'jrre Jesusa's uyrra pējtyti:

—Indya' ĩma'wēnnga ayte pa'j? jĭte', ²⁶Jesusa' na'wēc pas:

—Isatj we'we', i'cue'sha' pana's tyicpcach ũ'rarráa i'cue tyā'wē andya's pacué'. Nava andy tyā'wē maa yujva ājanimeesa's vittju tyā's yu' jiyurra tyā'wē yu'tsmeel'cue. ²⁷Tyic ũ'rre fi'nzewa'jrrá's pacuewa'jme', wejyva ũ' bagachte yujva ptsumée ĩtyi caafi'nze'jwa'jsa's pacuewa'ja'. Atsa' Dyus Nchi'c Nasa Yuusa' tyā'wē ptsumée ĩtyi fi'nzewa'ja's ũsu'nja, tyā'wē yūuwa'ja's andy Tata' ũscu naa pa'ga jĭc. ²⁸Tyā'jĭte', na'wēty pējy:

—ĩMa'wē yūucytja'w Dyus jycaajnyti' cytey yuuna fi'nzeya'? jĭte', ²⁹Jesusa' pta'shcu:

—Dyus jycaajnyti' cytey yuu wēerra', andya's mpa'gawe, andya' Dyus caajnisatj naa pa'ga jĭc.

³⁰Atsa' qui'quin pējtyti:

—Indya' Dyus caajnisane'nga sūjna cue'sh ew jiyucajn āchja' ĩquīj caavya'ja'jya'vanga? ³¹Cue'sh yatsgawe'sh manteywe'sha' nasa u'pnimée quiwesu u'jurra', ũ' maná yaasesa's ũ'ty. Atsa' tyā'wē yūuni's Dyus libruete na'wēc we'we': Dyusa' cielujū ũ'a's puutscu jĭ'c. ³²Atsa' tyā'jĭte', Jesusa' na'wēc pas:

—Isatj we'we', cielujū ũ'a's Moises puutsme'. Cielujū ũ'a's andy Tatac puuts. ³³Atsa' Dyus puutsni ũ' cielujū quīisa' naa quiwetewe'shtyi ptsumée ĩtyi caafi'nze'jwa'jsa'.

³⁴Tyā'jĭte', na'wēty pējy:

—Cue'shtyi jype'jsa, cielujū quīisa ũ'a's pejca puutsune'nga cue'shtyiva jĭte', ³⁵Jesusa' pta'shcu:

—Ũ' ĩtyi caafi'nze'jwa'jsa' andytju. Atsa' maanzcuēesava andy tashte pa'jsa' bagachte yujva wēemeetyna. Sa' tyā'wēy andyna ũuste jypa'gasa' peena yu' yū'wēemeetyna. ³⁶Andya' quimrrava i'cue'shtyi pta'shyā'tj, nava i'cue'sha' macue uyrrava, andya's cielujū quīisana sūju'tsmée i'cue. ³⁷Macue i'cue'sh yu' andya's jypa'gameeteva, andy jype'cjan Andy Tata ducjnisa'we'sh yu' jyucaysa andy

tashterráa pa'jatyna. Atsa' maava andy tashte pa'jsatyí' ajtsemée wechana jypa'ga'nja. ³⁸Tyā'wē cielujū qujrrava peecy andy ūus yaacynírrá's cytey yuuya' yuwe'tsmeetj. Andy Tata ma'wē yūucaatje' tyā'srráanatj cytey yuuya' yuwé'. ³⁹Andy Tata' andy jype'cjan ducjnísatyí' teechráa yujva iviitu jytjáasu'tsme!, cyají andya' nmej ente' qui' ityi vitu'nja. ⁴⁰Andyna caajsa jytjáasni' na'wē!: maava jyucay Dyus Nchi'ca's ūuste jypa'gasa' ptsumée ityi fi'nzewa'ja's ji'pju jytjáasu'c. Tyāa pa'ga tyā'wē ūuste jypa'gasatyí' andya' nmej ente' qui' ityi vitu'nja.

⁴¹Tyā'wē andyíi ū' cielujū quíisatj jīpa'ga judiúwe'sha' Jesusa's atsewe'weya' tacjtyi:

⁴²—¿Naa pijtsíi Jose nchi'cmeená'? Sa' ¿ma'wēga cielujū quíisatj jīna we'we'? Tyā'jicajmeníi cue'sha' tyajy neywe'shtyi ew jiitja'w.

⁴³Tyajū' Jesusa' tyā'jīni's jiyurra', na'wēc we'we:

—Maa yujva tyā'wē atsewe'wen ūswa'j ji'pjmeel'cue. ⁴⁴Andya' Tata jycaajnisatj atsa' tyāafi andy tashte cuutya'tje yuurráa tyāatyí' jyucaysaty nmej ente' ityi vitu'nja. ⁴⁵Tyā'wē yūuwa'ja's Dyus yuwe pta'shsa libruite na'wē fi'jni ūsa': Dyusa' caapiya'ljana jyucaysaty ¿jī'tsmeená'? Cyají maava andy Tata caapiya'jni's wēse'jra tyajy jycaajniity cytey yuusa yuurráa andy tashte pa'jatyna.

⁴⁶Maa yujva Dyusa's iuuymeeta'. Andy yuurráa Dyus tashu yuusatj na' tyā'sna iuytju. ⁴⁷Andya' isatj we'we!: Andya's jypa'gasa' ptsumée ityi fi'nzewa'ja's ji'pjutyna, ⁴⁸tyāasa ptsumée ityi caafi'nze'jwa'jsa ū'a', andytju. ⁴⁹Cue'sh yatsga manteywe'sh nasa u'pnimée quiwesu u'jurra' maná yaasesa's ū'rrava, pejca uu ena's ji'pjuty. ⁵⁰Nava andya' cielujū quíisa ū'a'stju pta'shi', tyā'sna ū'rra' uucajmen. ⁵¹Andyíi cielujū quíisa ū' ityisatj. Maava tyāa ū'a's ū'sa', bagachte yujva uumée ityi fi'nzewa'ja's ji'pjutyna. Atsa' ū' andy ūsu'nja tyā' andy cacue', cyaj maa nasava ptsumée ityi fi'nzewa'ja's ji'pjucajn tyā'wē andy cacue's ūsu'nja.

⁵²Tyā'jīte', judiúwe'sha' na'wēty puuty ya'paapēyi':

—Naa pitstjē'ja' ¿ma'wē tyajy cacue's cue'shtyi puutsya' ājacy? jīte', ⁵³Jesusa' na'wēc pta'sh:

—Andya' isatj we'we!: Dyus Nchi'c Nasa Yuusáa cacue's ū'rra tyajy eenava tundymeerra yu', ptsumée ityi fi'nzewa'ja's ji'pjumeene'cue.

⁵⁴Atsa' maava andy cacue's ū'rra andy eenava tundyrra yuurráa ptsumée ityi fi'nzewa'ja's ji'pjutyna, cyaj tyā'wē yūusatyi' andya' nmej ente' ityi vitu'nja. ⁵⁵Tyāa pa'gatey andy cacue' peena yu' cwēeje'lmeena, atsa' andy eeva peena yu' cyū'wē'lmeena. ⁵⁶Maava andy cacue's ū'na tyā'wēy andy eenava tundysa', bagachteva andy yacj ij ūsuna, atsa' andyva tyāa yacj ij ūsu'nja. ⁵⁷Tata' andyna caacj tyā' ityīsa'. Tyāa pa'ga andyva ityīsaj. Atsa' andyva Tata yacj ma'wē ityīsata'w, tyā'wēy ityi fi'nzewa'ja's ji'pjutyna maava andy cacue's ū'sa'. ⁵⁸Cielujū quíisa ū'a'stju pta'shna we'we'. Cue'sh yatsgawe'sh manteywe'sha' maná yaasesa's ū'rrava pejca uu ena's ji'pjuty. Nava naa ū'a' tyāa maná na'wēsame!. Maava naa ū'a's ū'rra', bagachte yujva ptsumée ityi fi'nzewa'ja's ji'pjutyna jīnac pta'sh.

Jesus we'weni' ptsumée ityi caafi'nze'jwa'jsa

⁵⁹Jesusa' tyā'wēc pta'sh Capernaumte judiuwe'sh pcjaacjenite. ⁶⁰Atsa' tyā'wē caapiya'jni's wēse'jrra', tyāa yacj u'jusawe'sh maafi yu' na'wēty we'we tyāawe'sh pwe'shrráa:

—Na'wē pta'shni', wala tjēya' jiyuwa'j, atsa' ma'wē yujva ya'jiyu'tsme'.

⁶¹Nasa jiyumeerra cuj jwend we'wena ūste Jesusa' jiyurra', na'jic:

—Andy pta'shni's jiyumeerra ūscha yaaqui'vá'cue. ⁶²Tyā'wē jiyumée ūsrava, Dyus Nchi'c Nasa Yuusa' cielun teecatste uyrra', ¿maa sūjuqui'cue?

⁶³Na'jī'tj na': Dyus Espiritu' ityi caafi'nze'jsa', atsa' tyāarrá'stju we'wena pta'shi', naa quiwete ūrra ityi fi'nzeni's pta'shi'tsmeetj. Andya' isatj pta'shi' Dyus yacj ityi fi'nzewa'ja's. ⁶⁴Nava maafi yu' isane' pta'shi' sūju'tsmeei'cue jic.

Jesusa' dyiicjēy jiyā'cj yu' maa tyā'wē atsetsteva, sa' quim icjcajn ducjwa'jsateva, tyāa pa'gac dyiicjēy tyā'jīna we'we.

Sa' qui' we'werra':

⁶⁵—I'cue'sh maafi yu' atsetste jiirratj andy Tata cuutya'tje yuurráa tyāawe'sha' andy tashte pa'jatyna jīna we'we.

⁶⁶Jesus tyā'wē pta'shterráa, tyāa yacj u'jusawe'sh maafi yu' tyuteena u'jty. ⁶⁷Tyajū' Jesusa' pējycu docesaty:

—¿I'cue'shva andya's tyuteerra u'jya'vacue'? jīte', ⁶⁸Simon Pedro' na'wēc pas:

—Cue'sha' ¿quim yacj u'juecytja'w? Indy yuurráa ptsumée ityi fi'nzewa'ja's pta'shna ūsngu atsa'. ⁶⁹Tyāa pa'gatey cue'sha' indya's jiyutja'w, tyāasatja'w indya' Cristo, Dyus ityisa Nchi'cne'nga sūju'.

⁷⁰Tyā'jīte', Jesus we'werra':

—Andya' i'cue'sh docesaty tyjityjrra pa'yateva, teeche'sa' echtjē'j jīia' jīnac pta'sh.

⁷¹Jesusa' Simon nchi'c Judas Iscariote's we'werrac tyā'jī, Judas tyā'wē docesatewe'shrrava Jesusa's icjcajn ducjya'vac yu' naa pa'ga.

Jesusa' Dyus Nchi'cna sūju'tsmeeta' Jesus nyacjwe'sha'

7 ¹Tyajū' Jesusa' Galilea quiwesuc u'ju'. Judea quiwesu yu' u'ju wēeme', cyteea' judiuwe'sh icjya' pacuenaty ūsu' naa pa'ga. ²Judiuwe'sh fiesta wa' vitni en ājatscu yu', ³atsa' Jesus nyacjwe'sha' na'wēty we'we:

—Ayte ūsmée Judea quiwen me'j, cyaj nasa iindy ju'nguj ūssawe'sh uyuutyna indy na'wē yū'ng tyā'sa's. ⁴Maava āate tuutje'j jytjāasutsrra', paatssu u'jumeena. Na'wē quimva ājanimeesa's caavya'ja'ng na' tyāatyī āate mcaavya'j maava uycajn jīnaty we'we'.

⁵Nyacjwe'shīi yujva Dyus Nchi'cna sūju'tsmeene'ta, tyāasaty ūste jypa'gameerra' tyā'wē we'we.

⁶Tyajū' Jesusa' na'jīnac pta'sh:

—Andy u'jwa'j ena' ājmeya', nava i'cue'sh yu' quīj enteva u'jya' ewurrāane'cue. ⁷Naa quiwetewe'sha' i'cue'shtyi' atse'tsmeeta', nava andya's atse'ty, tyā'wē tyāawe'sh ewmée yūuni's āatetj pta'shi' tyāa pa'ga.

⁸I'cue'sha' fiestan meljrráawe. Andya' yujme'nja, andy u'jwa'j en ãjmeya' atsa'.

⁹Tyã' we'werra', Jesusa' Galileatee neeyũuc.

Jesus fiestan u'jni

¹⁰Nava tyajy nyacjwe'sh u'jni e'su', Jesusva fiestan u'cj, quimva jiyunimeete. ¹¹Atsa' judiue'sha' na'jĩnaty tyãa fiestate Jesusa's pacuena ũsu': —¿Mtee ũsqui tyãa pitstjē'ja'? jĩna.

¹²Tyãa fiestate' Jesusa's nuywe'wesa yuurráaty susna ũsu'. Vitefi yu': Jesusa' ewsa yuja' jitspcachja', vite yu': Ewmeesa', nasaty i'shiina u'jusarrá' jĩnaty nuywe'we'.

¹³Nava Jesusa's ew we'wesa yu' maa yujva áate yu' we'wetsmeeta', judiue'shtyi ũucjrra.

Fiesta ente Jesus caapiya'jni

¹⁴Fiesta ptsuuna u'juetpcachja', Jesusa' dyuus yatte u'carra caapiya'jya' tacjcu. ¹⁵Atsa' judiue'sha' cuj yajcynaty ũsu' tyãawe'sh pwe'shrráa na'jĩna:

—Naa pitstjē'ja' ¿ma'wěrra tyacue wala jiina, maa caapiya'jsa yacj yujva u'jusameerrava? ¹⁶Atsa' tyã' we'weni's jiyurra', Jesusa' na'jĩnac pta'sh:

—Na'wētj caapiya'ja' tyã' andy peecy yajcyrra caapiya'jnisame'. Andyna jycaacj tyajy we'weni'stju caapiya'ja'. ¹⁷Maava Dyus jytjāasni's cytey yuuwa'jsa ũsrra', naa caapiya'jni's jiyuna Dyus we'weniteva, meerra' andy peecyrráa yajcyrra caapiya'jniteva. ¹⁸Peequírráa yajcyrra we'wesa', jytujtjesa yuuwa'jrrá'scu jytjāasu'. Nava Dyusrráana tuutje'jsa', Dyus jycaajni'rrá'scu isa we'wena pta'shi'.

¹⁹Moisesa' leya's fi'jrra ¿i'cue'shtyi ũsyujmeena' vacy? Tyã'wěteva i'cue'sha' maa yujva ley jycaajni's cytey yu'tsmeei'cue. Tyãasa i'cue andya's icjya'rráa yaaqui' jite', ²⁰nasa' na'wěty pas:

—Echtjē'j yacj ũsne'nga. ¿Quimga indya's icj wēje'?

²¹Tyajũ' Jesusa' na'jĩnac we'we:

—Qui'swal'j ente teeche nasa átsa'sa's nuycatyjitj tyãa pa'garráa i'cue tyacue susya' quiite. ²²Nava i'cue'sh yu' qui'swal'j enteva luuch pijtsty circuncida' i'cue, Moises jycaajni's nwēese'jrra. Naa cyaj i'cue átsa'sa's andy nuycatyjini yu'sa' tyacue susu'. (Nava ew jiyute yu', Moises tyã'wē circuncidāywa'ja's jycaajna tacjme', jwee yatsgawe'shtyi tyã'wē jycaaj.) ²³I'cue'sha' Moises leya's cytey yuuya' sũjrra i'cue qui'swal'j enteva circuncida' luuch pijtsty'. Sa' ¿quĩjya'cue tyacue ũuscha' andy teeche pitstjē'j átsa'sa's qui'swal'j ente nuycatyjirra nviitpa'garráa? ²⁴I'cue'sha' ew jiyumey yu' fiyfiyrráa yajcyna we'wenuwe, naasáa ew jiyurra yuurráa tyã'wē diyj yu'ga sũjna we'wewa'ja' jĩnac pta'sh.

Dyus tashu yuusa

²⁵ Tyajü' Jerusalente nasa maaí yu' na'wěty puuty paapēyi':

—¿Naa pitstjē'ja'sfi icjya' pacue'tsmeetyna'? ²⁶ Tyā'wē pacueetsteva, nasaa cshavyte yajcyyajcymée we'wena ūsa', quim yujva ma'jīnimeete. Meerra' ¿cue'sh npiitstjē'jwe'sha' ew yuj jiyuvá'ntacy naa pitstjē'ja' Dyus tashu yuusa Cristoteva? ²⁷ Naa pitstjē'ja' majuwe'shteva jīitja'w, atsa' isa Dyus caajni Cristo dyijvatsa', tyā'sa' tyāa quiwejuwe'sha' jīni yuumeena jīnaty we'we'.

²⁸ Atsa' Jesusa' dyuus yatte caapiya'jna ūsfi, sus we'werra na'jīc:

—Andya'sa' jiiyuji'cue majūwe'shteva. Nava andya' peecy yuu wēerrarráa yuwe'tsmeetj, Dyus caajni ayte ūstju. Tyāa yuurráa isa we'wesa' tyāa caajsa's yu' i'cue'sha' jiyu'tsmeei'cue. ²⁹ Tyā'sa' andy yuurráa jīitj, tyajy tashu caajni ayte ūstju naa pa'ga jīc.

³⁰ Tyā'jīte!, tundrra preesu jyūna u'j wēety, nava quim yujva tund yu' meeta', tyā'wē yūuwa'j en ājmeyne' yu' naa pa'ga. ³¹ Tyā'wēteva, wala cuj jiyuty Jesusa' quimteva sa' na'jī'ty:

—Dyus tashu yuusa Cristo quījrra', ¿naa pitstjē'tje jytjaacue quījquījva caavya'ja'jya' ājāma'c? jīnaty we'we'.

Jesusa's preesu'jya' caajni

³² Nasa tyā'wē Jesusa's tuutje'jna ūste fariseowe'sha' wēse'jrra', sacerdote npiitstjē'jwe'sh yacj puuty we'werra', dyuus yat tjengsawe'shtyi caajty Jesusa's tundrra jyūna yuucajn. ³³ Atsa' preesu'jya' caajni's jiyurra', Jesusa' na'jīnac we'we':

—Andyna caajsa tashna shawendna u'jya'vatj na' i'cue'sh yacj tyachmeerráa pi'cyna ūsya'vatj. ³⁴ Atsa' andya's pacuerrava uymeene'cue, tyāa pa'gatey andy u'juetstju cyte' pa'jya' ājāmeene'cue naa pa'ga.

³⁵ Tyajü' judiwe'sha' na'wěty puuty ya'paapējyya' tacj:

—Naa pitstjē'ja' ¿mtee u'tje tyā'wē cue'sha' uymée yuucytja'w? Meerra' ¿judiwe'sh ūsta' vite quiwesu griegowe'sh cshavysu atsa' tyāa griegowe'shtyi vāa pta'shya' u'juetsnacy? ³⁶ Andya's pacuerrava uymeene'cue, tyāa pa'gatey andy u'juetstju cyte' pa'jya' ājāmeene'cue naa pa'ga jīnac we'we' sa' ¿ma'jīrraqui'c tyā'wē we'we'? jī'ty.

Yu' ptsuwa'jmeesa

³⁷ Fiesta ptsuuya' nmej en yuutste!, Jesusa' yujurra na'jīnac sus we'we':

—Maava yū'wēesa ūsrra', andy tashte myujwe tundyya'. ³⁸ Andya's ūuste jypa'gasaty'i's tyāawe'sh ūuste yu' ptsuwa'jmeesa casejna nes yuuna, Dyus libroute we'we'c tyā'wē.

³⁹ Jesusa' tyā'jīna we'werra', tyā'sna yaacysa' Dyus Espiritu's jypa'gawa'ja'scu pta'shna tyā'jī'. Tyāa ensu' tyāa Dyus Espiritu' paljmeycu yu', Jesus yuu cielun tejcameycu yu' naa pa'ga.

Jesus quimteva jiyumeerra nasa fiyfiy yaacyni

⁴⁰Nasa wala kuj pcjaacjena ūsnite maaíi yu' Jesus pta'shni's wēse'jrra', na'wēty we'we:

—Naa pitstjē'ja' isa Dyus yuwe pta'shsa yujna jī'ty. ⁴¹Atsa' vite yu' na'jī'ty:

—Na' Dyus tashu yuusa Cristona jī'ty. Nava vite we'werra':

—Galileajū yuja', ¿Cristo' casejma'c? ⁴²Tyā'wēmeeteíic Dyus libroute we'werra': Cristo' jycaajsa David nwe'shrra', David upyni chjamb Belentey casejena jī'c jīnaty we'we'.

⁴³Tyājū' maaíi yu' Jesus ju'ngu we'wenaty neeyūu, atsa' vite yu' Jesusa's ajtsenaty neeyūu. ⁴⁴Atsa' maaíi yu' preesul'jrra jyūna u'j wēerrava, maa yujva tyā'wē yu' yūumeeta'.

Judiu npiitstjē'jwe'sha' Jesusa's jypa'gameeta'

⁴⁵Dyuus yat tjengsawe'sha' qui'quin shawendna pa'tje', sacerdote npiitstjē'jwe'sh vite' fariseowe'sha' na'jīnaty pējy:

—¿Mjiitecue tyāa Jesusa's preesul'jrra jyūna yuwe'tsmée? jīte', ⁴⁶tyāawe'sh pasrra':

—Bagachte yujva naa pitstjē'j na'wē zhichcue pta'shi'c tyā'wēsa yu' iiwēse'jmeetja'w. Tyāasatja'w preesul'jmée.

⁴⁷Tyājū' fariseowe'sha' wēeshū we'werra', na'jīty:

—¿I'cue'shva vitesa na'wēy ya'ishijatsvá'cue? ⁴⁸¿Cue'sh npiitstjē'jwe'sh meerrava fariseowe'sh maarrá' tyāa pitstjē'j caapiya'jni's jypa'garra ūste i'cue'sha' jiicue'? ⁴⁹Nava tyāa pitstjē'ja's nwēese'jsa' leya's jiimeesata' na' iiméj seena' ewmeesa nwe'wewa'jmeesa yā'tja'.

⁵⁰Tyājīte', cytee ūssa teech fariseo Nicodemo yaasesa Jesus tashte cus pa'jya' u'ju'ga tyāa we'werra na'jīc:

⁵¹—Yuuwesa's pa'yarra pējymey yu', castigāyya' ājame'nja'w, cue'sh leya' tyā'wē jycaaja'tsme' jīte', ⁵²tyāawe'sh pasrra':

—¿Indyva Galileajūwe'shvé'nga? Dyus libru's mtjeng vacy, sa' jiyune'nga: Galileajū yu', bagachte yujva Dyus yuwe pta'shsa iicasejmeeta' jīnaty atsewe'we. ⁵³Tyājīrra', puuty tyuteena u'jty tyāawe'sh yatna.

Teech u'ya's Jesus peltunāyni

8 ¹Naapcachja' Jesusa' Jerusalenu casejrra Olivos vitsnac u'j. ²Sa' cuscus cusírráa dyuus yatte shawendna pa'cj. Tyājū' nasa jyucaysa utyaate', Jesusa' caapiya'jya' cachcu. ³Tyājū' ley caapiya'jsawe'sh vite' fariseowe'sha' teech u'y canzh yūuna ūste cpajcyrra Jesus tashte nuypa'jty sa' pyājte tyajrra' ⁴na'jīty:

—Caapiya'jsa, naa u'ya's canzh yūuna ūsín cpajcytja'w. ⁵Tyā'wē yūusatyi' Moises leya' cuet wāatatajrrac icjcaja'. Atsa' indya' ¿ma'wē jycaajaqui'ng? jīnaty pējy. ⁶(Cytee ājmée we'wete', paatyjī'cjya' sūjrraty tyā'wē paapēyi'.)

Nava Jesusa' quĩitsjurrac quiwete cuseju fi'ja'. ⁷Atsa' manz usva jwee pẽjyte!, Jesusa' capjuterra na'jĩc:

—I'cue'sha' maarráava pcal ji'pjmeesa ũsrra', tyāa cjuẽ'y naa u'y cacuete cuet mwāatajwe jĩrra', ⁸qui' quĩitsjurra quiwete fi'cj. ⁹Atsa' tyā'jĩni's wẽse'jrra': Cue'shva pcalsane'tca'w sũjrra, casejna u'jty teechteechrraj, nyafyte' jwee iĩshsa cjuẽ'ytyi casej. Tyā'wẽ jyuca casejna u'tje', tyāa u'yrráac cytee neeyũu Jesus ũsnite. ¹⁰Atsa' Jesusa' capjuterra ley caapiya'jsawe'sh jyuca casejna u'jnite' tyāa u'yrráa ũste uyrra', na'jĩc:

—I'cuena paatyjĩ'cjsawe'sha' ¿mteeta yuu? ¿Maava i'cue's ewmeete nvijt-ya' ājameevá'nta? jĩte!, ¹¹tyāa u'ya' na'jĩnac pas:

—Maa yujva ājameeta' jĩte!, Jesusa' na'jĩc:

—Andyva i'cue's ewmeete nvijtme'nja. Me'jwe, nava peena yu' ewmée yũuna u'junuwe jĩc.

Jesusa' eena'te caafi'nze'jsa

¹²Qui'quin nasa pcjaacjete!, Jesusa' na'jĩnac we'we:

—Andya' eena'te caafi'nze'jsatj, atsa' maava andy yacj yuusa' eena'te fi'nzewa'ja's ji'pjutyna, sa' bagachte yujva chji'ndyte fi'nzemeetyna.

¹³Tyājũ' fariseowe'sha' na'wẽty we'we:

—Indya' peequírráa ya'tuutje'jna ũsngu atsa' tyā' cyul yujna jĩte!,
¹⁴Jesus pasrra':

—Macue peequírrá'ntca ya'tuutje'je!, nava andy pta'shni' i'hiinisame!. Tyāa pa'gatey andya' jiitj majũwe'shrra' qui' maa dyi'j u'juetsrrava. Nava i'cue'sha' jiimée i'cue andy majũwe'shteve sa' maa dyi'j u'juetsteve. ¹⁵I'cue'sha' peecy ũus yaacynijũrráa i'cue tyā'wẽ we'we!, andy isa we'weni's jiyumey. Nava andya' jiimeerra yu' we'we'tsmeetj. ¹⁶Nasa ma'wẽsateve isa jiyurraj we'we!, Tata' andya's caacj tyāac ma'wẽ yũuwa'ja'sva andya's pu'chji' tyāa pa'ga. ¹⁷I'cue'sh leyte' na'jĩc: Yuwe's jiisa e'nzĩ tyāa na'wẽrrarráa we'wenisarráa selpiina jĩ'c. ¹⁸Atsa' isa we'wesa teechsa' andyĩrráatj. Atsa' vite' andyna caajsa Tataíírrá'.

¹⁹Tyā'jĩte!, fariseowe'sha' na'jĩty:

—Iindy Tata' ¿mtee ũsna? jĩte!, Jesus pasrra':

—I'cue'sha' andya's jiyu'tsmeei'cue, sa' andy Tatanava jiyu'tsmeei'cue. Andy quimteva jiyuvatsa', andy Tatanava jiyune'cue jĩnac pta'sh.

²⁰Dyuus yatte ofrenda āshni caja pucate caapiya'jna ũsrra', tyā'jĩnac pta'sh Jesusa'. Nava maa yujva preesu'jya' ājameeta!, preesu'jwa'j en ājmeyne' yu' naa pa'ga.

Andy ũsnite' pa'jya' ājameene'cue

²¹Jesusa' qui'quin we'werra na'jĩc:

—Andya' ul'juetstju, atsa' i'cue'sha' macue pacueene'cue, nava andya's uymey i'cue'sh pcalte uune'cue. Tyāasa andy ul'juetstju cyteea' pa'jya' ājameene'cue jīna we'wete', ²²judiuwe'sha' na'l'jity:

—Meerra' ꝑeecy cusetey uuya'vaváanacy, tyāasa vá' andy ul'juetstju cyteea' pa'jya' ājameene'cue jīna we'we'cy? jīte', ²³Jesusa' pta'shcu:

—I'cue'sha' aytewe'shi'cue, naapcachja' andya' ēējūwe'shtju. Atsa' i'cue'sha' naa quiwetewe'shi'cue, naapcachja' andya' naa quiwetewe'shmeetj. ²⁴Tyā'wērra'itj i'cue'sh pcalte uune'cue jīna pta'shi'. Tyā'wē Dyus caajnisá' andyrráatj jīna pta'shteva jiyumée yā'jrra', i'cue'sh pcalte uune'cue jīna pta'shte', ²⁵na'l'jīnaty paapējy:

—Tyā'wērra' ꝑindya' quimnga? jīte', Jesus pasrra' na'l'jic:

—Andya' quimrrava nyaffi pta'shyā'tj. ²⁶Tyāasa wala pta'shwa'j ji'ptju i'cue'sh ma'wēsateva āate pta'shna, tyāa pa'gatey andyna caajsa' īshiisame', atsa' andya' tyajy we'weni's wēse'jrra tyā'wē īrráatj pta'shi' maava jiyucajn jīnac we'we.

²⁷Tyā'wē Dyusa' andy Tata' jīna Jesus pta'shteva jiyumeeta'. ²⁸Tyāa pa'gac Jesusa' na'l'jīna we'we:

—I'cue'sha' Dyus Nchi'c Nasa Yuusa's ēēte tyajrra yuurráa jiyune'cue quimteva, sa' peecyrráa yu' we'wemée, wejyva Tata cwe'we'jnirrá'sne' caapiya'j sūjune'cue. ²⁹Tyāa pa'gatey andyna caajsa', andy yacj ij ūsa', Tata' andyrráa yu'sa' nviitu'tsme', tyajy jytjāasnirrá'stju cytey yu' naa pa'ga jic.

³⁰Tyā'l'jīna we'wete', nasa cujsa Jesus ju'ngu yuuty.

Ewmeete fi'nzesa vite' ewmeejū nwe'wenisa

³¹Tyajū' Jesusa' tyajy ju'ngu yuusaawe'shtyi' na'l'jīnac pta'sh:

—Andy caapiya'jni's jypumbamée nwēese'jrra', andy nasa yuurra ³²ewsa's jiyune'cue, atsa' tyāa ewsa' ewmeesajū nwe'wena jīte', ³³tyāawe'sha' na'wēty pas:

—Cue'sha' Abrahan ji'tja'w, sa' bagachte yujva ewmeete yu' fi'nzesameetja'w. Atsa' indya' ꝑma'wēnga ewmeesajū nwe'weni yuune'cue jīna we'we'? jīte', ³⁴Jesusa' pta'shcu:

—Isatj we'we', maava ewmée yūuna fi'nzesa', ewmeete fi'nzesata'. ³⁵I'cue'sha' peecy jii i'cue: selpisa' yat namu na'wēsame', naasáa peecy nchi'c yuurráa yat namu na'wēsa'. ³⁶Tyāa pa'ga yat namu na'wēsa Dyus Nchi'c tyā'wē ewmeesajū nwe'wete yuurráa, isa ewmeete fi'nzesamée yuj yuune'cue. ³⁷I'cue'sha' Abrahan ji'tjeva jīitj, nava andya's icj wēje'i'cue, andy caapiya'jni's nwēese'j wēemeerraráa. ³⁸Andy Tata cwe'we'jnirrá'stju pta'shi', naapcachja' i'cue'sha' i'cue'sh tata jycaajnirrá's i'cue cytey yu' jīte', ³⁹tyāawe'sha' na'wēty pas:

—Cue'sh tata' Abrahana' jīte', Jesus pasrra':

—Abrahan luuchvatsa', Abrahan na'wēy yūune'cue. ⁴⁰Tyā'wēteva, andyna ma'wē Dyus caapiya'tje', tyā'srráatj isa pta'shi'. Nava i'cue'sha' andya's icjya' yuurráa i'cue pa'pchu'. Abrahana' bagachte yujva tyā'wē yūume'. ⁴¹I'cue'sh tata ma'wē yūute', i'cue'shva tyā'wēy i'cue yū' jīte', na'wēty pas:

—Tyãljicajna', cue'sha' ¿ptamunimeesa luuch vá'ntca'w? Cue'sha' teech tatarráa ji'ptja'w, tyã' Dyusa' jíte', ⁴² Jesusa' na'jīnac we'we:

—Isa Dyusa' i'cue'sh tatavatsa', andya's ajtseemeene'cue, andya' Dyus tashu caajnitj yuwé' tyāasa ayte ūstju. Andya' peecyráa yu' yuwe'tsmeetj, andya'sa' Dyuscu caaj. ⁴³ Na'sva andy caapiya'jni's jiyu'tsmeei'cue, tyã'wē andy we'weni's nwēese'je'tsmeei'cue, tyāasa i'cue jiyu'tsmée. ⁴⁴ I'cue'sh tata', echtjē'ja', atsa' i'cue'sha' tyajy luuchi'cue. Tyã'wērraí i'cue tyajy jytjāasni's cytey yuu wēje', echtjē'ja' nyafiitey nasaa quicje'jsa' naa pa'ga. Echtjē'ja' bagachte yujva ewsa's yū'tsme', sa' bagachte yujva isa we'we'tsme'. Tyāa yuu tyã'wēesana na' īshiinarráac we'we', sa' caaīshijja'jsa'. ⁴⁵ Nava andy isa we'weni yu's nwēese'je'tsmeei'cue. ⁴⁶ I'cue'sha' ¿maarra' andya's pcalsa' jīna ucje'jya' ājama'cue? andya' isasarrá'stju pta'shi' atsa'. Andy isasa's caapiya'jatste', ¿ma'wētecue andy we'weni's nwēese'je'tsmée? ⁴⁷ Dyus luucha' Dyus we'weni's nwēese'je'ty. Nava i'cue'sha' nwēese'je'tsmeei'cue na' Dyus luuch meei'cue jīc.

Abrahan meetey Cristo ūsyā'cj yu'

⁴⁸ Tyajū' judiuwe'sha' Jesusa's na'wēty atsewe'we:

—Indya' Samariajūwe'shngu, tyāasa echtjē'j yacj ūsngu atsa' isatja'w tyā'jī' jíte', ⁴⁹ Jesusa' na'wēc pas:

—Andya' echtjē'j yacj ūsmeetj, naasáa andy Tata's tuutje'jsarráatj. Nava i'cue'sha' andya's atse'i'cue. ⁵⁰ Andya's wechana tuutje'jni's pacue'tsmeetj. Nava teech ūsa' andya's tuutje'jsa tyā' andy ma'wēsateva jiia'. ⁵¹ Isatj we'we': Andy we'weni's cytey yuusa', bagachte yujva uu ena's ji'pjumeetyna.

⁵² Tyā'jíte', judiuwe'sha' na'wēty we'we:

—Āchtja'w wejy ew jiyu, echtjē'j yacj ūsteva. Abrahana' uuc sa' Dyus yuwe pta'shsawe'shva uuty. Naapcachja' indya' na'jī'ng: Maava andy we'weni's cytey yuurra', bagachte yujva uu ena's ji'pjumeetyna jī'ng.

⁵³ Cue'sh yatsgawe'sh Abrahana' uuc sa' Dyus yuwe pta'shsawe'shva uuty, atsa' indya' ¿Abrahante jytjaacuesa vá'nga? jíte', ⁵⁴ Jesusa' na'wēc pas:

—Andyírráa ya'tuutje'jna pta'shi'nja na' tyā' selpimeena. Nava andya's tuutje'jsa' andy Tata' tyā's i'cue cue'sh Dyusa' jīna we'we'. ⁵⁵ Nava i'cue'sha' tyāa Dyusa's jii yuuva meei'cue. Nava andya' tyā'sa' ew jiitj. Tyā'wē tyā'sa' ew jiirra jiimeetj jī'nja na', i'cue'sh na'wēy īshijja yu'nja. Nava andya' īshiimée Dyusa's jiitj, sa' tyajy jycaajni's cyteytju yu'.

⁵⁶ I'cue'sh yatsgawe'sh Abrahana' andy naa quiwete pa'jwa'ja's jiyurra', wala wechana yajcyu, sa' cytey yuuni's jiyurra' wejycu wala wecha.

⁵⁷ Tyā'jíte', judiuwe'sha' na'wēty weech we'we:

—Indya' cincuenta año yujva méé ji'pjingu, sa' ¿ma'wēnga tyā'wē Abrahana's uy? jíte', ⁵⁸ Jesus pasrra':

—Isatj we'we', Abrahan meei'n, andya' ūsyā'tj yu'.

⁵⁹ Tyā'jíte', judiuwe'sha' ūusacharra', Jesusa's cuet wātatajya'vaty yu'. Nava Jesusa' tyāawe'sh cshavysuy dyuus yatu casejna u'cj, quim yujva jiyunimeete.

Teech pitstjê'j uyya' âjasame's Jesus yu'tse'jni

9 ¹Jesusa' u'juetsrra', teech pitstjê'j naa quiwete upyji' uyya' âjasame'scu puuty uy. ²Atsa' tyâa yacj u'jusawe'sha' Jesusa's na'wêty paapêjy:

—Naa pitstjê'ja' ¿qui'j yuupa'gaqui'c tyâ'wê yafy ji'pjmée upyna üsu? ¿Tyajy pcalpa'ga ma'c tyâ'wê ñus ji'pju, meerra' neywe'sh pcalpa'ga vá' tyâ'wê yuu? jîte', ³Jesus pasrra' na'jic:

—Tyajy pcalpa'gava me', sa' neywe'sh pcalpa'gava meec tyâ'wê yuu, naasáa Dyus ewuni's áate caavya'ja'cjanrráac tyâ'wê yuu. ⁴Tyâa pa'ga caajsa mjíia's áate caavya'ja'jna mjíiwa'j ji'ptju nee en üsiyna. Tyâ'wême' cus yâ'tje', quim yujva mjíiya' âjameena. ⁵Andya' naa quiwete nee üsírráava, nasaty eena'te caafi'nze'jwa'jsatj.

⁶Tyâ'jírra', quiwe's fyne'shju tuupja'rra tyâa pitstjê'j yafyte shúshna'va, ⁷na'jínac jycaaj:

—Me'j pcji'cyya' Siloé yu'cafyte. (Tyâa Siloea' Jycaajnisá jini'.)

Tyajü' tyâa pitstjê'ja' u'jrra', yafytyi pcji'cyu, sa' uyna yâ'cj shawendna cüj. ⁸Atsa' tyajy yat utyasuwe'sh vite' nyaffi tyâ'wê yafy ji'pjmée upysateva ew jiisa' na'wêty we'we:

—Naa pitstjê'j ¿nyafi' lmushnu pêjyna u'psa meená'? jîte', ⁹maafi yu':

—Tyâafic jít'y. Naapcachja' vite':

—Tyâa na'wê yuj tjengu'c, nava tyâame' jít'y. Nava tyâa pitstjê'j yu':

—Andyíitj jíc.

¹⁰Tyajü' pêjytyi:

—Indy upynijüjy uyya' âjameerra', áchja' ¿ma'wê yuurranga uyya' ája'? jíte', ¹¹pta'shcu:

—Teech pitstjê'j Jesus yaasesa' quiwe's fyne'shju tuupja'rra andy yafyte shúshna'va na'jic: Me'j pcji'cyya' Siloé yu'cafyte jíte', u'jna'va pcji'cytju, atsa' andy yafya' pjatety atsa' uyu'tj jíte', ¹²paapêjytyi:

—Indya's tyâ'wê caajsa' ¿mtee üsna? jíte':

—Jiimeetj jínac pas.

Fariseowe'sh tyâa pitstjê'ja's paapêyni

¹³Tyajü' tyâa pitstjê'ja's pe'jna u'jty fariseowe'sh tashna. ¹⁴Jesus tyâ'wê quiwe's fyne'shju tuupja'rra uyya' âjasame's yu'tse'jni' qui'swa'j enne' yu'. ¹⁵Atsa' fariseowe'sha' qui' paapêjytyi tyâa pitstjê'ja's:

—¿Ma'wê yuurranga áchja' uyya' ája'? jíte', na'jínac pta'sh:

—Quiwe's fyne'shju tuupja'rra andy yafyte shúshcu, atsa' pcji'cytju sa' uyya' ájatj jíc.

¹⁶Tyajü' fariseowe'sh maafi yu' na'wêty we'we:

—Tyâ'wê yúusa' Dyus luuch meena, qui'swa'j ena's qui'su'tsme' na' jíte', vite' na'wêty we'we:



(San Juan 9.6)

—Pcalsarra', ¿ma'wē tyā'wē quim yujva ājānimeesa's caavya'ja'jya' ājācy?
Tyajū' tyāawe'shírráa tyā'wē we'werra', puuty puiindy'ty neeyūu.

¹⁷Sa' tyāa pitstjē'ja's qui' paapējytyi:

—Iindy yafya's yu'tse'jsa' ¿quimna sūju'nga? jīte':

—Tyā' Dyus yuwe pta'shsana sūju'tj jīnac pas.

¹⁸Tyā'wē upynijūjy uyya' ājasameerrava āchja' uyu'tj jīteva, judiuwe'sh yu' tyā'wēne' yu' sūju'tsmeeta'. Sa' tyāa pitstjē'j neywe'shtyi pa'yarra', ¹⁹paapējytyi:

—¿Naa tyā'wē i'cue'sh luuch upynijūjy uyya' ājasameena vacy? Sa' ¿ma'wē yūurraga āchja' uyya' āja'? jīte', ²⁰neywe'sh pasrra':

—Na' cue'sh luuch yuja', tyā'wē upyjūi uyya' ājasameeteva tyā'sa' jīitja'w. ²¹Nava jiimeetja'w ma'wē yūurrane' āchja' uyya' āja'. Sa' quim tyā'wē yafytyi' yu'tse'tjeva tyā'snava jiimeetja'w. Tyā's yuu mpējywe, tyā' tjē'jsayā'ja' na' tyāa pta'shina.

²²Paapēysatyi' ūucjrraty tyā'wērráa pas. Tyā'wēme' maa tyā'wē Jesusa' Dyus caajni Cristo' jīna tuutje'jena tyā'sa' fariseowe'sha' ajtserra peena yu' tyāawe'sh pcjaacjenite caapa'ja'jya'méety ūsu'. ²³Atsa' tyā'wē yuuya'vatety ūucjrra: Na' tjē'jsayā'ja' na' tyāa pta'shina jīnarráa pasu'.

²⁴Tyajū' fariseowe'sha' tyāa pitstjē'ja's qui' pa'yarra' na'wēty we'we:

—Dyus dyi'pte išhiimée mpeeta'sh. Cue'sha' jīitja'w iindy yafytyi yu'tse'jsa' pcalsateva jīte', ²⁵tyāa pitstjē'j pasrra' na'jīc:

—Pcalsa váana nava andya' jiimeetj. Andya' na'wërráa jiitj: nyaff' uyya' ája'tsmeetj, nava áchja' uyu'tj jíte', ²⁶ qui' paapëjytyi:

—¿Quíjga yúu? sa' ¿ma'wërraj yúurraga iindy yafytyi' yu'tse'j? jíte', ²⁷ tyā' na'wëc pas:

—Pta'shyā'tj, nava pta'shteve atsewe'we'rráa i'cue. Sa' ¿quíjya'cue peena pta'shcaja'? ¿I'cue'shva tyāa yacj u'ju wëje'vá'cue? jíte', ²⁸ na'jīnaty wëeshúu:

—Indya' tyāa yacj u'jusang. Nava cue'sha' Moises jycaajni's nwëese'jsatja'w. ²⁹ Cue'sha' jiitja'w Dyusa' Moises yacj puuty we'wec. Nava tyāa tjē'ja's majūwe'shteve jiimeetja'w.

³⁰ Tyajū' tyāa pitstjē'ja' na'wëc we'we:

—Wala yuj fiya', andy yafytyi yu'tse'jsa's majūwe'shteve i'cue'sha' jiyumeete'. ³¹ Maava jiitja'w Dyusa' pcalsawe'sh we'weni's pasu'tsme', naasáa Dyusna yajcyrra tyajy jycaajni's cytey yuusarráatycu Dyusa' pasu'. ³² Bagachte yujva iiwëse'jmeetja'w upyjíi uyya' ájasameety qui' caauyu'jni yu'sa'. ³³ Andy yafytyi yu'tse'jsa' Dyus caajnisameevatsa', tyā'wë caauyu'jya' ájawa'lmeene' yu' jíte', ³⁴ na'wëty wëeshúu we'we:

—Indya' upyjí iindy ūuste pcalrrarráa uta ji'pj upysang na' ¿ma'wëtenga cue'shtyi yu'cypej wëje'? jīna atsewe'werra', neeuty peena yu' jypa'gaya'mée.

Uysarrava Dyus yu's jiimeesa

³⁵ Tyajū' Jesusa' tyāa pitstjē'ja's neeuni's jiyurra', qui' puuty uyrra' na'wëc pëjy:

—¿Dyus Nchi'c quimteva jiingá'? jíte', ³⁶ tyāa pitstjē'j pasrra':

—Mpeeta'sh andy jiyucajn jīna pëjyte', ³⁷ Jesusa' pta'shcu:

—Indya' Dyus Nchi'ca's iuuyyā'jng. Andyítj, atsa' indya' tyāa yacjngu puuty we'we'.

³⁸ Tyā'jíte', tyāa pitstjē'ja' Jesus tashte peejyūcuerra':

—Indya' Dyus Nchi'c yuj yu'nga sūju'tj jíte', ³⁹ Jesusa' na'jīnac pta'sh:

—Andya' na'wë yuuya'írrráatj naa quiwete quíj, uyya' ájasameerrava uyya' ájācajn, atsa' macue uysarrava uyya' ájācajmén.

⁴⁰ Tyajū' fariseowe'sh cytee ūssa' tyā'wë wëse'jrra', na'wëty pëjy:

—Cue'shva uyya' ájasameevá'ntca'w jíte', ⁴¹ Jesusa' na'jīnac pta'sh:

—I'cue'sha' uyya' ájāsamée dyijvatsa', yuuwesamée yuune'cue. Nava uyu'tja'w jī'i'cue na', tyāa pa'ga Dyus dyi'pte' yuuwesai'cue jīc.

Piisháa cyuupjni's caaja'nda'jna pta'shni

10 ¹ Isatj we'we', maava piisháa ca'ga'jni vitytey u'camée, vite ajte vitytemée u'casa' tyā' pesweeta'. ² Nava vityte u'casa' piisháa-tjengsarra tyā'wë yuuna. ³ Atsa' cyte vityte tjengsa' vitya's pjaande'c u'cacajn. Atsa' piishá' jiyu'ty jype'jsa we'weni's, tyajū' teechteechrarj

cysusna pa'yarra cyuupjniñũ cutyi'ji'c. ⁴Sa' jyuca cashishrra', piisháa-tjengsa' yatstec u'jue', atsa' piisha' tyajy e'ste wa'lmeety u'jue', jype'jsa pa'yani's jiyu'ne'ta naa pa'ga. ⁵Nava nasa fiysa pa'yate yu', u'jmée wejyva ũpjna u'jue'ty, nasa fiysa pa'yate jiyurraty tyā'wē ũpju'.

⁶Jesusa' naa ejemplo's pta'shnac caapiya'j, nava nasa' jiyumeeta' tyā'wē pta'shni's.

Jesusa' ew jype'jsa'

⁷Nasa jiyumeete', Jesusa' na'jīnac qui'quin pta'sh:

—Isatj we'we': Andyí piisháa u'cani vity na'wēsaj. ⁸Andy pa'jmeyna yatste pa'jsa' jyucay i'shiisa pesweerráaty yu'. Atsa' piishá' ũucjrra utyaameeta'. ⁹Andyí vity na'wēsaj, atsa' maava andy tashte u'casa', nwe'weni yuutyna. Tyajüyá'ja' qui' casejn qui' u'can tyā'wē yuuna ũsrrava, sã'jīni nes yuutyna.

¹⁰Ewmeesa' pesweena icjna jyuca pembaya'rráaty pa'ja', naapcachja' andya' bagachte yujva ptsumée ũtyi fi'nzeczajntju yuwé'. ¹¹Andya' piishaaty ew jype'jsaj. Atsa' ew jype'jsa' piishaaty peeygãjrra nwe'wepa'garráa tyajy ũtyi fi'nzeni's iviituya' ũsa'. ¹²Nava vyuu pa'garráa piishaaty tjengna ũssa' yu'cj ech yujte uyna'va, piishaaty tjengmée ũpjna u'jue'ty, piisháa-tjengsa meena sa' piisha' tyāa jīiva meetyna, tyāa pa'gaty tyā'wē yū'. Atsa' tyā'wē yūute', yu'cj echa' piishaaty manzva icje'c, naapcachja' ũtyisa yu' ma'wēva ũpju'ty. ¹³Tyā'wē vyuu pa'garráa tjengna ũsna, tyāasane' ũpjna u'jue' piishaaty' tjengmée.

¹⁴⁻¹⁵Andya' piishaaty ew jype'jsaj. Andy Tatava ma'wē andya's ew jiina atsa' andyva ew jiitj Tata's, tyā'wēy andyva piishaaty' ew jiitj, atsa' andy piishaava andya's jiita'. Andy piishaaty wendyrra nwe'weya' andy ũtyi fi'nzeni's iviituya'vatj. ¹⁶Tyā'wēy piisháa vite ji'ptju ayte cyuupjnimeesa tyāatyva nuypa'ja'nja. Atsa' tyāawe'shva andy pa'yani's nwēese'jetyna. Tyā'wē yūute', teeche ajterrarráa jyuca pcjacjni neeyūutyna teeche jype'jsa yacjrráa.

¹⁷Tyā'wē andy ũtyi fi'nzeni's ya'iviituya'vatj, nava ũtyi yuuwa'ja's qui' jypa'gaya'vatj, tyāa pa'gac Tata' andya's wendyi'. ¹⁸Andy ũtyi fi'nzeni's quim yujva cusa'jya' ājameena. Andy yuutj peequí ya'ducje'. Sa' andy ũtyi fi'nzeni's ya'ducjrra uuya'va āja'nja sa' qui' ũtyi yuuwa'ja'sva qui' jypa'gaya' āja'nja. Tyā'wē yūucajncu andy Tata' andya's caaj.

¹⁹Tyā'wē we'weni's judiuwe'sh wēse'jrra, cuj jwendtyi yajcyna neeyūu. ²⁰Maafi yu' na'wēty ũuschawe'we':

—¿Quijya'cue nwēese'je' echtjē'j yacj ũsrra luucu we'weni's? jī'ty.

²¹Naapcachja' vite' na'jī'ty:

—Echtjē'j yacj ũsrra', quim yujva na'wē zhichcue caapiya'jya' ājameena. Echtjē'jrra', tyā'wē uyya' ājasameety caauyu'jya' ¿ājāma'c?

Judiuwe'sh Jesusa's atseni

²²Dyuus yata's tyajna jyā'jni's añu iisaty fiesta'ja' Jerusalen chjambte. Sa' tyāa fiestatety ūsu' nus ente. ²³Naapcachja' Jesusa' dyuus yat pwa' Salomon jii jīnisuc pecūjna u'ju'. ²⁴Atsa' judiuwe'sha' tyajy tashte pcjaacjerra na'wēty pējy:

—¿Bagachpcach cue'shtyi caypumba'jna ūsya'vanga? Indya' Dyus tashu yuusa Cristorra', teejwend mpeeta'sh jīte', ²⁵Jesusa' na'jīnac pas:

—Pta'shyā'tj, nava andy we'weni's jypa'ga'tsmeei'cue. Andy Tata jycaatje', na'wē quijva mji'tj, atsa' andy mjiini' āate caajiyu'ju'ty andy quimteva. ²⁶Andy piishāa mee'cue jī'tj na', isa i'cue'sha' tyā'wēsa yuji'cue. Tyāasa i'cue andya's jypa'gaya' wa'lu'. ²⁷Andy piishaaty jiitj, atsa' tyāawe'sha' andy pa'yani'sva wa'lmée nwēese'je'ty, sa' andy yacj u'jue'ty. ²⁸Tyāasatj tyāawe'shtyi' psumée ityi fi'nzewa'ja's peesu'. Atsa' quim yujva andy cusejū' cusa'jmeena, sa' bagachte yujva vitumeetyna. ²⁹Andy Tata maateva jytjaacuesac andy cuseté ducj, atsa' quim yujva cusa'jya' ājameena andy Tata cusejū'. ³⁰Tata andy yacja' tyāa na'wērrarráatja'w.

³¹Tyā'jīte', judiuwe'sha' Jesusa's qui' cuet wāatatajya'vaty yu'. ³²Atsa' Jesusa' we'wec:

—Andy Tata pu'chte i'cue'sh dyi'pte mjii ewsarrarrāa wala cuj caavya'ja'tj. Atsa' andy mjii ewsa ¿maaga i'cue'shtyi ewmeena' tjengu' atscue andya's cuet wāatataj wēje'? jīte', ³³judiuwe'sh pasrra' na'jīty:

—Ew yūupa'ga tyā'wē cuet wāatatajya'vameetja'w. Nasarrāang, naa cyajng Dyustju jīna Dyusa's weech we'we', tyāa pa'ga tyā'wē yūuya'vatja'w.

³⁴Tyājū' Jesusa' na'wēc we'we:

—I'cue'sh leyte i'cue'shtyi we'werra': Dyus i'cue ¿jī'tsmeena'?

³⁵Jiitja'w Dyus librote fi'jni's maava weech we'wewa'jme'. Maava Dyus yuwe's jypa'gasayā'ja', Dyus i'cue jīnac we'we Dyusa'. ³⁶Nava andya' tyā'wēsarrāameetj. Andya' Dyus yuu tyjityjrra naa quiwete caajnisatj, atsa' andya's ¿ma'wē Dyusa's weech we'we'c Dyus Nchi'ctju jīna jīya' ājaqui'cue? ³⁷Meerra' andy Tata mjii caajnimeesarráaty vāa mjiina ūsne'tca atsa' andy we'wenityi' jypa'ganuwe. ³⁸Nava andy Tata mjii caajnisaty yuj mjiite', andy yu's jypa'gameerrava, andy we'wenirráatyva miipa'gawe. Tyā'wē yūurrarrāa jiyune'cue, andy Tata' andy yacj ūsa', atsa' andya' Tata yacj ūsteva.

³⁹Tyā'jīte', Jesusa's preesu'jrra jyūna u'j wēety. Nava preesu'jmeyna, casejna u'cj.

⁴⁰Tyājū' Jesusa' Jordan yu'wala cuten u'jrra', Juan nyafii bautisāyna ūsul' cyteec ūsu'. ⁴¹Atsa' nasa wala cuj tjengya' pa'jrra', na'wēty we'we:

—Juana' quim yujva ājanimeesaty caavya'ja'jmeerrava, pta'shcu naa pitstjē'j pa'jrra ma'wē yūuwa'ja'sva, atsa' tyā' īshiinimée jyuca cytey yuuc jī'ty.

⁴²Tyājū' cytee ūssa nasa' wala cujsa Jesus quimteva jiyuty.

Lasaro uuníi

11 ¹Betania chjambte teeche pitstjē'j Lasaro yaasesac ātsā'na ūs yu', npe'shwe'sh Maria Marta u'pni chjambte. ²Tyāa ātsā'sa npe'sh Mariac tyā'wē Jesus chindacjē wēt putasa's awrra tyajy dycjasju andyi'jwa'ljsa yu'. ³Tyāawe'sha' pyacjīty ndiyi ātsā'na ūste', Jesusa's pta'shcajn yuwe caaj:

—Indy namicu wendynisa' wala ātsā'na ūsa' jīna.

⁴Tyājū' Jesusa' naa pta'shni's wēse'jrra' na'jīc:

—Na'wē ātsā'na ūsrrava, uuwa'ljsa meea'. Naasāa Dyus ājāni's āate caavya'ja'lina, tyā'wēy Dyus Nchi'c ājani'sva caavya'ja'cjanrrāa tyā'wē ātsā'na ūsa'.

⁵Atsa' Marta Maria tyāawe'sh ndiyi Lasaro yacja' Jesus wendynisaty yu'. ⁶Nava Lasaro' wala ātsā'na ūsa' jīna pta'shni's wēse'jrrava, nee e'nz enfic tyajy u'junisu jytjēyūu. ⁷Tyāa e'nz en scjēwniijū', Jesusa' na'jīnac we'we tyāa yacj u'jusawe'shtyi:

—Judea quiwen qui' u'juega jīte', ⁸tyāawe'sha' na'wēty pas:

—Caapiya'ljsa, mwēese'j. Tyāwāsū' judiuwe'sha' indya's icj wēerra cuet wātatajya'vaty yu', atsa' ŷma'wēnga cytey qui' u'j wēje'? jīte', ⁹Jesusa' na'wēc pas:

—Isa ena' doce ora ŷjī'pjmeena'? Maava en u'jurra' yu'spē'tjemée fi'nzetya, eena' cweetjniitene'ta fi'nze' naa pa'ga. ¹⁰Nava cus u'jurra', yu'spē'tjetyna, eena' cweetjnite u'jupa'gamée.

¹¹Tyājū' na'jīc Jesusa':

—Cue'sh namicu Lasaro' deeni', nava andya' fityya' u'jue'nja jīte',

¹²tyāa yacj u'jusawe'sha' na'jīty:

—Deenirráa ūsrra yu', fityte' quiiteena jīty.

¹³Lasaro' uuni ūstec Jesusa' tyā'wē we'we. Nava tyāa yacj u'jusawe'sha' jiyumeerra', ī'née deenisarrá'sne' we'we' sūju'ne'ta.

¹⁴Tyājū' Jesusa' teejwendcu āate pta'sh:

—Lasaro' uuni' jīna. ¹⁵I'cue'sha' andy ājani's uyrra' andy quimteva jiyucajn, ewrrá'ntca cytee ūsu'tsmée. Tyā'wē uuniyā'j ūsteva, tjengya' u'juega jīte', ¹⁶Tomas mellisu jī'ty tyā' na'wēc we'we vite pi'cyna u'jusawe'shtyi:

—Cue'shva u'juega Jesus yacj ja'nda uuya' jīc.

Jesus ītyi vit-sa

¹⁷Jesus cytee pa'jatste', Lasaro's pendani pajnz enyā'cj yu'. ¹⁸Atsa' Betania chjamba' Jerusalen chjambuj e'nz kilometro y mediorráac jyu'cja ūsu'. ¹⁹Atsa' judiuwe'sha' wala cuj pa'cju'ta tyā'wē ndiyi uute', npe'shwe'shtyi cviisha'jya'. ²⁰Atsa' tyāa entey Jesusa' pa'jatsa' jīni's jiyurra', Marta' puuty uuya' casejc. Nava Maria' yatte neeyūuc.

²¹Tyājū' Marta' Jesus yacj puuty uyrra' na'jīnac we'we:

—Indy ayte ūssavatsa', uuwa'lmeene' yu' ū'cue ndyi'sha'. ²²Nava jīitj Dyusa' jyuca ūsuna indy quīj pējyteva jīte', ²³Jesusa' na'wēc pas:

—I'cue ndyiya' ītyi yuuna jīte', ²⁴Marta' na'wēc pas:

—Ũ'cue' jiiitj, uusaawe'sh ñtyi yuu ente' ñtyi yuuyujuna.

²⁵Nava Jesusa' na'jĩc:

—Andyí uuniiteva ñtyi vit-satj, sa' ptsumée ñtyi fi'nzewa'ja'sva andyí peessatj. Maava andya's ñuste jypa'gasá' macue uurrava qui' ñtyi yuutyna. ²⁶Atsa' maava nee ñtyi ñssa' andyna ñuste jypa'garra', bagachte yujva uuwa'jmée ñtyi fi'nzetyna. Andy we'weni' isa yujtyna ¿sũju'cue'? jĩte', ²⁷Marta pasra':

—Tyã'wẽ yujna sũju'tj. Indya' Cristong, Dyus Nchi'c naa quiwete quiisa jĩc.

Jesus ũ'neni

²⁸Tyã'wẽ we'wena jyã'jrra', Marta' yatna shawendna u'cj nyacja's pa'yaya'. Sa' na'jĩnac susmée we'we:

—Caapiya'jsa ayte yã'j ũsa', sa' i'cue's yuu caacj.

²⁹Tyã'jĩ'tspcachja', Maria' quiitena' wala dund u'cj Jesusa's puuty uyya'.

³⁰Jesusa' Betania chjambte u'cameycu yu', Marta yacj mteene' puuty uy cytee nee ũsiyrráac yu'. ³¹Atsa' Maria' quiiterra wala dund scjẽwte', judiuwe'sh tyãa yatte cviisha'jna ũssa' e'stey u'jty, pendaní cafyite vaa ũ'neya' u'juetsna sũjrra.

³²Tyajũ' Maria' Jesus tashte cũjna'va, peejyũcuerra na'wẽc we'we:

—Cue'shtyi jype'jsa, indy ayte ũssavatsa', ũ'cue ndyi'sha' uuwa'jmeene' yu' jĩnac we'we.

³³Tyã'wẽ Maria vite' judiuwe'sh pi'cyna yuusa ũ'netste Jesusa' uyrra', tyãava wala ñusrra' ³⁴pẽjycu:

—¿Mteecue pendáa? jĩte':

—Myuj vacy tjengya' jĩty.

³⁵Atsa' Jesusa' ũ'nec. ³⁶Tyã'wẽ Jesus ũ'netste uyrra', judiuwe'sha' na'jĩty:

—Mtjengwe ma'wẽga wala peeygãja'.

³⁷Nava maaíi yu' na'wẽty we'we:

—Naa pitstjẽ'ja' uyya' ãjasameetyva caauyu'ju'c na' ¿quĩjrráava yũuya' ãjawa'jmée ma'c yu' Lasaro uucajmén?

Lasaro's ñtyi vitni

³⁸Tyajũ' Jesusa' qui'quin wala ñusna utyaac Lasaro's pendaní cafyite. Tyãa cafya' dyiiga pwa'ja'nic yu', atsa' u'cani vityte yu' cuetcu apjni yu'.

³⁹Jesusa' na'wẽc jycaaj:

—Apjni cueta's mquiuswe jĩte', uusáa npe'sh Marta' na'jĩc:

—Uuníi pajnz enyã'ja', atsa' pjandete' ¿canzh putameema'c? jĩte',

⁴⁰Jesus we'werra':

—Andy pta'shñityi' tyã'wẽ yujna sũjna ñuste jypa'garra', Dyus ma'wẽsateva jiyune'cue ¿jĩtsmeetca'?

⁴¹Tyã'jĩte', tyãa apjni cueta's quiistyi. Atsa' Jesusa' cielute pagayrra na'wẽc we'we:

—Tata, andy pēyni's pasu'ng naa pa'ga wecha'tj. ⁴² Andya' jiitj, indya' bagachteva andya's pasu'ng. Nava tyā'jīna ātetj wechá', ayte nasa ūsta' tyāawe'sh wēse'jrra', andya'sa' Dyus caajni yuj yu'ne' sūjcajn.

⁴³ Tyā'jīrra', Jesusa' suscu we'we:

—Lasaro, tyāajū mcaasej jītspcachja', ⁴⁴ uusá' ityi yuurra casejc, chinda, cuse pety dyi'p yā'jrra yapni. Atsa' Jesusa' cjimbaacj u'jya' ājācajn.



(San Juan 11.44)

Jesusa's icjya' puuty we'weni
(Mt. 26.1-5; Mr. 14.1-2; Lc. 22.1-2)

⁴⁵Uusá's ityi vitni's uyrra', Maria's pi'cyna üssa judiuwe'sha' Jesusa's üuste jypa'garraty neeyüu. ⁴⁶Nava vite judiuwe'sh atsesa yu' fariseowe'sh tashna u'jrra', Jesus tyä'wē uusá's ityi vitni's pta'shtyi. ⁴⁷Atsa' fariseowe'sha' sacerdote npiitstjē'jwe'sh yacj pcjaacjerra', na'jīnaty puuty we'we:

—Naa pitstjē'ja' naa quiwete quim yujva ājanimeesaty caavya'ja'jna quījquījva yūuna ūsa'. Atsa' ¿quīj yuucytja'w? ⁴⁸Tyāa pitstjē'ja's quījrrāava yūumeete', nasa' jyucay tyāa yacjrrarrāa u'juetyna. Atsa' Romajū nasa cue'sh dyuus yata's iviiturra', cue'shtyiva iviitutyna.

⁴⁹Tyajū' tyāa añute sacerdote npiitstjē'j Caifasa' na'wēc we'we:

—I'cue'sha' ūs yajcyya'rrāa yujva ājā'tsmeei'cue. ⁵⁰Cue'sh ji'j jyuca yu' vitucajmen wejyva jyucasa pa'gate teech yuurraa vituvatsrrāa wejy ewna. Tyä'wē yūuwa'ja's ūs yajcyya' i'cue āja'tsmée.

⁵¹Caifasa' tyāa añute' sacerdote npiitstjē'cj yu', sa' peecyrrāa tyä'wē yajcyrra we'wemeene'. Jesusa' judiuwe'sh jyucaysa pa'gate tyāarrāa uuwa'tjene' Dyusa' Caifasa's tyä'wē we'wewa'ja's caaūusutje'j. ⁵²Nava judiuwe'shtyi nwe'weya'rrāameene' tyä'wē uuya'va yu'. Dyus luuch mtee mteeva ūstyna tyāawe'shtyiva pcjacjya'c tyä'wē uuya'va yu'. ⁵³Atsa' tyāajūjy judiu npiitstjē'jwe'sha' Jesusa's icjya' puuty we'wety.

⁵⁴Tyāa pa'gac Jesusa' Judiuwe'sh cshavysu u'juya' ājāmeerra', Judea quiwejū casejna u'j tyāa yacj u'jusawe'sh yā'jrra teech chjamb nasa u'pnmée ja'ndasu Efrain yaasesa ūsu'c cytee ūsya'.

⁵⁵Tyajū' Judiuwe'sh fiesta Pascua en ājatscu yu'. Atsa' wala cuj nasa' u'jty Jerusalenna, Pascua fiesta ājmeyna tyāawe'sh cacuete pcaltyi yaattera ūsya'.

⁵⁶Cyte' Jesusa's pacuena yā'jty ūs yu' sa' dyuus yatte na'wēty puuty paapēyi':

—¿Ma'jīqui'cue? Jesusa' fiestate ūsya' ¿yujmañ?

⁵⁷Tyajū' fariseowe'sh vite' sacerdote npiitstjē'jwe'sha' neewe'wety maarrāava Jesusa' fiestate ūste jiyurra' tyāawe'shtyi pta'shcajn tundya' caajya'.

Wēt putasa's Jesus chindacjē teech u'y awni
(Mt. 26.6-13; Mr. 14.3-9)

12 ¹Pascua fiesta ājya' seis en peejiyna, Jesusa' Betania chjambna u'cj, Lasaro uuniiteva ityi vitcu cytee. ²Cyteea' ū'wa'j pjeu'jty Jesusna wechana, naapcachja' Marta yu' puutsutssac yu'. Atsa' Lasaro' Jesus yacj cachcu ū'ya'. ³Tyajū' Maria' teech libra ājc wēt putasāa wala pa'gasa's jyūna pa'jrra', Jesus chindacjē shūshrra', tyajy dycjasjuc andyi'. Atsa' yat dyyiite tyāa wēt putasarrāa jyuca utac.

⁴Tyajū' Jesus yacj u'jusa Simon nchi'c Judas Iscariote yaasesa' Jesusa's icjcajn ducjwa'jsa' na'wēc we'we:

⁵—¿Ma'wētequi'c naa u'ya' wēt putasa's tres cientos pesote tyweyrra nasa puuplesaty peesu'tsmée? jīc.

⁶Nava Judasa' puuplesaty pees jytjāasrra tyā'jītsme'. Tyā' vyuu jyaawsac yu', nava vyuu pcjajcinity quim yujva jiyunimée paatste ncuutyi'ji'u'ga, tyāasac tyā'wē we'we'.

⁷Tyājū' Jesusa' na'wēc we'we:

—Naa u'ya's tyā'wē yuja' we'wewa'j ji'pjmeeng. Naa wēt putasa's andy cacue's pendaatstewe'shcu jyaawni ji'pju'. ⁸Puuplesa' bagachteva i'cue'sh yacj nes yuutyna. Nava andya' jwee yu' i'cue'sh yacj nes yuuwa'jsameetj jīnac pta'sh.

Lasaro's icj wēeni

⁹Jesusa' Betaniate ūsa' jīni's jiyurra', judiuwe'sh wala cujsa pcjaacjerra Jesusa's tjengya' tyāa chjambna u'jty. Nava Jesusrrá's tjengya' u'jmée, Lasaro's ja'ndaty tjengya' u'j, tyā'sa' uuniiteva Jesusa' qui' ityi vitcu tyāa pa'ga. ¹⁰Tyājū' sacerdote npiitstjē'jwe'sha' puuty we'wety Lasaro'sva icjya', ¹¹tyā's Jesus ityi vitpa'garráa judiuwe'sh wala yā'j tyuteerra Jesus yacjtyi u'juets yu' naa pa'ga.

Jerusalente Jesus u'cani

(Mt. 21.1-11; Mr. 11.1-11; Lc. 19.28-40)

¹²Jerusalente Pascua fiestate nasa wala pa'tja. Sa' cuscus encjē' Jesusva Jerusalente fiestate pa'jana jīni's jiyurra', ¹³lamus ets spē'tjrra Jesusa's pu'tjengya' casejty. Sa' na'jīnaty sus we'we':

—iDyus tyacue ewte, teech yuja' Dyus caajni, Israelwe'shtyi Jycaajsa wala ewsa'! jīnaty wechál.

¹⁴Tyājū' Jesusa' teech burru ūste uyrra', tyāatec a'jrra u'j, Dyus librute na'wē fi'jni' tyāa cytey yuucajn:

¹⁵Ūcujnuwe, Sion chjambtewe'sh.

Mtjengwe, i'cue'shtyi Jycaajsa yuja', teech burrute a'jrra jīnac fi'jni yu'.

¹⁶Tyāapcachjī yu', Jesus yacj u'jusawe'sha' jiyumeeta' tyā'wē yūuni's. Nava Jesus cielun u'jnite', jiyuty tyā'wē fi'jni' cytey yuuteva.

¹⁷⁻¹⁸Tyā'wē uusá's Jesus ityi vitpa'gaty nasa jiyuwēesa' tyacue wala pu'tjengya' casej, Lasaro's ityi vitutste' cytee ij tjengna ūssa' jiimeesatyva pta'shne'ta tyāa pa'ga.

¹⁹Tyājū' tyā'wē nasa pu'tjengya' casejpa'garráa fariseowe'sha' na'jīnaty ūuscha we'we' tyāawe'sh pwe'sh:

—Mtjengwe vacy, quīj yujva yūuya' ājatsmeetja'w, naapcachrráa nasa' jyucay Jesus yacjrrarráa u'juetsta' jī'ty.

Greciajūwe'sh Jesusa's pacuení

²⁰Jerusalente fiesta ente jyu'j quiwe Greciajūwe'sh pa'jrra ūsu'ty.

²¹Tyājū' Greciajūwe'sha' Galilea quiwesu Betsaidatewe'sh Felipe's utyaana cūjrra', na'wēty pytjaa we'we:

—Jesusa'stja'w puuty uy wêje' jîte', ²²Felipe' u'jrra Andresa's pta'shcu, sa' tyajû' e'nzsay Jesusa's pta'shya' u'jty. ²³Atsa' Jesus we'werra':

—Dyus Nchi'c Nasa Yuusa' uurra qui' îtyi yuuwaj'en âjatsa'. ²⁴Na'jî'tj na': Teech scuutyj ñîña' quiwete weterra uumeerra yu', pejnamée teechrâa nes yuuna. Nava uurra bucharra', jweefîrrâa penana. ²⁵Maava naa quiwete îtyî fi'nzewa'jrrâ's yaacysa' ptsuwa'jmée îtyî fi'nzewa'ja's iviitutyna. Nava naa quiwete îtyî fi'nzeni's yaacysame', ptsuwa'jmée îtyî fi'nzewa'ja's ji'pjutyna. ²⁶Maava andya's selpîi wêerra', andy yacj yuweena, sa' andy mtee ûste' tyâava cytey ûsya' âjana andyna selpiisa'. Atsa' maava andyna selpisaatyî's andy Tata' tuutje'jena.

Jesusa' tyajy uuwa'ja's pta'shni

²⁷Âchja' wala ñusna ûstju, sa' ¿ma'jî'tca? Meerra' Tata, andya's meen nwe'we pytjaa yuucajmen jîte, ewvâanacy. Nava tyâ'wê pytjaa yuuya'fîrrâatj yuwé' na' tyâ'jîme'nja. ²⁸Tata, maava indyna jiyuwa'jrrâ's mcaavya'ja'j.

Tyajû' cielujû we'weni na'wêc ptjûuse:

—Andyna jiyuwa'ja's caavya'ja'jyâ'tj. Nava maava andya's jiyucajn qui' caavya'ja'jya'vatj jînic ptjûuse.

²⁹Atsa' nasa' tyâ'wê cielujû we'weni's wêse'jrra':

—Cpi'shne' tyâ'jî jî'ty, naapcachja' vite yu':

—Teech angelne' tyâ'wê we'we jî'ty.

³⁰Tyajû' Jesusa' na'jîc:

—Tyâ'wê we'weni' andyna pta'shna we'weme', i'cue'shtyi pta'shnac tyâ'wê we'we jiyucajn. ³¹Âchja' naa quiwete jyucaysa yuuwesa yuuwaj'en âjc, naapcachja' naa quiwete jycaajna ûssa echtjê'j yu' peena yu' jycaajya' âjâwa'jmeete neeyûuna. ³²Tyâ'wê andya's êecjê qui'pnijû, jyucaytyi nwe'weya' âjâ'nja.

³³Tyâ'wê we'werrac caajiyulj ma'wê uuya'varrava.

³⁴Tyajû' nasa' na'wêty we'we:

—Cue'sha' Dyus librate leya's iiwêse'tja'w, atsa' Cristo' bagachte yujva uuwa'jmée îtyi u'juwa'jsa' jî'c. Atsa' indya' ¿ma'wênga Dyus Nchi'c Nasa Yuusa's êecjê qui'pni yuuna jîna we'we'? Dyus Nchi'c Nasa Yuusa' ¿quimna? jîte', ³⁵Jesusa' na'jînac pas:

—Eena'sa' i'cue'sh yacj nee ûsuna, nava manz enrrâa ûsuna. Tyâ'wête' eena'te fi'nzewa'ja's mpa'gawe, eena'sa nee ûsiyna, cyaj chji'ndysa' i'cue'shtyi cpajcymeena. Tyâ'wême', chji'ndyte u'jusa' maa dyi'j ewsateva jiyuya' âjâ'tsme'. ³⁶Nee i'cue'sh yacj ûsiyna, eena'sa's mjiyuwe, cyaj eena'te fi'nzesa yuune'cue.

Tyâ'wê we'wena jyâ'jrra', Jesusa' u'jrra vyaame'.

Judiuwe'sha' Jesusa's jypa'gameeta'

³⁷Quim yujva ājanimeesa's tyacue wala caavya'ja'tjeva, nasa' jiyuya' āja'tsmeeta' Jesus quimteva. ³⁸Nava Dyus yuwe pta'shsa Isaiás fi'jrra nviitni' cytey yuucajntyi tyā'wē yuu: Cyte' na'jī'c:

Cue'sh pta'shni's ¿quimrrá' jypa'gata'?

Dyusa' tyajy ājani's ¿quimtyiga caavya'ja'j? jī'c.

Cristo's jiyuya' ājawa'jsameene'ta yu', tyāa pa'gac Dyus yuwe pta'shsa Isaiasa' tyā'wē fi'jrra nvijt.

³⁹Sa' Isaiasa' qui' we'werra':

⁴⁰Dyusa' tyāawe'sh yafytyi apjcu uyya' ājācjmén.

Sa' tyāawe'sh ūustyiva nuywejc jiyucajmen,

Sa' Dyus tashte shawendrra catyjiwa'ja'sva nvijtme' jī'c.

⁴¹Jesus ma'wē yuwa'jsateva jiyurrac Isaiasa' tyā'wē we'wena fi'j.

⁴²Tyā'wēteva, judiuwe'sh wala cujsa Jesus quimteva jiyuty, maafi yu' npiitstjē'jwe'sh yā'jrra. Nava fariseowe'sh ajtserra tyāawe'sh pcjaacjenijū cutyi'jrra peena yu' pa'jwa'jmée vitcaymen, āate yu' pta'shi'tsmeeta' ūucjrra. ⁴³Tyāawe'sha' nasaa tuutje'jnirrá's wejy ji'pju wēerraty tyā'wē yu'.

Ney pta'shcaajni's Jesus pta'shni

⁴⁴Tyajū' Jesusa' na'jīnac we'we:

—Maava andyna ūuste jypa'gasa', andyrráana jypa'gamée, andyna caajsa Tatanava jypa'gana. ⁴⁵Tyā'wēy maava andyna uysa', andy Tata'sva uysáa yuuna. ⁴⁶Andya' nasaty eena'te caafi'nze'jya'tj quīj, cyaj andyna ūuste jypa'gasa' chji'ndyte neeyūumeetyna. ⁴⁷Nava maava andy pta'shni's wēse'jrrava cytey nwēese'jmeete', tyā'wē yūusa's ewmeete nviitwa'jsa' andymeetj. Andy yu' naa quiwetewe'shtyi ewmeete nvijtya' yuwe'tsmeetj, wejyva nwe'weya'tj yuwé'. ⁴⁸Andya's wa'lrira andy pta'shnityi' cytey yuumeete', tyā'wē yūusaty ewmeete nviitwa'jsa ūsa': āchj na'wē andy pta'shna we'we'tj tyāa pta'shnisa írráa ewmeete nviitwa'jsata' nmej ente'. ⁴⁹Tyāa pa'gatey andyrráa we'wena pta'shistsmeetj. Andyna caajsa Tatafiic tyā'wē pta'shcaja', ⁵⁰cyaj andya' jiitj andy Tata we'weni' bagachte yujva ptsumée ityi caafi'nze'jwa'jsateva. Atsa' andy Tata ma'wē pta'shcaatje', tyā'sna írráatj andyva pta'shi' jīnac we'we Jesusa'.

Jesusa' tyāa yacj u'jusawe'sh chindaty pcji'cyni

13 ¹Pascua fiesta ājya' teech enrzáa pejiitscu yu'. Atsa' Jesusa' jiic yu' naa quiwe's nvijtrra Ney tashna u'jwa'j en āani's. Sa' naa quiwete tyāa yacj u'jusawe'shtyi' nyafiitey ma'wēne' peeygāj na', nmej entepcachcu peeygāj.

²Jesusa' tyāa yacj u'jusawe'sh yacj ū'na u'ppcachja', echtjē'ja' Simon nchi'c Judas Iscariote's caaūusutje'jetsyā'cj yu' Jesusa's ewmeesa cusete ducjajcn.

³Atsa' Jesusa' jiic yu' Dyus tashune' yuusa yu' sa' qui' Dyus tashnay u'jwa'ja's. Sa' tyā'wēy jiic yu' Dyus ma'wērraj jycaajwa'ja'sva tyāarrarrá's ducjni'sva.

⁴Tyājū' Jesusa' ũ'na u'pfi quiitena'va, atyjna qui'prra, toalla's jytujndcu. ⁵Sa' cuse cjweechaniite yu' awna', mesate ij ũ'na u'psa chindaty pcji'cyna', toallaju andy'c.

⁶Sa' Simon Pedro chindaty pcji'cyya'vate', tyā' na'wēc we'we:

—Cue'shtyi jype'jsa yuja', ¿andy chindaty pcji'cyma'ng? jīte', ⁷Jesusa' na'wēc pas:

—Āchjfi yu' jiyumeene'nga na'wē yūuni's. Nava e'su' jiyune'nga.

⁸Tyā'jīteva, Pedro' qui' na'jīc:

—Indya' andy chindaty pcji'cywa'jsameeng jīte', Jesusa' na'jīnac pta'sh:

—Indya's pcji'cymeete', andy yacj ũ'sya' ājameene'nga jīte', ⁹Simona' na'wēc pytjaa we'we:

—Tyā'wēyā'tje', chindarráaty pcji'cymée, cuse pety dyictjé yā'jrra meen pcji'cy jīc.

¹⁰Nava Jesusa' na'jīc:

—U'se pēwrra ũ'ssa', jyuca ateyā'tja', cyaj chindarráaty pcji'cywa'j peejyta'. I'cue'sha' ateyā'ji'cue, nava jyucasa yu' ate ũsmeei'cue.

¹¹Jyucaysa yu' ate ũsmeei'cue jīnac we'we, tyā's icjcajn ducjwa'jsa's we'werrac tyā'jī.

¹²Tyājū' Jesusa' tyāawe'sh chindaty pcji'cyna' jyā'jrra', atyja's jycajtsna' mesate qui' cachrra na'jīnac paapējy:



(San Juan 13.5)

—¿I'cue'sha' jiyu'cue' andy tyā'wē i'cue'sh chindaty pcji'cyte'? ¹³I'cue'sha' andya'sa' caapiya'jsa, jype'jsa, jirra', isa yuj we'we'i'cue, andya' tyā'wēsa yujtj naa pa'ga. ¹⁴Andya' caapiya'jsa, jype'jsarrava i'cue'sh chindaty pcji'cytju atsa' i'cue'shva tyā'wēy chindaty puuty ya'pcji'cyna mfi'nzewe teehsa na'wērrarra. ¹⁵Andy na'wēy yūuna fi'nzecajntju i'cue'shtyi tyā'wē selpi. ¹⁶Isatj we'we', maava selpisa' tyajy patronte jytjaacuesame', atsa' tyā'wēy caajnisava tyā's caajsate jytjaacuesame'. ¹⁷Na'wē selpiwa'ja's jiyurra cytey yuuna fi'nzerra', wech wecha fi'nzene'cue.

¹⁸I'cue'sh jyucaysa yuutyi' tyā'jī'tsmeetj. Jiitj quimrraj andy tyjityjnisateva. Nava Dyus librute na'wē fi'jni ūsa': Andy yacj ij ūsarrava, andya's ajtserra quicjel'jya'va' jīna fi'jni' cytey yuucajntju tyā'jī'. ¹⁹Āchjīi pta'shitstju, cyaj cytey yuute', andya's ew jiyune'cue Dyus Nchi'cdiyiteva. ²⁰Isatj we'we': maava andy caajnisas' jypa'garra', andya'sva jypa'gasa yuuna. Sa' andyrrāana jypa'gamée, andya's caajsanava jypa'gasa yuuna.

Judasa' Jesusa's ewmée yūuya' yaacyni
(Mt. 26.20-25; Mr. 14.17-21; Lc. 22.21-23)

²¹Tyā'jīna jyā'jirra', Jesusa' nūsñus yajcyrra āatec we'we:

—Isatj tyā'jī', i'cue'sh yacj u'jusa teehsa' andya's ajtserra ewmeesa cusete ducjya'va' jīc.

²²Tyājū' quimna tyā'jīteva jiyumeerra', dyi'p iisarrāaty puuty tjengu' tyāawe'sh pwe'sh. ²³Teehsa' Jesus pucate ij u'psa' Jesus wendynisac yu'. ²⁴Atsa' Simon Pedro' quimna tyā'jīteva jiyu wēerra', tyāa ij u'psa's cuseju pta'shcu paapēycajn. ²⁵Atsa' Jesus pucate ij u'psa' tupjirra na'jīnac paapējy:

—Jype'jsa, mpeeta'sh ¿quim indya's tyā'wē ajtserra ducjwa'jsana? jīte', ²⁶Jesusa' na'jīnac pta'sh:

—Pana's tuupja'jirra maana ūsu'nja tyāa andya's ducjwa'jsa' jirra', pana's tuupja'jna'va Simon nchi'c Judas Iscariote'scu ūs. ²⁷Atsa' Judasa' pana's jypa'gatpcachja', echtjē'ja' tyajy ūuste u'cac.

Atsa' Jesusa' Judasa's na'jīnac we'we:

—Quīj yūuya'varrava, dund cytey myuu jīte', ²⁸mesate ū'na u'psa' maa yujva jiyumeeta' tyā'wē we'weni's. ²⁹Maafī yu' na'wēty yaaqui': Judasa' vyu jyaawsate', cyaj vá' Jesusa' fiestate peejiwa'ja's weycaja', meerrava puuplesaty vá' quījrrāava peescaja' sūju'ty. ³⁰Naapcachja' Judasa' pana's ū'na'va casejna u'cj. Tyā'wē yuutste', chji'ndyni yā'cj yu'.

U'se jycaajnisas

³¹Judas u'jni e'su', Jesusa' na'wēc pta'sh:

—Dyus Nchi'c Nasa Yuusá's āchja' tuutjel'jnic yuu, atsa' Nchi'cva Neyas' tuutjel'cj. ³²Dyus Nchi'c Nasa Yuusa' Neyas' tuutjel'jetspcachja', Neyva Nchi'cas' tuutjel'jena, nava āchjīi tyā'wē yuuya'va'. ³³Andy nchi'ccuēwe'sh, jwee yu' tyach ūsme'nja i'cue'sh yacj. Andya' judiuwe'shtyi nyafīi we'werra': I'cue'sha' andya's

pacueene'cue. Nava andy u'ljuetstju cyte' yujya' ajameene'cue jinatj we'we, sa' i'cue'shtyiva tyā'wēyrraatj we'we'. ³⁴I'cue'sh yacj nviitutstju u'se jycaajnisas, puuty ya'peeygājna fi'nzewa'ja's. Andy ma'wētca i'cue'shtyi peeygājna fi'nze', tyā'wēy i'cue'shva puuty ya'peeygājna mfi'nzewe. ³⁵Tyā'wē puuty ya'peeygājna fi'nzete', maa nasava jiyutyna i'cue'sh andya's nwēese'jsateva.

Pedro' ishiiwa'jsateva Jesus pta'shni
(Mt. 26.31-35; Mr. 14.27-31; Lc. 22.31-34)

³⁶Tyajū' Simon Pedro' na'jinac Jesusa's paapējy:

—Jype'jsa, ¿mtee u'ljuetsnga? jite', Jesusa' na'jinac pta'sh:

—Andy u'ljuetstju cyte' yujya' ajameene'nga achjií yu'. Nava e's yu' yuweene'nga jiteva, ³⁷Pedro' qui'quin paapējycu:

—Jype'jsa ¿qui'j yuurra achjií yu' yujya' ajamée yuquiti'tj? Andy uuwa'ja's yujva üucjya'mée üstju, indya's peeygāaweete jite', ³⁸Jesus we'werra':

—¿Isanga tyā'ji'á'? Nava andya' na'ji'tj na': atall we'wemeyna, andya's jiimeetj jina tecj us ishijatsyā'j yuune'nga jic.

Jesusa' Dyus tashte caapa'ja'jwa'jsa

14 ¹Jesusa' na'jic:

—I'cue'sh üuste fiicājna ñusmée meswe. Wejy yuuva Dyusrrá's yajcyna meswe, sa' andynava tyā'wēyrráa yajcyna meswe. ²Andy Tata üsnite', jycaasena üswa'j wala üsa'. Tyā'wē méevatsa', meea' jina pta'shni yā'j yu'nja i'cue'shtyi. Tyāa pa'ga i'cue'sh cytee pa'jwa'ja's pjeu'jya' u'ljuetstju. ³Sa' u'jrra cytee i'cue'sh pa'jwa'ja's pjeu'jrra', qui' shawendu'nja i'cue'shtyi pe'jna u'jya', cyaj i'cue'shva andy üsnitey andy yacj ij üsune'cue. ⁴I'cue'sha' jii i'cue mtee u'ljuetsteva, sa' dyi'nava jii i'cue.

⁵Tyajū' Tomasa' na'jinac pējy:

—Jype'jsa, mtee u'ljuetsne'nga nava cue'sha' jiimeetja'w, sa' dyi'ja'sva jiimeetja'w jite', ⁶Jesusa' pta'shcu dyi'ja's:

—Andy yuurráa Dyus tashte caapa'ja'jwa'jsatj, sa' andy yuurráa caypumba'jwa'jsameetj, sa' andy yuurráa ityi caafi'nze'jwa'jsatj. Atsa' andypa'ga yuurráa maava andy Tata tashte pa'jya' ajatyna. ⁷I'cue'sha' andya's jiyuvatsa', andy Tata ma'wēsateva jiyune'cue. Tyā'wērrava achja' jiyu i'cue, uyna üsi'cue tyāa andy Tata'. ⁸Tyāa andy Tata' jite', Felipe' na'wēc pējy:

—Jype'jsa, iindy Tata's áate mcaavya'j cue'sh uycajn. Tyā'wērráa peejytja'w jite', ⁹Jesusa' pta'shcu:

—Andya' i'cue'sh yacj nacue tyach üstju atsa' ¿achj pa'jva andya's jiyumey vá'nga? Andyna uysa', andy Tatanac uyu'. Atsa' ¿ma'wēnga Tata's mcaavya'j jina pēyi'? ¹⁰Jiyu'tsmée vá'nga, andya' Tata yacj bagachteva nestju yu', atsa' tyā'wēy Tatava andy yacj nesa'. Na'wē we'we'tj na' peecy üusuj yajcyrra tyā'wē we'we'tsmeetj. Tata andy yacj üssa tyāa we'wecaatjerráatj we'we'.

¹¹Jiyurra mneeyüuwe: Bagachteva andya' Tata yacj e'nzsay ij nestja'w yu'.

Tyā'wē e'nzí ijne'ta fi'nze' sūjmeerrava, andy mjiinisarráatyva uyrra', Tata yacj ūssarrac tyā'wē ewsaty mji' sūjna mneeyūuwe. ¹²Isatj we'we', andyna ūuste jypa'gasa' andy na'wēy mjiiya' ājatyna. Nava tyā'wērráamée, andy mjiinite jytjaacue wala mjiiya' ājatyna, tyā'wē ājacajnírráa andya' u'juetstju Tata tashna. ¹³Sa' i'cue'sha' Tata's quij pēywa'l j'i'prrava, andya's pēyine'cue atsa' andya' i'cue'sh pēyni's jyuca cytey yu'nja, cyaj Nchi'cpa'gate Tata wechani yuuna. ¹⁴Na'j'i'tj na': andya's quij pējyteva jyuca cytey yu'nja.

Jesusa' Dyus Espiritu's caajya' neeyūuni

¹⁵I'cue'sha' andya's peeygājatsrra', andy jycaajnityi' nwēese'jna cytey myuuwe. ¹⁶Atsa' andy Tata's i'cue'sh pa'gate neewe'we'nja, i'cue'shtyi pu'chwa'jsa teeche andy na'wēysa's caacjan. Tyā' Dyus Espiritu isasarrá's caajiyu'jsa' tyā' bagachteva i'cue'sh yacj nes yuuna. ¹⁷Naa quiwetewe'sha' tyāa Espiritu's uyya' ājameerra' jiyuya'va ājameetyna, tyāasa jypa'gaya'va ājameetyna. Nava i'cue'sha' jii yā'ji'cue, tyāa Espiritu i'cue'sh yacj ūsteva, sa' bagachteva tyutemée nes yuuna. ¹⁸I'cue'shrráaty nvijtya'vameetj. Qui' shawendu'nja i'cue'sh yacj ūsya'. ¹⁹Naajū' tyachmeynarráa nasa' andya's peena yu' uymeetyna. Nava andya' uuwa'jsameetj, tyāa pa'ga i'cue'shva uuwa'jsamee'cue, tyāasa i'cue'sh yu' andya's uyuune'cue. ²⁰Tyājū tyāa ente ew jiyune'cue andya' Tata yacj nes yuusateva, naapcachja' i'cue'sha' andy yacj i'cue nes yu' atsa' andya' i'cue'sh yacjty nes yu'. ²¹Andy jycaajnity nwēese'jna cytey yuuna fi'nzesa' andya's isa ūusuj jyuca yaacysarra tyā'wē yuutyna. Atsa' andy Tata' tyā'wē yūusatyi' peeygājana, atsa' andyva tyā'wē yūusatyi' peeygājra āate vyaana nes yu'nja.

²²Tyā'jite', Judas Iscariotemée, vite Judasa' na'wēc pējy:

—Jype'jsa, ¿quij yuurra cue'shrráaty āate vyaarra', vite nasa naa quiwetewe'sh yuutyi' vyaamée yuquing? jite', ²³Jesus pasrra':

—Andya's ūusuj jyuca yaacysa' andy jycaajnity nwēese'jna cyteytyi yu'. Atsa' tyā'wē yūusatyi' andy Tata' peeygāja'c. Atsa' tyā'wē nwēese'jsa yacj yu' nes yu'nja'w Tata yacj. ²⁴Nava andy jycaajnity nwēese'jsame', andya's yaacysameerra tyā'wē yuuna. Na'wē andy caapiya'jnity wēse'ji'cue tyā' andyrráa caapiya'jnimeeta'. Andy Tata caapiya'jnita'.

²⁵I'cue'sh yacj nee ūsfi na'wē pta'shitstju. ²⁶Nava Dyus Espiritu's Tata' cajana andy na'wēy i'cue'shtyi pu'chna ūscajn tyā' jyuca caapiya'jana. Sa' na'wē quijva pta'shtju tyāatyi'sa' jyuca caayaquil'jana.

²⁷I'cue'sh ūuste wēt yajcyna fi'nzewa'ja's peesutstju. Naa quiwete wēt fi'nzewa'ja's nasa ūsu'ty tyā'wēsarrá's peesutsmeetj. Andy ma'wētca ūuste wētrráa yajcyna fi'nze' tyā's i'cue'shtyi peesutstju. Tyāa pa'ga fiicājna ūucjmée meswe. ²⁸U'jrra qui' shawendu'nja i'cue'sh yacj ūsya' jini's wēse'jyā'ji'cue na', andyna isa wendydijrra', wechwecha yaaquine'cue, tyāa pa'gatey andyte jytjaacuesa andy Tata tashna u'juetstju naa pa'ga. ²⁹Dyicjēy pta'shitstju, cyaj andy pta'shni cytey yuuna pa'tje', isa yuj pta'shi'ga sūjune'cue.

³⁰I'cue'sh yacj jwee yu' we'wena ũsya' ājame'nja, tyāa pa'gatey naa quiwete jycaajna ũssa echtjē'ja' andya's quījva yūuya' ājane'ljmeerrava, yuja'. ³¹Macue ājane'ljmeerrava cytey yuuna, cyaj naa quiwete nasa jyucaysa jiyutyna, andy Tata's nwēese'jrra tyajy jycaajni's cytey yuusateva. Tyā'jīna jyā'jrra', quiterrra ayjyu u'juega jīc.

Maava Jesus yacj tyutemée fi'nzewa'j

15 ¹Andyíi ũ'tash na'wēsaj, atsa' andy Tata' tyāa tasha's pjeu'jsa na'wēsa'. ²Cu'ta yūnsameetyi' spē'tje'c, nava cu'ta yūnsatyí' sūupi'jna pjeu'ju'c jytjaacue yūncajn. ³I'cue'sha' pjeu'jniyā'j ũsi'cue andy caapiya'jni's nwēese'pja'ga. ⁴Andy yacj tyutemée meswe, andyva ma'wē i'cue'sh yacj tyutemée ũstca tyā'wēy. I'cue'sha' peecy jii i'cue: cu'ta chpitterra ũssa' yūnu'tsme'. Tyā'wēy i'cue'shva andy yacj tyuteerra ũsrra', Dyus dyi'pte selpiiya' ājameene'cue.

⁵Andya' ũ'tash na'wēsaj atsa' i'cue'sha' ũ'tash cu'ta na'wēsa i'cue. Andy yacj tyutemée ũsrra', wala selpiine'cue. Atsa' andyva i'cue'sh yacj tyutemée fi'nze'nja. Andy yacjmée yu', i'cue'sha' quīj yujva yūuya' ājameene'cue. ⁶Atsa' ũ'tash cu'ta yūnsameetyi' ma'wēga spēetjē'tjrra ya'cambu', tyā'wēy ya'yuuna andy tashu tyutesatyí'.

⁷I'cue'sha' andy yacj tyutemée fi'nzerra andy caapiya'jni's pechcanameerra', quījva pēyine'cue, atsa' ya'ūsuna. ⁸Andy caapiya'jni's nwēese'jrra' Dyus dyi'pte wala selpiiya' ājane'cue. Atsa' tyā'wē yūute', andy Tata's wala tuutje'jni yuuna. ⁹Andy Tata' andya's wala peeygāja'c, atsa' andya' tyā'wēytju i'cue'shtyi peeygāja'. Atsa' andy peeygāanijū tyutemée meswe. ¹⁰Andy jycaajniy nwēese'jrra', andy peeygāaniterrāa fi'nzene'cue, andyva ma'wētca Tata jycaajniy nwēese'jrra' tyajy peeygāaniterrāa fi'nze' tyā'wēy.

¹¹Na'wētj pta'sh cyaj andy ma'wētca wechwecha yajcyna fi'nze', i'cue'shva tyā'wēy bagachva wechwecha yajcyna fi'nzene'cue. ¹²Andya' na'wētj jycaaja': andy ma'wētca i'cue'shtyi peeygāja', i'cue'shva tyā'wēy puuty ya'peeygājna mfi'nzewe. ¹³Namicu's nwe'weya' sūjrra peecy ityi fi'nzeni's iviitunisarrāa peeygāani yaase'. ¹⁴I'cue'sha' isa andy namicu dyijrra', andy jycaajni's cytey yuune'cue. ¹⁵Atsa' tyā'wē yūusatyi' peena yu' selpisāa jīna cysusme'nja. Selpisā' tyajy patron quīj yuuya'vateva jiiméec fi'nze'. Nava i'cue'sha' andy Tata we'wenityi' jyuca jii i'cue, tyāa pa'ga andyna selpisāa i'cue jīna cysusmée, andy namicu i'cue jīnarrāa cysusu'nja. ¹⁶I'cue'sh cjuē'y andya's tyjityjmee'cue, wejyva andytju i'cue'shtyi tyjityj. Sa' i'cue'sh mteeva u'jrra Dyus dyi'pte selpiina fi'nzecaajtju neewe'we', atsa' i'cue'sh tyā'wē Dyus dyi'pte selpiina u'juni' cyul yuumeena. Tyā'wē yūusatyi' andy Tata' jyuca ũsuna quīj pējyteva, andya's pi'cyrra pējyte'. ¹⁷Na'wē yūuwa'ja'stju i'cue'shtyi jycaaja': Puuty ya'peeygājna mfi'nzewe.

Jesus tyjitynisatyí' naa quiwetewe'sh atseni

¹⁸ Naa quiwetewe'sha' andya's nyafycjětyty ajtse na' i'cue'shtyiva tyā'wěyrráa atsetyna, nava ñusmée meswe. ¹⁹ I'cue'sha' naa quiwetewe'shvatsa', nasa' wendyityna, tyāawe'sh pwe'sh ma'wēta wendyi' tyā'wěy. Nava andya' i'cue'shtyí tyjitytju naa quiwejū, tyāa pa'gaty naa quiwetewe'sha' i'cue'shtyí atse', naa quiwetewe'shmée yā'ji'cue naa pa'ga. ²⁰ Miiyajcywe andy na'jina we'weni's: Maava selpisá' tyajy patronte jytjaacuesame' jini's. Andya' i'cue'shtyí jype'jsatj na's yujva icjya' pacue'ty na' i'cue'shtyiva tyā'wěyrráa icjya' pacueetyna. Sa' andy caapiya'jni's nwēese'jsa', i'cue'sh caapiya'jni'sva nwēese'jetyna. ²¹ Andy pa'garráa i'cue'shtyí pcyuutyna, andyna caajsa's jiyumeerra.

²² Dyus jycaajni's andy pta'shya' quijmeevatsa', tyāawe'sha' yuuwemeesa yuutyna. Nava āchja' andy pta'shni's jiyuty na' yuuwemeetja'w jiya' ājameetyna. ²³ Andyna atsesa' andy Tatanava atsesata'. ²⁴ Tyāawe'sh cshavysu quim yujva vit-ya' ājanimeesa's andy caavya'ja'jmeevatsa', yuuwemeesa yuutyna. Nava macue tyā'wē andy ājani's caavya'ja'tje uyrrava, andyna atse'ty. Atsa' andyna atsesayā'j yu' andy Tatanava atsesata'. ²⁵ Nava tyāawe'sh leyte na'wē fil'ni ūsa': andyna ajtsety quijva yuuwemeeteva ji'c tyā' cytey yuucajntyí tyā'wē yū'.

²⁶ Nava i'cue'shtyí pu'chwa'jsa Dyus Espiritu isa ew caajiyu'l'jwa'jsa's andy Tata tashu caja'nja tyā' andy quimteva ew caajiyu'l'juna. ²⁷ Atsa' i'cue'shva tyā'wěy andy quimteva pta'shine'cue, i'cue'sha' nyaffi i'cue andy yacj ūssa yu' naa pa'ga.

16 ¹ I'cue'shtyí pcyuute', ñusna wala cuj yaacycajmen na'wē pta'shitstju: ² ajtserra judiuwe'sh pcjaacjenijū cutyil'jrra peena yu' jypa'gameetyna i'cue'shtyí. Sa' tyā'wěrráa yūumée i'cue'sh maafityí' icjetyna, nava tyāawe'sh yu' Dyusa's selpiina ūstja'w sūjna tyā'wē yūutyna. ³ Tyāa atsesawe'sha' andy Tata's jiimeeta', sa' andynava jiimeeta', tyāasa tyā'wē pcyuutyna. ⁴ Atsa' cyajtj yatscjěy tyā'wē pta'shi' na' tyā'wē yūuwal'j en ājte', andy pta'shni's yaaquine'cue.

Dyus Espiritu caajiyu'jni

Tyā'wē pcyuual'ja's nyaffi yu' pta'shmeetj, tyāa pa'gately quijva meec yu' andy i'cue'sh yacj ūste'. ⁵ Nava āchja' andyna caajsa tashte ul'juetstju. Nava i'cue'sha' maa yujva pēyil'tsmeei'cue ħmtee ul'juetsnga? jina. ⁶ Tyā'wē pějymeerra i'neerráa i'cue wala ñusu', andy ul'juetstju jina pta'shte'. ⁷ Nava isatj pta'shi': andy ul'jmeete', i'cue'shtyí pu'chwa'jsa' quijmeena. Nava andy ul'jrra, tyā's caja'nja. Tyāa pa'ga pejca ul'jwa'j yuj ji'ptju, i'cue'shtyí pu'chwa'jsa's caajya'. ⁸ Atsa' tyā' naa quiwete quijrra', nasaty Dyus dyi'pte yuuwe pcalsa yujtja'w sūjwa'ja's caaūsusutje'jena. Sa' Jesusa' quijte yujva yuuwemée ewsa maatyva jyuca nwe'wewa'jsa yuj yu'ga sūjwa'ja'sva ew caajiyu'l'juna. Tyā'wěy yuuwesatyí' Dyusa' ewmeete yuj nviituna sūjwa'ja'sva caaūsusutje'jena. ⁹ Maava andya's jypa'gaya' wa'lpa'ga tyā'wē pcal yuuwesata'. ¹⁰ Andya' maatyva jyuca

nwe'wewa'jsarraíi nwe'wewa'ja's vitna uurra andy Tata tashna u'tje!, peena yu' uymeene'cue. ¹¹ Sa' yuuwesa' ewmeete neeyũuwa'jsane'tca'w sũjcajnĩi naa quiwete jycaajna ũssa echtjẽl' yuja'sva ewmeete yã'cj nviitni yuu.

¹² I'cue'shtyi wala pta'shwa'j ji'pjĩrráatj, nava áchjĩi yu' ew jiyuya' ájameene'cue. ¹³ Nava Dyus Espiritu quĩjrra', tyãa ente i'cue'shtyi' jyuca ew caajiyu'juna, tyã' isa we'wenisarrá's caajiyu'jsa'. Tyã' peecyrraá we'wemée, Dyus cwe'we'jnĩrrá's pta'shina, sa' quĩj yuuya'vateva dyiicjẽy caajiyu'juna. ¹⁴ Andy ma'wēsateva ew jiia' na' tyãasa i'cue'shtyiva caajiyu'juna, andya's tuutje'jsa' naa pa'ga. ¹⁵ Andy Tata ma'wēsate!, andyva tyã'wēysa írráatj. Tyãa pa'ga Espiritu' andy ma'wēsateva wejy ew caajiyu'juna jĩnatj pta'shi'.

Nuswa'j en scjẽwte', wecha en pa'jni

¹⁶ Áchja' andy Tata tashna u'jwa'j ájãtsa', atsa' andya's uymeene'cue. Nava vite encjẽl' andya's qui' uyuune'cue.

¹⁷ Tyã'jite!, tyãa yacj u'jusawe'sha' na'wěty puuty ya'paapěyi':

—¿Ma'jĩrraqui'c tyã'wē we'we'? Áchja' andy Tata tashna u'jwa'j ájatsa', atsa' andya's uymeene'cue. Nava vite encjẽl' qui' uyuune'cue ji'c sa', ¹⁸ ¿quĩj we'werraqui'c andy u'jwa'j ájatsa' jĩna we'we'? nava cue'sha' jiyu'tsmeetja'w.

¹⁹ Tyã'wē jiyuwēena ũsni's Jesusa' jiyurra' pta'shcu:

—Andy Tata tashna u'jwa'j ájatsa', atsa' andya's uymeene'cue. Nava vite encjẽl' qui' uyuune'cue jĩnatj we'we atsa' ¿tyã'sna vá'cue i'cue'sh pwe'sh jiyu wēena puuty paapěyi'? ²⁰ Isatj we'we!: I'cue'sha' ñusna ũ'nene'cue, atsa' naa quiwete nasa yu' wala wechaatyna. Nava i'cue'sha' macue ñusna ũsrrava, ñusu en scjẽwte', wechwecha neeyũune'cue. ²¹ Na's mjiyuwe: U'yva nasa upyya'vate átsa'atsrra', wala pytjaa yu'c acate. Nava luuch upyte', wechaweete tyãa aca yuuni's pechcana'c. ²² Tyã'wēy i'cue'shva áchjĩi yu' ñusu'i'cue. Nava andya's qui' uyrra', wechwecha yajcyna neeyũune'cue. Atsa' i'cue'sh wechwecha yaacyni's quim yujva cusa'jya' ájameena.

²³ Tyã'wē andya's qui' uyniijũ, tyajũyã'ja' jyuca jiisa andya's paapěywa'j ji'pjumeene'cue. Nava andy Tata yu'sa' quĩjva jyuca pějyja' ájãne'cue andya's pi'cyrra, atsa' tyã' jyuca ũsuna. ²⁴ Nava i'cue'sha' áchj pa'jva andy Tata's quĩj yujva pějnimée i'cue andya's pi'cyrra. Mpějywe vacy, sa' jypa'garra' wala wechaane'cue.

Cristo' quĩjnava jyuca cnayni

²⁵ Ejemplo yacjrráatj caaja'nda'jna pta'sh i'cue'sh jiyucajn. Nava áate pta'shwa'j en ájte!, peena yu' ejemplo yacj caaja'nda'jna pta'shme'nja, wejyva teejwend áaterrarráa pta'shi'nja andy Tata ma'wēsateva. ²⁶ Tyã'wē áate pta'shwa'j en ájte!, i'cue'sh yuu andy Tata's pějyja' ájane'cue, macue andy yu' i'cue'sh pa'gate we'we pu'chmeeteva. ²⁷ I'cue'sha' andya's wendyrta jypa'gai'cue, Dyus tashu yuusana sũjna. Tyãa pa'gac andy Tata' i'cue'shtyi peeygãja'. ²⁸ Andya' Tata tashu casejrra, naa quiwete yuwe'tj, sa' áchja' naa quiwe's nvijtrra qui' u'juetstju andy Tata tashna jite!, ²⁹ tyãa yacj u'jusawe'sha' na'ljity:

—Ächj yuurra' ejemplo yacj caaja'nda'jmée, teejwend äate pta'shna üsngu. ³⁰Ächja' jiyutja'w, indya' quijnava jyuca jiing. Tyäa pa'gatja'w ew jiyu Dyus tashu yuusateva. Tyäasa quim yujva indya's paapëywa'j ji'pjmeeta' jite', ³¹Jesusa':

—¿Ächja' jiyu'cue!? jīnac we'we. ³²Ächja' ena' äjc, atsa' ächjī i'cue'sha' teechea na'wërraj fiifi tyuteene'cue, sa' andyrráana nviitune'cue. Nava andyrráa yu' neeyüume'nja, Tata' andy yacj üsa' naa pa'ga. ³³Tyā'wë'tj andy yacj fi'nzewa'ja's jyuca pta'shi', cyaj andya's neewe'werra', üucjmée wëtwët yaaquine'cue. Naa quiwete' tjëyte ñuste fi'nzewa'ja's ji'pjune'cue. Nava andya's chjächja miijajcywe, tyäa pa'gatey naa quiwete ewmeesa's andya' cnayyā'tj naa pa'ga jīc.

Jesusa' tyajy jype'jnisaty Dyus cusete neewe'weni

17 ¹Jesusa' tyā'wë pta'shna jyā'jrra', cielute pagayrra Dyus yacj puuty we'wec na'jīna:

—Tata, ena' äjc. Iindy Nchi'c quimteva nasa jiyucajn äate mcaavya'ja', cyaj Nchi'cva indya's äate caajiyu'juna nasaty. ²Nasa jyucaysaty jycaajwa'ja's andyna üsngu, iindy üsni yuutyi' jyucaysaty ptsuwa'jmée ityi fi'nzewa'ja's üscajn. ³Atsa' ptsuwa'jmée ityi fi'nzewa'ja's ji'pju wëerra', teeche Dyusrráa üsngu tyā'sna jiyuwa'j ji'pja', sa' tyā'wëy iindy caajnisä Jesucristo'sva jiyuwa'j ji'pja'.

⁴Andya' naa quiwetewe'shtyi' ew caajiyu'tj indy ma'wëstateva, sa' indy mjī caajni's jyā'jyā'tj. ⁵Tata, naa quiwe meetey ma'wë'tca'w cielute ij wechana üsu', ächja' tyā'sa' qui' maj cytey ij wechana üswa'ja's.

⁶Naa quiwejū maafityi' tyjityngu, atsa' tyāawe'shtyi' caajiyu'tj indy ma'wëstateva. Tyāawe'sha' iindy jīity yu', nava andy jype'cjanngu üs, atsa' tyāawe'sha' nwëese'jty iindy jycaajni's. ⁷Sa' na'wë quījquījva yūuya' äja'tj tyāa äjanisa' iindy jycaajnityna sūjwa'ja's ji'pjuty. ⁸Indy yuwe pta'shcaajng tyā'sa' pta'shtju, atsa' tyāawe'sha' jypa'garra üuste yu'acjtyi. Sa' andya' Dyus caajnisä iindy tashuj yuusateva jiita'.

⁹Andya' tyāawe'shtyi' iindy cusetetj nvijtna neewe'we'. Naa quiwete indya's jiimeesa üsta' tyāawe'sh pa'gate neewe'we'tsmeetj. Andy jype'cjan üsngu tyāawe'sh pa'gaterráatj neewe'we', tyāawe'sha' iindy jīita' naa pa'ga. ¹⁰Jyuca andy jī' iindy jīrrarráata'. Atsa' jyuca iindy jī' andy jīrrarráata'. Tyāawe'shpa'ga yuurráatj tyacue wala wechaawa'ja's ji'pju.

¹¹Andya' naa quiwete tyachmeerráa üswa'j ji'pitju. Nava tyāawe'sha' naa quiwete neeyüutyna, naapcachja' andya' yujtj indy yacj üsya'. Tata, andyna üsngu tyāawe'shtyi meen jype'j jypa'yacy, cyaj teechea na'wërraj indy yacj tyutemée fi'nzetyna andyva ma'wë'tca indy yacj tyutemée fi'nze' tyā'wëy. ¹²Andya' naa quiwete tyāawe'sh yacj üsra', indy pu'chte' jypa'yacytju jype'jna fi'nze andya's jype'cjan üsngu tyāawe'shtyi's. Atsa' jyucaysa yu' vitumeeta', naasáa teeche vituwa'jsane' yu' tyāa yuurráac vitu, Dyus libruete pta'shna fi'jni' cytey yuucajn.

¹³Ächja' yujtj indy üsngu cyteey. Nava naa quiwete nee üsī tyā'wë'tj indya's neewe'we', cyaj tyāawe'sha' üucjmée wechana fi'nzetyna, andyva na'wë'tj wechana fi'nze' tyā'wëy. ¹⁴Iindy pta'sh caajni's pta'shtju andy jype'jnisatyi', nava

naa quiwetewe'sha' tyāawe'shtyi atse'ty, andy jype'jnisawe'sha' andy na'wēy naa quiwetewe'shmeeta' naa pa'ga. ¹⁵Andy jype'jnisatyi' naa quiwejū mcuutyi'j jī'tsmeetj, naasáa echtjē'j caypumba'cjamen meen nwe'we jīnarráatj neewe'we'. ¹⁶Andya' naa quiwetewe'shmeetj, atsa' tyāawe'shva naa quiwetewe'shmeeta'. ¹⁷Tyāawe'sha' iindy jīrráa yuucajn indyrráa jype'jene'nga, isasa's caapiya'jna. iindy caapiya'jni' caypumba'jwaljsame'. ¹⁸Indyva ma'wēnga andya'sa' naa quiwete caaj, tyā'wēy tyāawe'shtyiva cajatstju. ¹⁹Sa' tyāawe'sh pa'gate andyva iindy cusete neeyūutstju, cyaj tyāawe'shva iindy jype'jwa'jyā'j neeyūutyna.

²⁰Tyāawe'sh pa'gateráa neewe'wetsmeetj. Tyāawe'sh iindy yuwe's pta'shte', maava indya's jiyuwa'jsa ūstyna tyāawe'sh pa'gate ja'ndatj neewe'we'.

²¹Tyāawe'sh jyucaysa teechsa na'wērrarráa yajcyna cue'sh yacj tyutemée fi'nzecajntju neewe'we', Tata, indyva na'wē andy yacj fi'nzena ūsngu atsa' andyva indy yacj fi'nzena ūstju tyā'wēy yuucajn. Tyā'wē yuurra teechsa na'wērrarráa ij fi'nzetya, cyaj naa quiwetewe'sha' jiyutyna andya' iindy caajnisateva. ²²Indy yacj ij fi'nzewalja's andya's ūsngu atsa' tyāawe'shtyiva indy yacj ij fi'nzewalja's andya' ūstju, andyva indy yacj ma'wētca'w teechrráa na'wē fi'nze' tyā'wēy ij fi'nzecajn. ²³Andya' tyāawe'sh yacj fi'nzete', indyva andy yacj fi'nzene'nga, cyaj tyāawe'sha' teechrráa na'wēsa yuutyna. Atsa' tyā'wē yūute', naa quiwetewe'sha' jiyutyna andya' iindy caajnisateva. Sa' andya's ma'wēnga peeygāja', tyā'wēyngu peeygāja' naawe'shtyiva.

²⁴Tata, andya's jype'cjan ūsngu atsa' tyāawe'shtyi' andy ūsnitey ijtj ūs jytjāasu', naa quiwe meetey andya's peeygājrra wechana jype'jna ūsu'ng tyā'sa' uycajn. ²⁵Tata, indya' wala yuj ewsateva, naa quiwetewe'sha' indya's jiimeeta'. Nava andy yu' jīitj, atsa' andy jype'jnisava jiita' andya' iindy caajnisateva. ²⁶Andy jype'jnisatyi' caajiyu'tj indy quimteva, sa' caajiyu'jna nes yu'nja, cyaj indy andya's peeygāani' tyāawe'sh ūuste nes yuute', andyva tyāawe'sh ūuste nes yu'nja.

Jesusa's preesu'jni

(Mt. 26.47-56; Mr. 14.43-50; Lc. 22.47-53)

18 ¹Jesusa' tyā'wē neewe'wena jyā'jrra', Cedron yu'cuten ctejcana u'cj, tyāa yacj u'jusawe'sh yā'jrra teech walta ūsa' cytee u'caya'. ²Tyāa waltate' Jesus yacj u'jusawe'sha' manz usva tyāa yacj pcjaacjeya' u'casaty yu', naa pa'gac Jesusa's icjcajn ducjwa'jsa Judasa' jii yu'. ³Tyāasac Judasa' jiiyā'jrra', soldauwe'shtyi pe'jrra cytee pa'j u'j dyuus yat tjengsawe'sh yā'jrra. Tyāa dyuus yat tjengsawe'sh yu', sacerdote npiitstjē'j vite' fariseowe'sh jycaajnity yu'. Vite' fytū, vite' cchill, vite' lampara attraty pa'j. ⁴Nava Jesusa' tyā'sna ma'wēva pcyuurra icjwa'j ājte jiiyā'jrra', puuty uyya' casejc. Sa' na'ljīc: —¿Quimnacue pacué'? jīte', ⁵tyāawe'sha' na'wēty pas: —Jesus Nasaretjuwe'sha'stja'w pacué' jīte', Jesusa' na'ljīc: —Andyí tyāatj.

Atsa' Judasva cytee tyāawe'sh yacj ūsu'c, Jesusna cuuwe'jna. ⁶Tyajū' andyítj jīna Jesus we'weniterráa, Jesusa's tundwa'jsa' e'su ya'scarra quiwegaty wete. ⁷Atsa' Jesusa' qui' pējyцу:

—¿Quimnacue pacué'? jīte', tyāawe'sha':

—Jesus Nasaretjuwe'sha'stja'w pacué' jīnaty pas.

⁸Atsa' Jesus pasrra':

—Andyítj jīna pta'shyā'tj. Atsa' andya's pacueetsrra', andy yacj u'jusawe'sh ayte ūsta' tyāawe'shtyi' cuch yuunuwe u'cjan jīc.

⁹Jesusa' nyafii we'werra': Tata andyna jype'cjan ūscu tyā' jyucaysa yu' vitumeeta' tyā'jīni' cytey yuucajncu tyā'jī.

¹⁰Naapcachja' Simon Pedro' cchill ya'cynisa's jycuutyi'jrra teech pitstjē'j tījū'wē patsuwe'sha'scu spē'tj. (Tyāa pitstjē'ja' sacerdote npiitstjē'ja's selpisāa Malco yaasec yu'.) ¹¹Atsa' Jesusa' Pedro's na'jīnac jycaaj:

—Cchilla's vainutey myu'acj. Andy ñuste pytjaa yuuwa'ja'scu Tata' jytjāasu' atsa' tyā'sa' jypa'gawa'jsameena sūju'vá'nga jīc.

Jesusa's Anas tashna jyūna u'jni

(Mt. 26.57-58; Mr. 14.53-54; Lc. 22.54)

¹²Tyajū' soldau npiitstjē'j tyajy nasa yacj vite' dyuus yat tjengsawe'sh yā'jrra Jesusa's tundrra', ¹³Anas tashna cjuē'y jyūna u'jty. Tyāa Anas nduj Caifasa' sacerdote npiitstjē'c'j yu' tyāa añute. ¹⁴Tyāa Caifas'ic judiwe'shtyi na'jīna we'wesa yu': Nasa jyucaysa pa'gate teech pitstjē'jrrāa uuvats wejy ewna jīsac yu'.

Pedro īshiini

(Mt. 26.69-70; Mr. 14.66-68; Lc. 22.55-57)

¹⁵Jesusa's tundrra jyūna u'tje', Simon Pedro' vite pitstjē'jyā'jrra Jesus e'stey u'c'j. Tyāa vite pitstjē'j yu' sacerdote npiitstjē'j yacj jiisac yu', tyāa pa'ga tyāa npiitstjē'jsa yat patyute u'cac Jesus u'canitey. ¹⁶Nava Pedro' u'camée vity pucate neeyūuc. Tyāasac sacerdote npiitstjē'j yacj jiisa' cytee vityte tjengsa yacj puuty we'werra Pedro's dyiite ca'ga'j. ¹⁷Atsa' vityte tjengsa' pējyцу Pedro's:

—Indya' ¿naa pitstjē'j yacj u'jusameengá'? jīte', Pedro pasrra':

—Tyāa yacj u'jusameetj jīc.

¹⁸Tyajū' cytee selpisaawe'sh vite' dyuus yat tjengsawe'sh yā'jrra cumarra ipy yutjrraty bajchna ūsu' patyute. Atsa' Pedrova cytee tyāawe'sh yacj ipy pucate bajchna ūsu'c.

Anas Jesusa's paapēyni

(Mt. 26.59-66; Mr. 14.55-64; Lc. 22.66-71)

¹⁹Tyajū' Anasa' paapējyja' tacjcu Jesusa's:

—Indy yacj u'jusawe'sha' ¿quimtyna? atsa' indya' ¿quī'nga caapiya'ja'? jīte', ²⁰Jesusa' na'jīnac pas:

—Andya' āaterrarráa iwe'wetj nasa jyucaysa dyi'pte, judiuwe'sh pjaacjenisu vite' dyuus yatte judiuwe'sh jyucaysa cshavyte Dyus yuwe's caapiya'jna. Andya' paatste yu' quíjva iipta'shmeetj. ²¹Atsa' andya's ¿quíjya'nga paapëyi'? Andy pta'shni's wëse'jsaty mpaapëjy, atsa' tyāawe'sha' pta'shityna andy quíj we'weni'sva. Tyāawe'sha' andy pta'shni's jiita' na'.

²²Tyā'wë we'wete', dyuus yat tjengsawe'sh teeche cytee üssa' cuseju Jesus dyi'pga pejtyarra', na'wëc juuna' we'we:

—Anasa' sacerdote npiitstjê'ja' ats yuja' ¿tyā'wë pasu'ngá'? jíte', ²³Jesus pasrra':

—Andy ewmée we'wete', mpeeta'sh quíjsu ewmée we'wetsteva. Nawa ewsarrá's we'wetste', ¿ma'wëtenga andya's tyā'wë pcyú'? jīnac pas.

²⁴Tyā'wë yūunijū' Anasa' Jesusa's tundni üsīn, jyūna u'cjaacj sacerdote npiitstjê'j Caifas tashna.

Pedro qui' īshiini

(Mt. 26.71-75; Mr. 14.69-72; Lc. 22.58-62)

²⁵Naapcachja' Pedro' ipy pucate bajchna üsirráac yu'. Atsa' cytee üssawe'sha' na'wëty pëjy:

—Indya' ¿naa pitstjê'j yacj u'jusa yuj meenga vacy? jíte', Pedro':

—Andya' tyāameetj jīnac pas.

²⁶Atsa' sacerdote npiitstjê'ja's selpisáa teeche na'jīnac pëjy:

—Indya's ¿yumeevá'n'tca waltate tyāa yacj üste? (Tyā'jīna pëysa' Pedro teeche pitstjê'j tjū'wë's spë'tjcu tyāa pitstjê'j nwe'shcu yu'.)

²⁷Tyā'jīna qui' pëjyte', Pedro' qui'quin īshijatspcachja', atalla' we'wec.

Jesusa's Pilato tashna jyūna u'jni

(Mt. 27.1-2, 11-14; Mr. 15.1-5; Lc. 23.1-5)

²⁸Tyājū' Caifas yatu Jesusa's jyūna u'jty ne'jue'sh Pilato tashte nuypa'jya'. Naapcachja' cjicjiitscu yu'. Tyājū' judiuwe'sha' ne'jue'sh u'pnite u'cameeta', pcal pëetjeejena sūjrra. Tyā'wë pcal pëetjee'tje', Pascuawe'sha's ū'ya' ājame'nja'w sūjrraty u'camée. ²⁹Tyāa pa'gac Pilato' eca casejrra' na'jīna paapëjy:

—Naa pitstjê'ja' ¿quíjga yuu ats tyā'wë pāatyjī'cjna yujcue? jíte',

³⁰tyāawe'sha' na'wëty pas:

—Quíjva yuuwemeevatsa', iindy tashte nuypa'jwa'jmeene'tca'w yu' jíte', ³¹Pilato' na'jīnac jycaaj:

—Jyūna me'jwe, sa' i'cue'sh ley ma'wë jycaatje', cytey yuune'cue jíte', judiuwe'sha' na'jīnaty we'we:

—Cue'sha' judiuwe'shtja'w na' ¿ma'wë icj caajya' ājacytja'w?

³²Jesusa' ma'wë uuwa'jsarrava pta'shcu tyāa pta'shni' cytey yuucajnty tyā'jīna we'we.

³³Tyājū' Pilato' tyajy u'pnite qui' cūjrra', Jesusa's pa'yarra na'wëc paapëjy:

—¿Indya' judiuwe'shtyi jycaajsavá'nga? jíte', ³⁴Jesusa' na'jīc:



(San Juan 18.29)

—¿lindy ũusuj yajcyrranga tyā'jī'á'? meerra' ¿vitesa tyā'jīna andya's cysuusni's wēse'jrravá'nga tyā'jī'? jīte', ³⁵Pilato' na'wēc pas:

—Andya' judiumeetj. lindy nwe'sh vite' sacerdote npiitstjē'jwe'shtyi andy tashte indya's nuycūj, atsa' indya' ¿quījnga ewmée yūu? jīte', ³⁶Jesusa' pta'shcu:

—Andy jycaajwa'ja' naa quiweteme'. Tyā'wē naa quiwete jycaajwa'jsavatsa', andy ju'ngusawe'sha' puiiwa'jne'ta yu', judiuwe'sh cusete andya's ducjajmen. Atsa' naa quiwete jycaajsameetj.

³⁷Tyā'jīte', Pilato' qui' pējyju:

—Tyā'wērra' ¿indya' jycaajsa dyijngá'? jīte', Jesusa' na'jīc:

—Indy cysusu'ng tyā'wēfītj. Naa quiwete upyrra isasarráana pta'shya'tj yuwé'. Maava isasa's nwēese'jwa'jsa' andy we'weni's jypa'yacytyi wēse'je' jīte', ³⁸Pilato' na'wēc paapējy:

—Na'wē isasa' jīna we'we'ng tyā' ¿quījna?

Jesusa' icjwa'j yuuni

(Mt. 27.15-31; Mr. 15.6-20; Lc. 23.13-25)

Tyā'wē Jesusa's paapējyrra', Pilato' qui' eca casejc judiuwe'shtyi na'jīna pta'shya':

—Naa pitstjē'j ewmée yūuni's quījte yujva uyu'tsmeetj. ³⁹Nava Pascua fiesta iisa teech preesu caatyjweete'je'i'cue na' ¿āchva tyā'wēy tyjweete jytjāasu'cue' naa judiuwe'shtyi jycaajsa's? jīte', ⁴⁰jyucaysa na'jīty:

—Tyā'sa' caatyjweete'jnu. Barabasrrá's mcaatyjweete'j jīnaty weyi'.

Tyāa Barabasa' iiméj jytjaacue pesweesac yu'.

19 ¹Tyajũ' Pilato' Jesusa's jyũna u'jrta pechuucuecaacj. ²Atsa' soldauwe'sha' tsjũtsjna tandy vitrra Jesus dyictjete caaficje'jty, sa' atyj bejsa's caapã'chi'jrraty na'jĩ':

³—¡Viva, judiwe'shtyi jycaajsa! Tyã'jĩrraty dyi'pga petyaatya.

⁴Tyajũ' Pilato' qui' eca casejrta' na'wēc we'we:

—Mtjengwe, naa pitstjẽ'ja' aye ũsa', nava tyã'sa' macue paapẽjyrrava tyajy ewmée yũuni's uymeetj.

⁵Tyã'jĩ yã'tje', Jesusa' casejc dyictjete tsjũtsja's tandyrra caaficje'jni, sa' atyj bejsa's caapã'chi'jni. Atsa' Pilato' na'jĩnac we'we:

—Ãchja' aye ũsa' tyã pitstjẽ'ja's mtjengwe.

⁶Tyã'jĩte', sacerdote npiitstjẽ'jwe'sh vite' dyuus yat tjengsawe'sh Jesusa's tjengrra' na'jĩnaty sus weyya' quiite:

—Cluuste mcaafyutsu'j, cluuste mcaafyutsu'j jĩte', Pilato' na'jĩc:

—I'cue'sh jypa'garra cluuste mfyutswe. Andya' quĩj yujva ewmée yũuni's jiyuya' ajameetj jĩte', 7judiwe'sha' na'jĩnaty we'we:

—Cue'sha' ley ji'ptja'w tyã leya' icjaja'c, Dyus Nchi'ctju jĩna u'jupa'ga.

⁸Tyã'jĩni's wēse'jrta', Pilato' jweeĩrráac wala ũucjwa'j ji'pju. ⁹Sa' tyajy u'pnite u'carra', na'jĩnac Jesusa's paapẽjy:

—Indya' ¿majũwe'shnga? jĩteva, Jesusa' pasme'.

¹⁰Atsa' Pilato' na'jĩc:

—¿Andya's quĩj yuurranga pasu'tsmée? ¿Jiimeevá'nga? andya' cluuste fyutscajn jycaajya'va ajawa'jsatj, sa' tyã'wēy caatyjweete'jya'va ajawa'jsatj jĩte', ¹¹Jesusa' pascu:

—Dyuspa'gameevatsa', indya' quĩjya'yujva ajawa'jsameeng andya's. Nava iindy cusete andya's ducjsa' indyte jytjaacue yuuwesa'.

¹²Tyã'jĩna we'wenijũ' Pilato' wala pa'pchuc Jesusa's tyjweetewẽerra. Nava judiwe'sha' na'jĩnaty sus we'we:

—Naa pitstjẽ'ja's tyjweterra', jycaajsa Cesar namicumée yuune'nga. Maava fiy jycaajsa' tyã' Cesar ju'ngusame'.

¹³Tyã'jĩni's wēse'jrta', Pilato' Jesusa's ecate pe'jna u'jrta', jycaajna u'pnite cachcu. Tyã jycaajna u'pni' Gabata yaasec yu' hebreo yuwete. Tyã' Cuet Fyutsni jĩni'. ¹⁴Pascua fiesta ajatstec tyã'wē yũuna ũsu'. Tyajũ' Pilato' na'wēc we'we judiwe'shtyi:

—I'cue'shtyi jycaajsa' aye ũsa' jĩte', ¹⁵tyãawe'sha' na'wēty sus we'we:

—¡Peecy uuna, cluuste mfyuts! jĩte', Pilato' na'wēc we'we:

—I'cue'shtyi jycaajsa yuja's, ¿ma'wē cluuste fyuts cajuquĩ'tj? jĩte', sacerdote npiitstjẽ'jwe'sha' na'wēty we'we:

—Cue'shtyi jycaajsa' Cesar yuurrá'. Vite jycaajsa yu' ji'pjmeetja'w.

¹⁶Tyã'wē we'we yã'tje', Pilato' Jesusa's tyãawe'sh cusete cluuste fyutscajn ducjte', jyũna u'jty.

Jesusa's cluuscjē fyutsrra icjni
(Mt. 27.32-44; Mr. 15.21-32; Lc. 23.26-43)

¹⁷Jesusa' tyā'sna fyutswa'lj cluusa's yacjrra chjambu casejna u'cj, teeche ajte Gólgota yaase' cytee pa'j. Tyāa Gólgota yu', Uusáa Jycuet Dy'i'tj jīni' hebreo yuwete'. ¹⁸Cytee pa'jrra' Jesusa's cluuste fyutsty, vite e'nz pitstjē'jty tyā'wēy, Jesusa's pyājte tyajrra. ¹⁹Tyājū' Pilato' cluus cajcuete na'wēc qui'p caaj: Jesus Nasaretjuwe'sh, judiuwe'shtyi jycaajsa jīna fi'jni's. ²⁰Atsa' cluuste fyutsni' chjamb utyatec yu', naa pa'ga maanzcuēe judiua tyāa fi'jni's tjengu'ty. Tyāa fi'jni', hebreo, griego, latin yuwejuc fi'jni yu'. ²¹Atsa' sacerdote npiitstjē'jwe'sh vite' judiu npiitstjē'jwe'sha' na'jīnaty Pilato's paatyjī'cj:

—Judiuwe'shtyi Jycaajsa jīna fi'j na'wē, Andya' Judiuwe'shtyi Jycaajsatj jī'c jīna fi'jvatsa', wejy ewna.

²²Nava Pilato pasrra' na'jīc:


—Andy tyā'wē fi'jni's quim yujva yu'ptejmeena.

²³Tyājū' soldauwe'sha' Jesusa's cluuste fyuts yā'jrra', Jesus atjni's pajnzsa tyu'ndendety soldau iisa teecheech. Sa' atya'jsa tyā'wēytyi yūu wēe, nava tyā' teejwendsarrāac yu' catsnimeesa. ²⁴Atsa' soldauwe'sha' na'wēty puuty we'we:

—Tyā's sundeya'mée suerte cajan'ja'w quim jīi neeyūuteva jiyuya'.

Soldauwe'sh tyā'wē yūuni' Dyus libruete na'wē fi'jni cytey yuuc: Andy atjni's tyāawe'sh pwe'sh tyu'ndendety suerte caajrra jīna fi'jni'.

²⁵Tyā'wē yūutspcachja', Jesusa's fyutsni cluus pucate nji'l'jva ūsu'c vite' Jesus nji'l'j yūcue, vite' Cleofas nyu Maria, vite' Maria Magdalena. ²⁶Atsa' Jesus nji'l'j pucate Jesus wendynisa ij ūste Jesus uyrra', nji'l'ja's na'jīc:



(San Juan 19.25)



(San Juan 19.17)

—Naa pitstjê'ja' i'cue's jype'jena nchi'c na'wê jîrra', ²⁷tyāa pitstjê'ja'sva na'jînac neewe'we:

—Na'sa' iindy mama na'wê jype'jene'nga.

Tyā'jîte', tyāa pitstjê'ja' tyāa oratey Jesus nji'ja's tyajy yatna pe'jna u'cj.

Jesus uunîi

(Mt. 27.45-56; Mr. 15.33-41; Lc. 23.44-49)

²⁸Tyāa scjêua', Jesusa' jiic yu' jyuca cytey yuuna u'juetsteva. Sa' Dyus librute ma'wê fi'jni cytey yuucajncu na'jîna we'we:

—Yü'wêetj jîna.

²⁹Teech tasa vino utac üsu'. Atsa' tyāa vinote esponja's tuupja'jrra fytüte atsjrra Jesus yuwete utyaty chanzhacajn. ³⁰Atsa' Jesusa' esponja's chanzharra', na'wêc we'we:

—Jyuca jyā'jnic neeyüu jîna'va, quiitsjuna' uuc.

Teech soldau Jesus tambyte yājani

³¹Atsa' Pascua fiesta en ājats yā'cj yu'. Tyāa ena' wala qui'snisa yu'c. Atsa' judiue'sha' fiesta ente uusaawe'sh cacuety cluuscjê nviit wêemeerra', Pilato's pêjtyti cluuscjê qui'pnisa chindaty chcandendeya' caacjan, dund uute' cacuety tyajü quiisya'. ³²Tyajü' soldauwe'sh u'jrra chindaty chcandendety teehsa cjuê'yna, sa' vitenava tyā'wêytyi yüu Jesus pucacjê cluuscjê u'psa's. ³³Nava Jesusnava tyā'wêy yüuya' utyaana cûjrra', uunii yāl' u'ptety uy. Tyāa pa'gaty Jesus chindaty chcandendemée. ³⁴Tyā'wêteva, teech soldau yu' Jesus tambyte we'tjuc yāja'. Atsa' tyā'wê yājate', ee yu' yacju uwu. ³⁵Tyā'wê yüunisa's pta'shsa' tyajy yafyju yuuc uy, sa' isac we'we'. Sa' jiia' isa we'wetsrrava, cyaj i'cue'shva tyā'wê yuj yüune' sūjwa'ja's ji'pjune'cue. ³⁶Nava Dyus librute' na'wê fi'jni': iindy dyi'tjtyi' teehrrāa yujva chcajndemeetyna jîni cytey yuucajnty tyā'wê yüu. ³⁷Dyus librutey vite ajcjê na'wê fi'jni üsa': We'tju yājarra', tjengutyna jî'c.

Jesusa's pendanî

(Mt. 27.57-61; Mr. 15.42-47; Lc. 23.50-56)

³⁸Tyā'wê yüunijü' Jose yaasesa Arimatea chjambuwe'sha' Pilato tashte utyaac Jesus cacue's pêjyrra jyüna u'lja'. Atsa' Pilato' ewna jîte', Josea' Jesus cacue's pendaaya' jyüna u'cj. Naa Jose yu' Jesus ju'ngsac yu', nava judiue'shtyi üucjrra quimva jiyunimeene' u'ljusa yu'. ³⁹Tyajü' Nicodemova pa'cj, Jesus yacj cus puuty we'wesa. Tyāa yu' treinta kilo ājc yu'tse tû'srra pa'j, mirra aloe yacj ca'ndnisa. ⁴⁰Tyajü' Jose' Nicodemo yacj Jesus cacue's jyüna u'jrra', yaptyi tyāa yu'tse ca'ndnisa yacj, judiue'sh ma'wêne'ta uusāa cacuety pendá' tyā'wêytyi yüu.

⁴¹Jesusna cluuste fyutsni utyasu walta üsu'c. Atsa' tyāa waltate' uusāa pendawa'j cafy u'sesa u'pu'c, quim yujtyva pendanimeesa. ⁴²Tycaaty Jesus cacue's cjicj, cafya' utyatec u'pu' atsa' qui'swa'j enva ājatscu yu' naa pa'ga.

Jesus qui' ityi yuuni

(Mt. 28.1-10; Mr. 16.1-8; Lc. 24.1-12)

20 ¹Qui'sen cjiçjiitste wala cusí chji'ndytesy Maria Magdalena' pendaní cagyte cūjrra', cytee apjni cueta's quisiiniyā'j ūstec uy. ²Tyājū' wuwuurráac u'j Simon Pedro vite' Jesus wendynisa tashte pa'j. Sa' na'jīnac pta'sh:

—Cue'shtyi jype'jsa cacue's jyūna u'jne'ta pendaniijū, atsa' jiyumee'tja'w mcaane'ta cjiç nanva jīte', ³Pedrowe'sha' teejwend pendani cagyte tjengya' u'jty. ⁴E'nzī wuwuurráaty u'j, nava teeçsa' tjaacue dund wuwuurra Pedro's pjyajtssra' tyāa cjuē'y yatste cūjç pendani cagyte. ⁵Sa' cuyrra' Jesus cacue's yapnisarrāa u'ptec uy. Nava tyā'wē uyrrava, dyiite yu' u'came'. ⁶Tyājū' Pedrova e'ste cūjrra pendani cagyte u'cac, sa' tyāava uycu Jesus cacue's yapnisarrāa qui'pni u'pte. ⁷Sa' Jesus dyictjé yapnisa yu' tpejngrra fiite qui'pni u'ptec uy. ⁸Atsa' yatste cūusava cagy dyiite u'carra', tyā'wē tpejngrra qui'pni u'pte uyrra', Jesusa' ityi yuu yujgacy sūjwa'ja's ji'pjuc. ⁹Nava Jesusa' uurra qui' ityi yuuna jīna Dyus librate fi'jni's jiyumeytyi yu'. ¹⁰Tyājū' Pedro Juanwe'sha' tyā'wē uyrra', yatna qui' shawendna u'jty.

Maria Magdalena's Jesus vyaani

(Mr. 16.9-11)

¹¹Pedrowe'sh u'juetspcachja', Maria Magdalena' pendaní cagy pucate ū'nena neeyūuc. Tyā'wē ū'nena u'pfi, cagy dyiiga cuyrra' uycu ¹²e'nz angeleswe'sh chijmerrāa iicāj jyaatjsaty Jesus cacue's cjiçjnite pdyi'p cachrra u'pu', teeçsa' dyictjé ja'ndate vite' chinda ja'ndate.

¹³Tyājū' angeleswe'sha' na'wēty pējy:

—I'cue' ¿quij yūurra ū'nena ūscue? jīte', na'jīnac pas:

—Ū'cue's jype'jsa's jyūna u'tja, atsa' jiimeetj mcaane'ta cjiç nanva.

¹⁴Tyā'wē we'wepu'na' yu'tjengrra', teeç pitstjē'j yujurra ūstec uy. Nava tyā' Jesusna sūjme'. ¹⁵Atsa' Jesusa' na'jīc:

—I'cue' ¿quij yuutecue ū'né'? sa' ¿quimnacue pacué'? jīte', Maria' cytee walta tjengsa vá' tyā'wē we'we' sūjrra', na'wēc pas:

—Indy vá'nga ū'cue's jype'jsa cacue's jyūna u'j na' mpeeta'sh mcaa cjiçjrrava, ū'cue jyūna u'cjan. ¹⁶Tyā'jīte' Jesusa':

—¡Maria! jīnac cysus.

Atsa' Maria tupjirra na'wēc we'we hebreo yuweju:

—¡Raboni! jīc, tyā' Caapiya'jsa jīni'. ¹⁷Tyājū' Jesusa' na'jīc:

—Andya's jya'ndynuwe, Tata tashna u'jmeytju naa pa'ga. Wejyva andy yacjtjē'jwe'shtyi pta'shya' me'jwe na'jīna: Andy Tata' i'cue'sh Tatafirrá', sa' andy Dyusa' i'cue'sh Dyusfirrá' tyajy tashna u'juetstju jīnac pta'shcaaj jīne'cue.

¹⁸Tyā'wē pta'shcaatje', Maria Magdalena' pta'shya' u'cj: Jype'jsa's uytju, atsa' tyāac tyā'jīna pta'shcaaj jīc.

Jesus tyāa yacj u'jusawe'shtyi vyaani
(Mt. 28.16-20; Mr. 16.14-18; Lc. 24.36-49)

¹⁹Tyāa qui'sen entey cusa' Jesus yacj u'jusawe'sha' yatte u'carra vitytyi jyuca apjrraty ūsu', judiuwe'shtyi ūucjrra. Tyā'wē ūspcachja', Jesusa' tyāawe'sh pyājte vyaarra na'jīnac wecha:

—Ūucjmée wēt wētrráa yajcyna meswe.

²⁰Tyā'jīrra', tyajy cuse cpā'ty pta'shcu, tambyte we'tju yājani'sva tyā'wēy. Atsa' tyāawe'sha' Jesusa's uyrra' wala wechwecha yajcytyi.

²¹Tyājū' Jesusa' qui' we'werra na'jīc:

—Ūucjmée wēt wētrráa yajcyna meswe. Andy Tatava ma'wēga andya's caaj tyā'wēy andyva i'cue'shtyi cajattstju.

²²Tyā'jīrra', tyāawe'sh cajcuesu putjcu na'jīna:

—Miipa'gawe Dyus Espiritu's. ²³I'cue'sha' maatyva we'werra': I'cue'sh pcaltyi' Dyusa' peltunaīna jīte', peltunāyni yuutyna. Nava peltunaīmeena jīte', peltunāynimée neeyūutyna jīc.

Jesus ītyi yuuni's Tomas uyni

²⁴Jesus yacj u'jusarrava, Tomas mellisu jīnisa' meec yu' Jesus tyā'wē vyaani ente yu'. ²⁵Atsa' Tomas yu' uymeeteva, Jesus yacj u'jusa vite yu' pta'shtyi:

—Cue'shtyi jype'jsa's uytja'w jīna.

Tyā'wē pta'shteve, Tomasa' na'jīc:

—Cusete claus cpā'vitni's uyrra tyajy tambyte we'tju yājani'sva uyrra tycaa andy cuse's caajmeerra yu', tyā'wē ītyi yuune' sūjme'nja jīc.

²⁶Tyājū' teech qui'su scjēwniite', Jesus yacj u'jusawe'sha' qui' pcjaacjerra ūsu'ty teech yatte. Atsa' tyāa ente' Tomasva tyāawe'sh yacj pcjaacjena ūsu'c. Atsa' macue vitytyi apjrra ūsteve, Jesusa' tyāawe'sh pyājte vyaarrāac yuu, sa' na'jīc:

—Ūucjmée wēt wētrráa yajcyna meswe jīc. ²⁷Tyā'wē we'werra', Tomasa'sva na'jīc:

—Andy cusete cpā'yuunity tjengrra, tycaa iindy cuse's mcuupatj, sa' andy tambyte we'tju yājanigava mcuupatj. Tyā'wē yūurra', cuj jwend yajcymée, ītyi yuu yujga sūjwal'jrrá's ji'pjune'nga jīte', ²⁸Tomasa' na'jīc:

—i'Andyna jype'jsa yujng, sa' andy Dyus yujng!

²⁹Tyājū' Jesusa' na'jīc:

—Tomas, āchja' andya's uyrra', ītyi yuu yujga sūjwal'ja's ji'pjung. Nava andya's uymeerrava tyā'wē ītyi yuu yujne' sūjna yaacysava wechwecha fi'nzewa'jsata' jīnac we'we.

Jesucristo' Dyus Nchi'c yuj yu'c jīna pta'shsa' naa libru'

³⁰Naa quiwete quim yujva ājanimeesaty Jesusa' wala cuj caavya'ja'cj tyāa yacj u'jusawe'shtyi. Nava jyuca yu' naa libroute fi'jnimeeta'. ³¹Nava

Jesucristo' Dyus caajni tyajy Nchi'c yuj yu'ga sūjna jiyurra' tyā'sna jypa'garra', psumée ityi fi'nzewa'ja's ji'pjucajn pta'shna fi'jnisarráata'.

Tiberias ícj pucate Jesus vyaani

21 ¹Jesusa' Tiberias ícj wala pucate qui'quin na'wēc vyaa tyāa yacj u'jusawe'shtyi. ²Cytee pcjaacjerraty ūs yu' Simon Pedro, vite' Tomas mellisu ji'ty tyāa, vite' Natanael Galilea quiwesu Caná chjambtewe'sh, vite' Zebedeo nchi'cwe'sh, vite' e'nzsa. ³Cytee pcjaacjerra ūsrra', Simon Pedro' na'jīnac we'we:

—Wendy uweya' u'juetstju jīte':

—Cue'shva indy yacj yujtja'w jīnaty pas tyāawe'shva.

Sa' teech barcote cjēerra u'jty. Nava tyāa custe' teech wendy yujva uwemeeta'. ⁴Cjicjyna sējetste', Jesusa' ícj pucate vyaac. Nava tyāawe'sha' jiyumeeta' quimteva. ⁵Tyājū' Jesusa' na'jīnac pējy:

—¿Teech wendyrrá' uwecue'? jīte':

—Uwemeetja'w jīna paste', ⁶Jesusa' na'jīnac jycaaj:

—Wendy ucje's patsu ju'ngcē macjwe, sa' uweene'cue jīte', tyā'wēy ucje's acjrra', yu'ju wenzhrrava cutyi'jya' chjāchjameeta', wendy iiméj cuj cjēepa'ga. ⁷Tyā'wē yūuni's uyrra', Jesus yacj u'jusa wendynisa' Pedro's na'jīnac pta'sh:

—¡Naate ūsa' tyā' cue'shtyi jype'jsa'!

Tyā'jīna we'wetspcachja', Pedro' tyā'wē wēse'jna' ropa's jatjna'va yu'cjē cjēec Jesus tashna u'jya'. (Ropa's pajnderrac ūs yu', tyāasac tyā'wē yūu.) ⁸Barcote neeyūsáa vite yu' wendy ucje's wenzhna cūjty, cien metrorráac ūjndyte cūuwa'lj peejy yu' naa pa'ga. ⁹Tyājū' barcoju jysa'jrra', ipy yutjni chjā'chja cajcuela teech wendy pety pan cjicjni ūstety uy. ¹⁰Tyājū' Jesus we'werra':

—Áchj uwenisa wendytyi mneeyūjwe jīte', ¹¹Simon Pedro' barcote cjēena'va wendy ucje's wendy walasarrarráa ji'pjsa's wenzhna cūjc ūjndyte pa'j. Ciento cincuenta y tres wendycu ji'pju'. Cyaanzcuēe wendy ji'pjrrava, ucje' suteme'.

¹²Tyājū' Jesus pa'yarra':

—Ū'ya' myujwe jīc.

Tyā'wē pa'yate', tyāa yacj u'jusawe'sha' jype'jsateva jiyurra', maa yujva: Indya' ¿quimnga? jīna pēyi'tsmeeta'. ¹³Atsa' Jesusa' utyaana cūjrra', pana's uwena'va tyāawe'shtyi ūsu'scu, wendynava tyā'wēy.

¹⁴Jesus uurra qui' ityi yuunijū naa yacja' tecj us vyaac tyāa yacj u'jusawe'shtyi.

Jesus Pedro's neewe'weni

¹⁵Tyājū' ū'na jyā'jrra', Jesusa' Simon Pedro's pējycu:

—Jonas nchi'c Simon, ¿ayte ūsta' tyāawe'shte jytjaacuenga' andya's wendyi'á'? jīte', Pedro pasrra':

—Indya' peecy jiing andy indya's wendyitsteva jīte', Jesusa' na'wēc neewe'we:

—Tyā'wērra', andy piishacuēty wendyna miipe'j jīc.

¹⁶Tyājū' Jesusa' Pedro's qui' pējycu:



(San Juan 20.15)

—Jonas nchi'c Simon ¿andya's wendyi'ngá'? jíte!, Pedro pasrra!:

—Indya' jiing andy indya's wendytsteva. Tyā'jíte!, Jesusa' na'wēc neewe'we:

—Tyā'wērra!, andy piishaaty sāl'jīna miipe'l' jīc.

¹⁷Tecj usva qui' pējycu Jesusa!:

—Jonas nchi'c Simon, ¿andya's wendyi'ngá'? Atsa! Pedro' wala ñuscu tyā'wē tecj us ¿andya's wendyi'ngá'? jīna pējyte!. Sa' na'jīc:

—Indya' jyuca jiing andy indya's wendytsteva jíte!, Jesusa' na'jīnac neewe'we:

—Tyā'wērra! andy piishaaty jypa'yacy miipe'l'. ¹⁸Isatj we'we!, nyaffi pitstacyteya' ropa's peequí jatje'ng, sa' mtee u'l' wēerrava u'jue'ng. Nava iish yā'tje!, vitesa' indya's tundrra jyūna u'juetyna indy u'l' wēemeeteva.

¹⁹Jesusa' tyā'wē we'werra!, Pedro ma'wē yūuni uurra Dyusa's āate caavya'ja'l'jwa'ja's pta'shnac tyā'jī.

Tyajū! Jesus we'werra':

—Andy yacj myujrráa jīnac pi'cy.

Jesus yacj u'jusa wendynisa

²⁰Pedro' yu'tjengrra' uycu Jesus wendynisa's. Tyāa wendynisaíi nmej cus ũ'wetste', Jesus pucate cachrra u'prra' na'jīnac pēysa yu': Jype'jsa ¿quim indya's ducjwa'jsana? jīna. ²¹Tyā'sna Pedro uyrra', na'jīnac Jesusa's pējy:

—Jype'jsa, naa pitstjē'ja's ¿quij yuucy? jīte', ²²Jesusa' na'wēc pas:

—Andy jytjāaste' naa pitstjē'ja' uumée u'juma'c andy shawendna quijpcach, nava tyā'sa' indya' yaacywa'j ji'pjmeeng. Indya' andy yacj fi'nzewa'jrrá's miiyajcy.

²³Jesus tyā'wē we'wepa'ga, tyāa pitstjē'ja' uuwa'jsamée váana sūjnaty ũsu' Jesus yacj u'jusawe'sh vite yu'. Nava uumeena jīrra Jesusa' tyā'wē we'weme', naasáa andy jytjāaste', uumée u'juma'c andy shawendna quijpcach, nava indya' tyā'sa' yaacywa'j ji'pjmeeng jīnarráac we'we.

²⁴Jesus we'werra' tyā'wē uumeena jīna we'wenisa pitstjē'jīrráac pta'shna fi'j, atsa' isasa yuja's we'we'c sūju'tja'w.

²⁵Tyā'wē Jesus quijquijva caavya'ja'jnity jyuca pta'shna fi'jvatsa', naa quiwete libru yuuva cjēemeetyna sūju'tj.

JESUS JYCAAJNISAWE'SH DYUS YUWE'S PTA'SHNI

Dyus Espiritu's caajya' neeyūuni

1 ¹Jesusa' nyafyte quījva caapiya'jna quījquījva ew yūuc cielute tejcapcach tyā'sna, Teofilo, indyna pta'shna andy libru nyafyte fi'tj. ²Tyā' cielun u'ljmey, pitstjē'jwe'shtyi tyjityjcu jycaajya', sa' ma'wērraj yūuwa'ja'sva caapiya'cj Dyus Espiritu pu'chte. ³Sa' uunijū qui' ityi quiiterra', nyaffi na'wēyrrāac pety cacue yā'jrra tyāawe'shtyi vyaana ūsu' cuarenta entepcach. Tyā'wē ityi yuuyujga sūjna ew jiyucajncu tyā'wē vyaana ūsu', sa' Dyus ma'wē jycaajwa'ja'sva pta'shnac ūsu'. ⁴Sa' cielun u'ljya'varra', tyajy tyjityjnisawe'sh yacj nee ūsīi, Jesusa' neewe'wec Jerusalem chjambuj u'ljmée ūscajn na'jīna:

—Mūytjaswe, andy Tata caajya' neeyūuc tyā's jypa'gapcach, andy i'cue'shtyi pta'shtju tyā'sna. ⁵I'cue'sha' jii i'cue Juana' naasāa yu'terrāac acjna bautisa'i. Nava i'cue'sha' Dyus Espiritute yuu bautisāyni yuune'cue jyucaysa ja'ndarra'j tyachmeyna jīnac we'we.

Jesus cielun shawendni

⁶Tyājū' Jesus tyjityjnisawe'sha' tyāa yacj ūsrra', paapējytyi:
—Āchja' indy vāa naa ensu Israelwe'shtyi romanowe'sh cuseju nwe'wewa'jsane'nga jīte', ⁷Jesus pasrra':
—I'cue'sha' jiyuwa'jsamée i'cue Israelwe'shtyi nwe'wewa'j en bagachteva. Dyus cue'sh Tata yuurraa tyā'wē yūuwa'j ena's jīia'. ⁸Nava Dyus Espiritu quījte', tyāa yu's jypa'gawa'jsa yuji'cue, quījteva jyuca ājaya'. Sa' tyā'wē yūunijū casejrra u'juene'cue andya's tuutje'jya' Jerusamente, Judea quiwesu, vite' Samaria quiwesu mtee mtee maa quiweteva jyuca jīnac jycaaj.
⁹Tyā'wē we'wena jyā'jnjū tyachmeyna, tyāawe'sh tjengna ūsiyna Jesusa' ēete quiisnic yuu cielun pe'jna u'ljya'. Naapcachja' tāapj cūjrra apjcu, atsa' peena yu' vyaame'. ¹⁰Tyā'wē Jesusa's cielun pe'jna u'ljuetste', tyāawe'sha' cielute pagayna ūsiyna, e'nz pitstjē'j ropa chijmesa atjrra tyāawe'sh pucatety vyaa. ¹¹Tyā'wē vyaarra', na'wēty we'we:



(Hechos 1.8)

—Galileajuwe'sh, ¿quíj yuupa'ga cielute pagayna üscue? Jesusa' i'cue'sh cshavyuj ma'wē cielun u'juetstecue uy, tyā'wēyrráa qui'quin quiijana tyāaírráa jīnaty pta'sh.

Judas pa'gate Matias tyjityjni

¹² Tyajū' tjā'j Olivos yaasesaju u'jty Jerusalen chjambna shawendna. (Tyāa Olivos vitsa' Jerusalen utyac yu' teech kilometrorráac āj jyu'j neeyū'.)

¹³ Jerusálente pa'jrra', tyāawe'sh paandeeni ēe yatte tejcaty Pedro, Jacobo, Juan, Andres, Felipe, Tomás, Bartolomé, Mateo, Jacobo Alfeo nchi'c, Simon cananista ju'ngusa, vite' Judas Jacobo nyacj tyāawe'shtyi yu'. ¹⁴ Tyāawe'sha' cyteety tajtatey pcjaacje' Dyus yacj puuty we'weya' jyucaysa yacj, Jesus nyacjwe'sh vite' njī'j Maria, tyā'wēy vite u'ywe'sh yā'jrra.

¹⁵ Tyān ensuc Pedro' cytee pcjaacjesawe'sh ciento veinte cshavyte yujurra na'jī:

¹⁶ —Yacjtjē'jwe'sh mjiyuwe: Judas ewmée yūuwa'ja's Davida' fi'cj Dyus Espiritu caaūusutje'jni's Dyus librute tyā' cytey yuūwa'jsa yuj yu'ne'. Tyajīic Judasa' Jesusa's preesu'jwa'jsaty pe'jna cūjrra ducj. ¹⁷ Judasa' cue'sh yacj u'jusac yu', tyāasac cue'sh na'wēy mjīiwa'jsa yu'. ¹⁸ Nava Jesusa's tyweyni vyuju quiwec wey, sa' cyteec tēecjēe dyictjeju sutenus wete, atsa' meetu'ja' jyuca umbuc. ¹⁹ Tyajū' Jerusálentewe'sha' tyā'wē yūuni's jiyurra', tyāa quiwe's Acéldama yasety qui'p, tyāawe'sh yuwete yu' Ee pcawni quiwe jīnic yu'. ²⁰ Judas uuwa'ja's we'werrac Salmo librute na'jī:

Tyāa yatte u'pwa'jsa quim yujva neeyūumeetyna,
Atsa' tyajy yata' namu ji'pjmée peecy neeyūuna jī'c.

Vite ajcǵēva na'wē fil'jni':

Tyajy mjīiwa'ja's vite tee mjīi jīna fil'jni'.

²¹ Tyāa pa'ga cue'sh cshavyte pitstjē'j ūsta' cue'shtyi jype'jsa Jesus macue tyachne' cue'sh yacj ūsu' tyagachjī tyutemēe pi'cyna u'jusa. ²² Tyāawe'sha' Jesusa's Juan bautisāynijūy uyya' tacjrra cielun u'pjcach uysaata' tyāaty teech tyjityjiga, Jesus ītyi yuuni's tuutje'jna cue'sh yacj fi'nzewa'jsa jīc.

²³ Tyajū' e'nztyi pacuerra qui'p, José Barsabás yaasesa's tyā'sna írráa Justo jīnaty cysuusu', vite' Matiasna. ²⁴ Sa' na'wēty Dyus yacj puuty we'we:

—Indya' maa maa nasa ūs yaacyni'sva jīing. Cue'shtyi meen mcjiyu'j naa e'nzsaty maarrajtynga tyjityj, ²⁵ Judas pa'gatewe'sh, na'wē Judas tyajy mjīia's nvijrra vituc tyajy pcalpa'ga tyāa mjīia's jypa'gawa'jsa jīnaty Dyus yacj puuty we'we.

²⁶ Tyajū' suerte caajty quiim yase casejteva jiyuya', atsa' Matias yasec casej. Tyajūjy Matiasa' oncesawe'sh yacj utyaac pi'cyna u'juya'.

Dyus Espiritu quīini

2 ¹ Pentecostes fiesta en ājte', jyucaysa cyteerrarráaty pcjaacjerra ūsu'. ² Naapcachja' cieluju wejyaa wala na'wē susna quíjrra tyāawe'sh ūsni yatte jyuca utac. ³ Naapcachja' ipy beeni na'wēsaty jyucaysa cajcuesu vyaa. ⁴ Atsa' jyucaysa ja'ndarraj tyāawe'sh ūuste Dyus Espiritu yuurrarráa jyuca cjēete', tyā'sna jypa'garra maa nasa we'weni yuwe'sva we'weya' ājaty, Dyus Espiritu maa yuweju we'wewa'ja's jycaatje' tyāaju.

⁵ Tyān ensu' Dyus jycaajni's nwēese'jsa judiuwe'sh maa maa quiwejúva pa'jrraty ūsu' Jerusalente. ⁶ Tyajū' tyāa seena' susni's wēse'jrra', nasa jyucaysa pcjaacjety. Sa' tyā'wē teechsa na'wērraj tyāawe'sh we'weni yuweju we'weni's jiyurra', wala cuj yajcyna neeyūuty ⁷ ¿Ma'wērraqui'ty tyā'wē yūu? sūjna. Sa' tyāawe'sh pwe'sh na'jīnaty puuty paapēyi':

—Na'wē we'wena ūsta' tyāawe'sha' jyucay ¿Galileajūwe'shmeetyná'? ⁸ Sa' ¿ma'wērrata nasa iisa cue'sh yuweju we'weya' āja'? ⁹ Ayte ūstja'w Partiajūwe'sh, Mediajūwe'sh, Elamjūwe'sh, Mesopotamiajūwe'sh, Judeajūwe'sh, Capadociajūwe'sh, Pontojūwe'sh, Asia quiwejúwe'sh, ¹⁰ Frigia vite' Panfilia quiwejúwe'sh, Egipto vite' Africa Cirene quiwetewe'sh, tyā'wēy Romajūwe'shva ayte ūstja'w. Maafī yu' upyjī judiuwe'shtja'w, atsa' vite' judiumeerrava judiuwe'sh na'wēy Dyus jycaajni's nwēese'jsa ūstja'w. ¹¹ Tyā'wēy Cretajuwe'sh vite' Arabiajuwe'shva ūstja'w. Nava jyucaysa Dyus yuwe zhichcuesa'stja'w wēse'je', cue'sh we'weni yuweju pta'shpa'ga jī'ty. ¹² Tyā'wē yūuni's jyucaysa wala cuj jwend we'wena ūsu'ty na'jīna:

—¿Quij yūuya' tyā'wē yuutsqui? jī'ty. ¹³ Naapcachja' vite yu' atsewe'wena npeevyshijcana na'jī'ty:

—Naawe'sha' vino pus tundyrra tūurra tyā'wē we'wen ūsta' jī'ty.

Pedro nyafyrroj nasaty we'weni

¹⁴Tyaji' Pedro! Jesus jycaajnisawe'sh oncesa yacj yujurra sus we'wena na'jic: —Judeatewe'sh vite! Jerusalentewe'sh i'cue'sha' ew jiyurra neeyüuya' ew mwëese'ljwe andy pta'shya'vatj tyä'sna: ¹⁵Naa pitstjê'ljwe'sha' tüunityna jî'i'cue nava tyä'wë meeta'. Cusi las nueverrá' atsa' ¿ma'wë tüuni yuucytja'w? ¹⁶Na'wë yuuc tyä' Dyus yuwe pta'shsa Joel we'wec tyäac cytey yuu. Tyä' na'jî'c:

¹⁷Dyus we'werra':

Nmej ensu', andy Espiritu's naa quiwete nasa jyucaysaty macueva üsu'nja, Atsa' i'cue'sh nchi'c i'cue'sh niisa tyäawe'sha' andy yuwe's pta'shityna. Naapcachja' pitstacywe'sha' cieluju zhichcuesa vyaani's uyuutyna, Atsa' tjê'jsawe'sha' ewsa csha'utyna.

¹⁸Sa' andya's selpisaawe'shtyi pitstjê'lj ma'c yuu meerra' u'y ma'c yuu nava tyäawe'shtyi andy Espiritu's macueva üsu'nja, andy yuwe's pta'shcajn.

¹⁹Tyaji' cielujü quim yujva uynimeesa zhichcuesa caavya'ja'ja'nja:

Sa' naa quiwete' üucjüucjsa caavya'ja'ja'nja: ee, ipy wala, aaj wala tyä'wësaty.

²⁰Atsa' seca' cus na'wë chji'ndyina, a'teva ee na'wë bej yuuna.

Nava cue'shtyi nwe'wesa quüiwa'lj en zhichcuesa äjmeyna tyä'wë yuuna.

²¹Atsa' maava jyucaysa Dyusa's neewe'wena fi'nzesa' tyäa ente' nwe'weni yuutyna jî'c.

²²Ächja' Israelwe'sh mwëese'ljwe na'jîya'vatj: Jesus Nasaretjüwe'sh Dyus caajnis i'cue'sh cshavysu quijquijva ewsarrarráanac caavya'ja' ätsä'saty nuycatyjina, uusaaty ityi vitna Dyus pu'chte, Jesucristo' tyä'wëc yüu. Tyä'wë yüuni's jiiyäljne'cue. ²³Nava tyä'sa' cluuste fyutsrra icjcajn i'cue'sha' ducji'cue nasa ewmeesa cuset. Tyä'wë uuwa'ja's Dyusne' tyjityjrra nvijt tyäniitey, tyäa pa'ga i'cue tyä'wë yüu. ²⁴Nava Dyusa' qui' ityi vitrra uunü seena' üucjüucjsaju cutyi'cj, tyäa pa'gatey icjsa' bagachteva uuniirráa jil'pjuya' yu' äjawa'jsameec yu' naa pa'ga. ²⁵Jesus uurra qui' ityi yuuwa'ja's Davida' na'jinac pta'sh:

Andyna jype'jsa' bagachte yujva pu'vitumée andy yacj nescu yu'.

Tyä' andy pucate üsa' patsu ju'ngte, quij yujnava üucjajmén andya's nwe'wena.

²⁶Tyäa pa'gac andy üuste tyacue wala wechwecha üusutje', atsa' wechaawa'lj yuurrá'stju we'we'.

Tyäa pa'ga andy cacue' qui' ityi quiiteena süjnarráa scjêwu'nja,

²⁷Tyäa pa'gatey indya' andy üusa's uusaawe'sh üsnite nvijtmeene'nga, Sa' indya's selpisáa cacue'sva suweepcach yu' cjicjmeene'nga.

²⁸Ptsuwa'lmée ityi üswa'tje pa'jwa'ja's caapiya'jng,

Sa' iindy üsnite wechana üswa'ja's yuurráa üsune'nga jina fi'jni'.

²⁹Yacjtjê'ljwe'sh ew mjiyuwe: Na'wë cue'sh yatsgawe'sh David we'wec tyä' peecy uuwa'ja'siirráa tyäl'jî'tsme'. Tyä'wëmeete iirráa David uute' pendaaty, atsa' tyajy cacue' tycaa üsa' pendani ächpcach. ³⁰Nava Davida' Dyus yuwe pta'shsac yu'. Tyäasac jii yu' Dyusa' teech üsya' puuty we'wec tyajy jî'tjewe'sh tyä' Cristoc

yu' David na'wëy jycaajwa'jsa tyã'snac jii yu'. ³¹ Cristo uurra ïtyi quiiteetste uyna üssa na'wëc pta'sh Davida'. Tyãasac na'jĩ: tyajy üusa' uusaawe'sh üsnite neeyüumeena, atsa' tyajy cacue cja'tyva suweemeena. ³² David we'we'c Jesus tyã'snac Dyusa' uunijjüwa qui' ïtyi vit, atsa' cue'sha' jyucaysa uysaatja'w, tyãasa ew jii'tja'w. ³³ Sa' tyãa Jesusiic Dyus pucate patsu ju'ngte cãjpcach pe'jna u'jni yuu. Sa' cyte' Ney üsya' neeyüuc tyajy Espiritu's tyã'sa' jypa'garrac tyãa Espiritu's cue'shtyi macueva üs. Atsa' tyã'si'cue i'cue'sha' jyuca uyna wëse'j. ³⁴ David tyã'wë cielute tejcame', tyajjic Davidiiva na'jĩ':

Dyusa' andyna jype'jsa's na'jĩc:

Andy pucate patsu ju'ngte mcaach,

³⁵ Indyna atsesaty indyrrarrá's nwëese'jwa'ja's vitna jyã'pjcach jic.

³⁶ Israelwe'sh jyucaysa ew mjiyuwe: Naa Jesusa's i'cue'sha' cluuste caafyutsu'ji'cue tyã'snac Dyusa' Cristo jycaajwa'jsa vit.

³⁷ Tyã'jina pta'shte wëse'jrra', üuste wala ñus yajcytyi. Sa' Pedrowe'shtyi pëjytyi:

—Yac'tjê'jwe'sh, ächja' ¿ma'wë yüucytja'w? jite', ³⁸ Pedro pasrra':

—I'cue'sh pcaltyi nvijtrra, Dyus tashte mishawendwe, sa' Jesucristo's üuste jypa'garra yu'teva ya'mbautisäywe, cyaj i'cue'sh pcaltyi peltunäyni yuuna. Tyã'wë yüute!, i'cue'shtyiva Dyusa' tyajy Espiritu's üsuna. ³⁹ Tyãa pa'gatey Dyusa' tyajy Espiritu's üsya' neeyüuc tyã' i'cue'sh jii pety i'cue'sh luuch jii yã'jrra', sa' maanzcuëesa majüwe'shva üstyna Dyus pa'yanisa tyãawe'shva jypa'gatyna jĩ'c.

⁴⁰ Tyã'wë we'wena wala yu'cypejc Pedro' na'jĩna:

—Nasa ewmeesa cshavyte jypumbana fi'nzemée Dyus tashte mutyaawe ewte neeyüuya' jĩnac pta'sh. ⁴¹ Atsa' Pedro pta'shni's nwëese'jrra yu'te ya'bautisäytyi. Tyãa ente' tecj mil äjty Cristo's jypa'ga. ⁴² Sa' Pedrowe'sh caapiya'jni's piyarra', jyucaysa Dyusa's chjächja yajcynaty neeyüu. Sa' tyutemée cyteerrajty pcjaacjena fi'nze!, Dyus yacj puuty we'wena, ü'walja'sva cyteerraj ü'na.

Puuty cyteerraj ewrráa fi'nzeni

⁴³ Tyajü' nasa jyucaysa wala cuj yajcyna üsu'ty, naapcachja' Pedrowe'sha' ätsa'saty nuycatyjina quim yujva äjanimeesa'sva caavya'jal'naty üsu'. ⁴⁴ Jyucaysa Cristo's jypa'gas! tyutemeety cyteerraj fi'nze!, sa' quij jil'pjuni'sva ja'ndarrarráaty puuty peesu'sna fi'nze!. ⁴⁵ Sa' tyãawe'sh jil'pjuni's tyweyrra vyul's cyteerraj pcjajrraty peejiina fi'nzesaty peesu' tyãawe'sh peejini's pu'chna. ⁴⁶ Een isaty dyuus yatte pcjaacje!, sa' ü'walja's yu' yat iisaty pi'qui' üusuj jyuca wechana, ⁴⁷ sa' Dyusnava tyã'wëy wechana. Tyã'wë yüute!, nasa' tyãawe'shtyi' wala ew we'we'ty. Atsa' Dyusa' een isac tyajy luuchtyi' nuypejnana u'jue' ewte neeyüuwaljatsy.

U'juya' äjäsamée dyuus yat vityte catyjini

3 ¹ Teech ente' Pedro Juan yacjtyi dyuus yatte cüjuts yu', cusutste las treste Dyus yacj puuty we'wewa'j orate. ² Cyte' teech pitstjê'j upyjii chinda puuple u'juya' äjasameec u'p yu'. Tyã'sa' een isaty yacjna cüjrra dyuus yat Vity Zhichcuesa jĩnisa pucate qui'pu' cytee nasa u'casaty lmushnu pe'wna

u'pcajn. ³Tyāa puuple' Pedro Juan yacj dyuus yatte u'caya' cūjutste uyrra', Imushnu tjāascu. ⁴Atsa' Pedrowe'sha' tyāa puuple dyi'pte ew tjengrra', Pedro' na'jic:

—Mtjeng cue'shtyi jīte', ⁵tyāa puuple' ¿quīj peesya'vatyqui? sūjna ewcu tyāawe'sh dyi'pte tjeng. ⁶Atsa' Pedro we'werra':

—Vyu yu' quīj yujva ji'pjmeetj. Nava andy ji'ptju tyā'srrāava peesu'nja: Jesucristo Nasaretjūwe'sh indya's āchjīi nuycatyjina atsa' quiittera ew mneeyūu jīna'va, ⁷Pedro' patsu cusetu uwena' pu'quiscu, atsa' naa dundtey findya' cu'lete', chinda' jyuca ewtyi neeyūu. ⁸Tyājū' tyāa ātsa'sa' ūpjrrac quiite, sa' u'juya' ājarra tyāawe'sh yacjīi dyuus yatte u'cac, ūpjūupjna Dyusna wechana tuutje'jna. ⁹Tyājū' tyāa chinda puuple' tyā'wē ūpjūupjna Dyusna wechana yuute nasa jyucaysa uyrra', cuj yajcyna ūucjtyi. ¹⁰Tyāa nasa' chinda puuple's jiity yu' tyā'wē dyuus yat Vity Zhichcuesa jīnisa pucate cachrra Imushnu tjāasna u'psate.

Dyus yuwe's Pedro pta'shni

¹¹Chinda puuple u'juya' ājasameerrava catyjiyā'jrra', Pedrowe'shtyi uwerra tyjweetemēe u'jute', nasa jyucaysa wala cuj yajcyna Pedrowe'shtyi tjengya' seena' wala cuj pcjaacjety dyuus yat pwa' Salomon jīi jī'ty cytee. ¹²Tyā'wē nasa pcjaacjete', Pedro' na'jic:

—Israelwe'sh, ¿quīj yuupa'gacue i'cue'sha' tyā'wē ūucj we'wena cuj yaaqui'? Naa pitstjē'ja's cue'sh tyā'wē Dyus na'wē nuycatyjirra ew u'juwa'ja's peesutstjas i'cue yajcyna cue'shtyi tjengu'. ¹³Mwēese'jwe: Cue'sh yatsgawe'sh Abraham, Isaac, Jacob tyāawe'sh Dyusa' tyajy Nchi'c Jesusa's cielute seena' jyutjtjesa vitcu na'wē i'cue'sh yu' ajtserra jycaajsa Pilato cusetu ducji'cue. Atsa' Pilato yu' tyjweeteya' yajcyteva, i'cue'sh yu' caatyjweete'jmēe i'cue, ¹⁴wejyva quījva yuuwemeesa', mityjwete jīpcachte, i'cue'sh yu' teech pitstjē'j wala yuuwesa ewmeesarrā's i'cue tyjweete caaj. ¹⁵Tyā'wē yūurra i'cue'sha' Jesus ityi caafi'nze'jwa'jsa yu'sa' quicije'ji'cue. Nava Dyusa' tyā'sa' qui' ityi vitni's cue'sha' uysaatja'w, tyāasa jīitja'w. ¹⁶Tyāasatja'w Jesusa' nuycatyjina sūjrra tyajy yase's cysusna pi'cy, naa pitstjē'j i'cue'sh jiyunisa's nuycatyjicajn. Tyāa Jesus nuycatyjipa'ga yuurraa naa pitstjē'ja' jyuca ew catyjite', i'cue'sh jyucaysa uyna ūsi'cue.

¹⁷Yacjtjē'jwe'sh, tyā'wē yūui'cue nava jiimeerrane'cue tyā'wē yūu sūju'tj, tyā'wēy jycaajsawe'shva jiimeene'ta yu'. ¹⁸Nava i'cue'sh tyā'wē yūuwa'ja's Dyusa' yatstey pta'shcu tyajy yuwee pta'shsawe'shtyi na'jīna: Cristo' wala pytjaa pa'ga yuuna jīna atsa' tyā' cytey yuucajn i'cue tyā'wē icj. ¹⁹Tyā'wē yūupa'ga Dyus tashte shawendrra i'cue'sh pcalpa'ga perdon mpējywe tyāa pcaltyi cūcjni yuuya'. Tyā'wē yūurra' wechana ūswa'j ena's ji'pjune'cue, ²⁰Dyus caajni Cristo Jesus jycaajya' quījte. Tyā' i'cue'shtyi ew yūuwa'jsa' jīnic yu' tyānīi entey. ²¹Āchjīi yu' Jesucristo' cieluterrāa ūswa'jsa', Dyus naa quiwete quījna nasa jyuca pjeu'picach. Nyafy entey Dyus yuwe pta'shsawe'sh tyā'wēy Cristo' naa quiwete jycaajya' quīiwa'jsa' jīna pta'sh naa pa'ga tyā' cytey yuuna. ²²Tyā'wēy Moisesva na'jic: Dyusa' i'cue'sh jīi teech caajya'va' i'cue'sh

ji'tjewe'sh tyajy yuwe's pta'shwa'jsa, andya's ma'wēga caaj tyā'wēy. Tyā's mwēese'jwe, ma'wē jycaatjeva jyuca cytey yuuna. ²³Tyā'wēme!, maava Dyus yuwe pta'shsa's nwēese'jsame!, Israelwe'sh tashuj tyundeni neeyūurra jyucaysa vituwa'tja' jīc.

²⁴Ew mjiyuwe: Dyus yuwe pta'shsa Samuel fi'nzenijūjywe'sh jyucaysaty āchj naa ensu Cristo quiuwa'ja'srrarrāa we'wena pta'sh. ²⁵Atsa' i'cue'sha' Dyus yuwee pta'shsawe'sh ji'ji'cue, sa' tyā'wēy Dyusa' tyāniitey Abrahan yacjva puuty we'wec i'cue'shtyi ew yūuwa'ja's na'jīna: Naa quiwete nasa' jyucaysa bendiciona's jypa'gatyna iindy ji'j pa'gate jīna we'wec tyā'snava jypa'gasai'cue. ²⁶Tyajiic Dyusa' tyajy Nchi'ca's nyafyte' i'cue'sh tashte cjuē'ycu caaj i'cue'shtyi nwe'wecajn, cyaj i'cue'sha' teehsa na'wērraj ewmēe yūuni's nviitcajncu tyā'wē yūu jīc.

Pedro Juan yacj judiu npiitstjē'jwe'sh tashte cuutya'jni

4 ¹Pedro Juan yacj nasaty we'wena ūsiyna, sacerdotewe'sh vite' dyuus yatte tjengsawe'sh npiitstjē'j vite' saduceo tyāawe'sh pa'jty tund-ya'.



(Hechos 4.2)

²Tyā'wē Jesusva ma'wēga ñtyi yuu tyā'wēy uusaawe'shva ñtyi yuuwa'ja' jīna Pedrowe'sha' nasaty caapiya'jna ũste jiyurraty wala ũsachana pa'jrra, ³preesu'jrra carcelte cyuupj cuscuspcach, cusutsyā'cj yu' naa pa'ga. ⁴Nava Pedrowe'sh pta'shni's wēse'jrra Cristo's jypa'gasa yu' seena' wala kuj yu'ty, pitstjē'jrráaty isani cinco miltiyi yu'.

⁵Cuscus encjē' judiuwe'sh npiitstjē'jwe'sh vite' judiu ntjē'jsawe'sh vite' Dyus ley caapiya'jsa ⁶vite' sacerdote npiitstjē'j Anas vite' Caifas, Juan, Alejandro vite' jyucaysa sacerdote npiitstjē'j nwe'shva pcjaacjety Jerusalente. ⁷Sa' Pedrowe'shtyi pe'jya' caajrra tyāawe'sh cshavyte tyajrra paapējtyti:

—¿Quim pu'chtecue na'wē yūuya' āja'? meerrava ¿quimga jycaaj? jīte', ⁸Pedro' tyajy ũste Dyus Espiritu's jyuca jil'p'jrra', na'wēc pas:

—Judiu npiitstjē'jwe'sh, Israel ntjē'jsawe'sh: ⁹I'cue'sha' paapēyi'i'cue cue'sh ma'wē yūurra naa ātsa'sa's nuycatyjiteva jiyuya'. ¹⁰Atsa' i'cue'sh dyi'pte teejwend āate pta'shitstja'w, cyaj Israelwe'sh jyuca jiyutyna. Naa pitstjē'j ayte i'cue'sh dyi'pte ũsa' tyā' Jesucristo Nasaretjūwe'sh nuycatyjini ũsa'. Tyāa Jesucristo's i'cue'sha' cluuste caafyutsu'ji'cue, nava Dyusa' uunijūi qui' ñtyi vitcu. ¹¹Tyāa Jesusa's i'cue'sha' ajtsei'cue yat tyaa'sawe'shva ma'wēta: Naa cueta' selpime' jīrra wāatajiteva tyāafi wejy selpisāa yuu tyā'wēysac yu'. ¹²Quim yujva tyāa na'wēy nasaty nwe'weya' ājawa'jsa yu' meea' naa quiwete, naasāa Dyus caajni Jesus yuurraa cue'shtyi nwe'wewa'jsa' jīc Pedro'.

¹³Pedrowe'sha' quim yacj yujva piyana ũssamēe naasāa Jesus yacj yuurraa piyana ul'jusarrava wej yujva ũucjna shiingmēe we'wete', judiuty jycaajsawe'sh wēse'jrra' cujty yajcy. ¹⁴Tyāapcachja' catyjisa pitstjē'ja' tyāawe'sh yacj ijc ũsu', atsa' ewmēe yūuna ũsi'cue jīya' ājameeta'. ¹⁵Tyajū' Pedrowe'shtyi' eca casej caajty tyāawe'sh pwe'shrrāa puuty we'weya'. ¹⁶Sa' na'wēty puuty we'we:

—¿Quij yūucytja'w naa e'nz pitstjē'jwe'shtyi'? Tyāawe'sha' naa ātsa'sa's tyā'wē nuycatyjini's maa maava Jerusalentewe'sh jyuca jīita', atsa' cue'sha' tyā'wē nuycatyjimeeta' jīya' ājame'nja'w. ¹⁷Nava mtee mteeva nasaty jwee tuutje'cjamen juuna' we'we'nja'w, cyaj peena yu' Jesus caapiya'jni's pta'shmeetya jīrra', ¹⁸Pedrowe'shtyi' qui' pa'yarra, wala juuna' we'wety:

—Āchja' peena yu' bagachte yujva Jesus caapiya'jni's caapiya'jmeene'cue jīte', ¹⁹Pedrowe'sha' na'wēty pas:

—I'cue'sh ũus miijajcywe. ¿I'cue'sh jycaajnirrá's nwēese'jrra', Dyus jycaajni yu'sa' nwēese'jmeete vāa ewna? ²⁰Quijquijva cue'sh yafyju yuu uyna wēse'jna yuuni's wej yujva shuuna' yuuya' ājame'nja'w jīte', ²¹judiuty jycaajsawe'sha' ma'wē yujva caapechucue'jya' ājameerra', juuna' we'werrarrāa caatyjweete'jty. Tyā'wēme', nasa' jyucay Dyusrrāanaty tuutje'jna ũsu' tyā'wē ātsa'sa catyjipa'ga. ²²Tyāa catyjisa' cuarenta añu jytjaacuec jil'p'ju'.

Dyus yuwe's ũucjmēe pta'shwa'ja's pēyni

²³Tyajū' Pedrowe'sha' tyjweetenūi yuurra', ul'ty tyāawe'shtyi pil'cyna ul'jusawe'sh tashna. Cyte pa'jrra', jyuca pta'shtyi judiuty jycaajsawe'sh ma'wē

we'wete tyā'wēy. ²⁴Atsa' tyā'jīni's wēse'jrra', jyucaysa Dyus yacj na'jīnaty puuty we'we:

—Cielu, quiwe, ĩcj wala, cyte quījquījrraj ũstyna tyāaty jyuca vit-sa Dyus, ²⁵na'wēng cwe'we'j indyna selpisáa Davida's:

¿Quīj yuupa'gata vite nasa majūwe'shva tyacue ũsachana suste', nasa' cyulrráava ma'wē yūuwa'ja'sva pacué'?

²⁶Naa quiwete jycaajsa' weechi'ty,

Atsa' chjambte npiitstjē'j pcjaacjerra, Dyusa's ajtserra tyā'wēy Nchi'cnava atse'ty jī'c.

²⁷Tyā'jīni cytey yuuc. Tyāa pa'gaty Herodes vite' Poncio Pilato cytee Israelwe'sh pety vite nasa yā'jrra iindy Nchi'c Jesus quīj pcal yujva ji'pjmeesa's caang tyā'sna ajtserra naa chjambte pcjaacj, ²⁸ma'wē yūuwa'ja'sva indy ma'wēne'nga vitrra nvijt tyānii entey tyā'sa' jyuca cytey yuuya'. ²⁹Nava indya' tyāawe'sh ewmēe yūuya' yaacynijū nwe'werra cue'shtyi meen cchjāachja'j, cyaj iindy yuwe's quījte yujva ũucjmēe pta'shi'nja'w. ³⁰Sa' indy pu'chte', ātsa'satyva nuycatyjirra quījquījva caavva'ja'ja'nja'w iindy Nchi'c Jesusa's pi'cyrra.

³¹Tyā'jīna Dyus yacj puuty we'wena jyā'jatspcachja', tyāawe'sh pcjaacjenite' ejnd u'cj, naapcachja' Dyus Espiritu' tyāawe'sh ũuste cjēete', Dyus yuwe's ũucjmēety pta'shi'.

Tyāawe'sh ji'pjuni's cyteerraj ji'pjuni

³²Cristo's ũuste jypa'gasa' teechsa ma'wē yūuwa'ja's yajcyte', jyucaysa tyā'wērrarráa yūuwa'ja'srráaty yaaqui'. Maa yujva na' andy jī' jīmeety fi'nze'. Quījva ji'pjuni'sa' jyucaysa ja'ndarrarráaty jytyunde'. ³³Jesus jycaajnisawe'sha' jweefírráaty ũucjmēe pta'shi' Jesus uurrava qui' ĩtyi yuuni's, atsa' Dyusa' jyucaysaty wala pu'chji'c. ³⁴Tyāawe'sh cshavyte quim yujva jypeejysameety yu'. Tyā'wē maava tyāawe'sh quiwe vite' yat tyā'wēsaty tyweyrra vyu's jyūna pa'jrra, ³⁵Jesus jycaajnisawe'sh cusetety ducje', atsa' tyāawe'sha' maarraj jypeejyteva tyāawe'shtyi tyundeende'ty. ³⁶Tyān ensu' teech pitstjē'j levita José yaasesa ũsu'c, Chipre quiwete upysa. Atsa' Jesus jycaajnisawe'sha' Bernabé yasety qui'p. Tyāa yase yu', Cviisha'jsa jīni'. ³⁷Tyāa pitstjē'ja' tyajy quiwe's tyweyrra vyu's jyūna pa'jrra Jesus jycaajnisawe'shtyi ducjcu.

Ananiaswe'sh ptam ĩshiini

5 ¹Tyā'wēy Ananiaswe'sh ptamva tyāawe'sh quiwe's tyweytyi. ²Ananiasa' quiwee tyweyni vyu's pyājnráac jyūna u'jrra jyuca ducjetstju jīna Jesus jycaajnisawe'sh cusete nvijt. Tyā'wē ĩshiwa'ja's ptamí puuty we'werraty tyā'wē yūu. ³Atsa' Pedro' na'wēc we'we Ananiasa's: —Echtjē'ja's ¿quījya'nga iindy ũuste ca'gal'na ũsu', tyā'wē quiwee tyweyni vyu's pyājnráa ducjetsrra jyuca ducjetstju jīna Dyus Espiritu's ĩshiicajn? ⁴Quiwe' iindy jīine' yu', atsa' tyweyte' vvyuuva iindy jīine' yu'.

Atsa' ¿quĩjya'nga teejwend isasarrá's pta'shmée ishiiya' yajcy? Cue'shtyirrása ishiiimée, Dyusnava ishiiing jíc. ⁵Tyā'jīni's wēse'jna'va, Ananiasa' uuniic wete. Atsa' tyā'wē yūuni's nasa maava jyuca jiyusa' seena' wala ūucjwa'ja's ji'pjuty. ⁶Tyajū' pitstacywe'sh cūjrra, tyāa uuní cacue's yaprra pendaaya' jyūna u'jty.

⁷Tyā'wē yūuni tecj ora scjēuutspcachja', Ananias nyu Safirava pa'cj, nmi' uuni's jiimée. ⁸Atsa' Pedro' pējycu:

—Mpeeta'shwe, ¿i'cue'sh quiwe's cyanz pa'gaterráa dyij tyweycue'? jīna pējyte', tyāa u'y pasrra':

—Isa, tyā'wēterrāa yuj tyweytja'w jīnac pas.

⁹Tyajū' Pedro' na'jīnac we'we:

—I'cue'sha' ¿quĩjya'cue Dyus Espiritu's ishiiwa'ja's ptamíi puuty we'we'? I'cue nmi'a' tyā'wē ishiiipa'ga uute', tyā'sna pendasáa āchjrráa cūjutsta', sa' i'cuenava jyūna u'juetyna pendaaya' ¹⁰jītspcachja', tyāa u'yva Pedro tashga uuniic wete. Atsa' Ananiasna pendasáa pitstacywe'sh cūjrra, Safirava uuní ūste uyrra', jyūna u'jrra nmi' pucasuy pendaaty. ¹¹Atsa' Dyus yacj fi'nzesawe'sh tyā'wēy vite nasava tyā'wē seena' yūuni's jiyurra', wala ūucjwa'j ji'pjuty.

Quim yujva ājanimeesaty wala caavya'ja'jni

¹²Jesus jycaajnisawe'sha' quim yujva ājānimeesa's quĩjquĩva caavya'ja'jnaty ūsu' chjambte nasaa cshavysu. Sa' Dyus yacj fi'nzesawe'sh tyāawe'sh pwe'sh yu' dyuus yat pwa'tety pcjaacjē' Salomon jīi jī'ty cytee. ¹³Nava Dyus yacjmée fi'nzesa yu' quim yujva tyāawe'sh yacj pcjaacjena utya'tsmeeta', tyā'wē seena' yūute ūucjrra. Nava tyāawe'sha' ecaju yu' Dyus yacj fi'nzesaty wala ewrráa we'wena fi'nze'ty. ¹⁴Tyā'wēteva pitstjē'j pety u'y yā'jrra Cristo's tyāawe'sh ūuste jypa'gasa jwee'írrráaty seena' wala pejnana u'j. ¹⁵Tyājū' ātsa'saty aandaste cutyi'jrra Pedro scjēuwa'jsuty cjicje', cyaj Pedro pshū'ju'nirrá'sva jypa'gasa' catyjityna sūjrraty tyā'wē yū'. ¹⁶Jerusalen peecu'jsuwe'shva nasa seena' wala pa'jty, tyāawe'sh ātsa'saty pe'jrra vite' ech iiyamunisatyva pe'jrra, sa' jyucay nuycatyjinity neeyū'.

Pedro Juanwe'shtyi ajtserra icj wēeni

¹⁷Tyajū' sacerdote npiitstjē'ja' cytee ūssa saduceowe'sh yacj seena' wala ajtserra ¹⁸Jesus jycaajnisawe'shtyi' tundrra carcelte tyajty. ¹⁹Nava Dyus angel cus cūjrra carcel vitya's pjaanderra na'jīrrac eca cutyi'j:

²⁰—Dyus yatna qui' u'jrra nasaty' pta'shine'cue Dyus yacj fi'nzewa'ja's jīte', ²¹wala cusfitey Dyus yatna u'jrra pta'shya' tacjtyi. Naapcachja' sacerdote npiitstjē'j vite' cytee ūssa judiu ntjē'jsawe'sh jyucaysa pcjaacjerra Jesus jycaajnisawe'shtyi' carceluj cutyi'jya' caajty. ²²Atsa' policiawe'sha' carcelte uymeerra', pta'shya' qui' shawendtyi:

²³—Carcel vitya' wala ew apjni ūsa', atsa' cytee tjengsava vityte lajcy méety ūs yu'. Atsa' cue'sh cūjrra vitya's pjaandete', Pedrowe'sha' meety yu' jīty.

²⁴Tyãljĩna pta'shte', sacerdote npiitstjẽ'jwe'sh vite' cytee dyuus yatte tjengsawe'sh npiitstjẽ'j jyucaysa na'wẽty yaaqui': Naa yuwe' ¿ma'wẽ yũuwa'jsacy? sũjutspcachja', ²⁵teech pitstjẽ'j pta'shna cũjc:

—Carcelte ctyaja'ji'cue tyãawe'sha' dyuus yatte yã'j qui' caapiya'jna ũsta' nasaty jĩc.

²⁶Tyajũ' dyuus yatte tjengsawe'sh npiitstjẽ'ja' policia yacj u'jrra jyũna cũjty quĩjva pcyumée, Pedrowe'sh ju'ngusa nasa' ũusacharra cuet wãatatajwe'shte. ²⁷Sa' judiu ntjẽ'jsawe'sh tashte jyũna cũjte', sacerdote npiitstjẽ'ja' na'wẽc pẽjy:

²⁸—Cue'sha' i'cue'shtyi' bagachte yujva peena yu' pta'sh caajmeetja'w Jesus caapiya'jni's. Atsa' i'cue'sha' ¿quĩjcue yuu? Naa Jerusalente mtee mteeva jyuca i'cue'sh caapiya'jni's yuutarra cue'shtyi yuuwesa vit ya'vai'cue Jesus uuni's.

²⁹Tyã'jĩte', Pedrowe'sh pasrra':

—Cue'sha' nasaa jycaajni yuutyi' nwẽese'jwa'j ji'pjmeetja'w, naasáa Dyusrráana nwẽese'jwa'jsatja'w. ³⁰Cue'sh yatsgawe'sh tyãawe'sh Dyusa' Jesusa's qui' ĩtyi vitcu cluuscjẽ a'cyrra i'cue'sh icjni's. ³¹Dyusa' tyã'wẽ yũurra cielute tyajy pucate patsu ju'ngte qui'prra Jycaajwa'jsac vit, cyaj Israelwe'sha' tyãawe'sh pcaltiyi nvjĩrra Dyus tashte shawendte, Jesusa' nwe'wena. ³²Tyã'wẽ yũuni's cue'sha' jiitja'w, atsa' Dyusa' tyajy Espiritu's ũscu tyã'sna nwẽese'jsaty tyãa Espirituva jiia' jĩte', ³³judiu ntjẽ'jsawe'sh jweefĩrráa ũusacharra Pedrowe'shtyi icjya'vaty yu'. ³⁴Nava cytee tyãawe'sh cshavyte teech fariseo Gamaliel yaasesa u'pu'c, Dyus leya's caapiya'jsa wala jyutujtesa. Tyã' Jesus jycaajnisawe'shtyi eca dundte cutyi'cjaa'jrra, ³⁵judiu ntjẽ'jsawe'shtyi na'wẽc we'we yujurra:

—Israelwe'sh, naa pitstjẽ'jwe'shtyi na'wẽ yũuya'vai'cue tyã'sa' mpa'yajcywe. ³⁶I'cue'sha' miyajcywe: teech ente' vyaac teech pitstjẽ'j Teudas yaasesa wala chjãchjasatj jĩna, atsa' tyajy ju'ngu u'jsa cuatrocientos nasaty yu'. Nava tyãa npiitstjẽ'ja's icjnic yuu, atsa' tyajy nasa' jyuca pũshite', tyãa yuwe' ptsuuc. ³⁷Tyã'wẽ yũuni e'su, nasaty etste ãsh ente', teech pitstjẽ'j tyã'wẽy vyaac, Judas Galileajũwe'sh, atsa' tyajy ju'ngusa nasa wala cuj utyaaty. Nava tyãa Judasa's icjte', tyajy ju'ngusava jyuca pũshity. ³⁸Tyãa pa'ga naa pitstjẽ'jwe'shtyi' cuch yuunuwe. Naa yuwe' pitstjẽ'jwe'shrráa we'wenirra yu', quĩjva yũumeeteve ptsuuna. ³⁹Nava Dyus jĩi váana atsa' tyã'sa' i'cue'sha' i'viituya' ajãmeene'cue. Dyus yacj puiisáa yuuya'mée mpa'yajcywe jĩte', ⁴⁰Isa yuj we'wec sũjnaty neeyũu jyucaysa. Tyajũ' Jesus jycaajnisawe'shtyi pa'yarra': Āchja' peena yu' Jesus caapiya'jni's pta'shmeene'cue jĩna we'werra, wala pechujcuerrarráa tyjwetety. ⁴¹Atsa' Jesus jycaajnisawe'sha' judiu ntjẽ'jsawe'sh tashuj wala wechana casejty tyã'wẽ Jesus caapiya'jni's pta'shpa'ga pytjaa yuuwa'ja's ji'pjutja'w sũjna. ⁴²Maa ente yujva shuuna' fi'nzemée een isa Dyus yuwe's caapiya'jna tyã'wẽy Jesucristo ĩtyi yuuni'sva pta'shna pecũjna nestyi yu' yat-su vite' dyuus yatte.

Dyuus yatte tjengwa'jsa siete nasa tyjityjni

6 ¹Tyāa ensu! Cristo's jypa'gasawe'sh wala pejnate!, cytee griego yuweju we'wesawe'sha! judiu yuweju we'wesawe'shtyi ūuscha we'wewa'l uytyi cue'sh ji'l viuda yuutyi! ew sāl'jīmée ūsta! een isa peesni ū'a's jīte!, ²Jesus jycaajnisawe'sh docesa jiyurra!, Cristo's jypa'gasawe'shtyi jyuca pcjacjrra na'ljity: —Dyus yuwe's pta'shmée, sāl'jīwa'jrrá's jytjaacue pa'pchuya' yu! ājāme'nja'w cue'sha!. ³Tyā'wē yūuya'mée i'cue'sh yacj ūssa yacjtjē'jwe'sh siete pitstjē'l mtyjiityjwe, Dyus dyi'pte ew fi'nzesa, Dyus Espiritu's ūuste jypa'gasa, ma'wē yūuwa'ja'sva ew jiisaty. Tyā'wē yuurra tyāawe'shtyi ducje'nja'w sāl'jīna ūswa'l mjīia's. ⁴Atsa' cue'sha! Dyus yuwe's caapiya'jwa'jrrá's tjengu'nja'w, Dyus yacj pu'vitumée puuty we'wena jīte!, jyucaysa tyā'wē yūuwa'ja's yajcytyi. ⁵Sa! Dyus yacj jypumbamée fi'nzesa Estebana'styi tyjityj Dyus Espiritu's ūuste ji'pjsa. Vite! Felipe, Prócoro, Nicanor, Timón, Parmenas, Nicolas Antioquía chjambuwe'sh tyāawe'shtyi tyjityjnisa neeyūu. Tyāa Nicolasa' judiumeerrava judiuwe'sh na'wēy yuuna fi'nzeya! utyasaac yu!. ⁶Tyāa pitstjē'ljty tyjityjrra!, pe'jna u'ljty Jesus jycaajnisawe'sh tashte, atsa' tyāawe'sha' dyictjesu peequinzerra Dyus yacj puuty we'wety tyāawe'sh pa'gate.

⁷Tyājū! Dyus yuwe' walaana u'cj, atsa' Cristo's jypa'gasava Jerusalente seena' wala pejnac, tyāa pa'ga cytee judiuwe'sh sacerdote yujva Jesus caapiya'jni's jypa'gaty wala cujsa.

Estebana's preesu'jni

⁸Atsa' Estebana' Dyus pu'chte!, quim yujva ājanimeesa'sva caavya'ja'jnc fi'nze! tyāa chjambte. ⁹Tyā'wē yūute!, judiu vite quiwejuwe'sh Cirene, Alejandría, Cilicia, Asia tyāa quiwesuwe'sha' Esteban yacj ūuscha we'wena casejty. Tyāawe'sha' carceluj tyjweetenisa tyāawe'sh pwe'shrráa fiity pcjaacjeni yat ji'pju!. ¹⁰Nava tyāawe'sha' pasya! āja'tsmeeta! Estebana' Dyus Espiritu caaūusutje'jni's we'wete!. ¹¹Tyājū! vitety vyu ducjtyi tyā'wē Moisesa's atsewe'wena Dyusnava atse'c jīna īshiina pāatyjī'cjcajn. ¹²Tyā'wē yūurraty caaūuscha'l nasa ecajuwe'sh vite! judiu ntjē'jsawe'sh vite! Dyus leya's caapiya'jsawe'shtyi. Sa! Estebana's tundrra jyūna u'ljty judiu ntjē'jsawe'sh tashte. ¹³Sa! pacuety na'wē īshiina pta'shwa'jsa: Naa pitstjē'ja! een isa dyuus yata's atsewe'wena tyā'wēy Dyus leya'sva atsewe'wena nescu yu!. ¹⁴Jesus Nasaretjūwe'sha' naa dyuus yata's iviiturra, Moises caapiya'jni'sva iviituwa'jsa! jīna caapiya'jni's cue'sha' wēse'tja'w. ¹⁵Tyā'jīna īshiite!, judiu ntjē'jsawe'sh vite! cytee pcjaacjerra ūssa! Esteban dyi'pte tjengrra! Dyus angel na'wētety uy.

Esteban pasni

7 ¹Tyājū! sacerdote npiitstjē'ja! Estebana's pējyuc: —¿Na'wē pta'shi'ty tyā! jyuca isa yujna'? jīte!, ²Estebana' pta'shya' tacjuc:

—Yacjtjêl'jwe'sh, na's mwēese'jwe: Cue'sh Dyus cielutewe'sha' yatsgatjêl'j Abrahana's vyaac Harán quiwete u'pya' u'jme y nee Mesopotamia quiwete ūsiyna. ³Sa' na'wēc jycaaj: lindy quiwe pety iindy nwe'sh jyuca nvijtrra me'l' quiwe ūsya'vatj cytee. ⁴Tyā'jīte', Abrahana' Caldea quiweju casejrra Harán quiwetec u'pya' u'j. Tyajū' Abrahan neya' Harán quiwete uute', Dyusa' Abrahana's pe'l'na yuwe'c naa quiwete āchj ūsi'cue cytee. ⁵Nava Dyusa' Abrahana's naa quiwete nuypa'jrra', quiwe le'chcuērrāa yujva tyagachjī yu' ūsme'. Nava indya's e'surrāava naa quiwe's ūsu'nja, atsa' iindy uute', iindy luuch jīi neeyūuna jīc. Tyān ensu' Abrahana' luuch jī'pjmeeteva tyā'wēc iindy luuch jīi jīna puuty we'we. ⁶Abrahan jī'l' ma'wē fi'nzewa'ja'sva Dyusa' pta'shcu: lindy jī'jwe'sha' vite quiwesu pcyuuna jype'l'ni cuatrocientos año fi'nzetyna. ⁷Tyā'wēteva tyāa pcyuusawe'shtyi' castiga'ī'nja, cyaj iindy jī'ja' tyajū casejrra naa quiwete andya's selpiya' yuwetyna jīc. ⁸Dyusa' Abrahan yacj puuty we'werra', tyāa puuty we'weni's pechcanaya'mée jīrra circuncidāy caacj tyajy luuchtyi'. Tyāa pa'gac Abrahana' tyajy nchi'c Isaac upyjni ocho en ājatspcachja', circuncidāy. Tyā'wēy Isaacva tyajy nchi'c Jacoba's circuncidāy. Atsa' Jacobva tyajy nchi'cwe'sh docesaty tyā'wēyrrarrāac yuu. Tyāa Jacob nchi'cwe'sh tyā'wē Israelwe'sh jī'l' docesa neywe'shta'.

⁹Tyāa Jacob nchi'cwe'sha' nyacj Jose's ajtserra tyweytyi, Egipto quiwen jyūna u'cjan. Nava Dyusa' José yacj tyuteméec ūsu' ūuste fi'nzetsteva nwe'wena. ¹⁰Tyāasac Egiptote jycaajsa Faraon dyi'pte ew fi'nzewa'ja's ūs. Tyā'wē yūute', Faraona' Jose's Egiptote ne'l'jue'sh qui'prra jycaajsa yata's tjengwa'jsac nvijt.

¹¹Tyān ensu' Egipto quiwete jyuca Canaan quiwete yā'jrra wala wēje pa'c'j cyūusu'jwa'jsa, atsa' cue'sh yatsgatjêl'ja' ū'wal'j uymeeta'. ¹²Nava Jacoba' Egipto quiwete scuutyj tyweywal'j ūsa' jīni's jiyurra', tyajy nchi'c cue'sh yatsgawe'shtyi caacj. Tyāa entety nyafyrraj Egipto quiwen u'j. ¹³E'su qui' u'tje', Jose' pta'shcu: Andya' i'cue'sh nyacjtju jīna. Atsa' Egipto quiwete jycaajsa' jiyuc Jose' quiim jī'tjeva. ¹⁴Tyajū' Jose' tyajy ney Jacob pety nwe'sh jyucaysaty yuucacj. Tyāawe'sha' setenta y cinco ājty yu'. ¹⁵Tyā'wē yūupa'gac Jacoba' Egipto quiwen u'pya' u'jrra cytee uu, atsa' cue'sh jī'l' nyafytewe'shva tyāa quiwetee uuty. ¹⁶Nava e'su tyachte', José dyi'tjtyi jyūna yujrra Siquem quiwetety pendāa, Abrahana' Hamor nchi'cwe'shtyi quiwe weycu uusaaty pendawal'j jīrra cytee.

¹⁷Dyusa' Abrahana's quiwe ūswal'j en ājatste', Israelwe'sh Egiptote ūssa wala pejnaty. ¹⁸Naapcachja' Egipto quiwete jycaajwa'jsa' Jose's jiimeesac u'ca. ¹⁹Tyāa jycaajsa' cue'sh yatsgawe'shtyi ajtsena pcyuuya' tacjcu, luuch u'se upysaty ctjengul'mée uucajn. ²⁰Naapcachja' tyāa ensu' Moisesva upycu Dyus peeygāani wala zhichcuesa. Atsa' neywe'sha' yatte tecj a'te jype'l'jty. ²¹Nava jwee yu' jype'l'jya' ājameerra', yu'wala pucaga sūtjte', jycaajsa niisa uyrra', tyāac nuywala tyajy luuch na'wē vitrra. ²²Tyāa

pa'gac Moisesa' quíjteva jyuca caapiya'jni yuu Egipto quiwetewe'sh na'wēy, sa' quíjteva jyutjtesac yu'.

²³ Moisesa' cuarenta añu ji'pjurra', tyajy nwe'sh Israelwe'sh ũsnite tjengya' u'jya' yajcycu. ²⁴ Cytee ũsra uycu teech Egiptotewe'sh tyā'wē Israelwe'sh teechsa's pcyuuna ũste, atsa' Moisesa' ājmeecuesa ju'ngu yuurra Egiptotewe'sha's icjcu. ²⁵ Israelwe'sha' Dyusne' caaj cue'shtyi nwe'weya' sūcjajncu tyā'wē yūu Moisesa', nava tyāawe'sha' tyāa sūjmeeta'. ²⁶ Cuscuscjē' Moisesa' uycu e'nz Israelitawe'sh puina ũste, sa' na'jīnac nwe'we wēe: I'cue'sha' pyacjsai'cue, sa' ¿quíjya'cue pui'? jīte', ²⁷ vite's uyisá' Moisesa's chatyrra na'jīc: ¿Quimga indya's npiitstjē'jsa cue'shtyi nwe'wewa'jsa na'wē vitrra nvijt? ²⁸ Jū'na ma'wēnga Egiptotewe'sha's icj ¿tyā'wēy andynava icje'nja sūjvá'nga? jīte', ²⁹ Moisesa' tyāa quiweju ũpjna u'jrra Madian quiwencu u'j. Cyteec tyajy quiwemeete pa'jrra u'pu', sa' e'nz luuchcu ji'pju.

³⁰ Tyāa quiwete Sinai vits utyasu nasa u'pnimeete cuarenta añu fi'nzetste', tsjūtsj tashte ipy bejnac vyaa. Tyāa pyājte Dyus angela'scu uy. ³¹ Tyā'wē uyrra', Moisesa' cuj yajcyna utyaac ew tjengya'. Naapcachja' Dyus we'weni na'wēc ptjūuse: ³² Andya' iindy yatsgawe'sh Abrahan, Isaac, Jacob tyāawe'sh Dyustju jīte', Moisesa' ũucjna yayarra tjengme'. ³³ Atsa' Dyusa' Moisesa's we'werra': lindy pelgatyi's mpajnde, ayte' quíj pcal yujva ji'pjmeesa ũstju naa pa'ga. ³⁴ Sa' Egiptote andy nasa pytjaa yuuni's uytju, sa' pytjaa we'weni'sva wēse'tj. Tyāasatj yuwē' nwe'weya'. Atsa' andy jycaajni's nwēese'jrra Egipto quiwen u'juene'nga jīc. ³⁵ Israelwe'sha' nyaff' Moisesa's na'jīnaty ajtse: ¿Quimga indya's npiitstjē'jsa cue'shtyi nwe'wewa'jsa na'wē vitrra nvijt? Tyā'jīna ajtseteva, Dyusa' tsjūtsj tashte ipy cshavyuj vyaarra', Moisesa's caacj npiitstjē'jsa na'wē nwe'weya'. ³⁶ Moisescu tyā'wē cue'sh yatsgawe'shtyi Egipto quiwejuj cutyi'lj tyāa quiwete quíjquíjva seena'sa caavya'ja'jrra. Tyā'wēy Ícj Wala Bejsajuva cutyi'cj sa' nasa u'pnimeesu cuarenta añuc tyā'wē quim yujva ājānimeesa's caavya'ja'jna ũsu'. ³⁷ Tyāa Moisesírráac Israelwe'shtyi na'wē pta'sh: I'cue'sh jīl'j teechsa's cutyi'jrra Dyusa' caajya'va' tyajy yuwe's pta'shcajn, na'wēc andynava caaj tyā'wēy. Atsa' tyā'sa' nwēese'jwa'lj ji'pji'cue jīc Moisesa'. ³⁸ Moisescu tyā'wē nasa u'pnimée quiwete ũsu' cue'sh yatsga Israelwe'sh yacj. Sa' Dyus angel yacjva Sinaí vits walate puuty we'werra cue'sh yatsgawe'shtyi pta'shcu. Sa' Dyus jycaajna cuet taplate fi'jnityva jypa'gac cue'shtyi ũsya'.

³⁹ Tyā'wē yūuteva, cue'sh yatsga Israelwe'sha' Moisesa's nwēese'jmée ajtserra, Egipto quiwení shawendya'vaty yu'. ⁴⁰ Tyajū' Aarona's na'wēty we'we: Cue'shtyi pe'jna u'jwa'jsa dyus na'wēsa mpjeu'j. Tyā'wēme' Moises Egipto quiweju cue'shtyi cutyi'jsa quíjne' yuu nava vyaame'. ⁴¹ Tyā'jīrra' tyāawe'sh cuseju claa luuch na'wē pjeu'jrra tyā'snaty wala wechana tajcy icjrra camb. ⁴² Tyā'wē yūute', Dyusa' tyāawe'sh tashuj tyuteec, ēe walasu

estrella ũsta' tyāarráaty neewe'wecajn. Tyā'wē yūuwa'ja's Dyus yuwe pta'shsawe'sh librute na'wē fi'jni':

Israelwe'sha' nasa u'pnimée quiwete cuarenta año ũsrra',
¿andyna wechaya'cue tajcy icjrra cambna ũsu'á'?

43 Wej yujva tyā'wē yūumée andyna wechapcachte,
Naasáa dyus ityimeesa Molocrráanai'cue tyaja',
Tyā'wēy estrella Renfán yaasesa's i'cue neewe'we' i'cue'sh cuseju pjeu'jnisaty.

Tyāa pa'ga i'cue'shtyi naa quiwejū cutyi'jrra Babilonia quiwen caajya'vatj jīna fi'jni'.

44 Cue'sh yatsgawe'sha' nasa u'pnimée quiwete ũsrra', Dyusna wechana ũsni yat ji'pju'ty, Dyusa' ma'wēne' Moisesa's vitcaaj tyā'wēy vitraty ji'pju'. 45 Atsa' tyā'snaty cue'sh yatsgawe'sh Josué yacj yuusa' jypa'garra jyūna yuwé'. Sa' judiu ji'jmée vite nasa ũsni quiwete ca'ga'jrra, David entepcachtyi ji'pju'. Tyāa quiwe's Dyus pu'chte vite nasaty cutyi'jrra tyāawe'shtyi iiyamu. 46 Dyus peeygāanisa Davida' teeche dyuus yat tyaa'jwa'j pjeu'cj cytee Jacob ji'jwe'sh Dyus ũswa'j. 47 Nava tyāa dyuus yata's Salomoncu tyaj. 48 Tyā'wēteva, Dyus cielutewe'sha' pitstjē'jwe'sh tyaa'jni yatte yu' ũswa'jsa yu'tsme'. Tyā'wērra'ic Dyusa' tyajy yuweet pta'shsa's na'wē cwe'we'j:

49 Cielurráa andy jycaajna ũswa'ja',
Atsa' quiwe' andy chinda tyajwa'jrráa vitnisa'.
Tyā'wēte', ¿ma'wē andy ũswa'j yat tyajaqui'cue naa quiwete?
¿Teeche ajte andy jycaasewa'j andy vitnimeesa ũsmañ?

50 Nacue seena' quijquijva ũsta' nava tyā' jyuca andy vitnisarrarráata' jī'c Dyusa'.

51 Tyā'wēteva, Dyus yuwe's i'cue'sh ũuste jypa'gaya' wa'llra tjū'wē's apjrra i'cue fi'nze' Dyusa's jiimée na'wē. Bagachteva Dyus Espiritu's ajtsenarráa ũsi'cue i'cue'sh yatsgawe'sh na'wēy. 52 I'cue'sh yatsgawe'sh ¿maarra' Dyus yuwe pta'shsawe'shtyi pcyuusamée ũstymañ? Teeche yuja' quij pcal yujva ji'pjmeesa jīna pta'shsawe'shtyi icjtyi. Áchja' i'cue'sha' tyāa pcal ji'pjmeesa's ajtserra icji'cue. 53 Dyus angel i'cue'shtyi Dyus leya's ũsteva, nwēese'je'tsmée i'cue jīte', 54 tyāawe'sha' wēse'jrra', qui'tjtyi csuusul'jnaty ũusacha Estebana's.

Estebana's icjni

55 Tyā'wēteva, Estebana' Dyus Espiritu's ũuste jyucac ji'pj yu', sa' cielute pagayrra Dyus u'pni seena' zhichcuesa's uycu, tyā'wēy Jesusva Dyus pucate yujurra ũstec uy. 56 Sa' tyā'wēsa's uyrra' na'jīc:

—Mtjengwe, andya' uyna ũstju cielutewe'sh Dyus Nchi'c Nasa Yuusá' Ney pucate ũsa' jītspcachja', 57 tyāawe'sha' tjū'wēty yaapjrra, sus weyrra jyucaysa Estebana's āapjtyi icjya'. 58 Sa' chjambuj cutyi'jrra Estebana's



(Hechos 7.58)

atsesawe'sha' cuet wāatatajty, tyāawe'sh atyjty teech pitstacy Saulo yaasesa's ctjengu'jrra. ⁵⁹Cuet wāatatajatspcachja', Estebana' na'jīnac Dyus yacj puuty we'we:

—Jesus, andy ūsa's miipa'ga jīna'va, ⁶⁰peejyūcuerra suscu we'we na'jīna:

—Meen peltunaī na'wē yūutsta' tyāawe'shtyi'.

Tyā'wē we'wena'va uuc Estebana'.

Dyus yacj fi'nzesawe'shtyi Saulo ajtserra pacuení

8 ¹Estebana's icjetste', Saulo' wechanac ūsu'.

Isa tyān entety iiméj seena' ajtseya' tacj Dyus yacj fi'nzesa Jerusalentewe'shtyi. Tyā'wē yūute', jyucaysa pūshity Judea quiwesu vite' Samariasu, naasáa Jesus jycaajnisawe'shrráaty neeyūu Jerusamente. ²Estebana's icjte', pendaaya' jyūna u'jty Dyus yacj fi'nzesa yacjtjē'jwe'sh wala ū'nena. ³Naapcachja' Saulo' Dyus yacj fi'nzesawe'shtyi ajtserra yat iisac pacuena u'j tyājū juuna' yuuna cutyi'jrra carcelte ctyaaja'jya' pitstjē'j pety u'y yā'jrra. ⁴Nava Jerusalen chjambu ūpjna u'jsa yu', Dyus yuwe's mteeva iipta'shtyi u'jue'.

Dyus yuwe's Samariate pta'shni

⁵Tyājū' Felipe' Samaria quiwete teech chjambte pa'jrra Cristo' quimteva pta'shcu. ⁶Atsa' cytee nasa pcjaacjesa' Felipe we'weni's wala jypa'yajcy wēse'jty, sa' quim yujva ājānimeesa's caavya'ja'jni'sva uytyi. ⁷Tyā'wē maanzcuēe nasava catyjinity neeyū' tyā'wē tyāawe'sh ūuste ech ewmeesa

sus weyna casejte. Sa' tyā'wēy ēseyā' ājasamée vite' chinda puuple u'juya' ājasameeva catyjity. ⁸Tyā'wē yūute', tyāa chjambte nasa jyucaysa wala wechana ūsu'ty.

⁹Tyāa chjambte' teech dyijyuusāa Simon yaasesa' Samariate nasaty wala caypumba'jna ūsu'c, andya' quījteva jyuca jiisatj jīna. ¹⁰Atsa' tyā'snarrarrāaty nwēese'jna wechana ūsu' luuch ma'c yuu tjē'jsa ma'c yuu nava jyuca na'jīna:

—Naa pitstjē'ja's Dyusne' pu'chji' jī'ty. ¹¹Sa' tyajy jycaajni's jyucaty nwēese'je', tyā'wē tyajy dyijyuuni yacj wala tyachyā'j caypumba'jna ūsu'ne' naa pa'ga. ¹²Nava Felipe' Dyus jycaajwa'ja's pta'shna pa'jrra, Jesucristo' Dyus caajnisa' jīte' jiyurra', pitstjē'j pety u'y yā'jrra yu'te ya'bautisāytyi. ¹³Atsa' tyā'wē tyāa dyijyuusaava Felipe pta'shni's jiyurra', yu'te ya'bautisāyrra Felipe yacj u'ju'c. Sa' tyā'wē quījquījva caavya'ja'tje' tyā'sna uyrra' cujc yajcyna u'ju'.

¹⁴Tyājū' Jesus jycaajnisa Jerusalente ūssa' tyā'wē Samariatewe'shva Dyus yuwe's tyāawe'sh ūuste jypa'garra ya'bautisāytyi jīni's jiyurra', caajty Pedro's Juan yacj. ¹⁵Atsa' cytee tyāawe'sh pa'jrra', Dyus yacj puuty we'wety Dyus yuwe's jypa'gasa Samariatewe'sh pa'gate, Dyus Espiritu's jypa'gacajn. ¹⁶Tyā'wēme', nyaffi yu' Dyus Espiritu's ji'pjmeety yu', naasāa Jesusa'srrāaty jypa'garra yu'te ya'bautisāysa yu'. ¹⁷Tyājū' Pedrowe'sha' tyāawe'sh dyictjesu peequinzerra Dyus yacj puuty we'wete', Dyus Espiritu's jypa'gaty.

¹⁸Atsa' tyā'wē yūuterrāa Dyus Espiritu quījatste uyrra', tyāa dyijyuusāa Simona' vyy ūs wēec ¹⁹na'jīna:

—I'cue'sh tyā'wē ājani's andynava majwe, cyaj andyva dyictjesu peequinzeterrāa maava Dyus Espiritu's jypa'gatyna jīte', ²⁰Pedro pasrra':

—Iindy vyy' indy yacj ja'nda vituna, Dyus peesni's vyy yacjngu wey wēje' naa pa'ga. ²¹Indya' cue'sh na'wēy yuuwa'j yu'sa' le'chcue yujva jypa'gawa'j ji'pjmeeng, Dyus dyi'pte ewmeeng yaaqui' naa pa'ga. ²²Tyā'wē ewmēe yūuwa'jrrā's yaacyni's nvijtrra, Dyusa's mneewe'we. Tyā'wē yūute', peltunaivāana. ²³Tyā'wēme' iindy ūuste iivejch iivejch yaacywa'jrrāana uta ji'pjngu, atsa' tyā'wē yaacynisa' jyuca indya's tundrra ji'pja' jīte', ²⁴Simon pasrra':

—I'cue'sha' andy pa'gate Dyus yacj meen puuty we'wewe. Tyā'wēme', Dyusa' peltunāywe'shmeeta' andya's jīc.

²⁵Tyājū' Jesus jycaajnisawe'sha' Dyus yuwe's pta'shrra tyājū casejty Samaria quiwesu vite' chjambcuēsu Dyus yuwe's pta'shya'. Sa' tyā'wē yūurraty Jerusalenna qui' shawend.

Felipe' Etiopiajuwe'sh yacj puuty we'weni

²⁶Tyāa e'su' Dyus angela' Felipe's na'jīnac jycaaj:

—Ayjyu casejrra me'j Jerusalenu Gasa chjambna u'jni dyi'jsu.

Tyāa dyl'ja' nasa u'pnimeesuc scjēwna ūsu'. ²⁷Tyā'jīte', Felipe' tyāa dyl'tje u'juetsrra' teech pitstjē'j eunuco Etiopía quiwejuwe'sh u'juetstec uy. Tyāa pitstjē'ja' Etiopía quiwete reina Candace tashte vyyu jyaawsac yu'. Sa' Dyusa's wechaya' pal'sac yu' Jerusalente. ²⁸Tyāasac tyajy quiweníi shawendna tyajy u'jni carretillate cachrra Dyus yuwe pta'shsa Isaias libru's lēeyna u'juets yu'. ²⁹Tyajū' Dyus Espiritu' Felipe's we'wec: Carretillate u'jsa's cpajcyya' me'j jīte', ³⁰Felipe utyaana sējrra' Isaias librote na'jīna lēeyni's wēse'jrra' pējycu:

—ǃJiyu'ngá' iindy lēeyni's? jīte', ³¹tyāa pitstjē'ja' na'jīc:



(Hechos 8.29)

—¿Ma'wẽ yũurra jiyuquiti'j? quimva pta'shmeete' jĩrra', Felipe's carretillate tejcarra pucate cachcaacj. ³² Sa' Dyus librute na'wẽ fi'jni'scu lěeyna u'juets yu':

Piishacuẽ na'wẽc icjya' jyũna u'jni yuu.

Piishacuẽva ma'wẽga cjas wacatste' pembe'tsmée, tyã'wěy tyãava pembeeme'.

³³ Ñmeecuesa na'wẽ yuupa'ga, nwe'wenimeec uu,

Atsa' tyajy luuch jĩnisa quim yujva neeyũumeeta'.

Tyã' naa quiwete tyach fi'nzemeyna icjnic yuu naa pa'ga.

³⁴ Tyajũ' tyãa pitstjẽ'j lěeyna u'jsa' pějycu Felipe's:

—Andya's meen peeta'sh, Dyus yuwe pta'shsa ayte we'we'c tyã' ¿quimnaga we'we'? ¿Peecy uuwa'ja's vá' we'we'? meerra' ¿vitesa uuwa'ja's vá' pta'shi'? jĩte', ³⁵ Felipe' tyãa lěeyni's pta'shcu: Na' Jesus uuwa'ja'scu we'we' jĩna. ³⁶ Tyajũ' teech ajte yu'te pa'jrra', tyãa pitstjẽ'j Etiopajuwe'sha' na'jĩc:

—Ayte yu' u'pa' atsa' andya' ãchjĩi ya'bautisãy wěevatsa', ¿ãjãma'tj? jĩte', Felipe' na'jĩc:

³⁷—Indy ũusuj jyuca tyã'wẽ Jesusa' Dyus Nchi'cne' yu' sũjrra yu', ya'bautisãyya' ãjane'nga jĩna pta'shte', tyãa pitstjẽ'j pasrra':

—Jesucristo' Dyus Nchi'c yuj yu'ne' sũju'tj andya' jĩc.

³⁸ Tyajũ' carretilla's cyuujju'jrra, e'nzĩi yu'te quĩjrra Felipe' bautisãycu tyãa Etiopajuwe'sha's. ³⁹ Tyãa yu'ju casejetspcachja', Dyus Espiritu' Felipe's jyũna u'cj, atsa' tyãa Etiopajuwe'sha' peena yu' uymeerrava tyajy dyl'tje wala wětwět wechana u'cj. ⁴⁰ Tyajũ' Felipe' Azoto chjambte pa'jrra', chjamb iisac Dyus yuwe's pta'shna u'j, Cesarea chjambte pa'pjcach.

Saulo' Dyus yacj fi'nzeyã' utyani

(Hch. 22.6-16; 26.12-18)

9 ¹ Naapcachja' Saulo yu' icjwěena nescu yu' Jesusa's nwěese'jsawe'shtyi. Tyãasac sacerdote npiitstjẽ'j tashna u'j, ² carta pějyya' Damasco chjambna u'jrra judiuwe'sh pcjaacjeni yat-su Jesusa's nwěese'jsaty pacuerra' pitstjẽ'j pety u'y tundrra Jerusalenna preesu jyũna u'jya'. ³ Damascote pa'jya' utyaana u'juetspcachja', tyajy dyl'pte uymeenuscu cieluju eena'sa cweetj. ⁴ Atsa' Saulo' weterra' wěse'cj na'wẽ we'weni's:

—Saulo, Saulo, ¿quĩj yũupa'ganga andya's ajtserra pcyuuya' pacué'? jĩte', Saulo' pějycu:

⁵—Indya' ¿quimnga? jĩna. Sa' na'wẽ we'weni'scu wěse'j:

—Andyĩ Jesustju, indy na'wẽ ajtserra pcyuuya' pacue'ng tyãatj. Indya' peequírraa ya'cpã'yuuwa'ja's pacuena ũsngu jĩte', ⁶ Saulo' ũucjnite yayana na'jĩc:

—Indya' ¿quĩjnga yũu jytjãasu' andya's? jĩte', na'wēc pas Jesusa':

—Quiiterra me'j chjambna. Cytee pa'tje ya'pta'shina quĩj yũuwa'ja'sva jĩc.

⁷Tyã'wē yũute', Saulo yacj u'jsa' wala ũucjtyi, tyã'wē puuty we'weteva quimnava uymeerra. ⁸Tyajũ' Saulo' quiiterrava uyya' ājame'. Atsa' pu'quisrra jyũna u'ljty Damascon. ⁹Cyte' tecj en uyya' ājamée, tyã'wēy quĩjva ũ'meec u'pu'.

¹⁰Damascote' Jesusna nwēese'jsa Ananias yaasesac u'pu'. Tyã'sa' Jesus vyaarra na'wēc we'we:

—Ananias jĩna pa'yate', Ananias pasrra':

—¿Quĩj caajya'vanga? jĩte', ¹¹Jesus we'werra':

—Teech cliicjunc Cu'le yaasesate me'j. Cytee pa'jrra Judas yatte pēyine'nga: Teech pitstjē'j Tarsojuwe'sh Saulo yaasesa's peejytju jĩna. Tyāa pitstjē'ja' Dyus yacj puuty we'wena u'pa'. ¹²Sa' teech pitstjē'j Ananias yaasesa pa'jrra qui' uyya' ājacajn tyajy cacuete peequinzeetstec csha'w.

¹³Tyā'ljĩna we'weni's wēse'jrra' Ananiasa' na'jĩc:

—Andya's maava wala iipta'shta' Jerusalente indy yacj fi'nzesawe'shtyi tyã'wē wala pcyuusa' tyāa pitstjē'ja' jĩ'ty. ¹⁴Sa' āchva naa chjambte yuja' sacerdote npiitstjē'jwe'shtyi carta pējyrra indyna yaacysawe'shtyi preesu jyũna u'jya' jĩte', ¹⁵Jesus pasrra':

—Indya' me'jrrāa. Tyāa pitstjē'ja' andy tyjityjnisa' andy yuwe's pta'shwa'jsa nasa vite quiwejuwe'shtyi, jycaajsawe'shtyi, sa' Israelwe'shtyiva pta'shwa'jsa'. ¹⁶Andya' tyāa pitstjē'ja's pta'shi'nja andyna selpiina u'jupa'ga macue pcyuuni yuuwa'ja'sva jĩte', ¹⁷Ananiasa' Saulo u'pni yatna u'jrra', tyajy cacuete peequinzerra na'jĩc:

—Yacjtjē'j Saulo, dyi'tje indy yujte Jesus vyaane' tyāac andya's caaj indy qui' uyya' ājarra Dyus Espiritu's ũuste jyuca jypa'gacajn jĩtspcachja', ¹⁸yafyte apjsa umbute', qui' uyya' ājarra', quiiterra ya'bautisāycu.

¹⁹Tyajũ' ũ'wa'ja's qui' jypa'garra chjāchjac, sa' Damascotee ũsu'c manz enva Jesusa's nwēese'jsawe'sh yacj.

Saulo' Damascote Dyus yuwe's pta'shni

²⁰Tyajũ' Saulo' Dyus yuwe's pta'shya' tacjcu judiuwe'sh pcjaacjeni yatsu Jesusa' Dyus Nchi'ca' jĩna. ²¹Atsa' wēse'jsa jyucay cuj yajcyna na'wēty we'we':

—¿Naa pitstjē'jĩ tyã'wē Jerusalente Jesusa's neewe'wesaty icj wēena fi'nzesameená'? Sa' ¿tyã'wēy aytewe'shtyiva preesu jyũna u'jrra sacerdote npiitstjē'jwe'sh cusete ducjya' sũjrra yuusa yu'tsmeená'? jĩ'ty.

²²Tyā'jĩtsteva Saulo yu' jwee'ĩrrāac chjāchja pta'shi' Jesusa' Dyus tashu yuusa Cristo yuj yu'c jĩna, sa' cytee Damascote judiuwe'shtyi ma'wē paswa'ja's yujva ji'pjmeec nviitu'.

Judiuwe'sh icjya'vateva Saulo iyuni

²³Tyāa e'su tyachte', judiuwe'sha' Saulo's icjya' puuty we'werra ²⁴chjambu casejni vityte en cusva yupna nestyi yuu. Atsa' tyā'wē yūuni's Saulo' jiyuc. ²⁵Atsa' Saulo's pi'cyna u'jusawe'sha' cusrrāa Saulo's canasta walate acjrra chjamb pecu'j upjnicjēty ecaju spajcy atsesa cusejū nwe'weya'.

Jerusalente Saulo pa'jni

²⁶Tyāa e'su' Saulo' Jerusalente pa'jrra', Jesusa's nwēese'jsawe'sh yacj pcjaacje wēc. Nava cyteewe'sh jyucaysa ūcjtji Jesusa's nwēese'jsameevāana sūjrra. ²⁷Tyā'wēteva Bernabé yu' pe'jna u'jrra Jesus jycainisawe'sh tashte nuypa'jrra na'wēc pta'sh:

—Saulo's Jesus vyaac Damasco dyi'tje u'juetste, sa' tyāa yacj puuty we'wec. Atsa' Saulo' Damascote pa'jrra Jesus caapiya'jnirrarrá'scu pta'shna ūsu' jina pta'shte', Saulo's ūcjmée jypa'gaty. ²⁸Atsa' Jerusalente ūsu'c tyāawe'sh yacj pcjaacjena. ²⁹Sa' judiuwe'sh griego yuweju we'wesa yacj ūcjmeecc puuty we'we' Jesus caapiya'jni's pta'shna. Nava tyāawe'sh yu' ajtserra icjya'vaty yu'. ³⁰Atsa' tyā'wē yūuni's yacjtjē'jwe'sh jiyurra', Saulo's pe'jna u'jty Cesarea chjambna. Tyajū Tarso chjambnaty caaj.

³¹Tyajū' Dyus yacj fi'nzesa Judea, Galilea, Samariasuwe'sha' quim yujnava ūcjmée jweefirráaty chjächjana u'j Dyusrrāana nwēese'jna. Atsa' Dyus Espiritu pu'chte', jweefirráaty pejnana u'j.

Eneas catyjini

³²Tyajū' Pedro' yacjtjē'jwe'shtyi Dyus yuwe's pta'shya' casejrra', Lida chjambte Jesusa's nwēese'jsawe'shtyiva tjengya' u'cj. ³³Cyte' teech pitstjē'j Eneas yaasesa ocho añuc ātsa'na ūsu' ēseyā' ājameerra. ³⁴Atsa' Pedro' na'jīc:

—Eneas, indya's Jesucristo nuycatyjina. Atsa' quiittera iindy deeni's mquii jītspcachja', tyāa pitstjē'ja' naa dundtey quiitec. ³⁵Atsa' cytee Lida chjambte vite' Sarón quiwete ūssa jyucaysa uyrra', Jesusa's nwēese'jya' utyaaty.

Dorcas qui' ityi yuuni

³⁶Tyān ensu' Jope chjambte Jesusa's nwēese'jsa teech u'pu'c Tabita yaasesa. Tyā' griego yuwete' Dorcasu yaase yu'. Tyāa u'ya' wala pu'chna fi'nze'c maava peejysaty'. ³⁷Tyāa ensu' Dorcasa' ātsa'rra uuc. Atsa' uuní cacue's cpēul'jrra ēe yatgaty cjicj. ³⁸Pedro ūsni Lida chjamba' Jope chjamb yacj utyac yu'. Atsa' Jope chjambte Jesusa's nwēese'jsawe'sha' Pedro' Lida chjambte ūsa' jīni's jiyurra', e'nz pitstjē'j caajty Pedro's na'wē pta'shya':

—Jytjēeyuume Jope chjambna myuj jīte', ³⁹Pedro tyāawe'sh yacj u'jrra cyte pa'tje', pe'jna u'jty uusāa ūsniga. Atsa' viudawe'sh jyucaysa ū'nena pcjaacjerra pta'shtyi Dorcas nee ityiy cmiisa umrra peesnity.

⁴⁰Tyajū' Pedro' jyucaysaty eca cutyi'jna'va, peejyūcuerra Dyus yacj puuty we'wena'va uusá's tjengrra na'ljīnac we'we:

—Tabita, mquiitewe jītspcachja', tyāa uusá' tjengrra Pedro's uyna'va quiiterra cachcu. ⁴¹Tyajū' Pedro' pu'quisrra cyuujū'jna'va, Dyus yacj fi'nzesawe'sh vite' viudawe'shtyi pa'yarra, ityic ducj. ⁴²Tyā'wē yūuni's Jope chjambtewe'sh jyucaysa jiyurra', wala cujsa Jesusa's nwēese'jya' utyaaty. ⁴³Tyajū' Pedro' Jope chjambte cuj encu ūsu' cja'ty weysáa Simon yatte.

Pedro Cornelio yatte pa'jni

10 ¹Cesarea chjambte teech soldau cpiitan Cornelio yaasesa u'pu'c. Tyā' Italiajuwe'sh soldauty jycaajsac yu'. ²Tyāa pitstjē'ja' Dyusna wechana fi'nzesac yu', tyajy yattewe'sh jyucaysa yā'jrra. Sa' Dyus yacj pu'vituméc puuty we'wena fi'nze', tyā'wēy vyyuwa wala pu'chji'c judiuwe'shtyi. ³Teech ente cusutste las treste' Dyus angel tyajy tashte u'carra na'ljīna we'wetstec uy:

—¡Cornelio! jīna pa'yate', ⁴tyāa pitstjē'ja' wala ūucjna Dyus angela's tjengrra' na'wēc pas:

—¿Quīj pējynga? jīte', Dyus angel we'werra':

—Indya' tyā'wē peejisaaty pu'chna Dyus yacj pu'vitumée puuty we'wena fi'nzeni's Dyusa' wēse'cj. ⁵Atsa' indya' Pedro's pe'jya' mcaaj Jope chjambna. ⁶Tyāa Pedro' cja'ty weysáa Simon yatte paandejna ūsa' ícj wala pucate. Atsa' Pedro pa'jrra pta'shina indy ma'wē yūuwa'ja'sva jīte', ⁷tyāa angel u'juetspcachja' Cornelio' e'nz selpisáa vite' teech soldau Dyus dyi'pte ew fi'nzesa tyāawe'shtyi pa'yarra, ⁸jyuca pta'shna'va Jope chjambna caacj.

⁹Tyāawe'sha' cuscuscjē Jope chjambte utyaana pa'jatspcachja', ēepyāj yuutste' Pedro' tejcac ēe yat pwa'te Dyus yacj puuty we'weya'. ¹⁰Sa' Pedro' wala wēc, atsa' tyajy ū'wa'j pjeu'jutsty yu'. ¹¹Naapcachja' Pedro' uycu cielucjē tela wala na'wēsa puuty vitste tundrra nuyquījatste. ¹²Cyte yu' niimal yu'cj ech, ul, vichacue canzhস্য jyuca āshnisac ji'pju'. ¹³Tyajū' na'wē we'weni'scu wēse'j:

—Pedro, quiiterra naa niimaltyi' icjrra mē' jīte', ¹⁴Pedro pasrra':

—Andya' bagachte yujva na'wē niimal canzhsa yuutyi' ū'wa'jsameetj jīc.

¹⁵Atsa' qui' we'weni wēse'cj:

—Dyus yaatenisatyi' indya' canzhsata' jīwa'j ji'pjmeeng āchja'.

¹⁶Tyā'wē tecj usva vyaarrac, tyāa tela wala na'wēsa' qui' cieluní pu'quisni yuu. ¹⁷¿Quīj yūucajnqui'c tyā'wē vyaa? sūjna Pedro u'ppcachja', Cornelio caajnisal' pa'jty Simon yata's paapējyna. ¹⁸Sa' sustyi pa'yana cūj:

—¿Naa yatte paandeesa Simon Pedro yaasesa ūsmeená'? jīna.

¹⁹Pedro' tyā'wē uyni's ūus yajcyna u'piyna, Dyus Espiritu' we'wec:

—Tecj pitstjē'j indya's paapējyna ūsta'. ²⁰Atsa' quiiterra tyāawe'sh yacj me'j cuj yajcymée. Tyā'wēme', tyāawe'sha' andy caajni yujta' jīte',

²¹Pedro sa'jrra Cornelio caajnisawe'shtyi pējycu:

—¿Mal'jīa'cue yuwé? I'cue'sh pacuenisa' andytju jīte', ²²tyāawe'sha' pta'shtyi:

—Soldau cpiitan Cornelio caajni yujtja'w. Tyāa pitstjē'ja' wala ew zhichcue fi'nze'c Dyusna nwēese'jna, atsa' tyā'sa' judiuwe'sh jyucaysa wala wendyi'ty. Sa' teech ente' Dyus angel vyaarra' indya's pa'yacajn yuwe nvijtga. Cyaj Cornelio' jiyuna quīj pta'shwa'j ji'pjne'nga tyā'sna.

²³ Tyā'jīte', Pedro' tyajy deenite ca'ga'jrra, cyte dejrra cuscuscjē' Pedro' u'cj tyāawe'sh yacj, atsa' cyte Jope chjambte yacjtjē'jwe'shva u'jty pi'cyna.

²⁴ Cuscuscjē' Cesarea chjambte pa'jty, atsa' cyte' Cornelio' ūytjasnac ūsu' tyajy nwe'sh vite' tyajy namicu yacj pcjaacjerra. ²⁵ Pedro pa'jatspcachja', Cornelio' jypa'gaya' casejrra Pedro tashte peejyūcuc wechana. ²⁶ Nava Pedro' pu'quisrra na'wēc we'we:

—Andya's peejyūcuen. Andya' indy na'wēysa firráatj jīrra', ²⁷ Cornelio yacj puuty we'wena dyiite u'catsrra', cyte yu' wala cuj pcjaacjerra ūstec uyna cūj. ²⁸ Sa' Pedro' na'jīc:

—I'cue'sha' jiine'cue, judiuwe'sha' pcjaacjena puuty we'wewa'jsameeta' vite nasa judiumeesa yacja'. Nava Dyusa' andya's pta'shrra', quim yujnava atsecaajme'. ²⁹ Tyāa pa'gatj pa'yatpcachja', wa'lmée yuwé'. Āchja' andya's mpeeta'shwe quīya'cue yuucaaj jīte', ³⁰ Cornelio' pta'shcu:

—Āchja' pajnz en yuutsa' naapcachja' naa oratey las treste naa yattey quījva ū'mée Dyus yacjrráa puuty we'wena u'pu'tj. Naapcachja' teech pitstjē'j atjni ropa cuentetesa ji'pjsa vyaac. ³¹ Sa' na'wēc we'we: Cornelio, indya' tyā'wē peejisaaty pu'chna Dyus yacj puuty we'wena fi'nzeni's Dyusa' wēse'cj. ³² Atsa' Jope chjambna mcaaj, Simon Pedro yaasesa's pe'jya'. Tyāa Pedro' cja'ty weysáa Simon yatte paandejna ūsa' ĩcj wala pucate. Atsa' tyā' ayte pa'jrra puuty we'wena indy yacj jīnac we'we. ³³ Tyā'wē jycaaj yā'tje', jytjēeyuumée pacueya' caatj. Atsa' wech yuwe'ne'nga. Āchja' ayte Dyus dyi'pte jyucaysa pcjaacjerra ūstja'w, sa' wēse'jya'vatja'w ma'wēne' Dyus we'wecaaj tyā'sna.

Cornelio yatte Dyus yuwe's Pedro pta'shni

³⁴ Tyajū' Pedro' pta'shcu:

—Āchja' jiyutj Dyusa' quim yujnava ajtsemée, ³⁵ maa quiwejuwe'shrrava tyā'sna nwēese'jna ew yūuna fi'nza yuutyi' jypa'ga'rráac. ³⁶ Dyusa' Israelwe'sh ji'jty yuwe caacj Dyus yacj fi'nzewa'ja's Jesucristo yuurráa ūsuna sa' tyāafirráa naa quiwetewe'sh jyucaysaty jycaajana jīna. ³⁷ I'cue'sha' jiine'cue na'wēc yuu: Galileajū tacjrra judiuwe'sh quiwete jyuca tuutje'jnic yuu, Juan Dyus yuwe's pta'shrra yu'te bautisāynijū. ³⁸ Dyusa' Nasaretjuwe'sh Jesusa's tyajy Espiritu's ūste', Jesusa' quījteva nuyatyjinac fi'nze echtjē'j cusete ūssaty. Dyusa' tyāa yacju ūsu' naa pa'gac tyā'wē yūu. ³⁹ Jesusa' tyā'wē Judea quiwesu vite' Jerusalente quījteva ew yūuna fi'nzeni's cue'sha' jyuca uysaatja'w. Tyā'sa' cluuscjē' a'cyrra icjtyi. ⁴⁰ Nava Dyusa' tecj ente qui' ĩtyi vitrra caavya'ja'cj cue'shrráaty, nasa jyucaysaty yu' mée. ⁴¹ Dyusa'

maarrajtyn'e' cue'shtyi tyjityj tyāarráatycu vyaa. Atsa' cue'sha' tyāa yacj pcjaacjena ũ'na fi'nzesatja'w uurra qui' ityi yuunijũ. ⁴²Tyājũ' tyā' cue'shtyi caacj tyajy yuwe's nasaty na'wē pta'shcajn: Dyusa' tyāa Jesusa's tyāarrarráa castigāywal'jsac vitrra qui'p naa quiwete ityisa ma'ty yuu uusáa ma'ty yuu nava jyucaysaty. ⁴³Tyā'wēy Dyus yuwe pta'shsawe'shwa yatscjēy we'wety Jesusa' na'wē yūuwa'jsa' jīna: Maava jyucay tyā's nwēese'jsa' tyāawe'sh pcaltiyi peltunāyni yuutyna jīnaty we'we.

Judiu ji'jmeerrava Dyus Espiritu's jypa'gani

⁴⁴Pedro' tyā'wē pta'shna ũsiyna, cyte wēse'jna ũssawe'sh cacuete Dyus Espiritu qui'te', jyucaysa jypa'gaty. ⁴⁵Atsa' Jesusna nwēese'jsawe'sh judiu Pedro yacj yuusá' wala cuj yajcyna neeyūuty tyā'wē judiuwe'shmée vite nasava Dyus Espiritu's jypa'garra, ⁴⁶tyā'wē vite yuweju we'wena Dyusa's tuutje'jna ũste.

⁴⁷Tyājũ' Pedro' na'jīc:

—Naa nasava cue'sh na'wēy Dyus Espiritu's jypa'ga yā'tje', yu'te bautisāywa'ja's ¿quimrrá' yupya' ājama'c? jīrra', ⁴⁸ya'bautisāy caacj Jesucristo yasete. Tyājũ' Pedro's neevishaty tyāawe'sh yacj manz en cytee ũscajn.

Dyus ma'wē yūuni'sva Jerusalente pa'jrra Pedro pta'shni

11 ¹Jesus jycaajnisá vite' yacjtjē'jwe'sh Dyus yacj fi'nzesa Judea quiwete ũssa' jiyuty tyā'wē judiu ji'jmée vite nasava Dyus yuwe's jypa'gaty jīni's. ²Sa' Pedro Jerusalen chjambte shawendna pa'tje', cyte judiu circuncidāynisawe'sha' ũuschawe'wety Pedro's na'jīna:

³—¿Quijya'nga judiumée vite nasa tashsu u'jrra tyāawe'sh yacj pcjaacjerra ũ'we'?

⁴Tyājũ' Pedro' pta'shcu ma'wē yūuni'sva jyuca:

⁵—Andya' Jope chjambte Dyus yacj puuty we'wena u'prra uytju tela wala na'wēsa puuty pajnz vitste tundrra ēe walacjē caajni qui'c andy tashte pa'j. ⁶Atsa' ew tjengte', dyyite yu' niimal yu'cj ech, ul, vichacue canzhzac ji'pj yu'. ⁷Tyājũ' na'jīni'stju wēse'j: Pedro, quiiterra icjrra mē' jīte', ⁸na'wētj pas: Andya' bagachte yujva na'wē niimal canzhza yuutyi' ũ'wa'jsameetj. ⁹Tyājũ' qui' ptjūusec cieluju we'weni: Dyus yaatenisatyi' indya' canzhzata' jīwa'j ji'pjmeeng jīc. ¹⁰Tyā'wē tecj usva vyaarrac ēe walate qui' pu'quisni yuu. ¹¹Naapcachja' Cesareaju caajnisá tecj pitstjē'j pa'jty andya's pacuena. ¹²Atsa' Dyus Espiritu' andya's u'cjaacj tyāawe'sh yacj wa'lmée. Tyājũ' Jope chjambtewe'sh seis yacjtjē'jwe'sh yacj u'jrra' jyucaysa Cornelio yatte u'catja'w. ¹³Atsa' tyāa pitstjē'ja' pta'shcu Dyus angel vyaarra na'wē we'weni's: Jope chjambna Simon Pedro yaasesa's pa'yaya' mcaaj. ¹⁴Atsa' tyāa pa'jrra pta'shina iindy yatte jyucaysawe'sh Dyus yacj fi'nzewa'ja's. ¹⁵Tyā'wē pta'shte', andy we'wetspcachja', Dyus

Espiritu' tyāawe'sh cacuete quĩjc, cue'sh cacueteva ma'wēga nyaffi quĩj tyā'wēy. ¹⁶Tyājũ' yajcytju cue'shtyi jype'ljsa Jesucristo na'wē we'weni's: Juana' yu'terrāac acjna bautisaĩ'. Nava i'cue'sha' Dyus Espiritute yuu bautisāyni yuune'cue jĩni's. ¹⁷Cue'sha' Jesucristo's nwēese'pja'ga Dyusa' ma'wēga tyajy Espiritu's ūs, tyā'wēycu tyāawe'shtyiwa ūs. Atsa' andya' ġma'wē yūurra Dyus wendyni's wa'lna ūsuquĩ'tj?

¹⁸Tyājũ' Jerusalente ūssa yacjtjē'jwe'sha' wēsel'jrra', peena yu' pasmée Dyusrrāanaty na'wē tuutje'j:

—Judiuwe'shmée vite nasatyva Dyusa' ūsne' pcaltyi nvijtrra Dyus tashte ptsuwa'jmée fi'nzewa'ja's jĩnaty wechál'.

Antioquía chjambte Dyus yacj fi'nzesawe'sh

¹⁹Āchja' nyaffi na'wē Estebana's icjrra vite neeyūusāa yuutyi' ajtserra pcyuute', tyāawe'sha' ūpjna u'jrra' maafĩ yu' Fenice quiwen, vite' Chipre quiwesu, vite' Antioquía chjambsu cysũ pa'jrra vite nasa yuutyi' pta'shmée judiu jil'j pwe'sh yuurráaty pta'shi' Dyus yuwe u'sesa's. ²⁰Nava Dyus yacj fi'nzesa Chipre vite' Cirene quiwejuwe'sh maafĩ yu' Antioquía chjambte pa'jrra', judiuwe'shmeetyva pta'shtyi Jesus caapiya'jni ewte fi'nzewa'ja's. ²¹Atsa' Dyus pu'chte', tyāawe'sha' nyaffi jypumbana fi'nzeni's nvijtrra Jesus caapiya'jni's nwēese'jty.

²²Tyā'wēty Dyusa's nwēese'j jĩni's Jerusalente pcjaacjena ūssa' jiyurra', Bernabea's caajty Antioquía chjambna. ²³Atsa' Bernabea' cyte pa'jrra' wala wechac Dyus tyā'wē pu'chni's uyrra. Sa' jyucaytyi yu'cypejc jypumbamée ew Dyus yacj fi'nzeczajn. ²⁴Tyāa pa'gatey Bernabea' Dyus Espiritu's tyajy ūuste jyuca jypa'garra Dyus yacj yuurráa fi'nzesac yu'. Tyājũ' nasaty wala ya'cnaycu Dyus jĩi.

²⁵Tyā'wē yūurra', Bernabea' Tarso chjambna Saulo's pe'jya' u'jrra', Antioquía chjambte nuypa'cj. ²⁶Sa' cyte teeche añuty pcjaacjena ūsu' nasa ma'wēsatyva jyuca caapiya'jna. Antioquátety nyafyrraj cristiano jĩna cysusnisa yuu Cristo's nwēese'jsawe'shtyi.

²⁷Tyān ensu' Dyus yuwe pta'shsawe'sh Jerusalenu yuusa pa'jty Antioquíate. ²⁸Teechsa Agabo yaasesa' Dyus Espiritu caajiyu'tje', yacjtjē'jwe'sh cshavyte yujurra: Judiuwe'sh quiwete jyuca wēje en pa'jana jĩnac pta'sh. (Tyā'wē pta'shni' cytey yuuc jycaajsa Claudio ente.) ²⁹Tyā'wē wēje en pa'jana jĩni's wēsel'jrra', Dyus yacj fi'nzesa Antioquátewe'sha' tyāawe'sh jil'pjuni yacj pu'chya' yajcytyi yacjtjē'jwe'sh Judea quiwetewe'shtyi. ³⁰Tyājũ' peeswa'ja's pcjacjrra caajty Bernabé Saulo yacj Judeate ancianowe'shtyi ducjajn.

Jacobo's icjrra Pedro's carcelte tyaaajni

12 ¹Tyān ensu' jycaajsa Herodesa' pcyuuya' yajcyu Dyus yacj fi'nzesaty. ²Sa' cchilluj quii'cj Juan nyacj Jacobo's. ³Tyā'wē

yūute' Jacobowe'shtyi atsesa judiuwe'sha' wechaty jycaajsa Herodesa's, atsa' Pedronava preesu'cjaacj quicje'jya'. Pan levadura ji'pjmée ū'wa'l' fiesta entec tyā'wē yūu. ⁴Herodesa' Pedro's preesu tundrra' carcelte ctyaaja'cj. Custe pajnz us yu'ptjejna pe'tewa'jsa soldau tyajc, yu'ptjej iisa pajnz pajnz yujucajn. Pascua fiesta en scjēwte nasaa cshavyte cutyi'jya' sūjrrac tyā'wē yūu. ⁵Atsa' Pedro' carcelte wala ew yupni ūsu'c, nava Dyus yacj fi'nzesawe'sh yu' Dyus yacj pu'vitumēty puuty we'wena ūsu' Pedro pa'gate.

Dyusa' Pedro's carceluj cutyi'jni

⁶Herodesa' Pedro's nasaa cshavyte cutyi'jwa'l' en ājatste', tyāa custe Pedro' dejc e'nz soldau pyājte, e'nz cadenaju tundni. Naapcachja' vite e'nz soldau yu' carcel vitytety yupna ūsu'. ⁷Tyāa dundte Dyus angel vyaarrāa yuute', carcelte jyuca eena'c cweetj. Tyajū' angela' na'jīnac tu'cacana Pedro's fity:

—Dund yuj mquuite jītspcachja', tsam cadena' chucuetety Pedro cuseju. ⁸Atsa' qui' we'wec tyāa angela':

—Indy jytundni's ya'jytundrra, pelgatyi's mpaatj jīte', Pedro' tyā'wē yūuc. Tyajū' tyāa angela' qui' we'wec:

—Atyja's jycaatsrra myuj andy e'stey jīte', ⁹Pedro' angel e'stey casejc, isa angela' eca cutyi'jītsteva csha'wnavāa ūsne'tca sūjnarrāa yajcyna. ¹⁰Nava nyafy vityte soldau yupna ūsnite scjēwrra', e'ste vityte soldau yupna ūsniteva scjēwtyi. Sa' eca casejwa'l' tsam vityte sējetspcachja', tyāa vitya' peecyrrāa pjaatec. Atsa' casejrra u'jty cliicjunsu. Tyajū' angela' Pedrorrāana nvijtrra u'cj. ¹¹Tyajū' Pedro' naasūjc: Csha'wnimeega yu',



(Hechos12.7)

isa Dyusne' tyajy angela's caaj Herodes cuseju andya's nwe'weya', vite' judiwe'shva nacie wala ewmée yūuya' ūytjasu'ty tyāaju nwe'wecajn sūjnac yajcy.

¹² Pedro' tyā'wē ew jiyurra' u'cj Juan Marcos njī'j Maria yatna. Cyte' wala cuj pcjaacjerra Pedro pa'gate Dyusa's neewe'wenaty ūsu'. ¹³ Cyte cūjrā vityte uca'cate', teech luuch u'y Rode yaasesac tjengya' casej. ¹⁴ Nava Pedro we'weni's jiyurra', vitya's pjaandemée wechana qui' shawendcu dyiigay wuwuurraa:

—Pedro' vityte ūsa' jīna pta'shya'.

¹⁵ Atsa' na'jīnaty we'we:

—Luucu we'wena ūsi'cha jīteva:

—Īshijā'tsmeetj, isa yuja' jīte':

—Pedromée, tyāa yacj pi'cyna u'jusa angelrrāana jīty.

¹⁶ Tyā'wēteva, Pedro yu' vityte uca'cana nescu yu'. Atsa' vitya's pjaandeya' u'jrā', Pedro's uyrra wala cuj yajcytyi. ¹⁷ Nava shuuna' yuucajn Pedro' cuseju pta'shrra', Dyus ma'wē carceluj nwe'weni's jyuca pta'shcu. Sa':

—Jacobo vite' cue'sh yacjtjē'jwe'shtyi mpeeta'shwe tyā'jīna'va, tyāa yu' casejna u'cj vite ajte.

¹⁸ Cuscuuscjē cjcjynite', wala cuj yajcyna ūucjtyi soldauwe'sha' tyā'wē Pedro ma'wē yūuteva jiyumeerra. ¹⁹ Tyajū' jycaajsa Herodesa' pacueya' caacj, nava uymeete' cyte carcelte tjengsa soldautycu icj caaj. Tyāa e'surrāa Herodesa' Judea quiweju casejrā Cesarea quiwetec u'pya' u'j.

Herodes uunī

²⁰ Herodesa' wala puiina ūsu'c Tiro Sidón quiwete nasa yacj. Tyāa pa'gaty tyāa nasa' Herodes tashte mjīisa Blasto yaasesa's vyu ducjrā tyāa yacj u'j jycaajsa tashte utyaarra puiimée fi'nzewa'ja's puuty we'weya'. Tyā'wē yūumeete', tyāa nasa' jycaajsa quiwejurrāaty ū'a's jypa'gana fi'nzesa yu'. ²¹ Atsa' jycaajsa Herodesa' pta'shcu quīj ente tyajy tashte utyaawa'ja'sva. Sa' tyāa en ajte', Herodesa' jycaajsa atjini ropaty atjrā tyajy u'pnite cachrra we'wec. ²² Tyajū' nasa' na'jīnaty wechana sus we'we:

—Na'wē we'wesa' naa quiwete nasamée, Dyusa' jītspcachja', ²³ tyāa dundtey Dyus angela' acasa ūscu Herodesa's, atsa' jyuca wes ū'te' uuc, tyā'wē nasaa wechani's wechana yaacypa'ga.

²⁴ Nava Dyus yuwe yu' jweeīrrāac walaana u'j mtee mteeva pta'shni.

²⁵ Tyajū' Bernabé Saulowe'sha' mjīia's jyā'jrā Jerusalenuj qui' shawendtyi Juan Marcosa's pe'jrā.

Bernabé Saulo yacj Dyus yuwe's pta'shya' nyafyrraj casejni

13 ¹ Antioquía chjambte pcjaacjena ūssa yacj ūsu'ty Dyus yuwe pta'shsa vite' Dyus leya's jiisava: Bernabé, vite' cjūch Simon

jīnisa, vite' Lucio Cirene chjambuwe'sh, vite' Manaén Galileate jycaajsa Herodes yacj ij walaasáa, vite' Saulo'. ²Tyāawe'sha' teeche ente' Dyusna selpiina yūunaana ūste', Dyus Espiritu' na'wēc we'we:

—Saulo Bernabé yacj mcaajwe andya's selpicajn, tyāawe'sha' andy pa'yanisata' mjīiwa'jsa jīc.

³Tyājū' yūunaana jyā'jrra', tyāawe'sh dyictjesu peequinzerra Dyusna neewe'wena' caajty.

Bernabewe'sha' Chipre quiwete Dyus yuwe's pta'shni

⁴Dyus Espiritu caatje', Bernabé Saulowe'sha' Seleucia chjambna u'jrra tyājū' barcote cjēerra icj pyājte Chipre quiwentyi u'j. ⁵Tyāa quiwete Salamina chjambte pa'jrra', judiwe'sh pcjaacjeni yat-su Dyus yuwe's pta'shya' tacjtyi. Sa' Juan Marcosnava iipe'jty yu' pu'chwa'jsa. ⁶Chipre quiwe's pecūjna jyā'jatsrra', Pafos chjambtety pa'j. Sa' cyte' teeche judiu dyijyuusáa Barjesus yaasesa'styi uy. Tyāa pitstjē'ja' wala īshiisa yu'c Dyus yuwe pta'shsatj jīna īshiina. ⁷Tyāa dyijyuusá' cyte ne'jue'sh wala jīisa Sergio Paulo tashte mjīisac yu'. Tyāa ne'jue'sha' Dyus yuwe's wēse'j wēerra Bernabewe'shtyi pa'yac. ⁸Nava tyāa dyijyuusáa Elimasa' Bernabewe'shtyi' cwe'we'j wēeme', ne'jue'sha' Dyus yuwe's jiyucajmen. ⁹Tyā'wē yūute', Dyus Espiritu's ūuste jyuca ji'pjsa Saulo Pablo yaasesa' dyijyuusáa dyi'pte ūuscha tjengrra', na'jīc:

¹⁰—īshiina fi'nzesa, ewmeesa, echtjē'j luuch, ewsa yu'sa' jyuca ajtsena fi'nzesa ħmjīitenga Dyus yuwe ewsa's yupmēe fi'nze'tsmēe? ¹¹Tyāa pa'ga Dyusa' indya's āchjīi castigaīna, atsa' uyya' ājamēe fi'nzene'nga naa ensu' jītspcachja', tyāa dundtey uyya' ājameerra' maarrāatyva pacuec pu'quisrra pe'jna u'cjan. ¹²Tyājū' cyte ne'jue'sha' tyā'wē yūuni's uyrra', Jesus caapiya'jni's isa yujna sūjna ūuste jypa'gac.

Pablowe'sh Pisidia quiwesu pecūjni

¹³Pablo vite' tyāa yacj pi'cyna u'jusa yā'jrra barcote cjēerra Pafos chjambu casejty Panfilia quiwete Perge chjambte pa'jya'. Nava Juan Marcos yu' Perge chjambte pa'jrrarráa qui' shawendcu Jerusalennay. ¹⁴Pablowe'sha' Perge chjambu casejrra Pisidia quiwete Antioquía chjambnaty u'j. Cyte pa'jrra', jycaase ensu' judiwe'sh pcjaacjeni yatte u'caty. ¹⁵Atsa' pcjaacjeni yatte npiitstjē'ja' Dyus ley vite' Dyus yuwe pta'shsa fi'jni's lēeyna jyā'jrra', na'wēty we'we:

—Yacjtjē'jwe'sh, quīj we'wewa'j ji'pjrra', myu'cypejwe nasaty āchjīi jīte', ¹⁶Pablo' quiitena'va cuseju shuuna' yu'wa'ja's pta'shna'va we'wec:

—Israel ji'jwe'sh, vite nasava Dyusna nwēese'jsa, jypa'yacy mwēese'jwe: ¹⁷Israelwe'sh Dyusa' cue'sh yatsgawe'shtyi tyjityjrra wala cpeena'cj Egipto quiwete nee ūsiyna, sa' tyāa quiwe'jū cutyi'cj quījva seena'sa caavya'ja'jrra. ¹⁸Dyusa' nasa u'pnimēe quiwete cuarenta aṇu wantāyycu

nasa äjmée yūuna fi'nze'tsteva. ¹⁹Sa' Canaan quiwete nasaty jyuca iviituc tyāa quiwe's cue'sh yatsgawe'shtyi ūsya'. ²⁰Tyajū' cuatrocientos cincuenta año äjpcach jycaajwa'jsa ji'pjmée cue'shtyi tjengwa'jsa cjuēsrrāac nvijt, Dyus yuwe pta'shsa Samuel entepcach. ²¹Tyajūty tyāawe'shíi pējy teech jycaajwa'jsa, atsa' Dyusa' ūscu cuarenta año jycaajwa'jsa Cis nchi'c Saul yaasesa's. Tyāa pitstjē'ja' Benjamin ji'cj yu'. ²²Tyāa e'su' Dyusíi Saula's jycaajniñū cutyi'jrra, Davida'scu jycaajwa'jsa qui'p. Sa' na'wēc we'we: Isaí nchi'c David yuurráa andy jycaajni's cytey yuuwa'jsa uytju tyā' andy wendynisa' jīc. ²³Jesusa' David ji'tjewe'shcu yu', atsa' tyā'snac Dyusa' nvijt Israelwe'shtyi nwe'wewa'jsa, nyafiitey Dyusa' ma'wēne' ūsya' neeyūu tyā'sa' cytey yuuc. ²⁴Jesus pa'jmeyna Juana' Israel nasa jyucaysaty pta'shcu: I'cue'sh pcaltyi jyuca nvijtrra Dyus tashte mishawendwe yu'te ya'bautisāyna jīna. ²⁵Sa' Juana' tyajy uu en utyaatste', na'wēc we'we: Andya' i'cue'sh ūytjasu'i'cue tyāameetj. Andy e'ste teech yuja' tyajy pelgatyi wesrrāa yujnava andya' cijmbya' selpimeesatj jīc.

²⁶Yacjtjē'jwe'sh Abraham ji'j, vite nasava Dyusna nwēese'jsa i'cue'sh ewte neeyūuwa'ja's pta'shnic yuu. ²⁷Nava Jerusalente ūssa vite' tyāawe'sh npiitstjē'jsava jiyumeeta' Jesusa' quimteva. Sa' Dyus yuwe pta'shsa fi'jni'sva jiyumeeta' pcjaacjeni yat-su jycaase een isa lēeyrrava. Sa' tyāawe'shírrāa Jesusa's ewmeete nvijtrra', Dyus yuwe pta'shsa fi'jni tyāawe'sh lēeyni's cytey yuuty. ²⁸Tyā'wē Jesus ewmée yūuni's uymeerrava Pilato's yuwe ūstyí Jesusa's quicje'cjan. ²⁹Tyajū' Dyus librote ma'wēne' fi'jni ūsu' tyā'sa' jyuca cytey yuurra', Jesusa's cluus spajcyrra pendaaty. ³⁰Nava Dyusa' uunijū qui' ūtyi vitcu. ³¹Atsa' Jesusa' wala cuj en vyaac Galileajuwe'sh Jerusalenna pi'cyna yuusaty. Tyāasa tyāawe'sha' Jesus quimteva pta'shsata'.

³²Tyāa pa'ga cue'shva i'cue'shtyi pta'shitstja'w nyafiitey cue'sh yatsgawe'shtyi Dyusa' ūsya' neeyūuc tyā'sna. ³³Cue'sha' yatsgawe'sh ji'tja'w, tyāa pa'gac Dyusa' tyajy ūsya' neeyūuni's cue'sh yacj cytey yuurra, Jesusa's uunijūva ūtyi vit, salmo doste na'wē fi'jni ūsa' tyā'wēy: Indya' andy nchi'cngu. Atsa' indya's uunijūva ūtyi vittju āchja' jīc. ³⁴Uute' tyāa cacue' suweecajmen ūtyi yuuwa'ja's Dyusa' pta'shcu tyajy librote na'jīna: I'cue'shtyi peeygāawa'ja's David yacj puuty we'wetj tyā'sa' cytey yu'nja jīc. ³⁵Tyāasac salmo vite ajcjēva na'jī': Indyna selpisāa peeygāanisa cacue's nvijtmeene'nga suweewe'shte jī'c. ³⁶Tyā'wē we'weni' isa cytey yuuyujc. Tyajīc Davida' tyān ensu' Dyus jycaajni's cytey yuurra e'su' uuc, atsa' tyajy cacue's yatsgawe'sh pendaniitey pendaate', tyajy cacue' cytee jyuca ptsuuc. ³⁷Nava Dyusa' Jesusa's uunijūva ūtyi vitcu, atsa' tyāa cacue' ptsuume'. ³⁸Āchja' yacjtjē'jwe'sh i'cue'sha' mjiyuwe: I'cue'sh pcaltyi peltunāywa'ja's pta'shi'tja'w, nava peltunāywa'jsa' Jesus yuurrá'. ³⁹Nyafii Moises leya's nwēese'jrrava, perdona's uymeei'cue. Nava Jesusna yajcyrra nwēese'jrra', perdona's

uyuune'cue maava. ⁴⁰Mpa'yajcywe, tyā'wēme!, nyaffi Dyus yuwe pta'shsa na'wē we'wety tyā' cytey yuuwe'shta':

⁴¹Weechsawe'sh, mpa'yajcywe. I'cue'sh vituwa'ja's mūucjwe.

Tyā'wēme!, andyí Dyustju na',

Tyā'wē yūuwa'j en ājte!, quíjva seena'rráa yu'nja.

Tyā'wē yūuwa'ja's pta'shteva, i'cue'sha' jypa'gameene'cue jīnaty we'we jīc Pablo'.

⁴²Tyājū' Pablo' tyā'wē pta'shrra', tyāa yacj pi'cyna u'jusa yacj judiuwe'sh pcjaacjeni yatu casejetste!, cyte ūssa judiu jil'jmeerrava Pablowshtyi qui' pi'cytyi vite jycaase ente tyā'wēy pta'shya' yuucajn.

⁴³Cyte pcjaacjeni ptsuute!, judiuwe'sh wala cujsa vite! judiu jil'jmeerrava judiuwe'sh caapiya'jni's jypa'gasa Dyus yuwe's wala ew nwēese'jrra', Pablowshtyi caapiya'jni's nwēese'jsaty yuu. Atsa' Pablowshta' wala yu'cytejty Dyus peeygāanite wa'lmée fi'nzeczaj.

⁴⁴Vite qui'su jycaase ente!, chjambte nasa jyucay pcjaacjety Dyus yuwe's wēse'jya'. ⁴⁵Nava tyā'wē nasa wala pcjaacjety!, cyte judiuwe'sha' wala ūsacharra Pablowshtyi atsewe'wena wēeshuty. ⁴⁶Tyā'wēteva, Pablowshta' ūucjmeety na'jīna we'we:

—Dyus yuwe's nyafyete i'cue'sh judiu jil'j cjuē'ytyi pta'shwa'cj yu', cyajtja'w pta'sh. Nava jypa'gameeyā'jil'cue ptsumée ūtyi fi'nzewa'ja's, atsa' āchja' u'ljuetstja'w judiumée vite nasaty pta'shya'. ⁴⁷Dyusa' cue'shtyi na'wēc we'wena caaj:

Nasa cshavysu eena' cweetjwa'jsatj nvijt i'cue'shtyi!,

Sa' tyā'wēy maa quiweteva ewsa's pta'shwa'jsa jīc.

⁴⁸Atsa' judiu jil'jmée vite nasa tyā'jīni's wēse'jrra', Dyus yuwe' wala ewsa yu'ga jīna wecharra maarrajne'ta bagachte yujva ptsumée ūtyi fi'nzewa'jsa yu' tyāa yu' jyucay Dyus yuwe's jypa'gaty. ⁴⁹Tyā'wēc Dyus yuwe's pta'shni yuu tyāa quiwete jyuca. ⁵⁰Nava tyāa chjambte judiuwe'sha' nasa jytujtjesa pety u'y yā'jrra cyteerraj puuty we'werra, Pablowshtyi pcyuuya' yajcytyi tyāa quiwejū cutyi'pjcach. ⁵¹Tyā'wē yūute!, Pablowshta' tyāawe'sh chindate quiwe tujnda's sacueecuerra u'jty Iconio chjambna. ⁵²Nava cyte nasa Dyus yuwe's nwēese'jsa yu', wala wechana neeyūuty, Dyus Espiritu's ūuste jypa'garra.

Iconio chjambte Pablowshta' pa'jni

14 ¹Pablowshta' Iconio chjambte pa'jrra', judiuwe'sh pcjaacjeni yatte u'carra, Dyus yuwe zhichcuesa's pta'shte!, wala jypa'gaty judiuwe'sh vite! judiuwe'shmeesava. ²Nava judiuwe'sh Jesus caapiya'jni's atsesa yu' judiu jil'jmée vite nasaty ewmée yu'tywe'werra yacjtjē'jwe'shtyi atseyaacywa'ja's vittyi. ³Tyā'wē atsepa'gaírráaty Pablowshta' jweeírráa cyte tyach ūsu!, Dyusa' pu'chjina sūjna ūucjmée pta'shna. Atsa' Pablowshta' tyā'wē Dyus peeygāani's pta'shte!, Dyusa' cyte nasa wēse'jsa yuutyi' ewcu

caajiyul'j Pablowe'shtyi quĩjva seena'sa's caavya'ja'jya' ājawa'ja's ũsrra.
⁴Atsa' tyāa chjambtewe'sha' tyuteety, vite' judiu atsesawe'sh ju'ngu, vite'
 Pablowe'sh ju'ngu. ⁵Tyājũ' judiuwe'sh vite' judiuwe'shmeesava cjuēswe'sh
 yacj puuty we'wety Pablowe'shtyi wēeshuna cuet wāatatajrra icjya'.
⁶Nava Pablowe'sh jiyurra', ũpjna u'jty Licaonia quiwete Lистра Derbe
 chjambna cysũ jyuca pecũjrra ⁷Dyus yuwe ewte nviitwa'jsa's pta'shya'.

Listra chjambte Pablo's cuet wāatatajrra icj wēeni

⁸Sa' Lистра chjambte pa'tje', cyte' teeche pitstjē'j chinda ātsa'sac u'pu'.
 Tyā' upyjĩ tyā'wē yā'cj yu', sa' bagachte yujva u'juya' ājasameec yu'.
⁹Tyāa pitstjē'ja' Pablo pta'shni'scu wēse'jna u'pu'. Atsa' Pablo' tyajy
 dyi'pte tjengrra' jiyuc nuycatyjina sũjni's. ¹⁰Sa' suscu we'we:

—Cu'le myuju jĩna. Naapcachja' tyāa pitstjē'ja' ũpjrra yujuna'va ew
 yā'cj u'juya' āja. ¹¹Pablo tyā'wē yũuni's nasa uyrra', na'wēty Licaonia
 yuweju weyna we'we:

—jNasa na'wē yuurra dyuswe'sh cue'sh tashte quĩjty! jĩrra',
¹²Bernabea's Jupiter jĩnaty cysusu', sa' Pablo's Mercurio jĩnaty we'we',
 wejy tjaacue we'wesa yuupa'ga. ¹³Tyāawe'sh dyus Jupiter jĩ'ty tyā'sna
 neewe'wena ũsni yata' chjamb peecu'tjec ũsu', atsa' cyte selpisāa
 sacerdote' cla jyūna pa'cj quite zhichcuesa cju'ũ'jũ'jrra. Atsa' nasa'
 Pablowe'shtyi wechana peeju'cuerra neewe'weya'vaty yu' tyāa claty
 icjna. ¹⁴Nava Pablowe'sh jiyurra' tyā'wē yũute ũsrra peecy atjni ropaty
 sundena'va nasaa cshavyte cũjrra na'jĩnaty sus we'we:

¹⁵—I'cue'sha' ¿quĩjya'cue tyā'wē yũ? Cue'sha' nasa i'cue'sh
 na'wēysa fĩrráatja'w. Sa' tyā'wē yũuna fi'nzenisa' seelpimeesa' naa
 pa'ga nvijtrra Dyus ũtyāa cielu's pjeu'cj, quiwe, ĩcj wala cyte quĩjrraj
 ũstyna tyāaty jyuca tyā'snarrāa selpiina neewe'wewa'ja' jĩna pta'shya'
 yuusarráatja'w. ¹⁶Tyāa Dyusa' nyaffĩ ensu' nasaty' nvijtcu ma'wēva
 yũuna fi'nzecajn. ¹⁷Nava Dyus ũsyujna sũjcajn caajiyul'jna nescu yu', nus
 caapa'jal'jna, uutjashtyi ew cchjāachja'jna, ũ'wa'ja's peejymée peesna,
 wēt fi'nzewa'ja'sva ũsna jĩnac pta'sh. ¹⁸Tyā'wē pta'shrrac wala tjēyrrāava
 pejca nasaty cnay, tyāawe'shtyi wechana cla icjna peeju'cucajmen.

¹⁹Tyāa e'su' judiuwe'sh Antioquía Iconio chjambuwe'sh pa'jrra cyte
 nasaty ewmée yu'tywe'werra cuet wāatatajty Pablo's. Tyā'wē yũurra',
 uuyā'jne' sũjrra wenzhna u'jrra chjamb ecajtj wāatāj. ²⁰Nava cyteewe'sh
 Dyus yuwe's nwēese'jsa yu', Pablo's tjengya' u'tje', Pablo' qui' ũus ji'pjurra
 quiiterra qui' chjambtey u'cac. Sa' vite cuscuscjē' Bernabé yacj Derbe
 chjambnaty u'j.

²¹Derbe chjambte pa'jrra', Dyus yuwe ewte nviitwa'jsa's pta'shrra
 nasaty wala cnaytyi Dyus jĩ. Tyā'wē yũurraty shawend Lистра, Iconio,
 Antioquía chjambsu iipa'j. ²²Tyāa chjambsu pa'jrra', Dyus yuwe's
 nwēese'jsaty wala yu'cypejty Dyus jycaajna ũsnite u'ca wēerra' Dyus

yacj tyutemée fi'nzewa'ja', macue pytjaa ñuswa'j en pa'tjeva jīna. ²³Sa' cysū pcjaacjena ūsnisu jycaajwa'jsa ancianova pacuerra qui'ptyi. Tyā'wē yūurraty yūunaarra Dyus cusete neewe'werra nvijt.

Pablowe'sh Antioquía chjambnay qui' shawendni

²⁴Tyājū u'l'rra', Pisidia quiwesu scjēwrra Panfilia quiwetety pa'j. ²⁵Tyāa quiwete Perge chjambte Dyus yuwe's pta'shrra Atalia chjambnaty u'j. ²⁶Tyājū' barcote cjēerra u'l'jty Antioquía chjambna, majūne'ta Dyus cusete neewe'werra mjīiya' caajnisu yuu tyāa chjambnay. ²⁷Antioquía chjambte pa'jrra', cyte pcjaacjena ūssa yacjtjē'jwe'shtyi pta'shtyi Dyus ma'wēne' tyāawe'shtyi pu'chrra judiu ji'jmée vite nasatyva Dyus yuwe's caajiyu'j tyā'sna. ²⁸Sa' Pablowe'sha' cyte wala tyach ūsu'ty Dyus yuwe's nwēese'jsawe'sh yacj.

Pablo Jerusalentewe'shtyi paapējyja' u'jni

15 ¹Tyāa e'su' Judeajuwe'sh judiu Antioquía chjambte pa'jrra cyteewe'shtyi na'wēty caapiya'jna ūsu': Ya'circuncidāywa'j ji'pji'cue Moises jycaajni's cytey yuuna. Tyā'wē yūumeerra', ewte neeyūuya' ājameene'cue jīna. ²Atsa' tyā'wē caapiya'tje', Pablowe'sha' wala juuna' puuty we'wety tyā'wē pta'shsa yacj. Tyājū' cyte pcjaacjena ūssa yacjtjē'jwe'sha' Pablowe'shtyi vite caapi'qui'l'rra Jerusalenna caajty Jesus jycaajnisawe'sh vite' anciano cyteewe'sh yacj tyāa yuwe's paapējyna puuty we'wecajn.

³Antioquía chjambte pcjaacjesa yacjtjē'jwe'sh caatje', Fenicia Samaria quiwesu scjēwnaty u'j, judiu ji'jmée vite nasava Dyus yuwe's jypa'garra nyafii jypumbana fi'nzeni's nvijtyi jīna pta'shna. Atsa' cysū yacjtjē'jwe'sha' wala wechaty tyā'wē jiyurra'.

⁴Pablowe'sh Jerusalente pa'tje', cyte pcjaacjena ūssa vite' Jesus jycaajnisawe'sh ancianowe'sh yā'l'rra jypa'gaty. Atsa' Pablowe'sha' jyuca pta'shtyi tyā'wē judiu ji'jmée vite nasatyva Dyusa' ewte neeyūuwa'ja's ūscu jīna. ⁵Nava maafi yu' cyte ūssa fariseowe'sh Jesus caapiya'jni's jypa'gasarrava na'wēty we'we yujurra: Judiu ji'jmée vite nasa āchj u'se Dyus yuwe's jypa'gasawe'shtyi' circuncidāyrra, Moises jycaajni leya's jyuca nwēese'cjan jycaatje yuuna jīty.

⁶Tyājū' Jesus jycaajnisu vite' ancianowe'sh yacj pcjaacjerra tyāa yuwe's pjeu'jya' puuty we'wety. ⁷Tyā'wē wala tyach tyāa yuwe's puuty we'wenijū', Pedro' quiiterra na'wēc we'we:

—Yacjtjē'jwe'sh, i'cue'sha' jii i'cue Dyusa' andya's tyjityjcu tyajy yuwe ewte nviitwa'jsa's pta'shcajn judiu ji'jmée vite nasatyva, cyaj tyāawe'shva jiyucajn. ⁸Dyusa' jii' maarraj nwēese'jwa'jsateva, tyāasa fíc vite nasava tyā'sna nwēese'jwa'jsa yuutyi's tyajy Espiritu's ūs, cue'shtyiva ma'wēga tyajy Espiritu's ūs tyā'wēy. ⁹Dyusa' maa yujtyva nasa fiisata'

sūju'tsme' cue'sh yacj vite nasa yacj. Tyāasaíírráac vite nasarrava Jesusa's yaacysa yuutyi's tyāawe'sh pcaltyi' peltunāy. ¹⁰Dyus tyā'wē yūurra nwe'wenisatyi's ¿quíjya'cue i'cue'sha' jweeíírráa tjēysa's yuutyana jycaaj wēje'? Tyāa tjēysa's cue'sh yatsgawe'sh yujva cytey yuuya' ājameeta', atsa' cue'sh yu' wejytja'w ājāmée. ¹¹Tyā'wē cue'sha' tyāa tjēysa's cytey yūuya' ājameeteva, Jesusa' peeygājrra yuurráane' cue'shtyi' nwe'we sūju'tja'w. Tyāasane' vite nasatyva tyā'wēyrráa nwe'we.

¹²Pedro tyā'wē we'wete', jyucaysa shuuna'ty yuu, Pablowe'sh pta'shni's wēse'jya'. Atsa' tyāawe'sha' pta'shtyi Dyusa' tyā'wēc quim yujva ājānimeesa's caavya'ja'jya' ājāwa'ja's cue'shtyi ūsrra judiu jil'jmée vite nasatyva jyuca pu'ch jīna. ¹³Tyāawe'sh pta'shna jyā'tje', Jacoboc we'we:

—Yacjtjē'jwe'sh, mwēese'jwe. ¹⁴Simon Pedro na'wēc pta'sh judiu jil'jmée vite nasatyva Dyusa' nyafyrraj peeygājrra tyāawe'shtyi tyjityjcu tyajy luuch yuuwa'jsa. ¹⁵Tyā'wē yuuwa'ja's Dyus yuwe pta'shsawe'sh fi'jty tyā' cytey yuuc. Tyāa fi'jni' na'jī'c:

¹⁶Tyā'wē yūunijū shawendrra, qui' tyaja'nja David tyaa'jni yat wetenisa's.

Tyāa wetenisa's pjeu'jrra u'se vitrra nviitu'nja.

¹⁷Cyaj maava jyuca Dyusa's pacueya' ājatyna,

Maa quiwejuwe'shva andya's jiyusa yu' jyuca.


¹⁸Tyā'wē yūuwa'ja's Dyusa' nyaffi enteycu tyā'wē we'wena caajiyu'j.

¹⁹Tyāa pa'gatj andya' naasūju'. Judiu jil'jmeerrava Dyusna nwēese'jya' pacuesaatyi' cuch cue'sh leytyi nwēese'jwa'ja's jycaajmée, ²⁰naasāa na'wē pta'shna fi'tjerráa ewna: Naa quiwega dyus ūtyimeesa's wechaya' tajcy icjni chicha's ū'wa'jme'. Sa' ptammeesa pcal yuuna fi'nzewa'jme'. Tyā'wēy tajcynava tjucrra icjnisa chicha's ū'wa'jme', eenava ū'wa'jme'. ²¹Tyā'wē yūumeete', Moises leya's nyaffi enteytyi tyāasu we'wena pta'shna yujna ūsu' chjamb iisa judiuwe'sh pcjaacjeni yat-su jycaase ensu jīc Jacobo'.

²²Tyajū' Jesus jycaajnisawe'sh vite' ancianowe'sh cytee ūssa jyucaysa puuty we'wety Pablowe'sh yacj Antioquía chjambna caajya'. Sa' tyjityjtyi Judas Barsabás yaasesa's vite' Silas tyāawe'sh wala jyutjtjesaty.

²³Tyāawe'sh yacj carta na'jīna fi'jrra caajty:

Jesus jycaajnisawe'sh vite' ancianowe'sh wechana yuwe cajastja'w ayte ūssa yacjtjē'jwe'sh jyucaysa yā'jrra judiu jil'jmée vite nasa Antioquíate ūssa i'cue'shtyi, vite' Siria Cilicia quiwetewe'shtyiva. ²⁴Cue'sha' jiyutja'w cue'sh yacj ūssa judiu maafi yu' cue'sh jycaajmeeteva u'jrra tyāawe'sh caapiya'jni yacj i'cue'shtyi caypumba'jna ūsu'ne'ta Moises leya's nwēese'jrra ya'circuncidaíne'cue jīna. ²⁵Tyā'wē yūupa'ga cue'sh jyucaysa na'wē yūuya' puuty we'werra cue'sh yacj ūssaty tyjityjrra i'cue'shtyi tjengya' cajastja'w cue'sh yacjtjē'j Pablowe'sh ²⁶na'wē nūs cnaytyi cue'shtyi jype'jsa Jesucristo caapiya'jni's pta'shpa'ga tyāawe'sh yacj. ²⁷Atsa' cue'sh caajni Judas vite' Silas tyāawe'sh pa'jrra i'cue'shtyi



(Hechos 16.2)

pta'shityna ma'wē yūuwa'ja'sva ew āate. ²⁸I'cue'shtyi' jwee yu' tjaacue jycaajmēe na'wērrāa yūuwa'ja'scu Dyus Espiritu' cue'shtyi caaūusutje'j; ²⁹Naa quiwega dyus ityīmeesa's wechaya' tajcy icjni chicha's ū'wa'jme', eenava ū'wa'jme', tajcynava tjucrra icjnisa chicha's ū'wa'jme'. Ptammeesa pcal yuuna fi'nzewa'jme'. Na'wē neewe'we'tja'w tyāaty cytey yuuterrāa ewna. Dyus yacj tyutemēe mfi'nzewe.

³⁰Tyā'wē caatje', Silaswe'sha' Antioquíate pa'jrra cyteewe'sh yacj pcjaacjerra carta's ducje', ³¹tyāa carta's lēeyrra wala wechaty tyā'wē zhichcue yu'cypejna fi'jni's uyrra. ³²Tyāa Silaswe'sha' Dyus quīj yūuya'vateva dyiicjēy pta'shya' ājasaty yu', tyāasa cyte yacjtjē'jwe'shtyi yu'cypejna wala cchjāachja'jty. ³³Tyāawe'sha' cyte manz en ūsrra qui' shawenduutste', cyte yacjtjē'jwe'sha' yuwe wala wechaa caajna caajty quimne'ta caaj tyāawe'sh tashnay. ³⁴Nava Silas yu' cyte neeyūuya'c yajcy. ³⁵Tyajū' Pablowe'sha' Antioquíate Dyus yuwe's caapiya'jna nestyi yuu vite yacjtjē'jwe'sh yacj.

Pablo' Bernabé yacj tyuteerra Dyus yuwe's pta'shya' qui' casejni

³⁶Tyāa e'su' Pablo' Bernabea's na'jīc:

—Yacjtjē'jwe'shtyi qui' tjengya' u'juega maa chjamsurraj ne'tca'w Dyus yuwe's pta'sh cysū jyuca, ma'wē ūsteva uyya' jīte', ³⁷Bernabea' Juan Marcosna pe'jrrac u'j wēe. ³⁸Nava Pablo yu' pe'jna u'jya' wa'lcu, tyā'wē mjīi pu'chna jyā'jmée Panfiliajūrráa shawendsa' sūjrra. ³⁹Tyajū' puuty ūuscha we'werra tyuteety. Bernabea' Juan Marcosna pe'jrra Chipre quiwencu u'j, ⁴⁰naapcachja' Pablo' Silasnac tyjityj, tyāa yacj u'juwa'jsa. Atsa' cyte yacjtjē'jwe'sha' tyāawe'shtyi Dyus cusete neewe'wena



(Hechos 16.24)

jiyã'jatspcachja', casejty. ⁴¹Sa' u'jrra Siria Cilicia quiwesu yacjtjê'jwe'shtyi cchjãachja'jty Dyus yuwe's pta'shna.

Pablowe'sh yacj Timoteo u'jni

16 ¹Pablo Silas yacj Derbe Listra chjamsu pa'jrra cyte puuty uytyi Jesucristo's jypa'gasa Timoteo yaasesa yacj. Tyajy nji'ja' Jesucristo's jypa'gasa judiu ji'tjeva, Timoteo ney yu' judiu ji'jmée griegoc yu'. ²Listra Iconio chjamsu u'psa yacjtjê'jwe'sh maava jyucaty tyãa Timoteo's wala tuutje'je'. ³Tyajü' Pablo' tyãa Timoteo's pe'jrra u'jya'c yajcy, sa' caacircuncidaï'cj tyã'wê griego nchi'ca' jina cysü judiuwe'sh atsewe'wecajmén. ⁴Sa' Jerusalente Jesus jycaajnisá vite' ancianowe'sh fi'jni carta's jyucaty pta'shna u'jue' maa chjamsuwa yacjtjê'jwe'shtyi. ⁵Tyã'wê jiyurra', cysü pcjaacjesawe'sha' jweefirráaty chjächja Dyus yacj fi'nze', atsa' nasa yu' een isaty pejnana u'jue' Jesus caapiya'jni's nwëese'jna.

Pablo csha'wte teeche pitstjê'j Macedonijawe'sh pi'cyni

⁶Tyajü' Pablowe'sha' Frigia Galaciasuty ctejcana u'j, Dyus Espiritu' Asia quiwesu jwee yu' Dyus yuwe's caapta'shi'jme' naa pa'ga. ⁷Sa' Misia quiwete utya cüjrra', Bitinia quiwen u'jue'nja'w süjteva, Espiritu' u'cjaajme'. ⁸Tyã'wê yüyã'tje', Misia quiwen teejwend u'jrra, Troas chjambtety pa'j icj wala pucate. ⁹Cyte üsrrac Pablo' teeche custe csha'w teeche pitstjê'j Macedoniatewe'sh na'wê pytjaa we'wena üste: Macedoniate ctejcarra, cue'shtyi myuj pu'chya' jina. ¹⁰Pablo csha'wte tyã'wê pa'ya yã'tje', Macedonia quiwen u'jya' pjeu'tja'w, cue'shtyi' Dyus tyã'wê cajatsna Macedoniatewe'shtyi tyajy yuwe ewte nviitwa'jsa's pta'shya' süjrra.

Pablo Silas yacj Filipos chjambte cyuupjni

¹¹Troas chjambuj barcote cjeërra u'tja'w icj pyãjte Samotracia quiwen. Sa' vite cuscuscjê' Neapolis chjambte pa'tja'w. ¹²Tyajü qui' u'jrra', Filipos chjambte pa'jrra manz en üsu'tja'w. Tyãa chjamba' romanowe'sh iiyamunisa wala jytujtjesa yu'c Macedonia quiwete. ¹³Teeche jycaase ente' chjamb eca casejtja'w yu'wala pucate Dyus yacj puuty we'weya' pcjaacjenite, sa' Dyus yuwe's pta'shtja'w cyte u'y pcjaacjesaty. ¹⁴Atsa' cyte pcjaacjesa teeche'sa' Lidiac yaase yu', Tiatira chjambuwe'sh, tela zhichcuesaty tyweysáa. Tyãa u'ya' Dyusna nwëese'jsac tyã'wê Pablo pta'shni's wëse'jna u'pu'. Atsa' Dyusa' tyajy üuste caajiyu'cj Pablo pta'shni's. ¹⁵Tyajü' tyajy yattewe'sh yã'jrra jyuca yu'te ya'bautisãyrra', na'jīnac cue'shtyi pytjaa we'wena pi'cy:

—Ü'cue' Dyus yacj fi'nzewa'jsate i'cue'sha' ew jiirra', ü'cue yatte myujwe de'jya' jirra āandyijimeerra pe'jna u'cj.

¹⁶ Teech ente nyaffi ūsnitey u'juetsrra', puuty uytja'w teech cna'sa's echtjē'j tyajy ūuste caajiyu'tje pta'shna u'jusa yacj. Tyāa cna'sa' patron jype'jnisa cu'ga yu', sa' patronwe'shtyi wala vyu caacnayuju'cu'ga tyā'wē quij̄nava ūuste jiyurra nasaty pta'shna. ¹⁷ Tyāa cna'sa' cue'sh e'stey yuwe'c Pablo's na'wē sus we'wena:

—Naa pitstjē'jwe'sha' cielute Dyusna selpisaata', tyāasaty i'cue'shtyi' pta'shi' ewte u'jwa'j dyi'ja's jīna.

¹⁸ Manz enva tyā'wē yūute', nmejte' Pablo' cuchrra na'wēc we'we tyāa cna'sa ūuste u'psa echtjē'ja's:

—Jesucristo jycaajni's nwēese'jrra, tyāa cna'sa ūusuj mcaasej jīspcachja', echtjē'ja' casejc.

¹⁹ Nava patronwe'sha' tyāa cna'sa pa'garrāa vyu cnayna fi'nzeni's iviituyā'jrra', Pablowe'shtyi uwerra chjamb pyājte jyūna u'jrra ²⁰ cyte cjuēswe'shtyi na'jīnaty pāatyjī'cj:

—Naa pitstjē'j judiuwe'sha' wala cuch yuuna ūsta' cue'sh chjambte.

²¹ Quijva cue'shtyi selpiwa'jmeesarrāanaty caapiya'ja', atsa' tyā'sa' cytey yuuya' ājāme'nja'w, cue'sha' romano nasatja'w naa pa'ga jīte', ²² nasa' wala ūusachana ajtsety. Atsa' cjuēswe'sha' Pablowe'shtyi csūupi'jrra pechuucue caajty. ²³ Tyā'wē wala pcyuurra', carcelte ctyaaja'jrra cyte tjengna ūssa's wala jypa'yacy tjeng caatje', ²⁴ cyte tjengsa' carcel dyiite jwee dyiiju pe'jna u'jrra telte chindaty se'wrrac qui'p.

²⁵ Nava Pablowe'sh cuspyāj Dyus yacj puuty we'wena memna u'pte', vite preesu' wēse'jna u'ppcachja', ²⁶ ejnd seena' chjāchja u'tje', carcel vitya' jyuca pjaatety, atsa' preesu tundni cadenava chuctetety. ²⁷ Tyajū' carcelte tjengsa yajcyrra', carcel vity jyuca pjaattera ūste uyrra', cchilla's cutyi'jrra peequírrāa ya'icjya'vac yu', preesu' jyuca casejrra u'jne'ta sūjna ūucjrra. ²⁸ Atsa' Pablo' na'wēc we'we:

—Tyā'wē yūunu. Jyuca ūstja'w ayte jīte', ²⁹ carcelte tjengsa' bela pqui'tarra ūucjna wuwuurrāa cūjrra, Pablowe'sh tashte peejyūcuc.

³⁰ Tyajū' Pablowe'shtyi cutyi'jrra na'wēc pējy:

—I'cue'sha' mpeeta'shwe, ¿ma'wē yūurra Dyusa's uyuuqui'tj? jīte',

³¹ Pablowe'sha' na'wēty pta'sh:

—Cue'shtyi jype'jsa Jesucristo's jypa'garra yuurrāa Dyus yacj fi'nzewa'ja's uyuune'nga pety iindy yattewe'sh yā'jrra jyuca.

³² Tyajū' Dyus yuwe's pta'shtyi tyajy yattewe'sh jyucaysaty. ³³ Sa' carcelte tjengsa' tyāa custey Pablowe'sh cpā'ty pcji'cyna'va tyajy yattewe'sh yā'jrra jyucaysa ya'bautisātyti. ³⁴ Tyajū' tyajy yatna pe'jna u'jrra puutscu, sa' wala wechana ūsu'c Dyus yacj fi'nzewa'ja's ji'pjutja'w jyucaysa jīna.

³⁵ Tyajū' cjuēswe'sha' cusfi policia caajty carcelte tjengsa tashna Pablowe'shtyi' tyjweetecajn pta'shya'. ³⁶ Atsa' carcelte tjengsa' pta'shcu Pablo's:

—Cjuēswe'sha' tyjweetecaajty i'cue'shtyi'. Atsa' casejrra ūucjmée me'ljwe jíte', ³⁷Pablo' na'wēc we'we policiawe'shtyi:

—Cue'sha' romano nasateva ajtserra nasa jyuca uyna ūste pcyuurra carcelte cyuupjtyi, quīj yūupa'ga yuuweteva tyā'sa' jiyumey. Sa' āchja' paatste quīm yujva jiyunimeete tyjweete'nja'w ¿sūjuv'nta? Tyā'wē yūuya' yu' ājameetyna. Cue'shtyi cutyi'jya' tyāawe'sh yuu yuwetyna jíte', ³⁸policiawe'sha' u'jrra cjuēswe'shtyi tyā'wēy pta'shte', tyāawe'sha' wala ūucjtyi, Pablowe'sha' romano nasateva jiyurra'. ³⁹Tyajū' cjuēswe'sha' Pablowe'sh tashna u'jrra jypumbane'tca'w jīna pytjaa we'werra carceluj cutyi'jrra chjambuj casej caajty. ⁴⁰Atsa' Pablowe'sha' carceluj casejrra', cyte chjambte Lidia yatnaty u'j. Sa' ūucjmée meswe jīna yacjtjē'jwe'shtyi cviisha'jrraty tyajū casej.

Tesalonicate nasa ūuschani

17 ¹Pablo Silas yacj Anfípolis Apolonia chjamsu ctejcana u'jrra, Tesalónica chjambtety pa'j judiue'sh pcjaacjeni yatte. ²Pablo' jycaase ensu' tecj qui'supcachcu Dyus libru ma'wēne' we'we' tyā'sna caapiya'jna ūsu' judiue'sh pcjaacjeni yatte. ³Sa' āatec pta'sh:

—Dyus tashuj yuusa' wala pytjaa yuurra uurrava qui' ityi yuuwa'jsac yu', atsa' andy i'cue'shtyi pta'shi'tj Jesus jīna tyāafic Dyus tashuj yuusa Cristo yu'.

⁴Tyajū' judiue'sh maaíi yu' tyā'wē Jesusa' Dyus tashuj yuusa Cristo yuj yu'ne' sūjrra Pablowe'sh ju'nguty yuu. Tyā'wēy wala cuj griego Dyusna nwēese'jsava utyaaty, vite' u'yva wala cuj utyaaty jyutjjesawe'sh. ⁵Tyā'wē yūute', vite judiue'sh Pablo pta'shni's atsesa yu' wala ūusacharra nasa ewmeesaty pcjacjrra chjambte wala seena' csuusu'ty cuch yuuna. Sa' Jasón yatte Pablowe'shtyi pacueya' u'jty tyajū cutyi'jrra nasaa cshavyte ducjya'. ⁶Nava tyāawe'shtyi uymeerra', Jasón vite' yacjtjē'jwe'sh cyte ūssarráatyva wenzhna u'jrra chjambte cjuēs tashte cuutya'jrra na'wēty wēeshu:

—Tyāa nasa naa quiwe's jyuca caypumba'jsawe'sh ayteva pa'tja, ⁷atsa' Jasona' tyajy yattega jypa'ga. Tyāawe'sha' jyucaysa atse'ty Romate jycaajsa leya's, tyā'wē vite jycaajsa Jesus yaasesa ūsa' jīrra.

⁸Tyā'jīna we'wete', cjuēswe'sh nasa jyucaysa wala seena' sustyi. ⁹Nava Jasón vite' tyāa yacj ūssawe'shtyi vyu cusa'jrrarráa tyjweetety.

Pablo Silas yacj Bereate pa'jni

¹⁰Cyte yacjtjē'jwe'sha' tyāa custey wala dund caajty Pablowe'shtyi' Berea chjambna. Cyte pa'jna'va u'jty judiue'sh pcjaacjeni yatna. ¹¹Cyte judiue'sha' wala ew yu'ty Tesalonicatewe'sh na'wēmée. Dyus yuwe's wala wechana jypa'garra, een isaty Dyus libroute pacué' Pablowe'sh pta'shni isa dyijteva jiyuya'. ¹²Tyā'wē cyteewe'sh wala cujsa jiyuty Pablo

pta'shni' isa yuj yu'ga sũjna, vite' u'y griego jytujtjesa pety pitstjẽ'j yã'jrra. ¹³Nava judiu Tesalonicatewe'sha' tyã'wẽ Pablo' Dyus yuwe's pta'shna ũsa' Bereate jĩni's jiyurra', Berea chjambna u'jrra cyte nasaty wala seena' caaũuscha'jty. ¹⁴Atsa' cyte yacjtjẽ'jwe'sha' jwee yu' caajytjẽyujmẽe Pablo's caajty Atenas dyi'j. Naasáa Silas Timoteo tyãawe'shrráaty neeyũu Bereate. ¹⁵Pablo yacj pi'cyna u'jsawe'sha' Atenas chjambna pa'jty u'j. Sa' qui' Bereate shawendna pa'jrra', Pablo' i'cue'shtyi wala dund yuuccacj tyãa yacj ũsya' jĩnaty pta'sh Silaswe'shtyi'.

Atenas chjambte Pablo pa'jni

¹⁶Pablo' Atenas chjambte Silas Timoteo tyãawe'shtyi ũytjasna ũsra', wala cuj yajcyna fi'nze'c tyãa chjamba' naa quiwete dyus ũtymeessarrarráatycu tyacue wala ji'pj yu' naa pa'ga. ¹⁷Tyãasac judiwe'sh pcjaacjeni yatte judiwe'sh yacj vite' judiameerrava Dyusa's yaacysawe'sh yacj puuty we'we', sa' chjamb pyãjsuva een isac we'we' Dyus ũtymeessaty neewe'wesawe'sh yacj. ¹⁸Tyajũ' cyte epicúreo caapiya'jni's piyana ũssawe'sh vite' estóico caapiya'jni's piyana ũssawe'sh pitstjẽ'ja' Pablo yacj puuty we'wety, naapcachja' maafi yu' na'jĩnaty we'we' tyãawe'sh pwe'sh:

—Naa tjẽ'ja' ¿quiiqui'c tyacue wala we'we'? ji'ty. Naapcachja' vite we'werra':

—Dyus jiyunimeesaty cysusnac pta'shi' ji'ty.

Pablo' Jesus uurra qui' ũtyi yuuni's pta'shpa'gaty tyã'jĩna we'we'.

¹⁹Tyajũ' Pablo's teech ajte Areópago yaasesate pe'jna u'jrra paapẽjtyti:

—Cue'shtyi meen peeta'sh na'wẽ yuwe u'sesa pta'shi'ng tyã'sa' jiyu wẽetja'w. ²⁰Na'wẽ quĩjva fiysa pta'shi'ng tyã'sa' ew áate mcaajiyu'j jĩna.

²¹Tyã'wẽ Atenastewe'sha' jyucaysa pcjaacjerra quĩjva u'se caapiya'jni's wẽse'jna puuty paapẽjynarráa fi'nzesaty yu', atsa' vite quiwejuwe'sh Atenaste u'p-ya' pa'lsava tyã'wẽtyti yu'.

²²Tyajũ' Pablo' Areópagote tyãawe'sh cshavyte yujurra we'wec:

—Atenastewe'sh i'cue'sha' dyusa's wala yaacysane'cue sũju'tj.

²³Msuuva i'cue'sh dyusa's neewe'wenisu tjengna u'jrra', uytju teech altalte na'wẽ fi'jnisa: Jiyunimeesa Dyusa' jĩnisa. I'cue'sh na'wẽ jiyunimeesa dyus jĩna neewe'wene'cue tyãa Dyus jiyunimeesa'stju andya' áate caajiyu'ju'. ²⁴Tyãa Dyuscu naa quiwe's vitrra cyte quĩquĩjrraj ũstyna tyáatyva jyuca vit. Tyãa pa'ga tyãafi namu' naa quiwe, cielu yã'jrra. Tyã' pitstjẽ'jwe'sh tyaa'jni yat-su ũsu'tsme'. ²⁵Tyã' naa quiwete nasa pu'chni fi'nzewa'jsame'. Tyãafi cue'sh jyucaysa ũtyi fi'nzewa'ja's ũs, quĩquĩjrra naa jyuca. ²⁶Sa' nasa maanzcuẽesava teech pitstjẽ'j ji'jrrarráa yuuwa'ja's vitrra, msuurraj u'pwa'jsateva pta'shna ena'sva tyujndec nus pa'jn qui' secna yuuwa'ja's. ²⁷Dyusa' ũsna sũjrra pacuerra' tjẽymẽe uycajncu tyã'wẽ yũu. Atsa' Dyusa's pacuete yu' cue'sh yacj jyul'meete ũsa'. ²⁸Cue'sha' Dyus ũste fĩrráatja'w ũtyi ěse'sena fi'nzeya' aja'. Dyus ũste ũtyi i'cue'sh

jil'j wala fi'l'ya' jiisawe'sh na'wẽ we'we: Dyus taqui'nitja'w jĩna. ²⁹Tyã'wẽ Dyus taqui'niyã'jrra', pitstjẽ'jwe'sh ũus yajcyrra nasa na'wẽ piisani ũsta' vyuu bej, vyuu chijme, cuet tyã'wẽsa' cue'shtyi taqui'satyna sũjwa'l' jil'pjmeetja'w. ³⁰Dyusa' nyaffi ensuy yu' ma'jĩme' nasa' jiimeerra ma'wẽva yũuteva. Nava ächja' jyucaytyi jycaaja'c pcaltiyi nvijrra Dyusa'srraa pacuecajn. ³¹Tyã'wẽme', Dyusa' teech ente naa quiwete yuuwesaty castigäywa'jsa tyjityjcu. Atsa' tyãa tyjityjnisa' cytey yuuyujuna. Tyã'wẽ yuuya' írráac uurrava qui' ityi yuu.

³²Tyã'wẽ uurrava qui' ityi yuuc jĩni's wẽse'jrra', maafi yu' weechtyi, naapcachja' vite we'werra':

—Vite encjẽ qui' pta'shine'nga, tyagach qui' wẽse'je'nja'w jĩ'ty.

³³Tyãljyã'tje', Pablo' u'cj. ³⁴Nava maafi yu' Pablo pta'shni isa yujna sũjrra tyãa yacj utyaaty. Cyte utyaasaawe'sh teechsa' Dionisio Areópagote pcjaacjesatewe'shcu yu', sa' teech u'y Dámaris yaasesava utyaac, vite yã'jrra.

Corinto chjambte Pablo pa'jni

18 ¹Tyãa e'su', Pablo' Atenasuj casejrra Corinto chjambnac u'j. ²Cyte' teech judiu Aquila yaasesa yacjcu puuty uy, Ponto quiwejuwe'sh. Aquila tyajy nyu Priscila yã'jrra u'serraa Italiaju pa'jrraty cyte ũsu', Romate jycaajsa Claudio' judiue'shtyi tyajũ jyuca cutyi'pja'ga. Atsa' Pablo' tyãawe'sh yatna u'jrra Aquilawe'sh yattec yuju. ³Tyãawe'sh na'wẽy tultu catsrrac tyweyna fi'nzesa yu', tyãasac cyte neeyũu tyãawe'sh yacj mjĩina. ⁴Sa' jycaase ensu' judiue'sh pcjaacjeni yatna u'jrra, cyte judiue'sh vite' judiueesatyva Dyus yuwe's pta'shi'c Dyus jĩi cnayya'.

⁵Silas Timoteo yacj Macedonia quiweju pa'tje', Pablo' vite mjĩia's nvijrra, Dyus yuwe pta'shwa'tje yuurraac yuju een isa, Jesusa' Dyus tashuj yuusa Cristo yuj yu'c jĩna judiue'shtyi caajiyu'jna. ⁶Nava tyãawe'sha' tyã'wẽ pta'shni's jypeejymetja'w jĩrra ajtsena weechwa'ja's uytyi. Atsa' Pablo':

—Andya' yuuwemeetj, i'cue'shtyi pta'sh yã'tj. Atsa' yuuwesa' i'cue'shi'cue peecy uuwa'ja's pacuena ũspa'ga jĩna tyajy atjni ropa's ya'tatac. Sa' tyã'wẽ yũupa'ga ächja' u'juetstju judiu jil'jmée vite nasaty pta'shya' jĩc.

⁷Tyãljĩna'va judiue'sh pcjaacjeni yatuj casejna'va, teech pitstjẽ'j Justo yaasesa yatnac u'j, judiue'sh pcjaacjeni yat pucateyrraa. Tyãa pitstjẽ'ja' Dyusna neewe'wena fi'nzesac yu'. ⁸Tyajũ judiue'sh pcjaacjeni yattewe'sh npiitstjẽ'jsa Crispo' tyajy ũuste Jesusa's nwẽese'jya' yajcyu pety tyajy yattewe'sh yã'jrra jyuca. Tyã'wẽy Corintotewe'shva wala cujsa Cristo's jiyurra ũuste jypa'gaty yu'te ya'bautisãyna.

⁹Tyãa e'su' Jesusa' teech custe na'jĩnac vyaarra we'we Pablo's:

—Wej yujva ũucjmée Dyus yuwe's mpeeta'sh. Tyā'wēme', naa chjambte andyna nwēese'jwa'jsa wala ũs írráata'. ¹⁰Tyāa pa'ga andya' indy yacj pi'cyna ũstju, atsa' quim yujva indya's icjya' yu' ājameetyna.

¹¹Tyā'jyā'tje', Pablo' Corinto chjambte tyāawe'sh cshavyte Dyus yuwe's caapiya'jna ũsu'c añu y medio ājpcach.

¹²Nava Acaya quiwete ne'jue'sh Galión ensu' judiue'sha' Pablo's ajtserra cjuēs tashte jyūna u'jty. ¹³Sa' na'jīnaty pta'sh ne'jue'sha's:

—Dyusa's nwēese'jwa'ja's ley jycaaja'c tyāa jycaajni' casejrra Dyusa's fiy nwēese'jwa'ja'scu caapiya'ja' naa pitstjē'ja' jīte', ¹⁴Pablo pasya'vagachja', ne'jue'sh Galión cjuē'y judiue'shtyi we'wec:

—Yuwe ewmeesa's andya's pāatyji'cjetsvatsa', pu'chjivá'nja i'cue'sh pāatyji'cjni's. ¹⁵Nava i'cue'sh pwe'sh fi'nzeni leyrrá' atsa' tyā'sa' i'cue'sh pwe'sh mpjeu'jwe. Andya' tyāasu' tjengu ji'pjmeetj jīrra, ¹⁶tyajū eca cutyi'cj. ¹⁷Atsa' judiue'sh pcjaacjeni yatte npiitstjē'jsa Sostenesa's uwerra, pāpaty griegowe'sh jyucaysa ne'jue'sh dyi'pte. Nava Galiona' cuch ma'jīme'.

Pablo Dyus yuwe's pta'shya' qui' casejc naa yacja' tecj us

¹⁸Tyā'wēteva, Pablo' wala cuj en ũsu'c cyte. Tyāa e'suc cyte yacjtjē'jwe'shrráaty nvijtrra, Siria quiwen u'jwa'j ji'pju barcote cjēerra Priscila Aquila yā'jrra. Tyāa dyi'j u'juetsrra', Cencrea chjambte pa'jrra barcote cjēemey tyajy dycjasa's jyuca ctyiindyi'c. Dyus yacj yuurráa fi'nzewa'ja's Dyus yacj puuty we'wenac tyā'wē yūu. ¹⁹Tyajū' Efeso chjambte pa'jrra', Pablo' Priscila Aquilawe'shtyi nvijtna'va, judiue'sh pcjaacjeni yatna u'cj, cyte judiue'shtyi Dyus yuwe's caajiyu'jya'. ²⁰Atsa' tyāawe'sha' wala pytjaa we'wety cuj en ũscajn. Nava Pablo' cytey yuumée, ²¹tyajū qui' casejc na'jīrra:

—Jerusalente fiesta u'puya'va' cyte ũswa'j ji'iptju. Nava qui' shawendu'nja i'cue'shtyi tjengya', Dyus ma'wē jytjāaste' jīna we'werra, Efeso chjambuj barcote cjēerra u'cj. ²²Sa' Cesarea chjambte pa'jrra', Jerusalennac u'j cyte pcjaacjesawe'shtyi wechaya'. Tyajū' Antioquía chjambnac u'j. ²³Cyte manz en ũsrrarráa, tyajū qui' casejc Galacia Frigia quiwesu nyafii pta'shni'su jyuca pecūjya', Dyus yacj fi'nzesawe'shtyi cchjāachja'jna.

Efeso chjambte Apolos Dyus yuwe's pta'shni

²⁴Tyāa ensu' teech judiu Apolos yaasesa Alejandría chjambuwe'sh pa'cj Efeso chjambte, Dyus libru Moises fi'jni's ew jiisa caapiya'jya' shiingmeesa. ²⁵Sa' Jesucristo quimteva pta'shni jiic yu', tyāasac Juan yu'te bautisāynirráana jiirrava tyajy jiyuni yu'sa' jypumbamée caapiya'ja'. ²⁶Apolosa' judiue'sh pcjaacjeni yatte u'carra shiingmeec pta'shi'. Atsa' Priscila Aquilawe'sh jiyurra', tyāa Apolos tyā'srráa fii pe'jna

u'jrra, jweeírráaty ew pta'sh Jesucristo yacj fi'nzewa'ja's jyuca. ²⁷Atsa' Apolosa' Acaya quiwen u'juetste!, yacjtjê'jwe'sha' u'jwa'ja's pu'chrra teech carta fi'jty Acayate yacjtjê'jwe'sh wa'lmée jypa'gacajn. Tyā'wē Acayate pa'jrra', wala pu'chcu Dyus peeygājrra nwe'wenisaty na'wē yūuna: ²⁸Jesusa' Dyus tashuj yuusa Cristo yuj yu'c, i'cue'sh ūytjasni tyā'sna i'cue judiuwe'sh jypumba jīnac pta'shi', Dyus librute ma'wē fi'jni ūsna tyāa yacj caaja'nda'jna.

Efeso chjambte Pablo pa'jni

19 ¹Apolosa' Corinto chjambte ūspcachja', Pablo' yatscjēy pecūjni quiwesu pa'jna u'jrra Efeso chjambtec pa'j. Cytea' Jesucristo's iiwēse'jsa yacj puuty uyrra', ²na'wēc pējy:

—I'cue'sha' Jesucristo's jiyunijū' ¿Dyus Espiritu's jypa'gacue'? jīte!, na'wēty pas:

—Dyus Espiritu's naa quiwete caajnic yuu jīnirráa yujnava iiwēse'jmeetja'w cue'sha'.

³Tyājū' Pablo' pējyuc:

—I'cue'sha' ¿quīj yūuya' sūjrracue ya'bautisāy? jīte!, tyāawe'sh pasrra':

—Juan pta'shrra': Ya'bautisāywa'ja' jīc atsráatja'w ya'bautisāy jīty.

⁴Tyājū' Pablo' na'wēc pta'sh:

—Juana' yu'te bautisāyuc pcaltyi nvijrra peena yu' pcalte fi'nzemeene'cue, Dyus tashuj yuusa Cristo andy e'ste yuja' tyā'sna jypa'gaya' jīrra bautisāysac yu' jīte!, ⁵tyāawe'sha' ya'bautisāytyi Jesusa's nwēese'jya' sūjrra. ⁶Tyājū' Pablo' tyāawe'sh dyictjesu peequinzerra Dyusa's neewe'wete!, Dyus Espiritu' tyāawe'sh ūuste cjēc. Atsa' vite yuweju we'weya' ājawa'ja's jypa'gaty, sa' Dyus quīj yūuya'vateva dyiicjēy pta'shya' ājaty. ⁷Tyā'wē yūusa' doce pitstjē'jty yu'.

⁸Pablo' cyte ūsrra' judiuwe'sh pcjaacjeni yatna u'jna nescu yu' tecj a'tepcach. Sa' nasaty ewcu caajiyu'ju' Dyus jycaajwa'j ena's. ⁹Nava vite yu' tyā'wē pta'shni's wēse'j wēemeerra, atsewe'wety nasaa cshavyte. Atsa' Pablo' tyāawe'sh tashuj tyuteerra Jesucristo's jypa'gasawe'shtyi pe'jna u'cj Tiranno caapiya'jni yatna, sa' cyte' een isac pta'shi' e'nz añupcach. ¹⁰Atsa' Asia quiwesu u'psa jyucaysa jiyuty judiu vite' judiumeesava Jesus caapiya'jni's. ¹¹Tyājū' Dyus pu'chte!, Pablo' nuycatyji'c quīj weete ātsa'satyva jyuca. ¹²Tyā'wē yūuyā'tje!, Pablo' ropa meerra' pañuelo quījrráanava jyūna u'jue'ty ātsa'sawe'sh jya'ndycajn. Atsa' tyā's jya'ndyrrarráa quīj weejuva catyji'ty, tyā'wēy echva tyāawe'sh ūusuj caseje'ty.

¹³Tyā'wē yūute!, judiuwe'sh dyijyuurra echtyi nasaa ūusuj cutyi'jsawe'shva Jesus yase's cysusrra echtyi cutyi'jya' na'wēty we'we':

—Pablo cysusnisa Jesus yasete jycaajatstju casejcajn jīnaty we'we'.

¹⁴Tyā'wē yūusa' sacerdote npiitstjē'j Esceva nchi'c sietesaty tyā'wē yu'.

¹⁵Macue tyā'wē we'weteva, echa' na'wēc pas:



(Hechos 19.19)

—Jesusa's jiitj quimteva, sa' Pablo'sva iiyutju. Nava i'cue'sh yuutyi' jiimeetj quimteva. ¹⁶Tyā'jīna'va tyāa ech iiyamunisa nasa' jycaajna we'wesawe'sh cacuete āapjrra, tyāawe'sh atjni ropaty sundena cpā'vitna yūute', tyāawe'sha' ūpjna u'jty sūpyrrāa. ¹⁷Tyā'wē yūuni's Efeso chjambte ūssa judiūwe'sh vite' judiūmeesava jiyurra' Jesus yase's cysusya' wala ūucjtyi, sa' Jesusa's wechanarrāaty fi'nze'.

¹⁸Tyājū' Pablo pta'shni' ewsa yujna sūjrra maanzcuēsava utyaaty tyāawe'sh ewmēe yūuna fi'nzeni's āate pta'shna. ¹⁹Atsa' tyā'wē dyijyuuna fi'nzesava jyucay tyāawe'sh libru ewmeesaty jyūna pa'jrra', jyucaysa dyi'pte cambtyi. Tyāa libru' jyucarraj yu' cincuenta mil peso ājty pa'gasa yu'. ²⁰Tyā'wē yūute', Dyus yuwe' jwee'fīrrāac chjāchja walaana u'j.

²¹Tyāa e'su', Pablo' Jerusalenna u'juetsrra', Macedonia Acaya quiwesu pa'jna u'jya'c yajcy. Sa' Jerusalenuj Roma chjambnava u'jue'nja sūjrac yajcy. ²²Tyājū' Macedonia quiwen caacj tyā'sna pu'chna u'jusa Timoteo vite' Erasto tyāawe'sh e'nzsaty. Nava tyāa yu' nee Asia quiwete ūsu'c manz en.

Efeso chjambte nasa ūuschari

²³Tyān ensu' wala seena' sustyi Dyus yuwe's ajtserrarrāa. ²⁴Tyāa yuwe quiissa yu' Demetrio vyyu chijme's dyus Diana ūsni yat na'wē pjeu'jrra tyāa yacj mjīisaty wala vyyu caacnayu'jsac tyā'wē yūu. ²⁵Sa' tyāa yacj mjīisa vite' tyāa na'wēy pjeu'jsatyva jyuca pcjacjrra na'jīc:

—I'cue'sha' jii i'cue na'wē mjīirra' quīj yujva peejymetja'w vyyu uyu'. ²⁶Nava i'cue'sha' iiwēse'jne'cue Pablo jīnisa' naa chjamb Efesoterrāamēe, Asia quiwete msuuva nasaty' jyuca tyajy ju'ngu tupjitsa', tyā'wē pitstjē'jwe'sh pjeu'jni dyusa' ityimeesata' jīrra. ²⁷Na'sa' mpa'yajcywe. Tyā'wē yūumeete', cue'sh mjīinirráa vitumēe, dyus Diana ūsni yat tyacue wala jytujtjesa yuu vituna. Atsa' Asia quiwetewe'sh jwee vite quiwetewe'shva dyus Diana tyacue zhichcuesa's jwee yu' nwēese'jmeetyna.

²⁸Tyā'jīna we'wete', wala ūusacharra na'jīnaty sus we'we:

—Efeso chjambte dyus Diana yuurráa maateva jytjaacue jytujtjesa' jīnaty sus. ²⁹Atsa' tyāa chjambtewe'sh jyuca ūusacharra e'nz pitstjē'j Macedoniajūwe'sh Pablo's pi'cyna yuusa Gayo Aristarco tyāawe'shrrāaty uwerra wenzhna u'jty chjambte tyāawe'sh ūsnite. ³⁰Pablo' cyte u'ca wēec nasaty we'weya'. Nava cyte yacjtjē'jwe'sha' ca'ga'jmeeta'. ³¹Tyā'wēy Pablo namicu cjuēswe'sh jytujtjesava Pablo's cuch cyte u'cacaajmeeta'. ³²Naapcachja' pcjaacjesa yu' quījquījva ūuscha we'wena seena'ty susna ūsu'. Nava cyte pcjaacje pu'chsa jwee cujsa yu' jiimeety yu' quīj yūupa'ga tyā'wē pcjaacjeteva. ³³Nava cyte ūssa maafi yu' quīj yūupa'ga ūusachana ūsteva jiisa', teech pitstjē'j Alejandro yaasesa's pta'shrra nasaa cshavyte

ucapajcyna nuycũjty we'wewa'jsa. Atsa' tyāa pitstjē'ja' shuuna' yuuwa'ja's cuseju pta'shrra judiwe'sha' yuuwemeetja'w jīna we'we wēec. ³⁴Nava judiu írráateva jiyurra', jyucaysa qui' sus we'wety e'nz ora ājpcach na'jīna:

—¡Efeso chjambte dyus Diana yuurráa maateva jytjaacue jytujtjesa'! jīna.

³⁵Tyajū' chjambte secretario' peja shuuna' vitrra' na'jīc:

—Efesotewe'sh mwēese'jwe. Naa chjambte nasa' dyus Diana ūsni yata's wala jypa'yacy tjengna vite' Diana's piisanisa cieluju quīj tyā'snava tyā'wēy ew jype'jwa'jsateva jyuca jiita' maa quiwetewe'shva. ³⁶Atsa' ħma'wē yūurra tyā'sa' tjengmēe nvijt-ya' ājatyqui? Tyā'wē yu' yuumeetyna. Tyāa pa'ga wejy cuj yajcymēe shuuna' myuuwe. ³⁷Tyāa pa'gatey e'nz pitstjē'j i'cue'sh jyūna cūji'cue tyāawe'sha' i'cue'sh dyus Diana's suwvameeta' sa' atsewe'wenava ūsmeeta'. ³⁸Meerra' Demetrio vite' tyāa yacj mjiisawe'shrráa maa yacj iipuiisarrava, pāatyjī'cjwa'j ji'pjta', tyāa pa'gatey cjuēswe'sh ūsta', atsa' tyāawe'sh tashte pāatyjī'cjya' u'juetyna, cyaj caapdyi'pu'jrra yuwe's pjeu'jutyna quījterraj yuuwesateva. ³⁹I'cue'sha' cjuēs tashtemēe i'cue'sh pwe'shrráa puuty we'wewa'j ji'pjrrava, zhichcue mpuutywe'wewe tyā'wē susmēe. ⁴⁰Na'wē āchj susni yuwe's gobierno' paapēyiváana atsa' seena' ewmeete neeyūuwa'tje ūstja'w, quījva yuuwemeete suspa'ga.

⁴¹Tyā'wē we'werra', caaptsu'juc tyāa susni's.

Macedonia vite' Grecia quiwen Pablo u'jni

20 ¹Yuwe susni ptsuute', Pablo' Dyus yacj fi'nzesawe'shtyi pa'yarra wala ew yu'cypejrrac tyāawe'shtyi wecharra Macedonia quiwen u'j. ²Tyāa quiwesu jyuca pecūjc yacjtjē'jwe'sh ūucjwe'shte cchjāachja'jna. Sa' tyajū' Grecia quiwenva u'cj. ³Cyte tecj a'te ūsrra', barcote cjēerra Siria quiwen u'jya'vac yu'. Nava judiwe'sh icjya'vata' tyāa dyi'tje jīni's jiyurrarráa, barcote u'jmēe chindarráa maa dyi'june' pa'j tyā'wēycu shawendya' yajcy, Macedonia quiwejuy uycjēwna. ⁴Tyāa yacj pi'cyna u'jty Sópater Bereajuwe'sh, Aristarco vite' Segundo Tesalonicajuwe'sh vite' Gayo Derbejuwe'sh vite' Timoteo vite' Tíquico Trófimo tyāawe'sha' Asia quiwetewe'shtyi yu'. ⁵Tyāa yacjtjē'jwe'sha' dyi'j pyājū yatste u'jrra Troas chjambtety cue'shtyi ūytjas. ⁶Pan levadura ji'pjmēe ū'ni fiesta scjēwniitetja'w cue'sha' casej, Filipos chjambuj barcote cjēerra, sa' tajts ente' cpajcytja'w Troas chjambte. Cyte siete entja'w ūsu'.

Troas chjambte Pablo wechaya' pa'jni

⁷Qui'sen ente', Dyus yacj fi'nzesawe'sh yacj pcjaacjetja'w cyterraj pcjaacjerra ū'ya'. Naapcachja' Pablo' Dyus yuwe's caapiya'cj. Tyā'wē cuscuscjē' u'jue ji'pjrra', tyach cuspyājnpcachcu pta'shna ūsu', ⁸teech

piesate êete wala kuj lampara pqui'tanisa ũsu'ty cytee. ⁹Atsa' cyte teech pitstacy Eutico yaasesac ventanate cachrra u'pu'. Tyã'wẽ Pablo' wala jyu'j we'wete!, tyãa pitstacya' dee wẽerra dejna u'píi saapajcycu yat êe walaju, atsa' uuniisa'styi quiiis. ¹⁰Tyã'wẽ yũute!, Pablo' sa'jrra, tyãa uusa's psha'ndrra na'wẽc we'we:

—Yacjtjẽ'jwe'sh, ñusnuwe, qui' ïtyi yuuc jĩnac pta'sh. ¹¹Tyajũ' Pablo' qui' êe yatte tejcarra Santa Cena's puutscu. Tyã'wẽ yũurra cjicjyna sějpcach pta'shrrac u'j. ¹²Tyãa pitstacya' qui' ïtyi yuute!, pe'jna u'jrra jyucaysa wala wechana neeyũuty.

Troas chjambu Mileto chjambna u'jni

¹³Cue'sha' barcote cjẽerra yatste u'tja'w Asón chjambna, Pablo's cyte ũytjasya'. Naapcachja' tyã' chindajc u'j. ¹⁴Asón chjambujc cue'sh yacj barcote cjẽe, atsa' tyajũtja'w Mitilene chjambna u'j. ¹⁵Tyajũ qui' casejrra vite encjẽ' Quío quiwe pucasutja'w scjẽw. Sa' vite encjẽ' Samos quiwetec barco' dundte utyaa. Tyajũ qui' u'jrra', teech ajte Trogilio yaasesate pa'jrratja'w jycaase. Tyajũ' vite encjẽ' qui' u'jrra' Mileto chjambte pa'tja'w. ¹⁶Pablo' Asia quiwete jytjẽeyuuya'mée, Efeso chjambte u'came', Jerusalente dund pa'jrra Pentecostes fiestate ũsya' sũjrra.

Mileto chjambu Efesotewe'shtyi pa'yani

¹⁷Sa' Mileto chjambte pa'jrra', Efeso chjambte ancianowe'shtyi pa'yac na'wẽ we'weya':

¹⁸—Andya' Asia quiwete nyafyrraj pa'jĩi quĩjtca yũuna fi'nze ächpcach tyã'sa' i'cue'sha' jii i'cue. ¹⁹Judiuwe'sh atsepa'ga tyacue wala ñuswa'j en pa'tjeva, Jesucristo's een isa selpiina bagachteva i'cue'shtyi ũ'ne pety cjacj pu'chna nestju yu' quim yujnava iıwejch we'wemée. ²⁰I'cue'shtyi selpiwa'jsa Dyus yuwe's pta'shmée yu' yuumée, nasaa cshavysu yat-suva caapiya'jna nestju yu'. ²¹Tyã'wẽy judiuwe'sh vite' judiu jil'mée tyãawe'shtyiva jyucaysaty pta'shtju: Dyus tashte shawendya' pcaltyi nvijrra cue'shtyi jype'jsa Jesucristo'sva ũuste miipa'gawe jĩna. ²²Ächja' u'juetstju Jerusalenna Espiritu caajni. Nava jiimée u'juetstju cyte jwee quĩjrra yuune'tjeva. ²³Naasáa na'wẽ yuurráa jiitj: maa chjambte u'tjeva Dyus Espiritu' pta'shna nescu yu' carcelte cyuupjni wala ñuswa'j jipjngu jĩna. ²⁴Nava tyã'sa' yaaquĩtsmeetj, sa' andy uuwa'ja's yujva ũucju'tsmeetj. Jesucristo neewe'wec Dyus peeygãani's tyã'sna uu entepcach wechana pta'shna fi'nzevatsrráa, tyã'wëena sũju'tj.

²⁵Ayte i'cue'sh yacj ũsrra' Dyus jycaajwa'j ena's pta'shtju tyã's wëse'jsa aytewe'sha' andya's ächjuyã'ja' peena yu' uymeene'cue sũju'tj. ²⁶Nava andya' i'cue'shtyi caapiya'jyã'tj na' yuuwemeetj, ²⁷tyãa pa'gatey Dyus jytjãasni's paatste nvijtmée jyuca äaterrarráatj pta'sh naa pa'ga. ²⁸Atsa' ächja' peequíi ya'mpa'yajcywe, tyã'wẽy Jesucristo ee pcawrra weynisa

Dyus luuchtyiva ew jype'jna, Dyus Espiritu' i'cue'shtyic tjengwa'jsa nvijt naa pa'ga. ²⁹Jiitj andy u'tje', vite pa'jatyna Dyus yacj fi'nzesawe'shtyi iviitu wēena, shi'j weesweeva ma'wēta piishaaty iviitu' tyā'wēy yūuya'. ³⁰Jypa'yacymeerra', i'cue'sh pwe'shíiva casejene'cue isasa's pta'shipcachte caypumba'jwa'jrrá's pta'shna Dyus yacj fi'nzesaty caypumba'jna. ³¹I'cue'sha' miiyajcywe, andya' tecj añutj teehsa na'wērraj yu'cypejna ūsu' en pety cus yā'jrra ū'ne pety cjacj.

³²Āchja' yacjtjē'jwe'shtyi Dyusa's neewe'werra tyajy cusete nviitutstju tyajy caapiya'jni's pechcanamée fi'nzecajn, tyāa pa'gatey tyajy yuwe' cchjāachja'jna wechana caafi'nze'jrra cielute tyajy nwe'wenisa jyucaysa yacj ūswa'ja'sva ūsya' ājawa'jsa'. ³³Andya' i'cue'sh yacj ūsra', vyu, ropa, tyā'wēsa pees jytjāasna fi'nzemeetj quim yujnava. ³⁴I'cue'sha' ew jii i'cue tyā'wē yūumée, andy cuseju mjīrratj quij peejini'sva uyu', vite' andy yacj u'jusawe'sh jīiva tyā'wēy. ³⁵Tyā'wē vite jypeejysaty pu'chwa'ja's caapiya'jnatj fi'nze bagachteva. Tyā'wē yūucajnīc Jesucristova na'jī': Peessa yacj wejy wecha yuja' jypa'gasate jytjaacue jī'c.

³⁶Pablo' we'wena jyā'jrra', jyucaysa yacj peejyūcuerra Dyus yacj puuty we'wec. ³⁷Tyājū' jyucaysa ū'nena psha'ndrra Pablo's wechaty. ³⁸Tyā'wē peena yu' uymeene'cue jīte', wala ūusna ūsu'ty, sa' pi'cyna u'jty barcote cjēepcach.

Jerusalenna Pablo u'jni

21 ¹Yacjtjē'jwe'shtyi nvijtrra, barcote cjēena'va teejwend u'tja'w teech ajte Cos yaasesate. Sa' vite encjē' Rodas quiwete pa'tja'w. Tyāajū Pátara chjambnatja'w u'j. ²Pátara chjambte pa'jrra, teech barco uytja'w Fenicia quiwen u'jsa, tyāatetja'w cjēerra u'j. ³Chipre quiwe's uynatja'w scjēw, tyā' jembu ju'nguc neeyūu. Tyā'wē u'jrratja'w Siria quiwete pa'j. Sa' Tiro chjambte u'catja'w barco' cyte carga spāashwa'cj ji'pju' naa pa'ga. ⁴Cyte' Cristo's nwēese'jsawe'shtyitja'w uy, sa' siete entja'w ūsu' tyāawe'sh yacj. Atsa' tyāawe'shtyi Dyus Espiritu caajiyu'tje', Pablo's pta'shtyi Jerusalenna u'jmeene'nga jīna. ⁵Tyā'wēteva, siete en scjēuutspcachja', casejtja'w. Atsa' Cristo's nwēese'jsawe'sh jyucaysa nyuuwe'sh pety luuch yā'jrra pi'cyna yuwe'ty chjamb ecaju casejpcach. Sa' cyte ĩcj pucate peejyūcuerra Dyus yacj puuty we'werra, ⁶psha'ndna wechana'va barcote cjēetja'w. Naapcachja' tyāawe'sha' shawendtyi yatna.

⁷Cue'sha' Tiro chjambuj barcote u'jrra, Tolemaida chjambtetja'w pa'j. Cyte teech entja'w ūsu' yacjtjē'jwe'shtyi wechana. ⁸Vite cuscuscjē' Pablo vite' tyāa yacj u'jusa yā'jrra casejtja'w Cesarea chjambna u'jya'. Cyte pa'jrra', Felipe yatna u'jrra cytetja'w dej. Tyāa yu' Pedro tyjityjcu siete diácono tyāatewe'shcu yu' Jesucristo caapiya'jni's jypa'garra pta'shna pecūjsa. ⁹Tyāa Felipe' pajnz niisa cna'sasac ji'pju', Dyus we'weni's pta'shsa. ¹⁰Cyte manz en ūspcachja', teech pitstjē'j pa'cj, Agabo yaasesa

Judea quiwejuwe'sh, Dyus quiŷ yũuya'vateva dyiicjẽy pta'shsa. ¹¹ Tyã' cue'shtyi puuty uyrra', Pablo jytundni's pẽjyrra peequírráa chinda pety cuse yacj ya'jytundrra na'wẽc we'we:

—Dyus Espiritu' pta'shi'c, Jerusalente judiuwe'sha' naa jytundni namu's na'wẽ tundrra vite nasaty ducjetyna jĩc.

¹² Tyã'jĩni's wẽse'jrra', cue'sh vite' Cesareatewe'sh yã'jrra wala neevishatja'w Pablo's Jerusalenna u'cjamen. ¹³ Nava Pablo' na'wẽc pas:

—¿Quijya'cue tyacue ñusna ũ'ne', andyna cjaawãshi'j wẽerra? Andya' Jesucristo's selpiipa'ga tundnirrãa yuumée, Jerusalente uuwa'j ma'c yuu nava tyã'sa' ũucju'tsmeetj jĩc.

¹⁴ Neevishaya' ajameeyã'jrra', Dyus ma'wẽ jytjãaste' cytey yuuna jĩnarráatja'w we'we.

¹⁵ Tyãa e'su', pjeu'jna'va Jerusalenna u'tja'w. ¹⁶ Atsa' Cesareate yacjtjẽ'jwe'sh pi'cyna yuwe'ty, vite' tyãawe'sh yacj teech pitstjẽ'j Chipre quiwejuwe'sh, wala tyachyã'j Dyus yacj fi'nzesa Mnasón yaasesava yuwe'c. Atsa' cue'sha' tyajy yatte de'jya'tja'w puuty we'we.

Pablo Jerusalente pa'jrra Jacobo tashna u'jni

¹⁷ Jerusalente pa'tje', cyte yacjtjẽ'jwe'sha' wala wechana jypa'gaty.

¹⁸ Vite encjẽ' Pablo' cue'sh yacj u'cj Jacobo yatna pa'jya', atsa' cytea' ancianowe'sh jyucaysaty ũsu'. ¹⁹ Pablo' wechana jyã'jrra', pta'shcu judiu ji'jmée vite nasa cshavysuva Dyus yuwe's pta'shte', tyãawe'shtyi Dyus ma'wẽ yũuni'sva jyuca. ²⁰ Atsa' wẽse'jrra', Dyusa's wala wecharra na'wẽty pta'sh Pablo's:

—Yacjtjẽ'j, indya' jiiyã'jne'nga judiu ji'jwe'sh wala cujsa Jesus caapiya'jni's jypa'gasa ũsta', sa' tyãawe'sha' Moises leya's nviitmeete ewna jĩ'ty. ²¹ Tyãawe'sha' na'jĩni'sta jiyu: Indya' judiuwe'sh jyucaysaty vite quiwejuwe'shtyi caapiya'jrra Moises jycaajni's nwẽese'jmeene'cue, sa' i'cue'sh luuchtyiva circuncidãimeene'cue, quĩ yujnava cytey yuuwa'jme', tyã'jĩnac pta'shi' jĩni's jiita'. ²² Sa' iindy pa'jni's jiyurra', tyãawe'sha' indya's wẽse'jya' pcjaacjetyna, atsa' ¿quĩ yũucytja'w? ²³ Wejyva na'wẽ yũune'nga: Ayte pajnz pitstjẽ'j ũsta'. Tyãawe'sha' Dyus yatte u'caya' ajawa'ja's Moises ley jycaaja'c tyã'sa' cytey yuuya' ũsta'. ²⁴ Atsa' indya' tyãawe'shtyi dyuus yatna pe'jna u'jrra ley jycaajni qui'swa'ja's cytey cyu'ju'june'nga pety indy yã'jrra. Sa' cyte ducjwa'ja'sva indyrrarrãa deweene'nga. Tyajũ' tyãawe'sha' dycjasa's ctyiindy'jityna indyva tyã'wẽy. Tyã'wẽ leya's cytey yuute', maava jiyutyna tyã'wẽ Pablo' leya's nviitwa'ja' jĩnac jycaaja' jĩrra' ĩshijja'ne'ta sũjna. ²⁵ Nava judiu ji'jmée vite nasarrava Jesus caapiya'jni's jypa'gasawe'sh yu' ley jycaajni's cytey yuuwa'j ji'pjmeeta'. Tyãawe'shtyi' cue'sha' pta'shna fi'jyã'tja'w na'wẽ yũuwa'ja's: Dyus ĩtyimeesaty wechaya' tajcy icjni chicha's ũ'wa'jme', eenava ũ'wa'jme', tajcya's tjucrra

icjnisa chicha'sva ũ'wa'jme', sa' ptammeesa' pcal yūuna fi'nzewa'jme' jīna pta'shnisarrá's cytey yuuwa'jsata' jity.

Dyuus yatte Pablo's tundni

²⁶Tyajū' Pablo' tyāa pajnz pitstjē'jty pe'jna u'jrra', cuscus encjē' ley jycaajni's jyuca cytey yuurrac dyuus yat dyiite u'ca quīj entepcach qui'sya'varrava tyāaty pta'shya'.

²⁷Sa' siete en qui'swa'jty jyuca jyā'jatspcachja', Asia quiwejuwe'sh judiuwe'sh pa'jrra Pablo's dyuus yatte uyrra', nasa jyucaysaty caaūuscha'jna'va Pablo's tundrra ²⁸na'wēty sus we'we:

—Israelwe'sh, mpu'chwe. Naa pitstjē'jīc msuuva jyuca nasa jyucaysaty caapiya'jna pecūju' cue'sh jil'jty atsewe'wena, Moises leynava tyā'wēy. Sa' dyuus yatnava atsewe'we'c. Sa' tyā'wērrāa yūumée, āchja' judiu jil'jmée griegowe'shtyiva dyuus yat dyiite ca'gac canzh vitna jil'ty.

²⁹Efeso chjambuwe'sh Trófimo yacj Pablo' Jerusamente ũste ne'ta uy, tyāasaty dyuus yat dyiite ca'ga'jne' sūjrra tyā'jīna we'we'.

³⁰Tyā'jīna pta'shni seena' suste', nasa' wala dund cūjrra Pablo's tundrra dyuus yat ecaju wenzhna cutyi'jitspcachja', vitya's apjty. ³¹Icya'vaty yu', nava comandante' jiyuc Jerusalen chjambtewe'sh seena' susna ũsta'



(Hechos 22.24)

jīni's. ³²Tyājū' comandante' soldau vite' tyāawe'sh pwe'sh jytujtjesaty pcjacrja wuwuurráaty cūj nasa susna ūsnite. Atsa' comandante vite' soldauwe'shtyi uyrra', Pablo's icjmeeta'. ³³Tyājū' comandante cūjrra Pablo's e'nz cadenajuc tundcaaj. Tyā'wē yūurrac pējy ¿quimna sa' quījga yūu? jīna. ³⁴Nava nasa tyā'wē jyucaysa sus we'wena ūste', comandante jiyuya' ājameerra', cuartel yatna jyūna u'cjaacj. ³⁵Cuartel yat vityte cūjnarráa soldauwe'sha' Pablo's yacjrraty u'j, tyā'wē nasa' icj wēesa e'ste neeuna:

³⁶—Naa pitstjē'ja's icjwa'ja' jīna sus we'wena yuupa'ga.

Pablo cuartel vityuj we'weni

³⁷Pablo's cuartel yatte ca'ga'jatste', tyā' na'wēc we'we griego yuweju comandante's:

—¿Manz yuwerráava cwe'we'jmeema'ng? jīte', comandante pasrra':

—Indya' ¿griegová'nga? ³⁸Tyā'wērra' ¿nyaffi entey teech Egiptojuwe'sh na'wē nasa icjsarrarráaty cuatro mil āj nasa u'pnimeete pcjacrja puui quiiscu tyāameene'nga? jīte', ³⁹Pablo' na'jīc:

—Andya' judiutj. Cilicia quiwete Tarso chjamb jytujtjesatewe'shtju. Atsa' naa nasaty we'wewa'ja's ūsune'nga jīte', ⁴⁰comandante' ūytjascu. Naapcachja' Pablo' cuartel vityte yujuna'va cuseju shuuna' yuupa'ja's pta'shte', jyuca shuuna' yuuty, atsa' na'wēc we'we hebreo yuweju:

22 ¹—Yacjtjē'j vite' tjē'jsawe'sh, mwēese'jwe andy we'weni's jīte', ²hebreo yuweju we'weni's wēse'jrra', wejtyty shuuna' yuu. Tyājū' Pablo' na'jīc:

³—Andya' judiutj, Cilicia quiwete Tarso chjambte upysa. Nava ayte Jerusalente Gamaliel caapiya'jni walasaatj, cue'sh yatsgawe'sh leya's wala ew nwēese'jna. Bagachteva Dyusa's ūusuj jyucatj selpiina fi'nze', naa ente i'cue'sh ma'wēcue selpi' tyā'wēy. ⁴Andya' nyafi' Jesus caapiya'jni's nwēese'jsaty ajtserra quicje'jna vitetyi' tundrra jyūna u'tj pitstjē'j pety u'y yā'jrra carcelte tyajya'. ⁵Sacerdote npiitstjē'j vite' judiu ntjē'jsawe'sh jyucaysa jiita' tyā'wē Jesucristo yacj fi'nzesaty tundwa'ja's Damascote yacjtjē'j judiuwe'shtyi pta'shna carta pēyni's. Tyā'wē yūurratj u'j tundrra ay Jerusalente nuypa'jrra castigāyya'.

Pablo' Dyus yacj fi'nzeya' utyaatsrra tyāa ma'wēne' yūu tyā'sna pta'shni

(Hch. 9.1-19; 26.12-18)

⁶Nava andya' ēepyāj Damasco chjambte utyaana pa'jatspcachja', naa dundte ēe walaju eenac cweetj andy dyi'pte uymeenus. ⁷Atsa' quiwega weteetspcachja', na'wēc we'weni ptjūuse: Saulo, Saulo, ¿quīj yūupa'ganga andya's ajtserra pcyuuya' pacué? jīte', ⁸pējytju: Indya' ¿quimnga? Tyājū' na'wēc pta'sh: Indy na'wē ajtserra pcyuuya' pacue'ng tyāatj Jesus

Nasaretjuwe'sh jīc. ⁹Atsa' andy yacj u'jsa' tyā'wē eena' cweetjni's uyrra wala ūucjtyi. Nava andya's we'weni yu'sa' jiyumeeta'. ¹⁰Tyājū' andya' na'ljīnatj we'we: ¿Quijnga yūu jytjāasu'? jīte', Quiiterra Damascon me'lj, cyte ya'pta'shina quīj yūuwa'ja'sva jīnac jycaaj. ¹¹Tyā'wē eena' cweetjniijūrrāa uyya' ājāmeete', andy yacj pi'cyna u'jsawe'sha' andya's pu'quisrra u'jty Damascote pa'lj.

¹²Cytea' teeche pitstjē'lj u'pu'c Ananias yaasesa, Moises leya's jyuca nwēese'jsa. Tyā'wē nwēese'pja'gaty cyte judiwe'sha' tyāa Ananiasa's wala jytujtjesa' jīna we'we'. ¹³Tyāa Ananiasa' andya's tjengya' pa'jrra', na'wēc we'we: Yacjtjē'lj Saulo, indya' uyya' ājawa'ja's qui' mpa'ga jītspcachja', tjengrra' uyya' ājatj. ¹⁴Tyājū' na'wēc pta'sh: Cue'sh yatsgawe'shtyi jype'jsa Dyusa' indya's nyafiiteycu tyjityj tyā'sna nwēese'jwa'jsa, sa' quīj pcal yujva ji'pjmeesa's yafyju uyrra tyajy yuweju we'weni'sva wēse'jwa'jsa. ¹⁵Āchja' indya' naa quiwete jyucaysa dyi'pte Dyus yuwe's pta'shya' u'juene'nga sa' ma'wērrajne'nga uyna wēse'jna yuu tyā'snava pta'shya'. ¹⁶Sa' ¿quījya'rrāa tyacue wala jytjēyuuqui'ng? Āchjī quiitena'va yu'te ya'bautisāyrra Jesucristo's ūusuj jyuca miiyajcy iindy pcal peltunāyni yuucajn jīnac jycaaj.

Judiu ji'jmée vite nasaty Dyus yuwe's pta'shya' caajni's Pablo pta'shni

¹⁷Tyāa e'su' Jerusalenna qui' shawendrra dyuus yatna Dyus yacj puuty we'weya' u'tje', Jesusa' andya's cyte vyaarra, ¹⁸na'wēc we'we: Jerusalenuj dundrrāa mcaasej. Tyā'wēme', indya' macue pta'shteva nwēese'jmeetyna jīte', ¹⁹na'wētj pas: Andy tyā'wē judiwe'sh pcjaacjeni yat-su u'jrra cysū indyna neewe'wesaty carcelte tyajna vitetyl' cyuupjsatj. ²⁰Sa' indyna neewe'wena selpisáa Esteban eea's pcawuutsteva uynatj ūsu', tyā'wē yūuni ewna sūjna. Sa' icjsawe'sh atyjtyi tjengsatj yu' jīteva, ²¹Jesusa' na'ljīnac jycaaj: Me'jrrāa, andya' jyu'j caajya'vatj judiu ji'jmée vite nasaty pta'shya' jīc.

Pablo's comandante nwe'weni

²²Tyā'wē judiu ji'jmée vite nasaty pta'shya' jīni's wēse'jrraty, qui' ūusachana na'ljīna sus we'we:

—Tyāa pitstjē'lja's icjterrāa ewna. Peena yu' ūtyi fi'nzemeena jī'ty.

²³Tyā'wē sus we'wena, tyāawe'sh atyjtyi ēete wāatajna quiwe's pachrra tyā'wēy yuuterrāa, ²⁴comandante' Pablo's cuartel yatte ca'ga'cjaajrra pechuucuecaacj, tyā'wē yūuna cjaawāshi'jrrac pējyya'va yu' quīj yūupa'ga nasa' tyā'wē wala ūusachana ajtseteva jiyuya'. ²⁵Nava tundutspcachja', Pablo' na'wēc we'we cpiitana's:

—I'cue'sha' romano nasa's pechujcuete ¿ewmañ? quīj yuuweteve jiyumey.

²⁶Tyā'wē we'wete', cpiitana' na'wēc pta'shya' u'j comandante's:

—Na'wē yūuni's mpa'yajcy. Tyā'wēme', naa pitstjē'lja' romano nasa' jīte', ²⁷comandante' Pablo tashte utyaarra pējycu:

—Isa indya' ¿romano nasa dyijngá'? jīna. Atsa' Pablo pasrra':

—Tyā'wē itj jīc.

²⁸ Tyajū' comandante we'werra':

—Andya' wala vyu ducjrrarráa romano nasa yuuna pa'tj jīte', Pablo pasrra':

—Andya' upyjí tyā yā'tj yu' jīc.

²⁹ Tyajū' Pablo's pechuucuewa'jsa' cuch yuumée nvijtyi. Atsa' comandante yujva tyā'wē romano nasateva jiyurra', wala ūucjcu tyā'wē tundpa'ga.

Judiu ntjē'jsawe'sh tashte Pablo's tyaa'jni we'wecajn

³⁰ Judiuwe'sha' quī yūupa'gane'ta Pablo's atse' nava tyā'sna jiyu wēerra, cuscuscjē' comandante' jycaacj sacerdote npiitstjē'jwe'sh vite' judiu ntjē'jsawe'sh jycaacj pcyacjcaaj. Tyā'wē yūurrac cadenaty cijjmbrra tyāawe'sh tashte tyaj Pablo's.

23 ¹ Pablo' sacerdote npiitstjē'jwe'sh vite' judiu ntjē'jsawe'sh pcyacjcaesaty tjengrra', na'wēc we'we:

—Yacjtjē'jwe'sh, andya' āchpcach Dyus dyl'pte jypumbatj sūjwa'j yu'sa' jī'pjmeetj jīte', ² sacerdote npiitstjē'j Ananiasa' Pablo yuwega petya caacj pucate ij ūssaty. ³ Atsa' Pablo' na'wēc we'we:

—Āaterráa ew we'werra' ūuste yu' ewmée yaacypa'ga indya's Dyus castigaína. Indya' ley jycaajnirrá's cytey yuusatj ¿sūju'ngá'? Tyā'wērra' ¿quījya'nga andya's petyacaja'? Leya' tyā'wē jycaaja'tsme' jīte', ⁴ cyte ūssa' na'wēty we'we:

—Dyusna selpisáa sacerdote npiitstjē'ja's tyā'wē wēeshuwa'j jī'pjmeeng jīte', ⁵ Pablo' pasrra':

—Dyusna selpisáa sacerdote npiitstjē'jna sūju'tsme'ntca. Jiivatsa', tyā'wē paswa'jmeene'tca yu'. Tyā'wē yuucajmeníic Dyus libroteva na'wē pta'shi': lindy chjambte jycaajsa's juuna' we'wenu jī'c naa pa'ga.

⁶ Tyajū' cyte pcyacjcaesawe'sha' saduceo vite' fariseowe'sh tyāawe'shtevea jiyurra', Pablo' na'wēc sus we'we:

—Yacjtjē'jwe'sh, andya' fariseo jī'j, fariseo írráatj. Uusaawe'sha' qui' ityí yuua'jsa yujta' sūjna yaacysatj. Tyāa pa'ga yuurráa andya's ewmeesa' jīna ūsta'.

⁷ Tyā'wē we'wete', fariseo vite' saduceowe'sh yacj tyāawe'sh pwe'sh juuna' we'werra puuty tyuteety. ⁸ (Saduceowe'sha' uusaawe'sha' qui' ityí yuutyna sūju'tsmeeta', sa' uute' nasaa ūus vite' angeleswe'sh tyā'wēsa ūstyna sūju'tsvameeta', naapcachja' fariseowe'sha' tyā'wēsa jyuca ūstyna sūju'ty, tyāasaty puuty tyutee.) ⁹ Tyā'wē yūurra tyāawe'sh pwe'sh wala sustyi ūuscha we'wena. Atsa' fariseowe'sh ju'ngusa ley caapiya'jsawe'sh maaí yu' quitterra na'wēty we'we:

—Naa pitstjêl'ja' ewmée yūsame'. Meerra' Dyus angel vá' yu', meerra' uusáa ūs vá' tyā'wē vyaa, nava jiimeerra' cuch we'wemeeyuga. Tyā'wēme', jiimeerra' Dyusa's váa atsewe'wesa yu'nja'w jī'ty.

¹⁰Seena' ūsachana suste', comandante' Pablo's icjeváatyna sūjna ūucjrra soldauty yuucajrra, Pablo's cutyi'cjaacj pcjaacjesa cshavyu cuartel yatnay jyūna u'cjan.

¹¹Tyāa custe', Jesucristo' Pablo's vyaarra na'wēc we'we:

—Pablo, ūucjnu. Ay Jerusalente na'wēng we'we andyna pta'shna, tyā'wēy we'wewa'lj ji'pjngu Romateva jīc.

Pablo's icjya' puuty we'weni

¹²Cuscuscjê' judiwe'sh maafi yu' Pablo's icj wēesa na'wēty puuty we'we: Pablo's icjmeerra yu' quīj yujva ū'me'nja'w jīna. ¹³Tyā'wē Pablo's icjmeerra yu' quīj yujva ū'ya'mée puuty we'wesa' cuarenta pitstjêl'j jytjaacuety yu'. ¹⁴Tyā'wē yūuwa'ja's puuty we'werraty u'lj sacerdote npiitstjêl'j vite' judiu ntjêl'jsawe'sh tashna na'jīna pta'shya':

—Cue'sha' Pablo's icjmeerra yu' quīj yujva ū'me'nja'w jīnatja'w puuty we'we Dyus dyi'pte. ¹⁵Atsa' āchja' i'cue'sh ntjêl'jsawe'sh jyuca pcjaacjerra mpējywe comandante's: Cuscusa' Pablo's mcaaj cue'sh tashte, tyajy yuwe's jwee ew paapējy ya'vatja'w jīna. Naapcachja' cue'sha' ayte pa'ljmeyna icjya' dyi'tje yupu'nja'w jī'ty.

¹⁶Tyā'wē puuty we'wetste Pablo npe'sh nchi'c jiyurra', Pablo's pta'shya' u'cj cuartel yatna. ¹⁷Atsa' Pablo' jiyurra', teech cpiitana's pa'yarra na'wēc we'we:

—Naa luucha's meen pe'jna me'j comandante tashna, tyāa yacj puuty we'wewa'lj ji'pja' jīte', ¹⁸cpiitana' luucha's pe'jrra comandante tashte cūjrra pta'shcu:

—Carcelte ūssa Pablo' andya's pa'yarra naa luucha's pe'jna caacj, ayte indy yacj puuty we'wewa'lj ji'pja' jīte', ¹⁹comandante' luucha's cusete pu'quisna u'jrra paatste pējycu:

—¿Quījnga we'we wēje'? jīte', ²⁰luucha' pta'shcu:

—Judiwe'sha' na'wēty puuty we'we: Cuscusa' indya's pēyi'nja'w Pablo's caacjan, judiu ntjêl'jsawe'sh tashna yuue's jwee ew pējyya'vatja'w jīrra. ²¹Nava tyā'wē dyijna sūjrra Pablo's caajmeene'nga. Tyā'wēme', pitstjêl'j cuarenta jytjaacuesa Pablo's icjmeerra yu' quīj yujva ū'me'nja'w jīna Dyus dyi'pte puuty we'werra dyi'tje yupna ūsta'. Sa' indy mal'jīteva tyā'srráan ūytjasna ūsta' jīte', ²²comandante' luucha's na'jīna we'werrac caaj:

—Comandante's pta'shtju jīna quim yujnava pta'shmeene'nga jīrra.

Ne'jue'sh Felix tashte Pablo's caajni

²³Tyajū' comandante' e'nz cpiitanti pa'yarra Cesarea chjambna u'jya' pjeu'cjaacj. Doscientos soldau chindarráa u'juetyna, jimbatewe'sh setenta,

vite! lansa ji'pjsa doscientos, sa' ayjyu casejetyna cus las nuevete. ²⁴ Sa' tyā'wēy Pablo a'jwa'j jimbava pjeu'cjaacj, ne'jue'sh Felix tashte icjmée ew ducjcajn. ²⁵ Tyāawe'sh yacj carta caacj na'wē fi'jrra:

²⁶ Claudio Lisias fi'jatstju ne'jue'sh Felix's wechana. ²⁷ Naa pitstjē'ja's judiuwe'sha' carcelte tyajrra icjya'vaty yu'. Nava romano nasateva jiyurra', andya' soldau yacj u'jrra nwe'wetj. ²⁸ ¿Quij yūupa'gaqui'ty tyā'wē atse'? sūjrra jyūna u'tj judiuwe'sh ntjē'jsawe'sh tashna. ²⁹ Atsa' tyāawe'sh ley pa'garráata tyā'wē atse', nava icjya' yu' ājawa'jmeec yu' sa' carcelte tyajya'va ājawa'jme'. ³⁰ Nava Pablo's icjya' yuurráa jīna puuty we'werra yupna ūsta' jīni's jiyutj. Tyāasa iindy tashte cajatstju. Pablo's atsesatyva we'wetj quij yūupa'gane'cue atse' nava ne'jue'sh tashte u'jrra puuty we'wene'cue jītj. Tyā'wērráatj indya's pta'shi' jīnac fi'j.

³¹ Tyajū' soldauwe'shtyi tyā'wē jycaajyā'tje', Pablo's pe'jna'va cusrráa u'jty Antípatris chjambna. ³² Cuscuscjē' soldau chindarráa u'jsa' qui' shawendtyi cuartel yatna, naapcachja' jimbatewe'sha' u'jty Pablo yacj. ³³ Cesarea chjambte pa'jrra', carta's ūsna'va Pablonava ducjtyi ne'jue'sha's. ³⁴ Tyajū' ne'jue'sha' carta's lēeyrra' pējycu Pablo's: ¿Majūwe'shnga? jīna. Sa' Ciliciajūwe'shteve jiyurra', ³⁵ na'wēc we'we: —Iindy yuuwe's jiyu'nja indyna atsesawe'sh pāatyjī'cjya' pa'tje jīc. Tyajū' Pablo's Herodes tyaa'ni yatte cyuupjcu tjengwa'jsa tyajrra.

Pablo ma'wēsarrava Felix tashte we'weni

24 ¹ Tajts ente' sacerdote npiitstjē'j Ananiasa' pa'cj Cesarea chjambte judiu ntjē'jsawe'sh yā'jrra, sa' teeche yuwee pu'chsa Tértulo yaasesa'scu pe'jrra pa'j. Tyāawe'sha' utyaaty ne'jue'sh tashte Pablo' ewmeesa' jīna pāatyjī'cjya'. ² Tyajū' Pablo's nuycūjte', Tértulo' Felix's pta'shcu:

—Wech u'pu'nga, ne'jue'sh. Iindy jycaajnite, mteeva wēt fi'nzena ūstja'w. ³ Mteeva tyā'wērrarráa wēt fi'nzena ūstja'w, Felix indy tyā'wē ew yūupa'ga. Tyāasatja'w wala wechá'. ⁴ Nava indya's jwee yu' en caavitu'jya'vameetj, dundte meen mwēese'j cue'sh we'weni's. ⁵ Naa pitstjē'ja' iiméj seena' ewmeesateva cue'sha' cpajcytja'w. Maa quiwesuva jyuca judiuwe'shtyi tyujndena puui quīsna ūsa'. Sa' tyāafí Nasaretjuwe'sha's nwēese'jsa npiitstjē'ja'. ⁶ Dyuus yatte yujva nasa pcalsaty ca'ga'jya'vac yu' canzh vitna. Tyāa pa'ga cue'sha' tundtja'w, cue'sh ley ma'wē jycaatje' cytey yuuya'. ⁷ Nava comandante Lisias cue'sh yacj ja'nda wala juuna' cūjrra cusa'cj, ⁸ sa' atsesawe'sha' ne'jue'sh tashte pāatyjī'cjya' u'juetyna jīnac jycaaj. Cue'sh we'weni' īshiinimée jyuca isateva jiyuya' indy yuu mpējy naa pitstjē'ja's jīnac we'we.

⁹ Tyajū' judiuwe'sh cyte ij ūssava tyā' jyuca isasa yuja' jīna we'wete', ¹⁰ ne'jue'sha' cuseju pta'shcu Pablo's we'wecajn. Atsa' Pablo' na'wēc we'we:

—Andya' jiitj indya' wala cuj añu yã'j cue'sh quiwete jycaajna ũsngu. Tyãa pa'ga andya' iindy dyi'pte ũucjmée pasya'vatj andy ma'wēsarrava. ¹¹Indy yuu mpaapējy tyāawe'sh we'weni' isa dyijteva jiyuya'. Dyusa's Jerusalente neewe'weya' andy pa'jni doce enrráa yuutsa'. ¹²Andya' tyāa doce ensu' dyuus yatte nasaty caapui'jna judiuwe'sh pcjaacjeni yat-su chjambte msuu yujva tyā'wē yūuna ũsu'tsmeetj. ¹³Atsa' ewmée yūunisa' naata' jīna āate caavya'ja'jya' yu' quim yujva ājameetyna naa nasa'. ¹⁴Nava āatetj pta'shi' Dyus tashte pa'jwa'j dyi'ja's āchj u'se caajiyu'jnisa' īshiinisa' jī'ty tyā'snatj nwēese'je' cue'sh yatsgawe'shtyi jype'jsa Dyusa's selpiina. Sa' tyā'wē Dyus jycaajni leyte fi'jni vite' Dyus yuwe pta'shsawe'sh fi'jnity jyucatj cytey nwēese'je'. ¹⁵Tyāawe'shva ma'wēne'ta Dyusa's nwēese'jna yaaqui' tyā'wēyrráatj andyva nwēese'jna yaaqui'. Uusaawe'sha' qui' ityi yuutyna ewsa ma'ty yuu meerra' ewmeesa ma'ty yuu nava ja'ndarraaj sūjnatj yaaqui'. ¹⁶Tyāasatj Dyus dyi'pte vite' pitstjē'jwe'sh dyi'pteva yuuwemée fi'nzewa'ja's pa'pchu'.

¹⁷Andya' vite quiwesu manz añu pecūjna u'jurra', andy quiwen u'tj judiuwe'shtyi vyu peesya' caajny ducjna Dyus ofrenda'sva ũsya'. ¹⁸Andya' tyā'wē yūuna ley jycaajni'sva qui'sna jyā'jrra dyuus yatte ũspcachja', judiuwe'sh Asia quiwejuwe'sh pa'jrra dyuus yatte uytyi. Nava nasaty quīj yujva caapui'jna ũsu'tsmeetj. ¹⁹Tyā'wē uysaawe'sh ayte pāatyji'cjya' yuuwa'j ji'pjta', andy ewmée yūuna ũsteva uyrra'. ²⁰Meerra' comandante pcjacjete judiu ntjē'jsawe'sh vite' sacerdote npiitstjē'jwe'sh cyte ũssa i'cue'shrráava andy ewmée yūuni's uyvá'cue na' mpeeta'shwe. ²¹Andya' cyte ũsrra', Uusaawe'sha' qui' ityi yuutyna jīnarráatj we'we tyā'sna vá'cue ewméec yuu sūju'cy jīc.

²²Felixa's ew yā'cj pta'shni yu', tyāasac tyā'wērráa wēse'jrrarráa:

—Comandante Lisias pa'tje, tyāa yuwe's pjeu'ju'nja jīrra nvijt.

²³Tyajū' Felixa' cpiitana's jycaacj:

—Pablo's tyjweetenu. Nava jwee jytjaacue juuna' yūumée miipe'j, sa' tyajy namicuwe'sh yacj puuty we'wewa'ja'sva mes jīc.

²⁴Manz en scjēwniite', Felixa' tyajy nyu Drusila yacj qui' cūjrra Pablo's pa'ya caacj, Jesucristo pta'shni's we'wecajn. Tyāa u'ya' judiuc yu'. ²⁵Atsa' Pablo' pta'shcu Dyus dyi'pte ew fi'nzewa'ja', sa' peecy cacue's ewmée yūuna jype'jwa'jme'. Tyā'wēme', nmej ente' Dyusa' castigaīna jīna we'wete', Felixa' wala ũucjrra na'wēc we'we:

—Āchjfi yu' tyā'wērráa mpeeta'sh. Vite ente andy en ji'pjurra qui' pa'ya'nja jīc.

²⁶Pablo' vyu ducje'nja tyjwetecajn jīváana sūjrrac tyā'wē manz usva pa'ya Felixa' tyāa yacj puuty we'weya'. ²⁷Tyā'wē e'nz añupcach Pablo's carcelte jype'jna ũsrrarráa Felixa' ne'jue'sh casejc, atsa' vite ne'jue'sh Porcio Festoc u'ca. Nava Felixa' judiuwe'sh yaatseni fi'nze wēemeerra, Pablo's carcelte nvijtcu.

Pablo' Festo tashte we'weni

25 ¹Tyajú' Festo' Cesarea chjambte ne'jue'sh u'carra', tecj ente' Jerusalenna u'cj. ²Cyte' sacerdote npiitstjêl'jwe'sh vite' judiu jytujtjesawe'sha' utyaaty Pablo' ewmeesa' jîna pâatyjî'cjya'. ³Sa' Pablo's pe'jya' mcaaj Jerusalenna yuucajn jînaty pêjy. Tyâawe'sh yu' dyi'tje icjya' sũjrraty tyä'wê pêjy. ⁴Nava Festo pasrra':

—Pablo' Cesareate preesu ũsa'. Atsa' manz enterráa andya' tyāa chjambnaí u'juetstju. ⁵Tyāasatj na'jî': Tyāa pitstjêl'j ewmêe yũuni's pâatyjî'cjwa'j ji'pjrra', i'cue'sh jytujtjesawe'sha' andy yacj yuwetyna Cesarea chjambna jîc.

⁶Festo' Jerusalente ocho en jytjaacue ũsrrarráa qui' shawendcu Cesarea chjambna. Sa' cuscuscjê' yuwe paapêyni yatte u'carra cachna'va, Pablo's yuucaacj. ⁷Sa' cũjutspcachja', judiuwe'sh Jerusalenuj pa'jsava utyaaty quĩjteva seena' ewmeesa' jîna pâatyjî'cjna. Nava isasa yuja' jîna áate caavya'ja'jya' yu' ájameeta'. ⁸Tyajú' Pablo' na'wêc pas:

—Andya' quĩjte yujva yuuwemeetj. Judiuwe'sh ley, Dyus yatna, Romate jycaajsa Cesar maate yujva yuuwemeetj jîte', ⁹Festo' judiuwe'sh yacj ewte neeyũu wêerra na'wêc pêjy Pablo's:

—¿Jerusalenna u'jwêenga' iindy yuwe's cyte pjeu'cjan? jîte', ¹⁰Pablo pasrra':

—Andy yuwe's pjeu'jwa'jsa tashte yā'j ũstju, Cesar qui'pni iindy tashte. Andya' judiuwe'sh yacj quĩjte yujva yuuwemeeteva indya' ew jiing. ¹¹Meerra' andy uuwa'tje ájváane'tca yuuwe yuu atsa' tyä'wête yu' uuwa'ja's wa'lme'nja. Nava pâatyjî'cnisa quĩj yujva isameete yu', quim yujva pâatyjî'cjsa cusete andya's ducjya' ájameena. Wejyva Cesar paapêyni wejy ewna jîte', ¹²Festo' vite npiitstjêl'jwe'sh yacj puuty we'werra', na'wêc pta'sh Pablo's:

—Cesar paapêyni wejy ewna jî'ng na' tyajy tashte pa'j u'juene'nga jîc.

¹³Tyajú' manz en scjêwniite', jycaajsa Agripa vite' Berenice yacj Cesarea chjambte pa'jty Festo's wechaya'. ¹⁴Cyte cuj entyi ũsu', atsa' Festo' jycaajsa's pta'shcu Pablo yuwe's:

—Ayte teech pitstjêl'j preesu ũsa', Felix nviitni. ¹⁵Andy Jerusalente ũste', sacerdote npiitstjêl'jwe'sh vite' judiu ntjêl'sawe'sh pâatyjî'cjtyi tyāa pitstjêl'ja's ewmeete nviitcajn. ¹⁶Atsa' andya' pta'shtju: Romanowe'sh leya' maa yujnava icj caja'tsme', pâatyjî'cjya' yuuwesa yacj caapdyi'pu'jrra quim yuuweteva jiyumey yu'. ¹⁷Tyají andya' jytjêeyumêe pâatyjî'cjya'sh pa'jatspcachja', cuscuscjê' yuwe paapêyni yatte u'cana'va tyāa pitstjêl'ja's yuucaatj. ¹⁸Sa' ¿quĩj yũupa'ga yuuwecy? sũjna ũytjasnatj u'pu', nava pâatyjî'cjya' utyasaawe'sha' ma'wê yujva ewmeete nviit-ya' ájawa'lmeesarráanaty we'we. ¹⁹Tyāa pitstjêl'ja's atsesawe'sha' tyāawe'sh Dyusa's neewe'wena fi'nzeni vite' teech pitstjêl'j Jesus yaasesa uurrava

qui' ityi yuuc jīna Pablo pta'shni'srráaty we'we. ²⁰Tyāa yuwe's andya' ma'wē pjeu'jya'va ājameerra', Pablo's pējytju: ¿Jerusalenna u'j wēenga' cyte iindy yuwe's pjeu'cjan? jīna. ²¹Nava tyāa we'werra': Cesar paapēyni wejy ewna jīc, atsa' tyā'wē yā'tje', aytee preesu ūsune'nga Cesar tashte andy caajpcach jīnatj we'we.

²²Tyājū' Agripa' na'wēc we'we Festo's:

—Tyā'wēyā'tje', wēse'je'nja tyāa pitstjē'j we'weni's jīte', Festo pasrra':

—Cuscusí wēse'jene'nga jīc.

²³Cuscuscjē' jycaajsa Agripa vite' Berenice vite' soldau npiitstjē'jwe'sh vite' chjambte jytujtjesa tyāawe'sh yacj seena' zhichcue susna u'cana cūjty Festo u'pnite. Naapcachja' Pablo's yuu caajrra', ²⁴Festo' na'wēc we'we:

—Jycaajsa Agripa vite' ayte pcjaacjena cue'sh yacj ūssawe'sh cshavyte tyajatstju naa pitstjē'ja's. Judiuwe'sh maanzcuēesava naa pitstjē'ja's atsewe'we'ty Jerusalente vite' ayteva, sa' icjterrāa ewna jīna nestyi yu'. ²⁵Nava tyā'wē icjcajnva quījiteva yuuwemeena'c tjengu'. Nava tyāaíic Cesar paapēyni wejy ewna jī'. Atsa' tyajy tashna caja'nja sūju'tj. ²⁶Nava quījite yuuweteva tyā'sna pta'shna jycaajsa's fi'jwa'j yu' uymeetj. Tyāasa āchja' jycaajsa Agripa iindy tashte tyajatstju, vite' jyucaysa dyi'pte, atsa' indy paapējyrra quījite yuuweteva cpajcyrra pta'shte andya' etsa's fi'jrra caja'nja. ²⁷Tyā'wēme', cyulna'c tjengu' preesu caajrrava yuuwe yuuni's pta'shmeete'.

Pablo' tyajy yuwe's jycaajsa Agripa's pta'shni


26 ¹Tyājū' Agripa' na'wēc Pablo's we'we:

—Indy quīj yūuna fi'nzerrava mpeeta'sh jīte', Pablo' cuse's quiiarra na'wēc pta'sh:

²—Judiuwe'sha' andya's ewmeesa' jīnaty pāatyjī'cje' tyā'sa' jycaajsa Agripa iindy dyi'pte āate pta'shwa'ja's ji'pjurra' wala wecha'tj. ³Indya' jyuca ew jiing cue'sh judiu jī'j fi'nzeni vite' na'wē fiyfiyrraj yajcyrra puuty we'we'tja'w tyā'sna. Tyāasa wejy wa'lmée mwēese'j.

Cristo's jypa'gamey Pablo fi'nzeni

⁴Andy le'chcuējūjy ma'wēne'tca fi'nze andy quiwete vite' Jerusalente tyā'sa' judiuwe'sh jyucaysa jiita'. ⁵Fariseowe'sha' seena' juuna' jycaaja'ty Dyus leya's jyuca cytey yuucajn andya' tyāatewe'shtju yu' pitstacytey, atsa' tyāawe'sha' jiita' na' tyā'sa' pta'shya' ājatyna wa'lmeerra yu'. ⁶Dyusa' cue'sh yatsgawe'sh yacj puuty we'werra uusaawe'shtyi qui' ityi vit-ya' neeyūuc tyā'sa' cytey yuuna sūjnatj fi'nze', naa pa'ga yuurráaty paapējyya' ayte nuypa'j. ⁷Jycaajsa Agripa mjiyu: Israelwe'sh docesate jī'j jyucaysaty qui' ityi yuuwa'ja's ūytjasu', tyāasaty een isa pety cus Dyusa's selpi'. Tyā'wē yūuwa'ja's ūytjaspaga yuurráaty judiuwe'sh



(Hechos 26.3)

andya's ewmeesa' jírra atse'. ⁸Dyusa' tyā'wē uusaawe'shtyi ityi vituna
¿sūju'tsmeecue' vacy i'cue'shva?

Dyus yacj fi'nzesaty pcyuuni's pta'shni

⁹Andya' nyaffia' Jesus Nasaretjuwe'sha's ajtserra quījva yu'nja sūjrra,
¹⁰Jerusalente sacerdote npiitstjē'jwe'sh jycaatje', Jesus caapiya'jni's
nwēese'jsawe'sh maanzcuēesatyva carcelte tyajtj. Sa' icjetste uyrra', ew
yuj yuutsta' sūjnatj fi'nze'. ¹¹Maanzcuēe usva iipcyuutj, Jesus yase's
atsewe'wecajn. Msuuva judiuwe'sh pcjaacjeni yat-su tyā'wērrarráatj yuu.
Sa' seena' pyūuscue yuute', vite quiwesuva u'tj, tyā'wēy ajtserra pcyuuya'.

Pablo' Dyus yacj fi'nzeya' utyani's qui' pta'shni

(Hch. 9.1-19; 22.6-16)

¹²Tyā'wē yūuya' sūjrra, Damasco dyi'j u'juetstju yu', sacerdote
npiitstjē'jwe'sh caajni. ¹³Nava jycaajsa mwēese'lj: dyi'tje u'juetste ēēpyāj
yuutspcachja', secte jytjaacue eena'sa ēējū cweetjcu andy vite' pi'cyna
yuusáa jyucaysaty. ¹⁴Tyājū' jyucaysa wetetja'w, naapcachja' andya'
wēse'tj hebreo yuweju na'wē we'weni's: Saulo, Saulo, ¿quījya'nga

andya's ajtserra pcyuuya' pacué'? Indya' peequírráa ya'cpā'yuuwa'ja's pacuena ūsngu jīte', ¹⁵pējytju: ¿Indya' quimnga? jīte', pta'shcu: Andya' Jesustju, indy na'wē ajtserra pcyuuya' pacue'ng tyāatj. ¹⁶Nava āchja' mquuite. Āchj na'wē vyaatj sa' vite enteva vya'nja, atsa' tyā'wēc vyaajina mteeva pta'shya' u'juene'nga andyna selpiina. ¹⁷Indya's nwe'we'nja judiwe'sh cuseju, sa' judiu ji'jmée vite nasa quiwesu cajatstju cysūva nwe'we'nja. ¹⁸Tyāawe'sh tashsu cajatstju, atsa' indya' tyāawe'sh yafytyi pjaandene'nga, peena yu' chji'ndyte fi'nzemée eena'sa's uycajn, sa' echtjē'j cusete fi'nzemée Dyus yacj fi'nzecajn. Andya's jypa'gasa' tyāawe'sh pcaltyi peltunāyni neeyūurra cielute ūswa'ja's jypa'gatyna Dyus tyityjnisawe'sh yacj ja'ndarrajj jic andya's.

Pablo's Cristo vyaarra jycaajni's cytey nwēese'jni

¹⁹Agripa, indya'stju pta'shi': Tyā'wē vyaarra we'weni's wa'lmée cytey nwēese'jrra ²⁰Damascote ūssawe'sh cjuē'ytyi pta'shtju Dyus yuwe's, e'su' Jerusalte, vite' Judea quiwesu jyuca. Sa' judiu ji'jmée vite nasatyva pi'cytju, pcaltyi nvijtrra Dyusa's pacuerra ew yūuna mfi'nzewe jina. ²¹Tyā'wē yūupa'gaty judiwe'sha' dyuus yatte andya's tundrra icj wēe. ²²Nava Dyus pu'chte', āchpcach Dyus yuwe's le'chcuc yujva jypumbameetj pta'shna fi'nze' jytujtjesa ma'ty yuu ma'wēsatyva jyucaysaty. Sa' Dyus yuwe pta'shsawe'sh vite' Moises pta'shni tyāaju bagachte yujva fiy yu' pta'shi'tsmeetj. ²³Tyāawe'sha' na'wēty pta'sh: Dyus tashuj yuusa Cristo' wala pytjaa yuurra uurrava qui' tyāa cjuē'y ityī yuuna, sa' eena'te fi'nzewa'ja's pta'shina cue'sh ji'jty tyā'wēy vite quiweju nasatyva jīnaty pta'sh. Tyā'wēyrráatj andyva pta'shi'.

Pablo' Agripa's Cristo tashte cuutya'ja'jdyijc

²⁴Pablo tyā'wē we'wete', Festo' na'jīnac sus we'we:

—Pablo, luucu yuuning. Jwee wala piyarrane'nga tyā'wē luucu yuu jīte', ²⁵Pablo pasrra':

—Ne'jue'sh Festo indya' mjiyu: Andya' luucumeerra íitj ūus yajcyrra jypumbamée isasarráana pta'shi'. ²⁶Tyāa yuwe's jycaajsa Agripa ayte u'pa' tyāava ew jiia'. Tyāa pa'gatj andya' tjaamemée pta'shi' tyajj dyi'pte. Naa yuwe' paatste sūtjrra we'wenisame'. Tyāa pa'ga jycaajsava tyāa yuwe's ew jiina sūju'tj. ²⁷¿Dyus yuwe pta'shsawe'sh we'weni's ew jiiyujmeengá' vacy, jycaajsa Agripa? Indya' jiiyujne'nga sūju'tj jīte', ²⁸Agripa' na'wēc we'we:

—Andya's Cristo ju'ngu vit-ya' le'chcuēeng pejīi jīte', ²⁹Pablo we'werra':

—Le'chcuēe ma'c pejīi meerra' wala ma'c pejīi nava indyrrámée, ayte āchj wēse'jna ūsta' tyāawe'sh jyucaysatycu Cristo ju'ngu yuu jytjāasu' Dyusa', andyva ma'wēta Cristo ju'ngu yuu tyā'wēy, nava cadenaju tundnimée.

³⁰Pablo tyā'wē we'wete', jyucaysa quiitety, jycaajsa, ne'jue'sh, Berenice cyte ij pa'jsa jyuca. ³¹Sa' fiity tyuteena u'l, na'jīna puuty we'weya' tyāawe'sh pwe'sh:

—Naa pitstjē'ja' quīj yujva yuuwemeesa' icjcajn yuuva. Sa' carcelterraa yujva ūswa'l ji'pjme' jīrra', ³²Agripa' na'wēc we'we Festo's:

—Tyā'wē tyāaí Cesar paapēyni wejy ewna jīmeevatsa', naa pitstjē'ja's tyjweteya' ewna jīc.

Pablo's Roma chjambna caajni

27 ¹Italia quiwen cue'shtyi caajya' puuty we'weyā'jrra', Pablo vite preesu yā'jrra ducjtyi Batallón Augusto yaasesate cpiitan Julio cusete. ²Tyājū' Adramitio chjambte barco Asia quiwen u'jsate cjēetja'w, atsa' Aristarcova yuwe'c, Macedonia quiwete Tesalónica chjambtewe'sh. ³Cuscuscjē' Sidón chjambte pa'tja'w. Atsa' cpiitan Julio' Pablo's namicu yat-suc pa'jya' caaj tyāawe'sh sā'jīcajn. Tyāa cpiitana' Pablo yacj wala ewsa yu'c, tyāasac tyā'wē yūu. ⁴Sidón chjambuj casejrra', Chipre quiwe's jembu ju'ngutja'w nvijtna cjēw, wejya yuppa'ga. ⁵Tyājū' Cilicia Panfilia quiwesu utya scjēwna u'jrra, Lisia quiwete Mira chjambtetja'w pa'j.

⁶Cytea' soldau cpiitana' teech barco Alejandriajuwe'sh Italia quiwen u'jsa'scu uy. Sa' cue'shtyi cytec caateca'l tyājū qui' u'jya'. ⁷Nava tyā'wē wejya yupna ūste', wala cuj en tuundcuērraj u'jrra, wala tjēy pa'tja'w Gnido chjamb dyi'pte. Tyājū u'jrra', Salmon quiwee dyi'psutja'w scjēw, Creta quiwesu ta'nguna. ⁸Sa' tyāa quiwe pucasu wala tjēy u'jrra, teech ajte pa'tja'w Buenos Puertos yaasesate. Tyā' Lasea chjamb utyatec neeyū'.

⁹Tyā'wē tjēy u'jrra wala en iwiitpa'ga, nus pa'jwa'l en utyaac icjte u'jwa'l seena' ūucjūucjsa. Tyāa pa'gac Pablo' yu'cypej ¹⁰na'jīna:

—Jyucaysa mwēese'jwe, cue'sh u'jwa'ja' wala ūucjūucja'. Barco pety carga vituna, atsa' cue'shva uuwa'ja's ji'pjuvā'nja'w.

¹¹Tyā'jīteva, soldau cpiitana' Pablo's nwēese'jmée barco namu vite' barco tjengsawe'sh we'wenirrá'scu nwēese'j. ¹²Cyte chjamba' nus ente ūswa'l ewmeec yu'. Tyāa pa'gaty jyucaysa u'jya' yajcy Creta quiwete Fenice chjambte pa'jrra nus ena's cyte yu'scjēwya' sūjrra, Fenice chjambte' nus ente ūswa'l ūucjūucj meec yu' naa pa'ga.

Mar pyājte wejyaa wala quiiteni

¹³Buenos Puertos yaasesajū casejetste yu', wejcuērrāac wejyana ūsu', atsa' Fenice chjambte pa'jya' ājavā'nja'w sūjrra u'jty Creta quiwe pucasu tuundcuērraj. ¹⁴Nava wejcuē u'juetspcachja', wejyaa wala cue'sh u'jwa'l dyi'puj sējrra barco's yupcu. ¹⁵Sa' tyājūyā'ja' ma'wēva jyūna u'cj. Atsa' barco's caajya' ājameeyā'jrra', cuch yuumeetja'w wejya ma'wēva jyūna u'cjan. ¹⁶Íc pyājte quiwe le'chcuēsa Clauda yaasesa e'ssutja'w scjēw, cysūa' wejya tyacue chjāchjameec ūs yu'. Atsa' barco le'chcuē jyūrri

u'jnisa's wala tjëyrráava caateca'jya' ājātja'w barco walate. ¹⁷Tyājū' barco wala's lasu walaju pyājūjy tundtja'w suweecajmen. Sa' tyity wala Sirte yaasesate váa watsuya' u'juena sūjna ūucjrra, ēete tela wala's spajcytyi wejya ma'wēva barco's jyūna u'cjan. ¹⁸Tyā'wē wejya seena' chjāchja ūste', cuscuscjē' carga's ĩcjcjē pūshya' tacjtyi. ¹⁹Atsa' tecj en yuutste', cue'shíiva ĩcjcjē pūshya' pu'chtja'w barco ēseecajn. ²⁰Tyā'wē wejya seena' yuuna ūste', sec, estrella, quīj yujva vyaameeta' maanzcuēe enva. Atsa' cue'sh yuuva ĩtyī yuume'nja'w sūjwa'ja'srráatja'w ji'pju'.

²¹Tyā'wē maanzcuēe en quīj yujva ū'mée yujna ūssaty Pablo' na'wēc we'we:



(Hechos 27.21)

—I'cue'sha' andy we'weni's nwēese!jrra Creta quiwejū casejmeevatsa', na'wē ñus cnayna iviituwa!jmeene'tca'w yu'. ²²Nava āchja' ūucjnuwe. Ayte u'ljsa quim yujva uumeetyna, macue barco yu' suweerra vituteva. ²³Andya' Dyusna selpisaatj, atsa' āchj cus Dyus angel vyaarra ²⁴na'wēc we'we: Pablo, ūucjnu. Indya' Romate jycaajsa tashte utyaawa!j ji'pjngu, atsa' tyāa pa'ga Dyusa' nwe'weya'va' ay barcote u'ljsa jyucaysaty jic. ²⁵Tyāa pa'ga i'cue'sha' ūucjmée chjāchja miiyajcywe. Andya' Dyusrrāanatj yaaqui', angel we'weni' cytey yuuna sūjna. ²⁶Sa' ĩcj pyājte quiwe le'chcuēsate nviitni yu'nja'w jic Pablo'.

²⁷Adria ĩcjte wejya jyūna u'jni e'nz qui'su ājatste!, tyāa cuspyāj yuutspcachja', barcote tjengsawe'sha' quiwe utyasu u'juetsrraty jiyu. ²⁸Sa' macjue ĩcj dyiiteva jiyuya' isaty, atsa' treinta y seis metrorráac dyii yu'. Tyajū' yats yatste u'jrra qui' isaty, atsa' cytea' veintisiete metrorráac dyii yu'. ²⁹Tyajū' peñate vāa iica'nja'w sūjna ūucjrra, barco's neewewa'ljsa pajnz tsam walaty ĩcjčē acj barco e'scjē, wejya jyūna u'cjamen. Sa' wala ūucjna ūytjastyi cjiycpcach. ³⁰Naapcachja' barcote tjengsawe'sha' barco yatscjē vite tsam walaty ĩcjčē acjetstja'w jīnarrāa barco le'chcuēs ĩcjčē spaaquitsty yu', tyāate cjēerra casejna u'j wēerra. ³¹Nava Pablo' pta'shcu soldau cpiitan vite' soldauwe'shtyi:

—Naawe'sha' barcojū casejna u'tje!, i'cue'sha' ĩtyi yuumeene'cue jīte!, ³²soldauwe'sha' barco le'chcuē tundni lasuty spē'tjrra ĩcjčē wāatajty barco le'chcuēs.

³³Tyajū' Pablo' cusītey neewe'wec jyucaysaty quījrrāava ū'cain:

—I'cue'sh dejmée tyā'wēy ū'vamée ūsni e'nz qui'su yāl yuutsa'.

³⁴Atsa' i'cue'shtyi neewe'we'tj quījrrāava ū'cain. Tyā'wēme!, casejya' ya'chjāchjameena. Āchja' ūucjnuwe. I'cue'sh maa yujva vitumeene'cue.

³⁵Tyā'jīna'va, Pablo' jyucaysa dyi'pte Dyusa's wecharra pana's ū'c.

³⁶Tyajū' jyucaysa wejy ūucjmée tyāawe'shva ū'ty. ³⁷Barcote u'ljsa jyucarraj yu' doscientos setenta y seis nasatja'w yu'. ³⁸Quij ū' wēerrava tyā'sna ū'na jyā'jrra', scuutyja's ĩcjčē pūshtja'w barco jwee'fīrrāa ēseecajn.

Barco ĩcj dyiicjē cjēeni

³⁹Cjiycyna jyā'jnite!, barcote tjengsawe'sha' jiyumeeta' maa quiwete paljrrava. Nava ĩcj pucasu quiwe ucuesa u'pte uyrra', cyte nuypa'lja' ājāvā'nja'w sūjrra cytety u'lja' yajcy. ⁴⁰Sa' tsam wala ĩcj dyiicjē acjnisa lasuty spē'tjna'va, tela's ēete qui' quiisrra, barco's tuunduērraj jyūna u'ljty ucuete pa'lja'. ⁴¹Nava teeche ajte ĩcj jwee yu' dyiimeete yu' seena' chjāchja ucapajcyna ūsu'c cytec cūjya' u'j barco!. Atsa' barco ĩtsja' quiwete watsuna cūjte!, ma'wē yujva ēseme!, naapcachja' barco e'su yu'tūchjasāa ujcana cūjrra jyuca suwuutscu yu'. ⁴²Tyā'wē yuutste!, soldauwe'sha' preesuty jyuca icjya'vaty yu', pejndna casejrra iyuwe'shte. ⁴³Nava soldau cpiitana' Pablo's nwe'weya' yajcyu, sa' quicicje'jmeerra na'wēc jycaaj:

—Maava pejndya' jiisa' i'cue'sh cjuē'y yatste me'jwe, ⁴⁴naapcachja' vite' taplasu mcjēewe, meerrava barco pe'llasu tyā'wē yūurra mcaasejwe jīte', tyā'wē yūurra jyucay quiwete pa'tja'w uumée.

Malta quiwete Pablowe'sh pa'jni

28 ¹Cyte jyucaysa uumée pa'jrratja'w jiyu tyāa ĩcj pyājte quiwe' Maltaga yaase yu'. ²Cyte u'psa nasa' cue'shtyi wa'lmée jypa'garra, ipy wala yutjrra cue'shtyi bajchya' pi'cytyi, nus tyā'wē wala pa'jna ūspa'ga. ³Tyājū' Pablo' e'cy ujndy pcjacjrra, ipyte āshitscu yu', naapcachja' tyāa ipy pyājū ul weeswee ūpjna casejrra Pablo cusetec wa'cy. ⁴Tyā'wē Pablo cusetec ul wa'cyte', cyte ūssa' na'wēty we'we tyāawe'sh pwe'sh:

—Naa pitstjē'ja' nasa icjsana. Macue ĩcjtē yu' uumeeteva, Dyusa' ĩtyi u'ju jytjāasmeene' jī'ty. ⁵Atsa' Pablo' cuse's yajtarra ula's ipycjē acjcu, nava tyajy cuse yu' quījva yuume'. ⁶Atsa' nasa tjengna ūssa yu' ¿Ma'wēn uucy? sūjna jyucaysa ūytjasnaty ūsu'. Nava quījva yuumeyna wala tyach yuute':

—Pablo' nasa icjsamée wejyva Dyusna jī'ty.

⁷Tyāa quiwete teeche ne'jue'sh jytujtjesa u'pu'c Publio yaasesa. Tyajy uutjash ja'ndatetca'w pa'j cue'sha', atsa' tyāa pitstjē'ja' cue'shtyi wala ew jype'cj tecj enpcach. ⁸Tyāa ensu' Publio neya' ātsa'naga ūsu' cacuesecte eerrāa uchi'chrra. Atsa' Pablo' tjengya' u'jrra, peequinzerra Dyus yacj puuty we'wete', chjāchjac. ⁹Tyājū' tyāa quiwete vite ātsa'sawe'shva pa'jrra', jyuca catyjirraty neeyūu. ¹⁰Tyājū' cue'shtyi wala peeygājrra quījquījva dyl'tje peejini's jyucaty pees, barcote cjēerra qui' u'jya'vagachja'.

Roma chjambte Pablo pa'jni

¹¹Malta quiwete tecj a'te ūsrrarrāa, Alejandría quiwejuwe'sh barco cyte ūsu'c nus piipcach tyāate cjēerratja'w u'j. Tyāa barco' yatste e'nz dyus ĩtyimeesatycu piisani ji'pju', Castor vite' Polux yase ji'pjsa. ¹²Tyājū casejrra', Siracusa chjambte pa'jrra, tecj entja'w ūsu'. ¹³Tyājū qui' u'tja'w quiwe pucagarrarrāa, sa' Regio chjambtetja'w pa'j. Cuscuscjē' e'su wejya sējte', tjēymée u'jya' ājarra e'nz encjē' Puteoli chjambte pa'tja'w. ¹⁴Cytea' puuty uytja'w yacjtjē'jwe'shtyi, atsa' tyāawe'sha' pi'cytyi tyāawe'sh yatte teeche qui'su ūscajn. Tyājū casejrratja'w Roma chjambna u'j. ¹⁵Romate yacjtjē'jwe'sha' cue'sh yujteva jii yā'tja yu', sa' teeche ajte Tres Tabernas yaasesa utyate teeche chjamb ūsu'c Foro de Apio cyteta pu'tjengya' yuwé'. Atsa' Pablo' tyāawe'shtyi uyrra', Dyusa's wala wechana ūuste wēt wētcu yajcy.

¹⁶Romate pa'jna'va, soldau cpiitana' vite preesutyi' ducjcu cyte carcelte tjengsa npiitstjē'ja's, nava Pablo yu'sa' vite yatte fiic tyaj teeche soldau tjengwa'jsa tyajrra.

Roma chjambte pa'jrra Dyus yuwe's pta'shni

¹⁷Cyte pa'jni tecj en scjēwniite', Pablo' pa'ya caacj cyte Romate judiu npiitstjē'jwe'shtyi. Sa' pcjaacjete', na'wēc we'we:

—Andya' quíjva ewmée yu' yūmeetj judiuwe'shtyi, sa' cue'sh yatsgawe'sh caapiya'jni'sva ajtsena fi'nze'tsmeetj. Macue tyā'wēteva, Jerusamente andya's tundrra romanowe'shtyi ducjtyi. ¹⁸Atsa' romanowe'sha' paapējtyti, nava ewmée yūuni's yu' uymeerra', andya's tyjweete wēety icjwa'tje nvijt-ya' yu' ājameerra. ¹⁹Tyā'wēteva, judiuwe'sh yu' caatyjwete'jmeeta'. Atsa' tyā'wē yā'tje', andya' romanowe'shtyi jycaajsa Cesara'stju pi'cy andy yuwe's paapēycajn. Nava judiuwe'sh andyna preesu'jsa yuutyi' pāatyjī'cya'vameetj. ²⁰Tyāasatj i'cue'shtyi pa'ya tyā'jina pta'shya'. Israelwe'sha' ūytjasu'tja'w Dyus tashuj yuusa Cristo's tyāa pa'ga yuurraa andya' na'wē cadenaju tundni ūstju.

²¹Tyā'wē pta'shte', na'wēty we'we:

—Judeajū indyna nuywe'wena caajni carta quíjva iijypa'gameetja'w cue'sha', tyajū judiuwe'sh pa'jrrava pta'shi'tsmeeta' indya's atsewe'weni yu'sa'. ²²Āchj u'se pta'shni's mteeva jyucaty atsewe'we', atsa' tyā'sa' indya' ¿maa sūju'nga? Indy yaacyni's jiyu wēetja'w jirra', ²³vite ente qui' pa'jya' neeyūurra tyāa en ājte', wala cuj pcjaacjerra pa'jty Pablo ūsni yatte. Atsa' Pablo' cusí pta'shrra cusna quíjpcachcu pta'sh Dyus jycaajwa'ja's. Sa' Moises fi'jni ley vite' Dyus yuwe pta'shsa tyāniiteywe'sh fi'jni ma'wērrajne'ta Jesusa's we'wena fi'j tyā'snac āate caajiyu'j. ²⁴Atsa' maafi yu' Pablo pta'shni's wa'lmeety jypa'ga, nava vite yu' wa'ltyi. ²⁵Tyā'wē maafi yu' nwēese'j wēemeerra tyuteena u'juetste', Pablo' na'wēc tyāawe'shtyi we'we:

—Dyus yuwe pta'shsa Isaiasa's Dyus Espiritu cwe'we'tje', isa yuj na'jina pta'shne' cue'sh yatsgawe'shtyi':

²⁶U'jrra tyāa nasatyi' na'jina mpeeta'sh:

I'cue'sha' wēse'jrrava, jiyumeene'cue.

Meerra' uyuvá'cue, nava jiyumeene'cue.

²⁷Tyāa pa'gatey tyāawe'sh ūuste jiyuwa'j yu'sa' ji'pjmée yā'tja',

Sa' wēse'jya'va wa'lu'ty.

Tyāawe'sh yafya' apjanita', uymeerra' nwēese'jmeetyna.

Sa' ūusteve ew jiyumeetyna.

Sa' andy tashteva utyameetyna pcaltyi peltunāycajn jīnac we'we.

²⁸I'cue'sha' mjiyuwe: Āchjūyā'ja' Dyus ewte nviitwa'ja's judiu ji'ljmée vite nasarraaty pta'shwa'ja', atsa' tyāawe'sha' nwēese'jjetyna.

²⁹Tyā'wē Pablo we'wete', judiuwe'sha' tyāawe'sh pwe'sh wala cuj jwend we'wena u'jty.

³⁰Pablo' e'nz añu utac yat pqui'jrra tyaaajni ūsu', sa' cyte tjengya' pal'saty jyucaysatycu jypa'ga'. ³¹Cytea' quim yujva cuch yuuniméec fi'nze' Dyus jycaajwa'j ena's pta'shna, tyā'wēy Jesucristo caapiya'jni'sva āatec pta'shna fi'nze'.

SAN PABLO CARTA ROMA CHJAMBTEWE'SH JÏI

Romatewe'shtyi Pablo wechana fi'jni

1 ¹ Andya' Jesucristo's selpisáa Pablo yaasetj. Atsa' andya's Dyuscu tyjityrra nvijt, Cristo yuwe ewte nviitwa'jsa's pta'shcajn. ² Dyusa' tyāa yuwe ewte nviitwa'jsa's pta'shni yuuna jīna cfi'ja'cj nyafii entey Dyusna selpisaawe'shtyi. ³ Atsa' tyāa Dyus yuwe ewte nviitwa'jsa' cue'shtyi jype'jsa Jesucristo Dyus Nchi'ca'scu we'we'. Atsa' Jesucristo' naa quiwete yu' jycaajsa David ji'tjec upy cacue yu'. ⁴ Nava quijteva jyuca ājawa'jsa Dyus Nchi'cteva Dyus Espiritu' cue'shtyi caajiyu'cj Jesucristo's uunijū ityi vitrra. ⁵ Sa' andya's peeygājrra Jesucristo nwe'wete', Dyus tyjitynisatj yuu, Jesucristo's selpiwa'jsa, cyaj naa quiwete maa nasava Jesucristo's jiyurra jypa'gatyna tyā'sna nwēese'jya'. ⁶ Atsa' i'cue'shva Jesucristo's jiyurra ne'cue jypa'ga, Dyusa' pety i'cue'shne' tyjityj Jesucristo tashte pa'jwa'jsa tyāa pa'ga nwēese'jna ūsi'cue. ⁷ Achja' Roma chjambtewe'sh i'cue'sh jyucaysa jīi naa carta's fi'jrra cajatstju, i'cue'sha' Dyus peeygājrra tyjitynisai'cue tyāa yacj fi'nzesa. I'cue'shtyi' Dyusa' pu'chjina vite' cue'shtyi jype'jsa Jesucristo, tyāa pa'ga Dyus yacjrrāa mfi'nzewe.

Roma chjambna Pablo u'j wēeni

⁸ Jesucristo i'cue'shtyi pu'chpa'ga Dyus yacj i'cue'sh ew fi'nzeni's mteeva jyucaty ew we'we', tyāa pa'ga andya' Dyusa'stju wechā'. ⁹ Sa' na'wē Dyusa's nacue wala selpi'tj tyajy Nchi'c caapiya'jni's ūusuj jyuca yajcyna tyāa Dyusa' jiia' andya' i'cue'sh pa'gate bagachteva tyāa yacj puuty we'wena nes yuusaateva. ¹⁰ Tyāasatj i'cue'sh tashna yujvatsa' sūjrra Dyus yacj puuty we'wena nes yu'. ¹¹ Sa' cytee pa'jrra' Dyus yacj fi'nzewa'ja's i'cue'shtyi pu'chji'nja sūju'tj, jwee'frrāa chjāchja fi'nzeczajn. ¹² Sa' puuty cyteerraj ya'pu'chna Dyus yacj chjāchja

fi'nzewa'ja's ji'pju'nja'w, tyāa pa'gatey i'cue'shva Dyusa's yaacysa i'cue andy na'wēy.

¹³ Yacjtjē'jwe'shtyi pta'shi'tj: i'cue'sh yacj puuty uyya' yuwe'nja sūjna manz usva yajcyrrava, āchpcach yujya' yu' tundunimeetj. I'cue'sh cshavysu Dyus luuch yuwa'jsa ūstyna tyāaty Dyus jīi cnayya' yuwe'nja sūju'tj, ma'wēta vite quiwesuva Dyus jīi cnay tyā'wēy. ¹⁴ Andya' maa nasatyva jyuca Cristo yuwe's pta'shwa'j ji'ptju, chjambtewe'sh ma'ty yuu, fiy we'wesa ma'ty yuu, naa quiwete wala jiisa ma'ty yuu meerra' jiimeesa ma'ty yuu nava ma'wēsatyva jyuca pta'shwa'j ji'ptju. ¹⁵ Tyāasa andya' Cristo yuwe ewte nviitwa'jsa's pta'shya' yuwe'nja sūjnarrāa ūstju Roma chjambte i'cue'shtyiva.

Cristo' maatyva jyuca nwe'wewa'jsa'

¹⁶ Andya' Cristo yuwe ewte nviitwa'jsa's pta'shya' wej yujva tjaame'tsmeetj, tyāa pa'gatey Cristo' Dyus caajnisā' maatyva nwe'weya' ājawa'jsa tyā'sna ūste jypa'gasa yuutyi', judiu ma'ty yuu judiimeesa ma'ty yuu nava maa nasatyva jyuca nwe'wewa'jsa'. ¹⁷ Atsa' nwe'wenisa yuuya', Cristo's ūsuj jyuca yajcyrra jypa'gate yuurráac Dyus dyi'pte yuuwemée ewsa yuuna ya'pa'ja'. Tyā'wē yuwa'ja's Dyus librote vite ajcjevā na'jīnac pta'shi': Dyusa's ūsuj jyuca yajcyte yuurráa Dyus yacj fi'nzewa'ja's ya'ji'pjuna ji'c.

Naa quiwete nasa' yuuwesata'

¹⁸ Dyus castigo seena'sa cieluju yuja' nasa ewmeesa jyucaysawe'sh jīi, tyāawe'sha' ewmeete yuurráa fi'nzena isasa yu'sa' yupna ūsta' naa pa'ga. ¹⁹⁻²⁰ Tyāa ente' Dyus ma'wēsateva jiimeetja'w yu' jīya' ājameetyna, tyāa pa'gatey Dyus ma'wēsateva caajiyu'jsa ūsta' Dyus pjeu'jrra nviitnisa tyāaty caajiyu'ju'. Tyāa pa'gac naa quiwe's pjeu'jrra nviitnijū' ew ya'jiyu' Dyusa' quījteva jyuca ājawa'jsa bagachteva nes yuwa'jsateva. Atsa' tyāa ma'wēsarrava caajiyu'jncu tyā'wē pjeu'jrra nvijt. ²¹ Tyā'wē Dyusa' ūsyujna sūjwa'j yu'sa' ji'pjurrava, isate yu' Dyusa's wechana nwēese'jmée, naa quiwete quīj yujva seelpimeesarrá'styi pacuena jyā'j. Atsa' tyā'wē yūupa'ga tyāawe'sh ūsa' naa quiwete ewmeesa yuurrá'scu yaacywa'jsa neeyūu. ²² Tyāawe'sh yu' jiitja'w ji'ty, nava jiimeesaty yuuna pa'j. ²³ Tyā'wē Dyus bagachte yujva ptsuwa'jsamée quījteva jyuca ājawa'jsa' tyā'sna neewe'wepcachte, naa quiwete ptsuwa'jsa nasa na'wē piisarraty neewe'wena ūsu'. Sa' tyā'wērrāa yūumée, fyusá, yu'cj ech tyā'wēsa na'wē vitrraty neewe'wena ūsu'.

²⁴ Tyā'wē yūupa'ga Dyusa' tyāawe'shtyi' pu'chmée nvijtcu, peecy ewmée canzh yaacynirrás cytey yuuna fi'nzecajn, cyajty quījva tjaampa'sarrá's puuty ya'ewmée yūuna fi'nze' teeche na'wērraj. ²⁵ Tyāawe'sha' isa Dyus ūtyisa yu'sa' jypa'gaya' wa'llra, Dyusmeerrá'styi

jypa'ga. Tyāasaty wejyva Dyus quijnava jyuca pjeu'jrra nviit-sa'síi neewe'wepcachte, naa quiwete Dyus pjeu'jrra nviitnisarrá'styi neewe'wena fi'nze'. Tyā'wē Dyus bagachteva ptsuwa'jmeesa's neewe'wevats, wejy tjaacue ewsa', nava tyā'wē yūumeeta'.

²⁶ Tyāa pa'ga Dyusa' pu'chmēe nvijtcu, tyāawe'sh ewmēe canzh yaacynirrás's cytey yuuna fi'nzecajn. Atsa' u'y pwe'shtyi pcal yuuna fi'nze', tyāawe'sh cacue'síirráa suwwa'jsana pacuena. ²⁷ Tyā'wēy pitstjē'jwe'shva nyu yacj zhichcue fi'nzeni yu'sa' nvijtrra, puuty pitstjē'j pwe'shtyi pcal tjaampa'sarrás's cytey yuuna fi'nze', peecy cacue canzh yaacynirrás's nwēese'jna. Tyā'wē yūurra peecy cacuejūjyrráa ya'castigāywa'ja's uyuyty.

²⁸ Tyā'wē Dyusa's nwēese'jya' wa'lyā'tje', Dyusa' pu'chmēe nvijtcu, tyāawe'sh canzh yaacynirrás's nwēese'jrra peecy ma'wēva ewmēe yūuna fi'nzecajn. ²⁹ Tyāa pa'gaty ewmeesa yuurráa yuuna pa'j: ptjāawesa, pcal yuunisa, ewsa's jiirrava ewmeerráa yūsáa, Dyus yu's yajcymēe ji'pju wēenirrás's yaacysa, quijva ewmeerráa yūsáa, vitety atseyaacysa, nasa icjsa, puui quiissa, íshiisa, ewsa yu'sa' weechsa, íshiiarra caapui'jsa, tyā'wērráa yūsáata'. ³⁰ Vitety ewmēe nuywe'wesa, Dyusna atsesa, puuty ya'wēeshusá, peequfirráa iijwech yaacysa, vitée dyi'pte iijwech we'wesa, ewmēe yūuwa'j u'sesa pacuena fi'nzesa, neywe'shtyi nwēese'jsamēe, ³¹ ewsa's jiyuya' wa'lsa, puuty we'weni's cytey yuusamēe, quim yujnava peeygāasamēe, bagachte yujva yuwe ewuusamēe, quim yujnava pu'chsamēe. ³² Tyāawe'sha' wala ew jiita' tyā'wē ewmēe yūupa'ga Dyus castigote uuwa'ja's. Tyā'wē ew jiirrava, ewmeesa yuurráanaty cytey yuuna fi'nze'. Sa' ūus yujva ji'pmeesa yā'tja', tyāasaty vitesa ewmēe yūutste uyrra', wejyva cchjāachja'jna fi'nze'.

Dyusa' isac castigai'

2 ¹ Tyā'wē ewmēe yūupa'ga Dyus castigo's jypa'gawa'j ji'pjta' jīna indya' atsewe'werrava, tyāa nasa ewmeesa na'wē írráang ewmēe yūuna fi'nze' macue Dyusa's jiirrava. ² Peecy jiitja'w tyā'wē ewmēe yūsatyil's Dyusa' isac castigai' maatyva jyuca. ³ Atsa' indya' tyā'wē vitety atsewe'wena Dyus castigo's jypa'gawa'j ji'pjta' jīrrava indyva tyā'wēyrráa ewmēe yūurra', Dyusa' indya's castigaīmeena ¿sūju'ngá'? ⁴ Tyā'wē ewmēe yūuteva Dyusa' peeygājrra āchjii yu' castigaīmēe ūsa'. Nava tyāa yu' indy ewmēe yūunity nvijtrra tyajy tashte shawendcajn ūytjasna iipe'ja'. ⁵ Tyā'wē ūytjasna ūsteva, iindy ewmēe yūunity nvijtrra Dyus tashte shawendwa'j yu'sa' yaaquitsmeeng. Tyāa pa'ga ya'castigāywa'ja's jweeírráa nuywalana ūsngu, nmej ente Dyus castigāywa'j en ājtewe'sh. ⁶ Tyāa ente' ma'wē yūsarrava, teeche na'wērraj jypa'gatyna tyāawe'sh jī's: ⁷ bagachte yujva ptsuwa'jsame's een isa pacuena ewrráa yūuna fi'nzesa' ptsumēe ityi fi'nzewa'ja's jypa'gatyna. ⁸ Naapcachja' Dyusa's ajtsena tyajy jycaajni yu'sa' cytey yuumēe ewmeerráa yūuna fi'nzesa'

Dyus castigo seena' yujsa's jypa'gatyna. ⁹Maava ewmeerráa yūusa yuutyi's jyuca castigāywa'j en pa'jana, judiu jil'mée vite nasaty yujva castigāyrra', judiuwe'sh yuutyi' wejy tyā'wē castigāina. ¹⁰Nava maava ew yūuna fi'nzesatyi's Dyusa' ūsuna tyāa yacj wēt wechana fi'nzewa'ja's, judiuwe'shtyi ūsrra', judiu jil'mée vite nasatyva tyā'wēyrráa ūsuna. ¹¹Tyāa pa'gately Dyusa' teechsarráan jytjaacue ew jype'je'tsme', jyucaytyi tyāa na'wērrarráac jype'je'.

¹²Moises leya's jiimeesava ewmée yūuna fi'nzesa yu' jyucaysa vituwa'jsa fírráata'. Atsa' macue Moises leya's jiirrava ewmée yūuna fi'nzesa yu' tyāawe'shva jyucaysa vituwa'jsa fírráata', tyāa leya's nwēese'jmeerra ewmée yūupa'ga. ¹³Tyāa pa'gately leya's jiipa'garráa ewte ya'neeyū'tsme', atsa' macue leya's jiimeerrava ley jycaajnyty caavya'ja'jsa yuurráa yuuwemée yuwa'jsata'. ¹⁴Atsa' judiu jil'mée vite nasa macue leya's jiimeerrava ley jycaajni Dyus caaūsutje'jni's caavya'ja'jty ewmeesa yuutyi' nwēese'jméej ewsarrá's cytey yuuna. ¹⁵Tyā'wē yūuwa'ja's Dyusne' caaūsutje'je', tyāa pa'gaty āate caavya'ja'jna ewrráa fi'nze'. Tyā'wē yūuwa'ja's tyāawe'sh ūus yaacyni' caajiyu'ju'ne' quij yūuni ewmeesateva sa' quij yūuni ewsateva tyā'wēy. ¹⁶Atsa' Dyus caajni Jesucristo quijrra', nasaa ūusterráa yaacyni's jyuca āate caajiyu'juna tyā'wē yūuwa'ja'stju andya' pta'shi'.

Judiuwe'sh Moises leya's ji'pjsa

¹⁷Nava indya' na'jī'ng: judiutj, tyāasa Moises leya's ji'ptja'w. Tyāa pa'ga Dyusa's jiisatj jírra iwejchngu yaaqui'. ¹⁸Dyus jycaajni's jiisang, Dyus leya' caapiya'ja'c ewsarrá's tyjitywa'ja's. ¹⁹Yafy ji'pjmeesaty jype'jsatj jī'ng, sa' chji'ndyte fi'nzesatyva eena'te cutyi'jsatj jī'ng. ²⁰Sa' ley ji'ptja'w cyteea' ma'wē fi'nzewa'ja'sva pta'shi'c ewsarráana cytey yuwa'ja's jī'ng.

Tyāasang ma'wē fi'nzewa'ja'sva caajiyu'jsatj jī'. Sa' pytjaacuesatyva pta'shsatj, tyā'wē yuuya' fírráa leya's ji'ptja'w jī'ng. ²¹Tyā'wē vitety caapiya'jatsrra', indy yu' ¿quij yūurranga piya'tsmée? Indyíiva pta'shrra': Pesweewa'jme' jī'ng sa' indy yu' ¿quijya'nga peswé'? ²²Indyíi we'werrava: Ptamsayā'ja' vitesa yacj pcal yuwa'jme' jī'ng sa' ¿quij yūurranga indy yu' cytey yu'tsmée? Indyíiva Dyus ityimeesatyi's atse'ng sa' ¿quijya'nga Dyus ityimeesaty peswé'? ²³Dyus leya's ji'ptja'w sūjna iwejchngu yaaqui', nava tyāa ley jycaajni's jyuca nwēese'jmeerra', Dyusa's atsesang. ²⁴Atsa' Dyus librate' isa yuj we'we'c na'jīna: judiu jil'mée vite nasa' Dyusa's atsewe'we'ty, nava yuuwesa yu' i'cue'shi'cue jī'c.

²⁵Áchja' na'wē yūunisa's pta'shya'vatj: Moises leya's nwēese'jna caavya'ja'ja'tsrra yu', circuncidānyi's jypa'gawa'j yuja'. Nava ley jycaajnyty jyuca caavya'ja'ja'tsmeerra ya'circuncidāyte', circuncidāynimeesanpa fírrá'. ²⁶Atsa' circuncidāynimeesarrava leya's jiisa na'wē ew yūuwa'ja's cytey yuute yu', circuncidānyi na'wēysa fírrá'. ²⁷Mpa'yajcywe.

Tyā'wēme' circuncidāynimeesarrava, ley jycaajinity caavya'ja'jsa yu' circuncidāynisawe'shtyi ewmeecjē nviitutyna, macue leya's ji'pjrrava jycaajni's jyuca caavya'ja'ja'tsmeerra ya'circuncidāyte'. ²⁸ Tyā'wē yuwejurrāa judiutj jīsa judiu ya'yu'tsme', sa' tyā'wēy cacueterrāa circuncidāyrra judiu ya'yu'tsme', ²⁹ naasāa ūsusj jyuca Dyusa's yajcyna ew fi'nzeterrāac judiu na'wē yuj yuuna ya'pa'ja'. Sa' ewmēe ūus yaacyni's yu'ptjejisarrāa circuncidāyni na'wē. Atsa' tyā'wē ewmēe ūus yaacyni's yu'ptjejsa yuurrá'scu Dyusa' wechá'.

3 ¹ Tyā'wēte', judiurrāa ¿quij wejy tjaacue ewsa ji'pjtyna? Sa' ya'circuncidāyni' ¿quijtega selpi'? ² Tyāawe'sha' ewsa yu'sa' wala ji'pjta'. Tyāasaíi quijteva tjaacue ewsa Dyus yuwe's ji'pjta' tyāawe'shtyi neewe'werra nviitnisa's. ³ Tyā'wē Dyus yuwe tjaacue ewsa's ji'pjrrava judiuwe'sh maafi yu' Dyus yacj fi'nzewa'ja's cytey yuumeete', ¿quij yuucy? ¿Tyā'wē cytey yuumeeterrāa ¿Dyusva quijteva jyuca pu'chya' puuty we'weni's pu'chmēe yuuma'c? ⁴ Tyā'wē yuumeena. Macue naa quiwete nasa' Dyus yacj fi'nzewa'ja's cytey yuumeeteva, Dyus yu' tyajy pu'chya' puuty we'weni's cytey yuuna. Dyus tyā'wē cytey yūuwa'ja's we'werra', Dyus librote na'jī'c:

Tyāa ente cytey yuuni's uyrra',

Īshiimēe isa yuj we'wesa yu'ga jītyna jī'c.

⁵ Cue'sh ewmēe yūunisa' selpi'c tyā'wē ewmēe yūute írrāac Dyusa' tyajy peeygāani's jweefírrāa āate caavya'ja'ja'. Tyāa pa'ga ewmēe yūunisa' seelpisa', Dyus peeygāani's caavya'ja'jsa jī'ty maafi yu'. Tyā'wēte', cue'sh ewmēe yūuni's ¿ma'jī'tca'w? Cue'sh ewmēe yūunisa' seelpisate', Dyusa' ewmēe yūusatyi's castigāyrra', ¿Dyusva ewmēe yūusarra ma'c tyā'wē yūu? ⁶ Wej yujva ewmēe yūusame'. Dyusa' ¿ma'wē naa quiwete nasa yuuwesaty castigāyya' ājacy, tyāaíiva ewmēe yūusaarrá'?

⁷ Tyā'wē andy ewmēe yūunisa Dyusa's cytey cyu'ju'jna selpiitste', ¿andya's quijya'rrāa ewmeeng yūu jīna we'werra castigaícy? ⁸ Tyā'wē yaacysa': Ewmeesarrá's wejy pa'pchute ewna, ewsa vyaana nes yuucajn jī'ty. Tyāa yu' andya's atsesaty tyā'jī': Pablo' tyā'wēc caapiya'ja' jīna. Tyā'wē we'wesa' Dyus castigo yuurrá's jypa'gawa'jsata'.

Jyucay yuuwesatja'w

⁹ Na'wē' atsa' ¿judiuwe'shrrāa quij yūurra vite nasate jytjaacue ewsa yuucytja'w? Wej yujva tjaacue ewsameetja'w. Tyā'wē judiuwe'shrrāa tjaacue ewsatja'w sūjwe'shte caajiyu'jutstju: judiu ma'c yuu vite nasa ma'c yuu nava jyucaysa ewmēe pcalsarrarráatja'w. ¹⁰ Tyajíic Dyus libroteva na'wē we'we':

Teechrrāa yujva ewsa yu' meeta'.

¹¹ Quim yujva Dyusa's jiyurra pacueya' yaacysameeta'.

¹² Jyucaysa jypumbarra vituni ūsta'.

Tyāasa ew yūuwa'j yu'sa' teechrāa yujva yaaqui'tsmeeta'
mteewe'shrrāa yujva.

13 Tyāawe'sh we'weni' uusāa pendani cafya's pjandeni na'wē
canzhsata'.

Sa' tyāawe'sh tjune' ul weeswée veneno na'wē icjsa', īshiina
caypumba'jrra.

14 Seena' canzh ewmée we'weni yuurrá's ji'pjta'.

15 Tyāawe'sh chinda' nasa icjya' u'jwa'ja's yuurráaty selpi'.

16 Vitety űuste caafi'nze'jwa'ja's yuurráaty yajcyna fi'nze'.

17 Ewte caafi'nze'jwa'j yu'sa' yaaqui'tsmeeta'.

18 Dyusa' uyna űsna sūjna űucjwa'ja's yu' ji'pjmeeta' ji'c.

19 Dyus librute na'wē ewmeesata' jīna we'we'c tyāa yu' Dyus leya's
jiisawe'shtyi we'werrac tyā'jī'. Atsa' tyāawe'sha' Dyus yacj pdyi'puwa'j
en ājte', yuuwemeesatja'w jīna pasya' ājameetyna quim yujva. 20 Tyāa
pa'gatey leya'srrāa yajcyte', maa yujva yuuwemée ewsa ya'yu'tsme', leya'
naasāa quīj tyā'wē ewmeeteva tyā'sna pta'shsarrá' naa pa'ga.

Yuuwemeesa yuuya' Cristo's jypa'gawa'ja'

21 Atsa' ley jycaajni's nvijtrra yuuwemée ewsa yuuna pa'jwa'ja's āchja'
Dyusi caajiyu'cj, tyā'wē yūuwa'ja's Dyus leyte tyāniiteycu pta'shna fi'jni
ūsu' Dyusna selpisaawe'sh fi'jni. 22 Tyā'wē yuuwemée ewsa yuuna pa'jya',
naasāa Jesucristo yuurrá's űusuj jyuca yaacywa'ja', nasa ma'wēsava jyuca.
23 Tyā'wēme' maa yujva ewsamée, jyucay pcalsarrarrāa yuuna pa'jrra
Dyus tashte pa'jwa'ja's ji'pjmée űsta'. 24 Tyāa pa'gac Dyusa' peeygājrra
tyajy tashte yuuwemée ewsa yuuna pa'cjan, Cristo Jesusa's uuwa'j vit
cue'sh yuuwesaty nwe'wecajn. 25 Atsa' Cristo tyā'wē cluuste uunijūc
Dyusa's yaacysa tyāniiteywe'sh pcal peltunāynimée űsu'ne'ta tyāa pcaltyi
Dyusa' peltunāy, atsa' tyajūty yuuwemeesa jīni yuu. 26 Sa' naa ensuwe'sh
pcaltyiva tyā'wēyrrāac Dyusa' tyagachjīi Cristo cluuste uunijūjy
peltunāyrra nvijt, yuuwemeesa yuucajn maava Cristo's jypa'gawa'jsa
yuutyi'.

27 Atsa' ¿quīj yuupa'ga cue'shrrāa ewsatja'w sūjna weech yaaquicytja'w?
Tyā'wē yaacywa'ja' ptsuc. ¿Quīj yuupa'gaga iwejch yaacywa'ja' ptsu?
Jesusa's űusuj jyuca yajcyrra jypa'ganisa yacja', iwejch yaacywa'j
caseje'tsme', tyāa pa'gac iwejch yaacywa'ja' ptsu. Tyā'wēme' nyafii yu'
ley jycaajnyty cyteytju yu' sūjte', iwejch yaacywa'jrrāac caseje'. 28 Tyāa
pa'ga jiitja'w ley jycaajni's nvijtrra, naasāa Cristo yuurrá's űusuj jyuca
yajcyrra jypa'gaterrāa, yuuwemée ewsa yuuna ya'pa'ja'c nasa ma'wēsava
jyuca.

29 Dyusa' judiuwe'shrrāaty pu'chrra', judiu ji'jmée vite nasa yuutyi'
pu'chwa'jsamée váana atsne'cue i'cue'shrrāa iwejch yaaqui'. Tyā'wē
yuumée judiu ji'jmée vite nasatyva pu'chwa'jsafírrá'. 30 Teech Dyusrrāa

jyucaysawe'shtyi pu'chwa'jsa', circuncidāynisarrava Jesusna ũusuj jyuca yajcyna jypa'gaterráa yuuwemeesa ya'yuuna. Sa' tyā'wēy circuncidāynimeesarrava Jesusna ũusuj jyuca yajcyna jypa'gaterráa yuuwemée ewsa ya'yuuna. ³¹ Tyā'wē Jesusna ũuste jypa'gawa'jrrá's pta'shrra', ley yu' pu'chwa'jsame' jirra tyā'jĩ'tsmeetja'w, wejyva ley jycaajni's cytey yuuwa'ja'stja'w pta'shi'.

Abrahana' na'wēc yuu

4 ¹ Cue'sh yatsgawe'sh Abrahana's ũus miiyajcywe vacy: Tyā' ¿quĩjga yũu yuuwemeesa yuuna pa'jya'? ² Abrahana' quĩjrráava yũurra tyā'wē yuuwemée ewsa yuuna pa'jvatsa', tyā'wē yũurratj ewsa yuuna pa'j sũjna iwejch yaacywa'ja's ji'pjuwa'j ne' yu'. Nava quĩjva yũumeerrac ewsa yuuna pa'j, naa pa'ga iwejch yaacywa'j ji'pjmeec yu'. ³ Tyajĩc Dyus libroute pta'shrra': Abrahana' ũusuj yuurráac Dyusa' cytey yuuna sũjna yajcy. Tyā'wē yaacypa'garráa ewsa yuuc jĩ'c. ⁴ Peecy jii i'cue: Quĩjrráava mjĩipa'ga ducjnisa' peenisame'; tyā' mjĩipa'ga ducjnisa', yuula's dewenisa'. ⁵ Nava quĩj yujva yũumeerrava, naasáa pcalsaty nwe'wesa Dyusa's yuurráa ũusuj jyuca yajcyterráa, Dyusa' tyā'sa' yuuwemeesac vitu'. ⁶ Tyajĩc quĩj yujva yũumeerrava yuuwemeesa yuurra wechana fi'nzewa'ja's Davida' we'we na'jĩna:

⁷ Yuuwemeesang jĩna Dyusa' we'wete',

Yuuwemée neeyũusaawe'sha' wechanaty fi'nze'.

⁸ Maanava tyāawe'sh pcaltiyi cjũcjte', wechana fi'nzetyna jĩ'c.

⁹ Na'wē wechana fi'nzewa'ja's pta'shi'c tyā' ¿circuncidāynisawe'sh jĩirráa váana, meerra' circuncidāynimeesawe'sh jĩi yā'jrra váanacy? ¿Maa sũju'cue? Ew jiyuya' Abrahana's miiyajcywe. Tyā' ũusuj yuurráa Dyusa's yaacypa'ga yuurráac yuuwemée yuuna pa'j jĩ'c. ¹⁰ Atsa' Abrahana' ¿bagachga tyā'wē ewsa yuuna pa'j? ¿Circuncidāynijũ', meerra' circuncidāynimey vá' yuuwemée ewsa yuuna pa'j? Ew jiitja'w circuncidāyni yuumeycu yuuwemée ewsa yuuna pa'j. Tyāa e'suc Abrahana' circuncidāyni yuu. ¹¹ Nava tyāa circuncision yu' naasáa Dyusa's ũusuj jyuca yaacypa'ga yuurráa yuuwemeesac yuu jĩna cacuete sñal qui'pnisarrá'. Tyāa pa'gac Abrahana' tata na'wē caseje', macue circuncidāynimeesarrava Dyusa's ũusuj jyuca yaacysawe'sh maava jyucaysaty. Atsa' maava Abraham na'wēy circuncidāynimeesarrava ũusuj jyuca yaacysa yuutyi's Dyusa' tyā'wēyrráa yuuwemeesa vituna. ¹² Abrahana' circuncidāynisawe'shteve isa tata na'wēsa yuja', tyāawe'sh yuu Abraham na'wēy Dyusa's ũusuj jyuca yaacywa'ja's ji'pjute yu'.

Ūusujrráa Dyusa's yaacypa'ga Dyus puuty we'weni' cytey yuuni

¹³ Ayteva Abrahana' na'wērráac yuu tyā'sna miiyajcywe: Abraham vite' tyajy ji'ljwe'sh jĩi Dyusa' puuty we'wec naa quiwe's jyuca

tyāawe'shrrarráa yamuwa'ja's. Nava Abrahamana' leya's yaacypa'garráa tyā'wē Dyusa' yamuwa'ja's puuty we'weme', naasáa Abrahamana' ūusuj yuurráac Dyusa's jyuca yajcy, tyāa pa'ga yuurráac ewngu yuu jirra naa quiwete yamuwa'ja's vit. ¹⁴Tyā'wē leya's nwēese'jsarráa naa quiwe's yamuwa'jsavatsa', ūusujráa Dyusa's yaacysa' yamuwa'jsamée ne'ta yu', atsa' quiwe ūsu'nja jīna Dyus puuty we'wenisa' cyulne' yuuwa'j yu'. ¹⁵Ley ūste', tyā'sna cytey yuumeerra', yuuwesac ya'yu'. Nava ley meete', ¿ma'wē leya's cytey yuuya' ya'ājacy?

¹⁶Tyā'wē leymée pa'gaírráac Abrahamana' ūusuj yuurráa Dyusa's jyuca yajcy, atsa' tyā'wē yaacypa'gac Dyusa' naa quiwete jyuca yamuwa'ja's puuty we'we Abrahaman ji'jwe'shtyi. Tyāa puuty we'wenisa' leya's ji'pjsawe'sh jīrráa meea', Abrahamva ma'wēga Dyusa's ūusuj yuurráa jyuca yajcy tyā'wēy yūsawe'sh jīi yā'jrra. Tyāa pa'ga Abrahamana' cue'sh jyucaysate tata'. ¹⁷Tyā'fíc Dyus librouteva na'jī': Nasa maanzcuēesateva jyucaysate tata yuuwa'jsa indya's nviitutstju jic Dyusa'. Dyus yacja' quīj yujva tjēyme'. Tyā' uusaatyva qui' ityi vitu'c, sa' quīj yujva vyaawa'jmeeteva, caavya'ja'ja'c.

¹⁸Dyus Abraham yacj puuty we'wenisa' wej yujva cytey yuuwa'jsamée na'wērráac yu'. Nava Abrahamana' tyāa sūjmée Dyus we'weni' cytey yuuna sūjnarráac ūuste yu'acj. Atsa' Dyus we'werra': Iindy ji'ja' iiméj seena' cuj yuutyna jīna we'weni' cytey yuuyujc. Tyāa pa'gac nasa maanzcuēesateva jyucaysate tata yuu. ¹⁹Abrahamana' uuwa'ja'srráa yā'cj ūytjasna ūsu', cien añu ji'pjutsyā'cj yu' naa pa'ga. Atsa' Sara' bagachte yujva luuch ji'pjuwa'jsameec yu', tyā'wērráamée tjē'cjueyā'cj yu'. Macue tyā'wēteva, Dyusa' pu'chjina sūjwa'j yuurrá'scu ji'pju' Abrahamana'. ²⁰Tyāasac Dyus we'weni's jypumbana cuj jwend yajcymée Dyusa' cytey yuuna sūjna yuurráa yajcyna Dyusa's wecha. ²¹Tyāa pa'gatey Dyusa' tyajy we'weni' yu'sa' jyuca cytey yuuwa'jsa' sūjna yuurráac fi'nze. ²²Tyā'wē Dyus we'weni's ma'wērráa yujva jypumbamée cytey yuuna sūjwa'j yuurrá's ūuste yaacypa'gac Dyusa' Abrahamana's yuuwemeesa vit. ²³Nava Abrahamarráac yuuwemée ewsa yuu jīna fi'jni yuume'. ²⁴Cue'shtyiva ja'nda we'werrac tyā'jī', tyāa pa'gatey cue'shva Jesusa's ityi vit-sa Dyusa's ūusuj jyuca yaacypa'garráa yuuwemeesatja'w. ²⁵Cue'shtyi yuuwemeesa vit-ya'fírráac Dyusa' Jesucristo's pcalsawe'sh pa'gate uuwa'j vitrra qui' ityi vit.

Yuuwemeesa yuupa'ga Dyus yacj fi'nzewa'ja's uyni

5 ¹Tyā'wē Dyusa's ūusuj yuurráa jyuca yaacypa'garráa Dyusa' cue'shtyi's yuuwemeesac vit atsa' āchja' Dyus yacj wēt fi'nzewa'ja's ji'ptja'w, cue'shtyi jype'jsa Jesucristo nwe'wepa'ga. ²Tyā'wē Cristo cue'shtyi nwe'wepa'ga yuurráatja'w Dyus yacj wēt fi'nzewa'tje pa'j, Jesucristo's ūusuj jyuca yaacypa'ga. Tyāasa āchja' Dyus tashte pa'jwa'ja's ji'ptja'w, tyāasatja'w wala wechá'. ³Sa' Dyus tashte pa'jwa'ja'srráa

yajcyrra wechamée, naa quiwete ñuswa'ja'sva wecha'tja'w, tyāa pa'gatey ñuswa'j en pa'tje', jweelírrác Dyusa's chjächja yaacywa'j caseje'. ⁴Atsa' Dyusa's chjächja yaacywa'j casejte, Dyus yacj tyuteméc ya'fi'nze'. Atsa' Dyus yacj tyutemée fi'nzerra', Dyus luuchtja'w sūjwa'ja's ya'ji'pju'c. ⁵Atsa' Dyus luuchyā'ja', wej yujva ya'tjame'tsme', tyāa pa'gatey cue'sh ũuste Dyus Espiriturráa jyuca cjēerra ũsna Dyus peeygāanirrás' caajiyu'jna.

⁶Cue'shrráa yu' ya'nwe'wewa'ja's ājameeyā'tje', Cristo naa quiwete quīwa'j en ājte' pa'jrra cue'sh ewmeesa pa'gate uuc nwe'weya'. ⁷Quim yujva nasa ewmeesaty peeygājrra nwe'weya' uumeena. Meerra' maafi yu' tyā'wē yuuváatyna, nava nasa ewsaterráa tyā'wē yuutyna. ⁸Cue'sh yacj yu' tyā'wē ewmeesa pa'gate uuwa'ja' wala tjēya', nava Dyusa' cue'sh ewmeesateva peeygājrra tyajy Nchi'ca's naa quiwete caacj, ewmeesa cue'sh pa'gate uucajn. ⁹Tyā'wē Cristo cue'sh pa'gate uupa'ga nwe'wenisatja'w yuu, sa' nmej ente castigo iiméj seena'sate yu' wejy nwe'wenisa yu'nja'w. ¹⁰Tyāa pa'gatey cue'sha' Dyusa's atsesateyujva, tyāa yacj fi'nzewa'ja's vitcu Cristo's uuwa'j vitrra, na' āchj yu' Cristo uupa'ga yuuwemeesatja'w na' wejy nwe'wenisa yu'nja'w. ¹¹Tyā'wē yūupa'gatja'w Dyusa's wala wechá', cue'shtyi nwe'wesa Jesucristo' Dyus yacj fi'nzewa'ja's vitcu naa pa'ga.

Adan yacj Cristo yacja' ja'ndameeta'

¹²Pcala' naa quiwete teeche nasate yuurráa u'carrac uuwa'ja's vit, tyāa pa'gaty jyucaysa naa cacue uuwa'ja's ji'pju, pcalte wetepa'ga.

¹³Ley casejmey, pcala' naa quiwete ũsyā'cj yu'. Nava ley pta'shrra: Naa ewmeesa' jīna pta'sh ja'ndamée yu', ewmeesana sūjwa'ja's ya'ji'pju'tsmeene'. ¹⁴Ley yu' meeteva, pcal ũsyā'tje íity Moises meetey Adanwe'sh jyucaysa peecy cacue uuwa'j ena's ji'pju, Adan na'wēy yu' mée yūurra pcalte weteteva, uu ena' ja'ndarrarrác pa'j. Ew yajcyte yu', Adana' naa quiwete quīwa'jsa ũsu'c tyāa na'wēsac yu'.

¹⁵Nava Adan pcal yacj vite' cue'sh ewte neeyūunisa yacja' wej yujva ja'ndameeta'. Teeche pitstjē'j pcalte wetepa'ga yuurráa jyucaysaty uuwa'ja's ji'pju, naapcachja' teeche pitstjē'j Jesucristo pa'ga yuurráa jyucaysaty tyāa pcaluj ewte neeyūuwa'ja's ji'pju. Tyā' jyucaysatycu nwe'we naa pa'ga jytjaacue wala ewsac yu'. ¹⁶Teeche pitstjē'jsa pcal yuuc tyāa pcal yacj Dyus ũscu ewte neeyūuwa'ja's tyāa yacja' wej yujva ja'ndameeta'. Tyāa pa'gatey teeche teendyi'j pcal yūunisarráa maanzcuēe us pcalsateva ājsac yu', naapcachja' Dyus ũscu ewte neeyūuwa'ja's tyā' maanzcuēe pcal ji'pjsateva tyāaju yuuwemeesac vitna pa'j. ¹⁷Teeche yuuwe yuupa'garráa, uuwa'ja' nescu yuuna pa'j. Atsa' bagachte yujva ptsumée ityi fi'nzewa'ja' wejy tyā'wē bagachteva nes yuuna Jesucristopa'ga.

¹⁸Adan ewmée yūunisa' jyucaysatycu ewmeecjē vitna pa'j, naapcachja' Jesucristo ew yūunisa' nasa jyucaysatycu yuuwemée ewsa vit. ¹⁹Tyā'wē

teech pitstjêl' Dyusa's nwêese'pja'gameerrâa jyucaysaty pcalsa yuu, naapcachja' teech pitstjêl' Dyusa's nwêese'pja'garrâa jyucaysa yuuwemeesaty yuuna pa'j.

²⁰ Quîjrraj yûunisa tyâ'wê pcalteva jyuca âate jiyucajn îírrâac leya' casej. Atsa' pcala's tyâ'wê ew jiyutspcachja', Dyus peeygâanisa yu' jwee îírrâac tjaacue wala vyaa. ²¹ Pcala' uuwa'ja'scu vit, naapcachja' Dyus peeygâani' psumée îtyi fi'nzewa'ja'scu vit Jesucristo nwe'wepa'ga.

Pcala's nwêese'jmée Cristo yacjrrâa îtyi fi'nzewa'j

6 ¹ Dyus peeygâjna peltunâyni' jweeîírrâa nes yuucajn, ¿pcalte fi'nzena nesmtja'w yuu? ¿Maa sÿju'cue'? ² Cue'sha' peena yu' pcalte fi'nzewa'jsameetja'w, tyâa pa'gatey pcaluj tyuteerra peena yu' nwêese'jwa'jsa meeyâ'tja'w, sa' ¿quîjya'rrâa jwee pcalte fi'nzena nes yuucytja'w? ³ Meerra' jiyu'tsmeevá'cue, nava maava Cristo Jesus yacj fi'nzeyá' yu'te ya'bautisâynijû', Cristo yacj ja'nda uusâa na'wêtja'w yu'. Yu'te ya'bautisâyni tyâ'wê Cristo yacj ja'nda uurra pendaní na'wê yûunisa'. ⁴ Tyâa pa'ga cue'sha' uurra pendani na'wêsatja'w yuu, atsa' Cristova ma'wêga Dyus pu'chte uunijûva qui' îtyi yuu atsa' cue'shva tyâ'wêy yuusaatja'w. Tyâasa wala ew fi'nzewa'j jiptja'w.

⁵ Cue'sha' Cristo yacj ja'nda uusâa na'wê yuurra, tyâa yacj fi'nzena ûstja'w, tyâa na'wêy îtyi yuurra. ⁶ Tyâasa jiitja'w Cristo' cue'sh pcala's iviituya' cluuste uuc, cue'sha' peena yu' pcalte fi'nzecajmen. ⁷ Atsa' pcala' peena yu' jycaajya' âjawa'jsame', tyâ'wê uusâa na'wê yuusa yâ'tyji's. ⁸ Tyâa pa'gatey cue'sha' Cristo yacj ja'nda uusâa na'wê yuurra âchja' tyâa yacj îtyi fi'nzena ûstja'w naa pa'ga. ⁹ Cue'sha' jiitja'w Cristo' uurrava qui' îtyi yuunijÿyâ'ja', uu ena' peena yu' pa'jmeena tyâ'sa'. ¹⁰ Cristo' pcala's nmej iviituya' teendyi'j yuurráac uu, tyajÿyâ'ja' bagachte yujva peena yu' uuya'mée. Sa' âchja' Dyus yacj îtyi nes yuuwa'jsa' bagach enteva. ¹¹ I'cue'shva tyâ'wêy uusâa na'wêrrâa mfi'nzewe, pcala's peena yu' nwêese'jmée naasâa Dyus yacj yuurráa mfi'nzewe, Jesucristo's pi'cyrra.

¹² Pcala' peena yu' jycaajwa'j ji'pjme' i'cue'sh cacuete, nava nwêese'jevá'cue atsa' tyâaí qui' jycaajana. ¹³ I'cue'sh cacue's pcalte cselpi'jnuwe, wejyva Dyus cusete mecselpi'jwe, tyâa pa'gatey Dyusa'srrâa selpiiya' sÿjrra qui' îtyi yuusâa na'wêsa i'cue naa pa'ga. Atsa' i'cue'sh cacue' Dyus cusete ewsa yuurráana selpiina. ¹⁴ I'cue'sha' jii i'cue, leya' nwe'wewa'jsame', naa pa'ga âchja' Dyus nwe'wenite üsi'cue atsa' pcala' peena yu' i'cue'sh cacuete jycaajwa'j ji'pjme'.

Dyusa's yuurráa selpiiya' utyani

¹⁵ Tyâ'wê leya' nwe'weya' âjâmeeyâ'tje', ¿qui' pcalteyrrâa fi'nzemtja'w, Dyus nwe'wenite üsrrava? Wej yujva pcalte fi'nzewa'jme'. ¹⁶ I'cue'sha' ew jii i'cue, selpiina nwêese'jya' sÿjrra maava patron tashte pa'jrra', tyâa

yuurrá's i'cue nwēese'ljna selpi'. Tyā'wēyírrá' pcalá'srráa nwēese'tje', ewmeete vituwa'jrráac caseje', naapcachja' Dyusa'srráa nwēese'tje', Dyus yacj ew fi'nzewa'jrráac caseje'. ¹⁷I'cue'sha' nyafiia' pcalá'srráa i'cue selpisáa yu'. Nava áchja' Dyus pu'chte', úusuj jyuca wechana i'cue caapiya'jni ewsa's jypa'ga tyā's yuurráana nwēese'ljna. ¹⁸Tyāasa i'cue pcaluj tyuteyá'jrra', ew yūuna Dyusna selpiina fi'nzewa'tje pa'j. ¹⁹(I'cue'sh ew jiyucajntju naa quiwega selpinisa yacj caaja'nda'jrra pta'sh.) Nyaffiiva ma'wēcue i'cue'sh cacue's ewmeeterráa cseelpi'jna úsu', tyā'wēy áchja' Dyus cusete yuurráa ya'mducjwe i'cue'sh cacue's tyāa yuurrá's selpiiya'.

²⁰I'cue'sha' nyafiia' ew yūuna fi'nzewa'ja's nwēese'jmée pcalte yuurráa fi'nzena úsrra', ²¹cyte' ¿quijcue ewsa uy, tyā'wē tjaampa'terráa fi'nzena úsrra'? Tyā'wē fi'nzete', naasáa uuwa'l yuurráac vya'. ²²Nava pcaluj tyuteyá'jrra', Dyusna selpiwa'tje i'cue pa'j, atsa' cyte yuurra' ewsa vyaayuju'fic. Tyā'wē yūurra', quij pcal yujva ji'pjmée fi'nzewa'ja's ya'jypa'ga'c, sa' nmej ente' bagachte yujva ptsuwa'jmée ityi fi'nzewa'ja'sva ya'ji'pjuna. ²³Tyā'wēme', pcalá' naasáa uuwa'ja's yuurráac úsu'. Nava Dyusa' bagachte yujva psumée ityi fi'nzewa'ja'scu peesu', Cristo Jesus nwe'wepa'ga.

Ptamuní ley yacj caaja'nda'jni

7 ¹Yacjtjē'jwe'sh maava leya's jiisa' peecy jii i'cue leya' naa quiwete nasa nee ityiyterráa jycaajya' ájawa'jsa'. ²Ptamuurra fi'nzeni leya's miijajcywe vacy: U'y iimi'sa' tyajy nmi' uu ja'ndamée yu' vite yacj iimi'ya' ájawa'jsame'. Tyā'wē tyajy nmi' uumey vite pitstjē'j yacj utyaarra fi'nzerra', pcal yuusac yu' ji'c. ³Nava nmi' uunijūyá'ja', peena yu' tyā'wē jycaajna nes yuuya' ája'tsme', atsa' tyajy nmi' uunijū' vite pitstjē'j yacj iimi'ya' ájawa'ja'scu jycaaja'.

⁴I'cue'shva tyā'wēy Cristo tashte utyaasá' uúsaa na'wēsai'cue, atsa' leya' uusa's jycaajya' ájawa'jsame'. Atsa' áchja' i'cue'sha' Cristo uurra qui' ityi yuuc tyajy nasai'cue, Dyus yuurráana selpiina fi'nzewa'jsa'. ⁵Tyā'wē Cristo tashte utyamey, cue'sh ewmée yūuya' yaacynity ley pta'shrra': Ewme' ji'c tyāatyírráac wejy tjaacue yaacy wēe yuu. Atsa' tyā'wē yaacypa'ga Dyus castigote uuwa'jrráac yuu. ⁶Nava áchja' leya' cue'shtyi tjengwa'l ji'pjme'. Tyāa pa'ga áchja' Dyus Espiritu jycaajnirrá's nwēese'jwa'l ji'ptja'w, leya's yajcymée.

Andy úuste pcal ússa

⁷Tyā'wēte', leya' ewmeesana ¿sūju'cue'? Wej yujva tyā'wēme'. Tyāa leya' naasáa quij tyā'wē pcalteva pta'shsarrá'. Ley pa'gameevatsa', andya' jiyuwa'jmée ne'tca yu' quij tyā'wē pcalteva. Ley pta'shrra': Vite jiity cusa'l wēena ewmée yūuwa'ja's yajcyna fi'nzewa'jme' jimeevatsa', andya' jiyuwa'jmée ne'tca yu' tyā'wē yaacynisa' pcalteva. ⁸Ley pta'shrra': Tyā'wē

yaacyni' ewme' jiniñuc andy ñuste jweeñirraa ewmée yũu wēenisarráa ñusutje. Ley tyãñimeevatsa', pcalna sũjwa'j casejwa'jmeene' yu'.

⁹ Andya' nyafiaa' ley pta'shni's jiyumey yu', yuuwemeesatj sũju'rráatj.

Nava ley pta'shni's jiyuniñuc jweeñirraa ewmée yũu wēe yuu. Tyãa pa'gatj isa yuuwesa ne'tca sũjwa'ja's ji'pju. ¹⁰ Tyajutj isa ew jiyu, leya' nwe'wepcachte, ewmée yũuwa'ja's cchjãachja'jsarráac yuu andy yacja'.

¹¹ Tyãa pa'gatey pcalá' leypa'gañirraac jweeñirraa chjãchjarra andya's Dyus castigote uuwa'j vit.

¹² Tyãwērrava, leya' ewmeesame', tyãa pa'gatey leya' quijteva jyuca ew yũuna fi'nzewa'ja'srráac jycaaja'. ¹³ Tyãwē leya' ewsarra', ¿ma'wēqui'c andya's Dyus castigote uuwa'j vit? sũju'tj. Nava ley tyãwē uuwa'j vitme'. Ewmée yũu wēenisac Dyus castigote uuwa'j vit. Isa ew jiyute yu', ley jycaajni ewsa's nwēese'jmée ewmée yũu wēenisarrá's nwēese'pja'gac tyãwē pcal yu'. Atsa' tyãa pa'gac nwēese'jnimeesa' pcalna sũjna jiyuniñũ' yuuwesa uuwa'j ya'yu'.

¹⁴ Jiitja'w leya' Dyus yacj fi'nzewa'ja's yuj pta'shi'c. Nava Dyus yacj fi'nzemée ewmée yũuwa'ja'srráatj yajcyna fi'nze', naa pa'ga yuuwesa' andytju. ¹⁵ Andya' jiyu'tsmeetj ma'wērra ne'tca andyna selpiwa'jsa yu'sa' cytey yuumeerra', andyna ewmée vitwa'jsa yu'sa' cytey yu'.

¹⁶ Ley pta'shrra' ewme' ji'c atsa' ewmeesateva jiirratj tyãa ewmeesa's ñirraa cytey yu', tyãa pa'gatj leya' yuuwemeesana sũju'. ¹⁷ Peecyráa tyãwē ya'yu'tsmeene'. Andy ñuste ewmeesa ñsna tyãane' tyãwē ewmée yũuwa'ja'srráa caaũusutje'je'. ¹⁸ Tyãa pa'gatj andy ñuste' quij yujva ewsa yu' meena sũju'. Tyajñirraa ne'tca ewsa's nwēese'j wēerrava, cytey yuuya' ãja'tsmée. ¹⁹ Naasáa selpiwa'jmeesarrá's cytey yuurra', selpiwa'jsa yu'sa' cytey yu'tsmeetj. ²⁰ Na'ji'tj na': Andyna ewmée vitwa'jsa yu'sa' cytey yuurra', peecyráa tyãwē ya'yu'tsmeene', andy ñuste ewmée caaũusutje'jsa ñsna tyãane' ewmeesarrá's cytey yuwa'ja's caaũusutje'je' atsne' tyãwē ya'yu'.

²¹ Tyajñirraac ewsarrá's cytey yu'nja sũjteva, ewmée yũuwa'jrráa caseje'.

²² Andy yu', Dyus leya's cytey yu'nja sũjteva, ²³ andy ñuste ewmeesa ñsna tyãac ew yũuwa'ja's caaũusutje'je'tsmée. Tyãasac andya's ewmeete yuurraa jype'je'.

²⁴ Andya' seena' yuj ãjmeesatj. Atsa' andya's ¿quim nwe'wecy naa cacue na'wē uuwa'tje yuurraa pe'jna u'juetsa' tyãajũ? ²⁵ Tyãwēteva Jesucristo' pejca nwe'wec tyãajũ, tyãa pa'gatj Dyusa's wala wechál. Tyãwēme', nyaffi yu' Dyusa's selpi'nja sũjrrava, andy ñuste ewmée yũuya' yaacynirrá'stju selpi'.

Dyus Espiritu's nwēese'pja'ga Dyus yacj fi'nzewa'cj caseje'

8

¹ Tyãwē Cristo Jesus nwe'wepa'ga, cue'sh cacue ewmée yũuya' yaacyni's nwēese'jmée naasáa Dyus Espiriturrá's nwēese'jna

fi'nzesawe'sh yacja' ächja' quij castigo yujva meea'. ²Tyãa pa'gately Dyus Espiritu ityi caafi'nzel'jwa'jsa' nwe'wec tyã'wê pcalterrää fi'nzenijü, sa' uuwa'tjerrää yã'lj üsteva tyãajüva nwe'wec, Cristo Jesus yacj fi'nzepa'ga. ³Moises leya' cue'sh cacue ewmée yüunijü tyujndeya' äjameeyã'tje', Dyusa' tyajy Nchi'ca's caacj nasaa cacue's üsrra. Atsa' tyãa cacue yacj cluuste uurrac pejca nwe'we, pcala' peena yu' ewmée yüuna caafi'nze'cjamen. ⁴Tyã'wê cluuste uurrac cue'shtyi nwe'we, cue'sh cacue ewmée yüuya' yaacyni's wej yujva nwëese'jmée Dyus Espiriturrá's nwëese'tje', Dyus leya' quijteva jyuca ew yüuna fi'nzewa'ja'srrác jycaaja' tyã'sna pejca cytey yuuya' äjacajn.

⁵Tyãa pa'gaty ewmée yüuna fi'nzenijü nwe'wenisa' Dyus yacj fi'nzewa'jrrá's yajcyna fi'nze', naapcachja' ewmée üus yaacyni's yu'ptjejnimeesa' ewmée yüuwa'ja'srráaty pa'pchuna fi'nze'. ⁶Atsa' ewmée yüuwa'ja'srráa pa'pchute', Dyus castigote uuwa'jrrác caseje'. Nava Dyus Espiritu's nwëese'tje', üuste wê't fi'nzewa'cj caseje'. ⁷Tyã'wê ewmée yüuwa'ja'srráa pa'pchusa', Dyusa's atsesata'. Tyã'wërraüty Dyusa's nwëese'je'tsmée, sa' leya'sva cytey yuuya' äja'tsmeeta'. ⁸Tyã'wê ewmée yüuya' yaacyni's yu'ptjejnimeesa' Dyus yacj iwejnindy fi'nze'tsmeeta'.

⁹Nava i'cue'sha' Dyus Espiritu's üuste ji'pjrra', ewmée yüuya' yaacyni's nwëese'je'tsmeei'cue, naasáa Dyus Espiriturrá's i'cue nwëese'je'. Atsa' Dyus Espiritu's üuste ji'pjmeesa' Cristo jiimeeta'. ¹⁰Nava Cristo' i'cue'sh üuste fi'nzena üste', macue cacue yu' pcalpa'ga uuwa'jsateva Dyusa' i'cue'shtyi' qui' ityi vituna, tyãa pa'gately Dyusa' i'cue'shtyi yuuwemeesac vit naa pa'ga. ¹¹Tyã'wê Cristo Jesus uunijüva qui' ityi vit-sa Dyus Espiritu' i'cue'sh üuste fi'nzena üsrra', i'cue'sh uuteva qui' ityi vituna pety cacue yã'jrra.

¹²Tyãa pa'ga Dyus Espiriturrá's nwëese'jna fi'nzewa'jsatja'w, ewmée yüu wëenisa's nwëese'jwa'lj ji'pjmeetja'w. ¹³Tyã'wê ewmée yüu wëenisa's nwëese'jna fi'nzerra', bagachte yujva Dyus yacj fi'nzewa'jmeete u'juene'cue. Nava Dyus Espiritu pu'chte ewmée yüu wëenisa's nwëese'jmée jyucate nvijtrra', bagachte yujva ptsumée ityi fi'nzewa'tje u'juene'cue.

¹⁴Atsa' maava jyucaysa Dyus Espiritu jype'jnisa' Dyus luuchta'. ¹⁵Ew mjiyuwe: I'cue'shtyi jype'jsa Dyus Espiritu' nyafii ley ma'wëga seena' jycaaja' tyã'wê seena' juuna' jycaajwa'jsame', wejyva Dyus luuch yuucajn pu'chsarrá' üucjmée wechana fi'nzecajn. Tyãasaíic cue'sh üuste na'wërráa caaüusutje'je' Dyusa' cue'sh Tatana süjwa'ja's. ¹⁶Tyãasac Dyus Espiritu' cue'sh üuste cjeërra cue'shtyi caaüusutje'je' Dyus luuchtja'w süjwa'ja's. ¹⁷Tyã'wê Dyus luuch yã'ja', Dyus jĩ's jyuca jypa'gawa'jsatja'w. Dyusa' tyajy jii yu'sa' jyuca Cristo's üsuna tyã'sna cue'shva jypa'ga'nja'w Cristo yacj ja'ndarra. Nava Cristo yacj pytjaa yuua'ja's ji'pjurra yuurráa cielute tyã'wê jypa'ga'nja'w Cristo yacj ja'ndarra.

¹⁸ Cielute tyā'wē seena' wēt wēt-sa's jypa'gawa'jsatja'w, tyāasa naa quiwete pytjaa yuunisa's le'chcuērráa yujva yaacywa'l jip'jmeene'tca'w sūju'tj. ¹⁹ Tyāa pa'gafirráaty Dyus pjeu'jrra nviitnisa quījquījva jyuca tyacue wala ūytjasu', āchjíi yu' tyacue wala űusna űsrrava, Dyus luuch jyucaysaty jyucate nwe'wewa'l en seena' zhichcue yūuwa'ja's. ²⁰ Tyā'wē Dyus pjeu'jrra nviitnisa quījquījva jyuca űusna űscajní jyucaty ewmeeterrarráa nviitni neeyūu. Tyāasaty Dyus nwe'wewa'l ena's tyacue wala ūytjasu', Dyus pjeu'jrra nviitnisa' peecyrráa tyā'wē ewmeete neeyūumeeta', Dyusa' ma'wē nwe'wewa'ja'sva jiirrane' ewmeete weteyā'tje', tyagachjíi yu' nwe'wemée cytee nvijt. Tyāa pa'gaty tyacue wala űusu'. ²¹ Atsa' Dyus nwe'wewa'l en ājte', tyajū yuurrá' quījquījva jyuca āchj na'wē ewmeete űsta' tyāajū nwe'weni yuutyna Dyus luuch yacj ja'ndarra. ²² Jiitja'w āchjíi yu' quījva jyuca wala yuj seena' pytjaa yuuna u'y nasate yaacasá na'wē pembeena űsta'. ²³ Nava Dyus pjeu'jrra nviitnisarráamée tyā'wē pytjaa yuuna űsta'. Cue'sha' Dyus űsni yu'sa' jyuca jypa'gawa'jsarra nyafyte űsni tyajy Espiritu's jypa'gayā'tja'w. Nava cue'shva ja'nda pytjaa yuuna űstja'w, cue'sh cacue qui' űtyi yuuwa'l en ājte Dyus luuch jyucaysaty jyucate nwe'wewa'l ena's űytjasna. ²⁴ Tyā'wē cue'sh cacue qui' űtyi yuuwa'jsate firráac Dyusa' nwe'we, atsa' űtyi yuuwa'ja's jiirratja'w űytjasu', tyā'wē yuuwa'l en pa'jyujuna sūjna. ²⁵ Tyā'wē űtyi yuuwa'ja's jiimeevatsa', ¿quījya'rráa űytjasucytja'w? Nava tyā'wē yuuwa'l en ājmeya', nava e'surráava āayujuna sūjnatja'w űytjasu'. ²⁶ Tyāa pa'gafirráac Dyus Espiritu cue'sh űuste cjēerra pu'chna cchjāachja'ja'. Cue'sha' Dyus yacj ma'wē puuty we'wewa'ja'sva jiimeerra shiingutsteva, Dyus Espiritu' cue'sh pa'gate Dyus dyi'pte wala pa'pchu'c iiméj wala űus yajcyna. ²⁷ Atsa' Dyusa' űus yaacyni's jiisa', tyāasac Dyusa' jiyu tyajy Espiritu yaacyni's, Dyus Espiritu' naasáa Dyus cytey yuuwa'ja'srráac jytjāasu' cue'sh jyucaysa pa'gate.

Quīj yujva tyujndemeetyna Dyus yacj fi'nzesaty

²⁸ Cue'sha' űuswa'l ena's yaacywa'l jip'jmeetja'w, tyāa pa'gatey en ma'wēsava pa'jrrava, tyāa yu' jyuca selpiwa'jsarrarráata' Dyusna yaacysawe'sh yuutyi's tyā'sa' ew jiitja'w. Sa' tyāawe'shtyi' quīj yuuya' ne' Dyusa' tyjityj tyāa yu'sa' cytey yuuna. ²⁹ Tyāasaíic maarraj ne'ta tyajy tashte pa'jwa'jsa yu' tyāa yuutyi' jyuca jiyurra nyafíi entey tyjityj tyajy Nchi'c na'wēy yuucajn, atsa' tyajy Nchi'c yu'sa' nyacj ntjē'jsa yuuwa'jsac vitrra nvijt. ³⁰ Sa' tyajy tyjityjnisatyi's tyajy tashte nuypa'cj, sa' tyajy tashte pa'jsatyi's yuuwemeesac vit, sa' yuuwemée vitnisatyi's tyajy Nchi'c yacj ij űsawa'jsac vit.

³¹ Dyusa' cue'shtyi's tyā'wē seena' ew yūute', ¿quim cue'shtyi' ewmeete nvijt-ya' ājacy? ³² Dyusa' tyajy Nchi'ca's yujva űchji'ndymée cue'sh jyucaysa pa'gate cluuste uurra nwe'wecajn űscu. Tyajy Nchi'ca's yuj űsutsrra',

cue'sh quijcue peejini yu'sa' wejy tjaacue tjěymée ũsuna. ³³Dyus tyjityjrra yuuwemée vitnisatyí, ¿quim ewmeesata' jīya' ājacy? ³⁴Cristo' cue'shtyi nwe'weya' uurra qui' ityi yuurra āchja' Dyus patsu ju'ngte ũsa' cue'sh ju'ngu we'we pu'chna, atsa' ¿quim cue'shtyi ewmeete nvijt-ya' ājacy? ³⁵Na'wē' atsa' Cristo peeygāanisatyí's ¿quijrrá' tyajū tyujndeya' ājama'c? Meerra' űuswa'j en, yaatsewa'j en, pcyuwa'j en, wēje en, sūpyrráa nviitwa'j en, űucjūucjte yuurráa fi'nzewa'j en, icjte uuwa'j en quijva tjěysa pa'jana. ³⁶Tyajíic Dyus librouteva tyā'wē yūuwa'ja's we'werra' na'jī':

Dyus yacj fi'nzepa'ga icjte uuwa'jsarráatja'w,

Piishacuē's icjya' jyūna u'jnisa na'wē quij enteva jī'c.

³⁷Macue tyā'wē seena' yuwa'j en pa'tjeva, tyāatyí' jyuca cnaywa'jsatja'w, cue'shtyi peeygāasa Cristo pu'chpa'ga. ³⁸Tyāa pa'ga Dyus peeygāanijū' quij yujva tyujndeya' ājawa'jsame's ew jiitj: uu en ma'c yuu, meerra' naa quiwega ityi fi'nzewa'j ma'c yuu, Dyus angeleswe'sh ma'ty yuu, echtjē'j angeleswe'sh ma'ty yuu, meerra' echtjē'j yuu ma'c yuu, meerra' āchj naa ensu nacue seena' yuutsta' tyāa ma'ty yuu, meerra' vite en seena'sa yujna tyāa ma'ty yuu, ³⁹meerra' infernojuwe'sh seena'sa ma'ty yuu, nava Dyus peeygāanijū' quij yujva tyujndeya' ājameena, tyāa pa'gatey cue'shtyi jype'jsa Cristo Jesus nwe'wenisa yā'tja'w naa pa'ga.

Dyus Israelwe'shtyi tyjityjni

9 ¹Andy jī'j judiwe'shtyi iiméj wala peeygājna bagachteva andy űuste űusna yuurráatj fi'nze'. ²I'cue'sh pa'gate andya' Cristo yacj űswa'ja's iiviitute', i'cue'sh jyucaysa ewte neeyūune'jvatsa', andya' peeygāaweete cytey yu'nja sūju'tj. ³Andya' i'cue'shtyi tyā'wētj wala peeygāja' jīrra' īshiirra tyā'jitsmeetj, tyāa pa'gatey Cristo yacj fi'nzesarra' Dyus Espiritu caaūsutje'jnnirrá'stju we'we'. ⁴Andy jī'jwe'sha' Dyus tyjityjnisata', naa pa'ga Dyus luuchta'. Tyāapa'gac Dyusa' tyāawe'sh cshavyte pi'cyna űsu' eena' cweetjna. Sa' ma'wērraj pu'chwa'ja'sva puuty we'wec. Leynava űscu. Dyuus yatte ma'wē yūuwa'ja'sva pta'shcu. Sa' quiwe's jyuca yamuwa'ja'sva puuty we'wec. ⁵Tyāawe'sha' nyafyte Dyus tyjityjnisa Abrahan jī'tja', atsa' tyāawe'sh jī'tjec Cristo upyjna űsu' nasaa cacue yacj. Tyāa Cristo' Dyusírráac yu', bagachteva tuutje'jni yuwa'jsa.

⁶Israelwe'shtyi Dyusa' nwe'weya' puuty we'wec tyā'sa' cytey yuumée yu' yuume'. Israel jī'j judiwe'sha' maafí yu' Dyus luuch yu'tsmeeta', tyāa pa'garráac maafí yuutyí' cytey yuumée. ⁷Tyā'wēy Abrahan jī'jva jyucay yu' Dyus tyjityjnisa yu'tsmeeta', tyajíic Dyusíiva na'jīna āate pta'sh: iindy nchi'c Isaacte upysarráa iindy jī'j andy tyjityjnisa yuutyna jī'c. ⁸Atsa' Abrahan jī'tja'w naa pa'ga Dyus tyjityjnisatja'w sūjwa'ja's jī'pjmeeta' jyucay yu', naasáa Dyus puuty we'wenite upysarráa Abrahan jī'tja'. ⁹Tyāa pa'gatey Dyusa' na'jīnac Abrahan yacj puuty we'we: En ājte', shawendu'nja, atsa' Sara' teech nchi'c jī'pjuna jīc.

¹⁰ Tyā'wē Isaac upywa'ja'srráa we'wemée, Rebeca nchi'c e'nzsa upywa'ja'sva we'wec. Tyāawe'sh neya' Isaacu yu', cue'sh yatsgawe'sh. ¹¹ Sa' tyāa e'nz nchi'csa uppyuumeyna, Dyusa' tyjityjcu tyāawe'sh ma'wē yūuna fi'nzeni's uymeyrrava. ¹² Tyāasac Dyusa' na'wē we'we Rebeca's: Nyacj yatstewe'sha' e'stewe'sha's selpisáa yuuna jīnac we'we. Ew jiyute yu', Dyusa' ew yūsarráaty tyjityjwa'jsa yu'tsme', maatyva tyajy wendyni yuutyi' tyjityjwa'jsarrác yu' tyā'wē yūuwa'ja's caajiyu'j'nac macue judiu ji'tjeva pyacj e'nzí yuutyi' tyjityjmée, teechsarráana tyjityj. ¹³ Atsa' Dyus libruve tyā'wēyrráa we'wena fi'jni ūsa': Jacoba's peeygāj'tj, nava Esaua's peeygājmeetj jī'c.

¹⁴ Dyusa' ¿ewmeesarra ma'c tyā'wē ma'wēsatyva tyjityji'? Ewmeesa yu'tsme'. ¹⁵ Tyā'wēmeerraíic Moisesa's na'jīna we'we: Andya' ma'wēsanava peeygājarrá'nja, sa' tyā'wēy ma'wēsanava pu'chjirránja jī'c. ¹⁶ Tyā'wē cue'sh quijrráava pa'pchurra Dyus peeygāani's ya'jypa'ga'tsme'. Cue'sh cacueju quijva pa'pchumeeteve Dyusa' peeygājarrác maatyva. ¹⁷ Dyusa' ma'wēsanava peeygājarráana, sa' tyā'wēy wa'lwa'jsa yu'sa' ma'wēsanava cytee nviiturráana. ¹⁸ Tyāasafí Egipto quiwete jycaajsa's Dyus libruve pta'shi'c na'jīna: Indya's jycaajwa'jsatj vit, andy quijya'va jyuca ājani's iindypa'ga nasa jiyucajn, sa' andya's quimteve naa quiwete jyuca jiyucajntju indya's tyā'wē yūu jī'c.

¹⁹ Tyā'jite', na'wē yaaquine'nga: Dyusíi ne' ma'wē yūuwa'ja'sva vitu', atsa' cue'sha' yuuwemée ne'tca'w sūjune'nga. ²⁰ Nava ūus miiyajcy: Cue'sh ma'wē yuua'jsateve Dyusa' jiirrane' tyā'wē yūi', atsa' indya' tyā'wē yaacywa'j ji'pjmeeng. Quiwe mityja' ¿Quijya'nga andya's tyā'wē umu'? jīsaate jiimeetja'w. ²¹ Mityj umsa' ma'wē mityja's umwechteve tyajy wendyni yu'sa' viturráana, tyāa quiwe's írráa ewte selpiwa'jsa, vite' ewmeete selpiwa'jsa.

²² Dyusva nasatyí tyā'wēycu vit. Sa' maafityi's wa'lpa'ga castigo seena'sate ūswa'jsa vitrrava, peeygājrra macue tyachva ūytjascu dund yu' castigaímée. ²³ Sa' vite wa'lsameetyi's ēe walate seena' zhichcuesa's jypa'gawa'jsac vit, tyā'sna jypa'gawa'jsatyí nyaffi enteycu tyjityj. Atsa' cyteewe'sha' cue'shtja'w tyajy peeygāanisa. ²⁴ Dyusa' maatyva tyjityjwa'jsarrá, tyāasafíic maafityi' judiu ji'jtyva tyjityj, sa' judiu ji'jmée vite nasatyva tyjityjcu. ²⁵ Tyā'wē maatyva tyjityjwa'ja's Oseas libruve na'jīnac we'we:

Andy tyjityjnimeesateva, andy nasa vitu'nja.

Sa' andy peeygāanisameeteve, andy peeygāanisa vitu'nja jī'c.

²⁶ Sa' nyaffi we'werra': Andy luuchmée i'cue jīrrava, tyāa e'su': Dyus ítyisa luuch yuune'cue jīna we'wena jī'c.

²⁷ Nava Israelwe'shtyi we'werra' na'jī'c Isaiasa': Israelwe'sh ji'ja' cuet muse na'wē seena' cajsarrava, cujméerráa ewte neeyūutyna. ²⁸ Ewsa' cujméerráa yuucajnii wa'lsatyi's dund iviituna Dyusa' jī'c. ²⁹ Tyā'wē yūuwa'ja's we'werrac Isaiasa' na'jī':

Dyus quíjteva jyuca ájasa judiu jil'jty manzcuẽ nvijtmeevatsa',
Sodoma vite' Gomorra chjamb na'wẽ jyucate vituwa'jsa ne'tca'w yu'
jĩ'c.

Yuuwemeesa yuuya' Cristorrá's jypa'gani

³⁰ Áchja' na'wẽ yũuni's miiyajcywe: Judiu jil'mée vite nasa' yuuwemeesa yuuwa'ja's pacuesameerrava, Cristo's ũuste wa'lmée jypa'gasa yuupa'garráa yuuwemeesaty yuuna pa'j. ³¹ Naapcachja' Israelwe'sha' yuuwemeesa yuuna pa'jya' sũjrra leya'srráaty cytey yuuya' yajcy. Nava leya'srráa yajcyrra', yuuwemeesa yuuya' ájameeta'. ³² ¿Quíj yuurrata ájamée? Yuuwemeesa yuuya' Cristo's ũusuj jyuca yajcyrra jypa'gameeta' naa pa'gaty ájamée. Cristo's ũusuj jyuca yaaquipcachte, leya'srráaty yajcyna ũsu', tyáasaty wala jypumba. ³³ Tyā'wẽ jypumbawa'ja's Dyus libroute na'wẽ pta'shna fil'jni':

Andya' Jerusalen chjambte cuet qui'putstju, maafityi' caypumba'jrra petywa'jsa.

Nava maava tyā'sa' jypumbasamée yu', ñuste neeyũumeetyna jĩ'c.

10 ¹ Yacjtjẽ'jwe'shtyi isatj we'we': Israelwe'sh ewte neeyũuvatsa' sũjrratj ũusuj jyuca Dyus yacj puuty we'we'. ² Andya' jiitj Israelwe'sha' wala yuj Dyusa's pacuena pa'pchuna fil'nze'ty, nava ma'wẽ Dyusa's pacuewa'ja'sva ew yu' jiimeeta'. ³ Tyā'wẽ ew yu' jiimeerrafity yuuwemée ewsa yuuya' sũjrra tyāawe'shtyi ma'wẽne' ew tjengu' tyā'srráanaty cytey yuu wẽje', Dyusna ma'wẽ pacuewa'ja'sva Dyusí pta'shna nvijtcu tyāa yu'sa' cytey yuumée. ⁴ Tyā'wẽ Moises ley jycaajwa'j en scjẽwnijũ' Cristo jycaajwa'jsa', yuuwemée ewsa vit-ya' ájawa'jsa tyā'sna jypa'gasa yuutyi's. Nava tyā'sna pacuemée leya'srráa cytey yuu wẽete', yuuwemeesa ya'yu'tsme'.

⁵ Tyajfic ley jycaajni's nwēese'jrra yuuwemée ewsa yu'nja sũjna yaacysatyi's Moisesa' na'jina fil'j: Maava ley jycaajni's jyuca cytey yuusa' een isa ew fil'nzewa'jrrá's jil'pjutyna jĩ'c. ⁶ Nava yuuwemée ewsa yuuna pa'jya' yu', Cristo's ũusuj jyuca yaacywa'ja's Dyus libroute na'wẽc pta'shi': Cristo' quíjyā'cj atsa' cielun pe'jya' u'jwa'ja's yaacywa'jme'. ⁷ Sa' tyā'wẽy Cristo' ityi yuuyā'cj atsa' pendaniicjẽva pe'jya' u'jwa'ja's yaacywa'jme'. ⁸ Tyā'wẽ tjẽysa's yaacyajmení, Dyus yuwe ewsa' iindy yuwete ij ũsa', tjẽymée ũuste cjẽeya' jĩ'c. Dyus yuwe iindy yuwete ij ũsa' jĩ'c tyā'sna tjẽymée jypa'gawa'ja'stja'w pta'shi'. ⁹ Atsa' na'wẽrráa myũu: Dyus Nchi'c Jesucristo uuteva Dyusí qui' ityi vitcu sũjwa'ja's jil'pjurra Cristo yuurrá's nwēese'jya' jypa'gawa'ja'. Tyā'wẽ yuurra' ewte neeyũune'nga. ¹⁰ Tyā'wẽ ewte neeyũuya', Jesucristo's ũusuj jyuca yajcyrra jypa'gawa'ja', sa' áateva tuutje'jwa'ja'.

¹¹ Cristo's ũuste jypa'gasatyi's Dyus libroute na'wẽc we'we': Tyā'sa' ũuste jypa'gasa' maa yujva ñuste neeyũumeetyna jĩ'c. ¹² Sa' judiu jil'j vite'

judiu ji'ljmeesava tyāa na'wērrarrāa yuuwemée ewte neeyūuwa'jsata', tyāa pa'gatey Jesucristo' jyucaysaty nwe'wewa'jsa'. Atsa' tyā'sna neewe'wesa yuutyi'sa' maatyva jyucaysaty pu'chwa'jsa'. ¹³Tyajíc Dyus librute na'wē we'we': Maava jyucaysa ūusuj yuurráa jyuca yajcyna Dyusa's neewe'wesa', yuuwemée ewte neeyūutyna jī'c. ¹⁴Nava ¿ma'wē neewe'weya' ājatyqui, tyā'sa' ūuste ji'pjmeerra'? Sa' ¿ma'wē ūuste jypa'gaya' ājatyqui, tyā' nwe'wesa' jīna pta'shni's iiwēse'jmeerra'? Sa' ¿ma'wē wēse'jya' ājatyqui, quimva tyāa yuwe's pta'shmeete'? ¹⁵Sa' ¿ma'wē tyāa yuwe's pta'shya' ājatyqui, quimva caajmeete'? Tyāa yuwe's pta'shsaty we'werra', Dyus librute na'jī'c: Yuwe ewsa's pta'shna pa'jni' wala yuj ewsa', tyāa pa'gatey wechana fi'nzewa'ja'styi pta'shi' jī'c.

¹⁶Tyā'wēteva, jyucay yu' jypa'ga'tsmeeta' ewte neeyūuwa'ja's pta'shteva. Tyajíc Isaiasva na'wē we'we': Cue'sh pta'shni Dyus yuwe's ¿quimrrá' nwēese'jrra cytey yuuta'? jī'c. ¹⁷Tyā'wē Dyus yuwe pta'shni's ew jiyunijūc ūusuj jyuca jypa'gawa'j caseje', atsa' tyāa pta'shnisa yu' Cristo'scu we'we'.

¹⁸Tyā'wē pta'shteva meerra' ¿wēse'jmeevá'ntacy? Pejca wēse'jyuj ne'ta, tyajíc Dyus libruteva na'jīna we'we':

Tyāawe'sh pta'shni's jyuca ya'wēse'cj.

Naa quiwete mtee mteeva jyuca pa'cj jī'c.

¹⁹Macue tyā'wē yuuteva, Israelwe'sh yu' ¿jyumeevá'ntacy? Tyāawe'sha' jiyuyujne'ta, nava jypa'gameeta'. Tyāawe'shva jiyumée yu' neeyūumeene'ta. Tyajíc Moisesa' Dyus we'weni's na'wē pta'shi':

Andya' vite nasaty ew yūurra i'cue'shtyi cuj caayaqui'ji'nja,

Atsa' ūuschawa'ja's uyuune'cue, nasa Dyusa's jiimeesa ūsta'

tyāawe'shtyi andy luuch vitpa'ga jī'c.

²⁰Isaiasva Dyus we'weni's na'wēc āate pta'shi':

Andya's pacuena pa'pchumeerrava, uytyi.

Atsa' andya' āate vyaatj paapējyna andyna pacuemeeteva jī'c.

²¹Nava Israelwe'shtyi we'werra' na'jī'c Dyus librute:

Andya' pa'yana nestju yu' nasa wa'lsaty jī'c.

Israelwe'sh jyucate yu' vitunimée

11 ¹Tyā'wē pa'yateva pasmeeyā'tje', Dyusa' tyajy tyjityjnisa Israelwe'shtyi' ¿ajtsema'c? sūju'tj. Nava wej yujva tyā'wē yuume'. Tyā'wē ajtsemeerra'ic andya' Israel nasa, Abrahan ji'lj, Benjamin nchi'ctewe'shtju nava nwe'we. ²Dyusa' Israelwe'shtyi nyafiitey tyjityjrra, āchpcach ajtsemée iipe'ja'. I'cue'sha' jiine'cue Dyus yuwe pta'shsa Elias Dyus yacj puuty we'weni's. ³Cyte' na'jī'c: Iindy yuwee pta'shsatyi's icjtyi sa' iindy altalnava jyuca iviituty, naasáa andy yuurráatj neeyūu. Nava andynava icj wēje'fírráaty jīte', ⁴Dyus pasrra': Dyus ityimeesa Baal tashte peejyūcuesamée siete mil nasa tyjityjrra ji'ptju andy jīi, atsa' andyrráatj

neeyūu sūjwa'j ji'pjmeeng jīc. ⁵Naa ensuva tyā'wēyrrāa Israelwe'sh maaíi yu' Dyus tyjityjnisa ūsta' tyajy peeygāanisa. ⁶Dyusa' peeygājrra tyjityjcu. Nava ew yūuna fi'nzepa'ga tyā'wē tyjityjme', naasāa peeygājrra yuurraac ewmeesateva tyjityj. Atsa' ew yūuna fi'nzepa'garrāa Dyusa' tyjityjvatsa', Dyusa' peeygājrrac tyjityj jīya' ājame'nja'w.

⁷Israelwe'sha' ewte neeyūuwa'ja's pacuerrava tyanzíi yu' uymeeta', vite yu' Dyus we'weni's nwēese'jmeeta' naa pa'ga. Naasāa Dyus tyjityjnisa maaíírráaty ewte neeyūuwa'ja's uy. ⁸Atsa' tyā'wē nwēese'jwa'jmeesa's we'werrac Dyus librute na'jī':

Dyusa' tyāawe'shtyi' jiyuwa'jmeesac vit.

Atsa' yafy ji'pjrrava uysamée na'wērráata', sa' tjū'wē ji'pjrrava wēse'jsamée na'wērráaty neeyūu.

Āchpcach tyā'wērrarráata' jī'c.

⁹Tyājíc jycaajsa Davidva na'wē we'we:

Tyāawe'sh wechana fi'nzeni' ewméerrāa casejvatsa' ewna, castigāyni yuucajn.

¹⁰Tyāawe'sh yafya' peecy suweetyna, uyya' ājacajmén.

Tyāawe'sha' bagachte yujva ew fi'nzeya' ājameevatsa' ewna jīc.

Judiu ji'jmeesava Dyus peeygāanisa

¹¹Judiuwe'sha' jypumbarra weteyā'jrra', ¿peena yu' Dyus tashte shawendwa'jsameetymañ? Wej yujva tyā'wē yuūwa'jsameeta'. Tyā'wē judiuwe'sh wa'lpa'ga, judiu ji'jmée vite nasatycu ewte neeyūuwa'ja's pta'shni yuu, atsa' vite nasa Dyus yacj fi'nzetste uyrra', judiuwe'shva qui' shawendya' yaacycain. ¹²Judiuwe'sha' ewte neeyūuwa'ja's jypa'gaya' wa'lpa'ga, naa quiwete judiu ji'jmée vite nasa jyucaysatycu selpí, tyāasa judiuwe'sh jyucaysa Dyus tashte qui' shawendniū' wejy wala selpiina.

¹³Āchja' judiu ji'jmée vite nasa jīnisa i'cue'shtyi we'weya'vatj, tyāa pa'gatey andya' judiu ji'jmée vite nasaty Dyus yuwe's pta'shya' caajnisatj, tyāasa cytey yuuya'vatj. ¹⁴Tyā'wē yūute', i'cue'sh ewte fi'nzeni's andy jil'j maaíi yu' uyrra', i'cue'sh na'wēy ewte fi'nzewa'ja's pacueya' yaaquíváatyna sūju'tj. ¹⁵Judiuwe'sh e'scjē nviitni yuupa'ga judiu ji'jmée vite nasaty Dyus yacj wechana fi'nzewa'ja's ji'pju. Tyāasa judiuwe'sha' Dyus tashte qui' shawendna pa'jrra', uunijū qui' ityi yuusāa na'wēsa yuutyna. ¹⁶Ū'tash quíjva nyafytewe'sha's Dyus jīi peeste', neeyūsáava jyucac Dyus bendecīyni yu'. Fytūu tasha' Dyus jīite', cu'tava jyuca Dyus jīirrarráata'.

¹⁷Judiuwe'sh maaíi yu' uujnisa olivo fytūu cu'ta's spē'tjni na'wēty yuu. Atsa' tyāa spē'tjnite yu' uujnimeesa olivo cu'ta's pūpyrra caywetse'jnisa na'wē i'cue yuu, i'cue'sh judiu ji'jmée vite nasarrava. Tyāasa i'cue tyāa fytūu tash na'wēy ewsa yuuna pa'j, olivo fytūu tash ityisate caywetse'jni yuupa'ga. ¹⁸Nava tyāa cu'ta spē'tjnisate jytjaacue ewsatj sūjna yu'

yaacynu. Mpa'yajcy, tyā'wēme' cu'ta pūpynisa tyā'wē fytūu tash ityi yuuwa'ja's ūsu'tsme'; fytūu tash quiwete iwejttesac cu'ta pūpynisa's ityi yuuwa'ja's ūsu'.

¹⁹Tyā'wēteva, naa sūjuvā'nga: Tyāa fytūu cu'ta spē'tjnite caywetse'jya' andya's peejyne'ta yu', tyāasane'ta cu'ta dyij yu'sa' spē'tj sūjune'nga. ²⁰Nava indya's cytee caywetse'jya' sūjrra spē'tjni yuumeeta'. Tyāawe'sha' Cristo's jypa'gaya' wal'tyi tyāa pa'ga yuurráaty spē'tjni yuu. Naapcachja' indya' Cristo's wa'lmeeng jypa'ga, tyāa pa'ga yuurráang tyāawe'sh ūsnite yu' indy pa'jya' āja. Tyāa pa'ga iwejch yajcymée, wala jypa'yacy mfi'nze. ²¹Tyā'wēme', Dyusa' judiu tyajy tyjityjnisa yujtyva tjēyméc cutyi'j na' indya's yu' wejy tyā'wē tjēymée cutyi'jina jypa'yacymeete'. ²²Ūs miiyajcy: Dyusa' wala yuj peeygāasa'. Nava juuna'ya'va tyā'wēyrrá'. Nwēese'jsamée yacj yu', wala yuj juuna'sa'. Nava indy yacj yu' wala yuj peeygāasa'. Tyā'wēyā'tje', tyajy peeygāanijū tyutemée mfi'nze. Tyā'wē yuumeerra', indyva cutyi'jnisa yuune'nga. ²³Nava judiuwe'sha' Dyusa's qui' pacuerra yu', Dyus tashtey tjēymée qui' pa'jya' ājatyna, tyāa pa'gatey Dyusa' tjēymée jypa'gawa'jsa'. ²⁴Tyā'wē indya' judiu ji'jmée vite nasang yu' na's yujva tjēyméc ewsate yuutya. Naapcachja' judiuwe'sh yu' Dyus tyjityjnisaty yu', atsa' tyāawe'shtyi' wejy tjēymée qui' jypa'gana.

Israelwe'sh Dyus tashte jyuca shawendni

²⁵Yacjtjē'jwe'sh, Dyus ma'wē yūuya'varrava tyāa yuurráac jii yu' tyā'sna mjiyuwe āchja' iwejch yajcyna fi'nzeya'mée: Judiuwe'sh maaíi yu' tyā'wē yuj Dyusa's nwēese'jmeerra tyuteety. Nava judiu ji'jmée vite nasa maanzcuēesa Dyus tashte pa'jwa'jsa ūstyna tyāa jyuca ājpcachrráaty judiuwe'sha' Dyus tashu tyutee. ²⁶Sa' vite nasa jyuca Dyus tashte pa'jna jyā'jatspcachja', judiuwe'sha' qui' jyucay nwe'wenisa yuutyna. Tyā'wē yūuwa'ja's Dyus librute na'wēc pta'shi':

Nwe'wesa' Jerusalen chjambu pa'jrra',

Jacobwe'sh ewmée yūuni's tyundena.

²⁷Tyā'wē ewmée yūuni's tyujndeya'tj puuty we'we tyāawe'sh yacj ji'c.

²⁸Tyā'wē i'cue'sh ewte neeyūuwa'ja's ji'pjucajnrráaty judiuwe'sha' Dyusa's atsesa yuu. Nava Dyusa' tyāawe'sh yuutyi' atse'tsme', tyāa pa'gatey judiuwe'sha' nyafiitey Dyus tyjityjnisaty yu' naa pa'ga. ²⁹Tyāa pa'gatey Dyusa' ūsyā'jrra', cusa'ja'tsme', sa' pa'yayā'jrra', wa'lu'tsme'. ³⁰Nyafíia' i'cue'sha' Dyusa's jiimeerra nwēese'jsamée i'cue yu'. Nava āchja' judiuwe'sh nwēese'jetsmeete yu', i'cue'sha' Dyus peeygāanisa i'cue yuu. ³¹Nyafíia' i'cue'shva ma'wēcue nwēese'jsamée yu', tyā'wēy judiuwe'shva āchja' nwēese'jmée ūsta'. Nava i'cue'shva ma'wēcue Dyus peeygāani's jypa'ga, tyā'wēy jypa'gaya' írráa tyā'wē nwēese'jmée ūsta'. ³²Tyā'wē teechsarráa tjaacue ewsatj sa' tjaacue peeygāanisatj sūjcajmencu e'nzúity ja'ndarra'j nwēese'jwa'jmeete vit tyāa na'wērrarráa peeygāja'.

³³Dyusa' ma'wě yūuwa'ja'sva seena' yuj zhichcue ew pjeu'jrra ji'pjune' tyā'sna yajcyte', le'chcuerráa yujva ya'jiyu'tsme', sa' pta'shya'va ya'āja'tsme'. ³⁴Dyus ūus yaacyni's ¿quimrrá' jiyusa ūstymañ? ¿Quimrrá' Dyusa's caapiya'jsa ūstymañ? ³⁵Quijquijva jyuca Dyus jiirrarráata' tyajy nviitnisa, atsa' ¿quimrrá' andy ji'stju Dyusa's pees ji'wa'jsa ūstymañ? ³⁶Tyāasa Dyusa' seena' yuj wala ewsa' bagachteva nes yuuwa'jsa. Tyā'sa' seena' yuj wala wechawa'j ji'ptja'w.

Cue'sh ityi fi'nzeni's Dyus cusete ducjni

12 ¹Andy yacjtjē'jwe'shtyi neewe'we'tj: Dyusa' tyacue wala peeygāapa'ga, āchja' i'cue'sh ityi fi'nzeni pety cacueyā'jrra jyuca quij pcal yujva ji'pjmée tyajy cuseterrarráa ya'mducjwe, Dyusa's yuurráa selpiina fi'nzeya'. Dyusa' tyā'wě yūuni'scu jytjāasu' naa pa'ga cytey yuuwa'j ji'ptja'w. ²Āchjūyā'ja' naa quiwetewe'sh na'wěy yu' fi'nzenuwe, wejyva i'cue'sh fi'nzeni i'cue'sh ūus yaacyni tyāaty jyuca myu'ptjē'jwe, quijteva jyuca u'se yuuna pa'jya'. Tyā'wě yūurra Dyus jytjāasni ewsa, tyajy dyl'pte zhichcue wēt fi'nzenirrá's jiyune'cue.

³Dyusa' peeygājrra andya's neewe'wec i'cue'shtyi yu'cypejcajn, tyāa pa'ga yu'cypejwa'j ji'ptju: Andyrráatj tjaacue selpi' sūjna maa yujva iiwejch yaacywa'j ji'pjmée i'cue, naasáa quijte selpiwa'jsa ne' Dyusa' nviit tyā's yuurráana cytey myūuwe, wala jypa'yacyna. ⁴Nasaa cacue's miiyajcywe: Tyā' teechráarrava wala kuj jwend ji'pja', sa' fiyfiyrrajty selpi', teeche cacuetewe'shrráa we'shrrava. ⁵Tyā'wěy cue'shva wala kujrrava, jyucaysa Cristo yuurrá'stja'w selpi', jyucaysa cyteerraj fiyfiyrraj selpiina.

⁶Cue'sh selpiiya' ājawa'ja's Dyusa' fiyfiyrrajc ūs, quijterraj selpiiya' ājawa'jsa ne'tca'w yu' tyāa yu'sa' jyucac ūs. Atsa' tyāaty' wala jypa'yacy iijyūwa'j ji'ptja'w. Meerrava Dyusa' tyajy yuwe's pta'shya' ājawa'ja's ūste', tyajy caajiyu'jnirrá's cytey yuuwa'j ji'ptja'w. ⁷Vitesaty selpiina fi'nzewa'ja's ūste', tyā'snava cytey yuuwa'j ji'ptja'w. Sa' maava caapiya'jya' ājasa' tyā'sa' cytey yuuwa'ja'. ⁸Nuste fi'nzesaty puuty pu'chya' ājasa' tyā'wě yūuwa'ja's nviitwa'jme'. Peesya' yaaquitsrra', caashwendul'juna sūjmée tyā'wě peeswa'ja'. Dyus luuchtyi jype'jsa', wala jypa'yacy jype'jwa'ja'. Peejiina fi'nzesaty pu'chsa', wechana pu'chwa'ja'.

Dyusa's jiisa' na'wě yūuwa'ja'

⁹Teechsa na'wērraj puuty ya'peeygāawa'ja's mji'pjuwe, išhiimée ūusuj jyuca yajcyna. Ewmeesa's nwēese'jmée ewsarrá's cytey myuuwe. ¹⁰Yacjtjē'ja's juuna' yuumée wejyva yacjtjē'ja' tjaacue walasa' sūjna puuty ya'mpeeygājwe.

¹¹Dyusa's selpiwa'ja'srráa ūusuj jyuca wechana mpa'pchuwe, wa'l yajcymée.

¹²Ewte pa'jwa'ja's jii i'cue tyāa pa'ga wechana mfi'nzewe. Ñuswa'j en pa'tjeva tyā'sa' yajcymée, bagachteva Dyus yacj yuurraa puuty we'wena mfi'nzewe.

¹³Yacjtjē'jwe'sh peejiina fi'nzesawe'shtyi' mpu'chwe. I'cue'sh yatte pa'jsatyva wa'lmée mpa'gawe.

¹⁴I'cue'shtyi ajtsena pcyuusaty ca'tu yu' ewrraa myūuwe, wejy yuuva tyāawe'sh pa'gate Dyusa's mneewe'wewe nwe'wecajn.

¹⁵Wechasaa yacj i'cue'shva wechaa mpu'chwe, sa' ñussa yacj i'cue'shva ñus mpu'chwe.

¹⁶Puuty ja'ndarraj ewrraa mfi'nzewe. Jytjaacue jiitj sūjrra iiwejch yajcymée, ajmeecuesa na'wēyrraa mfi'nzewe.

¹⁷Macue ewmée yūusaateva, ca'tu yu' ewmée yuuwa'jme'. Ew yuuwa'jrrá's pa'pchuwa'ja' jyucaysaty.

¹⁸Jyucaysa yacj ew fi'nzewa'jrrá's mpaacuewe, i'cue'shtyi ma'wē wejy ew tjenguna tyāa yu'sa' jyuca cytey yuuna. ¹⁹Yacjtjē'jwe'shtyi neewe'we'tj i'cue'shtyi ewmée yūusaaty ca'tuva ewmée yūuwa'ja's pacuena fi'nzecajmén. Tyā'wē yūumée wejyva indyna ewmée yūusa's cuch yuunu, Dyus castigāywa'jsa' naa pa'ga. Tyajíc Dyus libroteva na'wē we'we': Ewmée yūusaty castigāywa'jsa' andytju. Andy jiine'tca jī'c. ²⁰Tyā'wē ca'tu ewmée yūuwa'ja's yajcymée na'wē myūu: Indyna atsesa ũ'wa'j jī'pjímée wēena fi'nzetste', ũ' mpuuts. Sa' yū'wēena fi'nzetste', tundywa'jva mes. Indya' tyā'wē yūurra', caytjame'jene'nga jī'c. ²¹Indyna ewmée yūusa's caacnayu'jnu, wejyva indy cjuē'y mecay, ca'tu ew yūurra.

Naa quiwete jycaajsawe'sh ma'wēsatyva nwēese'jwa'ja'

13 ¹Naa quiwete jycaajsawe'sh ma'wēsatyva jyuca nwēese'jna mfi'nzewe. Tyāawe'sha' jyuca Dyus nviitnisarrarráata'. Maa yujva Dyus nviitnimeesa yu' meeta'. ²Atsa' maava jycaajsawe'shtyi atsesa' Dyus nviitnisaty atsesa yuuna. Tyā'wē atsesa' yuuwesa castigāywa'j yuuna. ³Jycaajsa ũsta' tyāawe'sha' ew yūuna fi'nzesaty' castigāywa'jsameeta'. Tyāawe'sha' ewmée yūuna fi'nzesarráaty castigāywa'jsata'. Atsa' jycaajsawe'shtyi ũucjmée fi'nze wēerra', tyāawe'sh yu'cypejnyty jyuca nwēese'jna mfi'nzewe. Tyā'wē yūusaty' nwe'wewa'jsata'. ⁴Tyāa pa'gatey jycaajsawe'sha' Dyus nviitnisata', indyna pu'chwa'jsa. Nava indya' ewmée yūuna fi'nzerra', ũucjwa'j jī'pjune'nga, tyāa pa'gatey jycaajsawe'sha' peecyrraa ũsmeeta', tyāawe'sha' Dyus nviitnisata'. Tyāa pa'ga ley ma'wē jycaatje', cytey yuutyna ewmée yūusa's castigāyna. ⁵Tyāa pa'ga jycaajsawe'shtyi nwēese'jwa'ja', nava castigo's ũucjrrarráa nwēese'jmée, wejyva Dyus jycaajni's cytey yuutstju sūjna nwēese'jwa'ja'. ⁶Tyāawe'sha' Dyus nviitnisayā'jrra', tyāawe'sh tjengwa'j yu'sa' quījnavá jyucaty cytey yuuna fi'nze'. Tyāa pa'ga tyāawe'shtyi ducjwa'j vyyu's ũswa'j jī'pji'cue. ⁷Quījrraj yuuwa'j jī'pjrrava, tyā'sa' cytey yuuwa'ja': vyyu gobierno jī's

yuulrra', tyã'snava ducjwa'ja'. Sa' maarrajty nwëese'jwa'l' ji'pjrrava, tyãawe'shtyi' nwëese'jwa'ja' wa'lmée.

⁸ Quīj yūuwa'ja'sva jyuca cytey yuūwa'ja', quīj yuul yujva ji'pjmée fi'nzeya', naasáa puuty ya'peeygāawa'ja's yuurráa bagachteva ji'pjuna nes yuūwa'ja'. Tyā'wē puuty ya'peeygāasa' Dyus jycaajni leya's cytey yuusaarra tyā'wē yuuna. ⁹ Dyus leya' na'wēc jycaaja': Ptamsayā'ja' vite yacj canzh pcal yuūwa'jme'. Nasa icjwa'jme'. Pesweewa'jme'. Vitety īshiina nuywe'wewa'jme'. Vitee jīity cusa'j wēena fi'nzewa'jme' jī'c. Atsa' tyāa jycaajnityi' jyuca cytey nwëese'jya' na'wē yūuwa'ja': Vitetyva mpeeygāj, indy ma'wēnga ya'peeygāja' tyā'wēy jī'c. ¹⁰ Tyā'wē puuty ya'peeygāawa'ja's ji'pjrra', ewmée yūuwa'l' yu'sa' ya'yajcymeena. Na'jī'tj na': Peeygāanisa's ji'pjte yuurráac Dyus jycaajni leya's quījte yujva peejymée jyuca cytey ya'yu'.

¹¹ Tyā'wē peeygāawa'ja's jypa'yacymeene'cue atsa' āchja' jweeírráa utyaana u'juetsa' cue'shtyi' jyucate nwe'wewa'l' ena', tyāa pa'ga jypa'yacy meswe. ¹² Tyā'wē yūuwa'l' ena' pa'jya' jytjēyumeena, tyāa pa'ga chji'ndyte fi'nzeni's nvjitrá, eena'te fi'nzewa'ja's jypa'yacywa'l' ji'ptja'w. ¹³ Na'wē yūumée: ewmée yūuwa'l'rrá's yajcyna, canzh pcal yuuna, puuty yajtsena puuty puina, beca yat-su tūuna susna tyā'wē yūumée, ewrráa yūuna zhichcue fi'nzewa'l' ji'ptja'w. ¹⁴ Naasáa Jesucristo ma'wē jycaatje', tyā's yuurráa jyuca nwëese'jwa'l' ji'ptja'w, peecy ūus yaacyni ewmeesa yu's nwëese'jmeé.

Yacjtjē'ja's atsewe'wewa'jme'

14 ¹ Cristo caapiya'jni's achamée ew jiisa yacjtjē'ja's wa'lmée mpa'gawe, tyajj jypumbanisu atsewe'wemée. ² Miiyajcywe vacy viteya' naa sūju'ty: Ū'nisa yu'sa' quījnavá jyuca ū'wa'ja' sūju'ty. Naapcachja' Cristo caapiya'jni's achamée ew jiisa' ū'wa'ja's tyjityjrra ū'wa'ja' sūju'ty. ³ Atsa' maa sūjmée quījnavá jyuca ū'sa' tyjityjrrarráa ū'sa's atsewe'wewa'jme'. Tyā'wēy tyjityjrrarráa ū'sava cuch atsewe'wewa'jme' quījnavá jyuca ū'sa's. Ma'wē ū'sarrava tyāawe'sha' Dyus luuchta'. ⁴ Indya' ¿quimrranga iindy jype'jnimeety atsewe'we'? Tyā' ew ma'c yuu ewmée ma'c yuu nava tyā'sa' patron jype'jsa jiina, tyāa pa'gatey jype'jsa' ma'wē ew fi'nzewa'ja'sva tyāa pu'chwa'jsa'.

⁵ Viteya' naa sūju'ty: Fiesta en yuutyi' jyuca qui'swa'ja' sūju'ty. Naapcachja' vite' maa fiesta yuutyi' qui'swa'jme' sūju'ty. Ma'wē yaacysarrava teechsa na'wērraj i'cue'sh ūuste ew ūusutjenirrá's nwëese'jna mfi'nzewe cuch atsewe'wemée. ⁶ Tyāa pa'gatey fiesta entyi jyuca qui'ssava, Dyusa's wechanac qui'su', atsa' fiesta entyi jyucamée qui'ssava Dyusa's írráac wechana fi'nze'. Tyā'wēy quījnavá jyuca ū'sava Dyusa's wechanac ū'we', atsa' quīj iyyuutyi' ū'sameeva Dyusa's írráac wechá'. Jyucay Dyusa'srrarráaty wechá'.

⁷Tyāa pa'gatey cue'sh ityi fi'nzeni cue'sh uuwa'l ma'c yuu nava tyā' cue'sh jii meeta', atsa' peecy ma'wēva yūuna fi'nze'nja sūjwa'l ji'pjmeetja'w. ⁸Na'wē ityi fi'nze'tja'w tyā' Cristo jī', sa' uumtja'w nava Cristo jytjāasnirrā'stja'w cytey yu', tyāasa ityi fi'nzeni ma'c yuu uu en ma'c yuu nava Cristo jiirrarrāata'. ⁹Tyā'wē Cristo' ityisawe'sh ma'ty yuu uusaawe'sh ma'ty yuu nava jyucaysate namu yuuya'firrāac uunijjūva qui' ityi yuu. ¹⁰Namu' Cristo', atsa' indya' namumeerra' ¿quijya'nga iindy yacjtjē'ja's ewmeesa' jīna atsewe'we'? Dyus tashte cuutya'jni yuuwa'jsatja'w, atsa' Dyus yuurráa ma'wē yuusaateva we'wewa'l ji'pja'. ¹¹Tyají Dyus tashte cuutya'jni yuuwa'ja's Dyus librute na'wē fi'jni':

Andya' Dyus ityisa isatj we'we',

Majüwe'shva jyuca andy tashterraráa peejyücuena pa'jrra,

Dyus yuj yu'nga jīna wechaatyna.

¹²Tyā'wē yūurra teeche na'wērraj Dyus tashte paswa'l ji'pju'nja'w ma'wē yūusaarrava.

Yacjtjē'ja's caypumba'jwa'jme'

¹³Tyāa pa'ga āchjūyā'ja' tyā'wē ewmeeng yu' jīna puuty atsewe'wena fi'nzewa'l ji'pjmeetja'w. Tyā'wē yūumée wejyva ewrrāa yūuna mpu'ch, yacjtjē'l jypumbacajmén. ¹⁴Andya' jii'tj Cristo Jesus yacj fi'nzesa yacja', quij ū'yujva ewmeesa yu' meea'. Nava tyā'wē ewmeena sūjna yaacysa yacj yu' ewmée yujna. ¹⁵Nava iindy yacjtjē'l dyl'pte jypa'yacymée quijnava ū'pa'garrāa tyāa yacjtjē'ja' jypumbavāana atsa' indy yuuwesa yuune'nga peeygāasamée. Cristo uurra nwe'wenisawe'shtyi' indya' caypumba'jnu iindy ū'nisa yacj. ¹⁶Indy yacj yu' ewsarrava, vitesa yacj yu' ewmeesa vāa yuuna atsa' tyā'wē yūuwechsa yuutyi' wala mpa'yajcy. ¹⁷Tyāa pa'gatey Dyus yacj fi'nzewa'ja' ū'nisaty jypa'yacyrra tyā'wē Dyus yacj ya'fi'nze'tsme', naasāa Dyus Espiritu pu'chte yuurráac Dyus yacj wēt wechana jypumbamée fi'nzewa'ja's ya'ji'pju'. ¹⁸Tyā'wē vitety caypumba'jmée jypa'yacy Cristo's selpiite' Dyusa' wecha'c atsa' nasava wecha'ty tyā'wē yūute'.

¹⁹Tyā'wē puuty ew yūuna puimée fi'nzewa'jrrá's pacuewa'l ji'ptja'w, Dyus yacj jweefirrāa chjāchja fi'nzewa'ja's puuty ya'pu'chna. ²⁰Ū'nisa' jyuca ewsata'. Nava vitesaty caypumba'jwa'ja's ū'terrāa ewme'. Tyāa pa'ga Dyus yacj fi'nzesa yacjtjē'jwe'shtyi' caypumba'jnu iindy ū'ni yacj. ²¹Tyā'wē peecy yacjtjē'ja's caypumba'jwa'j yu'sa' ū'nimée wejy ewa', chich, vino, quijva caypumba'jwa'j yu'sa' jyuca. ²²Indy yacj yu' quij ū'va jyuca ewsateva jiirra', iindy ūusterrāa tyāa sūjna mfi'nze Dyus dyl'pte. Ewmeena sūjwa'ja's ūusterrāa yujva yaacysamée yacj yu', ew yuja'. ²³Nava ewmeevāana sūjna cuj jwend yajcyna ū'sa yacja', ewmée yuja'. Tyāa pa'gatey ewmeevāanacy sūjwa'ja's ji'pjrra nwēese'jmeete', tyāa yu' pcal yuja'.

Vitesa yacj ewrráa yūuna fi'nzewa'ja'

15 ¹Dyus yacj chjächjayā'j fi'nzesa' peecyrráa wēt fi'nzewa'ja's pacuemée, pu'chwa'j ji'ptja'w Dyus yacj fi'nzewa'ja's achamée ew jiisaty. ²Cue'sha' teeche na'wērraj vite nasaty pu'chna wēt caafi'nze'jwa'j ji'ptja'w ewrráa yūuna, tyāawe'sha' Dyus yacj jweeírráa chjächja fi'nzeya' ājacajn. ³Tyāa pa'gatey Cristo tyacue jytujtjesa yujrrava, peecyrráa wēt fi'nzewa'j yu'sa' pacuemée, wejyva vitety wēeshuni's tyāac jypa'ga. Tyā'sna we'werrac Dyus librute na'jī': Indyna wēeshuni's andytju jypa'ga jī'c. ⁴Dyus librute fi'jni ūsta' tyā' cue'shtyi cchjāachja'jwa'jsata', űuswa'j en ma'wēsa pa'tjeva űusmée chjächja yajcyna fi'nzeya' piyacajn. ⁵űuswa'j en pa'tjeva chjächja fi'nzewa'ja's Dyuscu űusu' na' tyāafí pu'chjina puuty ewrráa yūuna Cristo Jesus na'wēy fi'nzecajn, ⁶cyaj cyteerraj jyucaysa cue'shtyi jype'jsa Jesucristo Tata yuurrá's tuutje'jene'cue.

Judiu ji'jmée vite nasaty Dyus yuwe's pta'shni

⁷Cristova ma'wēga i'cue'shtyi jypa'ga tyā'wēy i'cue'shva wa'lmée mpa'gawe maa yacjtjē'jtyva, Dyus wechacajn. ⁸Miiyajcywe: Dyusa' cue'sh yatsgawe'sh yacj puuty we'wec Cristo quíiwa'ja's, atsa' tyāa puuty we'weni cytey yuucajncu Cristo' quíj judiuwe'shtyi selpiiya'. ⁹Sa' judiu ji'jmée vite nasava Dyusa's jypa'garra wechana tuutje'cjancu Cristo' quíj. Tyā'sna we'werrac Dyus librute na'jī':

Tyā'wē ew yūupa'ga tyāawe'sh cshavyte indya's wechana memna tuutje'je'nja jī'c.

¹⁰Sa' vite ajcjēva na'wēc we'we':

Judiu ji'jmée vite nasarrava judiuwe'sh yacj ja'ndarra'j wētwtē miiyajcywe jī'c.

¹¹Sa' vite ajcjēva pta'shi' íírráac:

Judiu ji'jmée vite nasa jyucaysawe'sh Dyusa's wechana mtuutje'jwe, Dyusa' seena' yuj walasa' jīna nasa jyucaytyi pta'shna.

¹²Tyajíírráac Isaiasva na'jīna fi'j:

Jesé jī'j teeche casejena, judiu ji'jmée vite nasaty jyuca yamuya'. Atsa' tyāawe'sha' nwe'wenisa yuutyna jī'c.

¹³Cue'shtyi nwe'wesa Dyusa' i'cue'sh űuste wētwtē wechana fi'nzewa'ja's űsuna tyā'sna jypa'gasatyi's, cyaj Dyus Espiritu pu'chte', Dyus nwe'wenisatja'w yuu sūjna wechana fi'nzene'cue.

¹⁴Andy yacjtjē'jwe'sh, andya' ew jiitj i'cue'sha' ew yūuwa'j yuurrá's ne'cue űuste jī'pj fi'nze', ma'wē yūuwa'ja'sva shiingmée. Tyāasa ne'cue teeche na'wērraj puuty ew ya'yu'cypejna fi'nze' sūju'tj. ¹⁵I'cue'sha' tyā'wēyā'j shiingmée fi'nzesa ne'cue, nava andyva fii yu'cypejna fi'jatstju Dyus yacj wejy ew fi'nzewa'ja's caajiyu'jna. ¹⁶Tyā'wē yūuwa'ja's Dyuscu andya's neewe'werra nvijt, judiu ji'jmée vite nasaty Jesucristo

caapiya'jni's pta'shcajn. Tyāa Jesucristo caapiya'jnisafi Dyus yuwe ewte nviitwa'jsa' tyā'snatj andya' pta'shi', judiu ji'jmée vite nasarrava Dyus Espiritu pu'chte!, Dyusa's jiyurra ewte neeyüucajn.

¹⁷Tyāasatj andy üuste wētwēt yaaqui', Jesucristo caapiya'jni's pta'shna Dyusa's selpi'tj sūjna. ¹⁸Nava tyā'wē yūuwa'ja's Cristoc andya's pu'ch judiu ji'jmée vite nasarrava Dyusa's nwēese'cjan, tyāawe'sh ew jiyucajn yuwejuva pta'shna, quim yujva ājanimeesaty āteva caavya'ja'jnic yuu Dyus Espiritu pu'chte. ¹⁹Tyā'wē yūunatj Cristo yuwe ewte nviitwa'jsa's mtee mteeva pta'shna jyāl', Jerusalente tacjrra Ilírico quiwete pa'pjcach. ²⁰Tyā'wē vite pta'shnisu yu' pecūjya'meetj yajcy, wejyva bagachterrāa yujva Cristo yase's cysusnimeesutj tyajy yuwe ewsa's pta'shya' yajcy, Dyus librate na'ji'c tyāa cytey yuucajn:

²¹ Tyāawe'sha' bagachterrāa yujva Dyus yuwe's pta'shni meesarrava, wēse'jetyna,
Sa' jiyutyna, bagachterrāa yujva jiimeesarrava ji'c.

Pablo Roma chjambna u'jya' yaacyni

²² Tyā'wē Dyus yuwe's caapiya'jna u'jurratj i'cue'sh tashna yujya' yu' tundu'tsmée, manz usva yujya' yajcyrrava. ²³⁻²⁴ Nava āchja' naa ja'ndasu pecūjna jyā'tj na' España quiwen u'juetsrra', i'cue'sh tashsuva iipa'j uycjēu'nja tyā'wē yūuwa'ja's nyafiitj yaacyni ji'pju'. Atsa' i'cue'sh yacj pcjaacjena ūsrra España quiwen u'juetste', pu'chjine'cue sūju'tj. ²⁵ Nava āchjī yu' Jerusalenna u'juetstju cytee yacjtjē'jwe'shtyi quijrrāava pu'chwa'j jyūna. ²⁶ Jerusalente yacjtjē'jwe'sh quijva ji'pjmeesa ūsta' tyāawe'shtyi pu'chya' jīrra vyuu pcjacjtyi Macedonia vite' Acaya quiwesuwe'sh tyā'sna jyūna u'juetstju. ²⁷ Tyā'wē pu'chte ewna sūjwa'ja's ji'pjuty, tyāa pa'gatey isa ew yajcyte yu' Macedoniasuwe'sha' yuultyi yu', tyā'wē judiu ji'jwe'sha' Dyus yuwe ewsa's jytyujndety judiu ji'jmée vite nasatyva. Tyāa pa'gaty Dyus yuwe ewsa's cue'shtyi pta'shpa'ga ca'tuva caashwendu'jwa'j ji'ptja'w jīrra tyāawe'sh ji'pjunisa yacj pu'chya' yajcy. ²⁸ Atsa' tyā'wē Jerusalente pa'jrra' pcjacjni vyuu's tyāawe'shtyi ducjrra', España quiwen u'jya'vatj, tyāasa i'cue'sh tashsuva dundte ne'ca'nja. ²⁹ Andy i'cue'sh tashte pa'tje', i'cue'sha' jweefīrrāa Cristo yacj chjāchja fi'nzene'cue sūju'tj.

³⁰ Yacjtjē'jwe'sh, i'cue'shtyitj neewe'we': peeygāawa'ja's Dyus Espiritu ūste ji'pji'cue, tyāasa andya's peeygājrra Jesucristo's pi'cyrra andy pa'gate Dyus yacj puuty we'wecajn. ³¹ Judea quiwete atsesa ūsta' tyāawe'sh andyna quijva ewmée yūucajmén Dyusa's mpi'cywe, sa' Jerusalente yacjtjē'jwe'shtyi pu'chwa'j jyūna u'juetstju tyā'snava wechana jypa'gacajn, ³² cyaj Dyus pu'chte!, ewrrāa qui' shawendrra i'cue'sh yacj wechana ūswa'ja's ji'pju'nja. ³³ Dyusa' i'cue'sh jyucaysa yacj pi'cyna nes yuuna, ewrrāa caafi'nze'jna.

Nasa iisa yuwe wechaa caajni

16 ¹Cue'sh npe'sh Febe pa'tje!, tyā'sa' wa'l'mée jypa'gacajn neewe'wetstju i'cue'shtyi, tyā' Cencrea chjambte pcjaacjesaty selpiisa'. ²Tyāa pa'gatey Dyusa's jiiyā'jsa' ma'wē yūuwa'ja'sva jii i'cue na' tyā'wērrāa yūuna mpa'gawe, Cristo's selpiisa' naa pa'ga cue'sh npe'shna sūjna. Sa' tyāa quīj peejini'sva mpu'chwe, tyāa pa'gatey tyā' maatyva wala pu'chsa' tyāasa'fíc andynava pu'ch.

³Priscila vite' Aquila tyāawe'shtyi yuwe mweechawe, Cristo Jesusna andy selpiitste!, tyāawe'sha' cytee andy yacj mjii pu'chsaty yu'.

⁴Tyāasa'fity tyāawe'sha' u'dyij andyna nwe'wena. Tyā'wē ew yūupa'gatj andya' tyāawe'shtyi' wala wechá'. Nava andyrrāa tyā'wē wecha'tsméetj, judiu jii'mée vite nasava wecha'ty Dyusa's jiisawe'sh. ⁵Priscila vite' Aquila tyāawe'sh yatte pcjaacjesa yacjtjē'jwe'shtyiva yuwe mweechawe. Sa' andy namicu Epeneto'sva mweechawe. Tyāac nyafýrraj Acaya quiwete Cristo's ūuste jypa'gasa yu'. ⁶Maria'sva yuwe mweechawe, tyā' nacue wala mjiiic i'cue'sh cshavyte. ⁷Andy jii'j Andrónico vite' Junias tyāawe'shtyiva yuwe mweechawe. Tyāawe'sha' andy yacj carcelte ūssata!, sa' Dyus yuwe's pta'shya' caajnisawe'shtyi yu', tjaacue jiyunisa. Sa' tyāawe'sha' Cristo's jiisayā'jty yu' Cristo's andy jiyumeyna.

⁸Cristo's jiisa andy namicu Ampliasnava yuwe mweechawe. ⁹Cue'sh na'wēy Cristo Jesusa's selpiina fi'nzesa Urbano'sva yuwe mweechawe, vite' andy namicu Estaquisnava tyā'wēy. ¹⁰Apelesnava yuwe mweechawe, tyā'sa' macue űuswa'j en pa'tjeva, Cristo yacj tyutemeec fi'nzesa yu'. Sa' Aristobulowe'shtyiva tyā'wēy yuwe mweechawe. ¹¹Andy jii'j Herodiana'sva yuwe mweechawe, vite' Narciso jii'jwe'sh Cristo's jiisaty yuwe mweechawe. ¹²Trifena vite' Trifosawe'shtyi yuwe mweechawe, tyāawe'sha' Cristo's selpisaaty yu'. Sa' cue'sh npe'sh Persidanava yuwe mweechawe, tyāava wala mjiiisa yu'c Cristo's selpiina. ¹³Rufusnava yuwe mweechawe, tyā' wala jiyunisa yu'c Cristo's nwēese'jsa' jīni, sa' tyajy njī'ja'sva yuwe mweechawe, tyā' andyna jype'jsa mama na'wēsac yu'. ¹⁴Vite' naawe'shtyi yuwe mweechawe: Asincrito, Flegonte, Hermas, Patrobas, Hermes, vite' yacjtjē'jwe'sh tyāawe'sh yacj ūssayā'jrra. ¹⁵Vite' naaty yuwe mweechawe: Filólogo, Julia, Olimpás, Nereo vite' tyajy npe'shna. Sa' tyāawe'sh yacj ūssa Cristo's jiisa yuutyi' jyuca mweechawe.

¹⁶Teechsa na'wērraj ūuste wala wēt yajcyna puuty yuwe mweechawe. Sa' Cristo's nwēese'jsa mteeva pcjaacjesa yu' jyucaysaty yuwe wechaacaja'.

¹⁷Yacjtjē'jwe'shtyi neewe'we'tj, i'cue'sha' wala mpa'yajcywe na'wē ew fi'nzewa'ja's piya i'cue tyāajū caypumba'jna caapui'jna fi'nzesaty. Tyā'wē yūusawe'sh yacja' mtyuteewe. ¹⁸Tyā'wēme!, tyāawe'sha' Jesucristo's selpiisameeta!. Tyāawe'sh ewmée yaacynirrá'styi cytey yuuna fi'nze!,

sa' nasa achamée ew jiisa yuutyi'sa' caypumba'ja'ty wala zhichcuerráa we'werra. ¹⁹Cristo caapiya'jni's i'cue'sh ūusuj jyuca nwēese'jni's jyucaysa jiita', tyāa pa'gatj andya' wechá'. Sa' ewmeesa yu's nwēese'jmée wejyva ewsarrá's nwēese'jna ūscajntju neewe'we'. ²⁰Atsa' quijteva jyuca ew caafi'nze'jsa Dyusa' i'cue'shtyi pu'chjina echtjē'j cnaycajmén. Atsa' i'cue'sha' Jesucristo yacjrráa mfi'nzewe.

²¹Andy yacj mjii pu'chsa Timoteova yuwe wechaacaja'c, vite' Lucio, Jasón, Sosípater andy ji'jwe'sh.

²²Naa carta's fi'pju'chsa Tercio andyva yuwe wechaacaja'tj Dyus yacj fi'nzesaty. ²³Sa' Dyus luuch pcjaacjewa'j yat pqui'jsa Gayova yuwe wechaacaja'c, andya's paandee yat pqui'jsa. Vite' Erastova yuwe wechaacaja'c, gobierno vyu's jyaawsa. Tyā'wēy cue'sh yacjtjē'j Cuarto yaasesava wechaacaja'c.

²⁴Cue'shtyi jype'jsa Jesucristo pu'chjina i'cue'sh jyucaysaty bagachteva.

Dyusa's yuurráa wechani

²⁵Āchja' Dyus cusete nviitutstju tyā' i'cue'shtyi jweefirráa chjāchja caafi'nze'jena, Jesucristo caapiya'jni's ma'wēta pta'sh tyā'sa' cytey yuuna. Cue'sh ewte neeyūuwa'ja's naa quiwemeeteycu Dyusa' pjeu'jrra ji'pju', ²⁶nava tyā'sa' jū'nasurráac caajiyu'jni yuu, Dyus yuwe pta'shsawe'shtyi caafi'ja'jrra. Tyā'sna āchja' maa quiweteva jyuca pta'shni yuutsa', maava Cristo's ūuste jypa'garra nwēese'cjan. Tyāa pa'ga Dyusa's wala wechaawa'j ji'ptja'w.

²⁷Dyus yuurráa ma'wē yūuwa'ja'sva jyuca jiisa'. Tyāa pa'ga tyā's yuurráa bagachteva wechana nes yuuwa'ja', cue'shtyi nwe'wesa Jesucristo ew yūupa'ga.

SAN PABLO CARTA NYAFYTE FI'JNI CORINTO CHJAMBTEWE'SH JÏI

Corintotewe'sh Dyus yacj fi'nzesawe'shtyi Pablo fi'jni

1 ¹ Andya' Pablo yaasetj, Dyus peeygājrra pa'yate Jesucristo jycajnisa. Tyā'wē yūuwa'ja's Dyuscu tyjityjrra nvijt. ² Corinto chjambte yacjtjē'jwe'shtyi wechana fi'jatstju, tyā'wēy yacjtjē'j Sostenesva yuwe wechaacaja'c. I'cue'sha' Cristo Jesus yacj tyutemée fi'nzeya' utyaapa'ga Dyus luuchi'cue. Majūwe'shva cue'shtyi jype'jsa Jesucristo yasena cysussa ūstyna tyāawe'sh yā'jrra ja'ndarra tyajy tashte yuurraa fi'nzecajncu Dyusa' pa'ya. Tyāa Jesucristo' cue'sh jyucaysaty jype'jsa'. ³ I'cue'shtyi' Dyusa' pu'chjina vite' cue'shtyi jype'jsa Jesucristova. Tyāa pa'ga Dyus yacjrrāa mfi'nzewe.

Jesucristo pu'chpa'ga Dyusa' quīj yujva peejymée jyucac pees

⁴ Dyusa's wechana nestju yu' i'cue'sh pa'gate, tyā'wē Dyusa' i'cue'shtyi peeygājrra quīj yujva peejymée jyucac pees Jesucristo pu'chpa'ga. ⁵ Tyā'wē Cristo yacj fi'nzeya' utyaapa'ga, Dyusa' tyajy dyi'pte quījteva jyuca i'cue'sh shiingmée fi'nzewa'ja's jyucac ūs, Dyus yuwe's pta'shwa'j ma'c yuu, meerra' maa isa pta'shsateva jiyuwa'j ma'c yuu nava jyuca. ⁶ Tyāa pa'ga Cristo caapiya'jni's i'cue'sh ūste caavya'ja'i'cue. ⁷ Tyā'wē Dyus pu'chte', i'cue'sha' quījte yujva shiingmée i'cue tyajy dyi'pte fi'nze' Jesucristo quīiwa'j ena's ūytjasna. ⁸ Dyusa' tyā'wē ewrrāa jype'jna nes yuuna nmej entepcach, cyaj Jesucristo quīi ente' i'cue'sha' quījte yujva yuuwemeesa yuune'cue. ⁹ Dyusa' na'wē ewrrāa jype'jya' neeyūuc na' cytey yuuna. Tyā'wē ewrrāa jype'jya' fīrrāac tyajy Nchi'c Jesucristo yacj fi'nzeya' pa'ya i'cue'shtyi'.

Dyus yacj fi'nzesawe'sh puuty puina tyuteni

¹⁰ Cue'shtyi jype'jsa Jesucristo dyi'pte yacjtjê'jwe'shtyi yu'cypejetstju, puuty ewterraj puuty we'werra tyutemée cyanzíi ja'ndarraj teehsa na'wërrarráa ew yajcyna fi'nzecajn. ¹¹ Cloé yattewe'sha' andya's pta'shtyi tyā'wē i'cue'sha' puina fi'nzena ūsta' jīna, tyāa pa'gatj andy yacjtjê'jwe'shtyi tyā'wē we'we'. ¹² I'cue'sha' teehsa na'wërraj fiyfiy we'wena ūsi'cue: Maaíi yu', andya' Pablo yacj u'jsatj, naapcachja' vite' Apolos yacj u'jsatj. Vite' Pedro yacj u'jsatj, atsa' viteíi yu' Cristo yacj u'jsatj jīna i'cue we'we'. ¹³ Nava Cristo' ¿teech ajtewe'sh yacjrráa fi'nzewa'jsaga yuúá'? ¿I'cue'sh pa'gate Pabloa cluuste uúá'? Meerrava ¿i'cue'sha' Pablo yase's cysusrracue yu'te bautisāyni yuúá'? ¹⁴ Ewrráa ne'tca i'cue'shtyi maa yujtyva yu'te bautisāymée, naasáa Crispo vite' Gayo tyāawe'shrráatytyu bautisāy. ¹⁵ Tyāa pa'ga quim yujva tyā'wē Pablo yase's cysusrra bautisāynitj jīya' ajameetyna. ¹⁶ Vite' Estefanaswe'shrráatytyu bautisāy, meerra' vitety bautisāy vá'n'tca nava tyāa yuutyi' yaaqui'tsmeetj. ¹⁷ Cristo' andya's bautisāyya' caajme', naasáa cue'sh ewte neeyūuwa'ja's pta'shya'rráac caaj. Nava naa quiwetewe'sha's jiyunisa yacjméec pta'shcaaj. Tyā'wēme', Cristo cluuste uuni's pta'shnisa' e'scjē neeyūuwe'shte.

Nwe'weya' ājawa'ja's Dyus pjeu'jrra nviitnisa

¹⁸ Cristo' cue'sh pa'gate cluuste uuc jīna pta'shni' quījva seelpimeesa na'wē ne' ptjūuse' viturra űus quiwete u'jwa'jsatyi'. Nava Dyus yacj ūsya' u'jwa'jsa cue'sh yuutyi' tyā'wē pta'shni' seena' wala seelpisa', cue'shtyi ewte nviitwa'jsa' naa pa'ga. ¹⁹ Dyus librute we'werra':

Iviitu'nja naa quiwetewe'shrrá's jiyuni's,

Sa' naa quiwetewe'shrrá's jiyuni's quījte yujva selpiiwa'jmée nviitu'nja jī'c.

²⁰ Tyā'wē' atsa' naa quiwetewe'shrrá's jiyuni' ¿quījte selpiicy? Quījteva jyuca jiisa caapiya'jsatja'w sūjsa' ¿mtee yuutyqui? Naa quiwete quīj ūsna tyā'sna jyuca jiisatjê'j ¿quīj yuucy? Áchja' tyā' ¿quījterrá' selpiima'c? Naa quiwetewe'shrrá's jiyunisa's quījteva seelpimeec vit Dyusa'.

²¹ Dyusa' jiyuc naa quiwetewe'shrrá's jyuca jiyusa' Dyusa's jiyuya' ājawa'jmeesateva. Tyāasac quījteva jiimeerrava tyā'sna ūusuj jyuca yajcyrra tyajy pta'shni's wa'lmée jypa'gaterráa nwe'wewa'ja's vit, macue tyajy pta'shni' vite yacj yu' seelpimée na'wēteva.

²² Judiuwe'sha' cielujū seena'sa caavya'ja'jni'styi uy wēje', naapcachja' griegowe'sha' naa quiwete jiyunisa'styi pacué'. ²³ Nava cue'sha' Cristo's cluuscjē qui'prra icjnirrá'stja'w pta'shi'. Judiuwe'sha' tyā'wē pta'shni'styi jypumba', naapcachja' griegowe'sh yuutyi'sa' quījteva seelpimée luucu we'weni na'wē ne' ptjūuse'. ²⁴ Nava Dyus tyjityjnisa judiu vite' griego

tyāawe'sh yacj yu', Cristo yuurráa nwe'wewa'jsa', nwe'wewa'ja's Dyus pjeu'jrra nviitnisa. ²⁵Naa quiwete nasa jiisa ũstyna tyāawe'sh yacj yu', Dyus jiimeesa na'wēsarrava, tyāawe'shte jytjaacue jiisa' Dyusa'. Atsa' Dyus chjächjameerra ājasamée na'wēsarrava, nasa naa quiwetewe'shte jytjaacue chjächjasa'. ²⁶Yacjtjē'jwe'sh, i'cue'shtyi Dyus tyjityjni's mjiyuwe. I'cue'sha' naa quiwetewe'sha's yu' walamée jii i'cue sa' chjächjasava cujmée i'cue, sa' jytujtesava cujmée i'cue. ²⁷Tyā'wērrava i'cue'sha' Dyus tyjityjnisa i'cue, i'cue'shtyi jiimeesata' jīna naa quiwetewe'sh nasa we'we'ty tyāawe'shtyi caytjame'jwa'jsa. Sa' tyā'wēy naa quiwete nasa we'werra': Chjächjamée ājmeesata' jī'ty tyāawe'shtyiva caytjame'jwa'jsa. ²⁸Naa quiwete nasa we'werra': Quījteva seelpimeesata' jīnaty atsewe'we' tyāa atsewe'wesaty seelpimeecjē nviitwa'jsa i'cue. ²⁹Tyā'wē i'cue'sha' ājmeecuesaty tyjityjnisa i'cue na' quim yujva Dyus dyi'pte iijech yajcyna fi'nzeya' ājameene'cue. ³⁰Cristo Jesus yacj fi'nzewa'ja's Dyuscu vit. Atsa' Cristo's jiyuwa'ja'sva Dyus fírráac vit. Sa' tyāa Cristopa'ga yuurráa cue'sha' Dyus dyi'pte ewtetja'w neeyūu, tyajy tashu tyutemée fi'nzeya'. ³¹Tyāa pa'ga Dyus yuurrá's wechana tuutje'jwa'ja's Dyus librute na'wē fi'jni ũsa': Maava jīitj sūjna jytujtje yaacywēje'tsrra', Dyus yuurrá's wechana tuutje'jwa'ja' jī'c.

Cristo cluuscjē uuc tyajy caapiya'jni's pta'shni

2 ¹Yacjtjē'jwe'sh, andya' Dyus yuwe's caapiyu'jya' cytee pa'jrra', jiisa we'weni seena' zhichcuesa yacj pta'shna pal'meetj. ²Cytee i'cue'sh yacj ũsrra', naa quiwetewe'sha's jiyunisa yacj pta'shna ũsu'tsmeetj, naasáa Jesucristo's cluuscjē qui'prra icjñírrá'stju pta'shna ũsu'. ³I'cue'sh tashte pa'jrra', wala jiisa na'wē pal'jmée, wejyva jiimeesa na'wē ũucjna pal'jrratj Dyus yuwe's i'cue'shtyi pta'sh. ⁴Nava naa quiwetewe'sha's jiyunisa yacj we'werra i'cue'shtyi' cnaymeetj. Tyā'wē yūmée, wejyva Dyus pu'chte tyajy Espiritu yacjrráatj caapiyu'jrra i'cue'shtyi' cnay. ⁵I'cue'sha' naa quiwetewe'sha'srráa piyarra Dyusa's jiyumée, wejyva Dyus fírráa pu'chte Dyusa's jiyusa yuucajntju naa quiwete jiyunisa yu'sa' we'wemée.

Dyus pjeu'jnityi' tyajy Espiritu yacj fírráac ya'jiyu'

⁶Tyā'wērrava, Dyusna ew yā'j jiisa yacj yu' tyā'wē we'weni' seena' yuj jiisa we'wenisata'. Nava tyā'wē we'weni' naa quiwetewe'shmeeta', sa' naa quiwete ne'jue'sh scjēwwa'jsa ũsta' wala jiisa tyāawe'sh we'weniva meeta', ⁷wejyva naa quiwe meetey bagachte yujva psumée cue'sh ewte neeyūuwa'ja's Dyusa' pjeu'jrra ji'pja'cj yu' quim yujva jiyunimeesa tyā'snatja'w pta'shi'. ⁸Tyā'sa' naa quiwete ne'jue'sh quim yujva jiyumeeta'. Jiyuvatsa', cluuscjē qui'prra icjwa'jmée ne'ta yu' cue'shtyi jype'jsa cielujūwe'sha's. ⁹Nava Dyus librute fi'jni ũsyā'cj yu' tyā'wē jiyuwa'ja'smée, tyāa pa'ga ne'ta jiyumée. Tyajíc na'jī':

Dyusna yaacysawe'sh jîi Dyusa' pjeu'cj tyāa pjeu'jni's
 Quim yujva iuymeeta', sa' iiwēse'jva meeta',
 Sa' ūsterrāa yujva yaacyni ji'pju'tsmeeta' jîna fi'jni'.

¹⁰Dyusa' tyajy Espiritu yacju tyā'wēsaty cue'shtyi caajiyu'j, tyāa pa'gatey tyajy Espiritu' Dyus pjeu'jni quim yujva jiyuwa'jmeesa ūstyna tyāaty jyuca jiisa'. ¹¹Ayga nasaa pwe'shrrāa yujva ¿quim jiyuya' ājacy vitee ūs yaacyni's? Naasāa tyā'wē yaacysayrrāa ¿jiyumeema'c? Tyā'wēy Dyus Espiritu yuurrāa jiia' Dyus yajcyrra pjeu'jnisaty'. ¹²Cue'sha' naa quiwetewe'sha's jiyunisa's jypa'garra ūsmeetja'w. Dyus Espiritu tyajy tashu yuusa'stja'w jypa'ga, Dyus peeygājrra cue'shtyi ew yūuc tyāaty jyuca jiyuya'. ¹³Tyāasatja'w cue'shtyi Dyus ew yūuni's tyajy Espiritu caajiyu'tje pta'shya' āja', sa' naa quiwetewe'sha's piyani's pta'shi'tsmeetja'w. Dyus jiityi' Dyus Espiritu yacjīrrāatja'w pta'shi'.

¹⁴Nava Dyus Espiritu's ūuste ji'pjmeesa' Dyus Espiritu we'weni's jiyuya' ājameetyna. Tyā'wēsa yacja' jiimeecuesa we'weni na'wērrāa ptjūsena. Dyus we'wenityi' Dyus Espiritu yacjrrāa ya'jiyuna, tyāa pa'ga Dyus Espiritu yacjmée yu' jiyuya' ājameetyna. Dyus yaacynityi' Dyus Espiritu yacjrrāa jiyuya' ājatyna. ¹⁵Nava maava Dyus Espiritu's ūuste ji'pjsa' jypumbamée ew jiyuya' ājatyna, atsa' tyā'wē yūusa's jypumbana ūsa' jiya' ājameetyna maa yujva. ¹⁶Tyā'wē jiyuya' ājawa'jmeete īrrāac Dyus librate na'wē we'we': ¿Quim jiyuya' ājacy Dyus yaacyni's? Dyusa's ¿quim caapiya'jya' ājacy? jī'c. Tyā'wēteva, cue'sha' jiitja'w Cristo yaacyni's, Dyus Espiritu caajiyu'pja'ga.

E'nzsa Dyus tashte mjiisarrāatja'w

3 ¹Yacjtjē'jwe'sh, macue wala jiisa ne'cue nava Dyusa's ew jiisa yacj na'wē yu' we'weya' ājameetj, Dyusa's quīj yujva jiimeesa yacj na'wērrāatj we'weya' āja. Cristo caapiya'jni yu's quīj yujva jiimée luuch le'chcua na'wērrāa i'cue. ²Luuch le'chcuesa's ma'wēta lechirrāana puutsu' vite ū' yu's puutsmée tyā'wēy i'cue'shtyi' caapiya'jrrava tjēymeecuēsarrāanatj caapiya'jrra nvijt, tyā'wē tjēysa yu'sa' ājameei'cue naa pa'ga sa' āchpcach jiyuya' āja'tsmeei'cue. ³Tyāasa āchpcach i'cue'sh ūuste Dyusa's yu' quīj yujva ji'pjmeei'cue, tyāasa i'cue puuty yajtsena puuina tyuteerra fi'nze'. Tyā'wē yūunisa', Dyusa's ūuste ji'pjmeesa fi'nzenisa'. ⁴Tyā'wē Andya' Pablo yacj u'lsatj jitspcachja' vite' Apolos yacj u'lsatj jîna tyā'wē yūurra', Dyusa's ¿ma'wērrāa yujva ūuste ji'pjmeesa na'wē yuj meecue vacy? ⁵Ūus miiyajcywe: Pablo' ¿quīj yūusaana? Atsa' Apolosva ¿quīj yūusaana? Cue'sha' naasāa Dyusna selpisarrāatja'w, Dyus ma'wē jycaatje' tyā'wēy mjiitja'w teechna na'wērraj, tyāa pa'ga i'cue Cristo's jiyuwa'ja's ji'pju. ⁶Andya' nyafyte uusarrāatj yu', naapcachja' Apolosa' yu'awsac yu'. Nava Dyuscu cbuucha'jrra nuywala. ⁷Tyā'wē uujsa vite' yu'awsa tyā'wē yūusa' quījva jytujtjesameeta', naasāa Dyus yuurrāa

jytujtjesa', tyā'wē cbuucha'jrra nuywalapa'ga. ⁸ Uujsa vite' yu'awsa tyāawe'sha' maa yujva jytjaacuesamée, tyāa na'werrarráata'. Nava dewewa'j yu'sa' tyacuerrarráa yu'mée Dyusa' deweena, macue mjiite', tyā'srráan deweena. ⁹ Dyus mjiinite cue'sha' cytee mjiisarráatja'w, atsa' i'cue'sha' Dyus mjiini quiwe na'wēsa i'cue.

Tyā'wēy i'cue'sha' yat na'wēsa i'cue, atsa' tyāa yata's tyajna pjeu'jsa' Dyusa'. ¹⁰ Dyus jycaatje andya' yat tyajya' jiisa na'wē yat tyaa'jwa'ja's caachinda'jsarráatj. Atsa' andy tacjni cajcuete' vite mjiina ūsa' yata's. Nava ma'wē mjiiwa'ja'sva jypa'yacy mjiiwa'j ji'pja' teechsa na'wērraj. ¹¹ Yat tyaa'jwa'ja's tacjna caachinda'jni ūsyā'ja' tyā' Jesucristo', atsa' quim yujva vite fiy caachinda'jwa'j ji'pjmeeta'. ¹² Na'wē caachinda'jni cajcuete quīj yacjva mjiityna: vyuu bej, vyuu chijme, cuet zhichcuesa yacj meerrava fytūu, tsjitsj, cjij tyā'wēsa yacj. ¹³ Nava Dyus castigāywa'j ente ya'pdyi'purra ya'jiyuna ma'wē mjiini'sva. Tyāa ente' ipy yacj quījiana, atsa' tyāa ipya' caajiyu'juna mjiisa ma'wē mjiini'sva. ¹⁴ Tyāa caachinda'jni cajcuete mjiisa' ew vāa mjiina ipyte chjavywa'jmeesa yacj atsa' tyā'wē ew mjiipa'ga dewater' yuuna. ¹⁵ Nava tyāa yatte mjiisa' ipyte chjavywa'jsa yacj vāa mjiina atsa' jyuca chjavyte', mjiipa'ga dewater' yuuna. Naasāa cytee mjiisa yuurráa ewte neeyūuna, tyāa ipy walajū ūpjna casejsa na'wē.

¹⁶ I'cue'shíi Dyus ūswa'j yati'cue, naa pa'ga Dyus Espiritu i'cue'sh ūste u'pwa'jsate jiimeevá'cue. ¹⁷ Dyus ūswa'j yata' quīj pcal yujva ji'pjmeesa na's maava Dyus ūswa'j yata's i'viitute', Dyusa' i'viituna tyā'wē yūusa's. Tyāa Dyus ūswa'j yata' i'cue'shi'cue.

¹⁸ I'cue'sha' maa yujva jypumbanuwe, wala jiisatja'w sūjna. Maava naa quiwetewe'sha's wala jiisa ūsra', jiimeecuesa na'wērráa miiyajcywe. Tyā'wē yuurráa, wala jiisa yuuna pa'jane'cue. ¹⁹ Naa quiwetewe'shrráana wala jiyuni', Dyus dyi'pte' quīj yujva seelpimeesa'. Tyajíc Dyus libroute na'wē we'we': Wala yā'j jiitja'w sūjna fi'nzesatyí' ewmeete cjēewa'ja'scu vitu' Dyusa', tyā'wē yaacypa'ga. ²⁰ Tyā'wēy vite ajcjēva na'wē fi'jni ūsa': Wala jiitja'w sūjna fi'nzeni', quijte yujva seelpimeeteva jiia' Dyusa' jī'c. ²¹ Tyāa pa'ga nasarráaty jytjaacue i'wejech i'wejech yajcyna fi'nzewa'jme'. Tyā'wē yaacyajmení quijva jyuca i'cue'sh jīrrarráata'. ²² Pablo ma'c yuu, Apolos ma'c yuu, Pedro ma'c yuu, naa quiwe ma'c yuu, ityi fi'nzenisa ma'c yuu, uuwa'j ma'c yuu, naa ensu fi'nzeni ma'c yuu, vite ensu fi'nzewa'j ma'c yuu, nava tyā' jyuca i'cue'sh jīrrarráata'. ²³ Naapcachja' i'cue'sh yu' Cristo jīi i'cue, atsa' Cristo yu' Dyus jī'.

Jesucristo jycaajnisawe'sh mjiini

4 ¹ Tyā'wēyā'tje', cue'shtyi' naa sūjnarráa mfi'nzewe: Cue'sh ewte neeyūuwa'ja's Dyusa' tyāniitey pjeu'jrra ji'pju'c quim yujva jiyunimeesa tyā'sna pta'shcajn neewe'werra nvijtte Cristo tashte selpisaatyna sūjnarráa mfi'nzewe. ² Tyā'wē mjiiwa'ja's jypa'gasas' ma'wē

mjiiwa'ja'sva jyuca cytey yuuwa'j ji'pja'. ³Andy mjiini's i'cue'sha' ma'wēva nuywe'wene'cue. Nava i'cue'sh we'wenityi' andya' le'chcuerraa yujva yaacywa'j ji'pjmeetj. Andyírraa yujva andy mjiini' ewa' sūju'tsmeetj. ⁴Nava andy ūuste yu' ewme' sūjna yu'tsme'. Atsa' andya' ew mjiisatj jirra tyā'wē we'wetsmeetj. Jesucristo yuurraa andy ma'wē mjiisateva we'wewa'j ji'pja'. ⁵Tyāa pa'ga mjiini's we'wewa'j en ājmeyna yu', i'cue'sha' nuywe'wenuwe. Mūytjaswe Jesucristo quijpcach. Tyāa yuurraa ew ma'c yuu ewmēe ma'c yuu nava caajiyu'juna macue jiyunimeesa ūusterraa yaacynisa sūtjni yuu ma'c nava jyuca. Tyā'wē yūunijū ya'jiyuna nasaa iisa ma'wē yūusaarrava.

⁶Yacjtjē'jwe'sh, tyā'wē nuywe'wena fi'nzeni'stju yu'cypeje', Apolos fi'nzeni vite' andy fi'nzeni tyāaty tjengrra tyā'wēy fi'nzecajn. Tyā'wē yuurraa, i'cue'sha' jypumbamēe fi'nzene'cue Dyus yuwe ma'wē jycaatje' tyā'srraa cytey yuuna. Sa' quim yujva tyā'wē teechsarrá's weech yajcyna wendyrra', vite yu's ajtsena fi'nzemeene'cue. ⁷Indya's ¿quimga jytjaacue walasa vit? Tyā'wē Dyus peesnimeesa ¿quijrrá' ji'pjnga'? Tyā'wē quijva jyuca Dyus peesnirrá's ji'pjrra', ¿ma'wērranga iwejch yaaqui', indyrraa pacuerra uysaa na'wē?

⁸I'cue'sha' quijva peejymēe ji'pjsa na'wē yā'ji'cue yaaqui'. Cue'sh yuutyi' e'scjē nvijtrra, jycaajsa na'wē i'cue yaaqui'. Wejyva jycaajsafi yuuvatsa' ewna, cyaj i'cue'sh jycaajnite cue'shva ij ūsya' āja'nja'w sūju'tj. ⁹Cue'sha' Jesus jycaajnisatja'w nava Dyusa' nmejcjē ne' nvijt sūju'tj, naasaa icjwa'j nviitnisa na'wērraatja'w. Cue'sh pytjaa yuurra uutste', angeleswe'sh vite' nasava tjengcajn nasa walaa cshavYTE nviitni na'wē ūstja'w. ¹⁰Cristo caapiya'jni's pta'shpa'garraa cue'shtyi' quijteva jiimeesa luucu we'wesata' ji'ty, naapcachja' i'cue'sh yu' Cristo caapiya'jni's shiingmēe jyuca jiisa na'wē i'cue yaaqui'. Cue'sha' ājmeecuesatja'w, naapcachja' i'cue'sh yu' jytujtjesa i'cue. Cue'shtyi' atse'ty nasa', nava i'cue'sh yuutyi' peeygāja'ty. ¹¹Āchpcach pytjaa yuunatja'w fi'nze', nasa ewmēe nuywe'weni, wēena, yū'wēena, atjwa'j ropa ji'pjmeē, yatva ji'pjmeetja'w, ¹²sa' cuseju mjiina wajtynatja'w fi'nze'. Nasa' cue'shtyi wēeshuteva, ewrraatja'w pasu'. Cue'shtyi pcyuuna pāpatsteva, wantāyrra iindeewe'tsmeetja'w. ¹³Cue'shtyi atsewe'wetsteva, ca'tu' peeygājnatja'w yu'cypeje'. Naa quiwete cytā' seelpimeesa na'wētja'w fi'nze', canzhsa's wāataani na'wētja'w yajtsena fi'nze' āchpcach.

¹⁴I'cue'sh tjaamecajn tyā'wē fi'jatsmeetj, wejyva andy luuch wendynisa na'wē yu'cypejnarráatj fi'ja'. ¹⁵Cristo jycaajni's caapiya'jsa diez mil ma'cue ji'pj yuu, nava ney na'wēsa yu' cujmēe ji'pji'cue. Tyā'wē Cristo Jesus yacj fi'nzewa'ja's caapiya'pja'ga i'cue'sh ney na'wēsa' andytju.

¹⁶Tyā'wētj i'cue'shtyi neewe'we', andy na'wēy fi'nzecajn.

¹⁷Tyāasa cajatstju Timoteo andy nchi'c wendyni na'wēsa Cristo yacj tyutemēe fi'nzesa's. Tyā' i'cue'shtyi caayaqui'jina andy ma'wē

ne'tca Cristo yacj fi'nze tyã'sna. Sa' tyã'wëy mteerraj Dyusa's jiisa pcjaacjena ùstyna cysũ pecũjrra', ma'wë ne'tca caapiya'ja' tyã'snaíírráa caayaqui'jina. ¹⁸I'cue'sh maafi yu' wala chjächja iiweijch yajcyna ùsi'cue, Pablo' bagach yujva pa'jmeena jina. ¹⁹Nava Dyus ma'wë jytjääste!, dund yuwe'nja puuty uyya', tyã'wë iiweijch we'wena ùssa quíj ma'ty yuu aan chjächja we'wena úsrra', tyã'wëy Dyus yacjva chjächja fi'nzena ùstyna. ²⁰Dyus yacj fi'nzenisa' yuwejurráa iiweijch we'wena fi'nzenimeesa', wejyva Dyus ma'wë jycaatje!, cytey yuuna fi'nzewa'ja'. ²¹I'cue'shtyi andy tjengya' pa'jrra' ¿ma'wëcue yuu jytjääsu'? ¿Pechuucue jytjääsucue', meerra' peeygájnacue pa'j jytjääsu'á'?

Peecy nji'j npaasa yacj íírráa nyu na'wë fi'nzesa

5 ¹Teech i'cue'sh yacj pcjaacjesa' peecy nji'j npaasa yacj íírráa nyu na'wë fi'nzena úsa' jinic ya'jiyu'. Tyã'wë fi'nzeni' pcal iiméj wala canzhsa'. Dyusa's jiimeesa yujva tyã'wë yu' fi'nze'tsmeetá'. ²Tyã'wë canzh pcal yuusa's i'cue'sh cshavyu cutyi'jipcachte, ewsatja'w sújna iiweechwa'jrrá's i'cue yaaqui'. ³Andya' i'cue'sh yacj ij yu' úsmeetj, nava andy ús yaacyni yacj yu' i'cue'sh yacj ij ústju. Tyáasatj tyáa pitstjé'j ma'wésateva jiyurra', castigäywa'tjeyä'j nvijt, andy ús yaacyni yacjrráava. ⁴I'cue'sha' Jesucristo's neewe'werra tyajy dyi'pte mpuutywe'wewe pcjaacjerra. Atsa' andyva i'cue'sh yacj ij ús na'wëyrráa pu'chji'nja, atsa' Jesucristova i'cue'sh yacj ij úsuna. ⁵Tyã'wë yúurra tyáa pitstjé'ja's echtjé'j cusete manvijtwe, tyajy cacue' vitucajn. Nava tyajy ús yu' vitumeena Jesucristo quíi ente'.

⁶I'cue'sha' tyã'wë canzh pcal yuusa's cutyi'jmée úsrra', iiweijch yajcyna úswa'j ji'pjmeel'cue. Jiimeevá'cue na'wë we'weni's: Levadura' le'chcuëerrava scuutyj ú'wete jyuca pëetjeje'c jini's. ⁷Levadura ewmeesa's mcutyi'jwe pëetjecajmen, cyaj i'cue'sha' Pascua fiestate ú'nisa pan levadura ji'pjmeé na'wë yuune'cue. Tyã'wë pcal ji'pjmeé fi'nzeczajncu Cristo' cue'sh pa'gate uu, tyã' cue'sh Pascuatewe'sh piishacuëc yu'. ⁸Tyã'wëyã'tje!, cue'sh úuste quíj yujva ewmeesa ji'pjmeé Dyusa'srráa úusuj jyuca yajcyna cue'sh Pascua fiesta's vitwa'j ji'ptja'w. Tyã'wë ew yajcyna vitni', pan levadura ji'pjmeesa yacj fiesta's vitni na'wësa'. Nava ewmée yajcyna Pascua fiesta's vitwa'j ji'pjmeetja'w. Tyã'wë ewmée yajcyna vitni', levadura ewmeesa yacj fiesta's vitni na'wë'.

⁹Nyafii vite carta fi'tj tyáate' na'wëtj yúucaaj: Canzh pcal yúuna fi'nzesa yacj pcjaacjenuwe jinatj fi'j. ¹⁰Tyã'wë canzh pcal yúuna fi'nzesa yacj, vitée jiity cusa'j wëesa, pesweesa, dyus ityimeesaty neewe'wesa tyáawe'sh yacja' jyucate mtyuteewe peena yu' puuty uymée fi'nzeya' jirra tyã'wë we'wemeetj. Tyáawe'sh yacj puuty uyya'mée tyutee wëerra', naa quiwejú casejrra yuurráa tyã'wë peena yu' puuty uymeene'cue. ¹¹Na'wëtj yúucaaj tyã'sna ne'cue jiyumée: Maava yacjtjé'tja'w jitsrrava, canzh pcal yúuna, vitée jiity cusa'j wëesa ma'c yuu, dyus ityimeesaty neewe'wesa

ma'c yuu, atsewe'wena wēeshuusáa ma'c yuu, tūsáa ma'c yuu, meerra' pesweesa ma'c yuu, tyā'wē yūuna fi'nzesa's i'cue'sh cshavyte jype'jnuwe jīnarráatj we'wena fi'j. Nasa tyā'wēsa's i'cue'sh yat-su pi'cywa'jme', atsa' ca'tuva pi'cymeena. ¹²⁻¹³Dyusna jiimeesatyí' tyāawe'sh ma'wē yūusaateva andya' tyāatyí' paapējyna castigāywa'j jī'pjmeetj. Dyusrráa castigāywa'jsa' tyāawe'sh ājmée yūusaatyí'. Nava i'cue'sh cshavyte ūssa yacjtjē'jwe'sh ājmée yūuni yu's i'cue'sh paapēywa'jsai'cue. Tyāasa tyāa canzh pcal yūusa's i'cue'sh cshavyu mcutyí'jwe.

I'cue'sh yuuwe yuuni's Dyusa's jiimeesa cjuēs tashsu paatyjī'cjni

6 ¹I'cue'sh pwe'sh yuwe susni's ¿qui'j yūurracue Dyusna jiimeesa cjuēs tashsu paatyjī'cjya' u'jue', wejyva yuwe susni's Dyusa's jiisa pwe'sh i'cue'shrráa pjeu'jupcachte. ²I'cue'sha' jiimeevá'cue Dyus luuchyá'ja' naa quiwe yujnava cue'sh jycaajwa'jsameevá'ntca'w. Tyā'wē naa quiwe yujnava i'cue'sh jycaajwa'jsarra' ¿qui'j yūurracue yuwe tjēymeesa yu's pjeu'jya' āja'tsmée? ³I'cue'sha' jiimeevá'cue cue'sha' angeleswe'sh yujtyva yu'cypejwa'jsameevá'ntca'w. Tyā'wērra', cue'sh pwe'sh yuwe susni's wejy ūucjmée pjeu'jwa'j jī'ptja'w. ⁴I'cue'sh pwe'sh canzhtjē'j susna puini's ¿qui'jya'cue paatyjī'cjya' u'jue' Dyusa's jiimeesa tashsu? ⁵Na'wētj we'we' i'cue'sh tjaamecajn: ¿Yacjtjē'jwe'sh pwe'sh yuwe susni's pjeu'jwa'jsa teechráava jiisameeváana atsne'cue tyā'wē vitety pi'cyya' u'jue'? ⁶Yacjtjē'j pwe'sh yuwe susni's Dyusna jiimeesa cjuēs tashsu paatyjī'cjte' ¿ewmañ?

⁷Tyā'wē i'cue'sh pwe'shírráa puuty puina fi'nzeni' canzh tjaampa'sa', atsa' ¿mjīitecue i'cue'shtyi pesweena ma'wēva ptjāawetsteva Dyusa's jiimeesa tashsu yu' paatyjī'cjya' u'jmée shuuna' neeyū'tsmée? ⁸Tyā'wē yūumée i'cue'shtyi pesweete', i'cue'shva yacjtjē'j jīityírráa pesweena quíjva ewmée i'cue yū'.

⁹⁻¹⁰Jiimeevá'cue Dyus jycaajna ūsnite u'caya' ājawa'jsameeta' tyā'wē ewmée yūusa' jīni's. Jypumbanuwe, tyā'wē yūusa' Dyus jycaajna ūsnite u'caya' ājawa'jsameeta': Pcal canzhgate fi'nzesa, dyus ityimeesa's neewe'wesa, ptamrrava vite yacj fi'nzesa, pitstjē'j pwe'shírráa pcal yuuna fi'nzesa, pesweesa, vitee jīity cusa'j wēesa, tūsáa, wēeshuusáa, īshiirra vitee jī's iyyamusa tyāawe'sha' Dyus jycaajnite u'caya' ājameetyna.

¹¹I'cue'sha' nyafíi yu' tyā'wēsa i'cue yu'. Nava āchja' Dyus peltunāyte', jyuca yaateni i'cue, sa' Jesucristo vite' cue'sh Dyus Espiritu pu'chte', Dyus yacj yuurráa fi'nzesai'cue.

Peecy cacue's pcalte caafi'nzel'jwa'jme'

¹²Cue'shtyi ma'wē yūuwechteva ma'wēva fi'nze'nja'w nava cue'sh fi'nzeni's quim yujva yupmeena jī'ty tyā' isa yuja'. Nava jyuca yuutyi's nwēese'jwa'j jī'pjmeetja'w, maafí yu' seelpimeesata' tyāa pa'ga. ¹³Isaty

we'we': Ũ'a' tutyjtewe'sha', naapcachja' tutyja' ũ' jypa'gawa'jsa', atsa' tyāaty' ¿quim yupuucy? jī'ty. Isa tyāa e'nzsa' tyā'wētewe'sh yujta', atsa' tyāaty' we'wewa'j ji'pjmeetja'w, ptsuwa'jsarráata' naa pa'ga. Nava cacue's ptammeesa yacj pcalte caafi'nze'jwa'jme', tyāa pa'gatey cue'sh cacue' Cristo ji', naapcachja' Cristo' cue'sh cacue's jype'jsa' naa pa'ga. ¹⁴Dyusa' ma'wēga Cristo's ityi vit, tyā'wēy cue'sh cacue'sva tjēymée ityi vit ya'va', naa pa'ga pcalte fi'nzewa'jsame'.

¹⁵I'cue'sh cacue' teeche na'wērraj Cristo cacue'írrá', atsa' tyā'sa' jiimeevá'cue. Tyā'wēte', Cristo cacue's uwerra u'y ewmeesa yacj utyaate ¿ewmañ? Wej yujva tyā'wē yūuwa'jme'. ¹⁶Meerra' i'cue'sha' jiimeevá'cue, u'y ewmeesa yacj pcal yūunijū' teeche cacuerráac yuuna pa'ja' jīni's. Tyā'sna we'werrac Dyus librute na'jī': E'nzsa teeche cacuerráa yuuna pa'jana jī'c. ¹⁷Tyāa pa'gac maava Cristo yacj utyaate', Cristo yacj teeche cacuerráa yuuna pa'ja' Dyus dyi'pte.

¹⁸Ma'wē yujva nyumeesa yacj canzh pcal yuuwa'jme'. Pcal ma'wēsava ũsta', nava peecy cacue yacj yu' meec pcal yu'. Nava ptammeerra canzh pcal yuuna fi'nzesa' tyajy cacue's írráac suwu', pcalte jyūna u'jrra. ¹⁹Jiimeevá'cue i'cue'sh cacue' Dyus Espiritu u'pwa'ja', tyāa pa'ga i'cue'sh ũuste' Dyus Espiritu u'pa', atsa' cacue' i'cue'sh jīi me'. ²⁰I'cue'sha' Dyus weynisai'cue wala pa'gate. Tyā'wēyā'tje', canzh yūumée Dyus dyi'pte ewrráa yūuna mfi'nzewe i'cue'sh cacue yacj vite' i'cue'sh ũus yaacyni yacjva tyā'wēy. Tyā'wēme', e'nzfi Dyus jīirráata'.

Ptamunisu yu'cypejni

7 ¹I'cue'sh pējyna fi'jni's áchj pasya'vatj. Pitstjē'ja' nyu ji'pjímée fi'nzeteve ew yujna. ²Nava tyā'wē pcal canzh yuuwa'jrráac wala caseje' naa pa'ga pitstjē'ja' nyu ji'pjuwa'ja', atsa' tyā'wēy u'yva peecy nmi' ji'pjuwa'ja'. ³Nmi'a' zhichcue fi'nzewa'ja' tyāawe'sh nyu yacj, atsa' nyua' tyā'wēy ew zhichcue fi'nzewa'ja' tyāawe'sh nmi' yacj. ⁴Nyua' peecy cacue' sūjna yaacywa'j ji'pjme', tyajy cacue' nmi' jī' naa pa'ga, naapcachja' nmi'va peecy cacue' sūjna yaacywa'j ji'pjme', tyajy cacue' nyu jī' naa pa'ga. ⁵Ptamsa yā'ja', ij fi'nzeni's puuty wa'lwajme', naasáa Dyusna orāyya'varra yuurráa, manz enrráava tyutewa'ja'. Nava e'su yā'ja' qui' ij fi'nzewa'ja', tyā'wēme' echtjē'j caypumba'jwe'shte.

⁶Maava jyucaysa ptamuwa'ja's jycaja'tsmeetj, nava ptamurra fi'nzenic andy yacja' ew tjengu' naa pa'garráatj tyā'jī'. ⁷Jyucay andy na'wērráa fi'nzevats, wejy ewna sūju'tj. Nava Dyusa' nasaa iisa fiyfiy fi'nzewa'ja's ne' pees, vitetyi' ptamurra fi'nzewa'j, vitetyi' ptamumée fi'nzewa'j.

⁸Viudawe'sh vite' ptammeesaty'tju yu'cypeje' tyāawe'sha' ptamumée andy na'wērráa fi'nzevats wejy ewna. ⁹Nava peecy cacue jytjāasni's neeweya' ájasame' ptamurra fi'nzeni wejy ewna, tyāasurráa yajcyna fi'nzeya'mée.

¹⁰Nava áchja' ptamsatyjtju jycaaja': nyua' nmi' yacj tyutewa'j ji'pjme'. Na'wê jycaajni' andy yajcyrra we'wenime', Dyuscu tyā'wê jycaaja'. ¹¹Nava maa enteya' maaíi yu' tyā'wê nmi' yacj tyuteváana nava tyāa u'lya' peena yu' vite yacj iimi'ya' ájameena. Meerra' nmi' yacj qui' yuwee ewuurra yu' nmi' tashtey qui' shawendya' ájana. Tyā'wêy nmi'va tyajy nyu yacj tyuteeya' ájameena.

¹²Áchja' vitetyi' andy úus yaacyni yacjtju yu'cypeje': Maa yacjtjê'j nyuuvu Cristo's úuste jypa'gasameerrava, nmi' yacj wa'lmée fi'nze wêeyá'tje', nmi'a' tyutemeete ewna. ¹³Tyā'wêy nyua' Cristo's jypa'gasateva nmi'a' Cristo's jypa'gasameerrava, nyu yacj wa'lmée fi'nze wêeyá'tje', tyāa nyua' tyutemeete ewna. ¹⁴Nmi' Cristo's jypa'gasameerrava, tyajy nyua' Cristo's jypa'gasa yacj wa'lmée fi'nzepa'ga, tyāawe'sh ptam fi'nzeni' Dyus dyi'pte ewsa'. Atsa' tyā'wêy nyu ma'c Cristo's jypa'gasamée yuu nava tyajy nmi' Cristo's jypa'gasa yacj wa'lmée fi'nzepa'ga tyāawe'sh ptam fi'nzeni' Dyus dyi'pte ewsa'. Tyā'wêmeevatsa', i'cue'sh luucha' Dyus peeygāanisamée yuutyna. Nava ewstate írráa i'cue'sh luucha' Dyus peeygāanisata'. ¹⁵Nava Cristo's jypa'gasamée nmi' ma'c yuu meerra' nyu ma'c yuu nava tyutee wêete', wa'lmeete ewna. Tyā'wê yu' tyuteeya' ájane'cue, tyāa pa'gatey Dyusa' puuty puimée fi'nzewa'ja'scu jycaaja'. ¹⁶Tyā'wê nmi' ma'c yuu meerra' nyu ma'c yuu nava tyā'wê peecy nmi'a's Dyus jii cnayu'nja sújna tyutemée fi'nzerrava, jii yu' meec ya'fi'nze' Dyusa's jiyuwa'jsamañ jiyuwa'jsameemañ nava.

¹⁷I'cue'sh fi'nzewa'ja's ma'wêne' Dyus nvijt atsa' tyā'srráa cytey nwêese'jna fi'nzewa'ja' nasa iisa teeche na'wêrraj. Nyaffi i'cue'shtyi Dyus pa'yatste ma'wêsane'cue yu' na' tyā'wêesa mfi'nzewe. Dyusna yaacysa mteeva pcjaacjesa ústyna tyāawe'shtyi' tyā'wê'tj jycaaja'. ¹⁸Maaíi yu'sa' circuncidāynisa's váa Dyus pa'yana atsa' tyā'wê circuncidāyni mneeyúu. Vite' circuncidāynimeesana váa Dyus pa'yana atsa' tyā'wêesa mneeyúu ya'circuncidāymée. ¹⁹Ya'circuncidāy ma'c meerra' ya'circuncidāymée ma'c nava tyā' qui'jva meesa'. Dyus jytjáasni's cytey yuuna fi'nzeterráa qui'jva yuumeena. ²⁰Nasa iisa ma'wêsarraj ne'cue yu' Dyus pa'yatste', tyā'wêesa mfi'nzewe. ²¹Meerra' indya' vitee cusete jycaajni fi'nzena úste vá' Dyusa' pa'ya atsa' tyajū casejmée fi'nzewa'ja' cuj yajcymée. Nava tyāa selpini'jū casejya' ewuwechte', mcaasej tyāajū. ²²Tyā'wê Dyusa' Cristo's úuste jypa'gaya' pa'yatste', vitee cusete jycaajni fi'nzena ússarrava, áchja' vitee jycaajni'jū casejrra Cristo's selpisáa i'cue yuu Dyus dyi'pte. Tyā'wêy vitee cusete selpisamée ma'c yuu nava áchja' vitee cusete selpiiya' u'casa yuuna Cristo tashte. ²³I'cue'sha' Dyus weynisa i'cue pa'gate. Tyāa pa'ga naa quiwete nasaa nwe'shtyi selpisáa ájmeeccuesatja'w sújmée mfi'nzewe. ²⁴Tyā'wê' naa pa'ga yacjtjê'jwe'sh, ma'wêsarraj ne'cue yu' Dyus pa'yatste', nava tyā'wêesa mfi'nzewe nasa iisa teeche na'wêrraj Dyus yacj tyutemée.

²⁵ Cna'sawe'shtyi' Dyusa' tyā'wēc jycaaja' jīwa'j yu' quīj yujva ji'pjmeetj. Nava Dyus yacj ew fi'nzesa yu'cypejni ewna sūjrratj andy ūus yaacyniju na'wē pta'shi': ²⁶ Pitstacya' teechrrāa yā'j fi'nzetsrra', tyā'wēesa fi'nzete ewna sūju'tj andya', naa ensu' fi'nzewa'j wala tjēya' tyāa pa'ga. ²⁷ Nyu ji'pjyā'jrra', tyutewa'ja's yaacynu. Nyu ji'pjmeesa', nyu yuuwa'jsa pacueya' yaacynu. ²⁸ Nava ptamunisa' pcalme', atsa' cna'sa ma'c ptamuuya' yajcy nava tyāava pcalme'. Nava ptamusa' naa quiwete űuswa'j tjēysa's pejca ji'pjutyna, atsa' tyāaty'tju ji'pjmeevatsa' sūju' andya'.

²⁹ Yacjtjē'jwe'sh, na'wē fi'nzewa'ja'stju pta'shi': Cuj enmeerrāa yā'j ūsa'. Naajūyā'ja' ptamrrava nyu ji'pjmeē na'wērrāa mfi'nzewe. ³⁰ űuswa'j en pa'tjeva, űusmēe ūssa na'wērrāa mfi'nzewe. Naapcachja' fiestate ūssa' wechana ūssa na'wēmēe mfi'nzewe. Quīj weyni ji'pjrrava tyāa weyni' cue'sh ji' sūjmēe mfi'nzewe. ³¹ Naa quiwete quījva wala ji'pjsa' ji'pjmeesa na'wērrāa meswe. Tyā'wēme', naa quiwe' ptsuuya'va.

³² I'cue'sha' peecy yatte tjengna fi'nzewa'ja's ji'pjmeē fi'nzevats wejy ewna sūju'tj. Tyā'wē maava nyu ji'pjmeesa' yatte tjengwa'ja's yajcymēe Dyus yacj ew fi'nzewa'jrrāanac pa'pchuna fi'nze'. ³³ Nava nyu ji'pjsa' peecy yatte tjengwa'ja'srrāac jytjaacue pa'pchuna fi'nze', tyajy nyu peejymēe fi'nzecajn. ³⁴ Tyā'wēy u'yva nmi' ji'pjsa vite' nmi' ji'pjmeesa' tyā'wērrarrāa yajcyna fi'nze'tsmeeta'. Nmi' ji'pjmeesa' Dyus jīrrā'scu jytjaacue pa'pchuna fi'nze', tyajy cacue tyajy ūus yaacyni yā'jrra Dyus dyi'pte ew fi'nzeya'. Naapcachja' nmi' ji'pjsa' naa quiwetewe'sha'srrāac wejy jytjaacue pa'pchuna fi'nze', nmi' wechacajn.

³⁵ Na'wētj pta'sh nava i'cue'shtyi yupna tyā'jītsmeetj, wejyva i'cue'shtyi selpiwa'ja's pu'chnarrāatj tyā'jī', cyaj Dyusa's yuurrāa wejy tjaacue selpiina fi'nzene'cue sūjrratj tyā'jī'.

³⁶ Tyā'wēteva maafi yu' andy niisa's cmi'a'tje wejy ewna. Tyā'wēme' e'suyā'ja' iimi'ya' ewumeena sūjna yaacysa', cmi'a'jane'cue, i'cue'sh ūuste ma'wē Dyus caaūsutje'jena tyā'snarrāa cytey yuuna. Mi'rra fi'nzeni' pcalsame'. ³⁷ Nava vite' tyā'wē niisa's cmi'a'j wēmeesa', cmi'a'jmeene'cue tyā'sa' quimva jycaajmeena atsa' cmi'a'jmeerra', wejyva ew yūuna. ³⁸ Maava tyā'wē cmi'a'jsa' ew fīrrāa yūuna. Nava cmi'a'jsame' jytjaacue ew yūuna.

³⁹ U'y iimi'sa' nmi' yacj tyuteeya' ājameena nmi' nee ityiye yu'. Tyā'sa' leycu tyā'wē juuna' jycaaja'. Nava nmi' uute yuurrāa qui' iimi'ya' ājana maa yacjva, nmi' yuuwa'jsa Dyusa's jiisa yacj. ⁴⁰ Nava nmi' uuyā'tje' peena yu' iimi'meerra', wejy wēt fi'nzena. Andya' tyā'wētj yaaqui', atsa' andya's Dyus Espiritu ne' caaūsutje'je' sūju'tj.

Dyus ityimeesaty wechaya' tajcy icjni's pta'shni

8 ¹ Āchja' Dyus ityimeesa ūsta' tyāaty wechaawa'j tajcy icjnisa's pta'shya'vatj. Tyāa chicha' quījva suwwa'jsameeteva tyā'sa' ew

jiitja'w cue'sha'. Nava tyā'wē jiitj sūjnisa' weech we'wewa'jrráac caseje', atsa' puuty ya'peeygājna Dyus yacj chjāchja fi'nzewa'j yu' ya'ji'pju'tsme'.
 2Maava tyā'srráana jiirra jiitj sūjna fi'nzesa', quíjva jiimeeta' ew jiisa na'wē yu'. 3Nava tyā'wē yūumée, Dyusa'srráa ūusuj jyuca yaacysa's Dyusa' jiia' tyā'wē yūusa's.

4Tyā'wē dyus ityimeesaty wechaya' tajcy icjnisa chicha's ū'te ¿ewmée dyijmañ? Ew ūus miiyajcywe. Tyāa dyus ityimeesa' naa quiwete quíj yujva meesata', naasáa teeche Dyus yuurráa ityisa ūsa', peena vite yu' meeta'. 5Dyus yaasesa naa quiwete vite' cielute ūsváatyna tyā'wē yaacysa yacj yu'. 6Nava cue'sh yacj yu', teeche Dyus yuurráa ūsa' cue'sh Tata cielute ūssa. Tyāac quíj yujva peejymée jyuca taqui'jrra nvijt, atsa' cue'sha' tyāa pa'garráatja'w ityi fi'nzeya' āja'. Tyā'wēy cue'shtyi jype'jsava teeche'ráa ūsa', tyā' Jesucristo'. Quíjva jyuca tyajy tjengna jype'pja'garráa ūsta', tyāa pa'ga cue'shva tyajy jype'jnisa fírráatja'w.

7Atsa' tyāa yacj ūssa yacja' chich tyā'wēsa's ū'teva, quíj yujva suwwa'jsameeteva tyā'sa' jiimeeta' jyuca yu'. Tyāasaty naa quiwete dyus ityimeesaty nyafii neewe'wesawe'sh Dyusa's achamée ew jiisa' chich tyā'wēsa's ū'te', ewmeena sūju'. 8Nava cue'sh ū'ni' Dyus dyi'pte ewsa vitwa'jsame'. Atsa' tyā'wē ū'rra' ewsa yuume'nja'w, sa' ewmeesava yuume'nja'w. 9Tyā'wēteva, mpa'yajcywe, i'cue'sh tyā'wē quíjnavā ū'ya' āja'nja'w sūjrra tyāa chicha's ū'pa'garráa Dyusa's achamée ew jiisaty pcalte cweete'jwe'shte. 10Meerrava na'wē vāa yuune'nga: dyus ityimeesaty wechanisa chich tyweyni's vāa ū'ya' cachjiine'nga, atsa' Dyusa's achamée ew jiisa uyrra', tyāava tyā'wēy ū'wena. 11Atsa' iindypa'garráa Dyusa's achamée ew jiisa iindy yacjtjē'j ūsa' vituna, tyajy pa'gate macue Cristo uuteva. 12Atsa' Dyusa's achamée ew jiisa yacjtjē'jty pcalte cweete'jrra', indyva Cristo dyi'pte yuuwesa yuune'nga. 13Tyāa pa'ga andy yacjtjē'j pcalte wetewe'shte chich tyā'wēsa's bagachte yujva ū'me'nja pcalte cweete'jya'mée.

Jesucristo jycaajnisat ū'wa'ja's jyuca pēywa'j ji'pja'

9¹ Andya' Jesus jycaajnisatewe'shtju, naa pa'ga sāl'jini's jyuca pēywa'j ji'ptju, tyāa pa'gatey cue'shtyi jype'jsa Jesusa's iuytju, sa' tyajy tashte mjiitj atsa' andy mjiirra Jesus tashte cuutya'jnisa i'cue i'cue'sha'.
 2Vitesa andya's we'werra': Pablo' Jesus jycaajnisatewe'shme' jisava ūsváatyna. Nava i'cue'sh yu' tyā'jīya' ājameene'cue. Andya' Jesucristo jycaajnisatewe'shte fírráa i'cue'sha' Jesucristo's nwēese'jsa i'cue andy pta'shte.

3Andyna nuywe'wesaty i' na'wētj pasu': 4Andya' ū'wa'ja's jyuca pējyya' ājawa'lsatj. 5Ma'wēta Jesucristo jycaajnisawe'shva tyāawe'sh nyuuty pe'jrra sāl'jini fi'nze' vite' Jesus nyacj, Pedrowe'shva, atsa' andyrráa ¿quíj yūurra tyā'wēy yūuya' ājamée yuquiti'tj? 6Bernabé yacj

cue'sh e'nzsarráa váa Dyus yuwe's pta'shna u'jurrava ¿naa quiwete mjiia's nviitwa'jsamée ne'tca'w? ⁷¿Maa soldaurrá' sã'jnimée fi'nzegá'? ¿Quimga uutjash vitrra', cytee yũnni's ũ'we'tsmée? ¿Quimga cla taqui'jrrava tyāa claa lechi's tundyi'tsmée? ⁸Andy ũusujrráa tyā'wē yajcyrra we'we'tsmeetj. Tyā'wēmeete íic Moises leyteva tyā'jī'. ⁹Cyteea' na'wē fi'jñi': Bueya's cmaajī'jitsrra', yuwe's tundwa'jme' iīū' mjiicajn jī'c. Dyusa' tyāa bueyrráaty peeygājrra tyā'wē we'weme', ¹⁰wejyva cue'shtyi we'werrac tyā'jī', tyāa pa'gatey tyāa leya' cue'sh jīic yu' naa pa'ga. Tyā'wē uutjashsu mjiisa ma'c yuu meerra' quiwe's wuwsa ma'c yuu nava cytee mjiini's cutyi'jrra ũ'we'nja sūjnac mji'. ¹¹Tyā'wē yā'tje', cue'shva i'cue'sh cshavysu Dyus jīi mjiisatja'w atsa' i'cue'sha' miijajcywe ¿cue'sh mjiipa'ga ũ'wa'j quijrráava jypa'gawa'j jī'pjmeemtja'w? ¹²Vite mjiisava ũ'wa'ja's jypa'gane'ta atsa' ¿cue'sh yu' wejy tyā'wē jypa'gawa'jsameemtja'w?

Tyā'wērrava cue'sha' mjiipa'ga ũ'wa'ja's iipējymee'tja'w, wejyva cue'sh peejini's wantaī'tja'w, Cristo caapiya'jni's yupsá na'wē yuuya'mée. ¹³I'cue'sha' jīi i'cue dyuus yatte mjiisa' dyuus yatte ũ' yacjtyi fi'nze'. Tyāawe'sha' na'wēty yu': altalte pu'chsa' cytee niimal icjni chicha'styi ũ'we'. ¹⁴Cristova tyā'wēyrráac jycaaja': Dyus yuwe pta'shsa tyāawe'sha' cytee sã'jini fi'nzewa'j jī'pita' jī'c. ¹⁵Nava andya' bagach yujva iipējymee'tj tyā'wē sã'jīwa'ja's, sa' i'cue'sh quijrráava peescajn tyā'jīna fi'jatsmeetj. Quijva sã'jīmeeteva wētjtu fi'nze' na' tyā'wē i'cue'shtyi tjāasmey uuwa'jsatj.

¹⁶Andya' Dyus yuwe's pta'shpa'ga iivejch yaaquitsmeetj, tyāa mjiia' andy jīime', Dyus jī' tyāa pa'ga. Atsa' Dyus yuwe's pta'shmeerra', wala yuj seena' yuuwesa yu'nja. ¹⁷Tyā'wē ducj jytjāasrra mjiī pacuevatsa', tyāa mjiipa'ga jypa'gawa'j jī'ptju sūju'nja. Nava tyā'wē yajcyrra mjiīnisa yu'tsme'. Tyāa mjiia's Dyuscu ũs, atsa' tyajy jycaajni'rrá's cytey yuuwa'j jī'ptju quijva ducj jytjāasmée. ¹⁸Dyus yuwe's wēt wechana pta'shni andy yacja' ducjni na'wēsa', atsa' andy mjiipa'ga i'cue'sh yuutyi's ducj jytjāasu'tsmeetj.

¹⁹Tyā'wē andya' ducj jytjāasmée ũstju, atsa' andya's quim yujva jycaajwa'j jī'pjmeeta'. Nava Cristo tashte nasa cuj nuypa'jya' sūjrra yuurráatj selpisáa yuu jyucaysaty. ²⁰Bagachteva judiwe'sh yacj ũsrra', judiu na'wēytju yu', tyāawe'shtyi Cristo jīi cnayya'. Andya' Moises leya's nwēese'jetsi yu' meerrava Moises leya's nwēese'jsa yacj ũsrra yu', tyāa leya's nwēese'jsa na'wēytju yu', tyāawe'shtyi Cristo jīi cnayya'. ²¹Sa' vite nasa Moises leya's jiimeesa yacj ũsrra', andyva tyāawe'sh na'wēyrráatj jiimeesa na'wē yuuna fi'nze' macue Dyus leya's yu' nvijtmée ũsrrava, tyāa pa'gatey Cristo jycaajni'stju nwēese'jna fi'nze'. Nava tyāawe'shtyi Cristo jīi cnayya'rráatj tyā'wē yū'. ²²Dyusa's achamée ew jiisa yacj ũsrra', andyva tyā'wēy jiimeecuesa na'wētj fi'nze'. Nasa ma'wēcuesate', andyva tyāawe'sh na'wēyrráatj fi'nze', tyā'wē yūute' maarráava ewte

neeyüuwa'ja's uyuváatyna sũjrra. ²³Tyãasatj quĩjteva jyuca tyã'wẽ yũuna fi'nze', Dyus yuwe ewsa's vitetyva jytyujndeya'.

²⁴I'cue'sha' peecy jii i'cue wuwuurra cnay wẽesa' cyanzíi ja'ndarrajty wuwu', peeswa'lj ũsna tyã'sna cnayya'. Nava teechsa yuurráac cnayu'. Tyãa cnaysava ma'wẽga chjächja wuwu', i'cue'shva tyã'wẽy myũuwe, peeswa'lj ũsna tyã'sna jypa'gaya'. ²⁵Maava wuwuurra cnay wẽesa' tyãawe'sh cacue's caapiya'jna pjeu'ju'ty yatscjẽy. Tyãawe'sha' naa quiwete corona ptsuwa'jsa's jypa'gaya'rráaty tyã'wẽ yũ'. Nava cue'sha' bagachte yujva ptsuwa'jsame's jypa'gaya'tja'w tyã'wẽ pa'pchu'. ²⁶Andy tyã'wẽ yũutsrra', ma'wẽ wuwuuwa'tjeva jiimée yu' wuwuume'nja. Andya' puiiya' jiimeesa na'wẽ fiisurráa ujcame'nja. ²⁷Tyã'wẽ yũuya'mée, andy cacue's caapiya'ja'tj. Tyã'wẽme', viterráaty ew caapiya'jrra', caapiya'jsa andy yu' seelpimeesa yuuya'mée.

Dyus ïtyimeesaty neewe'wecajmen yu'cypejni

10 ¹Yacjtjẽjwe'sh miiyajcywe: nyafiitey cue'sh yatsgawe'sha' jyucay Dyus nwe'wena jype'jni tãapj apjñity fi'nzena ũsu', sa' jyucay ïcjwala bejuyva ew uycjẽwtyi. ²Jyucay Moises yacj tyutemée fi'nzerra yuurráaty jyucay tãapj dyiite Dyus nwe'weni yuu, sa' tyã'wẽy ïcjuyva uycjẽwtyi, ³sa' jyucaysaty Dyus sã'jini fi'nzena ũsu'. ⁴Tyã'wẽytyi jyucaysa Dyus yusni yu'a'sva tundyna fi'nzena ũsu', sa' Dyusa' tyãawe'sh yacj ij dyi'tje pi'cyna u'juetsrra', peñate yu' cutyi'jrra yuscu. Atsa' tyãa peña yu' Cristoc yu'. ⁵Tyã'wẽ Dyusa' ew yũuteva, nasa wejy cujsa yu' Dyus dyi'pte ew fi'nzemeeta', tyãa pa'ga Dyus castigäyte uuty nasa u'pnimée quiwesu.

⁶Tyã'wẽ castigäyni uuty nava tyãa yu' cue'sh jypa'yajcyrra tyãawe'sh na'wẽy ewmée yũucajmenrráac tyã'wẽ yũu. ⁷Tyãa pa'ga i'cue'sha' dyus ïtyimeesatyi' neewe'wenuwe, tyãawe'sh na'wẽ yu'. Tyãawe'sh dyus ïtyimeesaty neewe'weni's na'wẽc pta'shi' Dyus libru': Nasa' wechana fiesta'jya' tacjtyi ũ'na tundyna jĩ'c. ⁸Tyãawe'sh na'wẽ ptamsamée canzh pcal yuuwa'lj ji'pjmeetja'w. Tyã'wẽ yũusa' uuty teech enterráa veintitres mil nasa. ⁹Cytee ũssa maaíi yu' Dyusa's juuna' ũuschawe'wety, atsa' tyã'wẽ we'wepa'ga ul weesweesa wa'cyte uuty. Nava cue'sha' juuna' we'wewa'lj ji'pjmeetja'w Dyusa's. ¹⁰Maaíi yu' Dyusa's atsewe'wety ewmeec yũu jĩna. Atsa' tyã'wẽ we'wepa'ga, Dyus caajni angel tyãawe'shtyi' iviituc. Nava cue'sha' tyã'wẽ atsewe'wewa'lj ji'pjmeetja'w.

¹¹Tyãniitey cue'sh yatsgawe'shtyi tyã'wẽc yũu, atsa' tyã'sa' Dyus librute fi'l'nic neeyũu cue'shva jypa'yacy fi'nzecajn, nmej ensa' utyaana u'juetsa' tyãa pa'ga. ¹²Tyã'wẽ Dyus yacj ew ũstju sũjna yaacysa' jypa'yacywa'ja' pcalte weteya'mée. ¹³I'cue'shtyi pcalte petywa'jsa pa'ja'ne' tyã' u'sesa tjaacue seena' tjẽysameeta', jyucaysa tyã'wẽsarrarráaty ji'pjusatja'w. Nava Dyusa's pi'quine'cue atsa' tyã' i'cue'sh wantäyya' chjächjawa'ljmeesa yu'sa'

caavya'ja'lmeena, wejyva pcalte pētywa'jsa pa'jatspcachja', ma'wē tyāa pcaluj iyuwa'ja'sva ij pu'chjina Dyusa'.

¹⁴Tyāa pa'ga yacjtjē'jwe'sh, dyus ityimeesaty neewe'wenijū casejcain yu'cypejni's mwēese'jwe: ¹⁵I'cue'sha' peecy jii i'cue andya' quij yuupa'ga ne'tca tyā'wē jycaaja' nava andy we'weni's mpa'yajcywe.

¹⁶Ūus miiyajcywe: Cristo' uutsrra' tyajy eea's pcawcu atsa' tyāa uuni's caayaqui'jsa vasotewe'sha's jypa'garra oraī'tja'w. Tyā'wē yūunisa' Cristo yacj utyaarra tyāa yacj tyutemeetja'w fi'nze' jīnisa'. Tyā'wēy Cristo' uuya' tyajy cacue's ducju atsa' tyāa uuni's caayaqui'jsa pana's pe'l'tenderra jytyunde'tja'w. Tyā'wē yūunisa' Cristo yacj utyaarra tyāa yacj tyutemēe ijtja'w fi'nze' jīnisa'. ¹⁷Macue wala cujrrava teech pana'srrāa jyucaysatja'w ū'we', tyāasatja'w teechrrāa na'wēsa yuuna pa'ja'.

¹⁸Miiyajcywe Israelwe'shtyi. Tyāawe'sha' Dyusna wechaya' tajcy icjni chicha's ū'sa' Dyus yacj tyutemēe fi'nzesarraty tyā'wē yū'. ¹⁹Tyā'jīte', tyā'wē yūuya' tajcy icjnisa chichte quij pēetjebene' sūjcain tyā'jītsmeetj, tyāa pa'gatey dyus ityimeesa' quijva meesata'. ²⁰Tyā'wēteva, dyus ityimeesaty wechaya' tajcy icje'ty Dyus cielutewe'sha's jiimeesa', atsa' tyā'wē yūuni' dyus ityimeesarrāaty wechanisame', echtjē'ja's wechanisa'. Atsa' i'cue'sha' tyā'wē echtjē'j yacj utyaarra fi'nzenuwe jīrratj tyā'wē we'we'. ²¹Tyā'wē echtjē'j yacj utyaarra wechana ūsrra', Cristo puutsni mesatewe'sha's yu' jypa'gaya' ājameene'cue. ²²Cue'shtyi jype'jsa Jesucristo's caaūuscha'jwa'jsameetja'w cue'sha', tyāa pa'gatey tyāate jytjaacue chjāchjasameetja'w naa pa'ga.

Quijnava ū'ya' ājawa'jsatja'w, nava jypa'yacywa'ja' vitety peeygājrra

²³Isa cue'sha' quijnava ū'ya' ājawa'jsa yujtja'w, nava jypa'yacywa'j jī'ptja'w. Macue quij ū'nava ū'ya' āja'nja'w nava tyā' Dyus yacj chjāchja fi'nzewa'j yu'sa' pu'chji'tsmeeta'. ²⁴Peecy fi'nzewa'jrrā's yajcymēe, vitetyva peeygāawa'ja' ew cfi'nze'jya'.

²⁵Mercaute chich ma'wēsanava weyrra maa sūjmēe ū'wa'ja', ²⁶tyāa pa'gatey Dyus jīirrarrāata' naa quiwe, tyā'wēy naa quiwete ūssa quijquijva jyuca.

²⁷Meerra' Dyusa's jiimeesa pi'cyte', i'cue'sha' u'jrra quij puutsteva tyā'sa' ū'werrāane'cue maa sūjmēe. ²⁸Nava Dyusa's achamēe ew jiisa' na'ljina we'wena: Naa chicha' dyus ityimeesaty wechanisa' na' ewmeena jīte', indya' tyā'sa' ū'meene'nga, tyā'wē pta'shsa's caypumba'jya'mēe. ²⁹Vitesa ūus yaacyni's jypa'yacycajntju we'we', iindy ūus yaacyni's we'wetsmeetj.

Nava Dyusa's shiingmēe ew jiisa' na'wē pēyina: Andy quijnava ū'ya' ājani's ¿quij yūurra vitesa neeweya' ājacy? ³⁰Andya' quij ū'wetsrrava Dyusa's wechana orāyrratj ū'we', atsa' andy ū'ni's ¿quij yūupa'ga ewmēe nuywe'wetyqui? jītyina. ³¹Ew yuja', nava i'cue'sh ū'nisa ma'c

yuu quĩj yũutsrrava Dyus dyi'pte selpiwa'jsarrá's tjengrra cytey myũuwe. ³²Judiuwe'sh vite' judiumeesa, meerra' Dyus luuch maatyva caypumba'jwe'shte' mpa'yajcywe. ³³Andya' na'wẽrráatj pa'pchu': peecy wẽt fi'nzewa'j yu's yajcymée, vitesaty pu'chwa'ja'srráatj pacuena fi'nze', tyāawe'sh ũusa' ewte neeyũucajn.

11 ¹Andyva ma'wẽtca Cristo fi'nzeni's tjengrra fi'nze', tyā'wẽy i'cue'shva andy fi'nzeni's tjengrra mfi'nzewe.

U'ya' cultote jypa'yacywa'j ji'pja'

²Yacjtjẽ'jwe'shtyi wecha'tj andya's pechcanamée yajcyrra andy caapiya'jnityi' cytey yuuna fi'nzepa'ga. ³Nava na'wẽsa'sva mjiyuwe: Cristo' Dyusa's nwẽese'jsa', atsa' pitstjẽ'jwe'sha' Cristo's nwẽese'jwa'jsata', atsa' u'ywe'sha' nmi'ty nwẽese'jwa'jsata'. ⁴Tyā'wẽ yũuwa'jsarra' maa pitstjẽ'jwa chua'a's qui'pmée cultote orāyna Dyus yuwe's pta'shna ũsrra', Cristo's weechsa yuuni'. ⁵Tyā'wẽy maa u'yva dyictje's ya'patjmée orāyna Dyus yuwe's pta'shna ũsrra', tyajy nmi'a's weechsa yuuni'. Tyā'wẽ ya'patjmeete', dycjasa's cwaaca'jni na'wẽsa'. ⁶U'ya' tyā'wẽ ya'patjetsmée yā'jrra', teejwend dycjasa's tee cwaaca'j. Nava u'y tyā'wẽ dycjasa's cwaaca'tje' tjaamewechte', tee ya'patj tyajy dyictje's. ⁷Pitstjẽ'ja' dyictje's ya'patjwa'jsame', tyāa pa'gatey Dyus wendyrrac tyāa na'wẽysa vit, tyajy jycaajnity nwẽese'jwa'jsa. Naapcachja' u'ya' pitstjẽ'j jycaajnity nwẽese'jwa'jsa'. ⁸Dyusa' pitstjẽ'ja's taqui'jitsrra', u'y cacuejuwe'sha's cutyi'jrra pjeu'jme', wejyva pitstjẽ'j cacuejuwe'sha's cutyi'jrrac u'ya's pjeu'j. ⁹Pitstjẽ'ja' pu'chwa'jsa peejycu yu', tyāa pa'garráac u'ya' pjeu'jni yuu. U'y tyā'wẽ pu'chwa'jsa peejyte pitstjẽ'ja's pjeu'jni yuume'. ¹⁰Tyāa pa'ga u'ya' pitstjẽ'ja's nwẽese'jwa'jsa' jĩni dyictjete ya'patjnisa ji'pjuwa'ja'. Tyā'wẽ ya'patjwa'jsarra' cytey yuumeete', Dyus angeleswe'sh tjengna ũsta'. ¹¹⁻¹²Tyā'wẽteva, ew ũus yajcyte yu', maa yujva tjaacuesameeta', tyāa pa'gatey pitstjẽ'jvatsva u'y cacuetemée peecyrráa yu' naa quiwete upyya' āja'tsme', tyā'wẽy u'yva pitstjẽ'j ji'pjmée peecyrráa yu' naa quiwete upyya' āja'tsme'. Isa yuja' u'ya' pitstjẽ'j cacuejuwe'sha'scu pjeu'jni yuu, tyā'wẽy pitstjẽ'jwa u'y cacuetec upyya' āja'. Tyāasa maa yujva tjaacuesamée, e'nzĩ Dyus pjeu'jnirrarráata'.

¹³Tyā'wẽ' naa pa'ga i'cue'sh pwe'sh ũus miiyajcywe, aan ewna tyā'wẽ Dyusa's orāitsrra u'ya' dyictje's ya'patjmeete. ¹⁴Pitstjẽ'ja' peecy yuu dycjas jyu'j ji'pjuwa'jmeesarra tyā'wẽ cju'ja'tje', tjaame yuja'. ¹⁵Nava u'y tyā'wẽ dycjas jyu'j ji'pjte', zhichcuesa'. Tyāa pa'gatey dyictje's apjwa'jĩrráac dycjas jyu'j nviitni yuu. ¹⁶Nava maafi yu' dyictje's ya'patjwa'ja's jycaajni's wa'lsa ũsrra', peecy ũus yaacywa'j ji'pja'. Tyā'wẽme' cue'sh vite' Dyus luuch msuuwe'sh maa yujva jiimeeta' dyictje's ya'patjmée Dyusa's orāyni yu's.

Ewmée yūuya'rráa Santa Cena's ū'ya' pcjaacjeni

¹⁷Na'wēsana pta'shna fi'jatsrra', i'cue'sha' ew yūusa i'cue jīna wechaya' āja'tsmeetj. I'cue'sha' Dyusa's wechaya' pcjaacjeni' selpiipcachte, wejy suwsarráana sūju'tj. ¹⁸I'cue'sha' Dyusa's wechaya' pcjaacjtsrra', bagachteva i'cue'sh pwe'sh puuty fiifii tyuteeya'rráaty pcjaacje' jī'ty atsa' tyā'wē pta'shni' isa yujna sūju'tj. ¹⁹Pcjaacjesa i'cue'sh pwe'sh tyā'wē fiifii tyuteni' ew yujna, tyajírráa mtee pcjaacjesa wejy Dyus yacj ew fi'nzesateva ya'jiyuna. ²⁰Nava Jesucristo mesatewe'sha'stja'w jypa'ga' jītsrra tyā'wē fiifii tyuteerra ūsni' tyā' Dyus jytjāasnime'. ²¹Tyāa pa'gatey i'cue'sha' ij pcjaacjerra ja'ndarra'j ū'wa'j en ājatspcachja', puuty fii tyuteerra maafi' yu' yatste ū'we'i'cue, vite jīi yu' nvijtmée. Atsa' viterráa tyicpcach meerrava tūunus tundyte', vite yu' ū'wa'j ji'pjmeety wēena neeyū'. ²²Tyā'wērráa yūutsrra', i'cue'sh yat-suyva ū'wa'jna. Tyā'wēme', vite ū'wa'j yu' nvijmeerra', cyūusu'ju'i'cue, atsa' puuty yaatsenirráac caseje'. I'cue'sh tyā'wē yūuna ūste', andya' i'cue'shtyi' ew yūuna ūsi'cue jīna ¿wechaya' ājama'tj? Na'wērráa yūute', wechaya' ājame'nja.

Santa Cena's ū'wa'ja's Cristoc caapiya'jrra nvijt

²³Andya' i'cue'shtyi' caapiya'tj nava Jesucristo andya's ma'wē caapiya'tje' tyā'wēyrráatj caapiya'j tyā' na'wē': Jesusa's icjcajn ducjwa'j cus ājatste', tyāa cusutste pana's cusete jypa'gac. ²⁴Sa' Dyusa's wechana orāyrra', pe'ltenderra na'jīc: Mē'we. Naa pana' andy cacue's i'cue'sh pa'gate pe'ltendenisa na'wēsa'. Tyā'wē myūuwe andy pytjaa yuurra uuni's bagachteva yajcyya'. ²⁵Ū'na jyā'jrra', tyā'wēy vaso's jypa'garra na'jīc: Andy eea's pcawrra yuurráa i'cue'shtyi nwe'wewa'ja's Dyusa' u'se pjeu'jrra nvijtcu. Atsa' naa vasotewe'sha' andy ee i'cue'sh pa'gate uwusáa na'wēsa'. Tyā'wē tundy iisa andy pytjaa yuurra ee pcawni's bagachteva caayaqui'jwa'jsa' jīnac caapiya'j. ²⁶Tyā'wē yā'tje', bagachteva naa pana's ū' iisa, naa vasotewe'shnava tundy iisa i'cue Jesucristo uuni's yajcyna nes yu', tyāa shawendna quījpcach.

Santa Cena's jypa'gaya'varra' na'wē yūuwa'ja'

²⁷Tyā'wē maava Jesucristo caapiya'jni's quījvameesa na'wē Dyusa's yajcymée maa sūjmée vāa pana's ū'na vasotewe'shnava tundiityna atsa' tyā'wē yūusa' pcalte wetesá yuutyna, tyā'wē Jesucristo cacue vite' tyajy ee na'wēsa's quījteva seelpimeesa na'wērráa yūupa'ga. ²⁸Tyāa pa'ga ūus miiyajcywe teechea na'wērraj pan vite' vasotewe'sh tyāaty jypa'gamey. ²⁹Tyā'wēme' nuste wetewa'ja's peequí pacuesáa yuutyna, tyā'wē Jesucristo cacue vite' tyajy ee na'wēsa tyāaty quījteva seelpimeesa na'wē maa sūjmée jypa'gapa'ga. ³⁰Tyā'wē jypa'yacypa'gamée i'cue'sh cshavytewe'sh maafi' yu' ātsa'na chjāchjamée ūsta', naapcachja' vite' uuna ūsta'. ³¹Peequí wala

jypa'yacyna fi'nzevatsa', tyā'wē ñuste wetewa'lj en pa'ljmeena. ³²Nava Dyusa' cue'shtyi peeygājrrac castigo caja', qui'quin tyā'sna pacuete', bagachte yujva Dyus yacj puuty uywa'ljmeesawe'sh yacj caajya'mée.

³³Na'wē! atsa' āchja' andy yacjtjē'jwe'sh, Jesucristo mesatewe'sha's ũ'ya' pcjaacjtsrra', teechsa na'wērraj puuty ya'peeygājna ja'ndarraj ũ'ya' mūytjaswe. ³⁴Maafi yu' wala wēesa ũsrra', tyajy yatte ũ'wena, tyā'wē puuty ya'peeygājmée pcjaacjete', Dyus castigāywe'shte. Vite yuwe ũsta' tyāatyi's andy pa'ljrra pjeu'ju'nja.

Dyusna selpiiwa'ja's Dyus Espiritu' nasa iisa fifyfyrraj ũsni

12 ¹Na'wē Dyus Espiritu' nasa iisa fifyfyrraj Dyusa's selpiiya' ājawa'ja's ũsu'c tyā'sna pta'shya'vatj, atsa' yacjtjē'jwe'sh jypa'yacy mwēese'jwe.

²I'cue'sha' ew jii i'cue Dyusa's jiyumeyrra', naa quiwete dyus ūtymeessaty i'cue nwēese'jna fi'nze'. ³Tyāa pa'ga āchja' ew mjiyuwe: Jesusa' seena' ewmeesa' jīna atsewe'wesa' Dyus Espiritu cwe'we'tje we'wesameena. Sa' tyā'wēy Jesusa' andyna jype'jsa' jīna we'wemeena quim yujva, tyā'wē Dyus Espiritu cwe'we'jmeete yu'.

⁴Quijva yūuya' ājawa'lj ũsta', atsa' nasa' tyāaty jypa'gatyna. Nava tyāa ājawa'ljty ũssa yu', Dyus Espiritu teechrrá'. ⁵Ma'wēva selpiwa'lj ũsta', atsa' nasa iisa macue fifyfyrraj selpiitsrrava, teech Dyusrráanatja'w selpi'. ⁶Ma'wēva fifyfyrraj mjīiwa'lja ũsta', nava teech Dyus yuurráac fifyfyrraj mjīiwa'lja'sva caapiya'ja'. ⁷Nasa iisa fifyfy selpiwa'ja's Dyus Espiritu' jyucaysaty peesu'scu, nasaa nwe'shtyi pu'chna fi'nzecajn. ⁸Dyus Espiritu' maafītyi' Dyus yuwe's jypumbamée jiyuya' ājawa'ja'scu ũsu'. Tyāa Espiritu' fīrráa maafītyi' ma'wēva yu'cypejya' ājawa'ja'scu ũsu'. ⁹Tyāa Espiritu' fīrráa maafītyi' Dyusa's ũuste jypumbamée yaacywa'ja'scu ũsu'. Vitetyi's ātsa'saty nuychjāachjawa'ja'scu ũsu'. ¹⁰Maafi yu' quim yujva ājanimeesa's ājawa'ja'styi jypa'ga'. Sa' vitetyi's Dyus quīj yūuya'vateva dyiicjēy jiyurra pta'shya' ājawa'ja'scu ũsu'. Vitetyi's maa tyā'wē Dyus Espiritute', vite' maa Dyus Espiritumeeteva jiyuwa'ja'scu ũsu'. Atsa' vite' jypa'ga'ty yuwe fiysaju we'weya' ājawa'ja's, naapcachja' vite' tyāa yuwe fiysaju we'weni's āate pta'shya' ājawa'ja'styi jypa'ga'. ¹¹Nava tyā'wē nasa iisa fifyfy selpiiya' ājawa'ja's ũssa' Dyus Espiritu teech yuurrá'. Tyāa yuurráac teechsa na'wērraj quīj mjīiya' ājawa'jsateva tyāaty ũsu'.

Jyucaysa teechsa cacuetewe'shrrarráatja'w

¹²Cacueva ma'wē teechrráarrava cuj jwend ji'pjna fifyfiysa, atsa' Cristova tyā'wēysa'. Macue cuj jwend fifyfiysarrava, cyanzii teech cacuetewe'shrráata'. ¹³Dyus Espiritu tyā'wē cue'sh ma'wēsatyva Cristo tashterrarráa cuutya'tje', teech cacuetewe'shrráatja'w yuu. Judiu ma'c yuu meerra' judiumée ma'c yuu, selpiisáa ma'c yuu meerra'

selpiisamée ma'c yuu nava tyāanzcuēesay Dyus Espiritu teechrráa ūsa' tyāarrarrá'stja'w jypa'ga' jyucaysa.

¹⁴ Cacue' teech jwendsa yacjrráa cacue yuuna pa'ja'tsme'; wala kuj jwend ji'pja'. ¹⁵ Chinda' we'wevatsa', na'ljina: Andya' cusemeetj, sa' tyāa pa'ga cacuetewe'shmeetj jina nava tyā'wē cusemeerrava cacuetewe'shírrá'. ¹⁶ Meerra' tjū'wē' we'wevatsa', na'ljina: Andya' yafymeetj, sa' tyāa pa'ga cacuetewe'shmeetj jina nava tyā'wē yafymeerrava cacueteywe'shírrá'. ¹⁷ Tyā'wē cacue' jyuca yafyrrarráavatsa', ¿ma'wē wēse'jya' ājacytja'w? Meerrava cacue' jyuca wēse'jnisarrarráavatsa', ¿ma'wē jyputaya' ājacytja'w? ¹⁸ Nava Dyusa' cue'sh cacuetewe'sh kuj jwendcu qui'p, quijrrajne' peejy yu' tyāatyí' jyuca. ¹⁹ Teech jwendsarráavatsa', ¿ma'wē cacue' selpiiya' ājacy? ²⁰ Tyā'wē cacuetewe'sha' kuj jwendsarrava teech cacueterrarráaty jyucaysa selpi'.

²¹ Yafya' cuse's we'werra': Indya'sa' jypeejymetj ¿jīya' ājama'c? Tyā'wēy dyictjeva chindaty we'werra': Indya'sa' jypeejymetj ¿jīya' ājama'c? ²² Tyā'wēmée wejyva cacuetewe'sh quijteva seelpimeesa na'wērrava, tyāáírráa jytjaacue jypeejysata'. ²³ Cacuetewe'sh jytjaacue yu' peejinimeesava ūsta', macue tyā'wēteva tyāatyva jypa'yaqui'tja'w. Sa' tyacue zhichcue pjeu'jna jype'jwa'jmeesa'sva ewtja'w pjeu'ju', jytjaacue yu' peejymeesa na'wēsateva. ²⁴ Dyusa' tyā'wēc jwee peejymeesa na'wēsatyva qui'pna cacue's pjeu'j, tyāáírráa jytjaacue selpiwa'jsa. ²⁵ Tyā'wē cacuetewe'sha' puuty yajtsemée cyaanzcuēy ja'ndarra'j puuty ya'pu'chwa'jsata'. ²⁶ Cacuetewe'sh teech jwendsa pytjaa yuutste', viteva jyucaysa űus pu'chji'ty. Cacuetewe'sh teech jwendsa peeygāani yuutste', viteva wechwechaty yaacy pu'chji'.

²⁷ Áchja' mjiyuwe: i'cue'sha' nasa iisa teechsa na'wērraj Cristo cacuete selpiisáa i'cue. ²⁸ Tyāa pa'gac Dyusa' tyajy luuchtyi' fiyfiy selpiwa'ja's peesu's teechsa na'wērraj: Nyafytewe'sha' Cristo jycaajnisawe'shtyi yuu. E'stewe'sha' Dyus quij yūuya'vateva dyiicjēy jiyurra pta'shwa'jsaty nviitni yuu. Tecjtewe'sha' caapiya'jwa'jsaty nviitni yuu. Tyajū' quim yujva ājanimeesa's ājawa'jsaty nviitni yuu. Naapcachja' vite' ātsa'saty nuychjāachjaya' ājawa'jsaty nviitni yuu. Vite' quijterrāava pu'chya' ājawa'jsaty nviitni yuu. Vite' jycaajwa'jsa nviitnity yuu, naapcachja' vite' yuwe fiysaju we'weya' ājawa'jsaty nviitni yuu. ²⁹ Jyucay yu' Cristo jycaajnisatewe'sh yuumeeta'. Jyucay yu' Dyus quij yūuya'vateva dyiicjēy jiyurra pta'shsa yuumeeta'. Jyucay yu' caapiya'jsa yuumeeta'. Jyucay yu' quim yujva ājanimeesa's ājawa'jsa yuumeeta'. ³⁰ Jyucay yu' ātsa'saty nuychjāachjaya' ājawa'ja's jypa'gasa yuumeeta'. Jyucay yu' yuwe fiysaju we'weya' ājawa'jsa yuumeeta'. Jyucay yu' tyā'wē yuwe fiysaju we'weni's āate pta'shya' ājawa'jsa yuumeeta'. ¿Tyā'wē meetyna' vacy? ³¹ Selpiiya' ājawa'j maarraj wejy tjaacue peejysatyna tyāaty mpaacuewe. Nava andya' tyāate jweeírráa tjaacue peejysa's pta'shya'vatj.

Peeygāanisa yuurráa quĩjteva tjaacue walasa'

13 ¹Andya' macue seena' wala zhichcue we'weya' jii yu'nja naa quiwete nasa walasa na'wē, tyā'wēy angeleswe'shte ja'nda, nava peeygāawa'l yu'sa' ji'pjmée yu'nja atsa' andy we'weni' quĩjte yujva selpiimeena. ²Dyus quĩj yūuya'vateva dyiicjēy jiyuya' ājawa'ja's ji'pj yu'nja, sa' quim yujva jiyunimeesa quĩjquĩjnava jyuca jiisa yu'nja, sa' tyā'wēy Dyusa' pu'chjina sūjwa'l yuurrá's ūuste yajcyrra vits walatyva fiite qui'pya' ājawa'ja's ji'pju'nja, nava peeygāawa'l yu'sa' ji'pjmée yu'nja atsa' macue tyā'wēsarrava quĩjte yujva seelpimeesa yu'nja. ³Tyā'wēy andy ji'pjuni's quĩjquĩjnava jyuca jytyuunde'nja, sa' andy cacue yujnava cambcajn ducjma'tj, nava peeygāawa'l yu'sa' ji'pjmeete', cyul yuj tyā'wē ya'yuuna.

⁴Maava peeygāawa'ja's ji'pjsa', ūuscha yaaquitsme', maa yacjva jyuca ewsa', maa yujtyva atse'tsme', iivejch yaaquitsme', iivejch we'we'tsme', ⁵vitye juuna' yū'tsme', peecy wēt fi'nzewa'l yu's pacue'tsme', ūuscha'tsvame', atseyaaquitsme'. ⁶Pcalte vite weteetste', tyāawe'shtyi npeevyshijcana wecha'tsme', naasáa ew fi'nzenirrá'scu wēt wēt yajcyna wechál. ⁷Macue quĩjva tjēysa pa'tjeva ūucj yajcymée peeygāawa'jrrá's ji'pjrra' jyucac wantaí', Dyusa' pu'chjina sūjna.

⁸Dyus quĩj yūuya'vateva dyiicjēy jiyurra pta'shna fi'nzenisa' ptsuwa'l en ājana, atsa' peena yu' tyā'wē yūuwa'l peejymée yuuna, atsa' yuwe fiysajuva ya'we'wemeena. Quĩjteva jyuca jiitj sūjnisava ptsuuna. Nava peeygāanisa yu' bagachte yujva ptsumeena. ⁹Tyāa ptsuwa'jsa le'chcuesarráaty jypa'garra ji'ptja'w, tyāasatja'w jyuca pta'shya' yu' āja'tsmée. ¹⁰Nava quĩjteva peejymée jyuca jiyuwa'l en ājte', tyāa ptsuwa'jsa le'chcuesaty ji'ptja'w tyā' scjēuutyna.

¹¹Andya' luuchteya' jiimée luuch we'wenirráaty'tju we'we', sa' luuch ūus yaacynirráaty'tju ji'pju', sa' luuch na'wērráatj jii fi'nze'. Nava jyuca tjē'jsa yuuna cājrra', luuch na'wē jiimée fi'nzeni's nvijtju. ¹²Tyā'wēy fírráatja'w āchjíi yu' ew jiyu'tsmée, chji'ndyte speejute tjengte ma'wē pshūurráa vyaacy tyā'wērráatja'w uyu'. Nava quĩjte yujva peejymée jyuca ew jiyuwa'l en ājte', seena' ew puuty pdyi'p āate uyu'nja'w. Āchjíi yu' jyucamée le'chcuerráa jiitj. Nava tyāa jyuca jiyuwa'l en ājte', quĩjte yujva peejymée jyuca jiyu'nja Dyusva ma'wē andya's ew jiina tyā'wēy. ¹³Cjĩ'jii pta'shtju tyāarráa ptsuute', na'wēsa tecj ūsta' tyāa yu' bagachte yujva scjēwwa'jsameeta': Dyusa' pu'chjina sūjna yaacynisa, vite' Dyus yacj puuty uywa'ja's ūytjasna fi'nzenisa, vite' peeygājna fi'nzenisa. Nava tyāa tecjsaty cysustju tyāate tjaacuesa' peeygājna fi'nzenisa'.

Yuwe fypsaju we'weni' nasaty' selpi'tsme'

14 ¹Nyafyte' peeygāawa'ja's cjuē'y wejy tjaacue mpa'pchuwe. Tyāa e'su mpaacuewe ma'wē selpiwa'ja'sva Dyus Espiritu ūsu'c tyāaty. Nava i'cue'shtyi Dyus we'weni's pta'shya' ājanisarrāa wejy seelpisa'. ²Tyā'wēme', maava yuwe fypsaju we'wesa' nasa yacjmée, Dyus yacjrrāa ne' we'we' jiyuwa'jmeesa's Dyus Espiritu cwe'we'jni, atsa' quim yujva jiyu'tsmeeta'. ³Naapcachja' i'cue'shtyi Dyus we'weni's pta'shsa', naa quiwete nasaty caajiyu'ju'c Dyus yacj chjāchja fi'nzewa'ja's vite' űuste fi'nzetsteva cwiisha'jna. ⁴Yuwe fypsaju we'wesa' peequfirrāc Dyus yacj chjāchja fi'nzewa'ja's ya'jypa'ga'. Nava Dyus we'weni's vitety pta'shsa', Dyus luuchtyi cchjāachja'jsa'.

⁵Yuwe fypsaju we'weya' jyucaysa ājavatsa', wala yuj ewna sūju'tj andya'. Nava Dyus we'weni's vitety āate pta'shya' ājani'stju wejy tjaacue jytjāasu'. Tyā'wē yūunisarrāa tjaacue ewsa'. Meerra' tyā'wē yuwe fypsaju we'wesa ūste', pucate vite āate caajiyu'tje yu' ew yujna, tyā'wē yu' Dyus luuch jiyutyna Dyus yacj chjāchja fi'nzewa'ja's.

⁶Yacjtjē'jwe'sh, ūus miiyajcywe: Andy pa'jrra yuwe fypsaju we'wete', i'cue'sha' ¿quijrrā' jiyuya' ājama'cue? tyā'wē cue'sh we'wenimée yuwejurrāa we'wete'. Nava Dyus we'weni's pta'shittersra', cue'sh we'weni yuweju caapiya'jna āate caajiyu'tje yuurrāa i'cue'sha' ew jiyune'cue Dyus jycaajnyty.

⁷Na'wēsaty miiyajcywe: música tucanisa cuvy vite' cytala tyāaty ma'wēva csuusu'tje', ya'jiyumeena mem ma'wēsa's tucatsteva. ⁸Tyā'wēy guerrate puiiya' u'jwa'ja's ew caajiyu'jna corneta's āate tujcameete', quim yujva jiyumeerra' pjeu'jmeetyna puiiwa'ja's. ⁹I'cue'sh yacjva tyā'wēyrrā'. Yuwe fypsaju we'wete', ¿ma'wē ya'jiyucy quij we'wetsteva? Ya'jiyumeena atsa' cyul yuj yuuna. ¹⁰Isa naa quiwete' yuwe ma'wēsava ūsyujta'. Nava maa yujva tyāawe'sh pwe'sh puuty we'weya' ājanimeesa yu' meetyna. ¹¹Maava andy yacj we'wetsrra', andy we'weni yuwe jiyunisaju we'wemeete', tyāa yacja' puuty we'weya' ājame'nja nasa fiysa na'wē. Atsa' tyāava andy yacj puuty we'weya' ājameena nasa fiysa na'wē. ¹²Tyāa pa'ga i'cue'sha' nacue wala quijya'va ājawa'ja's pacue'i'cue na' Dyus luuchtyi cchjāachja'jwa'jsarrā's mpaacuewe.

¹³Tyā'wē yā'tje', yuwe fypsajurrāa we'wesa' Dyusa's mpi'cywe tyāa yuwe fypsaju we'weni's nasaty āate caajiyu'jya' ājaya'. ¹⁴Tyā'wē yuwe jiyunimeesaju Dyusa's orāyrra', ūuste yu' Dyusa's yajcyna tyā'wē ya'yuuna, nava quij we'werrava tyāa yu'sa' ya'jiyumeena. ¹⁵Tyā'wēte', ¿ma'wē wejy ewqui? Ūusterrāa Dyusa's yajcyna tyā'wē yūumée, quij we'wetsrrava tyā'snava jii tyā'wē yuuní wejy ewna. Meerrava Dyusa's yajcyna memuutsrra', tyā'snava yuwe jiyunisaju memwa'jna. ¹⁶Indya' tyā'wē yuwe jiyunimeesajurrāa Dyusa's wechana tuutje'jene'nga atsa'

nasa jiimeecuesa cyte ũssa' indy yacj ja'nda Dyusa's wechana tuutje'jya' ājameetyna, quīj we'wetsteva jiyumeerra'. ¹⁷Dyusa's wechana orāyni' indy yacj yu' wala yuj ewna, nava vite yu'sa' selpiimeena. ¹⁸Dyus pu'chte andya' vite yuwe fysaju we'weya' i'cue'shte jytjaacue jiitj. ¹⁹Nava yuwe jiyunimeesaju wala jyu'j we'wena ũs na'wē', wejyva Dyus luuch cshavyte ũsrra', yuwe jiyunisaju jyu'jmeecuerrāa caapiya'jna we'wevatsrrāa ewna sūju'tj.

²⁰Yacjtjē'jwe'sh, luuch le'chcuē na'wē yuuna fi'nzenuwe. Naasāa ewmēe yūuwa'j yuurrā's quīj yujva yajcymēe mfi'nzewe luuch le'chcuē na'wē. Nava jypa'yacy fi'nzewa'j yu's tjē'jsa na'wē ew yajcyna mfi'nzewe. ²¹Yuwe fysaju we'weni' tjaacue selpiwa'jme's Dyus librute na'jī'c: Vite ajūwe'shtyi cwe'we'je'nja yuwe jiyunimeesaju naa nasaty pta'shna. Nava macue tyā'wē yūuteva, nwēese'jmeetyna jī'c. ²²Tyā'wē yuwe jiyunimeesaju we'wenisa' Dyusa's weechsawe'sh Dyus ũsyujna sūjna caayaqui'jwa'jsarrā', sa' Dyusa's jiiyā'jsawe'sh jīi me'. Naapcachja' Dyus we'weni's pta'shya' ājanisa', Dyusa's jiisa ũstyna tyāawe'sh jīirrá'. Dyusa's weechsawe'sh jīi me'.

Quīj yūutsrrava teech teechrroj we'wewa'ja'

²³Tyāa pa'ga Dyus luuch jyucaysa pcjaacjerra cyanzīi yuwe fiysa yacj susna ũste', maafī yu' Dyus Espiritu cwe'we'jniteva jiimeesa cūjrra', luucu yuuna ũsta' ʒjīmeema'c? ²⁴Nava jyucaysa Dyus we'weni's āate pta'shna ũsune'cue atsa' maafī yu' ecajuwe'sh cūjrra ũssa' jiyuna tyajy pcalte fi'nzena ũsni's, i'cue'sh tyā'wē Dyus we'weni's āate pta'shna ũspa'ga. ²⁵Tyāa pa'gatey i'cue'sh āate we'weni' tyajy ũus yaacynityi' cpaaquityna, atsa' quīitsjurra Dyusa's na'jīna wechaana: Dyusa' isa i'cue'sh yacj yuj ũsu'ga jīna.

²⁶Tyā'wē yā'tje', na'wē myūuwe yacjtjē'jwe'sh: i'cue'sh yacj pcjaacjena ũssa maafī yu' Dyusa's wechana memwa'j vāa jī'pjtyna, vite' caapiya'jwa'j vāa jī'pjtyna, meerrava Dyus we'weni's vāa caajiyu'jwa'j jī'pjtyna. Naapcachja' vite' yuwe fysaju vāa Dyusa's wechawa'j jī'pjtyna, meerra' tyāa yuwe fysaju we'weni's vāa āate pta'shwa'jsa ũstyna, atsa' tyā'wē yūuteva, ew yujna Dyus luuchtyi selpiwa'jsate yu'. ²⁷Yuwe fysaju we'wetsrra', e'nz meerra' tecj cyanzrrāa we'wewa'ja' teech teechrroj. Nava tyāa yuwe fysaju we'wenisa's āate caajiyu'jwa'jsa ũsterrāa tyā'wē yūuwa'ja'. ²⁸Nava āate caajiyu'jwa'jsa quimva meete', yuwe fysaju cuch we'wenuwe tyāa pcjaacjenite. Cyāanpasa' yuwe fysaju Dyusa's wecha wējetsrra', iindy ũusterrāa wechana mneeyūu. ²⁹Meerra' Dyus we'weni's pta'shwa'j vāa yuuna nava e'nz tecj cyanzrrāa mwe'wewe, naapcachja' wēse'jna u'psa' jypa'yacy wēse'jetyna Dyus we'weniteva jiyuya'. ³⁰Meerrava wēse'jna u'psa's Dyus we'weváana pta'shcajn, atsa' yatste we'wesa jyā'jpcach ũytjasrra we'wewa'ja'. ³¹Tyā'wē Dyus

we'weni's jypa'gasa' jyucay pta'shya' ājane'cue, nava vite we'wena jyā'jpcach ūytjasrra teech teechraraj. Tyā'wē yūute!, jyucaysa piyarra Dyus dyi'pte wejy chjāchja fi'nzene'cue. ³²Tyāa pa'gatey Dyus we'weni's jypa'gasawe'sha' tyāawe'sh ūus yaacyni's jypa'yacywa'ja', ma'wēva ūusutjeni's we'wemée. ³³Tyā'wēme!, Dyusa' tyā'wē caypumba'jna susna ūswa'jsame!. Ma'wēta Dyusa's yaacysa msuuwe'shva susmée fi'nze!, tyā'wēy fi'nzewa'ja'.

³⁴U'ywe'sha' pcjaacjena ūsni cultote! paapējyna susna ūswa'j ji'pjmeeta!. Tyā'wē yūumée, jypa'yacy wēse'jwa'j ji'pjta' culto qui'putste!, Dyus ley ma'wē jycaatje' cytey yuuna. ³⁵Quij paapēywa'j ji'pjrra', yat-su pa'jrra tyāawe'sh nmi'ty pēyityna. Wej yujva ewme! u'ywe'sh tyā'wē cultote susna ūste!.

³⁶I'cue'sha' iwejch yajcyna ma'wēva yuuwa'j ji'pjmeei'cue. Tyā'wē yuucajmenī Dyus yuwe! i'cue'sh tashu nyafyraraj casejme!, atsa' i'cue'shrrāa Dyus yuwe's jiisa ūsmeei'cue. ³⁷Na'wē we'wena fi'ljatstju tyā' Dyus jycaajni'ta', atsa' Dyus we'weni's jiyusa ūsvá'cue meerra' Dyus Espiritu caaūusutje'jni's jypa'gasa ūsrra!, peecy mjiyuwe. ³⁸Nava tyā'wē jycaajna fi'jnityi' cytey nwēese'jmeena atsa' tyāa nwēese'jsame's jypa'gameete ewna.

³⁹Yacjtjē'jwe'sh, na'wē myūuwe: Dyus we'weni's āate pta'shwa'jrrā's wejy miiyajcywe. Nava yuwe fiysaju we'weni's yup yu' meerrava, ⁴⁰cultote quījva susmée zhichcue teech teechraraj we'wena meswe.

Jesucristo qui' ĩtyi yuuni

15 ¹Āchja' na'wē Cristo yuwe ewte nviitwa'jsa's pta'shtju tyā' ma'wēsateva ew caajiyu'jya'vatj yacjtjē'jwe'shtyi. I'cue'sha' tyāa pta'shni's jypa'garra tyāajū tyutemée ūsi'cue. ²Tyāa Cristo yuwe ewsapa'ga i'cue'sha' nwe'weni ewte neeyūuwa'jsai'cue, andy pta'shni's cyulterraámée ūusuj jyuca jypa'garra yu'.

³Cristo yuwe ewte nviitwa'jsa jīni's andyna ma'wē caapiya'tje' i'cue'shtyiva tyā'wēyrrāatj caapiya'j tyā' na'wēc yu': Dyus libroute ma'wēne! fi'jni ūsu' atsa' tyā'sa' cytey yuuna Cristo! cue'sh pcalsa pa'gate uuc. ⁴Tyajū' pendaniic yuu nava tecj ente! qui' ĩtyi yuuc, Dyus libroute ma'wēne! fi'jni ūsu' tyā'wēy. ⁵Qui' ĩtyi yuurra!, Pedro's vyaac. Tyajū' vite tyajy jycaajnisatya vyaac. ⁶Tyāa e'su' yacjtjē'jwe'sh quinientos tjaacuety ūsu' teech ajte tyāatyva vyaac, atsa' tyā'wē uysá' wala cuj nee ĩtyiyta' macue vite! yu' uuteva. ⁷Tyāa e'su qui' vyaarra!, Jacobo'scu vyaa, sa' tyajy jycaajnisatyva qui' vyaac jyucaysaty.

⁸Nmejte' andynava vyaac, andya' en ājmeyp upysa seelpimeesa na'wēsateva. ⁹Tyāasa andya' Jesus jycaajnisatewe'sh vite yacj yu', wala ājmeecuesatj, sa' Jesus jycaajnisatya na'wē yuuva ya'cysuswa'jmeesatj, tyā'wē Dyus luuchtyitj ajtsena fi'nze naa pa'ga. ¹⁰Macue tyā'wēsateva,

Dyusa' andya's peeygājrra tyjityjcu tyajy peeygāani' cyul yuume' andy yacj. Tyā'wēsarrava andytju vitesate wejy jytjaacue mjii. Nava ew yajcyte yu' tyā' andyrrāa mjīnisa yu'tsme', Dyuscu andya's peeygājrra tyutemée ūsu' tyāa pa'garrāatj tyā'wē mjii. ¹¹Nava tyāa yu' quīj yuumeena, Jesus jycaajnisawe'sh ma'ty jytjaacue mjii, meerra' andy ma'tj jytjaacue mjii. Nava jyucaysa fiymée tyā'wērrarrāatja'w Cristo nwe'wewa'ja's pta'shi', atsa' tyā'sna i'cue i'cue'sha' ūuste jypa'ga.

Uusaawe'sh qui' ityi yuuwa'j

¹²Cue'sh pta'shni' Cristo ityi yuuni'scu caajiyu'jni yuu atsa' i'cue'sh yacj ūssa maaí yu' ħma'wēta uusaawe'sha' ityi yuuwa'jsameeta' jīna we'we'? ¹³Uusaawe'sh ityi yuuwa'jsameete', Cristova ityi yuumeene'ga. ¹⁴Cristo ityi yuumeete', cue'sh pta'shni' cyul yujna, atsa' Cristo' cue'shtyi nwe'wesa' sūjna i'cue'sh yaacynisava cyul yujna. ¹⁵Tyā'wē Cristo' ityi yuumée vá' atsa' cue'sha' Dyus dyi'pte i'shiisa yu'nja'w, Dyusa' Cristo's ityi vitcu jīna pta'shpa'ga. Tyā'wē uusaawe'sh ityi yuuwa'jsameete', Dyusva Cristo's ityi vitmeene'ga. ¹⁶Na'jī'tj na': uusaawe'sh ityi yuuwa'jsameete', Cristova ityi yuumeene'ga. ¹⁷Sa' Cristo ityi yuumeete', i'cue'sh ūuste yajcyrra Cristo' cue'shtyi nwe'wesa' sūjnisa' cyul yuj yuune', atsa' i'cue'sh pcala' āchpcach Dyus peltunāynimée ūstyna. ¹⁸Tyā'wē ityi yuumée vá' atsa' Cristo's ūuste jypa'garra uusaawe'sha' vitune'ta. ¹⁹Cristo yacj fi'nzeni' naa quiweterrāa selpiwa'jsate', maateva jytjaacue cyulsa' cue'sh ne'tca'w.

²⁰Nava tyā'wēme'. Cristo' ityi yuuyujc. Uusaawe'sh nyafyte ityi yuusa' tyāac yu'. ²¹Ma'wēga naa quiwete uuwa'jva teech nasate tacj, tyā'wēy uurra qui' ityi yuuwa'jva teech nasatec tacj. ²²Teechsa Adanpa'garrāa jyucaysaty uuwa'ja's ji'pju, tyā'wēy teechsa Cristopa'garrāa jyucaysaty qui' ityi yuuwa'ja'sva ji'pju. ²³Nava tyāawe'sh ityi yuuwa'j en ājte fiifirraj ityi yuutyna. Nyafyte' Cristo cjuē'ycu yatste ityi yuu. Tyāa e'suj Cristo qui' quīijana naapcach Cristo's jypa'garra uusaawe'sh ityi yuutyna. ²⁴Tyāa e'su nmejsa pa'jana, tyajū Cristo' naa quiwetewe'sh vite' cielutewe'sh ma'ty yuu nava quīj yujva nvijtmée jyuca caaptu'ju'jrra tyajy jycaajni's jyuca ducjena Neya's, tyāa yuurraa jycaacjan. ²⁵Nava tyā'wē yuumey yu' Cristo cjuē'y jycaajwa'jsa', tyā'wē Dyusa' atsesa jyucaysaty Cristorrarrá's nwēese'jwa'ja's vitpcach. ²⁶Tyā'wē jyucaysaty Cristorrarrá's nwēese'jwa'ja's vitrra, nmejte' uuwa'ja'sva Dyusa' iviituna. ²⁷Dyus librate we'werra': Jyucaysa Cristo's nwēese'jwa'jsata' jī'c atsa' Dyusva Cristo jycaajni yuuna sūjuvác'ue, nava tyā'wēme'. ²⁸Atsesa jyucaysa Cristorrarrá's nwēese'jetspcachja', Dyus Nchi'c Cristoíiva Ney tashte nwēese'jya' ya'ducjena Ney macue ne' ūs pety tyāa yā'jrra jyuca. Tyā'wē yūute, Dyusa' tyāarrarrāa jycaajana.

²⁹Tyã'wẽ uusaawe'sh ñtyi yuuwa'jsameete', ¿quĩjya'rráata tyã'wẽ ya'bautisaĩ ñtyi yuuwa'ja's yajcyrra?

³⁰Tyã'wẽ ñtyi yuuwa'jmeete', cue'sha' ¿quĩjya'rráatca'w een isa icj wēeni fi'nze', ñtyi yuuwa'ja's pta'shna cyulterraá? ³¹Andya' tyã'wẽ yuj een isa icj wēeni fi'nze'tj tyã' ñshiinime'. Nava, yacjtjē'jwe'sh, Jesucristo's ñuste ji'pji'cue tyãa pa'garráatj tyã'wẽ yu' wechana. ³²Efesotewe'sha' yu'cj ech na'wẽ seena' weesweesata' ji'ty tyãawe'sh yacj iipuiitj. Nava andya' ¿quĩj yūurratca uuwa'ja's ñucju'tsmée? Tyã'wẽ uuyã'jrra' peena yu' ñtyi yuuwa'jmée dyijte', isa yuj we'we'ne'ta na'wẽ we'wesa': Ū'na tundyna fi'nzega, uurra cytee ptsuwa'jsarráatja'w jĩa'.

³³Tyã'wẽ ñtyi yuuwa'jme' jĩni's tyã'wẽ dyijna sũjna jypumbanuwe. Tyã'wēme', namicuwe'sh ewmeesa' caypumba'jatyna ew fi'nzesa's ji'ty tyã' cytey yuuna. ³⁴I'cue'sha' jypumbamée fi'nzenite shawendrra, peena yu' pcalte fi'nzenuwe. Tyã'wẽ yūumeerra' i'cue'sh maafi yu' áchpa'jva Dyusa's jiimeei'cue. Tyã'wētj áate we'we' tjaamerra jypa'yacy fi'nzecajn.

¿Uusáa qui' ñtyi yuuwa'ja' ma'wěcy?

³⁵Nava maafi yu' pēyiváatyna na'jĩna: Uusáa qui' ñtyi yuuwa'ja' ¿ma'wěcy? Cacue ¿ma'wēsa ji'pjutyqui? jĩtyna. ³⁶Jiyuya' ája'tsmeevá'cue. I'cue'sha' peecy jiine'cue quĩj ñĩña'sva uujte', tyãa ñĩñ cajcucē'jewe'sha' chimbi'c, naapcachja' dyiitewe'sh ñusrráac buchá'. ³⁷Scuutyj ñĩñ ma'c yuu meerra' fytūu ñĩñ ma'c yuu nava uujte' tyãa ñĩñírráa áate cāawa'jsame', tyãa ñĩñte ñusrráa buchawa'jsa'. ³⁸Atsa' tyãa ñĩñuj buchasa' cacue ma'wēsarraj ji'pjuwa'jsateva tyã'wēsac Dyusa' ũsu', quĩj ñĩñteva tyãa iisa fifyirraj. ³⁹Tyajiĩ cacue ma'wēsava ũsta', nava tyã'wērrarráa meeta'. Nasaa cacue' fitya', atsa' niimal cacueva fitya'. Tyã'wēy fyuusáa cacueva fitya', atsa' yu'gawe'sh wendy cacueva fitya'. ⁴⁰Tyã'wēy ēe walateva ũsta', naapcachja' naa quiweteva ũsta'. Nava ēe walatewe'sha' fiy zhichcueta' naa quiwetewe'shte. ⁴¹Sec cweetjni vite' a'te cweetjniva fitya'. Tyã'wēy estrella cweetjni vite' sec cweetjniva fitya'. Sa' estrella pwe'sh cweetjniva puuty fyyrrarráata'.

⁴²Tyã'wēy cue'sh cacueva fiy yuuwa'jsa' qui' ñtyi yuunijũ'. Uute', cacue ptsuwa'jsa's ya'penda'c, naapcachja' tyãa pendaniijũ qui' ñtyi yu'c peena yu' uuwa'jmée cacue yacj. ⁴³Cacue canzhsa's ya'penda'c, nava tyajũ qui' ñtyi yuurra', seena' zhichcuesac yu'. Cacue selpimeesa'scu ya'penda', nava tyājũ qui' ñtyi yuurra bagachte yujva ptsumée selpiwa'jsac yu'. ⁴⁴Naa quiwete fi'nzeni cacue' vite', atsa' Dyus tashte fi'nzewa'j cacueva vite'. Tyãa pa'ga cacue naa quiwetewe'sha's ya'penda'c, naapcachja' qui' ñtyi yuusáa cacue' Dyus tashte ũswa'jsa'.

⁴⁵Tyajiic Dyus librate we'werra': Nyafyte pitstjē'j Adana' naa quiwete ñtyi fi'nzewa'ja'srráac ji'pju' jĩ'. Nava nmejtewe'sh Adana' ptsumée ñtyi fi'nzewa'ja's peessa'. ⁴⁶Nava nyafyte cacue' Dyus tashte fi'nzewa'jsa

yu'tsme!. Nyafytwewe'sha' naa quiwete fi'nzeni cacuerráac yu', naapcachja' nmejte cacue! Dyus tashte fi'nzewa'jsa'. ⁴⁷Nyafyte pitstjē'j Adana' quiwe'scu pjeu'jnisa yu' naa quiwetewe'sh, naapcachja' e'stewe'sha' Cristoc yu' cielujūwe'sh. ⁴⁸Naa quiwete jyucaysa nasaa cacue' nyafyte Adan cacueva ma'wēga quiwe yu', tyā'wēysa írráa'ta', naapcachja' cielute ūswa'jsa cacue' cielujūwe'sh cacue na'wēy yuuwa'jsa'. ⁴⁹Ma'wē'tca'w āchva nyafyte Adan cacue's írráa' ji'pjuya' āja', tyā'wēy Cristo cacue's írráa' ji'pjuya' āja'nja'w tyā'wē yuuwa'j en ājte'.

⁵⁰Yacjtjē'jwe'sh, i'cue'shtyi āatetj pta'shi': Naa cacue yacja' cielute Dyus jycaajnite u'caya' ya'ājameena. Naa quiwete ptsuwa'jsa' ħma'wē bagachte yujva ptsuwa'jmée ĩtyi fi'nzenite ūsya' ājacy?

⁵¹Āchja' pta'sh ya'vatj: Maaíi yu' nee uumée ūssa' naa dundte corneta tucani nmej susutspcachja', naa cacue's yu'ptjejni yuurra vite cacue jypa'ga'nja'w jyucaysa. ⁵²Tyā'wē corneta susutspcachja', uusaawe'sha' qui' ĩtyi yuutyna peena yu' uuya'mée, naapcachja' naa dundte yaacyni yuumeete nee uumée ĩtyi ūssa cacue' yu'ptjejni yuutyna. ⁵³Tyāa pa'gatey cacue ptsuusáa uunijū' vite cacue bagachte yujva ptsuwa'jmeesa's jypa'gawa'j ji'pja'. Sa' cue'sh cacue uuwa'jsa's yu'ptjejrri bagachte yujva uuwa'jmeesa's jypa'gawa'ja'. ⁵⁴Tyā'wē cacue ptsuusá' vite cacue bagachte yujva ptsuwa'jmeesa's jypa'garra cue'sh cacue uuwa'jsa's yu'ptjejrri bagachte yujva uuwa'jmeesa's jypa'ganijū' Dyus libru'te we'werra': Uuwa'ja's iviitunic yuu, peena yu' uu en pa'cjamen jī'c tyā' cytey yuuna. ⁵⁵Uuwa'ja' bagachte yujva mee yuucajn jyuca iviitute', ħma'wē uuwa'j en pa'ja'cy uuwa'ja's ji'pjuwa'jsamée yā'jsa's? ⁵⁶Uuwa'j ena' pcalpa'garráac pa'j, atsa' tyāa pcala's cchjāachja'jsa' nyaffi leycu tyā'wē yuu. ⁵⁷Tyā'wēteva, Dyus tyacue ewte cue'shtyi jype'jsa Jesucristo pu'chpa'ga uuwa'ja's peena yu' ji'pjuwa'jsameetja'w.

⁵⁸Tyāa pa'ga andy yacjtjē'jwe'sh, bagachte yujva pu'vitumée Dyus yacj mfi'nzewe, Jesucristo's jwee írráa chjāchja selpiina, tyāa pa'gatey Jesucristo's selpinisa' cyulsame'.

Yacjtjē'jwe'shtyi pu'chwa'j vyu pcjacjni

16 ¹Nyaffi Galaciate ūsrra', Dyus luuchtyi caapiya'tj Dyus yacj fi'nzesaty pu'chwa'j ma'wē vyu's pcjacjwa'ja'sva atsa' tyā'sa' cytey myūuwe. ²Qui'sen iisa teeche'sa na'wērraj i'cue'sh ji'pjuni's macue ūswa'ja'sva tyujnderra jyaawna me'jwe, andy pa'tje pcjacjna ūsya'mée. ³Cyte andy pa'jrri' tyāa pcjacjni vyu'sa' Jerusalenna caja'nja, atsa' u'jwa'jsa pacueene'cue tyāawe'shtyi carta ūsu'nja, Jerusalente yacjtjē'jwe'shtyi ducjajn pety tyāa vyu yā'jrri. ⁴Meerra' andy yuu vāa u'jwa'j casejena atsa' u'jue'nja, nava tyāawe'shva andy yacj pi'cyna yuweetya.

Pablo u'jya' yaacyni

⁵ Andya' yujrra', Macedonia quiwey uycjēwna yuwe'nja i'cue'sh tashte pa'jya'. ⁶ Cyte pa'jrra' manz en jytjēyuuwá'nja meerra' nus en scjēwpcach. Atsa' i'cue'sha' pu'chjine'cue tyāajū andy qui' u'jwa'ja's. ⁷ Dunderráa i'cue'sh yacj puuty uyya' yuu wēje'tsmeetj. Cyte tyachtju ūs wēje' i'cue'sh yacj, Dyus tyā'wē wendyvatsa'. ⁸ Nava ayte Efesote nee ūsya'vatj, Pentecostes fiesta scjēwpcach. ⁹ Tyā'wē atsesa ūsteva, Dyus jīi mjiiwa'j wala ew yuutsa' naa pa'ga tyā'sa' iviitume'nja sūju'tj.

¹⁰ Timoteo pa'javáana atsa' mpu'chwe, quijteva ñusmée wēt i'cue'sh yacj ūscajn. Tyā'wēme', tyāava andy na'wēyrráa Jesucristo's selpisá'.

¹¹ Tyāa pa'ga quimva atsenuwe, wejyva mpu'chwe dyi'tje peejymée yuuwa'ja's, cyaj andy tashte qui' shawendna pa'jya' ājana. Tyā'wēme', andya' Timoteo's ūytjasna ūstju ayte yacjtjē'jwe'sh yacj.

¹² Apolosa's wala pytjaa we'wetj yacjtjē'jwe'sh yacj i'cue'shtyi puuty uyya' u'cjan. Nava āchjii yu' dunduutsme', sa' maa ente u'jwa'j casejterrāava yuweena.

Yuwe wechaa caajnity pta'shna fi'jni

¹³ Jypa'yacy chjāchja mfi'nzewe, Dyus yuurrá's ūuste pechcanamée yajcyna. ¹⁴ Quīj yūutsrrava peeygāawa'ja's yuurráa yajcyna tyā'wē myūuwe.

¹⁵ Yacjtjē'jwe'sh, jiine'cue Acaya quiwete nyafyrraj Cristo yuwe ewsa's jypa'gasa' Estefanaswe'shta', sa' tyāawe'sha' wala selpiity Dyus tashte utyasaawe'shtyi pu'chna. ¹⁶ Atsa' i'cue'sha' peeygāawa'j ji'pji'cue tyāawe'shtyi's meerra' maava tyāawe'sh na'wēy pu'chna selpisaaty.

¹⁷ Andya' wala wecha'tj, Estéfanos, Fortunato, Acáico tyāawe'sh ayte pa'pja'ga. I'cue'sha' ayte andy yacj ūsmeerra', andya's pu'chya' āja'tsmeei'cue. ¹⁸ Nava tyāawe'sha' andya's cchjāachja'jty Dyus yacj wechana fi'nzewa'ja's, sa' i'cue'shtyiva tyā'wēy ne'ta yuu. Atsa' nasa tyāawe'sh na'wēysaty' peeygāawa'ja'.

¹⁹ Dyus yacj fi'nzesawe'sha' Asia quiwete yuwe wechaa caja'ty. Tyā'wēy Aquila ptamva yuwe wechaa caja'ty, cytee pcjaacjesawe'sh yā'jrra.

²⁰ Yacjtjē'jwe'sh jyucaysa yuwe wechaa caajni's mpa'gawe, sa' teechna na'wērraj puuty mweechawe.

²¹ Pablo yaasesatj andy cuseju fi'ja' i'cue'shtyi wechana. ²² Maaíi yu' Jesucristo's atsesa ūsváatyna, atsa' tyāawe'shtyi' Dyus castigote iviituwa'j yuutyna. Cue'shtyi jype'jsa Jesucristo dund quíjvatsa' sūju'tj.

²³ Jesucristo' i'cue'shtyi bendeciina. ²⁴ I'cue'sh jyucaysaty'tju andy peeygāani's caja', Jesucristo's neewe'wena.

SAN PABLO CARTA E'SU FI'JNI CORINTO CHJAMBTEWE'SH JÏI

Dyus yacj fi'nzesaty Pablo fi'jni

1 ¹ Jesucristo jycaajnisá Pablo yaasetj, tyā'wē yūuwa'ja's Dyuscu jytjāas tyāa pa'ga. Naa carta's yacjtjē'j Timoteo yacj fi'jrra cajatatju Dyus luuch Corinto chjambte pcjaacjena ūssawe'shtyi. Sa' tyāawe'shtyirráa méé, Acaya quiwesuwe'sh Dyus luuch jyucaysawe'sh jïi yā'jrra fi'jatstju wechana. ² I'cue'shtyi' Dyus cue'sh tata' pu'chjina vite' cue'shtyi jype'jsa Jesucristova, tyāa pa'ga Dyus yacjrráa mfi'nzewe.

Pablo pytjaa ñuste fi'nzeni

³ Áchja' Dyusa's wala wechawa'j ji'ptja'w, tyā' cue'shtyi jype'jsa Jesucristo Tata', tyāasac cue'shtyi's peeygājrra bagachteva cviisha'jna nes yu'. ⁴ Cue'shtyi' quījquīj ñuswa'j en pa'tjeva, cviisha'ja'c Dyusa', atsa' tyāa ma'wēga cue'shtyi's cviisha'j, tyā'wēy cue'shva vitesa ñusna fi'nzesaty cviisha'cjancu tyā'wē yū'. ⁵ Cristo's nwēese'pja'ga ma'wēga seena' ñuswa'j en pa'ja', nava Cristo pu'chte', tyā'wēyrráatja'w cviisha'jni'sva jypa'ga'. ⁶ Tyā'wē i'cue'sh ewte neeyūuwa'ja's jypa'garra cviisha'jni yuucajntja'w cue'sha' ñuste fi'nze'. Dyusa' cue'shtyi cviisha'jrra', i'cue'shtyiva tyā'wēy cviisha'jrra ewte nviituna, cyaj i'cue'sha' wantāyya' ājane'cue cue'shtyi ñuswa'j en pa'ja'c tyā'wēysa i'cue'shtyiva pa'tjeva. ⁷ I'cue'sha' ñuswa'j ena'sa' jypa'garra', Dyus cviisha'jni'sva tyā'wēyrráa jypa'gawa'jsa i'cue tyā'wē yūuwa'ja's ew jiitja'w.

⁸ Asia quiwete ma'wētca seena' ñussa's ji'pju tyā'sna miiyajcywe, yacjtjē'jwe'sh. Cyteea' iimejc seena' wala ñuswa'j en pa'j, atsa' peena yu' ityī fi'nzewa'j ji'pmeene'tca sūju'tj wantāyya' chjāchjameerra. ⁹ Áchja' uu en yujna sūju'rráatj. Nava naa quiwete ityī fi'nzeni's yajcymée Dyus ityī

vit-sana yaacycajnrráac tyā'wē yuu. ¹⁰ Tyacue seena' uuwa'tjerráa yā'j fi'nzetsteva, Dyusa' andya's nwe'wec, sa' āchva nwe'wena nes tyā'wē'. ¹¹ Cue'sh pa'gate i'cue'sha' Dyus yacj puuty we'wepa'ga tyā'wē nwe'wena nes yuuna sūjna Dyusrráanatj yaaqui'. Sa' nasa maanzcuēesava cue'sh pa'gate Dyus yacj puuty we'wete', Dyusa' cue'shtyi nwe'wena atsa' tyāawe'sha' Dyusa's wechaatyna.

Pablo' quīj yuurraga Corinton u'jmée

¹² Isatj we'we', Dyusa's atsesawe'sh yacjva ew yuurráatj yūuna fi'nze, sa' i'cue'sh yacj yu' wejytju tyā'wē ewrráa fi'nze sūjna yuurráac ūusutje', tyāa pa'gatj wechá'. Tyā'wē ew yūuna fi'nzewa'ja's Dyuscu pu'ch, atsa' peecy ūusujrráa chjāchja yajcyrra tyā'wē ew fi'nzemeetj. ¹³ Andya' i'cue'shtyi carta fi'jrra', īshiiya' sūjrra fiy yajcyna fi'ljmeetj, atsa' i'cue'sha' cuj jwend yaacynuwe. ¹⁴ I'cue'sh maafi yu' andy caapiya'jni' isasateva jiyui'cue na' ew jiyuna mja'jwe. Tyā'wē ew jiyurra', cue'shtyi jype'jsa Jesus quījte', i'cue'sha' wētwe't yaaquine'cue andy i'cue'shtyi ew yūupa'ga, atsa' andyva wētwe't yaaqui'nja i'cue'sh ew fi'nzepa'ga.

¹⁵ Tyā'wē andy caapiya'jni's ew jiisai'cue tyāa pa'ga andya' e'nz us pa'jya' yuwe'nja sūjna yaacynitj ji'pju' i'cue'sh yacj wechana puuty uyya'. ¹⁶ Nyafyte' Macedonia quiwen u'juetsrra iipa'j u'jue'nja. Sa' Macedoniajū qui' shawendna yujrra qui' pa'ja'nja sūju'tj. Atsa' cytee ūsrra Judea quiwen u'juetste', i'cue'sha' andya's pu'chjine'cue sūjna yaacynitj ji'pju'. ¹⁷ Ew ūus yajcymey fi'ja'ne' cytey yu'nja jīrrava cytey yu'tsme', Dyusa's jiimeesa na'wē, sūjuvā'cue. ¹⁸ Nava Dyusa' jiia' andya' e'nz jwend we'we'tsmeetj i'cue'shtyi's. ¹⁹ Tyā'wē yūucajmení Dyus Nchi'c Jesucristo' bagachte yujva e'nz jwend we'wemée isasarrá'scu we'we', atsa' cue'sha' tyajy we'weni'stja'w pta'shi' i'cue'sh cshavyte Silvano, Timoteo vite' andy yā'jrra. ²⁰ Na'wē Dyusa' quīj yūuwa'ja'sva puuty we'wec tyā'sa' Cristo yuurráac jyuca cytey yuu, Dyus puuty we'weni's caavya'ja'jna. Tyāa pa'gatja'w Dyusa' bagachteva cytey yuusa' jīna tuutje'je'. ²¹ Tyāasac Dyusa' andyna vite' i'cue'shtyiva pu'ch isasarrá's cytey yuuna fi'nzecajn, Cristo yuurrá's selpiina fi'nzepa'ga. ²² Sa' Dyusa' cue'shtyi tyjityjrra tyajy Espiritu's peescu, Dyus jīi yu'sa' quījnava jyuca tyā'wērrarráa jypa'gawa'jsa i'cue jīna caajiyu'jna.

²³ Na'wē Corinton u'jue'nja sūjrrava, cytey yuunimeetj. Nava tyāa yu' wejyva i'cue'shtyi juuna' we'wena ūsya'mmeetj tyā'wē yūu. Andy ūuste īshiirra tyā'jī'tsmeetj tyā'sa' Dyusa' jiia'. ²⁴ I'cue'shtyi ūusacharra tyā'wē yujmée yuumeetj, wejyva quimva juuna' we'wemeete i'cue'sh pwe'shrráa ewcuēerraj yuwe's pjeu'cjantju ūytjasna tyā'wē yūu. Andy tyā'wē juuna' yūucajmení i'cue'sha' Dyus yacj yu' chjāchja yā'j ūsi'cue.

2 ¹ Atsa' tyā'wē juuna' we'weya'rráa yu' u'jmeete ewna sūjnatj yajcy.

² Andya's i'cue'sh yuurráa wētwe't caayaqui'jwa'jsa i'cue naapcach

tyā'wē andya' i'cue'shtyi juuna' we'werra cyūusu'tje', andya's ¿quim wēt'wēt caayaqui'jicy? sūjnatj yajcy. ³Tyāasatj i'cue'shtyi cyūusu'jna pa'jya'mée cartarráa fi'jrra caaj, i'cue'sh tyā'wē ājmée yūuna ūspa'ga andya' wechana pa'japcachte, űuswa'jrráa ji'pju'nja sūjnatj yajcy. Naasáa andy wechana pa'tje yuurráa i'cue'shva tyā'wēy wechana ūswa'ja's ji'pjune'cue sūju'tj. ⁴Iiméj wala cuj yajcyna űusrra ű'nenatj carta's fi'j, nava i'cue'shtyi juuna' yuurra cyūusu'jya' sūjna űusacharra tyā'wē yūumeetj. Andya' i'cue'sh tyā'wē ājmée yūupa'ga iiméj wala peeygājrrarráatj tyā'wē ű'nena fi'j.

Canzh pcal yūusa's peltunāyrra cviisha'cjan yu'cypejni

⁵Nava tyā'wē ājmée yūusa' andyrráana tyā'wē cyūusu'jme', i'cue'shtyiwa jyucaysatycu tyā'wē cyūusu'j, tyā'wē canzh yūurra. (Tyā'wē canzhcu yūu jīnarráatj we'we' jyuca yu' pta'shya'mée.) ⁶I'cue'sh puuty we'werra castigāywa'ja's viti'cue tyā' cytee pa'jrráa ewna, jwee yu' tjaacue yuumée. ⁷Wejyva āchja' peltunāyrra mecviisha'jwe, tyā'wēme' wejy tjaacue wala űusrra isa jyucate vituwe'shte. ⁸Tyāa pa'gatj i'cue'shtyi neewe'we' peeygāawa'ja's qui' ji'pjucajn tyā'wē ājmée yūusa's. ⁹Juuna' yuucajn i'cue'shtyi fi'tj, nava andy jycaajni's aan cytey nwēese'jetyna sūjrrarráatj jiyuya' tyā'wē yūu. ¹⁰Āchja' i'cue'sha' tyā'wē ājmée yūusa's quīj yūuni'sva mpeltunaīwe, andyva peltunāytju peltunāywa'j űsu'c tyā'sa' Cristo dyi'pte, i'cue'sh pwe'sh puiimée ew fi'nzecajn. ¹¹Tyā'wēme', echtjē'ja' wala yuj jiia' cue'shtyi caypumba'jrra cnaywa'ja's tyā'sa' jii'tja'w.

Troaste Tito's uymeerra, Pablo wala űus yaacyni

¹²Cristo nwe'weni's pta'shya' Troas chjambte pa'tje', Cristo's selpiina űswa'j en wala yuj ewsa vyaac. ¹³Nava cue'sh yacjtjē'j Tito's uymeerra wala cuj yajcytju, tyāasatj tyajū casejrra Macedonian u'j.

Cristo yacja' quījteva jyucac ewrráa ya'fi'nze'

¹⁴Nava Dyusa' pu'chji'c Cristo Jesus yacj fi'nzete', quījteva ewrráa caafi'nze'jna, atsa' tyajy yuwe's mteeva caajiyul'jwa'jsatja'w, maa maava jiyuna jyā'cjan. ¹⁵Tyāa pa'gatey cue'sha' Dyusa's jiiyā'jsa' vite ewte neeyūuwa'jsa ma'ty yuu meerra' vituwa'jsa ma'ty yuu nava caajiyul'jwa'jsatja'w Dyus yacj fi'nzeni's. ¹⁶Tyā'wē yā'tje', ¿quim tyā'wē Dyus yuwe's caajiyul'jya' u'jwa'jsa űstyqui? Vituwa'jsa yacj yu', Dyus yacj fi'nzeni' wala yuj ewmée tjenguna, naapcachja' ewte neeyūuwa'jsa yacja' iiméj seena' zhichcuesa yuuna. ¹⁷Maafía' Dyus yuwe's yu'ptjejrra fiytyi pta'shna pecūju'. Nava cue'sha' tyā'wē yū'tsmeetja'w, sa' Dyus yuwe's vyuu pa'gava pta'shna űsmeetja'w. Tyā'wē yūuya'méefi, cue'sha' Dyus caajnisatja'w, Cristo's selpisáa. Tyāasatja'w īshiimée űusuj jyuca isasarrá's we'we' Dyus dyi'pte.

Nwe'wewa'ja's u'se pjeu'jrra Dyus nviitnisa

3 ¹Tyā'wē we'wena fi'jrra', peequírráa ewsatj jīnac we'we' ¿sūjuvá'cue? Meerra' viteva na'wēty neewe'wenisa carta jyūrra pa'ja' atsa' tyāava tyā'wēy jyūrra pa'jwa'l jī'pja' ¿sūjuvá'cue? Meerrava i'cue'sh neewe'wenisa carta cutyi'jwa'l jī'pja' ¿sūjuvá'cue? ²Andya' tyā'wē vitesa neewe'wenisa carta jyūrra pa'jwa'l jī'pjmeetj, tyāa pa'gatey andyna neewe'wewa'jsa' i'cue'shírráa i'cue. Tyāasa andy mjīini's maatyva caajiyu'jwa'jsa' i'cue'shi'cue, carta na'wēsa. ³Cue'shtyi neewe'wesa' Cristo', tyāasac tyajy cuseju yuu fi'jrra carta ūs, atsa' tyāa carta' i'cue'shi'cue. Nava tyāa carta' tintaju fi'jni yuume'. Dyus Espiritujuc fi'jni yuu, sa' cuet taplateva fi'jni yuumée, nasaa ūustec fi'jni neeyūu.

⁴Cristo pu'chpa'ga, Dyusa's selpiiya' ājātj, tyāasatj íshimée isa we'we'. ⁵Dyusa's selpiiya' ājānisa' peecyrráa tyā'wē ya'ājā'tsme'. Tyā'sa' Dyus pu'chtec tyā'wē ya'ājā'. ⁶Dyusa' naa ensu nasaty nwe'weya' ājāwa'ja's pjeu'jrra nvijtcu tyā' leya's nwēese'jwa'l yu'tsme', naasáa Dyus Espiritu's yuurráa ūuste jypa'gawa'cj yu', atsa' tyā'sna pta'shya' ājāwa'ja'scu Dyusa' andya's pu'ch. Ley fi'jrra nviitnisa' uuwa'tjerráac vit, naapcachja' Dyus Espiritu' Dyus yacj fi'nzewa'ja'scu vit.

⁷⁻⁸Moises ley cuet taplate fi'jnisa's jypa'ga enterráa yujva seena' yuj zhichcue eena' cweetjcu. Tyāa pa'ga Moises dyi'pva tyā'wēyca eena' cweetjna neeyūu. Atsa' Israelwe'sha' Moises dyi'pte tjengya' ājāmeeta', Moises dyi'pa' seena' eena' cweetjpa'ga. Nava tujndtujndrraj ūchjana u'cj. Tyā'wē uuwa'tjerráa vit-sa leya's jypa'ga enterráa yujva tyā'wē seena' zhichcue eena' cweetjrra', Dyus Espiritu caapiya'jni en yu' wejy tjaacue zhichcuesa'. ⁹Tyā'wē yuuwesa i'cue jīna pta'shsa leya's jypa'ga enterráa yujva seena' zhichcue yuuc atsa' cue'shtyi yuuwemée ewte nviitwa'jsa's pta'shni en yu' wejyca tjaacue zhichcuesa yu'. ¹⁰Ley jypa'ga ente' tyā'wē yuj seena' zhichcuesa yuuc. Nava āchj naa ensu tjaacue zhichcuesa vyaac tyāa yacj caaja'nda'tje yu', nyafiiwe'sha' seelpimeesac yuu. ¹¹Tyachmeerráa selpiwa'jsa pa'j enterráa yujva zhichcue yuurra', bagachte yujva ptsumée selpiwa'l en yu' wejy tjaacue zhichcuesa'.

¹²Tyā'wē bagachte yujva ptsumée selpiwa'ja's jiirratj āate pta'shna we'we'. ¹³Andya' Moises na'wē yūutsmeetj. Moisesa' tyachmeerráa eena' cweetjnisa ūchjatste Israelwe'sh uywe'shte dyi'pa's yaapjcu. ¹⁴Sa' Moisesa' quij yuucajn tyā'wē yaapjteva Israelwe'sha' jiyumeeta'. Sa' āchj pa'jva apjni ūsna jiyucajmen, tyāa pa'gaty tyāa leya's lēeyrrava jiyu'tsmée. Atsa' tyāa apjnisa's Cristo's pi'cyrra yuurráa pjaandeya' ya'ājana. ¹⁵Āchpcach apjni ūsna, Moises fi'jnity lēeyrrava jiyucajmen. ¹⁶Atsa' maava Jesucristo tashte utyaate yuurráac tyāa apjnisa' pjaandeni yu' jiyucajn. ¹⁷Cue'shtyi jype'jsa' Dyus Espiritu', atsa' tyāa yacj ūste yu', jiyuwa'ja's wej yujva ya'jypumbameena. ¹⁸Tyāa pa'gatey cue'sha' dyi'pa's yaapjni jī'pjmeetja'w,

tyāa pa'gac Dyus cweetjni' cue'sh dyi'pte speeju na'wē eena' cweetjya' ājā'. Atsa' Dyus Espiritu pu'chte', jyucaysa jwee írráatja'w Cristo ma'wēsate', tyāa na'wēy fi'nzena u'jya' āja', cue'shtyi jype'jsa Dyus Espiritu' tyā'wē yūuwa'ja'scu pu'chji' naa pa'ga.

4 ¹ Ājmeecueteva Dyuscu neewe'werra nvijt tyajy tashte selpiwa'ja's, cyajtja'w chjāchja yajcyna fi'nze'. ² Cue'sha' jyuca nvijttja'w paatste ewmēe yūuna íshiina fi'nzeni's. Tyāasa ewmēe yajcyrra Dyus yuwe's yu'ptjejna ūsmeetja'w. Isasarráanatja'w we'we', atsa' Dyus dyi'pte íshijja'tsmeene' sūjnarráa miijajcywe jyucaysa. ³ Nava ewte nviitwa'jsa Dyus yuwe's pta'shi'tja'w tyā'sa' maaí yu' achamēe vāa ew jiyutyna, nava tyāa yu' vituwa'jsa yacjrrāa tyā'wē yūuna. ⁴ Tyā'wē yūucajnī naa quiwete jycaajna ūssa echtjē'ja' tyāawe'sh ūs yaacyni's jyuca apjcu, Jesucristo Dyus na'wēysa caapiya'jni zhichcuesa's jiyucajmen. ⁵ Sa' cue'shtyi nwēese'j jytjāasrra pta'shi'tsmeetja'w, wejyva cue'shtyi nwe'wesa Jesucristo yuurrá's nwēese'jwa'ja' jīnarráatja'w pta'shi', cue'sha' naasáa i'cue'shtyi selpiisarráatja'w, Jesusa's nwēese'jsa. ⁶ Dyusa' nyafiitey quīj yujva meetey chji'ndy walate eena'sa's caacj cweetjcajn tyāa Dyusírráac cue'sh ūusteva eena' caacweetjē'j, Jesucristo' Dyusírráateva jiyucajn.

Dyusa' pu'chjina sūjnarráa fi'nzeni

⁷ Dyusa' cue'shtyi's neewe'wec Cristo caapiya'jni tyacue seena' zhichcuesa's. Nava cue'sha' tyā'wē seena' zhichcuesa's we'weya' yu' ājawa'jmeesatja'w, atsa' tyā'wē cue'sh yu' ājameete írráac Dyusrrarráa pu'chji'. ⁸ Tyāasafírráac tjēyte fi'nzewa'j iiméj wala pa'tjeva, tyajūva casejya' ājawa'ja's pu'chji'. Atsa' űuswa'j en pa'tjeva, Dyusa' pu'chjina sūjwa'j yuurrá'stja'w ji'pju'. ⁹ Naa quiwetewe'sh yu' ajtseteva, Dyus yu' atseni fi'nze'tsmeetja'w. Pcyuuni fi'nzerrava, jyucate yu' vituni yu'tsmeetja'w. ¹⁰ Jesusva ma'wēga uu tyāa na'wēy uúsáa na'wē yuuwa'j ji'ptja'w, ityī yuusáa Cristo pu'chni's jypa'garra tyāa na'wē yuurráa fi'nzeya'. ¹¹ Nava cue'sha' naa quiwete nee fi'nze'tsrra', bagachteva icj wēenírráatja'w fi'nze', Jesus caapiya'jni's pta'shpa'ga. Tyāa pa'gac ityī yuusáa Cristo pu'chni' vyaana nes yu'. ¹² Tyāasatja'w cue'sha' icj wēenírrá's jypa'gana fi'nze', naapcachja' i'cue'sha' Dyus yacj fi'nzewa'ja's i'cue jypa'gana fi'nze'.

¹³ Dyus librote' na'jīnac we'we': Dyus pu'chwa'ja's jiitj yu', tyāasatj tyā'wē we'we' jī'c. Atsa' cue'shva tyā'wēy Dyus pu'chwa'ja's ew jiitja'w, tyāasatja'w pta'shi'. ¹⁴ Sa' Dyusa' cue'shtyi na'wē yūuwa'ja'sva jiitja'w: Jesus uuteva qui' ityī vitcu, sa' cue'shtyiva tyā'wēy qui' ityī vituna. Tyā'wē yūurra tyajy ūsnite pe'jna u'juena pety i'cue'sh yā'jrra Jesus yacj fi'nzepa'ga. ¹⁵ Cue'sha' pcyuuni űustetja'w fi'nze', nava i'cue'sh ewte fi'nzewa'ja's uycajtntja'w tyā'wē yu', cyaj maanzcuēesava Dyus peeygāani's jypa'garra', cyaanzcuēesay Dyusa's wechana tuutjeljetyna.

¹⁶ Tyãasatja'w cue'sha' bagachteva ũucjmée Dyusrrá's chjächja yaaqui'. Macue cue'sh cacuete chjächjasa yu' ptsuuna u'juetsteva, Dyus yacj wechana fi'nzewa'l'j yu' jweefírráac een isa chjächja ya'fi'nze'. ¹⁷ Tyãa pa'gatey naa quiwete ñuste fi'nzenisa' dundtewe'shrráa, tyachmey scjēwwa'jsa'. Atsa' tyãa scjēwniijū' bagachte yujva scjēwwa'jsamée iiméj ewsa'scu cielute ya'ji'pju'. ¹⁸ Naa quiwetewe'sha's yaacywa'l' ji'pjmeetja'w, cielutewe'shrrá's yaacywa'l' ji'ptja'w. Tyãa pa'gatey naa quiwetewe'sha' tyachmey scjēwwa'jsata', nava cielutewe'sha' bagachte yujva scjēwwa'jsa meeta'.

5 ¹ Tyajírráa cue'sha' ew jiitja'w naa quiwete ityí fi'nzenisa cacue ptsuuteva, vite cacue bagachte yujva ptsuwa'jsamée tjaacue ewsa cue'sh jii pjeu'jni ji'pja' Dyusa' cielute. Tyã' ptsuwa'jsa naa quiwetewe'sh na'wēsame'. ² Tyajtja'w naa cacuete ñusna nee ityí fi'nzetsrra', dund cielute ũswa'l' cacue's jypa'gavatsa' sūjna yaaqui'. ³ Tyājū yuurra', cacue ji'pjmée yu' ũsmée, cacue ji'pj neeyū'nja'w. ⁴ Naa cacuete nee ityí fi'nzetsrra', ñus yajcynatja'w fi'nze'. Nava naa cacue iishsa's ajtserra dund uuvatsa' sūjrra tyā'wē ñus yaaqui'tsmeetja'w, naasáa naa cacue's dund pju'se'jni yuute', cue'sh cacue ptsuwa'jsarrava cytee u'se yuuna pa'jana sūjrratja'w tyā'wē yūuwa'ja's dund jytjáasu'. ⁵ Tyā'wē yūuwa'ja's Dyuscu pjeu'l', tyāasac tyā'wē yūuwa'ja's jypa'gawa'jsa yuji'cue jirra nyafyte tyajj Espiritu's cjuē'y ũs.

⁶ Pejca tyā'wē yūuwa'jsa yujtja'w, nava naa cacue yacj nee ityí ũsfi yu', cielute cue'shtyi jype'jsa Jesucristo ũsna cytee āchjii yu' ũsya' ājā'tsmeetja'w. ⁷ Nava pejca cytee pa'jwa'jsa yujtja'w sūjnarráatja'w fi'nze'. ⁸ Tyā'wē cue'shtyi jype'jsa tashte pa'jwa'ja's jiitja'w, tyãasatja'w naa cacuete ityí fi'nzeni's nvijtrra tyãa yacj ũsya' u'l' wēje'. ⁹ Tyãasa naa cacue yacj nee ũsfi mtja'w yuu, cjīmeerra' naa cacue's ji'pjmée yā'jmtja'w yuu, nava Cristo dyi'pte ew fi'nzewa'ja's yuurráatja'w pa'pchu'. ¹⁰ Tyā'wē jypa'yacymeete', Cristo tashte jyucaysa cuutya'lnisa yu'nja'w. Naa quiwete ew mtja'w selpiisáa yuu, meerra' ewmée mtja'w selpiisáa yuu nava teechsa na'wērraj peecy selpiini's jypa'gawa'jsatja'w.

Dyus yacj yuuwemée neeyūuni's pta'shni

¹¹ Tyā'wē Cristo tashte utyaarra ma'wē selpiisarrava tyā'sa' paswa'l' ji'ptja'w, tyãasatj Dyusna yuurráa selpi' i'cue'sh dyi'pte. Andy ma'wē selpini'sva Dyusa' jiiyā'ja', atsa' i'cue'shva andy quīj yūusatava jiyuvatsa' ewna sūju'tj. ¹² Andya' tjaacue ew selpisaatj jīna iivejch we'wena ũsmeetj, naasáa andy ew selpini's i'cue'sh yaacyajnrráatj tyā'jī'. Tyā'wē andy ew selpini's i'cue'sha' jii ũsrra íírráa, andyna ewmée nuywe'wesawe'shtyi' pasya' ājāne'cue. ¹³ Andya' luucu na'wē vántca we'we', nava tyā' Dyus jī'. Atsa' luucu na'wēmée we'werra yu', i'cue'shtyi ne'tca we'we' jiyucajn. ¹⁴ Cristo' jyucaysa pa'gate peeygājrra

uuc, atsa' tyāa peeygāani's yajcyte', tyā'sna selpiwal'j yuurráac caseje', na'wē yajcyna: ¹⁵Cristo' jyucaysa pa'gate uupa'ga, maava tyāa yacj ūssa' jyucaysa uusāa na'wēsajta'w yuu sūjna. Atsa' tyāa yacj fi'nzesawe'sha' ma'wēva fi'nzemée, wejyva na'wē tyāawe'sh pa'gate uurra qui' ityī yuuc tyā'srráana selpiina fi'nzewa'jsata'.

¹⁶Tyāa pa'ga āchjūyā'ja' vite ma'wēsateva tyāaty tjengna ūsterráa yujva yaacywal'j ji'pjmeetja'w. Andya' nyafii yu' wala ne'tca jypumba, tyāasafitj Cristo's naa quiwete cue'sh na'wēysafírrá' sūjna yaacyni ji'pju'. Nava āchja' tyā'wē yaacyni's yu'ptjejwa'ja', ¹⁷tyāa pa'gatey maava Cristo tashte utyasá' jyuca yu'ptjejnic yu'. Nyafii yajcyna fi'nzeni's nvijtrra, u'sesarrarráac ya'jypa'ga'.

¹⁸Tyā'wē u'se yuuwa'ja's Dyusrrarráac vitu', tyāasac tyāa yacj ew fi'nzewa'ja'sva vitu', cue'sh pa'gate Cristo's uuwa'j vitrra. Dyusa' tyā'wē yūurrac andya's neewe'werra nvijt, tyāa yacj ew fi'nzewa'ja's jyucaysatj pta'shcajn. ¹⁹Ew jiyute yu', Dyusa' naa quiwete nasaa pcaltji yuca peltunāyrra tyāa yacj ew fi'nzewa'ja's pjeu'jya'c tyā'wē Cristo's uuwa'j vitna ūsu'. Dyus tyā'wē yūuni's pta'shcajncu andya's neewe'werra nvijt. ²⁰Tyāa pa'ga andya' Cristo nwe'weni's pta'shya' Dyus caajni yujtj. Tyāasatj Dyus yuu we'we'ts na'wē andya' i'cue'shtyi jycaaja' na'jina: Dyus tashte mutyaawe, tyāa yacj fi'nzeya'. ²¹Cristo' quīj pcal yujva ji'pju'tsme', nava cue'sh ewmeesapa'garráa tyāac Dyus castigo's jypa'ga. Atsa' cue'sha' Cristo's jypa'garra', ewmeesarrava Dyus dyi'pte yuuwemeesa yuucajncu tyā'wē yūu.

6 ¹Tyāasa andya' Dyusna selpisaatj. Tyāa pa'gatj i'cue'shtyi yu'cypeje': Dyus peeygāani's jiyuyā'jrra', wa'lmée jypa'gacajn. ²Dyus peeygāawal'j ena's na'wēc pta'shi' Dyus libroute:

Ju'ngu yuuwa'j en ājte', wēse'tj,

Sa' pu'chtju ewte neeyūuacajn jī'c.

Tyāa pa'ga āchja' tyā'wē yūuwa'j en ājc, atsa' naa ensu' ewte neeyūuwa'j ente ūstja'w.

³Andy mjiini's ewmée nuywe'wecajmen, quim yujtyva ewmée yūuna ūsmeetj. ⁴Macue wala pytjaa yuuna, wantāyna, quijteva pejiina, tjēyte fi'nzena ūsrrava, Dyusna selpiinisarrá'stju caavya'ja'jna fi'nze'. ⁵Andya's pāparra carcelte tyaaajnisatj yuu. Wēeshuna pcyuuni wala tjēyte fi'nze'tj. Chjāchja mjiweete deewal'j en yujva uymée, wēenatj fi'nze'. ⁶Nava Dyus dyi'pte na'wē ew yūunírrá'stju caavya'ja'jna fi'nze': atsewe'wetsteva ca'tu yu' ew yūuna, Dyus Espiritu andy yacj fi'nzeni's caajiyu'jna, ūusuj jyuca peeygāani's caavya'ja'jna, ⁷isasarrá's pta'shna, Dyus pu'chni's caavya'ja'jna. Sa' atsewe'wesaty paswal'j ma'c yuu meerra' pcyuutste paswal'j ma'c yuu nava quijteva ewrráa paswal'ja'srráatj yajcyna fi'nze'. ⁸Sa' qui'quinte' wendynitj fi'nze', nava maa enteya' atsenitj fi'nze'. Vite ensuy yu' ew we'wena qui' ewmée we'wenitj fi'nze'. Qui'quinteya'

ĩshiisa' jĩna nuywe'weni, nava maa enteya' isasa's pta'shsa' jĩna we'wenitj fi'nze'. ⁹Maa enteya' nasa jiyunimeesa tjastyi andya's we'we', nava maa entey yu', andya's wala namicu na'wěty ew we'we'. Maa enteya' uuwa'tjerraa yā'tj fi'nze', nava u'ts yu' meetj. Wala pcyuuni yuurrava, icjni yu' yu'tsmeetj. ¹⁰Macue wala cyūusu'jni ūsrrava, wechanatj fi'nze'. Naa quiwete quĩjva ji'pjmeesarrava, maanzcuēesatyva ji'pjsatj vitu' Dyus dyi'pte. Macue ji'pjmeesarrava, quĩj yujva peeji yu' meetj fi'nze'.

¹¹Corintote yacjtjē'jwe'shtyi ĩshiirra tyā'jĩ'tsmeetj, andy ūste ūsutjeni's jyuca ātatj we'we'. ¹²I'cue'sh yu' andya's atseyaaqui'ne'cue, nava andya' ca'tu yu' i'cue'shtyi' atseyaaqui'tsmeetj. ¹³Neya' luuchtyi's ma'wēga peeygājna we'we', andyva i'cue'shtyi' tyā'wěytju peeygājna we'we'. I'cue'sh ūs yaacyni's paatsterraa ji'pjumée āate we'wecajntju andy ūs yaacyni's āate we'we'.

Dyus ĩtyisa ūswa'jrráatja'w

¹⁴Dyusa's jiimeesawe'sh yacja' ptamuwa'jme'. Tyā'wēme' cyteerraj tyāawe'sh na'wěy yūuna fi'nzeya' ājameene'cue. Ewsa' ewmeesa yacj fi'nzewa'jsame'. Eena'sa' chji'ndysa yacj cyteerraj ūsya' ewu'tsmeeta'. ¹⁵Cristo' echtjē'j yacja' puuty utya'tsmeeta'. Dyusa's jiisa' Dyusa's jiimeesa fi'nzenite fi'nzewa'jme'. ¹⁶Dyus ūsnite' Dyus ĩtyīmeesa' ūswa'j ji'pjmeeta'. I'cue'sha' Dyus ĩtyisa ūswa'jrraa i'cue. Tyajíc Dyusa' na'jĩna we'we:

Andya' tyāawe'sh Dyus yu'nja,

Tyāawe'sh ūste fi'nzewa'jsa.

Atsa' tyāawe'sha' andy luuch yuutyna jĩ'c.

¹⁷Sa' vite ajcjēva na'jĩnac we'we:

Ewmeesawe'sh cshavyu casejrra utyaanuwe,

Sa' ewmeesa's jya'ndynuwe.

¹⁸Tyā'wē yūute', i'cue'shtyi andy jypa'garra

Ney na'wē yu'nja.

Atsa' i'cue'sha' andy luuch yuune'cue jĩ'c quĩjteva jyuca ājāsa Dyusa'.

7 ¹Dyusa' tyā'wē ew fi'nzewa'ja'scu jycaaja'. Tyāa pa'ga, yacjtjē'jwe'sh, wala jypa'yacy fi'nzewa'j ji'ptja'w, cue'sh cacue ma'c yuu meerra' cue'sh ūs ma'c yuu nava suwwa'jsa yu'sa' ca'ga'jwa'j ji'pjmeetja'w. Dyusrrāana yajcyna jypa'yacy fi'nzewa'j ji'ptja'w.

Corintotewe'sh ewmée yūunijū shawendni

²Andya's atseyaacynuwe. Andya' quim yujtyva ĩshiina caypumba'jna ewmée yūuna ūsmeetj. ³Atsa' i'cue'shrraa yuuwesa i'cue jĩrra tyā'jĩ'tsmeetj. Tyā'wē yajcymeerraítj andy peeygāanisa i'cue, tyāasa andy yacj ja'ndarraaj fi'nzena tyutemey uuwa'jsatja'w jĩnatj we'we. ⁴Macue seena' ĩnswa'j ente ūsrrava, i'cue'shtyi yajcyrra wechanarráatj fi'nze', wej yujva ewmée yu' yajcymée.

⁵ Macedonia quiwete pa'jii le'chcuërráa yujva jycaasewa'l' ji'pjumeetj. Quíjva jyucac tjëysarrarráa vyaa, andy pecûjnisu yu' mteeva jyuca. Atsesawe'sh yacj pdyi'puwa'l'va ji'pjutj, sa' ûusteva ûucj yaacywa'l' casejc. ⁶ Nava Tito pa'pja'ga Dyusa' andya's cviisha'cj, ñusna ûsteva. ⁷ Nava Tito yacj puuty uypa'garráa andya's tyā'wē wecha en pa'jme'. Tito' andy tashte seena' wala wechana pa'cj, i'cue'sh ew yûuya' yaacypa'ga. Sa' pta'shcu tyacue wala âjmée yûurrava indy yacj wechaya' puuty uy wêje'ty jînisac wejy wala cviisha'j.

⁸ ¿Quíjya'qui'tj i'cue'shtyi juuna' we'wena tyā'wē carta fi'j? sūjna wala cuj yajcytju tyāa ensu yu'. Nava âchja' tyā'wē yaaqui'tsmeetj. Nyaffi yu' tyā'wē yaacyajni tyāa carta' i'cue'shtyi wala cyûusu'cj manz en yu'. Tyagachjîrráa juuna' we'weni's cuj yajcyrra', âchja' andya' wecha'tj. ⁹ Nava i'cue'shtyi cyûusu'jrra weech yajcyna tyā'wē wechatsmeetj, wejyva tyāa juuna' we'wenisa' i'cue'shtyi wala selpiic, ewmée yûuniijû caashwendul'jna, tyāa pa'garráatj wechá'. Atsa' i'cue'sha' tyāa ñus en pa'pja'ga ûuscha yajcymée Dyus dyi'pte ew fi'nzewa'jrrá's i'cue cytey yuu. Tyāa pa'gatj andya' quimnava atsesameetj sūju'. ¹⁰ Tyāa pa'gatey âjmée ne'tca'w yuu sūjna wa'lmée Dyus yacj ew fi'nzewa'ja's pacuete', ewmée yûuni's nvijrra ewte neeyûuwa'ja'scu ya'jypa'ga'. Tyāa pa'ga ñuswa'l' entyi' atsewa'jme'. Nava âjmée ne'tca'w yuu sūjwa'ja's yajcymeete', vituwa'jrráac caseje'. ¹¹ I'cue'sha' Dyusrráana yajcyna ne'cue tyāa ñusnisa's ajtsemée jypa'ga. Atsa' tyā'wē yûupa'ga ma'wēga ew fi'nzewa'j casej tyā'sa' miiyajcywe naata': Âjmée ne'tca'w yuu sūjna ûucjrra yuwe's pjeu'jya' yajcy i'cue, tyāa ewmée yûusa's castigäywa'ja's puuty we'wena. Tyā'wē yûurra', andy yacj puuty uyya' yajcy i'cue. Tyāasa i'cue yuuwemeesa yuu. ¹² Andya' tyāa carta's fi'jrra', tyāa ewmée yûusa's atseyajcyna tyā'wē yûumeetj, sa' ewmée yûute ñussa'sva yajcyna tyā'wē fi'jmeetj, naasáa i'cue'shtyi' wala yuj yaaqui'tj Dyus dyi'pte tyā'sa' i'cue'sh jiyucajnrráatj tyā'wē fi'j. ¹³ Tyāasatj i'cue'sh cytey yuute' wala wechawa'ja's jypa'ga.

Nava na'wē wechawa'ja's ji'pjutj tyāajû jweeírráatj wala wechawa'l' ji'pju i'cue'sha' Tito's wala ewrráa jypa'garra ewrráa ne'cue jype'l'jna úsu' atsa' wechanac shawend naa pa'ga. ¹⁴ Andya' Tito's cajatsrra' i'cue'shtyi we'wena: Wala ewsata' jîjt tyā' íshiini casejme'. I'cue'sha' andy yaacyni's cytey i'cue yuu, Tito's ew jypa'gana. Tyāasa andy we'weni' bagachteva isasarrarráata'. ¹⁵ I'cue'sha' ma'wēne'cue ewcuërráa jypa'garra tyajy we'weni's cytey nwēese'l' tyā'wē ew yûuni's yajcyrrac Tito' jweeírráa i'cue'shtyi's wala wechá'. ¹⁶ I'cue'shtyi's quíjte yujva ewmée yaacywa'l' ji'pjmeetj, tyāasatj wechá'.

Ji'pjuni's wa'lmée wechana peesni

8 ¹ Âchja' yacjtjêl'jwe'shtyi pta'shi'tj Dyus luuch Macedonia quiwesuwe'sha' pu'chwa'ja's áate caavya'ja'jty Dyus caayaqui'tje.

²Tyāawe'shtyi' tyacue wala tjēyte fi'nzewa'lj pa'jrrava, Dyus yacj jwee'fírráa chjāchja fi'nzecajncu tyā'wē yūu, tyāa pa'ga wala wechana fi'nze'ty. Tyāasaty wala ji'pjmeesarrava ūchji'ndymée pees. ³Tyāawe'sh ji'pjuni yu'sa' wa'lméety pees, sa' ma'wērráava yūuna pacuerraty tyā'wē yūu. Tyā'wē yūuni's andya' ew jiitj. ⁴Tyāawe'sh we'werra': Cue'sha' yacjtjē'jwe'shtyi pu'chya' vyuu pcjacj wēje'tja'w atsa' indya' ¿ma'jiqui'ng? jínaty we'we. ⁵Atsa' andya' cytee pa'j yu' yuumeetyna sūju'ne'tjca. Nava nyafyte' tyāawe'sh cacue yuunaty Dyus cusete ducj Dyus jytjāasnírrá's cytey yuuya'. Tyā'wē yūurraty cue'sh ma'wē jycaatjeva cytey yuuya' yajcy. Tyā'wē yūuni'stju pta'shi'. ⁶Atsa' Tito nyaffi i'cue'sh yacj ūsrra', vyuu pcjacjya' tacjcu tyā'sa' pcjacjna cāaja'cjan Tito's neewe'wetstju qui' yuja' naa pa'ga. ⁷I'cue'sha' quijteva jyuca ājāsa i'cue Dyusrráana yajcyna, wa'lmée caapiya'jna, wala jiisa i'cue, dund pa'pchuwa'ja'sva nwēese'jna andynava ajtsemée peeygāasa i'cue. Tyāasa pu'chwa'lj vyuu pcjacjwa'ja'sva tyā'wēy myūuwe.

⁸Juuna' jycaajna tyā'ji'tsmeetj, naasáa vitesa pa'pchuni's jiyurra', i'cue'shva isa peeygāja'tsrra', tyā'wēy pu'chjivá'cue sūjrrarráatj tyā'jī'. ⁹I'cue'sha' peecy jii i'cue cue'shtyi jype'jsa Jesucristo peeygāani's. Tyā' ji'pjsac yu', nava cue'shtyi wala peeygājrra ji'pjmeesac yuu, tyajy ji'pjuni's cue'shtyi ūsya'.

¹⁰I'cue'sha' jū'na añutey pu'chya' tacji'cue, nava jycaatjerráa tyā'wē yūumée, peecy yuu i'cue tyā'wē pu'chya' yajcy, atsa' tyā'wē yūunisa' ewsa yuja' jínatj yu'cypeje' andya'. ¹¹Nyaffíva ma'wēcue wechana peesna ūsu' i'cue'sh ji'pjuni yu'sa', āchva tyā'wēyrráa myūuwe cāaja'pjcach. ¹²Tyāa pa'gatey ma'wēcúerráa ji'pírrava, wa'lmée wechana peesni's Dyusa' jypa'ga'c. Dyusa' jiia', ji'pjmeeteva.

¹³Tyā'wē i'cue'sha' vitesaty pu'chte', tyāawe'shrráa peejimée fi'nzete', i'cue'sh yu' ji'pjimée tjēyte fi'nzecajn tyā'jī'tsmeetj. ¹⁴Puuty ya'pu'chna ja'ndarra'j peejimée fi'nzecajntju tyā'jī'. Áchj naa ensuy yu' i'cue'sha' quijva ji'pji'cue vite peejiina fi'nzesaty pu'chwa'lj. Nava vite ensu' i'cue'sh ji'pjimée peejiina fi'nzetspcachja', tyāawe'sh i'cue'sh peejini's pu'chjityna. Tyā'wē yūuna puuty peejimée ya'fi'nzena. ¹⁵Tyā'wē puuty pu'chwa'ja's pta'shrrac Dyus libroute na'jī': Wala pcjacjteva quijyaame', sa' le'chcuée pcjacjanava peejime' jī'c.

Tito yacj vite caapi'qui'jrra caajni

¹⁶Dyusa' Tito's caayaqui'jne' andy na'wēy i'cue'shtyi's peeygāawa'ja's. ¹⁷Tyāa pa'ga āchja' i'cue'shtyi's tjengya' yuja' quimva jycaajmeete, tyajy ūuste peeygāawa'ja's yajcyrra, sa' andy neewe'weni's cytey yuuya' yuja'.

¹⁸Tito's pi'cyna teech yacjtjē'j cajatstju. Tyā'sa' Dyus luuch msuuwe'shva wala neewe'we'ty Dyus yuwe's wala pta'sh pu'chsa' jīna. ¹⁹Sa' tyā'wērráa neewe'wemée, tyāa yacjtjē'ja's tyjityjtyi. Na'wē

Dyus dyi'pte cselpi'ji'l'jwa'l'j vyuu pcjacija ũstja'w tyā'sna andy ducjya' Jerusalenna u'juetste pi'cyna u'l'jwa'l'jsa jīrraty tyjityj. ²⁰ Andya's ewmée nuywe'wewe'shte, tyāa yacjtjē'ja' andy yacj ja'nda yuuwa'l'jsa', na'wē peeswa'l'j pcjacija ũsta' tyā'sna jyūna u'juetste. ²¹ Quījteva jyuca ewrrāa yūuya' ũstju, Dyus dyi'pterrāamée, nasaa dyi'pteva tyā'wēy.

²² Titowe'sh tyāa e'nzsarrāamée, vite yacjtjē'ja'sva cajastju, tyā' ew yūuwa'l'j yu'sa' quījteva jyucac pa'p'huna fi'nze', sa' āchja' i'cue'sh yuutyi'sa' wejycu wala tjaacue wechana yaaqui'. ²³ Tito cytee pa'tje', i'cue'shtyi pēyivāatyna ¿Tito' quimna? jīna, atsa' Pablo yacj mjīi pu'chsa' ayte cue'shtyi selpisāa jīne'cue. Meerrava vite yacjtjē'jwe'shtyi vāa ¿quimtyna? jīna pēyityna atsa' Dyus luuch neewe'werra caajnisata', Cristo's selpisāa jīne'cue. ²⁴ Āchja' i'cue'sh peeygāani's āate mcaavya'ja'l'jwe tyāa yacjtjē'jwe'shtyi ew jypa'gana, cyaj Dyus luuch vite ajsu pcjaacjesawe'shva i'cue'sh peeygāani's jiyutyna, atsa' i'cue'shtyi andy we'werra': Ewsata' jī'tj tyāava cytey casejena.

Yacjtjē'jwe'shtyi pu'chwa'l'j vyuu pcjacji

9 ¹ Dyus yacj fi'nzesa yacjtjē'jwe'shtyi pu'chya' vyuu pcjacija'ja's i'cue'shtyi caayaquil'jina fi'l'jwa'l'j peejymeena sūju'tj, ² tyāa pa'gatey i'cue'sha' quījteva wa'lsameeteva jīitj. Tyāasatj Macedonia quiwesuwe'shtyi'sa' wechana na'l'jina pta'sh: Acayasuwe'sha' jū'na ańutey pu'chya' ij ũsta' jīitj. Atsa' Macedonia quiwesuwe'sh maanzcuēesava i'cue'sh pu'chya' yaacyni's jiyurra', tyāawe'shva pu'chya' jajcytyi. ³ Tyā'wēteva naa yacjtjē'jwe'shtyi' neewe'wetstju, cyaj andy we'werra': Corintotewe'sha' pu'chya' ij ũsta' jīitj tyā' īshiini yuumeena. I'cue'sha' cytey yuucajtju tyā'jī'. ⁴ Tyā'wēme', Macedoniajūwe'sh maafīa' andy yacj ja'ndatey yuusa' i'cue'sh cytey yuumée ũsiyna cpaaquityna, atsa' wala tjaame yujna i'cue'sh tyacue wala pu'chya' ũsta' jīnisa tyā'wē cytey yuumeete'. ⁵ Tyāa sūjrratj naa yacjtjē'jwe'shtyi yatste caajya' jajcy i'cue'sh tashna, atsa' tyāawe'sh pa'l'jrra' na'wē pu'chwa'l'j pcjacija' jajcy i'cue tyā'sa' pcjaci pu'chna jyā'cjan. Cyaj i'cue'sh wala pcjacija' neeyūui'cue tyā'sa' ũchji'ndymée cāaja'l'jane'cue, macue peeswechteva.

⁶ I'cue'sha' peecy jii i'cue: walamée mjīite', ũ'va wala meec caseje'. Nava wala mjīite', ũ'va tyā'wēy walac caseje'. ⁷ Teechsa na'wērraj i'cue'sh ũuste macue peeswechte', tyā'srrāa cytey yuuwa'l'ja'. Wa'l'na tyā'wē yūuwa'l'jme', tyāa pa'gatey Dyusa' peeygāja'c ũuste wechana tyā'wē peessa's. ⁸ Tyā'wē yūute', Dyusa' peejimée ũsna nes yuuna i'cue'sh peejini yu'sa' jyuca. Tyajīrrāa i'cue'sha' vitesatyva ũchji'ndymée wala pu'chya' ājāne'cue. ⁹ Tyā'sna we'werrac Dyus libroute na'l'jī':

Ji'pjmeesaty wa'lmée wechana pu'chsa's tyā'wē ew yūupa'ga,
Dyusa' peejymée ũsna nes yuuna jī'c.

10 Uujwa'j fiwa's Dyuscu ūsu', sa' tyāaírráac cbuucha'jna nuywalá'. Tyāa pa'ga i'cue'sha' ū'wa'ja's peejymée jyuca uyrra', vitesaty peeswa'ja'sva wala uyuune'cue. 11 Tyā'wē yūute!, i'cue'sha' quíjquíjva ji'pjsa yuurra wa'lmée pu'chya' ājane'cue. Atsa' i'cue'sh ūchji'ndymée peesya' pcjacjni's cue'sh jyūna u'tje!, jypa'gasa yacjtjē'jwe'sha' Dyusa's wechaatyna. 12 Na'wē yacjtjē'jwe'shtyi pu'chwa'j cajasttja'w tyā' tyāawe'sh peejinírrá's selpiwa'jsame!. Tyā'wē yūupa'ga tyāawe'sha' Dyusa's wala wechacajn tyā'wē pu'chjittja'w. 13 Na'wē pu'chnisa's tyāawe'sha' jypa'garra', Cristo jycaajni's nwēese'jsa yuj yu'ta sūjna jiyutyna, tyāasa Dyusa's tuutje'jna wala wechaatyna, tyā'wē i'cue'sh wa'lmée peesya' pcjacjrra tyāawe'shtyi peesna vitesatyva peespa'ga. 14 Dyus pu'chte i'cue'sha' tyā'wē ew yūupa'ga, tyāawe'sha' iiméj wala wechana Dyus yacj puuty we'wetyna i'cue'sh pa'gate. 15 Dyusa's iiméj wala wecha'tja'w tyajy Nchi'ca's yuu cue'shtyi peespa'ga.

Pablo juuna' jycaajwa'ja's Cristo ūsni

10 1 Andya' Cristo na'wēy wala peeygājna i'cue'shtyi we'we'tj, andya's atsewe'wena na'ji'i'cue tyā'sna: Pablo' cue'sh yacj ij ūsrra yu' ma'jīme!. Nava jyu'j tyuteeyā'jrra', wala juuna' we'wena jycaaja'c jīna i'cue nuywe'we!. 2 Andy i'cue'sh tashte pa'jrra maafityi's juuna' yuucajmen, andya's nuywe'wenuwe, tyā'wē Dyus jytjāasnime'scu juuna' jycaaja' jīna. Tyā'wē nuywe'wesa yacj yu' puuty pdyi'puya'rráa ūstju maa yacjva. 3 Andya' i'cue'sh na'wēy nasarráa yujtj. Nava andya' naa quiwetewe'sh na'wē puiiya' ūsmeetj. 4 Cue'sha' naa quiwete puinisa yacj pui'tsmeetja'w. Dyus caaūusutje'jnisa yacjtja'w pui!. Tyāasa ewmeesa yu'sa' macue seena' wasatewa cnaywa'jsatja'w. 5 Tyāasatja'w cnayu' Dyusa's jiyucajmen yupsa yu'sa' ma'wēsatyva, cue'sh ūus yaacyni yu'sa' nwēese'jmée, Cristo caaūusutje'jnírrá'stja'w cytey yu' Cristo's nwēese'cjan. 6 Sa' i'cue'sh yu' ew yā'j nwēese'tjeva, maafí yu' nwēese'jmée ūssatyi's maatyva castigāyya'rráa ūstju.

7 I'cue'sha' āacjēwe'shrrá's i'cue tjengu', tyā'wē maava Cristo's selpisatj sūjna yaacysa', andynava tyā'wēy Cristo's selpisana sūjna yaacywa'jna. 8 Andya' juuna' jycaajwa'jsatj jīna we'wena nestju yu', nava tyā'jīpa'ga tjaamewa'j yu' ji'pjmeetj. Tyāa pa'gatey Cristoc tyā'wē iiviitumée wejyva juuna' jycaajna yu'cypejwa'ja's andyna ūs, i'cue'sha' Dyus yacj chjāchja fi'nzecajn. 9 Atsa' ūucjajncu carta juuna' fi'jrra caja' sūjna yaacynuwe. 10 Sa' i'cue'sh we'werra!: Cartate yu' wala juuna' we'wena fi'ja'c, nava puuty pdyi'purra yu', jycaajwa'j yu'sa' āja'tsme' jī'i'cue. 11 Nava tyā'jīsa' jypa'yaquina, ma'wēta jyu'ju ūsrra, juuna' we'wena carta caja' na', tyā'sa' cytey yu'nja i'cue'sh yacj puuty uyna pa'jrra'.

12 Wala mjiisatja'w jīna weech we'wesa yacj caaja'nda'jna ūs wēemeetj. Tyāawe'sha' iiméj wala jiimeeta', tyāasaty vitesate tjaacue mjiisatja'w jīna fi'nze!. 13 Andya' tyāawe'sh na'wēy vitee mjiinisu iweech we'wena fi'nzewa'j

ji'pjmeetj. Andya's Dyus mtee pa'l mjíina pecújwa'ja's ũsuna cytee pa'l mjíiwa'lsatj. Tyā'wērra fírráatj andya's Dyus caatje', i'cue'sh tashteva pa'l. 14 Tyā'wē andy pecújwa'jmeesu yu' u'jmée ũstju na', i'cue'sh tashsuva andy pecújwa'jmeevats yu', i'cue'sh yacj ũsya' nyaffi pa'jwa'jmée ne'tca yu'. Nava i'cue'sh tashsu andy pa'jwa'cj yu', tyāa pa'gatj Cristo caapiya'jni ewsa's i'cue'shtyi pta'shya' andy nyafyte pa'l. 15 Tyāasa andya' vitee mjíini's iweech we'wena ũsmeetj. Tyā'wē we'wemée wejyva Dyus pu'chte', jweefírráa i'cue'sh yacj wala mjíiya' āja'nja, i'cue'sha' jweefírráa Dyusa's jiyucajn sūju'tj. Nava Dyus mtee pa'l mjíicaatje', cytee pa'jrráa. 16 Tyā'wē yūurra tyāa e'su' vite ajsuva caseje'nja Dyus yuwe ewte nviitwa'jsa's pta'shna. Nava vitee mjíinisu yu' iweech we'wena u'came'nja sūju'tj.

17 Andytju mjíi jína we'wepcachte, wejyva Dyuscu mjíi sūjnarráa wechana fi'nzewa'ja'. 18 Tyāa pa'gatey iweejch we'wesa tyā'wē Dyus dyi'pte ewsa caseje'tsme', naasáa Dyus we'werra tyā' ewsa' jínisa yuurráa ewsa'.

Cristo caajnisatja'w jína íshiina u'jusa

11 1 Andya' i'cue'shtyi yu'cypejya' shiingu'ne'tjca, nava tyāatyí' mwantaíwe. Macue āja'tsmeevá'ntca, nava āchva mwantaíwe. 2 Andya' i'cue'shtyi' Cristo tashu wej yujva tyutee jytjáasu'tsmeetj. Cna'sava ma'wēga teeche yacj yuurráa imi'rra fi'nze', tyā'wēy i'cue'shtyi' Cristo yacj yuurráa caafi'nze'jya'tj neeyūu Dyus dyi'pte. 3 Nava echtjē'ja' nyaffiwa ma'wēga Eva's íshii, tyā'wēy āchva i'cue'shtyi's íshiijaváana, atsa' Cristo yacj tyacue ew fi'nzetsrrava tyuteevá'cue sūjrratj ũucju'. 4 Tyā'wē yaacyajní i'cue'sha' wa'lmée jypa'gana ũsi'cue andy pta'shi'tj Cristo caapiya'jni's tyā'wémée fiy pta'shsaty. Sa' nyaffi jypa'gai'cue Dyus Espiritu's tyā'wémée fiysanava wa'lmée wechana jypa'gana ũsi'cue. Tyā'wēy Dyus yuwe ewte nviitwa'jsa's nyafíi wēse'ji'cue tyā'wémée fiysateva wa'lu'tsmeei'cue. 5 Tyā'wē fiy caapiya'jsawe'sha' Jesus jycaajnisáa walasatja'w jī'ty, nava andya' tyāawe'shte ājmeecuesa ne'tca sūju'tsmeetj. 6 Andya' we'weya' yu' ājātsmeene'tjca, nava andy ũuste yu' wala jīitj. Tyāasa írráatj andya' i'cue'shtyi' āate caajiyu'ju' andy jiyuni's bagachteva. 7 Tyā'wē i'cue'shtyi cchjāachja'jya' sūjrra, i'cue'sh yuutyi's vyyu pējymée andy vyyu yacjtju fi'nze' Dyus yuwe's pta'shna. Sa' tyā'wē yūurra', ewmeevá'ntca yuucy. 8 I'cue'sh yuutyi' vyyu tjāasmée, wejyva Dyus luuch vite ajsuwe'sh andyna peestyi tyā'snatj i'cue'sh tashte caaselpi'ji'. 9 Sa' i'cue'sh tashte ũsrra', andya' peejiirrava i'cue'sh yuutyi' maa yujtyva tjāasmeetj. Andy peejini's Macedonijū yacjtjē'jwe'shtyi pees. Tyā'wētj wala jypa'yacy fi'nzena ũsu' i'cue'sh yuutyi's maa yujtyva tjāasmée, sa' i'cue'sh yuutyi's tjāasme'nja bagachteva. 10 Andy ũuste isa yajcyrra we'weni's Cristo' jiia', atsa' Acayasuwe'sha': Pablo' tyā'wē vyyu tjāascu jīya' ājāmeetyna. 11 Cue'shtyi ajtserrac Pablo' tyā'wē we'we' sūjuvácue. Nava tyā'wē yūumée, i'cue'shtyi wala peeygāja'tj tyā'sa' Dyusa' jiia'.

¹²Nava na'wětj vyyu tjāasu'tsmée na' tyā'wē yūuna nes yu'nja, andyva ma'wētca quījva tjāasmée Dyus yuwe's pta'shna ūsu' atsa' tyā'wēy tyāawe'shva quījva tjāasmeetja'w jīya' ājāmeetyna. ¹³Tyāawe'sha' Jesus jycaajnisatja'w jīna īshiinisa's isasa na'wē we'wena u'jusarráata'. ¹⁴Tyā'wē yūuni's fiy yuj yuune'ta sūjna yaacywa'j ji'pjmeetja'w, tyāa pa'gatey echtjē'j seena'sa yujrrava angel ewsa na'wē yuurrac vya'. ¹⁵Atsa' cya'jy echtjē'ja's selpisaava tyā'wēy ewmeesarrava ewsa na'wē yuurra vya'. Nava tyā'wē ewmée yūuna fi'nzepa'ga vituwa'ja's ji'pjutyna.

Cristo caajnis Pablo pytjaa yuuna fi'nzeni

¹⁶Andya' na'jī'tj na': Luucumeetj, nava tyā'wēteva luucuna sūjna yaacysa yacj yu' luucu na'wēyrráava qui' we'weya'vatj: ¿Andyrráa quīj yūurra iwe'jch yaacywa'ja's ji'pjmée yuuqui'tj? ¹⁷Iwe'jch we'wenisa' Cristo jycaajnisameeta', naasáa luucu yuusáa we'wenisarráata'. Tyāa pa'ga andya' luucu yuusáa we'wenirrá's we'weya'vatj. ¹⁸Naa quiwetewe'shrrá's jiirrava nacue wala iwe'jch yaaqui'ty atsa' andyva iwe'jch yaacywa'j ji'pjne'tca. ¹⁹I'cue'sha' tyacue wala jiisatja'w sūju'i'cue nava luucu we'wesa yuutyi' jiyumeei'cue nwēese'je'. ²⁰Tyāasa i'cue tyāawe'sh juuna' caaselpi'jini's wa'lu'tsmée, īshiirra vyyu cusa'ja'ty, sa' i'cue'shtyi iiyamurra ajtsenaty jypel'je' uyiina. ²¹Nava andya' tyā'wēy juuna' yuuya' ājāmeetj, atsa' tjaame yuja' nava pta'shi'tj.

Nava vite tyā'wē yā'j iwe'jch we'wetste', andyva tyā'wēy luucu we'weni's we'wewa'j ji'ptju. ²²Tyāawe'sha' hebreowe'shtyna, atsa' andyva tyāatj. Israelwe'shtyna, atsa' andyva tyāafirráatj. Abraham ji'ljtyna, atsa' andyva tyajūjywe'shtju. ²³Cristo's selpiisaatja'w jī'ty, atsa' andya' tyāawe'shte we'jy jytjaacue selpiisatj. Tyā'wē iwe'jch we'wenisa' luucu yuusáa we'wenirrá', nava we'wetstju. Andya' tyāawe'shte jytjaacue mjiisatj, tyāawe'shte jytjaacue pcyuunisatj, carcelte maanzcuēe usva cyuupjnisatj, maanzcuēe usva uuwa'tjerráa yā'j fi'nzesatj. ²⁴Andya's judiwe'sha' tajts us castigāyrra' treinta y nueve ājpcachtyi pechujcue. ²⁵Tecj ustju pāpani yuu. Teech ente' cuet wāatajrra icje'dyijty. Tecj uscu andy u'jni barco' icj dyiicjē cjēe. Vite ente' teech cus pe'te teen utatj icjsu pejdna u'ju'. ²⁶Iméj wala pecūjsatj, yu'wala seena'suva ctejcana, peswée icj wēeni, andy nwe'sh íva icj wēeni, maava tyā'wēy yūu wēeni. Chjamsu ma'c yuu, meerra' dyi'tje ma'c yuu, meerra' icjte ma'c yuu, nava tyā'wērrarráatj ūucj ūucjte fi'nzena ūsu'. Yacjtjē'jwe'shtja'w jīna īshiisava icj wēeni yuurráatj u'ju'. ²⁷Mjiina ñustetj fi'nze'. Maanzcuēe cusva dejmeetj u'juwa'j ji'pju', pytjaa wēena, yū'wēena, ū'wa'j uymée maanzcuēe usva u'jutj, ropa ji'pjmée cumana pytjaa yuuna.

²⁸Tyā'wē ñuste fi'nzenisarráaty ji'pjumeetj. Dyus luuch msuuwe'shtyiva jyuca peeygājna yaacywa'ja'sva een isatj ji'pju. ²⁹Maava Dyus yacj chjāchjamée fi'nzetste', andy yuu tyā'wē yuuts na'wētj yaaqui'

tyāawe'shtyi peeygājna. Maaíityi's pcalte cweete'jetste', andy yuu tyā'wē pcalte wetets na'wētj yaaqui' tyāawe'sh pa'gate. ³⁰ Andya' iwejch we'weya'varra', wejyva andy pytjaa yuuna fi'nzetste Dyus pu'chcu tyā'srráana yaacywa'l' ji'ptju. ³¹ Bagachteva tuutje'ljni fi'nzewa'jsa cue'shtyi jype'jsa Jesucristo Tata' jiia' andy ishiimée isa we'weni's. ³² Vite ente' andya's na'wēty yuu: Damasco chjambte ūste', Aretas jycaajna ūsni quiwete ne'jue'sha' chjambte u'cani vityte andyna tundwa'jsa tyajc. ³³ Nava andya's canastate acjrra ventana murallacjety spajcy. Tyā'wē yūurratj iyu ewmeesa cusejū.

Cristo caavya'ja'jni's uyni

12 ¹ Peequírráa iwejch we'weni yacja' quij yujva ewsa ya'cutyi'ji'tsme', atsa' wejy yuuva Cristo caavya'ja'jni's uynirrá's we'weya'vatj. ² Catorce añu yuutsa' tyāa ensu' teeche pitstjē'j Cristo's nwēese'jsa's tecj cielute cāpcach jyūna u'jnic yuu tyāa pitstjē'ja's jiiti. Tyā'sa' pety cacue ma'c jyūna u'jni yuu, meerra' cacue ji'pjmée ma'c jyūna u'jni yuu nava Dyusrráa jiina. ³ Ma'wēne' yuu cacue ji'pj ma'c jyūna u'jni yuu, meerra' ji'pjmée ma'c jyūna u'jni yuu tyāa yu'sa' jiimeetj, Dyusrráa jiia'. ⁴ Nava jyūna u'jni yuj yuuc Dyus ūsnite pa'j. Atsa' cyteea' we'weni wēse'cj, quim yujnava pta'shwa'l' meea's. ⁵ Tyā'wē yūunisarrá' iwejch yajcyya' ya'ajayujuna. Nava iwejch we'wena ūs wēemeetj, naasáa andy pytjaa yuuna fi'nzenirrá's yaacywa'l' ji'ptju. ⁶ Andy iwejch we'we wēevats yu', tyā' ishiinisamée yuj yuuna, tyāa pa'gatey isasarrá'scu ya'we'we' naa pa'ga. Nava tyā'wē yu' iwejch we'we'tsmeetj, cyaj maa yujva andya's tjaacue walasana sūjna yajcymetyyna andy fi'nzeni's uyna wēse'jrrava. ⁷ Tyā'wē Cristo caavya'ja'jnisa' iiméj seena' wala zhichcuesa yu'c, atsa' tyāaty jiyurra andya' iwejch yaacywe'shte, andy cacuete seena' wala acasa caapa'ja'jnitj yuu, echtjē'j caajnis. ⁸ Atsa' Cristo's tecj usva pējytju tyāa aca's caycase'cjan. ⁹ Nava Cristo' na'wērráac pas: Peeygājra andy pi'cyna ūsni wejy tjaacue ewsa', tyāa pa'gatey chjāchjameesafírráa andy pu'chni's jypa'gawa'jsata' jī'c. Tyāa pa'gatj wechana fi'nze', aca yu' casemeeteva, Cristo' andya's peeygājra pu'chna nes yuuna sūjna. ¹⁰ Tyāa pa'ga andya' wa'lu'tsmeetj, chjāchjameecuē fi'nzeni, wēeshuni, peejiina fi'nzeni, yajtsena fi'nzeni, Cristo's selpiipa'ga tjēysa pa'ja'ty tyāaty, tyāa pa'gatey naa cacuete jwee írráa ñuste chjāchjameecuē fi'nzetsrra yu', jwee írráatj Dyus yacj chjāchja fi'nze'.

Dyus yacj fi'nzesa Corintotewe'sh ewmeeváa fi'nzena ūstyna sūjrra Pablo cuj yaacyni

¹¹ Luucu na'wētj peequírráa weech we'we, nava i'cue'sh jiyucajncu tyā'wē we'wewa'l' casej. Andya' Dyus dyi'pte yu' ājmeecuesarrava, na'wē Jesus jycaajnis walasatja'w jī'ty tyāawe'shte yu' ājmeecuesameetj. Tyāa

pa'ga i'cue'sha' andy ju'ngu yuuwa'jsa i'cue yu'. ¹²Tyãasatj andya' i'cue'sh chshavyte selpiina ũsrra', quĩjteva wantäyna quĩjquĩva caavya'ja'tj quim yujva ewunimeesa iiméj wala zhichcuesaty. Tyã'wë yūunisaty caajiyu'jsa yu', andya' i'shiimée Jesus jycaajnisateva. ¹³Dyus luuch vite ajsuwe'shte tjaacue äjmeecuesamée i'cue, nava andya' peeygäjrratj i'cue'shtyi's pu'ch tjäasmée. Tyã'wë i'cue'shtyi quĩjva tjäaspa'gamée ñpeltunaĩwe!

¹⁴Ächja' i'cue'sh tashna pa'jya' yuuwa'ja's pjeu'jrra ji'ptju naa yacja' tecj us yujya' yaaquitstju. Nava i'cue'sh yuutyi's tjäasme'nja, tyã pa'gatey i'cue'sh pu'chwa'jsamée i'cue, wejyva i'cue'shtyi andy pu'chwa'jsatj ney na'wë. ¹⁵Tyã pa'ga andy ji'pjuni yu'sa' jyuca ũsu'nja, andy ityi fi'nzeniyä'jrra, i'cue'sh ũustyi vitu jytjäasmeerra. Tyã'wëtj andya' i'cue'shtyi jweefírráa peeygäja', naapcachja' i'cue'sh yu' andya's jweefírráa i'cue atse'.

¹⁶I'cue'shtyi andy quĩjva tjäassameete jiirrava, maafí yu' na'wë i'cue we'we': Tyã'wë äate yu' quĩjva tjäasmeerrava, ma'wë cutyi'jwa'ja'sva jiic yu', tyãasarráac quĩjva pëjymée ji'i'cue. ¹⁷Tyã'jicajna', na'wë Tito yacj teech yacjtjê'j i'cue'sh tashna nyafyrraj caatj, ¿tyagach vá'ntca i'cue'shtyi' i'shiia' yajcyrra caaj? ¹⁸Tito's i'cue'sh tashna nyafyrraj caja'tsrra', vite yacjtjê'j caapi'quij'rratj caaj. ¿Tyän ente vá' Tito i'cue'shtyi i'shii? Andya' Tito yacj teehsa na'wërraj ew yajcynarráa fi'nzesate ¿jiimeevá'cue?

¹⁹Cue'sh dyi'pte ewte neeyūu wëerrarráac tyã'ji' sūjvú'cue, nava tyã'wëmeetj, wejyva Dyus dyi'ptetj we'we' Cristo jycaajnírrá's, cyaj i'cue'sha' Dyus yacj jweefírráa chjächja fi'nzewa'ja's uyuune'cue, andy yacjtjê'jwe'sh yaacynisa. ²⁰Tyã'wëme', i'cue'sh tashte pa'jrra', andy jycaajnime's váa uyu'nja. Sa' peeygājna pa'japcachte, juuna' yuuwa'j váa casejena sūjte ũucj yuja'. Tyã'wë andy pa'ja'tste', i'cue'sha' puuty puina, vitée ji'pjunity atseyajcyna, ũusachana, puuty tyuteena, yuwe susna, e'sgarráa atsewe'wena, iwejch yajcyna, ewmée váa fi'nzena ũs yuune'cue sūjte ũucj yuj yu'. ²¹Sa' i'cue'sh tashna yujya'vatj tyã ente' i'cue'sh pa'gate andya' Dyus dyi'pte tjaamewa'j ji'pjuvájna sūjrra ũucju'tj. Tyã'wë i'cue'sh tyacue tyachteva pcal canzhsate írráa fi'nzena ũste uyna pa'jrra', wala ñusna ũnewa'j ji'pju'nja sūjrratj tyã'wë ũucj yaaqui'.

Yu'cypejna yuwe wechaa caajni

13 ¹Naa yacja' tecj us i'cue'sh tashna pa'jya' yuuwa'ja's yaaquitstju. Cytee pa'jrra', quĩj yuwe's pjeu'ju'tsrrava, jiisa e'nz meerrava tecj tyajrra yuuwesa's castigäywa'j yuuna. ²I'cue'sh yacj cytee nyafíi ũsrra', jypa'yacy fi'nzecajn dyiicjēy we'wetj pcalte fi'nzesaty maatyva na'jina: I'cue'sh tashte qui'quin pa'jrra', peltunaĩme'nja jini's ächja' qui' caayaqui'jitstju nee jyu'tje ũsí. ³I'cue'sha' andya's jiyu wëena ũsi'cue Cristo caajnisadyijteva, tyã'sa' andy pa'tje jiyune'cue. I'cue'sh äjmée yūusatyi's Cristo' juuna'meecuē jycaja'tsme', tyãasa tyajy juuna' jycaajni's

i'cue'sh cshavyte caavya'ja'jya' ũsa'. ⁴Tyā' naa quiwete chjāchjameecuẽ fi'nzesa na'wẽ yuj cluuste fyutsni uuc, nava ityĩ yuuc seena' chjāchja yuuwa'ja's Dyus ũste. Andyva tyāa na'wẽy naa quiwete chjāchjameecuẽ fi'nzeni's ji'pjurrava, tyāa yacj fi'nzerra', Dyus cchjāachja'jnitj fi'nze' i'cue'shtyi yu'cypejwa'jsa.

⁵Tyāa pa'ga ċma'wẽ ũscytja'w? sũjna meswe, aan Dyus yacj fi'nzena ũsne'cue. Īshiisamée Dyus luuch dyijrra', ċJesucristo's ũuste ji'pjcue'? ⁶Jesucristo's ũuste ji'pjdyijrra', andya's ew jiyune'cue, Dyus luuchtju jīna isatj we'we' naa pa'ga. ⁷Tyāasatj i'cue'sh pa'gate Dyus yacj puuty we'we', quījva ewmée yūuna fi'nzecajmen. Andya' ishiirra tyā'jī'tsmeetj, naasāa i'cue'sh ewrrāa fi'nze jytjāasrratj tyā'jī'. Andya' īshiisa na'wẽ vántca, nava tyāa yu' quīj yuumeena. ⁸Tyāa pa'gatey isasa's cytey nwēese'jwa'jrrāa ji'ptju. ⁹Dyus yacj i'cue'sh chjāchja fi'nzetste', andya' wecha'tj. Andy yu' chjāchjameecuẽrrava, Dyus yacj puuty we'wena nes yu'nja, i'cue'sha' Dyus yacj chjāchja fi'nzeya' ājācajn. ¹⁰I'cue'sh tashna yujmey, naa carta's fi'jrra yatste cajastju, cyaj andy pa'jrra', i'cue'shtyi juuna' yuuwa'j ji'pjume'nja. Tyā'wẽ juuna' yūuwa'ja's Cristoc andya's neewe'we, i'cue'sha' Dyus yacj tyutemée jweefirráa chjāchja fi'nzewa'ja's ji'pjucajn. I'cue'shtyi wejy yuuva cchjāachja'jnatj tyā'wẽ yū'.

¹¹Āchja' yacjtjē'jwe'shtyi neewe'we'tj ewrrāa fi'nzecajn. Quījteva jypumbamée fi'nzewa'jrrā's mpaacuewe. Cviisha'jni myūuwe. Cyteerraj zhichcue puimée mfi'nzewe. Atsa' ew caafi'nze'jsa Dyusa' i'cue'sh yacj nes yuuna peeygājna. ¹²Ūusuj jyuca yajcyrra puuty teeche na'wērraj yuwe mweechawe. ¹³Dyusa's jiisa yacjtjē'jwe'sh jyucaysaty yuwe wechaacaja'.

¹⁴Dyus yacjrrāa mfi'nzewe. Jesucristo pu'chjina, Dyus Espiritu yacj tyutemée fi'nzecajn.

SAN PABLO CARTA GALACIA QUIWESUWE'SH JÏI

Galacia quiwesuwe'shtyi wechana fi'jni

1 ¹ Andya' Jesucristo jycaajnis Pablo yaasetj. Naa quiwete pitstjê'jwe'sh andya's tyjityjrra jycaajnisameetj, wejyva Jesucristo vite' Dyus cue'sh Tata na'wê uunijüva qui' ïtyi vitcu tyāawe'sh jycaajnisatj. ² Andy vite' yacjtjê'jwe'sh ayte üssa tyāawe'sh yacj naa carta's fi'jrra cajastju Cristo nasa Galacia quiwesu pcjaacjena üssawe'shtyi wechana. ³ I'cue'shtyi' Dyusa' pu'chjina ewrrāa caafi'nze'jna vite' cue'shtyi jype'jsa Jesucristo. ⁴ Tyāa Jesucristo íc cue'sh pcaltiyi cjücjrra ewmeejü nwe'weya' peequí ya'ducjrra cue'sh pa'gate uu, Dyus jytjāasnirrá's cytey yuuna. ⁵ Tyāa pa'ga Dyusa's bagachteva wala wechawa'j ji'ptja'w.

Dyus yuwe vite yu' meea'

⁶ I'cue'sha' Cristo nwe'wenijü tyachmeyna tyuteerra Dyus yuwe vite fiy caapiya'jnirrá's nwēese'jna üsta' jñi's jiyurra', andya' wala cuj yaaqui'tj. ⁷ Ewte nviitwa'jsa Dyus yuwe vite yu' meea', nava i'cue'shtyi caypumba'j wēerrarrāa maafi yu' Cristo caapiya'jni's yu'ptjejrra fiy caapiya'jna üsta'. ⁸ Nava cue'sh pta'shtja'w tyā'wēmée fiy caapiya'jna pa'jatyna Dyus yuwe' jña atsa' tyā'wē yūsatyi' Dyus yuu iiméj seena' ewmeesata' jirra iviituwa'tje nviitni yuutyna. Meerra' andy ma'tj fiy caapiya'jna pa'j meerra' cielujü quíisa angel ma'c tyā'wē fiy caapiya'jna pa'j nava tyā'wē yūsua yuutyi' tyā'wērrarrāa yuuni yuutyna. ⁹ Na'jī'tj na': Maava Dyus yuwe's pta'shsatja'w jirrava fiy pta'shna pa'jatyna cue'sh caapiya'tja'w tyā'wēmée atsa' tyāa nasatyi' Dyus yuu iiméj seena' ewmeesata' jirra iviituwa'tjerrāa nviitni yuutyna.

¹⁰ Na'wētj we'we' atsa' i'cue'sha' peecy mjiyuwe: andya' naa quiwete pitstjê'jwe'sh andya's ew we'we jytjāasna üsmeetj, naasāa Dyus

caaũusutjel'nirrá'stju áate we'we'. Sa' naa quiwete pitstjê'ljwe'shtyi wechaa jytjâasna ũsrra', Cristona selpiisameerra tyã'wê yu'nja.

Judiu ji'jmée vite nasaty Dyus yuwe's pta'shsa Pablo

¹¹Yacjtjê'ljwe'sh mjiyuwe: Na'wê Dyus yuwe ewte nviitwa'jsa's pta'shi'tj tyã' pitstjê'ljwe'sh ũus yajcyrra caapiya'jnisame'. ¹²Tyã'sa' andya's naa quiwete pitstjê'ljwe'sh ũsmeeta', naasáa Jesucristo yuurráac caajiyu'j.

¹³I'cue'sha' jiijyã'jne'cue andya' nyafi' judiuwe'sh jycaajni's nwêese'jna ũsrra', ma'wê'tca fi'nze', sa' ma'wê'tca seena' juuna' yuuna Cristo nasaty ajtse iviituya' sũjrra'. ¹⁴Andya' judiuwe'sh jycaajni leya's quĩte yujva peejymée jyucatj cytey yuuna ũssa yu', andy ja'ndawe'sh ũsu'ty tyãawe'shte jytjaacue. Sa' andy yatsgawe'sh caapiya'jni's andyrráatj iiméj ew cytey yuusa yu'. ¹⁵Tyã'wê atsesateva, Dyusa' andya's iiméj wala peeygãjrra, mama tutyuj casejmeyna tyjityjrra nviitnisa ne'tca yu'. ¹⁶Tyãasac tyajy Nchi'ca's jiyuwa'j en ájte', andya's pa'yarra caajiyu'j tyã'wê tyajy yuwe ewte nviitwa'jsa's judiu ji'jmée vite nasaty pta'shcajn. Atsa' andya' maa yujtyva paapêjyya' u'lmeetj. ¹⁷Jerusalente Jesucristo jycaajnisawe'sh ũsu'ty tyãawe'shrráa yujtyva tjengya' u'lmeetj. Tyã'wê yũupcachte wejyva Arabia quiwentju u'j, sa' tyãa e'su shawendrra' Damascontju u'j.

¹⁸Sa' tecj añu scjêwnijütj Jerusalenna u'j, tyãasatj Pedro's jiyu, sa' cytee ũsu'tj tyãa yacj e'nz qui'su ájpcach. ¹⁹Nava Jesucristo jycaajnisawe'sh vite yu' jwee yu' uymeetj, naasáa Jesucristo nyacj Jacoborrá'stju uy. ²⁰Dyus dyi'pte isatj we'we', na'wê quim yujtyva paapêjymeetj jĩna fil'jatstju tyã' i'shiinisame'.

²¹Tyãa e'su' Siria vite' Cilicia quiwentju u'j. ²²Atsa' Cristo nasa Judea quiwesu ũsta' tyãawe'sha' andy yu'sa' iuuymeeta', ²³naasáa na'jĩnirrá'styi wêse'j: Cue'shtyi ajtserra iviitu wêesarrava, áchja' Cristo's jypa'gawa'ja's pta'shna u'ju' jĩni'styi wêse'j. ²⁴Tyã'wê wêse'jrra', Dyusa's wala wechaty andy tyã'wê yũupa'ga.

2 ¹Catorce añu scjêwnijũ' qui' u'tj Jerusalenna, Bernabé vite' Tito tyãawe'shtyi pe'jrra. ²Tyã'wê u'jwa'ja's Dyuscu pta'sh tyãa pa'gatj andya' u'j. Sa' cytee Jerusalente jycaajsawe'shta' jĩni ũsu'ty tyãawe'sh yacj dundte pcjaacjerra tyãawe'shtyi pta'shtju na'wê judiu ji'jmée vite nasaty caapiya'jal'tj Dyus yuwe ewte nviitwa'jsa's tyã'sna. Tyã'wê'tj pta'sh, tyã'wême' andy mjĩni' ewmeec yu' jĩwe'shte. ³Nava Tito andy yacj cytee ũsu'c tyã'srráa yujnava caacircuncidaĩ'jmeeta', tyã' judiu meec yu' na'sva. ⁴Tyã'wêteva tyãa entey cue'sh cshavyte u'caty cue'shva yacjtjê'ljwe'shtja'w jĩna i'shiisa. Tyãawe'sh yu' Tito's caacircuncidaĩ'j wêety. Cue'sh tyã'wê yũumeerrava, Cristo Jesus yacj cue'sh ew fi'nzeni's suw wêerraty peetjengu'jya' u'ca, judiuwe'sh fi'nzenitey caashwendu'j wêerra. ⁵Tyã'wêteva, wej yujva tyãawe'sh we'weni's cytey yuumeetja'w,

tyā'wē Dyus yuwe isa pta'shnirrá's i'cue'sh nwēese'jna nes yuucajntja'w tyāawe'sh we'weni's cytey yuumée.

⁶Cue'sh tyā'wē nwēese'jmeeteva, yacjtjē'jwe'sh jycaajsawe'sha' andya's caapiya'jwa'l'fiy yu' quīj yujva yu'cypejmeeta'. Macue tyāawe'sha' walasa ne'ta yu', nava andya' tyāaty' tjengu ji'pjmeetj, tyāa pa'gatey Dyus dyi'pte' maa yujva walasamée teeche'sa na'wērrarráatja'w naa pa'ga.

⁷Tyā'wē caapiya'jwa'ja's fiy yu'cypejna pta'shipcachte, wejyva tyāawe'sha' jiyuty Dyus yuj indya's caajne', tyajy yuwe ewsa's judiu ji'jmée vite nasatyva pta'shcajn. Pedronava ma'wēga judiu ji'jrráaty pta'shwa'jsa nviyt, tyā'wēy ne' indya's vite nasaty pta'shwa'jsa nviyt jinarráaty we'we.

⁸Tyāa pa'gatey judiuwe'shrráaty pta'shwa'jsa Pedrona caajsa Dyus írráac andynava caaj judiu ji'jmée vite nasaa cshavysu.

⁹Tyajiírráaty Jacobo, Pedro vite' Juan tyāawe'sha' walasata' jínisarrava, cue'shtyi'sa' ma'jmée Dyus ne' tyā'wē i'cue'shtyi's mjiíwa'jsa nviyt jírra wechana cuse ústy andyna vite' Bernabewe'shtyi na'jína: I'cue'sha' judiu ji'jmée vite nasa yacj mjiíne'cue, naapcachja' cue'sha' judiu ji'j yacjrráa mji'nja'w jírraty tyā'wē cuse ús. ¹⁰Naasáa yacjtjē'jwe'sh quíjva ji'pjmeé peejiina fi'nzesa yuutyi' pu'chwa'ja's pechcanamée yajcyna fi'nzene'cue jinarráaty neewe'we, atsa' tyā'sa' wala jypa'yacy cytey yu'tj.

Ewte neeyūuya' judiuwe'shva Cristo's ūuste jypa'gawa'ja'

¹¹Tyā'wē Pedro' walasa' jínisateva, andya' tyā'sa' wala juuna' we'wetj, Antioquíate pa'jrra' ewmeec yūuna úsu' naa pa'ga. ¹²Pedro' Antioquíate úsrra', Jerusalenu Jacobo caajnisawe'sh pa'jmeyna yu' judiu ji'jmée vite nasa yacj pcjaacjerra tyāawe'sh yacj wa'lmeec ū'we'. Nava Jerusalenuwe'sh pa'jyā'tje', tyuteerra pcjaacjeme', tyajy ji'j circuncidāynisawe'shtyi ūucjrrac tyā'wē yūu. ¹³Atsa' judiu ji'j Dyusna jiisa úsu'ty tyāawe'shva Pedro na'wētyi yūu. Tyāa pa'ga Bernabé yujva Pedrowe'sh yacjcu utyáa. ¹⁴Dyus yuwe ewte nviitwa'jsa' tyā'wē jycaaja'tsme' na's tyā'wē fiy yuutste', andya' Pedro's wala juuna' we'wetj pcjaacjesawe'sh cshavyte na'jína: Indya' judiurrava, ayte úsrra' vite pa'jmeyna yu' judiu na'wēmeeng fi'nze. Nava áchj vite pa'tje yu', ¿quíjya'nga judiu ji'jmée vite nasa yacja' utyaawa'jme' jisa na'wē yu'?

¹⁵Cue'sha' mama tutyuj casejí judiu ji'tja'w yu', sa' Dyusna jiimeesa ji'j yu'tsmeetja'w. ¹⁶Macue judiu ji'jrrava, Moises leya'srráa yajcyte', maa yujva yuuwemée ewsa ya'yu'tsme', naasáa Jesucristo's ūuste jypa'gate yuurráac yuuwemeesa ewte ya'neeyū'. Tyajiírráatja'w cue'sha' judiurrava, yuuwemée ewte neeyūuya' sūjrra Jesucristo's ūusuj jyuca yajcyrra jypa'ga, tyā'wē ley jycaajni yacja' yuuwemée ewte ya'neeyū'tsme' naa pa'ga. Atsa' leya's yaacysa' naa quiwete quim yujva yuuwemée ewte neeyūuwa'lsameeta'.

¹⁷Tyāasa ew yajcyte yu', macue judiurrava yuuwemeesa yuuya' Cristo's ūuste jypa'gameerra yu', pcalsaiírráa ne'tca'w. Tyā'jíte', leya's

nvijtrra Cristorrá's jypa'garra ne'tca'w yuuwe pcalsa yuu sũjuvácue. Wej yujva tyā'wēme!. ¹⁸ Moises leya's nwēese'lmeete ewna jĩrrava, e'su qui' we'werra': Pejca nwēese'tje ewna jĩna we'wesa tyā'wē yuuwesa yuuna. ¹⁹ Andya' Moises leya's nvijtrrava qui' nwēese'ljrra' yuuwesa yuuya'mée tyāa ley yacja' uúsaa na'wētj yuu, Dyusrráana nwēese'lja'. ²⁰ Andya' leya's nwēese'lja'mée Dyus yacjrráa fi'nzeya', Cristo yacj ja'nda uúsaa na'wētj yuu, Tyāasa āchj ĩtyi fi'nze'tj tyā' andy jĩime!, andyna ĩtyi caafi'nze'ljsa Cristo jĩ'. Tyāasatj naa cacue yacj ĩtyi fi'nze'tsrrava, na'wē Dyus Nchi'c andyna peeygājrra peequíi ya'ducjrra uuc andy pa'gate tyāa yacj yuurráa fi'nze!. ²¹ Tyāa pa'ga Dyus peeygājrra ewte nviitni's weech wēemeetj. Tyā'wē leya's nwēese'lja'garráa yuuwemée ewte neeyũvatsa', Cristo uuni' cyulne' yuuwalj yu'. Nava tyā'wē yuume!.

Leypa'ga Dyus Espiritu's ya'jypa'ga'tsme'

3 ¹ Galacia quiwesuwe'sh, wala yuj jiimeesa yuui'cue. I'cue'shtyi' ¿quimiga tyacue wala ĩshii atscue Dyus yuwe isasa's nvijt? I'cue'sh tyā'wē yuucajmeníi tja'w cue'sha' áate pta'sh Jesucristo cluuscjē uúsaa quimteva. ² Mpeeta'shwe: I'cue'sha' ¿Moises ley jycaajni's nwēese'ljrracue Dyus Espiritu's jypa'ga'? Meerra' ¿cue'sh pta'shni's nwēese'ljrracue Dyus Espiritu's jypa'ga'? ³ I'cue'sha' pejca tyacue yu' wala jypumbawa'lmeetena Dyus Espiritu i'cue'sh ũuste pu'chya' tacjni's ¿ma'wē i'cue'sh cacueju pa'pchurra Dyus Espiritu tacjni's jyā'jaqui'cue? ⁴ Dyus yuwe's wēse'lja'ga nacue wala pcyuuni yuui'cue nava Dyus yuwe isa pta'shni's nvijtrra', cyulterrāa pcyuunisa yuune'cue. Tyacue cyulterrāa yu' pcyuuni yuumeevats wej ewna. ⁵ Dyusa' tyajy Espiritu's ũsrra', quim yujva ājanimeesa's quĩquĩjva caavya'ja'ja'c i'cue'shtyi ew jiyucajn pu'chna sa' ¿ley jycaajni's cytey yuupa'gaga tyā'wē yuuá'? Meerra' ¿cue'sh pta'shni' isasa yujna sũjna jypa'gate vá' tyā'wē yuu?

Abrahan yacj Dyus puuty we'weni

⁶ Abrahana's miijajcywe: Tyā' ũusuj yuurráac Dyusa's jyuca yajcyna nwēese'lj. Atsa' tyā'wē yũuterrāa Dyusa' Abrahana's yuuwemée ewsa vit. ⁷ Tyāa pa'ga i'cue'sha' mjiyuwe: Dyusa's ũusuj yuurráa jyuca yajcyna nwēese'ljsa yuurráa Abrahan jilj yuutyna. ⁸ Tyā'wē judiu jiljmée vite nasava Dyusa's ũusuj jyuca yajcyna nwēese'tjerrāa tyāawe'shtyiva yuuwemée ewsa vitwa'ja's dyiicjēy pta'shnic yuu Abrahana's na'jĩna: Maa nasava jyuca ewsa yuutyna iindypa'ga yuurráa jĩ'c Dyus librate. ⁹ Tyāa pa'ga maava Dyusa's ũusuj yuurráa yajcyrra nwēese'ljsa' Abrahan na'wēy yuuwemée ewsa'ta' āchwe'shva.

¹⁰ Atsa' Moises ley jycaaja'c tyā'srráana cytey yuusa': Iiméj seena' ewmeesata' jĩna Dyus yuu we'werra', iviituwa'tje nviitni ũsta'. Tyajíic Moises ley ĩiva na'wē we'we!: Maava ley jycaajnity jyuca cytey yuusame!,

iviituwa'tje nviitni yuutyna jĩ'c. ¹¹Atsa' tyã'wẽ leya'srráa nwẽese'jsa' quim yujva Dyus dyi'pte yuuwemée ewsa yu' meeta'. Tyajíc áate na'wẽ pta'shi' Dyus librute': Dyusa's úusuj jyuca yajcyterráa Dyus dyi'pte yuuwemeesa yuuwa'ja's ya'ji'pjuna jĩ'c. ¹²Atsa' Moises leya' Dyusa's úusuj yaacywa'ja's we'we'tsme'. Tyã'wẽ úusuj yaacywa'ja's we'wemeerra íic na'wẽrráa we'we': Maava jycaajna fi'jrra nviitnisarráaty jyuca cytey nwẽese'jwa'ja' ĩtyi fi'nzeya' jĩ'c.

¹³Tyã'wẽ leya's jyucamée nwẽese'pja'ga iiméj seena' yuuwesatja'w yu', tyãa pa'ga Cristoc cue'sh iiméj seena' yuuwesa pa'gate uu, ley castigāyni cue'shtyi nwe'weya'. Tyã'wẽ iiméj seena' yuuwesa's castigāyni uuwa'ja's na'wẽc pta'shi' Dyus librute: Iiméj seena' yuuwesa's maava fytūcjē a'cyrra icjni yuuna jĩ'c. ¹⁴Tyã'wẽ Cristo Jesus cue'sh pa'gate uupa'gatja'w judiu ji'jmeerrava Dyusa's úusuj jyuca yajcyna nwẽese'pja'ga yuuwemée ewsa yuurra Dyus Espiritu's jypa'gawa'jsa yuu. Tyã'wẽ yuuwa'ja'scu Dyusa' Abrahan yacj puuty we'we tyã' cytey yuuc.

¹⁵Yacjtjē'jwe'sh, na'wẽ yūuni's miiyajcywe: Cue'sha' quīj yūuya' puuty we'werrava tyã'sa' pechcanamée cytey yuuya' jyuca etste fi'jrra peecy yase's qui'pprac ya'nviitu'. Atsa' tyã'wẽ yūuni's quim yujva ishini' jiya' āja'tsmeeta', sa' yu'ptjeja'va āja'tsmeeta'. ¹⁶Tyã'wēy Dyusva Abrahan yacj ew puuty we'werra nviitni's quim yujva yu'ptjeja' ājameetyna vite' Abrahan ji'lj yacj puuty we'weni's. (Dyus we'werra': Iindy ji'ljwe'sh jĩ'tsme', naasáa teechráac cysusu': Iindy ji'lj jīnarráa. Tyãa yu' Cristo's we'werrac tyã'jĩ'.) ¹⁷Na'jĩ'tj na': Dyusa' ūswa'ja's cytey yuuya' Abrahan yacj ewcu puuty we'werra neeyūu, atsa' tyãa puuty we'weni cuatrocientos treinta año scjēwnijūc Moises leya' casejna ūsu'. Naa pa'ga tyãa leya' Dyus ew puuty we'werra nviitni's yu'ptjeja' ājawa'jsame', e'su casejsa' naa pa'ga. ¹⁸Moises leypa'ga ewte neeyūuwa'ja's jypa'gawa'jsavatsa', dyiicjēy Dyus puuty we'weni' selpiwa'jmée ne' yu'. Nava tyã'wẽ yūumée, ewte neeyūuwa'ja's Dyusa' Abrahan yacj ew puuty we'werra neeyūuc tyã' Moises leypa'gaméec jypa'gawa'j yu'.

Leya' na'wẽrráa yuusa'

¹⁹Tyã'wēte', Moises leya' ¿quījtega selpi'? Ewmée yūuna fi'nzepa'ga yu'cypejna fi'jrra nviitnisarráac yu'. Sa' Dyus Abrahan yacj puuty we'werra': Iindy ji'lj jīc tyãa pa'picachrráac tyãa leya' jycaajwa'jsa yu'. Tyãa leya's fi'jrra nviit-sa yu' Dyus angeleswe'shrráaty yu', atsa' Moisescu jypa'garra jweeju yu' nasaty caapiya'j. ²⁰Nava ewte neeyūuwa'ja's Dyus puuty we'wec tyã'sa' angeleswe'sh jypa'garra peena Abrahana's ūsmeeta'. Tyã'wẽ yūumée, Dyus yuuc tyajy yuweju ewte neeyūuwa'ja's puuty we'we.

²¹Tyã'jīte', Moises ley yacj Dyus puuty we'wenisa yacja' utyaaya' ājawa'jsamée iipuiisatyna sūjuvácue. Tyã'wẽsameeta'. Atsa' ley tyã'wẽ

ewte neeyüuwa'ja's üsya' ãjawa'jsavatsa', leya's nwëese'jsa yu' jyuca ewte yã'j üs yu'nja'w. ²²Nava tyã'wëmeete íic leyíi we'werrava: Jyucaysa pcalte yuurráa üsta' jî'. Tyãa pa'ga Jesucristo's üusuj jyuca yajcyrra yuurráa cue'sh ewte neeyüuwa'ja's Dyus puuty we'wec tyã'sa' jypa'gawa'jsatja'w.

²³Tyã'jîte!, Moises leya' Dyus puuty we'weni's atsesana sūjuvácue. Wej yujva atsesame!. Wejy yuuva leya' cue'shtyi jyaawna üssac yu' Jesucristo's üuste jypa'garra ewte neeyüucajn. ²⁴Leya' naasáa Cristo quĩpcach cue'shtyi jype'jsarrác yu', cyaj Cristo quĩjte!, tyã'sa' üuste jypa'garra' yuuwemée ewte neeyüuwa'ja's jî'pjucajn. ²⁵Ächja' Cristo's üuste jypa'gawa'j en äjc, atsa' tyãa ley cue'shtyi jype'jsa's peena yu' yaacywa'j jî'pjmeetja'w.

²⁶Tyãa pa'ga i'cue'sha' Cristo's üusuj jyuca yajcyrra nwëese'pja'garráa Dyus luuch yuui'cue. ²⁷I'cue'sh jyucaysa Cristo yacj fi'nzeya' sūjrra yu'te ya'bautisāysa' tyajy cusete jype'jni üsi'cue. ²⁸Ächja' maa yujva puuty iíwejch yaacywa'jme!. Judiu ma'c yuu meerra' judiumée ma'c yuu, patron jî'pjsa ma'c yuu meerra' patron jî'pjmeesa ma'c yuu, pitstjê'j ma'c yuu meerra' u'y ma'c yuu nava maa yujva puuty iíwejch yaacywa'jme!, tyãa pa'gatey Cristo Jesus yacj fi'nzesa' maa yujva tjaacuemée jyucaysa puuty tyãa na'wërrarráa i'cue. ²⁹I'cue'sha' Cristo's jypa'gasarra', Abrahan jî'jrra tyã'wë yuune'cue, sa' ewte neeyüuwa'ja's puuty we'wec tyã'sa' jypa'gawa'jsai'cue.

4 ¹Ächja' na'sna mjiyuwe: Luucha' ney uute!, le'chcuëy yu' vite tjê'jsa cusetec jype'jni fi'nze' walaarra yu', ney nviitni's jyuca tyãarrarráa jypa'gawa'jsarrava. ²Atsa' le'chcuëy yu' tjê'jsaty tjengna jype'je!, macue tyachpcach ne' neya' neewe'werra tjê'jsa cusete jype'cjan nvijt tyãa en äjpcach. ³Cue'shva tyã'wëysatja'w yu'. Luuchva ma'wëga le'chcuëy yu' tjê'jsa jype'jni fi'nze!, tyã'wëytja'w nyaffi yu' ley jycaajni tyajy cusete fi'nzena üsu!. ⁴Nava macue tyachpcach ne'tca'w jype'jni fi'nzewa'jsa yu' tyãa en ptsuute!, Dyusa' tyajy Nchi'ca's caacj, teeche u'y cacuete casejrra judiuwe'sh na'wëy leya's nwëese'jwa'jsa. ⁵Atsa' cue'sha' ley jype'jni üsteva, tyã'wë yūurrac tyãajū cutyi'jrra Dyus luuch yuua'ja's üs. ⁶Tyãa pa'ga i'cue Dyus luuch yuuna pa'j, atsa' Dyusa' tyajy Espiritu's i'cue'sh üuste caacj, ächja' Dyus luuchtja'w sūjwa'ja's jî'pjucajn. Tyajc Dyus Espiritu' i'cue'sh üuste caaüusutje'je! Dyusa' cue'sh Tata' sūjwa'ja's. ⁷Tyãa pa'ga ächja' i'cue'sha' ley jype'jnisamée, Dyus luuchi'cue. Atsa' tyajy luuch yuupa'ga Dyusa' tyãa jî's quĩjnava jyuca i'cue'sh jīrrarráa nviituna Cristo nwe'wepa'ga.

Lej jycaajnite qui' shawendsaty yu'cypejini

⁸I'cue'sha' nyaffi yu' Dyusa's jiimeerra!, Dyusmeerráaty i'cue selpiina fi'nzesa yu'. ⁹Nava ächja' Dyusa's jiisa yã'ji'cue meerrava Dyusa' i'cue'shtyi jiia' atsa' ¿quĩjya'rráa qui' shawenduqui'cue pitstjê'jwe'sh

caapiya'jni achamée seelpisate fi'nzeya'? ¹⁰ Tyā'wē Dyusa's jiiyā'jrra', ley jycaajni entyi qui'sna, a'tetyva qui'sna, añutyva qui'sna nwēese'jwa'j ji'pjmeei'cue. ¹¹ Tyāa pa'gatj tyā'wē yūutste uyrra wala yaaqui': Cyulrrāa vā'ntca i'cue'shtyi caapiya'j sūjna.

¹² Tyāasatj yacjtjē'jwe'shtyi neewe'we', andyva ma'wētca ley caapiya'jni's jyuca nvijtrra i'cue'sh na'wēy ley jycaajnimée fi'nzena ūsu' tyā'wēy yuucajn. ¹³ Tyā'wē andya' cytee uuya' ūsrra', i'cue'shtyi nyafyrraj Dyus yuwe's pta'shte', ¹⁴ ātsa'na ūsteva ajtsemée wejyva Dyus angel meerrava Jesucristo tjas'i'cue wechana jypa'ga andya's. ¹⁵ Nava tyagachtey wēt wechana yaacynisa' ħmteega yuu? Na'ji'tj na': Tyagachjii yu' andyna peegyāaweeterrāa i'cue'sh yafytyi cutyi'jrra andyna ūsya' ājavatsa', tyā'wē yūuwa'jne'cue yu'. ¹⁶ Nava āchja' isasa's pta'shsa yu's atsesa na'wē yuuna ūsi'cue andya's.

¹⁷ Cysū i'cue'shtyi caapiya'jsawe'sha' i'cue'shtyi tyāawe'sh ju'nguty tupji jytjāasu'. Nava ew yajcyrra tyā'wē yu'tsmeeta', naasāa andy caapiya'jni'jū tyunde wēerrarrāa tyā'wē yūuna ūsta', i'cue'sha' tyāawe'sh yacj u'cjan. ¹⁸ Tyā'wē vitesaty peecy ju'ngu tupjywa'j yuja', nava bagachteva ew yūuwa'jrrā's yajcyrra tyā'wē yūuwa'ja', sa' andy cytee i'cue'sh yacj ij ūsterrāa tyā'wē ew yūusāa na'wē fi'nzewa'jme'. ¹⁹ Luuchwe'sh, andya' i'cue'sh tyā'wē yūupa'ga iimēj wala acate űusna ūstju, u'y nasate yaacasāa na'wē. Sa' űusna nes yu'nja i'cue'sha' Cristo na'wēy fi'nzeya' ājapcach. ²⁰ Andya' āchjii'tj cytee i'cue'sh yacj ūs wēje', i'cue'sh jypumbana yaacyni's yu'ptjejya'. Nava jiimeetj i'cue'shtyi ma'wē pu'chwa'ja'sva.

Sara Agar yacj caaja'nda'jni

²¹ I'cue'sha' ewte neeyūuya' sūjrra' Moises leya's i'cue yaaqui', sa' tyāa leya' na'wēsarrā' tyā'sa' jiyu'tsmeevā'cue. ²² Tyā'sa' jiyucajn na'wē fi'jni ūsa' Dyus librate: Abrahana' e'nz luuchcu ji'pju ji'c. Teechsa' peecy nyuutewe'shmée, yatte selpisāa u'ytewe'shcu yu', atsa' vite nchi'ca' peecy nyuutewe'shcu yu'. ²³ Atsa' yatte selpisaate casejsa' quijva meesa peecy vyaasarrāac yu'. Nava peecy nyuute casejsa' na'wē Dyusa' Abrahan yacj puuty we'werra': Luuch ji'pjune'cue jic tyāac yu'. ²⁴ Tyāa e'nz u'ya' na'wēsata': Na'wē Dyus e'nzsa yacj puuty we'wec Abrahan vite' Moises yacj tyāata' tyāa e'nz u'ysa'. Dyus puuty we'weni teechna' Sinaí vits walatec yuu, atsa' cytee puuty we'weni' Agarva ma'wēga vatee jycaajni selpiina fi'nze tyā'wēsa'. Tyāasa íity tyāa puuty we'wenijū upysa' ley jycaajni selpiina fi'nzeya' caseje'. ²⁵ Agara' Arabia quiwesu Sinaí vits wala na'wēsa'; tyā'wēy naa ensu Jerusalen ūsa' tyāava tyāa Sinaí na'wēysa'. Tyajíirráa tyāa chjambte ūssa judiwe'sha' vatee cusete jycaajnisawe'shta'. ²⁶ Naapcachja' cielute Jerusalen chjambtewe'sha' vatee jycaajni fi'nzesameeta'. Cue'sha' cyteewe'shtja'w tjaacuesa. ²⁷ Tyā'sna we'werrac Dyus librate na'jii':

U'y nasa ji'pjuwa'lmeesarrava, ñusmée wēt miiyajcywe.

Wechana sus mwe'wewe, nasate yaacani's jiimeerrava.

Tyāa pa'gatey luuch ji'pjuwa'lmeesarrava,

Luuch ji'pjuwa'jsate jytjaacue luuch ji'pjuna jī'c.

²⁸Yacjtjē'jwe'sh, cue'sha' Dyus puuty we'werra': Luuch ji'pjune'cue jīc tyāatewe'shtja'w Isaac na'wēsa. ²⁹Tyāa enteva ma'wēga selpiina fi'nzesa luucha' Dyus puuty we'wenite casejsa luucha's ajtsena quiite, āchjva tyā'wēyrrāa yūuna ūsta'. ³⁰Tyāa ente tyā'wē atsepa'gac na'wē yūuni's Dyus librate pta'shi': Tyāa u'y selpisa's pchi'c ūty mcutyij'. Tyā'wēme' selpisāa nchi'ca' peecy nyuute nchi'c yacj ja'ndarraj jypa'gaya' ājameena ney nviitni's jī'c. ³¹Nava cue'sha' selpisāa nchi'c na'wēsameetja'w, wejyva nyuute nchi'c na'wēsataja'w.

Ley jycaajnimée fi'nzeni

5 ¹Cristo' ley jycaajniū tyujndec, cue'sha' ley jycaajni fi'nzeczajmen. Atsa' i'cue'sha' ewte pa'lyā'jrra', peena yu' utyaanuwe ley jycaajni's nwēese'jya'.

²Ew mjiyuwe: Andya' na'jī'tj na', i'cue'sha' circunciona's jypa'gavá'cue atsa' ley jycaajniū Cristo nwe'wec tyā' cyul yuuna. ³Qui' caayaqui'jītstju: Maa pitstjē'jva ya'circuncidāy yā'jrra', tyā'srrāana jypa'gamée, Moises leya's jyuca nwēese'jwa'j ji'pjta'. ⁴Leya's jyuca cytey nwēese'jrra yuurraa yuuwemée ewte neeyū'nja sūjna yaacysa', Cristo tashu tyutesāa yuune'cue, sa' Dyus peeygāanijūva tyutesāa yuune'cue. ⁵Nava cue'sha' Cristo's ūusuj yuurraa jyuca yaacywa'ja's Dyus Espiritu pu'chte', tyā'wē yūurrarrāa yuuwemée ewsatja'w yuu. ⁶Tyāa pa'gatey Cristo Jesus yacj fi'nzesa yacja' circuncidāyni ma'c yuu circuncidāynimée ma'c yuu nava tyā'wēsa' peejyme', naasāa Cristo's ūuste jypa'ganirraa tyā'wē', tyāa pa'gatey Cristo's ūuste jypa'ganijū' peeygāawa'ja's ya'ji'pju'c naa pa'ga.

⁷I'cue'sha' ew yā'ji'cue fi'nzena ūs yu', atsa' ¿quimga nwēese'cjamen caypumba'jna pa'j? ⁸I'cue'shtyi caypumba'jna pa'jsa' Dyus caajnis a yu'tsmeeta'. ⁹Tyāa pa'ga mpa'yajcywe. Tyā'wēme', levadura' le'chcuēerrava jyucac pēetjeje' scuutyj ū'we macueteve. ¹⁰Tyā'wēteva i'cue'sha' tyacue yu' jypumbacajmen Cristo' pejca pu'chjina sūju'tj. Nava Dyusa' seena' yuj castigaīna caypumba'jsa's quimteva.

¹¹Yacjtjē'jwe'sh, miiyajcywe: Andya' tyā'wē circuncidāywa'ja's caapiya'jvatsa', judiuwe'sha' andya's ajtsemeetyna. Tyā'wē yuuvats yu', Cristo' nwe'weya' cluuscjē uuc jīna pta'shnisa' caaūuscha'jmeena judiuwe'shtyi'. ¹²Nava tyā'wē i'cue'shtyi caacircuncidaī'j wēena cuch yuuna fi'nzesa' peecy cacuetewe'sha's tee jwend jyuca ya'spē'tjvatsa', jiyutyna sūju'tj andya'.

¹³I'cue'shtyi' circuncidāycajmenfi ley jycaajniū nwe'wenisa yā'ji'cue yuu. Nava tyā'jīte', āchja' leya' we'wewa'j ji'pjmeena sūjrra peecy

ma'wēva ewmée yūuna fi'nzewa'ljme', wejyva vitety peeygājna puuty ya'selpiina fi'nzewa'ja'. ¹⁴Tyāa pa'gatey leya' tyā'wē yūuwa'ja'sírráac wejy tjaacue neewe'we' na'ljina: Peequí ma'wēnga ya'peeygāja', tyā'wēy mpeeygāj maatyva jī'c. ¹⁵Nava tyā'wē yūumée puuty puina yajtsena fi'nzesa' jyua ja'ndarra'j puuty ptsuune'cue jypa'yacymeerra'.

Cue'sh ūus yaacyni vite' Dyus Espiritu caaūusutje'jni

¹⁶Tyā'wē yūuwe'shte na'wē yūuwa'ja'stju pta'shi': Dyus Espiritu ew caaūusutje'jnirrá's cytey yuuna mfi'nzewe, peecy ūusujrráa yaacyni's cytey yuuya'mée. ¹⁷Tyā'wēme', cue'sh ūusujrráa yaacynisa' pejca yuj ewmeesa'scu yaaqui'. Tyāa pa'ga Dyus Espiritu' cue'sh ūus yaacyni's jypa'ga'tsme', naapcachja' cue'sh ūus yaacyni' Dyus Espiritu's yupu'c. Tyāa pa'ga ne'cue pejca yuj ewmeesarrá's cytey yu'. ¹⁸Nava Dyus Espiritu i'cue'sh ūuste jycaajna ūste', jypumbana ley jycaajnite fi'nzewa'jsameei'cue.

¹⁹Dyus Espiritu caaūusutje'jnimée peecy ūusujrráa yaacynisa' naata': ptamumée pcal yuuni, ptamsarrava vitesa yacj pcal yuuni, ma'wēva canzh pcal yuuni, ²⁰dyus ityimeesaty neewe'weni, dyijyuuni, ajtsena fi'nzeni, puini, ipyāani, ūuschani, puiiwa'ja's ma'wēva yūuna pacuení, pcjaacjesa yacjtjē'jwe'sh puuty puirra tyutení, ²¹vitesa ji'pjunity atseni, nasa icjni, tūuna fi'nzeni, tūusáa pwe'sh ma'wēva canzh yuuni, pcal ma'wēsava ūsta' tyāaty cytey yuuni. Tyā'wē yūusatyi' andya' āate pta'shitstju: Tyāawe'sha' Dyus jycaajna ūsnite u'cawa'jsameeta'. Tyā'sa' nyaffiiva pta'sh yā'tj.

²²Āchja' Dyus Espiritu caaūusutje'jni' naata': peeygāani, wech wecha fi'nzeni, ūuste ewrráa yaacyni, ūuscha yajcymée fi'nzeni, maatyva peeygājna fi'nzeni, vitesaty pu'chna fi'nzeni, wa'lmée nwēese'jna fi'nzeni, ²³iwejch yajcymée fi'nzeni, ūuste ewmée ūusutjeni's nwēese'jmée fi'nzeni. Tyā'wē ew yā'j fi'nzesa's leya' tjengwa'j ji'pjme'. ²⁴Cristo nasa yā'ja', peecy ūus yaacyni ewmeesa's cytey yuuna fi'nzewa'j ji'pjmeeta'.

²⁵Dyus Espiritu tyā'wē ew fi'nzewa'ja's ūste', tyāa yacj yuurráa fi'nzewa'j ji'ptja'w nwēese'jna. ²⁶Iwejch yajcyna puuty puina ajtsena fi'nzewa'j ji'pjmeetja'w.

Puuty pu'chna fi'nzeni

6 ¹Yacjtjē'jwe'shtyi neewe'we'tj: Maa yacjtjē'jva ājmée yūuni's jiyurra', tyā'sa' myu'cypejwe, i'cue'sha' Dyus yacj chjāchja yā'j fi'nzesa'i'cue naa pa'ga. Nava wala jypa'yacy weech we'wemée myu'cypejwe. Tyā'wēme' i'cue'shtyiwa wetewa'j en pa'javáana. ²Teechsa na'wērraj puuty ya'mpu'chwe tjēyte fi'nzeni's. Tyā'wē yūurra Cristo jycaajni's cytey yuusáa yuune'cue.

³Quijteva jwee yu' tjaacue ewsameerra tyā'wē iwejch yajcyrra', īshiisa yuuna. ⁴Tyāa pa'ga peecy fi'nzeni's cjuē'y yaacywa'j ji'pja'

¿ma'wësaqui'tj? sũjna. Tyã'wë peecy fi'nzeni ewteva jiyurra, wëtwët yaacywa'ja', nava vitesa fi'nzeni's weechwa'j ji'pjme'. ⁵Teechsa na'wërraj peecy fi'nzenirrá's wala jypa'yacywa'ja'.

⁶Cristo jycaajni's cytey yuuna caapiya'jsa's pu'chwa'j ji'pja' peecy ji'pjuni quij yacjrráava.

⁷I'cue'sha' ya'jypumbanuwe naa sũjna: Quĩjva yũuteva, Dyusa' tyacue yu' jiyumeena sũjna. Dyusa's quim yujva tyã'wë yu' yajcyna weechmeena. I'cue'sh quij yũurrava tyã'wëysafírráa jypa'gane'cue'. ⁸Meerrava peecy ũus yaacyni ewmeesarrá's cytey yuusa', uuwa'ja'srráa ji'pjuna tyã'wë yũupa'ga. Nava Dyus Espiritu caaũusutje'jni's cytey yuusa' bagachte yujva ptsumée ĩtyi fi'nzewa'ja's ji'pjuna. ⁹Tyãa pa'ga ew yũuwa'jrrá's wajtymée cytey yuuna fi'nzewa'j ji'ptja'w. Tyã'wë ew yũuwa'ja's wa'lmée cytey yuuna ũsrra', ewsa's jypa'gawa'j en äjte', jypa'ga'nja'w. ¹⁰Tyãasa ma'wën enteva vitety ew yũunarráa fi'nzewa'j ji'ptja'w, sa' Dyus yacj fi'nzesa cue'sh yacjtjê'jwe'sh yuutyi' wejy tyã'wë ew yũuwa'j ji'ptja'w.

Peecy cacuetewe'sha's yajcymée Cristorrá's wechani

¹¹Mtjengwe, andy cuseju yuu ew äate fi'jatstju, i'cue'sh jiyucajn.

¹²Cristo cluuste uuni's pta'shpa'ga yaatseni fi'nze wëemeerrarráa, tyã'wë i'cue'shtyi' caacircuncidaĩ'j wëena ũsta'. ¹³Tyãawe'sha' macue ya'circuncidäyrava, ley jycaajni's jyuca yu' cytey yu'tsmeeta'. Nava i'cue'sh yuutyi' circuncidäycaja'ty, tyã'wë caacircuncidaĩ'tja'w sũjna weech weech yaacy wëerraty tyã'wë yu'. ¹⁴Nava andya' quij yujnava weech weech yaacy wëemeetj, naasáa cue'shtyi jype'jsa Jesucristo cluuste uuni yuurráac andy ũuste wëtwët caaũusutje'je'. Cristo cluuste uupa'ga andy yacja' naa cacuetewe'sha' seelpisame'. Tyãasa andya' naa cacuetewe'sha's nwëese'j wëemeetj, uusáa na'wë. ¹⁵Tyãa pa'gatey Cristo Jesus yacj fi'nzesa yacja' circuncidäyni ma'c yuu meerra' circuncidäynimée ma'c yuu nava tyã' quĩjva meesa', naasáa ewmée ũus yaacyni's yu'ptjejrri fi'nzenisarráa seelpisa'. ¹⁶Na'wëtj jycaaja' tyã'sa' cytey yuuna fi'nzesa' Dyus peeygãani ew fi'nzewa'ja's jypa'gatyna Dyus luuch jyucaysawe'sh.

¹⁷Ächja' naajũ' peena yu' quimva cuch yuuni peejymetj. Cuch yuucajmení andya' Jesusa's selpisaatj, tyãa pa'ga pcyuuni cacuete sñal ji'ptju.

¹⁸Yacjtjê'jwe'sh, cue'shtyi jype'jsa Jesucristo' i'cue'sh jyucaysaty pu'vitumée pu'chjina.

SAN PABLO CARTA EFESO CHJAMBTWE'SH JÏI

Efeso chjambtewe'shtyi fi'jni

1 ¹ Andya' Jesucristo jycaajnis Pablo yaasetj, tyā'wēte selpiwa'jsa Dyus nviitnisa. Tyāa pa'ga Dyus luuch Efeso chjambtewe'sh jïi naa carta's fi'jrra cajatstju, Cristo Jesusa's nwēese'jna fi'nzesawe'shtyi wechana. ² I'cue'shtyi' Dyusa' pu'chjina vite' cue'shtyi jype'jsa Jesucristova, tyāa pa'ga Dyus yacjrráa mfi'nzewe.

Cristo jïi yuupa'ga Dyus iiméj wala pu'chni

³ Cue'shtyi jype'jsa Jesucristo Tata's wala yuj wechawa'j ji'ptja'w. Cue'sha' Cristo yacj utyaapa'ga quīj yujva peejymée jyucac tyajy dyi'pte jypumbamée fi'nzewa'ja's nvijt cielutewe'sh yuuwa'ja's. ⁴ Tyāasa íc naa quiwe meetey Dyusa' cue'shtyi' tyjityj, quīj pcal yujva ji'pjmée Cristo na'wēysa yuucajn. ⁵ Cue'sha' quījte yujva seelpimeesateva Dyusa' naasáa peeygājrra yuurráac Jesucristo nwe'wete', cue'sh tyajy luuch yuuwa'ja's dyiicjēy vitrra nvijt. ⁶ Tyā'wē peeygāapa'ga Dyusa's bagachteva wechana yuurráa tuutje'jwa'j ji'ptja'w, tyajy Nchi'c Jesucristo nwe'wepa'ga. ⁷ Tyāa Jesucristoc cue'shtyi' nwe'we tyajy eeju cue'sh pcaltyi jyuca peltunāyrra. Nava Dyusa' cue'shtyi wala peeygājrra yuurráac tyā'wē yuuwa'ja's vit. ⁸ Tyā'wēy Dyusa' cue'shtyi' quījte yujva peejymée jyuca āate caajiycj. ⁹ Nyafiitey quim yujva jiyunimeete ma'wē yuuwa'ja's ne' vitrra ji'pju' tyā'snac cue'shtyi caajiylj. ¹⁰ Tyāa yu' na'wēc yu' cielute ūssa vite' naa quiwetewe'sh yā'jrra jyuca Cristorrarrá's nwēese'jwa'ja', atsa' tyā'wē yūuwa'j en ājte', jyuca cytey yuuna.

¹¹ Dyus jïi yu'sa' jyuca jypa'gawa'ja's Dyusa' nyafiitey ne' pjeu'jrra nvijt Cristo nwe'wenisawe'sh jïi. Naa pa'ga Cristo nwe'wenisa' jypa'gawa'jsatja'w Dyus pjeu'jrra nviitni yu' jyuca. ¹² Cue'sh tyā'wē yūuwa'ja'scu Dyusa' pjeu'jrra nvijt, Cristo's nyafyte neewe'wesa cue'sh

tyā'wē Dyus ew yūupa'ga wechaacajn. ¹³Atsa' i'cue'shva tyā'wēy Dyus yuwe ewte nviitwa'jsa's wēse'jrra Cristo yacj fi'nzeyā' utyaatspcacha', Dyus ūsni tyajy Espiritu' i'cue'sh ūuste cǵēec, Dyus cuseju peena yu' tyutecajmen. ¹⁴Atsa' Dyus Espiritu's ūuste ji'pjsa' nmej ente' tyajy nasaty jyucate nwe'wena jyā'jnijū' Dyus jīi yu'sa' quijnava jyuca jypa'gawa'jsarra tyā'wē tyajy Espiritu's ji'pjsa ya'yuuna. Tyāa pa'ga Dyus tyacue wala ew yūusa's wechawa'ja'.

Dyus yacj jweeíírráa ew fi'nzewa'ja's caajiyu'cjan pēyni

¹⁵Tyāa pa'gatj andya' tyā'wē i'cue'sha' Cristo Jesus yacj jypumbameety fi'nze', sa' Dyus luuch jyucaysawe'shtyi peeygāja'ty jīni's jiyurra', ¹⁶bagachteva Dyus yacj puuty we'wena wechana nes yu'. ¹⁷Sa' cue'shtyi nwe'wesa Jesucristo Tata cielutewe'sha's pēyi'tj, tyāa yacj jweeíírráa ew fi'nzewa'ja's caajiyu'cjan, ¹⁸cyaj i'cue'shtyi quíjya' nwe'werrava ew caajiyu'juna. Sa' cielute Dyus jī's quijnava jyuca jypa'gawa'j ji'ptja'w tyā' seena' yuj wala zhichcuesa' tyā'snava jiyune'cue. ¹⁹Sa' Dyus ājanisa cue'sh ūustyi yu'ptjejsa' seena' yuj walasa' tyā'snava jiyune'cue. ²⁰Dyusa' tyāa ājanisa yacj íírráac Cristo's uunijūva qui' ityi vitrra cielute tyajy pucate caycachi'j. ²¹Sa' Cristo's cielute tyajy pucate caycachi'jrrac naa quiwete vite' cielute maa maateva jytjaacue walasa vitrra jycaajwa'ja's ūs, naa ente ma'c yuu meerra' vite ente ma'c yuu nava maateva Cristorrarráa jytjaacue walasa yuucajn. ²²Dyusa' tyā'wē yūurrac quíjquíjva Cristorrarrá's nwēese'jwa'ja's vitrra tyajy luuch yuutyi's Cristo yacj ij fi'nzewa'jsa vit, tyāawe'sh yuurráa maateva puutejca wendynisa tyajy jype'jni yuucajn. ²³Tyāa pa'ga Cristo jype'jnisa' tyāa yacj teechráa yuuna pa'jrra, tyāa na'wēysa íírráata', quíj yujva jwee yu' peejymeesa.

Dyus peeygāapa'ga yuurráa nwe'wenisa

2 ¹Dyusa' Cristo'sva ma'wēga ityi vit, tyā'wēycu i'cue'shtyiva ityi vit. Tyā'wēme', nyafiai' i'cue'sha' pcalpa'ga Dyus dyi'pte uuní na'wē yā'ji'cue ūs yu'. ²Tyāasai'cue tyagachtey yu' echtjē'j naa quiwete jycaajni yuurrá's nwēese'jna ūsu'. Dyusa's nwēese'jya' wa'lsa yuutyi's echtjē'ja' jweeíírráac cwa'lu'ju', atsa' tyā'snai'cue nwēese'jsa yu'. ³I'cue'shrráamée, cue'shva nyafiai' tyā'wērrarráatja'w fi'nzesa yu' jyucaysa, ewmée yaacynírrá's jyuca cytey yuuna. Tyāa pa'ga Dyus castigo seena'sa's jypa'gawa'jsatja'w yu' maava jyucaysa.

⁴Nava tyā'wē pcalpa'ga Dyus dyi'pte uuní na'wē yā'j ūsteva, Dyusa' cue'shtyi iiméj wala ew yūuc peeygājrra. ⁵Tyāasac Cristo'sva ma'wēga uunijūva ityi vit, tyā'wēy cue'shtyiva ityi vit. Quíjte yujva seelpimeesarrava, Dyus peeygāapa'ga yuurráai'cue nwe'wenisa yuu. ⁶Dyusa' Cristo'sva ma'wēga uunijūva ityi vit, tyā'wēy cue'shtyiva ityi

vitrrac cielute Cristo yacj caycachi'j. ⁷Nava cue'shtyi tyajy peeygãani tyacue seena' walasa's naa e'su' âate caavya'ja'jya'c tyã'wẽ yũu cue'sh tyacue wala âjmeecueteva, naasáa Cristo pa'ga yuurráa. ⁸Tyãa pa'ga i'cue'sha' quĩjte yujva seelpimeesarrava, naasáa Dyus peeygãjrra nwe'wenisarráa i'cue, tyã'wẽ Cristo's ũusuj jyuca yaacypa'ga. Dyus nwe'weni's i'cue'sh cacueju ew yũuna fi'nzerra uymeei'cue, tyã'sa' Dyuscu pees peeygãjrra. ⁹Dyus nwe'weni's cacueju ew yũuna fi'nzerra ya'jypa'ga'tsme' naa pa'ga maa yujva iweejch yaacywa'j ji'pjmeeta'. ¹⁰Tyãa pa'gatey cue'sh u'se yu'ptjejwa'ja's Dyus pjeu'jrra nviitnisatja'w, ewrráa yũuna Cristo Jesus jype'jni fi'nzewa'jsa. Tyã'wẽ yũuna fi'nzewa'ja's Dyusa' nyafiiteycu pjeu'jrra nvijt, tyã'wẽ yuurráa yũuna fi'nzecajn.

Dyus tashte pa'jwa'ja's ji'pjuni

¹¹I'cue'sha' nyafii' ma'wẽsacue yu' tyã'sna miiyajcywe: i'cue'sha' judiu ji'jmeei'cue yu', atsa' judiue'sha' i'cue'shtyi's Dyus tyjitynimeesata' jĩnaty we'we'. ¹²Sa' tyãa ensu' judiue'sh yacjmée fi'nzesa i'cue yu', Cristo's ũuste ji'pjmeesa. Sa' i'cue'sha' Dyus pu'chwa'ja'sva ji'pjmeesa i'cue yu'. Tyãa pa'ga i'cue bagachte yujva Dyus tashte pa'jwa'j yu'sa' ji'pjmeesa yu'. ¹³Macue nyafii' yu' Dyus tashte pa'jwa'ja's ji'pjmeesarrava, âchja' Cristo Jesusa's nwẽese'jya' utyaapa'ga, Dyus tashte pa'jwa'ja's uyi'cue, Cristo' i'cue'shtyi nwe'weya' cluuste uupa'ga. ¹⁴Cristo' tyã'wẽ yũurrac judiue'sh judiu ji'jmeesaty ajtsena fi'nzeni's iviiturra e'nzsaty teech jwendrráa vitna pa'j. ¹⁵Sa' Moises leya'sva caaptsu'ju'c, Cristo tashterrarráa utyaarra e'nzsa puuty yajtsemée cyteerraj ij fi'nzecajn. ¹⁶Cristo' cluuste uurrac e'nzsaty cyteerraj ij fi'nzewa'ja's vitra, Dyus yacj yuuwemeesa vit.

¹⁷Cristo' quĩjrra' e'nzíi Dyus yacj yuuwemée neeyũuwa'ja's pta'shcu, i'cue'sh Dyus tashte pa'jwa'ja's ji'pjmeesatyva pta'shcu, sa' judiue'sh Dyus tashte fi'nzesatyva pta'shcu. ¹⁸Tyãa pa'ga âchja' judiumtja'w yuu meerra' judiueemtja'w yuu nava Dyus Espiritu's jypa'garra e'nzíi Dyus tashte pa'jwa'ja's ji'ptja'w. ¹⁹Âchja' i'cue'sha' nasa ecajuwe'sh meei'cue, Dyus luuch yacj cyteerraj utyaarra teech yattewe'shrráa i'cue yuuna pa'j jyucaysa tyãa na'wẽsarrarráa. ²⁰Tyã'wẽ cyteerraj utyaapa'ga ew jiyute yu' i'cue'sha' yat na'wẽsa i'cue: yata's nyafyte' cuet yacju ya'caachinda'ja', atsa' tyãa caachinda'jnisa yu' Jesucristo'. Tyã'wẽ yuuna mjĩiya' tacjsa' Dyusna selpisaawe'sh vite' Jesus jycaajnisawe'shtyi yu'. ²¹Atsa' i'cue'sha' tyãawe'sh caachinda'jna tacjni cajcuete yata's ew pjeu'jna umna ul'jnisa i'cue, teech yattráa yuuna cãjrra Dyus yuurrá's selpiwa'jsa. ²²Tyãa pa'ga i'cue'sha' Jesucristo yacj utyaarra', Dyus tyjityjnisa maa yacjva cyteerraj utyasáa i'cue yuu, teech yattráa yuuna, tyãa yatte Dyus ũswa'j yuuya'.

Dyus yuwe's judiu ji'lmeety pta'shwa'jsa

3 ¹Tyā'wē andya' Jesucristo caapiya'jni's pta'shpa'ga i'cue'sh judiu ji'lmeerrava Dyus yacj fi'nzewa'ja's ji'pjupa'ga, preesu ūsrrava, Dyus yacj puuty we'we'tj. ²I'cue'sha' jiiyā'jne'cue Dyusa' i'cue'shtyi peeygārra andynac neewe'we i'cue'shtyi caapiya'cjan. ³Sa' i'cue'sha' judiwe'sh yacj utyaawa'ja's quim yujva jiimeene'ta yu' tyā'snac Dyusa' andya's caajiyluj. Atsa' tyā'sa' i'cue'shtyi nyafii pta'shna fi'tj walameecuē. ⁴Tyā'sa' lēeyrra' jiyune'cue cue'sha' judiwe'sh yacj utyaaya' ājawa'ja'sne' Dyusa' Pablo's caajiyluj sūjna. ⁵Tyā'snac nyafii enteya' quim yujtyva caajiylujnimée ūsu', nava āchja' Jesus jycaajnisawe'sh vite' Dyusna selpisaawe'shtyi Dyusa' caajiyluj tyajy Espiritu caaūusutje'tje. ⁶Tyā' na'wē': Macue judiu ji'lmeerrava Cristo nwe'weni's nwēese'pja'ga yuurāa e'nzī cyteerraj utyaarra teechrāa yuuna pa'jrra, judiwe'sh yacj ja'nda Dyus tashte ūswa'ja's ji'pjuty, sa' Dyus ūsni Cristo ji's fīrrāa jyuca jypa'gawa'jsata'. Tyā'wēc caajiyluj.

⁷Tyā'wē yūuni's pta'shwa'jsac Dyusa' andya's nvijt, tyacue wala ājmeecuesateva tyāafi andya's pu'chrra. ⁸Andya' Dyus yacj fi'nzesa maateva jytjaacue ājmeecuesatj. Nava Dyusa' andya'scu nvijt, Cristo nwe'wenisa yuurāa quijteva tjaacue ewsa' tyā'sna judiu ji'jmée vite nasaty pta'shcajn. ⁹Tyā'wē quijnava jyuca pjeu'jsa Dyusa' judiu ji'lmeetyva nwe'werra judiwe'sh yacj cyteerraj yuutyaya' ājawa'ja's tyāniiteycu pjeu'jrra ji'pju' quim yujtyva caajiylujnimée tyā'sna āate pta'shwa'jsatj nviitni yuu maatyva jyucaysaty. ¹⁰Dyusa' ma'wē yūurra nasa ma'wēsatyva jyuca nwe'werra cyteerraj teechrāa vitna pa'jni's caajiylujnic yuu, atsa' Dyus tyā'wē yūuni's āchja' Dyus yacj fi'nzesawe'sha', ēe walatewe'sh, angeles ma'wēsava jyuca jiyutyna. ¹¹Dyusa' tyā'wēne' nasaty nwe'wewa'ja's tyāniitey pjeu'jrra ji'pju' naa quiwe meetey tyā'sa' cytey yuuc, Jesucristo's naa quiwete caajrra. ¹²Tyā'wē Cristo nwe'wepa'ga āchja' Dyus tashte ūucjmée pa'jya' ājatja'w, tyā'wē ūucjmée utyaawa'ja's Cristo íc caaūusutje'je' naa pa'ga. ¹³Tyāa pa'ga andy i'cue'sh pa'gate pytjaa yuuni's ūusna yajcymée, wejyva Dyusa'srrāa wechana meswe.

Cristo peeygāani iiměj seena' walasa

¹⁴Tyā'wē Jesucristo Tata' nwe'wewa'ja's pjeu'jrra cytey yuupa'gatj andya' tyā'sa' peejyūcuerra wechana neewe'we', ¹⁵tyā'sa' maava jyucaty Tata jīna cysusu' Dyus luuch naa quiwetewe'sh ma'ty yuu, cielutewe'sh ma'ty yuu nava jyucaysa. ¹⁶Atsa' andya' Tata's pēyi'tj, Dyus Espiritu i'cue'shtyi pu'chna quijte yujva peejymée chjāchja caafi'nze'cjan, ¹⁷cyaj i'cue'sh ūusuj jyuca yajcyte', Cristo' i'cue'sh ūuste nes yuuna. Tyā'wē yūute', i'cue'sha' jypumbamée peeygāawa'jrrā's wala ji'pjurra ¹⁸Dyus

luuch jyucaysa jiyuya' ājane'cue, Cristo peeygājrra nwe'wenisa iiměj seena' walasa'sva. ¹⁹Tyāa peeygāani' iiměj seena' walasa' atsa' ¿quimrra' jiyuya' ājama'ty? Tyā'wēteva i'cue'sh jyucajn Dyusa's pēy'i'tj, cyaj Dyusa's ūusuj jyuca jiyurra tyāa yacj yuurraa fi'nzene'cue.

²⁰Dyusa's seena' yuj wala wechaawa'ja'. Tyā' quījteva jyuca pu'chya' ājawa'jsa', cue'sh macue pējyteva tyāate jytjaacue wala bagachteva pu'chna nes yuuwa'jsa'. ²¹Tyāa pa'ga Cristo nwe'wenisa yā'j yu', Dyusa's bagachteva wechana nes yuuwa'ja' Cristo nwe'wepa'ga.

Dyus Espiritu' ma'wēsatyva cyteerraj yuutyani

4 ¹Cristo's selpiipa'ga andya' preesu ūstju, nava i'cue'shtyi neewe'we'tj: ma'wē fi'nzecajn ne' Dyusa' i'cue'shtyi tyjityj tyā'sa' cytey yuuna meswe. ²Dyus yacj fi'nzesayā'ja' maa yujva iiwejch yajcymée wejyva puuty ya'peeygājna ewrrāa yūuna mfi'nzewe. ³I'cue'sha' puuty ūuscha yajcyna fi'nzemée, wejyva cyteerraj tyutemée fi'nzewa'jrrā's mpa'pchuwe, Dyus Espiritu' cyteerraj yuutya yā'cj naa pa'ga. ⁴Tyāasa Cristo nwe'wenisa yā'j yu', ma'wēsarrava cyteerraj teechrāac yuuna pa'ja', sa' cyanzīi Dyus Espiritu' teechsarrā'styi jyucaysa jypa'ga', sa' cyanzīi teeche ajte Dyus tashterrarrāa pa'jwa'ja'scu ya'ūytjasu', ⁵tyāa pa'gatey jyucaysaty nwe'wesa' teechrā', atsa' tyā'srrāanac jyucaysa ya'nwēese'je'. Sa' jyucaysa tyā'srrarrāanac yajcyna bautismo's ya'jypa'ga'. ⁶Sa' teeche Dyusrrāa ūsa' jyucaysate Tata tyā' maateva puutejca walasa' jyucaysaty jycaajsa, sa' jyucaysa yacj ūsa'.

⁷Sa' teechrāa vitna pa'jrrava, Dyusna selpiiya' ājawa'j yu'sa' fiyfiyrrajc Cristo' ūs teeche na'wērraj. ⁸Tyā'wē yūuwa'ja's we'werrac Dyus libroute na'jīna fi'jni yuu:

Ewmeesa cusejū nwe'werra cielun pe'jna u'cj,

Sa' naa quiwete nasatyī's ājawa'ja's ūscu jī'c.

⁹¿Ma'wērraga tyā'wē cielute tejcac jīna we'wē'? Cristo' nyafyte' uusaawe'sh ūsnite cjuē'y cjēerra tyāajūc qui' cielute tejca jīrrac tyā'jī'. ¹⁰Tyā'wē uusaawe'sh ūsnite cjuē'y cjēesa írrāac cielute iiměj ēe walate cājpcach tejca, mteeva tyāarrarrāa jyuca tjengna ūsa' ājaya'. ¹¹Tyā'wē yūurrac Dyusna selpiiya' fiyfiyrraj ājawa'ja's ūs jyucaysaty teeche na'wērraj: maafityi's tyajy yuwe's nyafyte pta'shwa'jsac nvijt; vitetyi's Dyus ma'wē yūuya'vateva dyiicjēy pta'shwa'jsac nvijt; vitetyi's Dyus yuwe pta'shwa'jsac nvijt; vitetyi's Dyus yuwe's caapiya'jna jype'jwa'jsac nvijt. ¹²Tyajy nasatyī' tyā'wēc mjīiwa'jsa pjeu'jrra nvijt, tyā'wē Cristo nwe'wenisa yuutyī' jweeírrāa cyteerraj chjāchja fi'nzewa'ja's caapiya'cjancu tyā'wē yūu. ¹³Cyaj jyucaysa Dyus Nchi'ca'srrarrāa nwēese'jrra tyā'sa' ew jiyuna jyā'jrra quījte yujva jypumbamée ew fi'nzecajncu tyā'wē caapiya'jrra nvijt. ¹⁴Tyājū yūurra' luuch na'wē yuume'nja'w. Tyā'wēme' nasa ewmée yajcyrra īshiina pta'shnite tjēyméec

wetena pa'jrra cyte jypumbana ya'fi'nze'. ¹⁵ Tyā'wē jypumbamée, wejyva isasarrá's we'wena peeygāawa'j yuurrá's yajcyrra Cristo yacj jweefírráa chjāchja fi'nzena u'jwa'j ji'ptja'w. ¹⁶ Atsa' maava Cristo tashte utyaarra jyucaysa cyteerraj pcjaacjerra puuty ya'caapiya'jna ew yūuna fi'nzete', tjēyméec peeygājna fi'nzewa'ja' walaana u'jue'.

Ewmée yaacyni's jyuca yu'ptjejni

¹⁷ Tyā'wē' atsa' cyajtj i'cue'shtyi neewe'we', vite nasa Dyusna jiimeesa na'wē fi'nzewe'shte. Tyāawe'sha' peecy ūus yaacyni seelpiwa'jmeesarrá'styi cytey yuuna fi'nze'. ¹⁸ Tyā'wē Dyusa's jypa'gaya' wa'lpa'ga Dyus yacjmée ūsra ew eena' yaacywa'j yu'sa' ji'pjmeeta'. ¹⁹ Tyāasaty tyāawe'sha' tjaame ūus yu'sa' ji'pjmeé, pcal seena' canzhsaterráa fi'nze'. ²⁰ Nava i'cue'shtyi' Cristo' tyā'wē fi'nze caajme'. ²¹ Tyā'sa' i'cue'sha' peecy jiine'cue Jesus caapiya'jni isasa's wēse'jsa dyijrra', ²² nyaffi ūus yaacyni ewmeeterráa caafi'nze'jsa's nwēese'jmée jyuca nvijtrra, ²³ ew ūus yaacywa'ja's caapiya'jni yacj mpju'se'jwe. ²⁴ Cyaj i'cue'sh ūuste ewsa yuurráa yu'ptjejni yuute', Dyus ma'wēne' jyjtāasu' tyāa yuurráana āate caavya'ja'jna fi'nzene'cue, Dyus dyi'pte quīj pcal yujva ji'pjmeé.

²⁵ Tyāasa āchja' peena yu' i'shiina fi'nzemée, wejyva teeche na'wērraj isasarrá's mwe'wewe maa yacjva, tyāa pa'gatey jyucaysa cyteerraj teeche jwendrráa yuuna pa'jsatja'w tyāa ji'jrrarráatewe'sh.

²⁶ Mpa'yajcywe, ūuschani yacjrráa yu' fi'nzewa'jme', ewmeete weteya'mée. Tyāa entey ya'mpeltunaīwe. ²⁷ Ehtjē'ja's wej yujva ca'ga'jnuwe.

²⁸ Pesweesava Dyusna jiyunijūyā'ja', pesweewa'jme', wejyva pesweemée cuseju mjīirra vite peejiina fi'nzesatyva pu'chna fi'nzewa'ja'.

²⁹ Sa' canzh we'wenisa yu' teeche yuwerráa yujva i'cue'sh yuweju casejwa'jsame', wejyva Dyus yacj fi'nzewa'j selpiwa'jsarrá's we'wewa'ja', cyaj vitesava Dyus yacj fi'nzewa'jrrá's piyaatyna. ³⁰ Sa' Dyus Espiritu'sva cyūusu'jnuwe, tyāa pa'gatey Dyus Espiritu'írráac i'cue'shtyi's Dyus jīi vitna pa'jrra nvijt, Dyus tashna u'jwa'j en ājtewe'sh.

³¹ Sa' ewmée yajcyna, ajtsena, pyūuscue yuute juuna' we'wena, ūusachana ma'wēwa wēeshuna fi'nzenijū jyuca mtyuteewe. ³² Wejyva puuty ewrráa yūuna, teeche na'wērraj puuty peeygājna, puuty ya'peltunāyna mfi'nzewe, Cristo cue'shtyi nwe'wete Dyusva ma'wēga cue'shtyi peltunāy tyā'wēy.

Dyus luuchyā'ja' tyāa na'wēy fi'nzeni

5 ¹ i'cue'sha' Dyus luuch yā'ji'cue na' tyāa na'wēy fi'nzeya' mpa'pchuwe. ² Puuty ya'peeygājna mfi'nzewe, tyā'wē yūucajnírráac Cristova cue'shtyi peeygājrra Dyus dyi'pte peequí ya'ducjrra piishacuē na'wē icjni yuu.

³Tyāa pa'ga i'cue'sha' Dyus jiiyā'jrra', ptamsa ma'ty yuu meerra' ptamsamée ma'ty yuu nava canzh yuuna fi'nzeni's jyuca nvijtrra ũusterrāa yujva yaacywa'l' ji'pjmeei'cue. Sa' Dyus yu's yajcymée ji'pju wēenirrá's yaacywa'l' ji'pjmeei'cue. Quíjva canzhsa yu'sa' cysuswa'jrrāa yujva ji'pjmeei'cue. ⁴Tjaampa' yūuni quíj yujva seelpimeesa yu'sa' tyā'wē we'wena fi'nzewa'jme', wejyva Dyusa'srrāa wechana fi'nzewa'ja'. ⁵I'cue'sha' jii yā'ji'cue: Dyus yu'sa' yajcymée ji'pju wēenirrá's yajcyna fi'nzesa (tyā'wē ji'pju wēenirrá's yajcyte', tyā'srrāanac dyus na'wē yaacywa'l' caseje'), canzh pcal yūuna fi'nzesa, quíjva canzhsarrá's cytey yuuna fi'nzesa, tyā'wē yūusa' Dyus Cristo yacj jycaajna ũsnite u'caya' ājameetyna. ⁶Tyāa pa'ga tyā'wē pcal canzhstate fi'nzewa'ja's caapiya'jni's mpa'yajcywe. Tyā'wēme' tyāa pa'ga'irráa Dyus castigo seena'sa yuja' Dyus jycaajni's nwēese'jmée fi'nzesawe'sh jii. ⁷Tyāawe'sh yacj ja'nda ewmée yūuna fi'nzenuwe.

⁸Nyafiai' i'cue'sha' jypumbana ũsrra', chji'ndyte na'wēi'cue fi'nzesa yu'. Nava āchja' Cristo's ũuste jypa'ganijū' eena'te ũsi'cue. Tyāa pa'ga peena yu' jypumbamée eena'terrāa mfi'nzewe Cristo nwe'wenijūyā'ja'. ⁹Eena'te fi'nzetsrra', puuty peeygājna isasarrá's we'wena fi'nzewa'ja', Dyus dyi'pte jypumbamée. ¹⁰Naasāa Cristo jytjāasnirrá's cytey yuuya' mpa'pchuwe. ¹¹Jypumbana chji'ndyte ũssa yacj ja'nda ewmée yūuna fi'nzenuwe, wejy yuuva tyā'wē yūusatyi' mcaapiya'jwe ewmée yūucajmen. ¹²Tyā'wēme', paatste tyāawe'sh ewmée yūuna fi'nzeni's āate we'wewēete tjaame yuja'. ¹³Nava tyāawe'sh ewmée canzh yūuna fi'nzeni's tjaamemée āate we'wewa'ja', cyaj quíj yujva paatstemée jyuca āaterrarrāa caavya'ja'jni yuuna. ¹⁴Tyā'sna we'werrac na'ji':

Jypa'yacymeeng fi'nze', miiyajcy.

Sa' pcalte uuní na'wē fi'nzenijū mcaasej,

Atsa' Cristo' eena'te caafi'nze'jena ji'c.

¹⁵Tyāa pa'ga wala jypa'yajcy fi'nzewa'jrrá's dund mpa'pchuwe, jiimeesa na'wē jypa'yajcymée yu' fi'nzenuwe. ¹⁶Tyā'wēme' naa ensu' ũuswa'l' enrāa casejetsa', naa pa'ga en ewsatyi' iviitunuwe. ¹⁷I'cue'sha' jypa'yajcymée yu' fi'nzemée, ewsa's jiyuwa'ja's mpa'pchuwe, Cristo jytjāasnirrá's ew jiyuya'. ¹⁸Tyāasa tūuna fi'nzenuwe. Tyā'wēme', tūunisa' vituwa'tje pe'jna u'jsa'. Atsa' tyā'wē yūumée wejyva Dyus Espiriturrá's ũuste jyuca jypa'garra, ¹⁹i'cue'sh pwe'sh jyucaysa Dyusa'srrāa ũusuj jyuca yajcyna wechana memna meswe. ²⁰Macue wala tjēysa vyaateva, tyāatyi's ũusmée bagachteva Dyusrrāana wechana meswe, Jesucristo's pi'cyrra.

Jyucaysa puuty ya'nwēese'jna fi'nzeni

²¹Āchja' i'cue'sh pwe'sh jyucaysa puuty ya'nwēese'jna mfi'nzewe, Dyusa's yajcyna. ²²Nyuua' nmi'a's nwēese'jwa'l' ji'pja', Cristo' tyā'wēc jycaaja' naa pa'ga. ²³Tyāa pa'gatey nmi' tyā'wē nyuua's tjengna jype'jwa'jsa', Cristova ma'wēga tyajy nwe'wenisatyi's tjengna jype'je'

tyā'wēy. Atsa' Cristo' i'neerráa tjengna jype'jmée, vitucajmen nwe'wesa'.
 24 Atsa' Cristo nwe'wenisava ma'wēta Cristo's nwēese'je', tyā'wēy
 nyuuwe'shva nwēese'jwa'j ji'pjta' tyāawe'sh nmi'ty quíjteva jyuca.

25 Āchja' nmi'a' nyuua's peeygāawa'j ji'pja', Cristova ma'wēga
 tyajy nwe'wenisaty peeygājra tyāawe'sh pa'gate cluuste uu tyā'wēy.
 26 Cristo' tyā'wēc yuu tyajy nwe'wenisa nasaty quíj pcal yujva ji'pjmée
 jyuca yaatena pa'jrra, 27 tyajy tashte iiméj zhichcue pjeu'jni tyāa
 yuurrá's selpiwa'jsa vit-ya'c tyā'wē yūu. 28 Nmi'a' tyā'wē peecy nyuua's
 peeygāawa'j ji'pja' peecy cacue'sva ma'wēga ya'peeygāja' tyā'wēy, tyāa
 pa'gatey nyuua' peecy cacue'írrá' naa pa'ga. 29 Quim yujva peecy cacue's
 atse'tsme', wejyva wala ew jypa'yaqui'c. Atsa' Cristova tyā'wēycu tyajy
 nasaty' wala ew jypa'yacyna jype'je'. 30 Tyāa pa'gatey tyāa jii yā'tja'w,
 tyajy tashte tyuteeya'mée utyasáa. 31 Tyā'wēycu ya'yu', ptamusava peecy
 neywe'shtyi nvijtrra nyuu yuuwa'jsa yacj ya'utya'c tyuteeya'mée, atsa'
 e'nzrrava teechráac yuuna pa'ja'. 32 Ptamuurra fi'nzenisa' Cristo tyajy
 nwe'wenisa cyteerraj utyaarra teechráa yuuna pa'jwa'ja's caajiyul'nisa',
 atsa' tyā'wē teechráa yuuna pa'jwa'ja's quim yujva jiimeety yu' tyā'snatj
 pta'shi'. 33 Atsa' ptamsayā'ja', teechna na'wērraj peecy nyuuty peeygājna
 fi'nzewa'ja', i'cue'sh cacueti ma'wēcue peeygāja' tyā'wēy. Atsa' nyuua'
 peecy nmi'a's nwēese'jna fi'nzewa'ja'.

6 1 Cristo's jiiyā'jsa' luuchwe'sh i'cue'sh neywe'shtyi nwēese'jna
 mfi'nzewe, Cristo' tyā'wēc jycaaja' naa pa'ga. 2 Tyā'wē cytey
 nwēese'jsaty'is Dyusa' wala tyach caafi'nze'jya' neeyūuc tyā'sa' Moises
 leyte na'jīna pta'shna fi'jrra nviitni ūsa': Peecy neywe'shtyi nwēese'jrra',
 3 wala ew fi'nzene'nga naa quiwete wala tyach jī'c.

4 Neywe'shva i'cue'sh luuchtyi zhichcue ewrráa miipe'jwe, Cristo's
 jiyuwa'ja'srráa caapiya'jna.

5 Selpisaawe'shva naa quiwete i'cue'sh patronwe'shtyi wa'lmée
 mwēese'jwe, Cristo yu's nwēese'je'ts na'wē yajcyna. 6 Patronwe'sh
 tjengna ūsterráa tyā'wē cytey yuuwa'jme', wejyva Cristo's nwēese'je'ts
 na'wē yajcyna cytey yuuwa'ja', ūuste wechana. 7 I'cue'sh mjīia's wa'l
 yajcymée Cristo's selpiitstju sūjna ew mjīiwa'ja', nasaty selpiitstju
 sūjmée. 8 I'cue'sha' jiiyā'ji'cue patron ji'pjsa ma'c yuu patron ji'pjmēesa
 ma'c yuu nava tyā'wē yūusatyi' Dyus dewewa'jsa' teechna na'wērraj
 ma'wē mjīisateva. 9 Patronwe'shva i'cue'shtyi selpisaaty juuna' yūumée
 miipe'jwe, tyāa pa'gatey jii i'cue selpisaawe'sh vite' patronwe'shva
 jyucaysa Cristo cielute ūssa teechna yuurráana nwēese'jsai'cue. Tyāa
 pa'gatey Cristo dyi'pte' maa yujva tjaacue walasa meeta'.

Ewmeesa's deewewa'ja's jypa'gani

10 Āchja', yacjtjē'jwe'sh, chjāchja mfi'nzewe Cristo yacj tyutemée,
 atsa' tyā' pu'chna nes yuuna bagachteva cchjāachja'jna. 11 Tyāa pa'gatey

ewmeesa yacj puiiwa'ja's Dyusa' jyuca ũscu, atsa' tyāa yacj puiirra', echtjē'j ewmée yūunite wetemeene'cue. ¹²Tyā'wēme', naa quiwete nasaa pwe'sh yacj puiina ũsmeetja'w. Naa quiwete echtjē'j ma'wē seena' ewmée canzh tyāarrarrāa jycaajna ũsna tyāa yacj cue'sha' pdyi'purra puiina ũstja'w. ¹³Tyāa pa'ga ewmeesa yacj puiiwa'j Dyus ũsni's jyuca mpa'gawe, ewmeesa yacj pdyi'purra ũucjmée chjāchja deeweya'. Tyā'wē yūurra', ewmeesa ma'wēsa'sva i'cue'sh yuj cnayuune'cue. ¹⁴Tyāasa āchja' ũucjmée chjāchja meswe, Dyus yuwe isasarrá's ũuste ew yu'acjrra cytey nwēese'jna. Ew yūuwa'j yuurrá's ũuste jyuca mji'pjuwe. ¹⁵Sa' Dyus yuwe ewte nviitwa'jsa's mteeva pta'shya' u'jya'rrāa meswe. ¹⁶Atsa' Dyusa' quījteva jyuca pu'chjina sūjwa'j yuurrá'sa' wej yujva pechcananuwe. Tyā'wē yaacyni yacja' echtjē'j macue seena' yuutsteva, jyuca cnayuune'cue.

¹⁷Dyus nwe'wenijūyā'ja' tyāajū wej yujva tyutenuwe, sa' Dyus Espiritu caapiya'jni Dyus yuwe'sva wej yujva pechcananuwe. ¹⁸Tyā'wērrāa yūumée, Dyus Espiritu's pi'cyrra Dyus yacj yuurráa bagachteva puuty we'wena meswe, chjāchja fi'nzewa'ja's pējyna. Sa' Dyus yacj puuty we'wewa'ja's bagachte yujva pechcanamée meswe, Dyus luuch jyucaysa pa'gateva Dyusa's mneewe'wewe. ¹⁹Sa' andy pa'gateva Dyusa's neewe'wena meswe, cyaj Cristo's ma'wē ũuste jypa'gawa'ja's quim yujva jiyunimeesa's shiingmée pta'shya' ājacajn. ²⁰Tyā'sna pta'shwa'jsa írrāac Dyusa' andya's nvijt, atsa' tyāa pa'ga írrāa āchja' preesu ũstju. Atsa' i'cue'sha' Dyusa's neewe'wena meswe, tyajy yuwe's ũucjmée pta'shcajn.

Yuwe wechaa caajni

²¹⁻²²Cue'sh yacjtjē'j Tíquico bagachteva Dyus yacj tyutemée pta'sh pu'chsa tyā'sa' cajatstju, andy ma'wēne'tca fi'nze' tyā'sa' jyuca pta'shcajn. Atsa' andy ma'wē fi'nzena quījrraj yūuna ũsteva jiyurra', i'cue'sh maafi yu' ũusna ũsrrava chjāchja yaaquine'cue.

²³Dyus cue'sh Tata vite' cue'shtyi nwe'wesa Jesucristo tyāawe'sha' i'cue'shtyi pu'chjityna, quījteva ewrrāa puuty ya'peeygājna Dyusa's yuurráa yajcyna fi'nzecajn. ²⁴Sa' maava cue'shtyi nwe'wesa Jesucristo's yaacysa yuutyi's Dyusa' pu'chjina jyucaysaty.

SAN PABLO CARTA FILIPOS CHJAMBTEWE'SH JÏI

Pablo carcelte ùsrra Filipos chjambte yacjtjē'jty fi'jni

1 ¹Jesucristo's selpisáa Pablo vite' Timoteo cue'shtja'w naa carta's fi'jrra caja' Dyus luuch Cristo Jesus yacj fi'nzesawe'shtyi, Filipos chjambte ùssa yacjtjē'jwe'sh vite' dyuus yatte jycaajsawe'sh vite' cytee mjïi pu'chsa jyucaysaty wechana. ²I'cue'shtyi' Dyusa' pu'chjina vite' cue'shtyi jype'jsa Jesucristova, tyāa pa'ga Dyus yacjrráa mfi'nzewe.

Dyus yacj fi'nzesawe'sh pa'gate Pablo Dyus yacj puuty we'weni

³Bagachteva i'cue'shtyi yaacy iisatj Dyusa's wecha'. ⁴Sa' i'cue'sh jyucaysa pa'gate bagachteva wala wechana Dyus yacj puuty we'we'tj. ⁵Tyāa pa'gatey ja'ndarra mjïisatja'w Dyus yuwe's pta'shna nyafiitey tacjrra āchpcach. ⁶Atsa' na'wē i'cue'sh ew fi'nzewa'ja's Dyusa' i'cue'shtyi pu'chya' tacjcu na' Jesucristo naa quiwete shawendna quījpcach pu'chna nes yuuna tyā'wē yūuwa'ja's ew jiitj. ⁷Andya' Dyus yuwe's pta'shpa'garráa āchja' carcelte ūstju. Nava cjuēs tashte pa'yama'ty pējyya' nava Dyus yuwe ewsa yuja' jīna pta'shna nes yu'nja, tyā'wēy i'cue'shva tuutje'j pu'chna ūsi'cue. Tyāa pa'ga andya' i'cue'shtyi iiméj wala peeygājna jyucaysaty pechcanamée yajcyna fi'nzete', wala wecha yuja'. ⁸Jesucristova ma'wēga peeygāj tyā'wēy andyva i'cue'shtyi jyucaysaty iiméj wala peeygāani's Dyusa' jīia'. ⁹Tyāasatj i'cue'sh pa'gate Dyus yacj puuty we'wena pēyi' peeygāawa'ja's jweefírráa wala ji'pjurra ma'wē fi'nzewa'ja'sva wala ew jii quījte yujva jypumbacajmén, ¹⁰cyaj maa ewsateva jiyurra tyā'srráa tyjityjrra Dyus dyi'pte ew fi'nzeya' ājāne'cue. Atsa' tyā'wē fi'nzerra'. Cristo quīi ente' wej yujva yuuwe meesa yuune'cue. ¹¹Tyā'wē yuucajn Jesucristo' jweefírráa wala pu'chjina, i'cue'sh ew yūuna fi'nzete' Dyusa' jweefírráa tuutje'jni yuucajn.

Andy ityĩ fi'nzeni' jyuca Cristo jĩi yuurrá'

¹² Yacjtjê'jwe'sh jiyucajn pta'shya'vatj: andya's na'wê carcelte ũswa'j en pa'cj nava tyāa yu' jweeírráa Dyus yuwe's tuutje'cjancu tyā'wê yuu. ¹³ Tyāa pa'ga soldau jyucaysa maava jyuca jiita' Cristo's selpiipa'garráa preesu ũsteva. ¹⁴ Atsa' andya' tyā'wê preesu ũsrrava Dyus yuwe's ũucjmée pta'shitste jiyurra', maa yacjtjê'jwe'shva tyā'wêy ũucjmeety Dyusa's jweeírráa chjāchja yajcyna pta'shi'. ¹⁵⁻¹⁶ Maaíi yu' andya's atseyajcyrraty Cristo caapiya'jni's pta'shi', andya' preesu yā'j ũste', jweeírráa cyūusu'j wēerra. ¹⁷ Naapcachja' vite' andya's pu'chna ew yajcyrraty tyā'wê yū'. Andy yu' preesu ũsrrava Dyus yuwe yu'sa' ũucjmée pta'shna ũsteva jiirraty tyāawe'shva ũucjmée ew yū'. ¹⁸ Andya's atseyaacysa ma'c yuu cjiimeerra' atseyaacysamée ma'c yuu nava Cristo caapiya'jni's maatyva pta'shnirráa ewna. Tyāa pa'gatj andya' wechá'.

¹⁹ Andy pa'gate i'cue'sha' Dyus yacj puuty we'wena ũsne'cue, naapcachja' Dyus Espirituva pu'chte', preesu ũsrrava ew caseje'nja sūjnatj wala wechá'. ²⁰ Tyāa pa'ga macue preesu ũsrrava wej yujva tjaamemée, wejyva Cristo yuurrá's áate tuutje'j wēetj. Nyafíiva ma'wēta tuutje'je' āchva tyā'wēyrráa yu'nja. Tyāa pa'ga macue andy uuma'tj meerra' uumeema'tj nava Cristo' tuutje'jni nes yuuna. ²¹ Tyāa pa'gatey naa quiwete andy ityĩ fi'nzenisa' jyuca Cristo jĩi yuurrá', sa' uurra' Cristo yacj ũsya' u'jwa'lsatj. ²² Tyāa pa'ga ma'sna tyjityj wēerrava āja'tsmeetj, tyā'wē naa quiwete nee fi'nze'tsrra', Cristona selpiina ũste', wala ewsaírrá' naa pa'ga. ²³ Atsa' tyāa e'nzsaty tyjityjwa'ja' andy yacja' tjēya'. Qui'quinte' uuni wejy ewna Cristo yacj ũsya' u'jni sūjnatj yaaqui'. ²⁴ Nava naa quiwete nee ityĩ fi'nzeni wejy jytjaacue peejya' i'cue'shtyi pu'chna ũswa'j. ²⁵ Tyāa pa'ga naa quiwete nee uumey i'cue'shtyi pu'chna ũswa'j ji'pjíirráatj, Dyus yacj chjāchja fi'nzecajn. ²⁶ Atsa' i'cue'sha' na'wê andya's nee ũs jytjáasu'i'cue atsa' Dyus pu'chte' pa'ja'nja, Cristo Jesusa's wechawa'ja's ji'pjucajn.

²⁷ Cristo caapiya'jnirrá's cytey yuuna mfi'nzewe. Atsa' bagachterráava andy tjengya' pa'jma'tj meerra' pa'jmeema'tj nava Dyusrrá's chjāchja yajcyna teeche'sa na'wērraj jyucaysa Dyus yuwe's pta'shna pa'pchuna ũsta' jĩnirrá's jiyu wēetj. ²⁸ Sa' atsesawe'shtyi ma'wē yujva ũucjmée mfi'nzewe. Tyāawe'sha' jyucate vituwa'lsarraj tyā'wê atsetyna, naapcachja' i'cue'sh ũucjmée fi'nzesa' Dyus nwe'wenisarraj tyā'wê ũucjmeene'cue. ²⁹ Tyāa pa'ga Cristo's jypa'gasa yā'ja' Dyus yacj wēt fi'nzewa'ja'srráa wechana jypa'gamée, Cristo's selpiipa'ga naa quiwete tjēyte ñuste fi'nzewa'ja'sva wechana jypa'gawa'ja'. ³⁰ Andyva ma'wēta atseni fi'nze nyafí', sa' āchva tyā'wēyrráa atseni ũstju tyā'sa' jii i'cue, atsa' i'cue'shva tyā'wēy andy yacj ja'ndarraj yajtsena ũsi'cue.

Cristo' ajmeecuesa na'wē yuurrava tjaacue walasa yuuna pa'jni

2 ¹I'cue'shtyi na'wētj yu'cypeje': Cristo peeygāanisa Dyus Espiritu's ūuste ji'pjdyijrra', tyajy cviisha'jni cchjāachja'jni mfi'nzewe, ²teehsa na'wērraj puuty ya'peeygājna, teehsa na'wērrarrāa yajcyna. Atsa' tyā'wē fi'nzetsta' jini's jiyurra', andya' wala wecha'nja.

³Iiweych yajcyna peecy wēt fi'nzewa'jrrā's yaacywa'jme', wejyva iiweych yajcymée vitesaty jytjaacue tujtjesa' sūjna tyāawe'shtyi ewrrāa yūuna mfi'nzewe. ⁴Tyā'wē peecy wēt fi'nzewa'jrrā's yajcymée, wejyva vitesaty pu'chna mfi'nzewe ew fi'nzewa'ja's tyāawe'shva jiyucajn.

⁵Cristo' na'wēc yūuya' yajcy tyā'sna i'cue'sh mji'pjuwe: ⁶Cristo' Dyusfirrāac yu', nava Dyus tyacue seena' wala jytujtjesatj sūjwa'j yu'sa' ji'pjmée, ⁷tyā'wē yaacywa'ja's jyuca nvijrra cue'sh ajmeecuesa na'wē yuurrac selpiiya' yajcy. ⁸Tyāasac ajmeecuesa na'wē yuuna pa'jrra űus űus cluuste uuwa'ja'sva ji'pju, Dyusna nwēese'jrra. ⁹Tyā'wē yūupa'gac Dyusa' cielun pe'jna u'jrra maateva jytjaacue tujtjesa vitrra qui'p jycaajwa'jsa. ¹⁰Atsa' cielute űssa vite' naa quiwete űssa vite' mtee mteewe'shva jyuca Jesus tashterrarrāa peejyūcuerra ¹¹na'jityna: Jesucristo yuurrāa maateva jytjaacue jycaajwa'jsa jina Dyusa's wechaatyna.

Dyusa's jiisa' naa quiwete eena' cweetjna fi'nzewa'ja'

¹²Andy yacjtjē'jwe'sh yaacynisaty na'wētj yu'cypeje': i'cue'sh yacj andy cytee űsrra caapiya'jni's wa'lmée i'cue jyuca cytey nwēese'je'. Tyāasa āchja' jweefirráa chjāchja Dyusa's yajcyna meswe, jypumbamée fi'nzewa'ja's pa'pchuna, macue andy yu' jyu'tje űsteva. ¹³Tyāa pa'gatey tyā'wē ew yūuna fi'nzewa'ja's Dyuscu caaūusutje'je', tyajy jytjāasni's cytey yuuna fi'nzecajn.

¹⁴Quijteva jyuca ewrrāa myūuwe nuywe'wena puiimée. ¹⁵Tyā'wē ewrrāa yūute', quim yujva i'cue'shtyi yuuwesa ewmeesata' jīya' ājāmeetyna, wejyva Dyus luuch yuj yu'ta' yuuwemeesa jīnarrāa we'wetyna, macue naa quiwete nasa ewmeesa cshavyte űsteva. Atsa' i'cue'sha' eena' cweetjsa na'wē mfi'nzewe tyāawe'sh cshavyte, ¹⁶Dyus yuwe űtyī caafi'nzel'jwa'ja's mtee mteeva pta'shna. Atsa' naa quiwete Cristo quijte', andya' cyulmeetca pa'pchuna mjiī sūjna wēt wēt yaaqui'nja i'cue'sh tyā'wē ew yūuna fi'nzepa'ga. ¹⁷Tyāasatj űucjmée mji', macue andy űtyī fi'nzeni's iviituwa'j ma'c yuu i'cue'sh pa'gate Dyusna selpiipa'ga, nava tyā'sa' űucjmée wechana cytey yuuya' űstju. Tyā'wē andy wechani'stju i'cue'sh jyucaysaty pta'shi', ¹⁸andy na'wēy űucjmée wechana űscajn.

Timoteo vite' Epafrodito yacj caajni

¹⁹I'cue'sh ma'wē fi'nzena űsteva jiyurra wechana űsya', Dyus pu'chte' Timoteo's dund caja'nja i'cue'shtyi tjengya' sūju'tj. ²⁰Tyā'wēme', andy

na'wëy i'cue'sh pa'gate pa'pchusa vite yu' ji'pjmeetj. ²¹Vite yu' üsrrava, peecy wët fi'nzewa'jrrá'styi yaaqui', Cristo Jesus jytjáasni yu'sa' yajcymée. ²²Nava Timoteo' tyä'wë yu'tsme'. I'cue'sha' jiiyá'ji'cue ma'wëga wala selpíi Dyus yuwe's andy yacj pta'sh pu'chna, peecy luuch ma'wë neya's pu'chjicy tyä'wëc yüu. ²³Tyāa pa'ga andya's quíj yüuya'vateva jiyuna'va, Timoteo's dund caja'nja i'cue'shtyi pta'shya'. ²⁴Meerra' andy yuu i'cue'shtyi tjengya' yujvatsa', sūjrra Dyusrrá'stju neewe'we'.

²⁵Yacjtjē'j Epafrodito's i'cue'sha' caajne'cue andy peejinity ctū'se'jrra atsa' ayte üsa', andya's pu'chna pytjaa yuuna. Atsa' tyä'sva caja'nja sūjū'tj. ²⁶Tyā'wë tyajy ätsā'ni's i'cue'shva jiyuty jini's wësē'jrra', tyä' i'cue'sh yacj wala puuty uy wëje'c, tyāasac wala cuj yaaqui'. ²⁷Isa ätsā'na weterra', uuwa'tjerrāa yā'cj üsu'. Nava Dyusa' tyä'sa' pu'chcu. Sa' tyä'srrāana pu'chmée, andynava tyä'wëycu pu'ch, na'wë ñusna üstju tyāate jytjaacue ñussa pa'cjamén. ²⁸Tyāa pa'ga tyä'sa' dund caja'nja sūju'tj, tyāa yacj i'cue'sh puuty uyrra' wechana üscajn. Atsa' i'cue'sh wechana üste', andyva ñusmée wechana üsu'nja. ²⁹Tyāa yacjtjē'ja's wala wechana mpa'gawe, sa' tyāa na'wëysatyi's bagachteva mpeeygājwe. ³⁰Tyāa yacjtjē'ja' Cristo's selpiipa'garrāa tyajy ityī fi'nzeni's iviitu'dyijc, tyä'wë i'cue'sh yu' andya's pu'chya' ājāmeeteva, tyāa yu' andya's selpiina üsrrac tyä'wë u'dyij.

Dyus dyi'pte ew fi'nzewa'ja's Dyus íírráac üsu'

3 ¹Ächja', yacjtjē'jwe'sh, Dyus yacj wechana mfi'nzewe. Nyaffi neewe'wena fi'tj tyä'wëyrrāa ächva neewe'wetstju, i'cue'shtyi' selpiwa'jsa' naa pa'ga. ²Nasa ewmeesa caypumba'jna fi'nzesatyi's mpa'yajcywe, peecy cacuetewe'sha's spē'tjsaty. ³Ew jiyute yu', Dyusa's üusuj jyuca yajcyrra neewe'wesa cue'sh tyä'wë Dyus luuch circuncidāynisatja'w. Tyāa pa'gatey Cristo Jesus jii yā'tja'w sūjrra wechanatja'w fi'nze' naa pa'ga. Sa' cue'sh ājāni cacuecjēwe'sha's weech yajcyna fi'nze'tsmeetja'w. ⁴Tyāaty yaacy wëevats yu', andyva weech yajcyya' āja'nja, quimteva jytjaacuesatj naa pa'ga. ⁵Andy āaga yuuni ocho en yuutspcachja', circuncidāynisatj. Sa' Israel nasatj, Benjamin ji'tj. Sa' mama tutyju caseji hebreo nwe'shtju yu', tatawe'sha' judiuty yu' tyāa pa'ga. Cjirrava andya' fariseotj yu', judiwe'sh ley ma'wë jycaatjeva jyuca cyteytju yuuna fi'nzesa yu'. ⁶Tyāasatj ley caapiya'jni's nwëese'jna Cristo nasatyi's icjya' pacué', Dyusna selpiitstju sūjrra. Atsa' andya's quim yujva ley jycaajni's cytey yuume' jīya' ājāmeetyna.

⁷Nyaffi yu' tyä'wësa' andy yacja' seena' yuj wala ewsa yu'ty. Nava ächja' Cristo's jypa'ganijū' tyä'wësa' quijte yujva seelpimeety yuuna pa'j. ⁸Ächja' Cristo Jesusna ew jiyuwa'j wejy jytjaacue wala ewsa', naa pa'ga tyä'wësatyi' jyuca nvijtrratj fi'nze'. Cristorrá's selpiina fi'nze wëerra quijquijnava jyuca nvijttju seelpimeesatyi's, tyāa yacj yuurráa fi'nzeya'. ⁹Tyä'wë ley jycaajni's cytey nwëese'jrra ew fi'nzewa'ja's ji'pjumeetj.

Tyā'wē ew fi'nzewa'ja's Dyuscu ūs, Cristo's ūusuj jyuca yaacypa'ga.
 10 Tyāasa Cristo yuurrá's ew jiyurra tyāa ma'wēne! uurra qui' ityī yuu
 tyā'wēy yuu wēetj. Sa' tyāa na'wēy pytjaa yuurra uuwa'j'na ji'pjurra,
 11 uunijūva qui' ityī yu'nja sūjū'tj.

Dyus dyi'pte ewsa yuuna pa'jwa'ja's pacuena nes yuuni

12 Tyā'wē Cristo's jyuca jiiyā'tj jī'tsmeetj, sa' Dyus dyi'pte ewsayā'tj
 sūju'tsvameetj. Nava tyā'wē yūuwa'ja's ājā'nja sūjnarráatj pa'p'chuna nes
 yu'. Cristo Jesusa' andya's tyāa jīic vitna pa'j atsa' āchja' andya' Cristo
 jīitj sūjnarráatj pa'p'chuna fi'nze! 13 Yacjtjē'jwe'shtyi na'ji'tj na': Cristo's
 jiyuwa'j peejírráatj sa' Dyus dyi'pte ew fi'nzena pa'jwa'j peejírrá' sūjū'tj.
 Atsa' tyāaty cytey yuu wēerra na'wētj yū': nyaffi fi'nzeni's pechcanarra,
 na'wē jiyuna jyā'jwa'j ūsta' tyāarráaty'tju wejy pa'p'chu'. 14 Tyāaty jyuca
 ew jiyuna pa'jrra', Cristo Jesus tashte ūsya' Dyus pa'yac cytee ūsu'nja
 sūjū'tj.

15 Dyusa's ewyā'j jiisa' jyucaysa na'wē pta'shi'tj tyā'wērrarráa yaacywa'j
 ji'ptja'w. Meerra' jypumbavá'cue nava Dyusa' ew áate caajiyu'juna.

16 Na'wē Dyus yacj ew fi'nzewa'ja's jiiyā'tja'w tyā'sa' pechcanamée cytey
 yuuna fi'nzewa'j ji'ptja'w.

17 Yacjtjē'jwe'sh, andy na'wēy mfi'nzewe. I'cue'shtyiva ma'wē'tca'w
 caapiya'j tyā'wēy vite yacjtjē'jwa ūsta' ew fi'nzesa, atsa' tyāawe'sh na'wēy
 mfi'nzewe. 18 Wala cujus iipta'shyā'tj, nava qui' peena pta'shitstju ū'nena:
 maa'fi yu' Cristo cluuste uuni's atsesa ūsta'. 19 Tyāawe'sha' ū'wa'ja's
 yuurráa dyus na'wē yajcyna fi'nzesata', sa' tjaamewa'ja's yaaquipcachte
 tjaampa'su yu' iwejch yaacysarráata'. Nava nmejte' jyuca iviituni
 yuutyna. 20 Naapcachja' cue'sh yu' cielute ūswa'jsatja'w. Tyāasa ūytjasna
 ūstja'w, cue'shtyi nwe'wesa Jesucristo cielujū quíijana sūjna. 21 Tyā' cue'sh
 cacue seelpimeesa's yu'ptjejrja, tyajy cacue na'wēy ewsa vituna, Cristo'
 ma'wē yūuwa'ja'sva jyuca ājāwa'jsa' naa pa'ga.

Pejca Dyus yacj yuurráa wechana mfi'nzewe

4 1 Andy yacjtjē'jwe'shtyi yajcyte', wala wecha yuja', Dyus yuwe's
 jiyurra jypumbamée ūste'. Atsa' i'cue'shtyi wala peeygājna
 neewe'we'tj: Dyusna pechcanamée chjāchja yajcyna meswe.

2 Evodia vite! Síntique tyāawe'sha' e'nzī Dyusa's ūuste jypa'garra
 fi'nzetsrra', puiimée fi'nzecajntju neewe'we'. 3 Sa' tyāa e'nz u'lyti's
 yu'cypejcajn indyna neewe'wetstju, andy yacj mjīi pu'chna u'jusang naa
 pa'ga. Tyāa e'nz u'ywe'sha' nyaffia' andy yacj Dyus yuwe's wala pta'sh
 pu'chtyi, Clemente vite! andy yacj mjīi pu'chsawe'sh yā'jrja. Atsa' tyāawe'sh
 yase' fil'jni yā'j ūsta' bagachte yujva uuwa'jmée ityī fi'nzewa'j librate.

4 Dyusna chjāchja yajcyna fi'nzetsrra', wech wecha yajcyna mfi'nzewe.
 I'cue'shtyi peena neewe'wetstju, wech wecha fi'nzecajn. 5 Cyaj maava

i'cue'sh ew yūuna fi'nzeni's jiyucajn, i'cue'sha' Dyus yacj ew fi'nzewa'l yuurrá's pa'pchuna meswe, Cristo quíiwa'ja' ájatsyá'ja' naa pa'ga.

⁶Wej yujva ñusmée, wejyva Dyusrráana neewe'wena meswe. Quíj peejyrrava, tyá'sna jyuca mpějywe wechana. ⁷Tyá'wē yūute', Dyusa' ūsuna ūuste wēt yaacywa'l seena' walasa's. Atsa' ūuste wēt yaacywa'l ja's jypa'gate', wala yuj wecha yuja'. Tyá'wē Dyus ūsni ūuste wēt yaacyni's ew áate pta'shya' ya'ája'tsme', tyá'wē seena' walasa pa'ga. Tyāa wēt yaacywa'l ja's jypa'gasayá'ja', Cristo Jesus yacj wētráa yajcyna fi'nzene'cue.

Dyus dyi'pte ew fi'nzewa'jrrá's yajcyna fi'nzeni

⁸Yacjtjē'jwe'sh na'wē yajcyna fi'nzecajn neewe'werra nmej nviitutstju: quíjquijva i'cue'sh ūuste suwwa'jsamée ew Dyus dyi'pte caafi'nze'l'jwa'lja yuurrá's mpa'pchuwe, íshiimée isasarrá's we'wena, ewrráa yūuna quíjteva jypumbamée. ⁹Andy caapiya'jnity ūusuj jyuca jypa'garra ūsra' tyāaty' cytey yuuna mfi'nzewe. Andy ma'wē jycaajrra' qui' ma'wēne'tca yūuna fi'nze tyāaty' tyá'wēy myūuwe. Atsa' i'cue'sh ūuste wēt yaacywa'l ja's ūssa Dyusa' i'cue'sh yacj nes yuuna.

Filiposwe'sh Pablo's ofrenda peesni

¹⁰I'cue'sha' andya's qui' yaacypa'ga andya' wala wecha'tj. Nyafí' pechcanane'cue sūjrra tyā'j'i'tsmeetj. Tyá'wē pechcanameerrava pu'chya'rráa ne'cue ájámée ūsu' sūjū'tj. ¹¹Quíjva ji'pjmée peejiinatj ūsu' jírra tyā'j'i'tsmeetj. Tyāa pa'gatey andya' piyatj quíjcuē ji'pjuni yacjrráava wechana fi'nzeya'. ¹²Quíj yujva ji'pjmée fi'nzeni's jiitj, sa' wala ji'pj fi'nzeni'sva jiitj. Tyic ūswa'l ma'c yuu meerra' wēena fi'nzewa'l ma'c yuu nava ma'wē fi'nzewa'l en pa'tjeva maa sūjmée ūsya'tj piya. Quíjva pejiima'tj pejiimeema'tj nava tyá'wē fi'nzewa'l ja's jyuca piyatj. ¹³Tyāa pa'gatey naa quiwete macue wala tjēysa ñussa pa'tjeva, Cristo yuurráac pu'chna nes yu', chjächja caafi'nze'l'jna. ¹⁴Macue tyá'wēteva, i'cue'sha' ew i'cue yūu, andy peejiina fi'nzeni's pu'chna.

¹⁵Andy nyafyrraj Macedoniasu Dyus yuwe's pta'shya' u'juetste', andya's quim yujva pu'chmeeteva, i'cue'sh yuurráa i'cue andy peejini's pu'chna caaj, andya' i'cue'shtyi caapiya'tj Dyus yacj fi'nzewa'l ja's naa pa'ga. ¹⁶Sa' andy Tesalonicate nee ūsiyna i'cue'sha' qui' vyuu caaji'cue andy peejini's pu'chna. ¹⁷Tyá'wē andyna quíjrráava peeste', tyá'sna jypa'gawa'l'jrrá's yajcyna fi'nze'tsmeetj, wejyva tyá'wē yūupa'ga Dyusa' jweeírráa wala peesuna i'cue'shtyi's sūjnarráatj yaaqui'. ¹⁸Epafrdito yacj vyuu caacjue tyāarráa andy peejinite jytjaacueyá'ja'. Tyāa peesya' caajnisá' Dyus dyi'pte iiméj wala ewsa yu'c, Dyusa's wechana peesnisa ne' yu' naa pa'ga. ¹⁹Atsa' andy Dyusa' i'cue'sh quíj peejiina ūsteva, jyuca ūsuna pejiicajmén, tyāa pa'gatey Cristo Jesusa's jypa'ganijū' Dyus jīi yu'sa' quíj yujva peejymée

jjucac ya'jypa'ga'. ²⁰Tyãa pa'ga cue'sh Tata cielute ãssa's wechana nes yuuwa'ja' bagachteva.

Dyus luuch jyucaysaty yuwe wechaa caajni

²¹Dyus luuch jyucaysaty yuwe mweechawe, Cristo Jesus yacj fi'nzesawe'shtyi. Tyã'wëy andy yacj ãssa yacjtjê'jwe'shva yuwe wechaa caja'ty. ²²Sa' Dyus luuch Cesar tashte selpiina ãssava jyucaysa yuwe wechaa caja'ty.

²³Cue'shtyi jype'jsa Jesucristo' i'cue'shtyi' pu'chjina ewrráa caafi'nze'jna.

SAN PABLO CARTA COLOSAS CHJAMBTEWE'SH JÏI

Dyus yacj fi'nzesa Colosas chjambtewe'shtyi Pablo fi'jni

1 ¹ Andya' Jesucristo jycaajnisá Pablo yaasetj, tyā'wēte selpiwa'jsa Dyus nviitnisá. ² Tyāa pa'ga Dyus luuch Colosas chjambtewe'sh jÏi naa carta's fi'jrra cajaststju, Cristo's nwēese'jsawe'shtyi wechana yacjtjē'j Timoteo yacj. I'cue'shtyi' Dyus cue'sh Tata' pu'chjina, ewrráa caafi'nze'jna.

Dyus yacj fi'nzesawe'sh pa'gate Pablo Dyus yacj puuty we'weni

³ I'cue'sh pa'gate Dyus yacj puuty we'wetsrra', cue'shtyi nwe'wesa Jesucristo Tata's wala wecha'tja'w bagachteva. ⁴ I'cue'sha' Cristo Jesus yacj jypumbamée Dyus luuch jyucaysa yacj puuty ya'peeygājna ũsta' jÏni'stja'w jiyu. ⁵ Tyā'wē i'cue'sh jÏi cielute jyaawni ũsa' tyā'sna jypa'gaya' sÿjrrane'cue tyā'wē ew fi'nze', sa' Dyus yuwe ewte nviitwa'jsa isasa's pta'shte wēse'jrrane'cue cielutewe'sha'srráa ũytjasya' yajcy. ⁶ Dyus yuwe ewte nviit-sa's pta'shnisa āchja' tyacue walaana u'juetsa' naa quiwete mtee mteeva jyuca. I'cue'shva Dyus peeygāani isasa's pta'shte', isasa yujna sÿjna jypa'ganijūjy, ma'wēga pejnana u'j tyā'wēy yuutsa'. ⁷ Cue'sh yacjtjē'j Epafra's Cristo's selpisáa tyā'wēc Dyus yuwe ewte nviit-sa's i'cue'shtyi caapiya'j tyā'sna iipe'ji'cue. Tyā' nyafii yu' cue'sh yacjcu mjÏi pu'chsa yu'. ⁸ Tyāac Dyus Espiritu yuurrá's nwēese'jna peeygājna ũsta' jÏna pta'sh.

⁹ I'cue'sh tyā'wē ew fi'nzeni's pta'shiyna, Dyus yacj puuty we'wena nestja'w yu' i'cue'sh pa'gate, tyā'wē Dyus yacj fi'nzewa'ja's quÿjte yujva jypumbamée wala ew jiyurra tyāajū ma'wē yujva tyutemée fi'nzecajn.

¹⁰ Tyāa pa'ga i'cue'sha' Cristo jÿiyā'jrra', tyajy jycaajni yuurrá's jyuca cytey yuuna ewrráa fi'nzerra Dyus yacj fi'nzewa'ja's jweefirrāa ew piyaane'cue. ¹¹ Sa' tyajū' quÿjte yujva jypumbana ñusmée wechana chjāchja fi'nzene'cue. ¹² Tyā'wē yūurra Dyusa's ũusuj jyuca wechawa'ja's

ji'pjune'cue. Tyā' cue'shtyi jypa'gawa'l pjeu'jrra ji'pja' tyā'sa' ūsuna tyā'sna nwēese'jsa yuutyi' jyucaysaty. ¹³Tyāac chji'ndyte fi'nzena ūsteva, tyajū cutyi'jrra tyajy Nchi'c wendynisa tashte nvijt, ¹⁴tyajy Nchi'c peltunāyrra nwe'wenisatja'w naa pa'ga.

Cue'sh pa'gate Cristo uupa'ga Dyus yacj yuuwemée neeyūuni

¹⁵Dyusa' cue'sh yafyte vyaasame', nava vyaaya' quīj c tyajy Nchi'c Jesucristo cacuete. Tyāasa Cristo' Dyus írrá', naa quiwete quījquījteva tjaacue yatstewe'sh. ¹⁶Dyusa' tyajy Nchi'c Jesucristo'scu neewe'werra nvijt naa quiwe, cielu, quījquījrraj ūstyna, cue'sh yafyte vyaasáa vite' cue'sh yafyte vyaasamée tyāaty jyuca tyāarrarráa vitcajn. Tyāa pa'ga quījquījva jyuca Cristo jīita' tyajy vitnisa, sa' tyā'srrarráa nwēese'jwa'jsata', echtjē'j ma'ty yuu angeleswe'sh ma'ty yuu nava jyuca. ¹⁷Naa quiwe meetey Cristo' ūsyā'cj yu', sa' āchva tyāa írráa ūsa', tyajy pa'ga yuurráa quījquījva jyuca ewrráa ūsta'. ¹⁸Sa' Cristo's jypa'garra tyāa yacj fi'nzesa maanzcuēesatyva jyuca Cristo írráa jycaajsa'. Tyāac nyafytewe'sh yu', sa' tyāa írráac uurrava nyafyte qui' ityi yuu, tyāarrarráa bagachteva jycaajwa'jsa. ¹⁹Dyusa' Cristo's caacj, nava le'chcuerráa yujva vitemée, Dyus írráac yu'. ²⁰Sa' Dyusa' maa yujtyva nvijtmée, naa quiwetewe'sh quījquījva jyuca Cristo's ajtsemée yuwe ewuuna pa'jwa'ja'scu vit, Cristo's cluuste uuwa'l vitrra.

²¹I'cue'shva nyafia' Dyus luuchmée i'cue yu', Dyusa's atsewa'jrrá's yajcyna fi'nzesa, ewmeerráa yūuna. Nava ewmeesarrava āchja' Dyus tashte pa'jya' ājawa'ja's Dyusíi pjeu'cj, ²²tyā'wē Cristo's pytjaa yuurra uuwa'l vitrra. Naasáa cue'sh quīj pcal yujva ji'pjimée tyajy tashte yuurráa selpiina fi'nzeczajncu tyā'wē yūu. ²³Atsa' tyā'wē ew fi'nzeya' ājaya', Cristo yuurrá's iiméj ew ūusuj jyuca yajcyna tyajy yuwe ewsa nwe'wewa'jsa pta'shni's jii i'cue tyajū tyutenuwe. Tyāa Dyus yuwe ewsa nwe'wewa'jsa's tyā'wē mtee mteeva jyuca pta'shni yuutsa', atsa' tyā'sna pta'shcajncu Dyusa' nvijt andya's.

Dyus luuchtyi selpiicajn Dyusa' Pablo's neewe'werra nviitnisa

²⁴Tyāa pa'ga Dyus yuwe's i'cue'shtyi pta'shpa'ga pytjaa yuuna ūsrrava, wala wecha'tj. Nava andy pytjaa yuuwa'l yuutyi's wa'lu'tsmeetj. Cristova ma'wēga tyajy nasaa pa'gate pytjaa yuurra uu tyāa pa'ga andyva pytjaa yuuwa'lsatj. ²⁵Dyus luuchtyi selpiwa'jsac Dyusa' andya's neewe'werra nvijt, Dyus yuwe's i'cue'shtyiva pta'shcajn quījte yujva peejymée jyuca. ²⁶Tyāniitey bagachte yujva caajiyu'jnimeesa ūsu'ne' tyā'snac Dyusa' āchja' caajiyu'l tyajy nasaty, atsa' tyā'sna pta'shwa'lsatj. ²⁷Dyusa' tyajy yuwe caajiyu'jnimeesa iiméj wala selpiwa'jsa yu'c judiu ji'jmée vite nasatyva tyā'snac caajiyu'l tyajy nasaty. Tyā' naac yu': Cristo' i'cue'sh ūuste u'cac, tyāa pa'ga i'cue'sha' Dyus tashte pa'jwa'ja's ji'pji'cue jīna pta'shni's i'cue

jiimée yu'. ²⁸Atsa' Cristo i'cue'sh ũuste cjëeni'stja'w cue'sha' pta'shi', yu'cypejna, caapiya'jna, jyucaysa wala ew jiyurra teehsa na'wërraj Cristo yacj yuurraa jypumbamée fi'nzewa'ja's ew piyacajn. ²⁹Tyā'wë yūuwa'ja's caapiya'lnatj tyacue wala chjächja mjī', Cristo quījteva jyuca pu'chte.

2 ¹I'cue'sha' mjiiyuwe: Andya' i'cue'sh pa'gate vite' Laodiceatewe'sh vite' andyna jiimeesa ũstyna tyāawe'sh jyucaysa pa'gate iiméj wala pa'pchuna Dyus yacj puuty we'wena ũstju. ²I'cue'sh jyucaysa Cristo ma'wēsateva quījte yujva peejymée jyuca ew jiyucajn tyā'wë pa'pchuna ũstju. Tyāa Cristoc i'cue'sh ũuste cjëewa'jsa yu' tyā'snac tyāniitey quim yujtyva caajiyu'jnimée ũsu'. Atsa' tyā'sna ew jiyurra' jypumbamée i'cue'sh pwe'sh puuty ya'peeygājna fi'nzene'cue. ³Tyāa pa'gatey ma'wërraj jiyuwa'j peejyteva, Cristo yuurraac ũsu'. ⁴I'cue'shtyi' tyā'wëtj ew āate pta'shi', vitesa i'ishiina zhichcue we'wena caypumba'jwe'shte. ⁵Andya' i'cue'sh yacj ij ũsmeetj, nava i'cue'sh yacj ij ũs na'wë yajcyna ũstju ũuste yu', tyāasatj wala wechá', Cristo yacj yuurraa jypumbamée fi'nzepa'ga.

⁶Tyāasa Jesucristo's ma'wëcue nyafii wechana jypa'ga tyā'wëesa mfi'nzewe tyāa yacj tyutemée. ⁷Bagachteva Cristorrá's yajcyna tyāa yuurra's nwëese'jna Dyusa's wechana fi'nzewa'ja's i'cue caapiya'jni yuu, tyajū tyutenuwe.

Cristo ityi yuupa'ga cue'shva pcaluj ityi yuuni

⁸Tyāasa i'cue'sha' wala mpa'yajcywe, naa quiwete nasaa pwe'sh yajcyrra caapiya'jnirrá's pta'shna caypumba'jwe'shte. Tyāawe'sha' Cristo caapiya'jni's caapiya'jsamée, ewmeesa jycaajnnirrá's cytey yuusata'. ⁹I'cue'sha' tyā'wë caapiya'jni's nwëese'jwa'jsa meei'cue, tyāa pa'gatey Cristo' Dyus ma'wēsateva tyāava tyā'wëysafírrá'. ¹⁰Atsa' i'cue'sha' tyā'sna ũuste jypa'ganijū' Cristo yacj teehrráa i'cue yuuna pa'ja'. Tyāa pa'ga jwee yu' vite yu' quījva peejymée yā'ji'cue, tyāa pa'gatey Cristorrarráa jyuca jycaajsa' naa quiwetewe'sh vite' ēe wasasu ewmeesa ũstyna tyāa yā'jrra. ¹¹Cristo's ũuste jypa'ganijūyā'ja', circuncidāyni na'wë yā'ji'cue neeyū'. Nava peecy cacuetewe'shna circuncidaī'ty tyāamée, i'cue'sh ewmée yūuna fi'nzenijū Cristo nwe'wenisa circuncidāyni yaase'. Cristo' tyā'wërráac yu'. ¹²Tyā'wë yūunijū' i'cue'sha' yu'te ya'bautisāyrra' Cristo yacj ja'nda pendani na'wësa i'cue yuu, sa' Cristo yacj ja'nda qui' ityi yuusáa na'wë i'cue yuu, tyā'wë Cristo uuteva Dyusa' qui' ityi vitcu sūjwa'ja's ji'pjuil'cue naa pa'ga. ¹³Nava nyafii yu' i'cue'sha' pcalpa'ga Dyus dyi'pte uunfi na'wëi'cue ũsu', pcaluj tyundenimée. Tyā'wëteva āchja' Dyusa' pcaltyi jyuca peltunāypa'ga i'cue'sha' Cristo na'wëy ityi yuusáa na'wë i'cue yuu. ¹⁴Cue'sha' Dyus jycaajni's nwëese'pja'gamée yuuwesane'tca'w yu'. Nava Cristo cluuste uupa'ga Dyusa' jyuca peltunāycu. ¹⁵Sa' tyā'wërráa yuumée, echtjēlj tyāa yacj ũssa yā'jrra jyuca cnayrra Cristorrarrá's bagachteva nwëese'jwa'ja's vitrrac nvijt Dyusa'.

Naa quiwetewe'sha's nwēese'jmée cielutewe'sha'srráa mpaacuewe

¹⁶ Tyā'wē Cristo nwe'wenisa yā'ja' āchja' quim yujva leya's nwēese'jwa'ja's jycaajwa'j ji'pjmeeta', i'cue'sh ū'ni's we'wena meerra' qui'swa'j en tyā'wēsaty. ¹⁷ Tyā'wē yūunisa' naasáa teech pa'jwa'jsa ūsu'c tyā'sna jypa'gawa'ja's caapiya'jsarráaty yu'. Atsa' ew jiyute yu', tyāa pa'jwa'jsa' Cristoc yu'. ¹⁸ I'cue'sha' īshiisawe'shtyi mpa'yajcywe. Tyā'wēme', tyāawe'sha' wala ewsatja'w jīna angeleswe'shtyi neewe'wena, quījva uysameerrava tyā'wē ewsarrá's ī'cjsatja'w jīna iiweych we'wena i'cue'shtyi caypumba'jatyna. ¹⁹ Tyāawe'sha' Cristo yacj fi'nzesameeta'. Cristo yacj fi'nzevats yu', wala yuj ewna, tyāa pa'gatey Cristo quijteva jyuca cchjāachja'jna tyajy nasa yuutyi' jype'jsa', Dyus jycaajni's cytey yuuna.

²⁰ I'cue'sha' naa quiwete pitstjē'jwe'sh we'weni's nwēese'jya'mée, Cristo yacj ja'nda uusáa na'wē yuusáa i'cue. Sa' ¿quījja'rará pitstjē'jwe'sh we'weni's nwēese'jwa'jsamée yā'jrra', tyāawe'sh tyā'jīna jycaajnityi' nwēese'jna ūsuqui'cue? ²¹ Tyāawe'sha' na'wēty jycaaja': Tyā'sa' jya'ndynu, tyā'sa' ū'nu, tyā'sa' jypa'ganu jīna quījquījva wala jycaaja'ty. ²² Tyā'wē jycaajnis'a' naa quiwete pitstjē'jwe'sh caapiya'jnisarráata', jyuca scjēwwa'jsa. ²³ Tyāaty jypa'yacymeete', ewsa na'wē yuj tjenguna, tyāa pa'gatey iiweych yajcymée peecy cacue's ew caafi'nze'jwa'ja'scu jycaaja'. Nava naa quiwete ewmée yajcyna fi'nzeni's yu' neeweya' āja'tsme'.

3 ¹ I'cue'sha' Cristo yacj ja'nda ītyi yuusáa na'wē yuusáa yā'jrra', cielute iiméj zhichcuesa bagachteva wēt fi'nzewa'ja'srráa mpaacuewe, Dyus pucate Cristo ūsnitewe'shna. ² Naa quiwetewe'sha's yajcymée, cielutewe'shrrá's myajcywe, ³ tyāa pa'gatey i'cue'sha' Cristo yacj ja'nda uusáa na'wē yuupa'ga, Cristo yacj fi'nzetsi'cue Dyus tashte. ⁴ Sa' i'cue'shtyi ītyi caafi'nze'jsa Cristo vyaate', i'cue'shva tyāa ma'wēsate' tyā'wēysa yuurra tyāa yacj ij ūsya' u'juene'cue.

Ewmeesaty' nvijtrra ew yūuna fi'nzenity jypa'gani

⁵ Tyāa pa'ga i'cue'sh ūus yaacyni ewmeesa naata' tyāaty' jyuca manvijtwe: ptamumey pcalte fi'nzeni, ptamsarrava vitesa yacj pcal yūuna fi'nzeni, quījva ewmée yūuwa'jrrá's yaacyni, Dyus yu's yajcymée jweeíírráa ji'pju wēena fi'nzeni, (tyā'wē ji'pju wēenirrá's yajcyte', tyā'srráanac Dyus na'wē yaacywa'j caseje'.) ⁶ Tyā'wē ewmée yūupa'ga íírráa Dyus castigo seena'sa yuja' Dyusa's nwēese'jsameewe'shtyi. ⁷ I'cue'shva tyā'wē yūuna fi'nzesai'cue yu'. ⁸ Nava āchja' na'wēsaty jyuca manvijtwe: pyūuscue yaacyni, ūuschani, vitety ewmée nuywe'weni, wēeshuni, canzh we'weni tyā'wēsaty. ⁹ Tyāa pa'gatey jyuca nvijt yā'ji'cue na' puuty ya'īshiina fi'nzemée, ¹⁰ ewrráa yūuna fi'nzewa'ja's jypa'garra ūsi'cue. Tyā'wē yūurra' i'cue'sha' jweeíírráa ya'yu'ptjejna u'juene'cue,

Dyusa's ew jiyuna pa'jrra tyāa na'wēy yuuna pa'jya'. ¹¹Atsa' tyā'wē ya'yu'ptjejnisa' maava jyuca cyteerraj teechrrāa yuuna pa'jsata'. Judiuwe'sh ma'ty yuu, judiuwe'shmée ma'ty yuu, circuncidāynisawe'sh ma'ty yuu, circuncidāynimeesawe'sh ma'ty yuu, wala jiisa ma'ty yuu, jiimeesa ma'ty yuu, patron ji'pjsa ma'ty yuu, patron ji'pjmeesa ma'ty yuu nava maava jyuca cyteerraj teechrrāa yuuna pa'jsata'. Tyāa pa'gatey Cristo's jypa'ganirrāa tyā'wē', Cristo jyucaysawe'sh ji'.

¹²I'cue'sha' Dyus peeygājrra tyjitynisai'cue, tyāa pa'ga i'cue'sh ūuste na'wēsaty jypa'garra mfi'nzewe: vitety peeygāawa'ja's, pu'chna fi'nzewa'ja's, iweych yajcymée maa yacjva jyuca ewrrāa fi'nzewa'ja's, puuty ūuscha yajcymée fi'nzewa'ja's. ¹³Macue ewmée nuywe'weteva puuty ya'peltunāyna mfi'nzewe. Cristova ma'wēga i'cue'shtyi peltunāy tyā'wēy myūuwe i'cue'sh pwe'sh. ¹⁴Sa' peeygājna fi'nzewa'j yuurā's quijteva tjaacue wala mji'pjuwe. Tyāa maateva tjaacue peejysa'. ¹⁵Tyā'wē yūunijū' Dyusa' ūsuna jyucaysa cyteerraj ūuste wēt wechana fi'nzewa'ja's. Tyā'wē jyucaysaty cyteerraj teechrrāa vit-ya'fírrāac Dyusa' i'cue'shtyi tyjityj, tyāa pa'ga mweechawe. ¹⁶Āchja' Cristo caapiya'jni's i'cue'sh ūuste jyuca mpiyawe. Tyā'wē yūurra puuty caapiya'jna, wala jypa'yacy puuty yu'cypejna, Dyusa's ūuste wechana memna mfi'nzewe. ¹⁷I'cue'sha' quij yūuna ūsrrava, Cristo Jesusa's tuutje'jwa'ja's yuurāa myajcywe, Dyusa's yuurāa wechana.

Yattewe'sh maa yacjva jyuca ya'nwēese'jna fi'nzeni

¹⁸Nyuuwe'sha' i'cue'sh nmi'ty nwēese'jwa'j ji'pji'cue. Cristo's jiiyā'jrra', zhichcue fi'nzewa'ja'. ¹⁹Atsa' nmi'we'shva peecy nyuu yacj puiina yajtsemée peeygājna mfi'nzewe. ²⁰Tyā'wēy luuchwe'shva i'cue'sh neywe'shtyi quijteva jyuca mwēese'jwe. Tyā'wē yūuni's Dyusa' wecha'c. ²¹Neywe'sha' peecy luuchtyi zhichcue yu'cypejna miipe'jwe pcyuumée, i'cue'sh yacj cuchcajmen. ²²Selpisaawe'sha' naa quiwete i'cue'sh patronwe'sh jycaajnyity wa'lmée mwēese'jwe quijteva jyuca. Patronwe'sh tjengna ūste āajurrāa nwēese'jmée, ūusuj jyuca wa'lmée mwēese'jwe, Dyusa' jiina sūjna. ²³Quij mjiitsrrava wa'lmée Cristo's selpiitstju sūjnarrāa cytey myuuwe, nasaty selpiitstju sūjmée. ²⁴Tyā'wē yajcyna selpiipa'ga, Cristo' i'cue'shtyi' cielute deweena, tyāa pa'gatey Cristo jii sūjrrane'cue mjii naa pa'ga. ²⁵Nava maava wa' yajcyna mjiisa' achamée ewsarrā's jypa'gatyna, tyāa pa'gatey Dyusa' jyuca jiia' ma'wē yūuna fi'nzesateva.

4 ¹Patronwe'sha' i'cue'shtyi selpisaaty ewrrāa jype'jna meswe. Tyā'wēme', i'cue'shva selpisāa fírrāa i'cue, i'cue'shtyi jycaajsa' Cristo cielute ūsa'.

²Āchja' wala jypa'yacy Dyus yacj yuurāa puuty we'wena meswe, pechcanamée Dyusa's wechana. ³Sa' cue'sh pa'gateva tyā'wēy Dyus yacj puuty we'wena meswe, Dyus yuwe pta'shwa'j en vyaacajn, cyaj

Cristo's ma'wẽ ùuste jypa'gawa'ja'sva jiyunimeesa's pta'shi'nja. Tyā'wẽ pta'shpa'gafírráa andya' preesu ùstju. ⁴Nava Dyus pu'chte', shiingmée ew ãate caajiyu'ju'nja.

⁵Dyusna jiimeesawe'sh yacj wala jypa'yacy ewrráa mfi'nzewe, ewmée we'wecajmen. Sa' Dyus yuwe pta'shwa'j ena's iviitnuwe. ⁶I'cue'sha' zhichcue ewrráa jypa'yacy mwe'wewe. Tyā'wẽ yūurra', ma'wěsa yacjva tjěymée pasya' ājane'cue.

Yuwe wechaa caajnity fi'jni

⁷Cue'sh yacjtjě'j Tíquico Cristo's selpiic andy yacj ja'nda quĩjteva pu'vitumée pu'chna tyā' i'cue'shtyi pta'shina andy fi'nzeni's. ⁸Tyā'wẽ pta'shna i'cue'shtyi cchjāachja'cjan cajastju. ⁹Tyāa yacj teech pi'cyna yuja', Cristo's jypa'gasa cue'sh yacjtjě'j Onésimo. Tyā' i'cue'sh chjambteywe'sha'. Tyāawe'sh pa'jrra jyuca pta'shityna aysū quĩjrraj yūutsteva.

¹⁰Carcelte andyna pi'cyna ùssa Aristarcova yuwe wecha caja'c, vite' Bernabé pucacjě nyacj Marcosva. I'cue'sha' jiiyā'ji'cue Marcos ma'wēsateva, tyāa pa'ga wa'lmée mpa'gawe. ¹¹Jesus Justo jĩ'ty tyāava yuwe wechaa caja'c. Judiuwe'sh Cristo's jypa'gasa andya's pu'chsa yu' tyāawe'sh yuurráaty yu', Dyus jycaajwa'ja's pta'shsa. Tyāa pa'ga andy yacj' wala wecha yuja'. ¹²Cristo's selpisáa Epafrasva yuwe wechaa caja'c. Tyā' i'cue'sh yacj ùssac yu'. Tyā' i'cue'sh pa'gate bagachteva Dyusa's neewe'wena nescu yu', quĩjteva jypumbamée Dyus jytjāasnirrá's cytey yuuna fi'nzecajn. ¹³Andya' jiitj Epafrasa' i'cue'shtyi yajcyna wala pa'pchu'c, Dyusa's neewe'wena. Sa' Laodicea chjambtewe'sh vite' Hierapolis chjambtewe'shtyiva tyā'wěycu Dyusna neewe'we'. ¹⁴Médico Lucas vite' Demas tyāawe'shva yuwe wechaa caja'ty.

¹⁵Yuwe mweechawe yacjtjě'jwe'sh Laodiceatewe'shtyi vite' Ninfasna, sa' tyajy yatte pcjaacjesawe'shtyiva tyā'wěy. ¹⁶Naa carta's i'cue'sh pwe'sh lēeyna jyā'jrra', mcaajwe Laodicea chjambte pcjaacjesawe'sh lēeycajn, sa' Laodicea chjambtewe'shtyi carta caatj tyāa carta i'cue'sh tashte pa'tje', tyā'snava mlēeywe. ¹⁷Arquiposa's na'jīna myu'cypejwe: Cristo mjīia's cytey myuu jīna.

¹⁸Andy cuseju yuu naa carta's fi'jrra cajastju i'cue'shtyi wechana. Nava andya's pechcanamée yajcyna mfi'nzewe, preesu ùstju naa pa'ga. I'cue'shtyi' Dyusa' pu'chjina.

SAN PABLO CARTA NYAFYTE FI'JNI TESALONICA CHJAMBTEWE'SH JÏI

Tesalónica chjambte Dyus yacj fi'nzesawe'shtyi Pablowe'sh fi'jni

1 ¹ Pablo yaasesa naa carta's fi'jatstju Silvano vite' Timoteo tyāawe'sh yacj, yacjtjē'jwe'sh Tesalónica chjambte pcjaacjena üssawe'shtyi wechana. I'cue'sha' Dyus cue'sh Tata vite' cue'shtyi jype'jsa Jesucristo tyāawe'sh yacj tyutemée wala ew fi'nzena üsi'cue. I'cue'shtyi' Dyusa' pu'chjina vite' cue'shtyi jype'jsa Jesucristo, tyāa pa'ga Dyus yacjrráa mfi'nzewe.

Tesalonicatewe'sh Dyus yacj fi'nzewa'ja's caavya'ja'jni

² I'cue'sh jyucaysa tyā'wē ew fi'nzepa'ga Dyusa'stja'w wechana puuty we'we' i'cue'shtyi pechcanamée neewe'wena. ³ Tyā'wē i'cue'sh pa'gate Dyus cue'sh Tata yacj puuty we'wetsrra', na'wē i'cue'sha' Dyus yuurráana yajcyna i'cue tyajy jycaajni's mjī', sa' tyā'wēy wala peeygājna selpí i'cue cue'shtyi jype'jsa Jesucristorrá's üytjasna tyāa yacj tyutemée. Tyāatytja'w bagachteva pechcanamée Dyus dyi'pte neewe'we'. ⁴ Cue'sha' jii'tja'w Dyusa' yacjtjē'jwe'shtyi peeygājrra tyjityjcu nwe'weya'. ⁵ Atsa' cue'sha' Dyus yuwe nwe'wewa'ja's pta'shitsrra' yuwejurráa we'wemeetja'w, wejyva pta'shwa'ja's Dyus Espiritu pu'chte', tyā' ishiinimeena sūjnatja'w pta'sh. I'cue'sha' peecy jii i'cue ma'wē pta'shrra', cue'shíi yuuva tyā'wēytja'w yūuna fi'nze i'cue'sh yacj üsrra'. ⁶ I'cue'sha' cue'sh fi'nzeni vite' Jesucristo fi'nzenity tjengrra tyāa na'wēyi'cue fi'nze macue wala atsetsteva, Dyus yuwe's Dyus Espiritu üste' wala wechana jypa'garra. ⁷ I'cue'sh tyā'wē yūupa'gaty vite quiwe Macedonia Acayasuwe'sh Dyus luuch jyucaysa cue'shva tyā'wēy fi'nzega sūjwa'ja's ji'pju. ⁸ I'cue'sh tyā'wē yūuni yacj i'cue Jesucristo caapiya'jni's Macedonia Acaya

quiwesurráamée, msuu msuuva jyuca caajiyu'lj, tyāa pa'gac i'cue'sha' Dyusa's yaacysateva ya'jiyu', atsa' āchja' cue'sha' i'cue'sh ew fi'nzeni's tuutje'jwa'lj ji'pjmeeyā'tja'w. ⁹I'cue'sh ew fi'nzeni's cue'sh pta'shipcachte, wejyva tyāawe'sh cjuē'tytyi pta'shi' ma'wēne'cue cue'shtyi ew jypa'ga tyā'sna, sa' ma'wēne'cue Dyus ityimeesaty nvijtrra Dyus ityisa's selpiiya' yaaqui'. ¹⁰Sa' āchja' ma'wē ūytjasna ūscue Jesus Dyus Nchi'c uunijūva ityi yuurra cieluju qui' shawendwa'ja's tyā'snaty pta'shi'. Tyāa Jesusa' Dyus castigo seena'ju nwe'wewa'jsa'.

Tesalonicate Pablo mjiina ūsni

2 ¹Yacjtjē'jwe'sh, i'cue'shíiva jii i'cue cue'sh i'cue'sh tashte pa'jni' cyul yuume'. ²Nyafii yu' tyacue wala wēeshuna pcyuunitja'w yuu Filipos chjambte tyā'sa' jii i'cue. Nava Dyusa' pu'chcu tyajy yuwe ewte nviitwa'jsa's atsesa cshavyte ūucjmée pta'shcajn. ³Tyāa pa'gatey cue'sha' jypumbarra pta'shna ūsu'tsmeetja'w, sa' ewmée yajcyrra išiina ūsu'tsmeetja'w. ⁴Tyā'wēmeete'fic Dyusa' tyajy yuwe ewte nviitwa'jsa's cue'shtyi neewe'werra nvijt, cyajtja'w tyā'wē pta'sh. Naa quiwete nasaty wechaa jytjāasrra tyā'wē yu'tsmeetja'w, wejyva Dyus cue'sh ūustyti jiisa wechacajntja'w tyā'wē yū'. ⁵I'cue'sha' jii i'cue cue'sha' bagachte yujva tyā'wē nasaty yu'cywe'wena ūsu'tsmeetja'w, sa' vyyu cnayya' sūjrrava tyā'wē ūsu'tsmeetja'w. Dyusa' jiia'. ⁶Bagachte yujva nasa tyā'wē cue'shtyi ew we'wena tuutje'lj jytjāasnava u'ju'tsmeetja'w. I'cue'shtyi vitesaty maa yujtyva tyā'wē jytjāasmeetja'w. Sa' tyā'wē i'cue'shtyi juuna' we'werra quijrráava tjāas wēevatsa', ājawa'jne'tca'w yu', Jesucristo jycaajnisatja'w yu' naa pa'ga. ⁷Tyā'wē yūupcachte, i'cue'shtyi ewcuerráatja'w we'we, luuch nji'jva ma'wēga ewcuē jype'jna nuywalá' tyā'wē. ⁸I'cue'sha' iiméj wala wendynisai'cue tyāa pa'ga Dyus yuwerrá's ūsmée, cue'sh ityi fi'nzeni yuunava iviituvatsa' sūjtja'w i'cue'sh pa'gate, i'cue'sh ew fi'nzeni's jytjāasrra. ⁹Yacjtjē'jwe'sh, yaaqui'ne'cue, cue'sha' Dyus yuwe's pta'shna u'jurra' ma'wētca'w chjāchja mji' cue'sh peejini's uyya', en ma'c yuu meerra' cus ma'c yuu nava mji'tja'w vitesaty tjāasya'mée.

¹⁰I'cue'sha' jii i'cue, atsa' Dyusva jiia', cue'sh tyā'wē ew zhichcue i'cue'sh yacj fi'nzeni's, atsa' quim yujva cue'shtyi ewmée nuywe'weya' ājameetyna. ¹¹Jii i'cue cue'sha' ma'wētca'w i'cue'shtyi teeche na'wērraj cviisha'jn cchjāachja'jna yuu, neyva ma'wēga luuchtyi jype'je' tyā'wētja'w yuu. ¹²Cue'sha' wala ew yu'cypejna neewe'wetja'w Dyus dyi'pte ma'wē fi'nzerra tyajy jycaajna ūsnite u'caya' ājawa'ja's.

¹³Dyus yuwe's cue'sh pta'shte', nasaa pta'shnirráamée, Dyus pta'shni yujna sūjnai'cue jypa'ga, tyāa pa'gatja'w cue'sha' Dyusa's wechá' bagachteva. Isa tyā' Dyus yuwe yuja', tyāasa'ic i'cue'sh ūustyti yu'ptjeje'. ¹⁴Yacjtjē'jwe'sh, i'cue'sha' Judea quiwete Dyus luuch Cristo Jesus yacj fi'nzesa ūsta' tyāawe'sh na'wēyi'cue yuu. Tyāawe'shtyi' peecy nwe'shíirráa wala ajtsety tyā'wēy

i'cue'shva wala yaatseni fi'nzei'cue i'cue'sh nwe'shírráa. ¹⁵Tyāa judiuwe'sha' cue'shtyi jype'jsa Jesusa's icjtyi nyafiiva ma'wēne'ta icj Dyus yuwe pta'shsaty tyā'wēy. Tyāasaty cue'shtyiva chjambu cutyi'jna ūsu'. Tyāawe'sha' Dyus dyl'pte ew yūuna ūsmeeta', sa' nasa jyucaysaty atse'ty. ¹⁶Judiu jil'mée vite nasava ewte neeyūucajn Dyus yuwe's pta'sh wēje'tsteva, ūsu'tsmeeta' cue'shtyi. Tyā'wē yūurra tyāawe'sh pcaltyi jweefírráa nuywalana ūsta', nava āchja' Dyus castigo seena'sa yuja' tyā'wē yūupa'ga.

Tesalonicatewe'shtyi Pablo manz usva puuty uyya' u'jya' yaacyni

¹⁷Yacjtjē'jwe'sh tashu cue'sha' tyuteerra', yafy yacj yu' puuty uymeerrava ūuste yu' pechcanameetja'w i'cue'shtyi yajcyna fi'nze', ħma'wēn qui' puuty uyya' u'juecytja'w? sūjna. ¹⁸I'cue'sh tashna yujya' yajcytja'w, sa' andya' manz usva tyā'wē yuu wēetj. Nava echtjē'ja' cue'shtyi yupcu. ¹⁹Tyā'wēteva cue'shtyi jype'jsa Jesucristo quíi ente' i'cue'sh tyā'wē cue'shtyi wētwtē ħcaaūusutje'jwa'jsa meema'cue? ²⁰Isa i'cue'sh yuj tyā'wē wētwtē caaūusutje'jwa'jsai'cue.

3 ¹Tyā'wē i'cue'shtyi puuty uy wēerra wantaímeerra, yacjtjē'j Timoteorrá'sva caatj i'cue'shtyi tjengya', andy yu' Atenaste neeyūurra. ²Tyā' Dyusna selpisáa, cue'sh yacj mjíisa' Cristo yuwe ewsa's pta'shna, sa' űuste fi'nzesaty cchjāachja'jna cviisha'jwa'jsac yu', ³tyā'wē quim yujva naa űussa's űucjna cuj yaacycajmén. Tyā'wēme', i'cue'sha' peecy jii i'cue' naa tjēyte űuste fi'nzewa'ja's jypa'gawa'jsatja'w. ⁴Tyājítja'w cytee i'cue'sh yacj nee űsfi pta'sh tjēyte űuste fi'nzewa'j en pa'jana jīna tyā' cytey yuuc tyā'sa' jypa'gai'cue. ⁵Tyāa pa'gatj andya' i'cue'sh pytjaa űusni's peeygāaweete wantaímeerra pējyya' caaj Jesucristo yacj ma'wē fi'nzetsteva jiyuya', tyā'wēme' echtjē'ja' pejca ewmeete cweete'jevāana atsa' cue'sh mjíini' cyul yuuna sūjrra.

⁶Atsa' Timoteo' shawendna pa'cj, sa' Dyus yacj jypumbamée peeygājna ūsta' jīnac yuwe ewsa jyūna pa'j. Tyā'wērráamée, cue'shtyiva yaaquít'y wala wendyna ħbagach puuty uyuucytja'w? jīna, cue'shva ma'wētcaw tyāawe'shtyi puuty uy wēje' tyā'wēytyi yaaqui' jīnac pta'shi'. ⁷Tyāa pa'gatja'w tyacue wala űuste tjēyte fi'nzena űsrrava wala wechá', yacjtjē'jwe'sh, i'cue'sh tyā'wē Jesucristo yacj tyutemée chjāchja fi'nzeni's jiyurra. ⁸I'cue'sha' Jesucristo yacj tyutemée fi'nzeni's jiyute', cue'sh yacja' űuste iiméj wala wētwtē űusutjec. ⁹Atsa' ħma'wē yūurra Dyusa's iiméj wala wechaya' ājacytja'w? i'cue'sh pa'gate tyacue wala wētwtē-sa's űuste jypa'garra'. ¹⁰En ma'c yuu cus ma'c yuu nava Dyusa's pējyna nestja'w yu', i'cue'sh yacj puuty uyya' yuuwa'ja's űste', i'cue'sh nee pejiine'cue Dyusna jiyuwa'ja's tyā'sna caapiya'ja'nja'w sūjrra.

¹¹Dyus cue'sh Tata vite' cue'shtyi jype'jsa Jesucristo tyāawe'sha' pejca pu'chjityna sūju'tja'w cue'sh yujya' ājawa'ja's. ¹²I'cue'shtyi' Jesucristo' jweefírráa wala cchjāachja'jana, sa' maatyva jyucaysaty

puuty ya'peeygāawa'ja's ūsuna cue'shva ma'wēta'w i'cue'shtyi peeygāja' tyā'wēy. ¹³I'cue'sh ūste jypumbamée fi'nzewa'ja's ūsuna, cyaj cue'shtyi jype'jsa Jesucristo tyajy nwe'wenisa yacj shawendna quĩjte', i'cue'sha' Dyus dyi'pte yuuwemeesa yuune'cue.

Na'wē fi'nzenirrá'scu Dyusa' jytjáasu'

4 ¹Āchja' yacjtjē'jwe'shtyi wala yu'cypejna neewe'wetstja'w Jesucristo jycaajni's: na'wē Dyus dyi'pte ew fi'nzewa'ja's ma'wēta'w caapiya'j tyā'sa' nviitmée, jweeírráa ew fi'nzena

²Jesus jycaatje' cue'sha' caapiya'tja'w tyā'sa' i'cue'sha' jii i'cue. ³Dyusa' quĩj pcal yujva ji'pjmée'c fi'nze jytjáasu', ptamumée pcal yūuna fi'nzenijū jyuca tyuteerra. ⁴Teechsa na'wērraj peecy nyuuty pcalsu caafi'nze'jmée ew zhichcue miipe'jwe. ⁵Dyusna jiimeesa na'wē canzh ewmée yajcyna yu' fi'nzenuwe. ⁶Quim yujva vatee nyuuty pcal yuwa'j ji'pjmeeta' nmi'a's pesweena. Tyā'wēme', Dyusa' seena' yuj wala castigaína ma'wēta'w pta'shi' tyā'sa' cytey yuuna. ⁷Tyāa pa'gatey Dyusa' pa'yac nava tyajy dyi'pte quĩj pcal yujva ji'pjmée fi'nzecajncu tyā'wē yūu. ⁸Tyā'wē maava na'wē ew caapiya'jni's nwēese'jsame' caapiya'jsa's nwēese'jsamée yu'tsme'; Dyus tyajy Espiritu's ūssa'scu nwēese'jsamée yu'.

⁹Yacjtjē'j pwe'sh puuty ya'peeygāawa'ja's pta'shna fi'jwa'j ji'pjmeetj, tyāa pa'gatey Dyusa' caapiya'jyā'cj teeche na'wērraj puuty ya'peeygāawa'ja's. ¹⁰Tyāa pa'gai'cue Macedoniate ūssa yacjtjē'jwe'sh jyucaysaty peeygājna fi'nze'. Nava yacjtjē'jwe'shtyi neewe'we'tja'w, i'cue'sh peeygāani' jweeírráa ūste penacajn. ¹¹Cuch ñus yajcymée wētrráa mfi'nzewe i'cue'sh mjiisurráa pa'pchuna, ma'wēta'w neewe'we tyā'wē yūuna, ¹²cyaj Dyusa's jiimeesava atsewe'wemeetyna, atsa' i'cue'shtyiva quĩjva peejiimeena.

Jesucristo' qui' shawendna quĩjana

¹³Yacjtjē'jwe'shtyi caajiyu'jmée yu' nviit wēemeetja'w uusaawe'sh ma'wē yuwa'jsateva, cyaj i'cue'shva Dyusna jiimeesa na'wē ñusmeene'cue. ¹⁴Jesusa' uurrava qui' ĩtyi yuuni's jii'tja'w, tyā'wēyrráa Jesusna jypa'garra uusaaty' Dyusa' qui' ĩtyi vitrra Jesus yacj nuyquĩjana sūju'tja'w.

¹⁵Cyajtja'w i'cue'shtyi pta'shi' Cristo caapiya'jni's, tyā'wē Cristo quĩi ente' cue'sh nee ĩtyi ūssa' uusaawe'sh yatste pe'jna u'jni yuume'nja'w. ¹⁶Tyāa pa'gatey Cristoírráa cieluju quĩiwa'jsa' seena' jycaajwa'ja's we'wena, Dyus angeleswe'sh npiitstjē'jwa we'wena, naapcachja' Dyus tucani zhichcuesava susuna. Naapcachja' Cristona jypa'garra uusaawe'sh cju'e'y ĩtyi yuutyna. ¹⁷Tyājū' nee ĩtyi ūssa' tyāawe'sh yacj ja'ndarra'j pe'jna u'jni yu'nja'w tāapj pyājte ciolute Cristo's puuty uyya'. Tyājū' Cristo yacj nes yu'nja'w bagachteva. ¹⁸Cyaj na'wē pta'shni's jiyurra', puuty cviisha'jna mfi'nzewe ñusmée.

5 ¹Nava bagach quíi ente quíiwa'tjeva tyāa yu'sa' pta'shna fi'jwa'l' peejyme' yacjtjē'jwe'shtyi. ²I'cue'sha' ew jii i'cue Cristo' quīj enteva quījrrāa yūuna yajcymée ūsiyna, pesweeva ma'wēga cus pyāj yaacynimeete pa'ja' tyā'wēy. ³Nasa we'werra': Quījva yuumeena, jyuca ewrrāa ūstja'w jina ūsiyna, tyāa dundte Dyus castigāywa'l' ena' pa'jana, u'y nasate ātsa'atste ma'wē acasa pa'jacy tyā'wēy, atsa' íyuya' ājameetyna. ⁴Nava Cristo quíiwa'ja's jiimée chji'ndyte yu' ūsmeei'cue, tyāa pa'ga i'cue'sh jypa'yacymée ūsiyna Cristo' cpajcymeena peswée na'wē. ⁵Tyāa pa'gatey i'cue'sh jyucaysa jiisa eena'tewe'shi'cue, cue'sha' jiimeesa chji'ndyte fi'nzesa na'wēsameetja'w. ⁶Tyāa pa'ga vite nasa deesa na'wē fi'nzewa'jsameetja'w, wejyva ma'wē fi'nzewa'ja'sva jypa'yacy ūsuga. ⁷Cusrāa deenisa' atsa' tūusa' custewe'shrrac tū'. ⁸Nava cue'sha' eena'tewe'shtja'w na' jypa'yacy fi'nzega, tyāa pa'gatey Dyusa's ūuste pechcanamée yaacywa'ja's jypa'garra peeygāawa'ja'sva ji'ptja'w, sa' ewte neeyūuwa'ja's ūuste ew jiitja'w naa pa'ga. ⁹Dyusa' cue'shtyi' castigāyya' sūjrra nvijtme', wejyva Jesucristo nwe'wete ewte neeyūuwa'ja's ji'pjucajncu tyā'wē nvijt. ¹⁰Tyāa pa'gac Jesucristo' cue'sh pa'gate paa ya'ducjrra uu, atsa' āchja' ítyi mtja'w yuu meerra' uuníi mtja'w yuu nava bagachte yujva tyāa yacj tyuteme'nja'w. ¹¹Tyāa pa'ga ñusmée mfi'nzewe. Puuty teeche na'wērraj cchjāachja'l'na na'wē yūuna ūsi'cue tyā'wērrāa meswe.

Dyus yacj fi'nzesaty Pablo yu'cypejni

¹²Yacjtjē'jwe'shtyi neewe'wetstja'w i'cue'shtyi yu'cypejna: Dyus yacj fi'nzewa'ja's pu'chsaty' ew miipe'l'jwe. ¹³Tyā'wē pu'chna ūspa'ga tyāawe'shtyi' wala wechana mpeeygājwe. Tyā'wēy vitesa yacjva puuty ewrrāa mfi'nzewe.

¹⁴Na'wē yūuwa'ja'sva neewe'wetstja'w yacjtjē'jwe'shtyi: Mjīiya' wa'lsaty myu'cypejwe. Dyusna achamée chjāchja yaacysaty' mecchjāachja'l'jwe. Dyusna ew jiimeesatyva mpu'chwe. Jyucaysaty peeygāawa'ja's mji'pjuwe.

¹⁵Mpa'yajcywe puuty ewmeerrāa yūuna fi'nzemée, wejyva i'cue'sha' puuty teeche na'wērraj ew myūuwe naa quiwete jyucaysa yacj.

¹⁶Bagachteva wechana wērrāa mfi'nzewe. ¹⁷Een isa Dyus yacj puuty we'wena mfi'nzewe. ¹⁸Quīj ñus en pa'tjeva, Dyusa'srrāa wechana meswe, tyāa pa'gatey Dyusa' tyā'wēc fi'nze jytjāasu' i'cue'sh Cristo Jesusa's jypa'gasaty.

¹⁹Dyus Espiritu's iiviitunuwe. ²⁰Dyus caaūusutje'jni's pta'shni's weechnuwe. ²¹Wala jypa'yacy pacuena atyajrra ewsarrā's mpa'gawe.

²²Quījva ewmeesajū yu' jyuca mtyuteewe.

²³Dyus ewte caafi'nze'l'ja quīj pcal yujva ji'pjmée vitna pa'jana i'cue'sh cacue ma'c yuu, i'cue'sh ūus ma'c yuu, i'cue'sh yaacyni ma'c yuu nava

jyuca, cyaj Jesucristo quĩi ente yuuwemeesa yuune'cue. 24 I'cue'shtyi pa'yasa' ãshiiwa'jsame' na' tyã' cytey yuuna.

Pablo yuwe wechaa caajni

25 I'cue'sha' Dyus yacj meen puuty we'wewe cue'sh pa'gate.

26 Yacjtjẽ'jwe'sh jyucaysaty meen wechawe Dyusrráana yajcyna.

27 Jesucristo jycaatje', tyã'wẽ i'cue'shtyi neewe'wetstju naa carta's lëeycajn jyucaysa yacjtjẽ'jwe'sh cshavyte.

28 Cue'shtyi jype'jsa Jesucristo' i'cue'shtyi pu'chjina.

SAN PABLO CARTA E'SU FI'JNI TESALONICA CHJAMBTEWE'SH JÏI

Tesalónica chjambte Dyus yacj fi'nzesawe'shtyi Pablowe'sh fi'jni

1 ¹ Pablo yaasesa naa carta's fi'jatstju Silvano vite' Timoteo tyāawe'sh yacj, yacjtjē'jwe'sh Tesalónica chjambte pcjaacjena üssawe'shtyi wechana. I'cue'sha' Dyus cue'sh Tata vite' cue'shtyi jype'jsa Jesucristo tyāawe'sh yacj tyutemée wala ew fi'nzena üsi'cue. ² I'cue'shtyi' Dyusa' pu'chjina vite' cue'shtyi jype'jsa Jesucristo, tyāa pa'ga Dyus yacjrráa mfi'nzewe.

Cristo' shawendna quíjrra Dyusna nwēese'jsameewe'shtyi castigaína

³ Yacjtjē'jwe'sh, i'cue'sh pa'gate pejca Dyusa's wechawa'j ji'pj yujtja'w, tyā'wē yūuni' cyulsame' naa pa'ga. Tyāa pa'gatey i'cue'sh üusuj Dyusa's yaacynisa' een isa jwee írráa walaana u'juetsa', naapcachja' teechna na'wērraj puuty ya'peeygājna fi'nzewa'jva jwee írráa pejnana u'juetsa'.

⁴ Tyāa pa'gatja'w cue'sha' msuuva Dyus luuch pcjaacjena üsnisu wēt wechana pta'shi' i'cue'sh ew fi'nzeni's. Tyā'wē yuucajnī i'cue'sha' tyacue wala pcyuuni yajtsena üsrrava, Dyus yacj jypumbamée fi'nzewa'j yu'sa' wa'lmeei'cue áate caavya'ja'ja'. ⁵ Dyusa' iiméj wala ewsa' na' tyāasa ne' tyā'wē ew fi'nzewa'ja's i'cue'shtyi caavya'ja'ja', tyāa pa'ga i'cue'sha' pcyuuni yajtsena üsrrava tyajy jycaajna üsnite pa'jwa'jsai'cue.

⁶ Nava i'cue'shtyi pcyuusáa yuutyi' ca'tuva Dyus castigāyni yuj yuutyna, ⁷ sa' i'cue'sh ñuste fi'nzesa yuutyi' jycaasewa'ja's üsuna cue'sh yā'jrra, tyā'wē Jesucristo' tyajy angeleswe'sh yā'jrra cielujū quíjrra, ⁸ Dyusna nwēese'jmeerra cue'shtyi jype'jsa Jesucristo's pta'shni'sva nwēese'jsameety castigāyya' seena' ipy wala yacj quíjrra tyā'wē cue'shtyi jycaasewa'ja's üsuna. ⁹ Tyāawe'shtyi' Dyus jycaajna üsni tashu tyujinderra

bagachte yujva peena yu' Dyus yacj puuty uywa'ljmeete ñuste castigãyni yuutyna. ¹⁰Naapcachja' na'wẽ cue'sh pta'shni's i'cue'sh jyucaysa jypa'gai'cue tyãa yã'jrra vite' Dyus luuch jyucaysa yacj wala wechana Jesucristo's jypa'gasa yuune'cue tyajy shawendna quii ente'.

¹¹Tyãa sũjratja'w i'cue'sh pa'gate Dyus yacj puuty we'wena nes yu', Dyusa' i'cue'shtyi pa'yayã'jrra' tyajy cusete jype'jna nes yuucajn. Sa' tyã'wẽy Dyus yacj puuty we'we'tja'w, Dyusa' i'cue'shtyi peeygãawa'ja's pu'vitumée cytey yuurra tyãa yacj jypumbamée fi'nzewa'ja'sva jyuca pu'chcajn, ¹²cyaj cue'shtyi jype'jsa Jesucristo's tuutje'jsa yuune'cue, naapcachja' i'cue'sha' Jesucristo tuutje'jni yuune'cue naasáa cue'sh Dyus vite' Jesucristo peeygãapa'ga yuurráa.

Teech pitstjẽ'j iiméj seena' canzh pcalsa vyaana

2 ¹Nava ãchja' cue'shtyi jype'jsa Jesucristo cue'shtyi pcjacjya' quiiwa'ja's pta'shitstju, yacjtjẽ'jwe'shtyi wala neewe'wena. ²I'cue'sha' tjẽymée yu'ptjejna ùsnuwe, isa yujváana sũjna ùcjna, tyã'wẽ Jesucristo quiiwa'j ena' ãjyã'cj jini's, meerrava Dyuscu vyaarra tyã'jicaja' jiváatyna, meerra' Pabloc tyã'wẽ pta'shcaja' jiváatyna, nmejte' cartava cue'sh fi'jni na'wẽysarrava ïshiinisa pa'javáana. ³Nava wej yujva jypumbanuwe ïshiini's. Tyã'wẽ jypumbacajmén Cristo quiiwa'j en ãjmeyna nyafyte' Dyusa's uy wẽemée ajtserra tyãa yacj puiiwa'j en cjuẽ'y u'puna, naapcachja' teech pitstjẽ'j echtjẽ'j na'wẽy iiméj seena' canzh pcalsa infiernote acjni yuuwa'jsava vyaana. ⁴Tyã' quijnava jyuca atsesa yuuna Dyus yase's cysuusni yu'sa', sa' dyuus yatte u'carra cachjiina, andya' Dyustju jina jycaajya'.

⁵Andya' cytee i'cue'sh yacj nee ùsiy pta'shtju tyã'wẽ Dyusa's atsesa pa'jwa'ja's, atsa' ¿yaaqui'tsmeecue'? ⁶Tyã'wẽ yũuwa'j en ãjmeyna, tyãa ewmeesa casejwe'shte quij tyã'wẽ yupna ùsteva tyã'sa' jii i'cue i'cue'sha'. ⁷Tyãa ewmeesa' paatste mjiina yã'j ùsa', atsa' naasáa tyãa ewmeesa's yupna neewesa's cutyi'jwa'jrráa yã'j peeja'. ⁸Tyãjũ isa tyãa ewmeesa' ãate vyaana, nava Jesucristo' tyajy we'wenijurráa naa dundte icjena, sa' peena yu' caavya'ja'ljmeena eena' cweetjna quini yacj. ⁹Tyãa canzh ewmeesa' echtjẽ'j caajni tyã'wẽ pa'jana, tyãasa quim yujva ãjanimeesa's caavya'ja'jana ïshiina caypumba'jna. ¹⁰Sa' Dyus yuwe isasa's pta'shni's jypa'gasameetyi' tjẽymée caypumba'jana ewmeesarrá's caavya'ja'jrra. ¹¹⁻¹²Tyã'wẽ Dyus yuwe isasa's pta'shteva jypa'gamée ïshiina pta'shnirrá's nwẽese'pja'ga, Dyusa' tyãawe'shtyi' jypumbacajn nviituna vituwa'jsa yuucajn.

Ewte neeyũuwa'jsaty Dyus tyjityjnisa

¹³Nava cue'sha' bagachteva Dyusa's wechawa'j ji'ptja'w i'cue'sh ew fi'nzepa'ga. I'cue'sha' Jesucristo peeygãanisai'cue, tyãa pa'gatey Dyusa'

nyafiitey tyjityjcu i'cue'sh ewte neeyũuwa'lsaty, atsa' Dyus Espiritu' pcal ji'pjmeesac vitna pa'j yuwe ewsa's jypa'gapa'ga. ¹⁴Tyã'wẽ yuuya'c Dyusa' pa'ya yuwe ewsa cue'sh pta'shpa'ga, cyaj cue'shtyi jype'jsa Jesucristo ũsnite pa'jya' ājacajn.

¹⁵Tyãa pa'ga, yacjtjẽ'jwe'sh, wej yujva jypumbamée meswe, na'wẽ i'cue'sh yacj ũsrra caapiya'tja'w sa' cartateva fi'jna pta'shtja'w tyāaty pechcanamée. ¹⁶Cue'shtyi jype'jsa Jesucristo vite' Dyus cue'sh Tata peeygājrra bagachte yujva ptsuwa'jmée wechana ũswa'ja's ũscu ¹⁷tyãa i'cue'sh ũusty i' cchjāachja'jana, atsa' quĩjva ewrrāa yũuna fi'nzene'cue, we'wewa'j ma'c yuu nava ewsarrā's puuty we'wena.

Dyus yacj mpuutywe'wewe cue'shtyi neewe'wena

3 ¹Nmeje', yacjtjẽ'jwe'shtyi na'wẽtj neewe'we': I'cue'shva ma'wẽcue Jesucristo pta'shni's wechana jypa'ga tyã'wẽy msuuwe'shva jypa'gacajn Dyus yacj mpuutywe'wewe cue'sh pa'gate, ²cyaj nasa ewmeesa cuseju iyu'nja'w. Tyã'wẽme' jyucaysa yu' Dyusa's yaacysameeta'. ³Tyã'wẽteva Jesucristo' bagachte yujva i'cue'shtyi' nvijtmée ewmeejũ nwe'wena cchjāachja'jana. ⁴Cue'sh pta'shni's na'wẽ yũuna ũsi'cue tyã'wẽrrāa nes yuucajn Jesucristo' pu'chjina sũju'tja'w. ⁵Sa' Dyus peeygāani's pechcanamée yaacycajn, Jesucristo' caayaqui'jna nes yuuna tyãa na'wẽy chjāchja fi'nzecajn.

Mjĩiwa'j ji'pja'

⁶Yacjtjẽ'jwe'shtyi Jesucristo jycaajni's neewe'wetstja'w: maa yacjtjẽ'jva mjĩimeena sa' cue'sh caapiya'jni'sva cytey yuumeena atsa' tyã'wẽsa yacja' pcjaacjenuwe. ⁷I'cue'sha' jii i'cue cue'sha' ma'wẽ yũuna fi'nzesateva. Cue'sha' i'cue'sh yacj ũsrra', mjĩimée yu' fi'nzemeetja'w. ⁸Sa' ũ'a's ducjmée yu' fi'nzemeetja'w, wejyva en ma'c yuu cus ma'c yuu nava wala chjāchja mjĩitja'w i'cue'sh maa yujtyva tjāasya'mée. ⁹Tyã'wẽ yũu wēemeevatsa', cue'sha' i'cue'shtyi pu'ch tjāasya' ājawa'lsatja'w yu'. Nava tyã'wẽ pu'ch tjāasmée mjĩitja'w, i'cue'shva cue'sh na'wẽy yũuna fi'nzecajn. ¹⁰Tyã'wẽ yũucajmenfi cue'sha' cytee ũsrra' na'wẽ yũuwa'ja'stja'w nvijt: Mjĩiya' wa'lsa', ũ'wa'jme' jĩna. ¹¹I'cue'sh yacj ũssa maafi yu' quĩj yujva mjĩimée ewmeerrāa fi'nzena yuwe csuusu'jna fi'nzewa'ja'srrāaty yaaqui' jĩnaty pta'shi'. ¹²Jesucristo jycaajni'stja'w juuna' we'wena jycaaja' tyã'wẽ yũusatyi', cyaj tyāawe'sha' chjāchja mjĩirra peecy ũ'wa'ja's uyuutyna.

¹³Yacjtjẽ'jwe'sh, i'cue'sha' ew yũuwa'j yu'sa' wa'lnuwe. ¹⁴Meerra' maafi yu' cytey yuumeevāatyna na'jĩna fi'jatstja'w tyã'sna atsa' maa tyã'wẽ yũusateva ew jiyurra, tyãa yacj pcjaacjenuwe, cyaj tjaameetyna. ¹⁵Nava puiisáa na'wẽ yu' yuunuwe, wejyva zhichcue myu'cypejwe, ma'wẽrrava yacjtjẽ'ja' naa pa'ga.

Dyus yacjrráa fi'nzewa'ja's neewe'weni

¹⁶Cue'shtyi jype'jsa Jesucristo' i'cue'sh wēt fi'nzewa'ja's ũsuna bagachteva, ewrráa caafi'nze'jna. Dyus yacjrráa mfi'nzewe.

¹⁷Pablotj tyã'wē wechana fi'ja' andy cuseju. Andy cartatyi' tyã'wērrarráatj andy yase's qui'pna fi'ja', tyãasatj na'snava tyã'wēy fi'ja'.

¹⁸Cue'shtyi jype'jsa Jesucristo' pu'chjina i'cue'sh jyucaysaty.

SAN PABLO CARTA NYAFYTE FI'JNI TIMOTEO JII

Pablo Timoteo's fi'jni

1 ¹ Andya' Jesucristo jycaajnisá Pablo yaasetj, tyāasa cue'shtyi nwe'wesa Dyus vite' cue'shtyi jype'jsa Jesucristo tyāawe'sh caajnisatj, Jesucristo yuurráa nwe'wewa'ja's pta'shsa. ² Dyus yacj jypumbamée fi'nzesa isa andy nchi'c na'wesa Timoteo's fi'jatstju naa carta's. Dyus cue'sh Tata vite' cue'shtyi jype'jsa Cristo Jesus tyāawe'sh peeygājrra pu'chte', indya' ewrráa wēt fi'nzene'nga.

Caapiya'jni ewmeesa's jypa'yacycajn neewe'weni

³ Macedonia quiwen ul'juetsrra', indya's Efeso chjambtee nvijttju Dyus yuwemée tyāawe'sh ūus yajcyrra fiy caapiya'jsaty yupcajn. ⁴ Tyā'wēme', tyāawe'sha' Dyus librate yu' fi'jnimeeteva nyafiitey yatsgawe'sha' tyā'wēty yūu jīna yajcyrraty cuentu'ju', atsa' tyā'wēsaty wēse'cjamén indya' we'wewa'jsang neeyūu. Atsa' tyā'wēsarrá's cuentu'jni' Dyus neewe'werra nvijtcu tyāate yu' le'chcuerráa yujva selpi'tsme'.

⁵ Tyāa pa'gatj na'wē yūuwa'jrrá's jycaaja': puuty ya'peeygāawa'ja's isa īshiimée ūusuj jyuca yajcyna Dyus yacj yuurráa fi'nzewa'ja'stju neewe'we'. ⁶ Maafi yu' tyā'wē peeygāawa'ju tyuteerra cuentu selpiwa'jmeesurráaty puuty we'wena fi'nze'. ⁷ Tyāawe'sha' Dyus libru's jiyuwa'ja's caapiya'jsaty yuu wēje', nava tyāawe'shírráa yujva jiyu'tsmeeta' peecy caapiya'jni's tyacue wala chjāchja we'wetsrrava.

⁸ Jiitja'w Dyus jycaajni leya' ew yuja', ma'wē jycaatje' cytey yuusáa yacj yu'. ⁹ Ew yūuna fi'nzesaty' Dyus jycaajni leya' tjengwal' ji'pjme'. Dyus jycaajni leya' na'wēsarráaty tjengwal' ji'pja': Dyusna atsesa, Dyusna nwēese'jsamée, ewmeesa, pcalsawe'sh, Dyusna ūucjsamée, Dyus yuwe'sva weechsa, neywe'shtyi icjsa meerrava nasa ma'wēsatyva icjsa, ¹⁰ ptamumey pcal yūuna fi'nzesa meerrava pitstjē'j pwe'sh tyā'wē yūsáa,

nasaty sũtjrra icjsa, ïshiisa, Dyus uyte isatj we'we' jĩna ïshiisa. Sa' Dyus yuwemeesurráa tyā'wē puuty we'wena fi'nzeni yu'sa' Dyus leya' yup yuju'c. ¹¹Atsa' andy caapiya'ja'tj tyā' ïshiinisame', tyāasafí Cristo yuwe ewte nviitwa'jsa's Dyusí andyna neewe'werra nvijtcu tyāafírrá'.

Dyus peeygājrra tyacue ew yūupa'ga wechani

¹²Cue'shtyi jype'jsa Jesucristo's wecha'tj, andya's tyjityrra na'wē selpiwa'jsac nvijt tyajy tashite selpiwa'jsane'tca yu' naa pa'ga. ¹³Andya' nyafíi yu' ajtserra wēeshuuna pcyuuya' pacuesaatj yu'. Nava Dyusa' andya's peeygājrra jypa'gac, jiimeerrane'tca tyā'wē yūuna ūsu' naa pa'ga. ¹⁴Tyāasa cue'shtyi jype'jsa pu'chni' andy yacja' iiméj walasa yu'c vite' Cristo Jesus yacj utyaapa'ga tyajy peeygāanisava tyā'wēycu walasa yu'.

¹⁵Cristo Jesus naa quiwete quíjc pcalsaty nwe'weya' jĩna pta'shni' ïshiinisame', atsa' tyā'wē pta'shni's nasa jyucaysa isa yujna sũjwa'j ji'pja'. Nava maateva jytaacue pcalsa' andytju yu'. ¹⁶Macue tyā'wēteva, Dyusa' andya's peeygājrc, andy tyacue ewmeesateva Jesucristo' tyā'wēsa's cjuē'ycu wejy peeygājna jypa'ga sũjcajncu tyā'wē yūu. Atsa' maava andy na'wēy ewmeesa ūsrrava cue'shva ptsumée ïtyi fi'nzewa'ja's pejca jypa'gayuju'nja'w sũjcajncu tyā'wē yūu. ¹⁷Tyāa pa'ga bagachteva wechana nes yuuwa'j ji'ptja'w jycaajsa ptsuwa'jsame's. Tyā' cue'sh yafyte vyaasame', nava bagachte yujva ptsuwa'jsavame'. Dyus tyāa yuurráa quíjte yujva shiingwa'jsame'.

¹⁸Andy nchi'c na'wēsa Timoteo indya's neewe'wetstju, iindy ūuste ma'wē ew fi'nzewa'ja's ūusutjena tyā'srráa cytey yuuna, ew yūuwa'jrrá's pa'pchuna Dyusa' pu'chjina sũjna fi'nzecajn. Indy tyā'wē ew fi'nzecajnírráaty yacjtjē'jwe'shva dyiicjēy pta'sh Dyus yacj jypumbamée selpiwa'jsa' jĩna atsa' tyā'sa' cytey myuu. ¹⁹Maaíi yu' quíj tyā'wē ewsateva jiirra, qui' quíj ewmeesateva jiirrava nwēese'jmeerra, Dyus yacj fi'nzenijū jypumbaty. ²⁰Tyā'wē yūusa' Himeneo, Alejandro tyāawe'shta'. Atsa' andya' tyāawe'shtyi' echtjē'j cusete nvijttju, cyaj Dyusa's atsewe'weya'mée piyaatyna.

Dyus yacj ma'wē puuty we'wewa'ja'sva caapiya'jni

2 ¹Nyafyte' Dyus yacj puuty we'wewa'ja's cjuē'ytju neewe'we'. I'cue'sha' nasa jyucaysa pa'gate Dyusa's wechana mneewe'wewe tyāa yacj puuty we'wena, sa' quíj pējyrrava pēywa'ja'. ²Tyā'wēy naa quiwete jycaajna ūssawe'sh jyucaysa pa'gateva Dyus yacj puuty we'wewa'ja', cyaj Dyus pu'chte' tyāawe'sh ew jycaatje', wēt fi'nzeya' āja'nja'w quíjva cuch yuunimée Dyus yacj yuurráa. ³Cue'shtyi nwe'wesa Dyusa' tyā'wē yūuni'scu jyjtāasu'. ⁴Tyāa pa'gatey Dyusa' quim yujtyva vitu jyjtāasu'tsme', jyucaysa ewsa's jiyurra ewte neeyūuni'scu jyjtāasu'. ⁵Tyā'wēme', ewte nviitwa'jsa' teech Dyus yuurráa ūsa', atsa' tyā'wēy

Dyus dyi'pte nasaa ju'ngu yuurra we'we pu'chsava teech íírráa ũsa', tyā' Jesucristo' cue'sh cacue's íírráa ji'pjsa. ⁶Tyāa Jesucristoc jyucaysa ewte neeyũuwa'ja's vitna pcalsa pa'gate uu tyā'wē yũuwa'j en ājte!. ⁷Atsa' tyā'wē yũuni's pta'shwa'jsa tyjityrra nviitnisatj, Jesucristo jycaajnisaa. Tyāasa andya' íshiinimeesa isasa's caapiya'jwa'jsatj, judiu ji'jmée vite nasava Dyus yacj jypumbamée fi'nzecajn. Tyā'wē caajnisatj jírra' íshijja'tsmeetj tyā'sa' Cristo' jiia'.

⁸Tyāasatj neewe'we': Nasa msuuwe'shva Dyus yacj puuty we'wewa'j ji'pja' puiina fi'nzemée Dyus yuurráana ũusuj jyuca yajcyna. ⁹Tyā'wēy u'ywe'shva ropa iijyũni's jypa'yacywa'ja' nasa we'wecajmen. Sa' dycjasa's quindutsrra' tyacue wala vyuu bej qui'pna ew pjeu'jmeeteva ewna. ¹⁰Atjnisava jwee pa'gasa iijyũmeerrava, Dyus yacj ew fi'nzenírráa wejy ewsa', tyāa yacjrráa fi'nzesayā'ja'. ¹¹U'ywe'sha' wala jypa'yacy wēse'jna u'pwa'jsata' caapiya'jni's. ¹²Nasaa cshavyte u'y we'wewa'ja's ũsme'nja, sa' pitstjē'ja's jycaajwa'ja'sva ũsme'nja, wejyva shuuna'rráa u'pwa'jsa'. ¹³Tyā'wē pitstjē'ja's jycaacjamení, Dyusa' Adana's cjuē'ycu pjeu'j, e'suc Eva's pjeu'j. ¹⁴Atsa' Adan ya'íshiini yuume', u'ycu ya'íshii. Tyā'wē ya'íshiirrac pcalte wete. ¹⁵Nava u'ya' peecy luuchtyi ew jype'jna Dyus yacjva jypumbamée ew fi'nzerra', ewte neeyũuna.

Ma'wēsa anciano yũuwa'ja'sva pta'shni

3 ¹Isatj we'we': Maava dyuus yatte jycaajwa'ja's jypa'gasa anciano' mjii ewsa's jypa'gasa yuuna. ²Nava cytee jycaajwa'ja's jypa'gasa' quíjte yujva jypumbamée wala ew fi'nzesa yuuwa'ja', ājmée yũute yu'cypejni fi'nzewa'jsame'. Sa' peecy nyuu yacjrráa fi'nzesa yuuwa'ja'; quíjteva jyuca jypa'yacy fi'nzesa yuuwa'ja', sa' zhichcue juuna' yuumeé fi'nzesa yuuwa'ja'; paandeesaty yat pqui'jna fi'nzesa yuuwa'ja', sa' ewsa's ma'wē caapiya'jwa'ja'sva jyuca jiisa yuuwa'ja'. ³Tũuna fi'nzesa yuuwa'jme' puii jypacuena, vyu cnaywa'jrrá's yajcyna fi'nzesa yuuwa'jme', wejyva vyu's yajcymée peeygājna pu'chna ewrráa yũuna fi'nzesa yuuwa'ja'. ⁴Peecy yattewe'shtyi ew zhichcue jype'jsa yuuwa'ja', sa' peecy luuchva nwēese'jna ew fi'nzecajn caapiya'jsa yuuwa'ja'. ⁵Tyā'wē peecy yattewe'sh yujtyva ew jype'jya' ājameerra', ¿ma'wē Dyus luuch yuutyi' jype'jya' ājacy? ⁶Dyuus yatte jycaajsa' Cristo's u'se jypa'gasa yuuwa'jme'. Tyā'wēme', wala iiweych yajcyrra ewmeete weteena echtjē'j weteniitey. ⁷Nasa Dyusa's jiimeesa cshavysuva wala ew fi'nzesa yuuwa'ja', tyā'wē echtjē'j cusete weteya'mée, nasa ewmée we'wewe'shte.

Ma'wēsa diácono yũuwa'ja'sva pta'shni

⁸Tyā'wēy dyuus yatte pcjaacjesaty tjeng pu'chsa diaconova Dyus dyi'pte wala ew fi'nzesa yuuwa'ja'. Quíj yũuya' puuty we'werrava íshiimée cytey yuusáa yuuwa'ja'. Tũumée fi'nzesa yuuwa'ja', vyuu cnaywa'jrrá's wejy

pa'pchuna fi'nzesa yuuwa'jme'. ⁹Dyus yacj fi'nzewa'ja's ew jiisa yuuna sa' ũusteva jypumbamée ũstju sũjwa'ja's ji'pjusa yuuwa'ja'. ¹⁰Ma'wēsateva jiyuya' nyafyte manz en nvijtrra, quĩjteva ewrráa fi'nzeni's uyrra tyā'wē dyuus yatte pcjaacjesaty tjeng pu'chwa'jsa nviitwa'ja'. ¹¹Tyā'wēy u'yva dyuus yatte selpiina fi'nzesa' Dyus dyi'pte wala ew fi'nzesa yuuwa'ja', vitesaty nuywe'wemée, quĩjteva jyuca jypa'yacy ewrráa fi'nzesa yuuwa'ja'. ¹²Dyuus yatte pcjaacjesaty tjeng pu'chsa diacono' peecy nyuu yacjrráa fi'nzesa yuuwa'ja', sa' peecy yattewe'shtyi ew jype'jsa yuuwa'ja'. ¹³Tyā'wē diaconowe'sha' tyāawe'sh mji's ew mjĩirra', tujtjety fi'nze', sa' Cristo Jesus yacj fi'nzewa'ja's tjaamemée pta'shwa'ja's uyu'ty.

Cue'sh ewte neeyũuwa'ja's quim yujnava caajiyu'jnimeec ũsu'

¹⁴Indy yacj puuty uyya' dund yuwe'nja sũju'tj, nava meerra' jytjēyuuwá'nja sũjrra naa carta's fi'jatstju, ¹⁵cyaj Dyus yacj fi'nzesa yacj ew fi'nzeya' ma'wē yũuwa'ja'sva jiyune'nga. Tyāawe'sha' Dyus ityisa luuchta', tyāasaty isa ewsa's nvijtmée tyāate yuurráa fi'nze'. ¹⁶Cue'sh ewte neeyũuwa'ja's quim yujva jiyunimeec ũsu' tyā'sa' Dyusa' caavya'ja'cj tyā' na'wē seena' walasa':

Dyusa' nasaa cacue yacjcu vyaa,
Sa' Dyus Espiritu we'werra': Tyā' quĩj pcal yujva ji'pjmeesa' jīnic yuu.
Atsa' Dyus angeleswe'shva uyniisac yuu.
Sa' mtee mteeva jyuca pta'shni yuute',
Naa quiwete msuuwe'shva maafí yu' tyāawe'sh ũuste jypa'gaty.
Tyajũ' cielute qui' jypa'ganic yuu.

Dyus tashuj tyuteerra ewmeesarrá's caapiya'jsa

4 ¹Tyā'wē ew āate caavya'ja'jni yuuteva, maafí yu' nmej en yuutste' Dyus tashu tyuteetyna echtjē'j īshiina caapiya'jnite fi'nzeya'. Tyā'jīnac Dyus Espiritu' āate pta'shi'. ²Tyāa nasa īshiina caapiya'jsa' yuwejurráa ew we'werra', ũuste yu' ech jycaajnirrás' nwēese'jna ewsa yu's nwēese'jsame' ³na'wē jycaajatyna: Cambawa'jme' sa' ũ'tasha's Dyus nvijtcu Dyus nwe'wenisa ewsarrás' nwēese'jsawe'sh Dyusa's wechana ũ'cajn tyāa ũ'a's tyjityrrarráa ũ'wa'ja' jītya. ⁴Tyā'wē yuucajmení Dyus nviitnisa yu' quĩj ũ'va jyuca ewsa', atsa' ewmeesa' jīmée ũ'wa'ja', ⁵tyāa pa'gatey Dyus yuwete we'werra': Ũ'a' jyuca ewsa' jī'c atsa' ũ'a's jypa'garra' Dyusa's wecharra ũ'te', ewmeesa yu'tsme'.

Jesucristo's wala ew selpisáa

⁶Tyā'wē Dyus yacj fi'nzewa'ja's ũuste yu'acjrra isasarrás' caapiya'jni's ew piyarra yacjtjē'jwe'shtyi caypumba'jmée jype'jrra', Jesucristo's wala ew selpisaarra tyā'wē yuune'nga. ⁷Dyus yacj fi'nzewa'jmeerrás' we'weni seelpimeesaty' nwēese'jmée, Dyus yacj fi'nzewa'jrrás' chjāchja

mpa'pchu. ⁸Tyã'wēme' cacue chjächjawa'jrrá's pa'pchute', jwee yu' selpi'tsme'. Nava Dyus yacj fi'nzewa'ja's chjächja pa'pchunisac wejy jytjaacue selpi'. Tyã'wēsa' naa quiwete ew fi'nzewa'tjec selpi', sa' cieluteva selpiwa'jsafírrá'. ⁹Na'wē pta'shni' íshiinisame', atsa' jyucaysa nwēese'jwa'j ji'pja'. ¹⁰Tyãa pa'gafírráatja'w pytjaa ya'iiwēeshuunava chjächja mji', tyãa pa'gatey Dyus ityisa úsa' tyã' pu'ch yujuna súju'tja'w, tyã' naa quiwete nasa jyucaysaty nwe'wesa' tyã'sna úuste jypa'gasa yuutyi' jyuca.

¹¹Tyã'wē yúuwa'ja's ew caapiya'jwa'j ji'pjngu. ¹²Sa' pitstacya' jina weechwe'shte wala ew mfi'nze, cyaj Dyusa's jiisawe'sh iindy fi'nzeni's uyrra', tyã'wēy ew fi'nzecajn quijteva úus yajcyrra mwe'we. Sa' tyãawe'shtyi peeygájna mfi'nze, Dyus yacj jypumbamée, quijte yujva pcalte wetemée. ¹³Andy pa'pjcach indya' Dyus yuwe's nasaa cshavyte lēeyna, yu'cypejna caapiya'jna yuuwa'jrrá's pa'pchuna mes. ¹⁴Indy quijteva shiingmée ajawa'ja's Dyusa' úscu ancianowe'sh indya's peequinzerra Dyus yacj puuty we'wete tyāatyí' iviituya'mée wala mpa'yajcy. ¹⁵Tyã'wē ew fi'nzewa'ja's yuurráa pechcanamée mfi'nze, cyaj indya' Dyus yacj jweefírráa chjächjana u'jni's jyucaysa uyuutyna. ¹⁶Peequí wala mpa'yajcy sa' caapiya'jni'sva tyã'wēy mpa'yajcy quijte yujva shiingmée. Tyã'wē yúurra', indyíiva ewte neeyúune'nga, sa' iindy pta'shni's wēse'jsatyva ewte nviitune'nga.

Dyus yacj fi'nzesaty na'wē yúuna fi'nzewa'ja'

5 ¹Indya' tjé'jsatyi's juuna' we'wena yu'cypejmée, wejyva peeygájna ewrráa myu'cypej, iindy tata na'wē yajcyna. Sa' pitstacytyiva iindy nyacjwe'sh na'wē yajcyna myu'cypej. ²U'y tjé'jsatyva iindy mama na'wē yajcyna ewcuérráa myu'cypej. Sa' cna'sawe'shtyiva iindy npe'sh na'wē yajcyna myu'cypej wala jypa'yacy fi'nzena.

³Nmi' uute u'yrráa neeyúusaawe'sh quijva ji'pjmée pejiina ússatyí' mpu'ch. ⁴Nava tyãawe'sha' nchi'c meerra' ntsun ji'pjuvátyna atsa' tyãa ntsun meerrava nchi'c tyã'wē njí'ja's jype'jwa'j ji'pja', neywe'sh ma'wēne'ta peeygájna jype'j tyã'wēy yúuwa'j ji'pja'. Tyã'wēc Dyusa' jytjáasu'. ⁵Nava nmi' uute' luuch ji'pjmée tyáarráa neeyúusa', Dyus yuurráanaty een isa neewe'wena fi'nze', Dyusa' pu'chjina sújna. ⁶Nava vite' tyã'wē yúumée nmi' uuyá'tje' naa quiwetewe'shrrá's yajcyna fi'nzesa' uuníi na'wēsaya'tja'. ⁷Áchja' nasa ecajuwe'sh ewmée nuywe'wecajmén, na'wē yúuwa'ja'sva mcaapiya'j u'yrráa neeyúusáa jil'jty: ⁸Tyã'wē peecy nwe'shtyi jype'jwa'j ji'pja', sa' peecy yattewe'sh yuutyi' wejy tjaacue tjengwa'j ji'pja', naa cyaj cytey yuumeerra' Dyus luuchtju sújwa'j ji'pjme' sa' Dyusa's jiimeesate jytjaacuec yuuwesa yuuna.

⁹Nmi' uute' u'yrráa neeyúusaatyí' pu'chwa'ja', nava sesenta añu ji'pjsa teech nmi' yacjrráa fi'nzesaty tyã'wē pu'chwa'ja'. ¹⁰Tyãawe'sha' bagachteva ew fi'nzesa yuutyna na'wē yúuna: luuch ji'pjsarra' tyāaty

ew jype'jsa yuutyna, yatte pa'jsaty jypa'gasa yuutyna, yacjtjê'jwe'shtyi peeygâjna pu'chsa yuutyna, ñuste pytjaa yuusaty pu'chsa yuutyna, quijteva jyuca ewrráa yūuna fi'nzesarráaty pu'chwa'ja'.

¹¹Nava sesenta aña ajmée ji'pjsaty' jypa'gawa'jme'. Tyā'wēme', qui' imi'wa'jrrá's yaacynite Cristo tashu tyuteetyna, ¹²atsa' tyā'wē yūurra' yuuwesa yuutyna, tyā'wē Cristo yacj fi'nzeya' puuty we'weni's e'scjē nviitpa'ga. ¹³Sa' tyā'wēsa' yat iisa pa'jna u'jya' piyaatyna, mjīiwa'j yu'sa' yaacysamée yuuna. Sa' tyā'wērrámée, tyā'wē tyāawe'sh we'wewa'jmeesu jyuca we'we pu'chya' piyarra', yuwee csuusuj'sa yuutyna. ¹⁴Tyāa pa'ga nee cna'satey tyāawe'sh nmi' uute', tyāawe'sha' qui' iimi'rra luuch uyrra yatte fi'nzetya, tyā'wē Dyus yacj fi'nzesaty atsesa nuywe'wecajméntju tyā'wē jycaaja'. ¹⁵Tyā'wē yūumeerra maafi yu' Dyusa's pechcanarra echtjê'j yacj fi'nzena ūsta'.

¹⁶Dyusna jiisa' nchi'c ma'c yuu meerra' niisa ma'c yuu nava maava i'cue'sh nwe'sh tyā'wē u'yrráa neeyūusa's sâ'jina jype'jwa'j ji'pjī'cue, cyaj dyuus yatte pcjaacjesawe'sha' tyacue tjēysa's uymeetyna tyāa u'ytyi pu'chna, naasáa quij nwe'sh yujva ji'pjmeesarrá's pu'chwa'jsata'.

¹⁷Dyus yuwe's pta'shna caapiya'jna nasaty ew jype'jsa' wala ew pu'chni fi'nzewa'j ji'pjta'. ¹⁸Tyāa pa'gatey Dyus libru' na'wēc pta'shi': Mjīisa buey yuwe's tundnu iūū' mjīicajn jī'c, sa' vite ajcjēva we'werra': Mjīisa' jypa'gawa'j ji'pja' jī'c.

¹⁹Dyus yuwe's pta'shsaty yuuwesa' jīna nuywe'weni's e'nz meerrava tecj ew jiisa casejmey yu' nwēese'jnu. ²⁰Nava isa pcalte dyij fi'nzena ūste jiyurra', juuna' mwe'we jyucaysa cshavyte, cyaj vite wēse'jna ūssa' ūucjrra pcalte fi'nzemeetyna. ²¹Dyus vite' cue'shtyi jype'jsa Jesucristo vite' Dyus angel tyjitynisa tyāawe'sh dyi'pte tyā'wē yūuwa'ja's cajatstju, ajmée yūusaty' jyucaytyi tyāa na'wērrarráa we'wena yu'cypejcajn. ²²Jiyumey yu' quim yujnava dyuus yatte jycaajwa'jsa qui'pnu. Tyā'wē jiyumey jycaajwa'jsa qui'prra', tyajy pcala's sūtj pu'chsa yuune'nga. Quijva ewmeesa yu's jyuca mpa'yajcy.

²³Nava tutyj wala ātsa'ng tyāa pa'ga yuurráa yu'rrá's yu' tundymée, uva yu' pusmeesa yu's le'chcucue mtundy.

²⁴Maafi yu' tyāawe'sh pcala' wala āate ya'jiyu'ty paapējymeeteva. Nava vite' ya'jiyu'tsmeeta', tyā'wēsa' nmej ente yā'jrráa ya'jiyuna. ²⁵Tyā'wētyi ew yūuna fi'nzenisava āate ya'jiyu', sa' ew yūuna fi'nzenisa dund yu' āate ya'jiyumeerrava, bagachteva vyaamée yu' neeyūumeetyna.

Dyus yacj fi'nzenisa' naa quiwete ji'pjunita tjaacue walasa'

6 ¹Selpiisá' i'cue'sh patron yacj wala jypa'yacy nwēese'jna mfi'nzewe, Dyusa's atsewe'weni yuucajmén vite' cue'sh caapiya'jni'sva tyā'wēy ewmée we'wecajmén. ²Sa' selpisaawe'sh i'cue'sh patron maafia' Dyusa's jiisa váa yuuna atsa' tyā'wē cue'sh yacjtjê'j íírrá' sūjrrarráa le'chcucue

nwēese'jmée fi'nzewa'j ji'pjmeeta', wejyva jwee'fírráa ew selpiwa'j ji'pjta', tyāa pa'gatey Dyusna jiisaty'fírráa wejy ew pu'chna selpiwa'ja' peeygājna. Tyā'wē yūuwa'ja's pta'shna mcaapiya'j.

³Maafi yu' cue'shtyi jype'jsa Jesucristo caapiya'jni'smée, fiy vaa pta'shina cue'sh caapiya'jni'svamée, ⁴sa' tyā' ūuste iiweych yaacysa quíjva jiimeesarra tyā'wē yuuna. Naasáa tyā' luucu na'wē quíjva seelpimeesurráa we'wena fi'nzesa yuuna atsa' tyā'wē yūupa'gac vitety ewmée yūuwa'j caseje': atseyaacyni, puini, wēeshuni, nasa ewsaty ewmeesata' sūjna fi'nzeni, ⁵puiiwa'j ptsuwa'jmeec caseje', tyā'wē nasa Dyusa's jiimeesawe'sh yacj. Sa' ewmée caapiya'jsawe'sha' Dyus yacj fi'nzeni jīnisa' vyyu cnaynisana sūju'ty. Tyā'wēsa yacja' pcjaacjenu. ⁶Tyā'wē Dyus yacj fi'nzenisa' naa quiwete iiméj wala ji'pjunisate jytjaacue walasa' quíjva ji'pjmeerrava wēt fi'nzesa yacj yu'. ⁷Tyāa pa'gatey cue'sha' naa quiwete quíjva ji'pjmeetja'w pa'j na' quíjva ji'pjímée caseje'nja'w. ⁸Tyā'wē quíjva ji'pjmeerrava ū'wa'j vite! atjwa'j ropa tyā'wēsaty ji'pjrrarráa wechana fi'nzewa'j ji'ptja'w. ⁹Nava tyā'wē yaacysame' maafi yu' wala ji'pju wēenirrás' yaacysa' ewmeetety wete', ewmée yūuwa'jrrás' yaacypa'ga. Sa' tyā'wē yaacynisa' nasaty ewmeete caaivitu'jsarrá'. ¹⁰Tyā'wē vyurrás' wejy tjaacue yaacypa'ga'fírráac quíjteva jyuca ewmée yūuwa'jrrarráa caseje'. Tyāa pa'ga maafi yu' vyyu ji'pju wēenirrás' yaacysa' Dyus yacj fi'nzenijū tyuteerra wala ñusterráa fi'nzena ūsta' peequí.

Dyus yuurrás' ūuste pechcanamée yaacywa'ja's mji'pju

¹¹Nava indya' Dyusna nwēese'jsang naa pa'ga tyāa ewmējū jyuca tyuteerra quíjte yujva jypumbamée Dyusrráana yajcyna vitety peeygājna tjēysa pa'tjeva tyāaty' yajcymée ūusuj jyuca manvijt ewmeesa's. ¹²Dyus yacj tyutemée fi'nzewa'ja'srráa chjāchja mpa'pchu, bagachte yujva ptsumée ūtyi fi'nzewa'ja'srráa yajcyna. Tyā'wē yuucajn'fírráac Dyusa' pa'ya, atsa' indya' jyucaysa dyi'pte Dyus yacjrráa fi'nze'nja jīnang we'we. ¹³Dyusa' na'wē ūtyi fi'nzewa'ja's peesu'c quíjquíjrraj ūsna tyāaty jyuca vite! Jesucristova Dyus Nchi'ctju jīna āate pta'shcu Poncio Pilato tashte tyā'wē yuusaawe'sh dyi'pte āchja' indya's jycaajatstju: ¹⁴Andy ma'wē jycaajni's cytey nwēese'jene'nga quíjte yujva jypumbana yu'ptjejmée cue'shtyi jype'jsa Jesucristo quíjpcach. ¹⁵Jesucristo quíiwa'j en ājte', Dyusa' Jesucristo's caavya'ja'jana, tyāa pa'gatey Dyus yuurráa quíjteva jyuca ājawa'jsa tyāa yuurrá', sa' Maa jycaajsateva jytjaacue jytujtjesa', Maateva jytjaacue chjāchjasa. ¹⁶Tyāa yuurráa uuwa'jsame', eena' cweetjnite quim yujva utyaaya' ājanimeete ūssa. Tyā'sa' maa pitstjē'j yujva iuymeetyna sa' āchpcach iuymeeta'. Tyacue seena' walasa tyāa yuurrás' tuutjel'ni yuwa'ja', bagachte yujva ptsuwa'jmeesa's.

¹⁷Naa quiwete ji'pjsaty' mwe'we, ji'pjuwa'jrrás' pa'pchuuna iiweych yajcyna fi'nzeczajmén. Tyā'wēme' ji'pjunirrás' yaacyni' wala cyulsata',

wejyva Dyusa'srráa yaaquityna, tyãa pa'gatey tyã' ãityisa', cue'sh qui'jrraj peejini'sva peejymée jyuca ùssa. ¹⁸Ew yũuwa'jrrá's mcaaj, cyaj tyãawe'sh ew yũunirrás' ji'pjsa yuutyna, sa' tyãawe'sh ji'pjuni's vitety jytyujndeya'va piyaatyna. ¹⁹Tyã'wē yũurra' cielute jypa'gawa'ja's jyaawsa yuurra, bagachte yujva ptsumée ãityi fi'nzewa'ja's jypa'gasa yuutyna.

Timoteo jypa'yajcy fi'nzewa'ja's neewe'weni

²⁰Timoteo, indyna neewe'weni's mpa'yajcy. We'weni quĩjva seelpimeesaty' wēse'jnu, sa' Dyus yuwete jytjaacue jiisatja'w jĩna weechsatyva nwēese'jnu. ²¹Tyã'wē yũumeerrái maaí yu' tyã'jĩna we'wesa yacj u'jsa' jypumbana ùsta' Dyus yacj fi'nzenijũ. Tyã'wē yũucajmén, Dyusa' indya's pu'chjina.

SAN PABLO CARTA E'SU FI'JNI TIMOTEO JÏI

Pablo' Timoteo's fi'jni

1 ¹ Andya' Jesucristo jycaajnisá Pablo yaasetj. Tyāasa Dyus caajnisatj, tyā'wē Cristo Jesusa's jypa'gate', tyā' ityi fi'nzewa'ja's ūswa'jsa' jina pta'shcajn. ² Andy nchi'c na'wēsa Timoteo indya's fi'jatstju, Dyus cue'sh Tata vite' cue'shtyi jype'jsa Jesucristo tyāawe'sh peeygājrra pu'chte', indya' ewrráa wēt fi'nzene'nga.

Jesucristo' nwe'wesa' jina pta'shwa'ja's tjaamenu

³ Cus ma'c yuu en ma'c yuu nava bagachteva Dyus yacj puuty we'we iisatj indya's yajcyna Dyusa's wechá', andy ūuste quīj pcal yujva ji'pjmée tyā'srráanatj selpi' andy yatsgawe'sh ma'wēne'ta selpi' tyā'wēy. ⁴ Indy pytjaa ū'nena neeyūuni's wala yaaqui'tj, tyāasatj indy yacj puuty uyvatsa' iiméj wala wechawa'ja's ji'pju'nja'w sūju'. ⁵ Indya' Dyusa's ūusuj jyucang yaaqui' tyā'sa' jiitj, nyafíia' iindy neepenzh Loida vite' iindy mama Eunice tyāawe'shtyi tyā'wē yaacywa'ja's ji'pju', nava āchja' tyā'wē yaacywa'ja's indyva ji'pjne'nga sūju'tj.

⁶ Tyāa pa'gatj indya's yu'cypeje' na'wē andy indya's peequinzerra Dyus yacj puuty we'wete', Dyusa' ūscu indy quījteva shiingmée fi'nzewa'ja's, atsa' tyāatyí' jweeíírráa pechcanamée pa'pchuna mfi'nze. ⁷ Dyusa' cue'sh ūucjna fi'nzewa'ja's ūsmel', wejyva ūucjmée chjāchja yajcyna peeygājna peequí ew fi'nzewa'j tyā'wēsaticu ūs. ⁸ Tyāa pa'ga tjaamena ūucjnu cue'shtyi jype'jsa Jesucristo' nwe'wesa yuja' jina pta'shwa'ja's, sa' Jesucristo's selpiipa'ga andy preesu ūstju tyāa pa'gava tjaamenu. Dyus yuwe ewte nviitwa'jsa's pta'shpa'ga űuswa'j en pa'tjeva tyā'sa' yajcymée, Dyusa' andya's cchjāachja'jana sūjnarráa mes. ⁹ Dyusa' cue'shtyi nwe'werra tyjitycu, tyajy dyi'pte quīj pcal yujva ji'pjmée fi'nzecajn. Nava tyajy dyi'pte cue'sh ew yūupa'ga tyā'wē tyjityme', naasáa tyajy jytjāasni'

tyā'wēc yu' naa pa'garráac cue'shtyi' peeygājrra tyjityj, tyā'wē Cristo Jesus yacj utyaapa'ga. Naa quiwe meetey Dyusa' cue'shtyi' peeygāj. ¹⁰Nava tyajy peeygāani' cue'shtyi' nwe'wesa Jesucristo quīnījūc isa āate vyaa. Tyajuc Jesucristo' uuwa'ja's cnayrra qui' ityi yuuwa'ja's vit, sa' āate caajiyu'cj bagachte yujva psumée ityi fi'nzewa'ja's. Tyā'wē yūuni'scu Cristo yuwe ewte nviitwa'jsa' pta'shi'.

¹¹Atsa' tyāa Cristo yuwe's pta'shcajncu andya's Dyusa' nvijt, judiu ji'jmée vite nasatyva caapiya'cjan. ¹²Tyāa pa'gatj tyacue wala tjēyte fi'nze'. Nava tjaame'tsmeetj, tyāa pa'gatey jiitj quim tyā'wē andy yacj pu'chna ūsteva, sa' ew jiitj Cristo tashte ūswa'j en ājpcach tyā' andy neewe'weni's cytey yuuna nes yuuna.

¹³Atsa' indya' andy ma'wētca ew caapiya'j tyā'wērráa mfi'nze, sa' Dyusa's ūsuj jyuca yajcyna peeygāawa'ja'sva ūste ji'pjngu Cristo Jesus yacj fi'nzepa'ga tyāatyi's pechcanamée mfi'nze. ¹⁴Indyna Dyus neewe'werra nviitni's wala ew mpa'yajcy pechcanamée, atsa' Dyus Espiritu cue'sh ūste ūssa' pu'chjina.

¹⁵Indya' jiiyā'jne'nga, Asia quiwesuwe'sh jyucaysa andya's tjengmée nvijtyi, vite' Figelo Hermógenes tyāawe'shva tyuteety. ¹⁶Tyā'wēteva Onesíforo yu' manz usva andya's cviisha'cj andy preesu ūsteva tjaamemée. Tyāa pa'ga Cristo' Onesíforowe'shtyi' nwe'wena. ¹⁷Tyāasafíc tyā' Romate ūsrra', andya's uypcach pacuena pa'j. ¹⁸Tyā'wē ew yūupa'ga Cristo tashna u'jwa'j en ājte', Dyusa' deweena. Indya' ew jiing tyā' cue'shtyi' wala pu'chsa' Efesote.

Indya' soldau ew nwēese'jsa na'wē myuu

2 ¹Andy nchi'c na'wēsa indya' Cristo Jesus pu'chni's jypa'garra Dyus yacj chjāchja mfi'nze. ²Nasa maanzcuēesa cshavyte andy ma'wēne'tca pta'sh tyāa pta'shni'sfírráa mcaapiya'j Dyus yacj ew fi'nzesaty, cyaj tyāawe'shva vitety tyā'wēyrráa caapiya'jatyna.

³Indya' Jesucristorrá's nwēese'jsa yā'jrra', űuswa'j en tjēysa pa'tjeva tyāatyi' űucjmée chjāchja myajcy. ⁴Soldauva ma'wēga vitesu yu' nwēese'jmée soldau npiitstjē'j jycaajnrá's nwēese'je' tyā'wēy myūu. ⁵Tyā'wēy cnayya' pweesa'sava ma'wē jycaatje' cytey nwēese'jna pa'pchumeerra yu', quīj yujva cnaymeena. ⁶Mjīsava nyafyte' mjīiwa'ja's cjuē'y chjāchja mjīiwa'j ji'pja' uutjash tjē'tje' ű'wa'j uyya'. ⁷Andy we'wenityi's jiyuya' űus myajcy, atsa' Jesucristo' caajiyu'juna jyuca.

⁸Āchja' Jesucristo' jycaajsa David ji'j uurrava qui' ityi yuuc tyā'sna myajcy. Andya' tyā'snatj pta'shi' ewte nviitwa'jsa' jīna. ⁹Tyā'wē Cristo yuwe ewsa's pta'shpa'ga yuurráa preesu űstju yuuwesa na'wē tundni pytjaa yuuna. Nava Dyus yuwe yu's tund-ya' ājameetyna. ¹⁰Tyā'wē Dyus yuwe's yup-ya' ājawa'jme' atsfírráatj andy űuswa'ja's űucjmée Dyus yuwe's pta'shi' Dyus tyjitynisa nwe'wewa'j űstyna tyāawe'shtyi

peeygājrra, cyaj Cristo Jesus yacj utyaapa'ga tyāawe'shva ji'pjutyna ptsuwa'jmée wechana ewte ūswa'ja's.

11 Na'wē yūuwa'ja's pta'shnisa' īshiinisame':

Cristo's ūuste jypa'garra uurra', tyāa na'wēy ītyi fi'nze'nja'w.

12 Macue űuste fi'nzewa'ja's ji'pjurrava, cielute tyāa yacj jycaajwa'j yu'sa' iviitume'nja'w.

Tyā'wē yūumée wa'luvā'nja'w atsa' tyāava cue'shtyi' jypa'gameena.

13 Meerra' cue'sha' tyāa yacj cytey yuumeevā'nja'w, nava tyā' tyajy puuty we'weni's cytey yuuna nes yuuna.

Tyāa pa'gatey Dyusa' tyajy puuty we'weni's īshiiwa'jsame'.

Quījte yujva shiingmée fi'nzewa'jrrá's pa'pchuni

14 Yacjtjē'jwe'shtyi yu'cypejni's mcaayaqui'j Dyus dyi'pte, cyaj selpiwa'jmeesu we'wenirrá's ūuscha pasna fi'nzemeetyna. Tyā'wēsa' selpi'tsme', naasāa wēse'jsaty caypumba'jsarrá'. 15 Dyus dyi'pte quījte yujva shiingmée wala ew fi'nzewa'jrrá's mpa'pchu, Dyus yuwe's jypumbamée pta'shna, mjiisava ma'wēga ew mjiirra' tjaame'tsmée tyā'wēy myūu. 16 Selpiwa'jmeesurrāa we'wena caapiya'jnity mpa'yajcy. Tyā'wēme' tyā'wē caapiya'jsa' jweefirráaty een isa jypumbana ewmeete wetena u'jue'. 17 Naapcachja' tyāawe'sh caapiya'jni yu' jweefirráa mteeva jyuca suwna u'juena. Himeneo vite' Filetowe'sha' tyā'wē yūusaty yu'. 18 Tyāasaty isa pta'shniijū yu' jypumbarra uusaawe'sh ītyi yuuwa'j ena' scjēwyā'cj jīna caypumba'jna ūsta' Dyus yacj fi'nzesaty maafityi's. 19 Nava maarraj tyāa jīiteva ew jiyucajn Dyusí na'jīna we'werrac nvijt: Dyusa' jīia' maarraj tyāa jīiteva jī'c. Sa': Jyucaysa Dyus yacj fi'nzesa' ewmeejū jyuca tyutewa'jsata' jī'c.

20 Miiyajcy: Teech yatte' iijyūnisa vyuu bej vyuu chijme tyā'wē ewsarrāa ūsmeeta'. Cyteea' achamée selpisāa fytūu, quiwe mityjva ūsta'. Nava iijyūni ewsa' ewsarrá's selpiwa'jsa', atsa' achamée ewsa' ewmeesurrāa selpiwa'jsata'. 21 Tyā'wē Dyus cusete ew selpi wēerra', ewmeejū jyuca tyuteerra bagachte yujva pcalte wetemée Dyus yacj yuurráa fi'nzewa'ja'. Tyā'wē yuurráa selpiya' ya'ājana quījteva ew yūuwa'ja's.

22 Indya' pitstacywe'sh ewmée yajcyna fi'nzenijū tyuteerra quījte yujva jypumbamée ewrrāa mfi'nze, Dyusrrāana yajcyna, maa yacjva ewrrāa fi'nzena peeygājna Dyusa's ūusuj jyuca neewe'wesawe'sh yacj utyaarra. 23 Yuwe quījteva selpiwa'jmeesaty' nweese'jnu, yuwe tyā'wēsaty' jiiyā'jng puiiwa'jrrāac caseje'. 24 Tyāa pa'gatey Dyusa's selpisá' puiisu fi'nzewa'jme', wejyva jyucaysa yacj ewrrāa yūuna fi'nzewa'ja'. Sa' ew caapiya'jsa yuuwa'ja', ewmée nuywe'wenity yajcymée. 25 Tyā'wē ūusuj jyuca peeygājna atsesaty yu'cypejwa'ja', Dyusa' tyāawe'sh ewmée yaacynity yu'ptjerrra ewsa's caajiyl'jvatsa' sūjna. 26 Cyaj echtjē'j cusete fi'nzeni's jiyurra', tyāajū iyuya' ājatyna. Tyā'wēme' echtjē'ja' ma'wēva suwya' ūsa'.

Nmej en yuutste' na'wē yūsáa nasa casejetyna

3 ¹Nmej en yuutste', en ewmeesa ũucjũucjsa pa'jana atsa' tyā'wē yūuwa'ja's jii mfi'nze. ²Nasa' peecy wēt fi'nzewa'jrrá's pa'pchurra', vite yuutyi' atsesa, vyyurrá's wejy yaacysa, iwejch we'wena fi'nzesa, Dyusa's atsewe'wesa, neywe'shtyi nwēese'jmée, ew yūuteva ca'tu yu' wechasamée, Dyusa's yujva nwēese'jya' yaacysamée, ³vitety peeygāawa'j yu'sa' ji'pjmeesa, ewmée nuywe'wesa, peecy cacueju ewmée yūu wēenirrá's tjaacue yaacysa, quijva ewsa yu'sa' jyuca ajtserra seena' pcyuusáa, ⁴áate yu' ew we'werrava e'sga yu' quicje'jna fi'nzesa, yuwe ewmée casejwa'jsurráa we'wena fi'nzesa, ew ũus yajcymey quijva yūsáa, iwejch yaacywa'jrrá's ji'pjsa, Dyusna pacuepcachte naa quiwete wēt fi'nzenirrá's pacuesáa, ⁵Dyusa's yaacysa na'wē yuj yuuna fi'nzetya, nava isa ũuste yu' Dyusa's ji'pjmée yuutyna. Nasa tyā'wēsaty mpa'yajcy. ⁶Tyā'wēme' tyāawe'sha' maafi yu' yat-su pa'jrra ishiiyatyna u'y ew fi'nzewa'j yu'sa' ji'pjmeesa pcalterráa fi'nzesaty. Tyāa u'ya' quij yūu wēeni'sva jyuca jiyu wēenite ⁷caapiya'jni's jypa'garrava, isa ewsa yu'sa' jiyuya' āja'tsmeeta', pcalterráa fi'nzepa'ga. ⁸Ma'wēta dyijyuusáa e'nzsa Janes Jambres tyāawe'shva Moisesa's ajtse, tyā'wēy tyāa pitstjē'jwe'sha' isasa yu'sa' atsetyna. Tyāa pa'gatey tyāawe'sh ũus yaacyni' jyuca suwenia', Dyus yacj fi'nzewa'j yu'sa' ji'pjmeeta' naa pa'ga. ⁹Nava tyāa pitstjē'jwe'sha' jwee yu' quijva yūuya' ājameetyna, tyāawe'sha' quijva jiimeesate jiyuyā'jrra', nasa' jyucaysa jwee yu' nwēese'jmeetyna naa pa'ga, ma'wēta e'nzsa Moisesa's atsesava quijva yūuya' ājamée tyā'wēy.

Pablo' Timoteo's nmej neewe'werra nviitni

¹⁰Nava indy yu' andy caapiya'jnity jypumbamée ũsngu. Indya' jiiing andy ew fi'nzeni, Dyusrrá's selpiia' yaacyni, Dyusa's pechcanamée yaacyni, macue tjēysa vyaateva tyāatyi' yajcymée fi'nzeni, peeygājnarráa fi'nzeni, ma'wēta maa sūjmée wantāyi' tyacue ajtserra pcyuuni yuurrava. ¹¹Indya' peecy jiiing Antioquía, Iconio, Listra chjamsu andyna pcyuuna atsenityi'. Nava Dyusa' tyāasu jyuca nwe'wec. ¹²Atsa' maava Cristo Jesusa's selpiia' utyasa' pcyuuni yuutyna. ¹³Naapcachja' ewmeesa ishiiisa' jweefirráa ewmée yūuna u'juetyna, atsa' ya'ishiisa' jweeju vitetyva ishiiina u'juetyna.

¹⁴Nava indy yu' iindy piyanijū wej yujva tyutemée mfi'nze, tyāa pa'gatey wala ew jiiing indya's quim caapiya'tjeva. ¹⁵Le'chcuējūy Dyus yuwe's jiyung tyā' Cristo Jesus yacj fi'nzerra ewte pa'jwa'ja's caajiyu'juna. ¹⁶Tyāa pa'gatey Dyus libru' jyuca Dyus caaūsutje'lnisarrarráata', tyāasa seelpisata' ewmée yūucajmen yu'cypejya', jypumbamée ewrráa caafi'nze'jya'. ¹⁷Cyaj Dyus yacj fi'nzesa' quijteva shiingmée piyarra ewrráa yūuna fi'nzetya.

4 ¹ Cue'shtyi jype'jsa Jesucristo jycaajsa yuurra yujna ñtyisaty vite' uusaaty pcjajrra quij yūsateva we'weya' tyajy dyi'pte vite' Dyus dyi'pte wala ew neewe'wetstju ² Dyus yuwe's pta'shwa'ja's. Bagachteva pta'shna nes myuu. Pta'shwa'j en yu'sa' iviitunu, caajiyu'jna, ewmée yūcajmen we'wena, yu'cypejna. Bagachteva wa'lmée mcaapiya'j. ³ Tyā'wēme', en ājana, atsa' tyājyūyā'ja' nasa' jypa'gaya' wa'lutyna Dyus yuwe ewsa's macue pta'shteve. Naasāa tyāawe'sh ūus pēyni's caapiya'jwa'jsarrāa maanzcuēeva pacueetyna. ⁴ Isa caapiya'jni yu'sa' e'scjē nvijtrra, quijva naa quiwete cuentu'jnirrá's nwēese'jetyna. ⁵ Nava indya' jypumbamée fi'nzewa'ja's mpa'yajcy, ñussa pa'tjeva chjāchja mfi'nze. Sa' Dyus yuwe's pta'shwa'tje yuurāa mfi'nze, iindy mjīia's wej yujva nviitnu. ⁶ Tyā'wēme', andya' āchja' icjwa'jrrāa yā'j ūstju, andy uu ena' utya ūsa'. ⁷ Nava andya' ewmeesa yacj puiwa'ja's andy yuj cnaytju, Dyus neewe'weni andy pta'shwa'ja's jyuca cytey yuutj, sa' Dyusa's yaacywa'ja's le'chcue yujva iviitumeetj. ⁸ Tyā'wē Dyus dyi'pte ew selpiina fi'nzepa'ga peeswa'j cielute jyaawni ūsa' tyā' andya's ūytjasna ūsa'. Tyā'sa' cue'shtyi jype'jsa cjuēs ewsa tyajy quīwa'j en ājte, andya's ūsuna. Sa' andyrrāana ūsmeena; tyajy quīwa'j ena's wechana ūytjasna ūssa yuutyi' jyucaysaty ūsuna.

Timoteo's Pablo yuu caajni

⁹ Ma'wēteva en cutyi'jrra dund myuj andya's tjengya'. ¹⁰ Tyā'wēme', Demasa' andya's tjengmée u'cj Tesalónican, tyā' naa quiwetewe'shrrá'scu wejy wendyi' tyāasac tyā'wē yūu. Crescente' Galacia quiwencu u'j, naapcachja' Tito' Dalmacia quiwencu u'j. ¹¹ Atsa' Lucas yuurāa andy yacj ūsa'. Marcosa's pacuerra pe'jrra myuj, ayte andya's mjīi pu'chcajn. ¹² Tíquico's Efeso chjambnatj caaj. ¹³ Indya' yujrra', andy atyj Troas chjambte Carpo yatte nvijttju tyā'sa' jyūrra yuweene'nga. Sa' libruty vite' fi'jni etsty yujy pechcanamée jyūne'nga. ¹⁴ Tsam tutsa Alejandro' andya's wala ewmée yūuc. Nava tyā'wē yūupa'ga tyā'sa' Dyus jiina. ¹⁵ Indya' mpa'yajcy tyāa pitstjē'ja's. Tyā'wēme', tyā' wala atsesa yuuc cue'sh pta'shni's. ¹⁶ Andya' nyafyrraj andy ma'wēsarrava cjuēswe'sh tashna pasya' u'tje', quim yujva andy ju'ngu yuumeeta', andyrrāanaty nvijt. Tyā'wē yūuteva, tyāawe'shtyi' Dyusa' peltunāyvatsa' sūju'tj. ¹⁷ Macue tyā'wē yūuteva, Dyusa' andya's pu'chcu ñuscajmen, cyajtj Cristo yuwe ewte nviit-sa's pta'shya' ājarra judiu jil'mée vite nasa maanzcuēesatyva cwēese'jya' āja. Dyusa' tyā'wēc andya's nwe'we león yuweju. ¹⁸ Sa' tyā'wērrarrāa ewmееjū jyuca nwe'werra jyaawuuna cielute tyajy jycaajna ūsnitewe'sh. Wala yuj wecha yuja' tyā'wē ew yūupa'ga.

Pablo yuwe wechaa caajni

¹⁹ ãchja' yuwe meen wecha Prisca vite' Aquila vite' Onesíforowe'shtyi.
²⁰ Erasto' Corintote neeyũuc, atsa' Trofimo's Miletotetj nvijt ätsa'c tyâa
pa'ga. ²¹ Nus pa'jwa'j en äjmeyna yujya' mpa'pchu. Indya's yuwe wechaa
caja'ty Eubulo vite' Pudente vite' Lino vite' Claudia vite' yacjtjẽ'jwe'sh
jyucaysa.

²² Cue'shtyi jype'jsa Jesucristo' indy yacj nes yuuna, atsa' Dyusa'
i'cue'sh jyucaysaty pu'chjina.

SAN PABLO CARTA TITO JÏI

Pablo' Tito's fi'jni

1 ¹ Andya' Dyusna selpisáa Pablo yaasetj, Jesucristo jycaajnisá. Tyāasa Jesucristo tashte nuypa'jwa'jsatj Dyus tyjitynisa ũstyna tyāawe'shtyi, cyaj tyāawe'shva Dyus yuwe isasa's jiyutyna, ² bagachte yujva ptsumée ĩtyi fi'nzewa'ja's ji'pjuya' sũjna. Tyāa ptsumée ĩtyi fi'nzewa'ja's Dyusa' peesya' neeyũuc Dyus ĩshiisamée naa quiwe meetey. ³ Tyāasac tyāa ptsumée ĩtyi fi'nzewa'ja's en ājte', caajiyu'j cue'shtyi nwe'wesa Dyusa' andyna pta'shwa'jsa nvijtrra. ⁴ Naa carta's fi'jatstju Tito andy nchi'c na'wēsang naa pa'ga. Tyāasa e'nzsay tyāa na'wērrarrāa Dyusa's jiisatja'w. Dyus cue'sh Tata vite' cue'shtyi nwe'wesa Jesucristo tyāawe'sh peeygājrra pu'chte', indya' ewrrāa wēt fi'nzene'nga.

Creta quiwete Tito mjiini

⁵ Mar pyājte Creta quiwete indya's nvijttju andy ma'wē neewe'weni's cytey yuucajn. Tyāa pa'gang indya' cytee yuwe puuty we'wena jyā'jnimée neeyũuc tyāaty pjeu'jna jyā'jrra chjamb iisa dyuus yatte jycaajwa'jsa ancianowe'sh pacuerra qui'pna yuuwa'jsa neeyũu. ⁶ Anciano neeyũuwa'jsa' wala ew fi'nzesa yuutyna jypumbate yu'cypejni yuuya'mée. Sa' peecy nyuu yacjrrāa fi'nzesa yuuwa'ja'. Atsa' tyāawe'sh luucha' Dyusa's nwēese'jsa yuuwa'ja', tyā'wē Dyusa's nwēese'jmée ewmeety yũuna fi'nze' jĩni yuuya'mée. ⁷ Dyuus yatte jycaajwa'ja's jypa'gasa' Dyus mjiia's tjengwa'jsata', tyāa pa'ga wala ew fi'nzewa'j ji'pjita'. Vitety ũuscha we'wena juuna' tjengna fi'nzewa'jme'. Tũuna, puii jypacuena, vyuurrá's yajcyrra mjiiwa'jme'. ⁸ Tyā'wē yũumée, ew yũuwa'jrrá's yajcyna fi'nzewa'ja', pa'jsaty yat pqui'jna, ew ũus yajcyrra we'wesa, Dyus dyi'pte ew fi'nzesa, Dyus yuurrá's selpisáa, ma'wē fi'nzewa'ja'sva peequíi wala jypa'yacywa'ja'. ⁹ Dyus yuwe isasa pta'shni yuuc tyāate yuurráa tyutemée fi'nzewa'ja', vite jypumbasaty ewsa's caapiya'jna cchjāachja'jya', sa' Dyus yuwe isasa's atsewe'wesatyva ew caajiyu'jya'.

¹⁰Tyā'wēme!, Dyusa's atsesa seena' wala ũsta', selpimeesarrá's we'wena nasaty caypumba'jna. Nava judiwe'sh wejy tjaacue tyā'wē yūuna ũsta'.

¹¹Tyāawe'sh īshiini yuwe's jyucate cwe'we'jmée yuumeete!, yat iisa jyuca caypumba'jna ũsta' ewmeesarrá's caapiya'jna vyuu cnaywa'jrrá's yajcyrra.

¹²Tyajiíc teeche wala jytujtjesa cyteewe'sh tyajy nwe'shírráaty na'jina we'we: Cretawe'sha' wala īshijta', weesweesata', watycuē nū'sarráata' jīnac fi'j. ¹³Tyā' isa yuj we'wec. Tyāa pa'ga tyāawe'shtyi' juuna' mwe'we, cyaj Dyus yacj jypumbamée jweefírráa chjāchjana u'jrra, ¹⁴judiwe'sh īshiina cuentu'jni's nwēese'jmeetyna, sa' Dyus tashuj tyuteerra fi'nzesa jycaajnityva nwēese'jmeetyna.

¹⁵Maava ũuste ewsa's ji'pjsa', ew yaacywa'j yuurrá'scu ji'pju'. Nava maava ũuste ewsa's ji'pjmeesa', ewmeesa yuurrá'scu yajcyna fi'nze', tyāa pa'gatey tyāawe'sh ũus yuu jyuca ewmeena naa pa'ga. ¹⁶Dyusa's jīitja'w ji'ty, nava Dyusa's jiisa na'wē yu' fi'nze'tsmeeta', naasáa seena' canzhsarráata', Dyusna ajtsena quíjva ewsa yu'sa' caavya'ja'jya' ājasameeta'.

Dyus yuwe ma'wē jycaatje' tyā'srráana caapiya'jwa'ja'

2 ¹Nava indya' Dyus yuwe ma'wē jycaatje', tyā'wēyrráa caapiya'jna mes. ²Tyā'wēme' pitstjē'j tjē'jsawe'sha' quíjteva jyuca jypa'yacy fi'nzewa'ja's piyawa'j ji'pja', quíjsuva cytey yuuna, ũus yajcyrra jypa'yacy we'wena, Dyus yuurrá's ũusuj jyuca yajcyna, peeygāawa'ja's pechcanamée, macue tjēysa pa'tjeva tyāatyí' ũusmée fi'nzena tyā'wē piyawa'j ji'pja'. ³Tyā'wēy u'y tjē'jsawe'shva peequí wala jypa'yacy zhichcue fi'nzewa'j ji'pja'. Isameesarrá's wēse'jrra nuywe'wena fi'nzemée, tūunava fi'nzewa'jsameeta', ewsarrá's caapiya'jna fi'nzewa'jsata'. ⁴Cyaj cna'sa u'se iimi'sava tyāawe'sh nmi'ty peeygājna fi'nzeya' piyaatyna, tyā'wēy peecy luuchtyi peeygājna, ⁵peequí wala jypa'yacy quíjteva jyuca ewrráa fi'nzena, tyā'wēy yatteva jypa'yacy fi'nzena peecy nmi'ty nwēese'jna, cyaj quim yujva Dyus yuwe's atsewe'wemeetyna.

⁶Tyā'wēy pitstacywe'shtyiva myu'cypej ew zhichcue fi'nzecajn. ⁷Sa' quíjteva jyuca indya' ew mfi'nze, cyaj tyāawe'shva iindy fi'nzeni's uyrra', tyā'wēy yūucajn. Caapiya'jni'sva le'hcue yujva fiymée jyuca isasa yuurrá's mpeeta'sh. ⁸Ew yuurráa yu'cypejna mfi'nze, cyaj quim yujva i'cue'shtyi atsesa ewmée nuywe'wewa'ja's uymeerra', tjaameetyna.

⁹Selpisaatyva myu'cypej, tyāawe'sh patron jycaajnity quíjteva jyuca nwēese'jna wa'lna ũuscha pasmée ewrráa yuucajn, ¹⁰quíj yujnava pesweemée ew yuurráa fi'nzecajn, cyaj tyāawe'sh ew fi'nzeni's uyrra', nwe'wesa Dyus yuwe' wala zhichcuesa yu'ga jīnarráa we'wetyna.

¹¹Dyusa' tyajy peeygāani's caavya'ja'cj tyā' maatyva jyuca ewte nviitwa'jsa'. ¹²Dyus peeygāani' ewmeesa's nvijtna naa quiwete pcalte fi'nzewa'jrrá's yaacyni'sva nvijtrra, peequí wala jypa'yacy fi'nzena Dyus

yacj tyutemée tyā's yuurráa selpiina fi'nzewa'ja'scu jycaaja'. ¹³ Tyā'wēy Dyus peeygāani' cue'shtyi nwe'wesa Dyus Jesucristo jytujtjesa quíjya' neeyūuc tyāa en ājpcach wechana ūytjasna ūswa'ja'scu jycaaja'. ¹⁴ Tyāa Jesucristo' quíj ewmeejūva cue'shtyi nwe'werra jyuca pcaltyi yaaterra jyucate tyāa jii vit-ya' cue'sh pa'gate uuc. Ewsa yuurrá's jyuca cytey yuu jytjáasrrac tyā'wē yūu.

¹⁵ Tyā'wē yūuwa'ja's caapiya'jwa'j ji'pjngu, quíj yūuwa'ja'sva ūucjmée cchjáachja'jna, ewmée yūucajmén yu'cypejna. Indya's quim yujva ajtsena weechwa'j ji'pjmeeta'.

Dyus yacj fi'nzesawe'sha' cjuēswe'shtyi nwēese'jwa'j ji'pjta'

3 ¹ Yacjtjē'jwe'shtyi qui' mcaayaqui'j maava jycaajsawe'shtyi nwēese'jna, cjuēswe'shtyiwa jyuca nwēese'jna quíjva ew yūuwa'j yu'sa' jyuca cytey yuucajn. ² Quim yujtyva atsewe'wewa'j ji'pjmeeta', puui jypacuena fi'nzewa'jsameeta' wejyva ūusuj jyuca ewrráa yaacywa'ja's ji'pjuwa'jsata' nasa jyucaysaty peeygājna.

³ Nyafia' cue'shva Dyusa's jiimeerra' nwēese'jsamée jypumbana naa quiwete ewmeesarrá's pa'pchuna puuty ewmeerráa yajcyna puuty yajtsenarráa fi'nzesatja'w yu', seena' canzhsa. ⁴ Nava cue'shtyi nwe'wesa Dyus peeygāani nasa jyucaysa jii vyaarra', cue'shtyi nwe'wec. ⁵ Nava cue'sh cacueju ew yūuna fi'nzepa'ga tyā'wē yūume', naasáa peeygājrra yuurráac tyā'wē nwe'we cue'sh ūuste pcaltyi yaatena. Tyāa pa'gac Dyus Espiritu' cue'shtyi yu'ptjejrna quíj pcal yujva ji'pjmée caafi'nze'je'. ⁶ Nava tyā'wē nwe'wesa Jesucristopa'ga yuurráac Dyusa' tyajy Espiritu's jyuca ūs cue'shtyi, ⁷ cyaj Dyus dyi'pte yuuwemeesa yuuna pa'jrna ptsumée ūtyi fi'nzewa'ja's jypa'gacajncu tyā'wē peeygājrra nwe'we.

⁸ Na'wē pta'shtju tyā' isa yuja', tyāa pa'ga indya' tyāatyí' caayaqui'jna nes myuu, cyaj Dyusa's ūuste jypa'gasa' ewrráa yūuna fi'nzetyna. Tyā'wē ew yūuna fi'nzenisa' wala seelpisa' jyucaysaty. ⁹ Nava puuty we'weni seelpimeesatyí's mpa'yajcy, tyāniiteywe'sh quimrraj ne'ta yu' sa' quíjrraj ne'ta yuusáa yu' tyāarráaty jiyu wēena fi'nzenity, vite' Moises leysu we'werra puuty puui wēenity, vite' puui jypacuena fi'nzenity. Tyā'wēsa' quíjte yujva seelpimeesata'.

¹⁰ I'cue'sh pcjaacjenitewe'sh maafia' isameesarrá's caapiya'jna caypumba'jwa'jsa casejeváana atsa' tyā'sa' pa'yarra myu'cypej e'nz uspcach. Nava e'nz us we'weteva nwēese'jmeete', pcjaacjenijū cutyí'jrna peena yu' caapa'ja'jnu. ¹¹ Tyā'wēme' nasa tyā'wē yūusa' bagachteva pcalte yuurráa fi'nzewa'jsarra tyā'wē yuuna.

Tito's we'weni quíj yūuwa'ja'sva

¹² Artemas meerra' Tíquico tyāawe'shtyi iindy tashna andy cajatspcachja', indya' dund yuweene'nga Nicopoliste andy yacj puuty

uyya', nus en scjēwpcach cytee ūsu'nja sūju'tj. ¹³Iindy ājani yu'sa' quījteva jyuca mpu'ch yuwee pu'chsa Zenas vite' Apolos tyāawe'sh dyi'tje peejini's, cyaj quījva peejimée dyi'tje u'juetyna. ¹⁴Atsa' iindy tyā'wē yūuni's uyrra', cue'sh yacjtjē'jwe'shva selpiiya' piyaatyna ew yūuna peejinisu pu'chya'.

Pablo yuwe wechaa caajni

¹⁵Andy yacj ūssa jyucaysa yuwe wechaa caja'ty. Atsa' indyva yuwe meen wecha cue'sh namicuwe'sh Dyus yacj jypumbamée fi'nzesaty. Dyusa' i'cue'sh jyucaysaty pu'chjina.

SAN PABLO CARTA FILEMON JÏI

Pablo' Filemona's fi'jni

¹ Andya' Jesucristo jycaajni yuwe ewsa's pta'shpa'garráa preesu üstju, nava naa carta's fi'jatstju yacjtjê'j Timoteo yacj, cue'sh yacj mjïisa Filemon indya's wechana. ² Vite' cue'sh npe'sh Apia vite' yacjtjê'j Arquipo cue'sh yacj mjïisa vite' iindy yatte pcjaacjesawe'sh tyäawe'shtyi wechanatj fi'ja'. ³ Dyus cue'sh Tata vite' cue'shtyi jype'jsa Jesucristo tyäawe'sh pu'chni wêt mfi'nze.

Filemona' Cristo's üusuj jyuca yajcyna vitetyva peeygãani

⁴ Bagachteva Dyus yacj puuty we'we iisatj indya's yajcyna Dyusa's wechá'. ⁵ Tyä'wê Jesucristo's yuurráa yajcyna yacjtjê'jwe'sh jyucaysatycu peeygãjna fi'nze' jïni's jiyurratj tyä'wê wechá'. ⁶ Indy tyä'wê Dyus yacj fi'nzepa'ga viteva Dyusa's jypa'gasa üsta' tyäawe'shva Cristo Jesus quijteva jyuca pu'chni's ew jiyucajntju Dyusa's neewe'we'. ⁷ Andya's iiméj wala wech wecha üusutjec yacjtjê'j iindy peeygãani's jiyute', tyäa pa'gatey tyä'wê iindy pa'garráa viteva tyäawe'sh üuste wêt-sa's jypa'gaty naa pa'ga.

Pablo Filemona's neewe'weni Onesimo's ewrráa jypa'gacajn

⁸ Andya' Cristo caajnisatj na' indya's juuna' jycaajya' äjawa'jsatj. ⁹ Nava indy tyä'wê ewstate jiirra', juuna' we'wemée peeygãjnarráatj we'we', andya' Cristo Jesusna selpiipa'ga preesu üstju tjê'cjue yä'jsa. ¹⁰ Tyäasatj indya's pu'ch jytjãasu' Onesimo's ewrráa yūuna. Tyä'sa' andy nchi'c na'wēsaj Dyus jïi cnay ay carcelte üsrrava. ¹¹ Nyafii yu' indyna selpisáa Onesimo' seelpimeesac yuu. Nava ächja' wala seelpisa' andy yacj vite' indy yacjva. ¹² Tyä'sna iindy tashte qui' cajatatju atsa' miipa'ga andy yuu cytee pa'jats na'wê. ¹³ Andya' Dyus yuwe's pta'shpa'ga ay carcelte üstju atsa' andyna pi'cyna üswa'jsa Onesimo's caajmeevats wejy ewna, indya' andy yacj pi'cyna üsya' äja'tsmeeng atsa' Onesimo üscajn. ¹⁴ Nava tyä'wê

yūu wēemeetj, indyna caajiyu'jme yu', cyaj indy andyna pu'ch wēerra' pu'chjine'nga Onesimo's caapi'qui'jna. Nava indya's tyā'wē myūu jīna yu' jytjāasutsmeetj. ¹⁵Onesimo' iindy tashu manz en yu' tyuteene', naajūyā'ja' peena yu' bagachte yujva tyuteeya'mée. ¹⁶Nava āchja' selpiisáa na'wēmée, wejyva selpiisaate jytjaacue yacjtjē'j peeygāanisa na'wē ew indy jype'cjan ne' tyā'wē yūu. Andya' Onesimo's wala peeygāja'tj, atsa' indya' wejy jytjaacue peeygāawa'j ji'pjngu, Onesimo' iindy jype'jnisac yu' nava āchja' tyā'wērrāamée, iindy yacjtjē'ja' Cristo's jiisapa'ga.

¹⁷Indya' andya's namicu na'wē dyij yaaquitsrra', Onesimo's miipa'ga, andy pa'jvats ma'wē wechana jypa'gaqui'ng tyā'wē yajcyna miipa'ga.

¹⁸Indya's ājmée vá' yuu, meerra' yuulváana atsa' andyna yuula's pēyine'nga. ¹⁹Yuula's ducje'nja jīna Pablo andy cuseju fi'jni's uyrra', wejy yuuva andy tyā'wē Pablo's yuultju ew yūupa'ga sūjune'nga. ²⁰Yacjtjē'j, tyā'wē andy neewe'weni's cytey meen yuu, Onesimo's jypa'gana Dyusa's jiisa na'wē. Tyā'wē yūurra', andy ūuste wētwtēt caayaqui'jine'nga.

²¹Tyā'jīnatj fi'ja'. Indya' cytey yuune'nga sa' andy jytjāasnite jytjaacue ew yūuwa'ja's jiirratj tyā'jī'. ²²Tyā'wērrāa yūumée, andy pa'jwa'ja'sva ūytjasna mes. I'cue'sh tyā'wē Dyus yacj puuty we'wena ūste', Dyusa' cajaváana atsa' maa enteya' shawendu'nja i'cue'shtyi tjengya'.

Yuwe wechaa caajnity pta'shna fi'jni

²³Cristo Jesusna selpiipa'ga carcelte andy yacj pi'cyna ūssa Epafrasva yuwe wechaa caja'c, ²⁴vite' Marcos, Aristarco, Demas, Lucas tyāawe'shva mjīi pu'chsata' sa' wechaa caja'ty.

²⁵Cue'shtyi jype'jsa Jesucristo' i'cue'shtyi pu'chjina.

CARTA HEBREOWE'SH JÏI

Dyusa' cue'shtyi we'wec tyajy Nchi'ca's caajrra

1 ¹Dyusa' tyāniitey cue'sh yatsgawe'shtyi maanzcuēe usva we'wec fiyfiyrraj tyajy yuwee pta'shsawe'shtyi jycaajrra. ²Sa' āchj naa nmej ensu' Dyusa' cue'shtyic we'we tyajy Nchi'ca's caajrra. Dyusa' tyajy Nchi'ca's jycaajrrac naa quiwe quījquijnava jyuca vit. Tyā'wē yūurrac Dyusa' tyāatyī's jyuca Nchi'c cuseterrarrāa nvijt. ³Tyāa Nchi'c íc Ney zhichcue zmeena' cweetjnisa yu', sa' Dyus ma'wēsate' le'chcuerrāa yujva fysamée tyāa írrāac yu'. Sa' tyāa írrāa naa quiwe ma'c yuu nava quījquijnava jyuca ewrrāa caafi'nze'jna ūsa' tyajy we'weni yacjrrāa. Sa' tyāa írrāa cue'sh pcaltiy yaattera Dyus pucate cachcu cielute.

Dyus Nchi'ca' angeleswe'shte tjaacue walasa'

⁴Dyus Nchi'ca' angeleswe'shte tjaacuec walasa yu', tyāasac Ney ūsni yase jypa'ga maa angeleswe'shteva tjaacue walasa. ⁵Tyā'wēte írrāac Dyusa' bagachte yujva angeleswe'shtyi' maa yujtyva na'jīna we'wemée:

Indya' andy Nchi'cngu,

Tyāa pa'gatj ītyi yuuwa'ja's āchja' vit jīme'.

Sa' tyā'wēy maa angel yujnava na'wē we'weme':

Andya' tyajy Ney yu'nja,

Atsa' tyā' andy Nchi'c yuuna jīme'.

⁶Nava Dyusa' tyajy Nchi'ca's nyafyrraj naa quiwete nuyquījrra', na'wēc we'we:

Dyus angeleswe'sh jyucaysa tyā'srrāana nwēese'jwa'j ji'pjta' jīnac jycaaj.

⁷Sa' angeleswe'sh fi'nzewa'ja's yu' na'wērrāac we'we:

Angeleswe'sha' wejya na'wē vyaawa'jsa vitnisata',

Sa' Dyus jycaajnity selpiina ipy beesa na'wē vyaana yuuwa'jsa vitnisata' jī'c.

⁸Nava Nchi'c fi'nzewa'ja's we'werra yu' na'jī'c:

Dyus, iindy jycaajna ūswa'ja' bagachteva nes yuuna,

Indya' ew yuurráa jycaajna ūswa'jsang.

- 9 Sa' ewmeesa yu'sa' jypa'gamée, ewsa yuurrá'sngu pacue.
Tyāa pa'gac iindy Dyusa' iindy wēt fi'nzewa'ja's iiméj wala pees,
Naa quiwete iindy nwe'shte jytjaacue jī'c.
- 10 Vite ajcjē' na'jī'c Dyus Nchi'ca's we'werra':
Indyngu quiwe's pjeu'j nyafyte,
Sa' cieluva iindy cuseju vitnisata'.
- 11 Nava tyā'wēsa' ptsuutyna, naapcachja' indya' bagachteva nes
yuune'nga.
Quijquijva jyuca ropa na'wērráa iishityna.
- 12 Atsa' jyuca yu'ptjejni yuutyna.
Nava indy yu' bagachteva tyā'wēsa nes yuune'nga.
Iindy ityi fi'nzeni' bagachte yujva ptsumeena jī'c.
- 13 Nava Dyusa' maa angeleswe'sh yujtyva tyā'wē yu' na'jīna we'weme'
bagachterraa yujva:
Andy pucate patsu ju'ngte mcaach,
Indyna atsesa maatyva jyuca indyrrarráana nwēese'jwa'ja's vitna
jyā'pjcach jīme'.
- 14 Jyucay angeleswe'sha' cue'sh na'wē cacue ji'pjmeesa naa quiwete
maarraaj ewte neeyūuwa'jsa ūstyna tyāawe'shtyi pu'chya' caajnisarraata'.

Ewte neeyūuwa'ja's jypa'yajcymée yu' yuuwa'jme'

2 ¹Tyāa pa'ga wala jypa'yacywa'j ji'ptja'w, na'wē Dyus Nchi'c yuu
cue'shtyi we'wete yuwe ewsa's wēse'tja'w tyāajū tyuteeya'mée.
²Dyus yuwe's angeleswe'shrráa pta'shni yujva iishiini yuumée cyteycu
yuu. Tyāa pa'ga'irráaty nwēese'jmée pcalte wetesawe'sha' castigāyni yuu
tyāawe'sh ājmée yūupa'ga. ³Tyāarráa yujva cyteycu yuu, atsa' cue'sh ewte
neeyūuwa'j tyacue walasa's Dyus Nchi'c Cristo tyajy yuweju yuuc pta'sh
tyā'sa' jypa'yacymeerra', ¿ma'wē Dyus castigo seena'sajū iyucytja'w? Atsa'
Cristo pta'shni's nyafyte wēse'jsawe'sha' cue'shtyity pta'sh, isasa yuja'
jīna. ⁴Tyāawe'shrráa isasa yuja' jīmeeta', Dyus yuuc isasa yujna sūjna
jiyucajn quim yujva ājanimeesa's caavya'ja'j. Sa' Dyus Espiritu pu'chte
quijte yujva shiingmée selpiina fi'nzewa'jty ūscu teechsa na'wērraj, tyajy
ūs wēeni yu's jyuca.

Jesucristo' cue'sh yacj pyacjsa na'wēc yuu

⁵Na'wē Cristorrarrá's nwēese'jwa'j en pa'jana jī'tja'w tyāa ente
jycaajwa'ja's angeleswe'shtyi nvijtme' Dyusa'. ⁶Tyā'wē meec yu'
tyajjirráac na'jīna teech ajcjē pta'shi' Dyus librute:

Nasa' ¿ma'wēsana atsnga tyā'sa' peeygāja'?

Nasa ptsuwa'lsarrá's ¿quijya'nga tyacue wala pa'pchuna yaaqui'?

⁷Nasa's manz en yu' angeleswe'shte ājmeecuesa na'wēng nvijt,

Nava jytjaacue walasa yuuwa'j vitrang nvijt,

Tyā'wē yūurra iindy vitnityi' tyāarrarráa jycaajya' ājawa'ja's ūsngu.

⁸ Quījva jyuca tyāarrarrá's nwēese'ljwa'ja's vitngu jī'c.

Dyusa' tyā'wē jyuca tyāarrarrá's nwēese'ljwa'ja's vit yā'jrra', quīj yujva nwēese'ljwa'jsamée yu' nvijtme!. Tyā'wēteva āchpcach tyāarrarrá's quījva jyuca nwēese'ljni yu's iuymetja'w. ⁹Na'wē manz en yu' angeleswe'shte ājmeecuesa vitcu tyā' Jesusa' tyā'snac Dyusa' cue'sh jyucaysa pa'gate uuwa'jsa vit. Nava āchja' Dyus pucate u'pa', tyāarrarráa jycaajwa'jsa yuurra tyā'wē pytjaa yuurra uupa'ga.

¹⁰ Quījquijnava jyuca vit-sa Dyuscu tyajy luuch yuuwa'jsa yuutyi' jyuca nwe'werra tyajy tashte nuypa'jya' Jesucristo's pytjaa yuurra uuwa'j vit, quijte yujva shiingmée nwe'wesa yuucajn. ¹¹ Tyā'wē pcaltiyi peltunāynisa vite! pcaltiyi peltunāysa tyāa yacj e'nzsa' teech Neytewe'shrrarráata' tyāa Neya' Dyusa'. Tyā'wē teech Neytewe'shrráa ne'tca'w, tyāa pa'gac Dyus Nchi'ca' cue'shtyi's tjaamemée Andy nyacj jīna we'we!. ¹² Tyā'snac Dyus librute na'ljī':

Indy ma'wēsateva andy nyacjwe'shtyi pta'shi'nja,

Sa' andy nyacjwe'sh cshavyte indya's wechana tuutje'je'nja jī'c.

¹³ Sa' vite ajcjēva na'wēc we'we!:

Andya' Dyusrráana yajcyna fi'nze'nja.

Sa' qui'quin we'werra!:

Dyus ūsni luuch ayte ūsta' tyāa yacj ayte ūstju jī'c.

¹⁴ Nasava pyacjsa jīnisa' maanzcuēerrava cyanzí teech ney cacue pety ee jypa'garra yuurráaty pyacjsa yu', tyāa pa'gac Jesusva pyacjsa yuuya' nasaa cacue's jypa'ga uuya' ājaya'. Tyā'wē yūurrac cluuste uurra uuwa'j vit-sa's cnay. Tyā'wē nasaty uuwa'j vit-sa' echtjē'cj yu'. ¹⁵ Tyā'wē yūurrac Jesusa' jyucaysaty nwe'we bagachteva uuwa'ja's ūucjna yuurráa fi'nzenijū. ¹⁶ Tyā' angeleswe'shtyi pu'chya' quījme', wejyva nasa Abrahan jil'tycu pu'chya' quīj. ¹⁷ Tyā'wē nasaty pu'chya' ājaya'c cue'sh na'wēsa yuu quījteva jyuca. Tyāasac nyacj na'wē yuuna pa'jrra cue'shtyi peeygāawa'ja's jipjurra pcalsawe'sh pa'gate Dyus tashte we'wewa'jsa yuu. Sa' nasaa pcaltiyi jyuca peltunāyya'c pytjaa yuurra uuwa'j jipjuna ūsu!. ¹⁸ Tyā'wē nasaa cacue's jypa'garrac pcalte cue'sh chjāchjamée fi'nzeni's jyuca jiyu. Tyāasa āchja' pcalte chjāchjamée fi'nzesatyi's quijte yujva shiingmée nwe'weya' ājawa'jsa'.

Jesusráa Moiseeste tjaacuesa'

3 ¹ Yacjtjē'jwe'sh i'cue'sha' Dyus pa'yanisa i'cue yuu tyāa jīi yuuwa'jsa, tyāa pa'ga wala ew mjiiyuwe Cristo Jesusa's. Tyā' Dyus caajnisal, pcalsawe'sh pa'gate Dyus tashte we'wewa'jsa, sa' Dyus yacj cue'sh fi'nzewa'ja's pta'shsa!. ² Jesusa' quijteva jyuca cytey yuuc ma'wē yūuwa'ja's ne' Dyus jycaaj tyā'sa' jyuca. Moisesva ma'wēga Dyus luuchtyi jype'ljwa'ja's jyuca cytey yuu, tyā'wēycu Jesusva cytey yuu. ³ Nava Jesusráa

Moiseste tjaacue jytujtjesa', ma'wēga yat namurráa jytujtje yu' atsa' yatte selpiisáa yu' jytujtje meec yu', tyā'wēy Jesusráa jytujtjesa'. ⁴Yata's quimráava tyajte yujc yat yuuna pa'ja', nava namu yu' Dyusa'. ⁵Moisesa' selpiisaarráarrava tyā'wēc quijte yujva peejymée jyuca cytey yuu Dyus luuchtyi jype'ljna, nava tyajy selpiini yu' e'su Dyus quij yūuya'vateva tyāaty caajiyu'jsarráac yu'. ⁶Naapcachja' Cristo' selpiisamée Dyus Nchi'c yuuc yu', tyāasa Dyus luucha' cue'shtja'w tyāaty quijte yujva peejymée jype'jwa'jsa', cue'sh yuu uu entepcach tyutemée tyā's yuurráa wechana fi'nzete yu'.

Dyus luuch, Dyus tashte jycaasena ūswa'j

⁷Tyāa pa'ga tyāa yacjrráa fi'nzewa'ja's na'wēc pta'shi' Dyus Espiritu':

Āchj Dyus we'weni's wēse'jyā'jrra',

⁸I'cue'sh ūuste wa'l yaacynuwe. I'cue'sh yatsgawe'shva na'wēty wa'l'na ūsu' tyā'wē yūunuwe.

Tyā'wē wa'lrra tyāawe'sha' Dyusa's cvissaty na'wē yuu nasa u'pnimée quiwete.

⁹I'cue'sh yatsgawe'sha' cytee ūsrra',

Tyacue cuarenta añupcach tyāawe'shtyi andy quijquijteva ew yūuna pu'chni's uyrrava,

Andya's wa'ltyi.

¹⁰Tyāa pa'gatj tyāa nasa yacj wēt fi'nzeya' ājameerra na'jīna we'we:

Andy caapiya'jni's wa'lrra, tyāawe'sh ūuste jypumbanarráaty fi'nze'.

¹¹Atsa' tyā'wē yūupa'ga, tyāawe'sha' andy yacj jycaasena ūswa'tje u'cameetyna jīnatj jurāy jī'c.

¹²Tyāa pa'ga, yacjtjē'jwe'sh, wala mpa'yajcywe, tyā'wē Dyus we'weni' wej yujva isameesana sūjna ewmée yajcyrra Dyus ityisa tashu tyuteeya'mée. ¹³Tyā'wē yūumée, jweefírráa chjāchja yaacywa'ja's een isa puuty pu'chna mfi'nzewe, cyaj i'cue'shtyi' maa yujtyva pcala' caypumba'jmeena, atsa' i'cue'sh ūuste ewmée yaacywa'ja's ji'pjumeene'cue. ¹⁴Nyafíiva ma'wētca'w Cristo yacj jypumbamée fi'nze tyā'wēesa nmej entepcach fi'nzerra', tyāa yacj ūswa'ja's ji'pju'nja'w.

¹⁵Tyā'wē wa'lcajmen na'wēc we'we':

Āchj Dyus we'weni's wēse'jyā'jrra',

I'cue'sh ūuste wa'l yaacynuwe. I'cue'sh yatsgawe'shva na'wēty wa'l'na ūsu' tyā'wē yūunuwe jī'c.

¹⁶¿Quimta tyā'wē Dyus yuwe's wēse'jrrava e'su yā'ja' wa'l'na ūsu'? Egipto quiweju Moises cutyi'cj tyāawe'sh jyucaysaty tyā'wē yūu. ¹⁷Dyusa' ¿quim yacjga cuarenta añupcach pyūuscuete fi'nzena ūsu'? Pcalte wetepa'ga nasa u'pnimée quiwete uuty tyāawe'sh yacjcu tyā'wē pyūuscuete fi'nzena ūsu'. ¹⁸Dyusa' ¿quimtyiga tyā'wē andy yacj jycaasena ūsya' u'cameetyna jīna we'we? Nwēese'jsameetycu tyā'jīna we'we. ¹⁹Dyus we'weni's nwēese'jmeerra', u'caya' ājameeta' tyā'sa' āchja' jiyutja'w.

4 ¹Tyāa pa'ga wala jypa'yaquiga. Tyā'wēme!, i'cue'shva maafi yu' iviituvá'cue Dyus yacj jycaasena ūswa'tje pa'jwa'ja's ji'pjrrava. ²Tyāawe'shtyiva ma'wēga jycaasena ūswa'tje pa'jwa'ja's pta'shni yuu, tyā'wēy cue'shtyiva pta'shnic yuu Dyus yuwe ewte nviitwa'ja's. Nava tyāawe'shtyi' tyāa pta'shni' selpiime!, Dyus yuwe! isa cytey yuuwa'jsana sūjna ūusuj jyuca nwēese'jmeeta' naa pa'ga. ³Dyus we'werra: Andy yacj jycaasena ūswa'tje u'cameetyna jīna jurāycu. Nava cue'sh yu' pejca u'cawa'jsatja'w, Dyus yuwe! isa yujna sūjnatja'w jypa'garra nwēese'j naa pa'ga. Na'wē andy yacj jycaasena ūswa'j jīna we'wec tyāa yu' nyafiitey naa quiwe's vitna jyā'jrra jycaasec, sa' āchpa'jva jycaasena ūsa' cyte u'cawa'ja's we'werrac tyā'ji'. ⁴Tyajy mjiia's vitna jyā'jrra jycaaseni's Dyus librute na'jīnac we'we'!

Dyusa' tyajy mjiia's jyuca jyā'jrra', siete ensa's jycaasec ji'c.

⁵Sa' cyte tyajy jycaaseni's we'werrac:

Andy yacj jycaaseya' u'caya' ājameetyna ji'.

⁶Macue tyā'wēteva, maafi yu' cytee jycaasena ūswa'tje u'catyna. Nyafiwe'sha' ewte neeyūuwa'ja's pta'shte wēse'jrrava, Dyusa's nwēese'jmeerra jycaasena ūswa'tje u'cameeta'. ⁷Tyā'wē yūuni en scjēwniijū wala tyachtec Dyusa' Davida's na'jīna cwe'we'j:

Āchj Dyus we'weni's wēse'jyā'jrra',

Wa'lna nwēese'jmée yu' yuunuwe ji'c.

Tyāa yu' āchj naa ensuwe'shva tyā'wēy yūuwe'shtec tyā'ji'. ⁸Jycaasewa'j jīna we'we'c tyāa jycaasewa'ja' Josué entewe'shvatsa', Dyusa' e'su tyachte qui' we'wewa'jmeene' yu' āchj jīna. ⁹Tyāa pa'ga jycaasewa'j tjaacue ewsa nee ūsirrā' Dyusa's nwēese'jsawe'sh jīi. ¹⁰Tyāa pa'gatey Dyus yacj jycaasewa'tje u'casa' tyāawe'sh mjiiniijū jyucatec jycaase', Dyusva ma'wēga tyajy mjiini's jyā'jrra jyucate jycaase tyā'wēy. ¹¹Tyāasa Dyus yacj jycaasewa'tje u'caya' pa'pchuwa'j ji'ptja'w, Dyus we'weni's nwēese'jmeeta' tyāawe'sh na'wē yūumée.

¹²Tyā'wēme!, Dyus we'weni' ityisa', quijteva jyuca seelpisa. Dyus we'weni' chill pdyi'p seena' zecsate jytjaacue zecsā', tyāasac ūus dyiite quij pcal ji'pjteva jyuca āate cpajcywe'we'. Sa' ūusterrāa yaacyni quij yujnava paatste nviitu'tsme!. ¹³Dyus vitnisa' quij yujva tyajy dyi'pte paatste uynimeete yu' neeyūumeetyna. Quijquijva jyuca āaterrarrāa ūsta' cue'shtyi castigāywa'jsa ūsa' tyajy dyi'pte.

Dyus tashte pcalsawe'sh ju'ngu we'we pu'chsa' Jesusa'

¹⁴Dyus Nchi'c Jesus tyā'wē Dyus tashte cue'sh pcalsawe'sh ju'ngu we'we pu'chwa'jsa cielute u'cac, tyāa pa'ga tyajy tashuj tyutemée fi'nzega. ¹⁵Tyāa pa'gatey cielute cue'sh ju'ngu yuusa' tyāa yu' pcalte yu' wetemeerrava, pcalte cue'sh chjāchjamée fi'nzeni yu'sa' jyuca jiyuc, tyāasa cue'sh ājmeecuesaty jyuca peeygājna pu'chwa'jsa'. ¹⁶Tyāa pa'ga Dyus tashte ūucjmée utyaaga, Dyus peeygāani's ji'pjurra cue'sh tjēyte fi'nzenijū nwe'weni yuuya' quij enteva.

5 ¹Pcalsawe'sh ju'ngu we'we pu'chwa'jsa tyjityjrna naa quiwete nviitnisa' tyāa fírráa pcalpa'ga tajcy icjrna Dyus altalte cambwa'jsa'. ²Pcalsawe'sh ju'ngu we'we pu'chsa' tyāa fíva pcalte ñuste fi'nzesarra', ñuste fi'nzeni ma'wēteva jyuca jiia'. Tyāasa jiimeecuesa vituna fi'nzesaty wala peeygājna ju'ngu yuwa'jsa'. ³Sa' tyāa fíva ajmeecue pcalsarra', peecy pcalpa'gava tajcy icjrna Dyus altalte cambwa'j ji'pju'c, vitesa pa'gateva tyā'wēy.

⁴Pcalsawe'sh ju'ngu we'we pu'chwa'jsa' nasaa pwe'shrráa yajcyrra qui'pnisa yu'tsmeeta'. Tyāawe'shtyi' Dyuscu tyjityjrna nviitu', Aaronva ma'wēga Dyus tyjityjnisa yuu tyā'wēy. ⁵Atsa' Cristova tyā'wēy yūunisafírráac yuu. Tyā' peecyrráa yu' pcalsawe'sh ju'ngu Dyus tashte we'wesa yuume'. Tyā'sa' Dyuscu tyjityjrna nvijt. Tyajíic Dyus libroteva na'jī':

Dyus we'werra':

Indya' andy Nchi'cngu,

Tyāa pa'gatj ityi yuwa'ja's āchja' ūs jīnac we'we'.

⁶Sa' vite ajcjēva Dyus librote na'jīnac we'weni yuu:

Indya' pcalsawe'sh ju'ngu Dyus tashte we'we pu'chwa'jsang bagachteva,

Melquisedecva ma'wēga yuu tyā'wēysa jī'c.

⁷Cristo' naa quiwete ūsrra', tyajy uwa'j en jyuca utyaatste', Dyus nwe'weya' ājawa'jsa dyi'pte wala pytjaa sus neewe'wec ū'nena, atsa' Dyusa' wēse'cj tyajy pytjaa we'weni's. ⁸Cristo' macue Dyus Nchi'crrava, iiméj wala pytjaa yuwa'ja's jiyurra, nwēese'jwa'ja'sva piyac. ⁹Tyā'wē quīj pytjaa yuunisateva jyuca jiyuna jyā'jrrac, bagachteva nwe'wena nes yuwa'jsa yuuna pa'j jyucaysa nwēese'jsa yuutyi's. ¹⁰Tyā'wē yūunijūc Dyusa' pcalsawe'sh ju'ngu we'we pu'chwa'jsa vit, Melquisedec na'wēysa.

Dyusa's jiirra tyajū tyuteete' ūucjūcjsa'

¹¹Na'wē pta'shi'tj tyā'sa' wala we'wewa'j ji'pjírráatj, nava i'cue'sha' jiyuya' āja'tsmeei'cue, atsa' wala tjēya' ew pta'sh wēete yu'. ¹²Dyusa's jiyuni tyacue tyachte', i'cue'sh yuu caapiya'jsa yuupcachte, nee peejírráa i'cue Dyus caapiya'jni tjēymeecuesa's qui' peena ew pta'shwa'j. I'cue'sha' luuch na'wēysarráa i'cue, quīj ū'a'sva ū'wepcachte, luuch ū'ni lechi'srráa i'cue ū'we'. ¹³Tyā'wē lechírrás' ū'sa' luuch le'hcue cchu'chu'jnisa na'wēsarráata', tyāasaty Dyus yacj ew fi'nzewa'j yu'sa' jiyu'tsmée. ¹⁴Nava tjē'jsa yā'ja' tjē'jsa ū'nisaty jypa'gawa'ja', quīj ewsatyna vite' quīj ewmeesatyna nava tyāaty jyuca jiyuya'.

6 ¹Tyāa pa'ga Cristo caapiya'jni nyafyte tjēymeecuesaty pta'shtja'w tyāa yacjrráa fi'nzemée, jweefírráa wala piyana ul'jwa'j ji'ptja'w, shiingna fi'nzeya'mée. Nyafyte caapiya'jnisa yacjrráa yu' fi'nzemeeyuuga. Tyā' naata': pcaltyi nvijtrra Dyus tashte shawendni, Dyusa' ūsyujna sūjna

ûusuj jyuca yaacyni, ²yu'te ya'bautisâyni, Dyusna selpiwa'jsaty tyjityjrra Dyus cusete neewe'weni, qui' îtyi yuuwa'ja's caapiya'jni, Dyus castigo iimêj seena'te pa'jwa'ja's pta'shni, tyâa nyafyte caapiya'jnisata'. ³Dyus pu'chte' jweefirrâa piyana u'jue'nja'w.

⁴Tyâ'wême', maava Dyus yacj fi'nzewa'ja's ew jiisa, Dyus peescu ewte neeyûuwa'ja's tyâ'snava ew jiisa, Dyus Espiritu'sva ûuste jypa'gasa, ⁵tyâ'wêy Dyus yuwe ewsateva jiisa, nmej ente' Cristorrarrâa jycaajwa'ja'sva jiisa, ⁶tyâ'wê quîjteva ew jiisa Dyus tashuj tyutesaati' peena caashwendu'j wêete ya'âja'tsme'. Tyâa pa'gatey tyâawe'sha' Dyus Nchi'ca's ew jiirrava ajtsena weechrra cluuscjê qui' qui'psa na'wê yuusaata' naa pa'gac ya'âja'tsmée. ⁷Tyâawe'shtyi' na'wêtja'w caaja'nda'ja': Quiwe mjîinisa' nus pa'jni yu'a's jyuca chanzhate', uutjash ewsac caseje', Dyus pu'chte mjîisawe'sh jîi. ⁸Nava ewsa casejmée jyûtj quîjte yujva seelpimeesarrâa buchate', quiwe tyâ'wêsa's nmejte' tjengnimée yuuna. Tyâ'wêy maava Dyusa's jiirra qui' tyutesá' quîjte yujva seelpimée, iviituni yuutyna.

Dyusa' cytey yuuna sūjniisac chjächja caafi'nze'je'

⁹Nava i'cue'sh yu' tyâ'wê yuumée, Dyus nwe'wenijüyâ'ja' jweefirrâa wala ew yûuna fi'nzene'cue sūju'tj. ¹⁰I'cue'sh tyâ'wê ew yûuna yacjtjê'jwe'shtyi peeygâjna pu'chna âate caavya'ja'jna âchpcach tyâ'wê ew yûuna nes tyâ'wê i'cue, naa pa'ga Dyusa' i'cue'sh ew yûuni's pechcanameena. ¹¹Nava andya' nmej entepcach tyâ'wê caavya'ja'jna pa'pchuna nestju yûu jytjâasu' teechsa na'wêrraj. Tyâ'wê yûurra', cyulmée pa'pchusa yuune'cue. ¹²Wa'lwa'j yu'sa' le'chcue yujva ji'pjunuwe, yatsgaywe'shva ma'wêta Dyusa' cytey yuuna sūjna ûusuj jyuca yajcyrra Dyus peesni's jypa'ga tyâ'wêy myûuwe.

¹³Miiyajcywe, Dyusa' Abrahana's pu'chwa'ja's puuty we'werra' peecy yase'siirrâa cysusna jurâycu, vite tyâate jytjaacuesa yu' meec yu' naa pa'ga. ¹⁴Sa' na'jîc: Isa, iindy jil'ty wala nuypejnana indya's pu'chwa'jsatj jînac jurây. ¹⁵Atsa' Abrahana' wa'lmée ûytjasrra', jypa'gac Dyus ma'wêne' yûuya' neeyûu tyâ'sa' jyuca. ¹⁶Atsa' nasava juraîtsrra', tyâawe'shte jytjaacue walasa's cysusnaty juraî', cytey yu'nja jîna. Tyâ'wê yûute', îshiimée cytey yuuna sūjwa'jrrâac ya'jil'pju'. ¹⁷Tyâa pa'gac Dyusva tyâ'wêy jurây: Andy puuty we'weni's cytey yu'nja jîna. Dyusa' tyajy puuty we'weni's le'chcuerrâa yujva yu'ptjejmée cytey yuuya'c ûsu', atsa' tyâ'sna jypa'gawa'jsa' cytey yuuyujuna sūjnarrâa ûscajncu tyâ'wê yûu. ¹⁸Dyus jurâyni' e'nz jwendtyi yu': Cytey yu'nja jîna we'weni vite' tyajy yase's cysusni. Tyâa pa'ga tyajy puuty we'weni' yu'ptjejmeetyna. Cyajtja'w Dyusa' tyajy puuty we'weni's cytey yuuyujuna Dyusna pacuesaatyi's sūjna chjächja yaacywa'ja's ji'pju'. ¹⁹Dyusa' tyajy puuty we'weni's cytey yuuna sūjnisac cue'shtyi's jypumbamée chjächja caafi'nze'je', tyâa

pa'gatey cue'sha' cielute ũssa Dyus puuty we'weni cytey yuuwa'ja's
jiirratja'w ũytjasu' naa pa'ga. ²⁰Jesusa' cielute Dyus ũsnitec u'ca, Dyus
tashte pcalsawe'sh ju'ngu we'we pu'chrra cue'shtyi cytee ca'ga'jya'. Tyā'
Melquisedec na'wēsac yu'.

Jesusa' Melquisedec na'wēsa'

7 ¹Naa Melquisedecja' Salem chjambte jycaajsac yu', nava tyāaírráa
pcalsawe'sh ju'ngu we'we pu'chsac yu'. Atsa' teech ente' Abrahana'
guerrate puina ũsrra', naa quiwete jycaajsa ewmeesaty cnayrra
shawendna pa'jatste', Melquisedecja' pu'tjengya' casejrra bendicion acjte',
²Abrahana' diesmo ducjcu macuene' ducjwa'j ji'pju' tyāa yu's jyuca.
(Hebreo yuwete' Melquisedec jīnisa' Ew Jycaajsa jīnisa', atsa' Salem
jīnisa' wēt fi'nzeni jīnisac yu'. Tyāasa Melquisedecja' wēt fi'nzenite ew
jycaajsa' jīnisa'.) ³Sa' tyajy ney tyajy nji'j tyajy yatsgawe'sh tyāatyis
ya'jiyu'tsme', tyajy upyjni en tyajy uuni tyā'wēsarra yujtyva. Tyāasa
Dyus Nchi'c pcalsawe'sh ju'ngu we'we pu'chna nes yuusa na'wēysac yu'
Melquisedecja'.

⁴Āchja' ew mjiyuwe: Melquisedecja' iiméj wala jytujtjesa yu'c. Tyajíic
cue'sh yatsgawe'sh Abrahan yujva diesmo's tyā'sna ducj guerrate puirra
tyajy jiityi's qui' cusa'jni's. ⁵Moises leya' naasáa Levi ji'j yuurráatycu jycaaja'
tyāawe'sh nwe'sh diesmoty jypa'gawa'jsa. ⁶Tyā'wēteva, Melquisedecja' Levi
ji'ljmeerrava Abrahan ducjni diesmo's jypa'gac, sa' Abrahana' macue Dyus
tyjityinisateva Melquisedecja' bendeciycu. ⁷Bendeciysa' bendeciynisate
jytjaacue walasa' tyā'sa' tyā'wēme' jiya' ājameetyna quim yujva. ⁸Āchj
naa ensu cue'sh pwe'sh ducjni diesmo's jypa'gasa' nasa uuwa'jsarráata'.
Nava Dyus librate Melquisedecja's we'werra': Bagachte yujva uumée ityi
ũssa jīna we'wets na'wēc pta'shi'. ⁹Levi ji'ljwe'sh jyucaysa na'wē diesmo's
jypa'ga'ty tyāawe'shva diesmo's ducjsaty yuu Melquisedecna. Ew jiyute yu',
tyāawe'sh jyucaysa pa'gate Abrahancu ducj. ¹⁰Tyā'wēc yuu jicajni' Abrahana'
Melquisedec yacj puuty uyrra diesmo's ducjetste', Levi ji'lj yuuwa'jsa' Abrahan
cacueju casejmeityi yu'.

¹¹Ley nviitnisa Aaron ji'lj leviwe'shrráa tyā'wē nasa pcalsaty Dyus
tashte cuutya'jya' ājavatsa', vite caajwa'j peejymeene' yu', Melquisedecva
ma'wēga Aaron ji'tjewe'shmée yu' tyā'wēysa. ¹²Tyā'wē pcalsawe'sh ju'ngu
we'we pu'chsa leviwe'shtyi cutyi'jrra', leynava pju'se'jwa'ja'. ¹³Na'wē
vite caajwa'ja's we'we'c tyā' cue'shtyi jype'jsa Jesucristo's we'werrac
tyā'jī'. Jesucristo' Israel nwe'shrrava, Aaron ji'tjewe'sh meec yu'. ¹⁴Judá
ji'tjewe'shcu yu' tyā'sa' ew jiitja'w. Atsa' Judá ji'tjewe'sha' quim yujva
pcalsawe'sh ju'ngu we'we pu'chwa'ja's ji'pjmeeta'. Tyajíic Moisesa' tyā'wē
yūuwa'ja's Judá ji'tjewe'shtyi' maa yujtyva cysumée.

¹⁵Aytec isa ew ya'jiyu' leya'sva pju'se'jwa'ja's. Tyā'wē pju'se'cjaníi
pcalsawe'sh ju'ngu we'we pu'chwa'jsa' ley nviitnisamée, Melquisedec

na'wēsac yu'. ¹⁶Tyā' ley tyjityjrra nviitnisamée, bagachterrāa yujva ptsumée ïtyi fi'nzewa'jsac yu'. ¹⁷Tyajíc Jesusa's we'werra na'jī Dyusa':

Indya' bagachteva pcalsawe'sh ju'ngu we'we pu'chna nes yuune'nga, Melquisedec na'wēsa jī'c.

¹⁸⁻¹⁹Tyajíc Moises leya' nasa pcalsaty Dyus tashte cuutya'jya' ājamée ma'wērrāa yujva, tyāa pa'gac tyāa leya's pju'se'jni yuu. Atsa' āchja' tyāa leyte jytjaacue ewsa ji'ptja'w tyāa yacja' Dyus tashte utyaaya' āja'tja'w.

²⁰Dyus tashte cuutya'jya' ājawa'ja's Dyusa' nviitutsrra' juraīmée yu' nvijtme'. ²¹Dyus tashte cuutya'jya' ājawa'jsa jīnisa nyafiwe'shtyi' Dyusa' juraīmeec nvijt. Nava Jesusa's tyā'wē yuuwa'jsa nviitutsrra', jurāyrrac nvijt. Tyajíc Dyus libroute na'jīna we'we':

Indya' bagachteva pcalsawe'sh ju'ngu we'we pu'chna nes yuune'nga jīnac Dyusa' tyajy we'weni's jurāy na' yu'ptjejmeena.

²²Tyāa pa'ga Jesusa' jytjaacue ew puuty we'werra nviitnisa'.

²³Pcalsawe'sh ju'ngu we'we pu'chsa nyafiwe'sha' wala cuj yu'ty, tyāa pa'gatey uunaty u'jue'. Tyāasaty teechrāa yu' u'pya' āja'tsmée. ²⁴Nava Jesusa' uuwa'jsame', tyāasa pcalsawe'sh ju'ngu we'we pu'chna ūswa'ja's vitety nvijtmeena. ²⁵Sa' tyā'sna pi'cyrra Dyus tashte utyaawa'ja's pacuesāa yuutyi's nwe'werra, bagachte yujva vituwa'jmeete nvijt-ya' ājana, tyāa pa'gatey tyā' bagachte yujva uumée ïtyi nes yuuwa'jsa', pcalsawe'sh ju'ngu we'we pu'chna.

²⁶Pcalsawe'sh ju'ngu Dyus tashte we'we pu'chsa' Jesus na'wēsa ewsatja'w peejy yu'. Tyā' quīj pcal yujva ji'pjmeesa, bagachte yujva ewmée yūuna fi'nzesamée, naa quiwetewe'sh na'wēsa meec yu'. Tyāasac Dyus pucate cājpcach jyūna u'jnisa yuu. ²⁷Pcalsawe'sh ju'ngu we'we pu'chwa'jsa nyafiwe'sha' na'wēty een isa tajcy icjrra Dyus altalte cambu' tyā'wē yūuwa'jsa meec yu'. Tyāawe'sha' nyafyte' peecy pcalpa'ga cjuē'y tyā'wē tajcy cambrraty nasaa pcalpa'gava tyā'wēy yū'. Nava Jesusa' een isa tyā'wē tajcy icjme', tyāa yuuc uu tee dyi'jrrāa jyucaysa pa'gate.

²⁸Pcalsawe'sh ju'ngu we'we pu'chwa'jsaty Moises ley nviitutsrra', naa quiwete nasa ājmeecuesarrāatycu nviitu'. Nava ley scjēwnite Dyus jurāyrra tyā'wē yūuwa'jsa nviitutsrra', tyajy Nchi'c iiméj tjaacue ewsa'scu nvijt bagachteva nes yuuwa'jsa.

Dyus u'se puuty we'weni's cytey yuucajn pu'chsa' Jesusa'

8 ¹Na'wē pcalsawe'sh ju'ngu Dyus tashte we'we pu'chsa jī'tja'w tyā' maateva jytjaacue ewsa cielute Dyus pucate cachrra ²pcalsawe'sh ju'ngu we'we pu'chna ūsa' Dyus ūsnite yuu u'carra. Tyāa Dyus ūsni' nasaa tyaaajnisame', tyā'sa' Dyus yuuc tyaj. ³Pcalsawe'sh ju'ngu we'we pu'chna ūssa nyafiwe'sha' pcalpa'ga tajcy icjrra Dyus altalte cambna nes yuuwa'jsa jīrra nviitnisaty yu'. Tyāa pa'gac Jesucristova quījrrāava nuycūwa'j ji'pju. ⁴Jesucristo' naa quiwete tyā'wē pcalsawe'sh ju'ngu

we'we pu'chna ūswa'ja's vit wēevatsa', ājawa'lmeene' yu', tyā'wē ājacajmeníi Moises ley nviitnisaty ūs yu' pcalsawe'sh ju'ngu we'we pu'chsa. ⁵Nava naa quiwete tyā'wē pcalsawe'sh ju'ngu we'we pu'chsa' naasáa cielute ma'wērraj yūuwa'ljna tyā'sna caajiyu'jnirrá'styi selpi'. Tyā'wē cielutewe'sha's caajiyu'jnisate írráac Dyusna neewe'wena ūswa'j yat Moises tyajatste', Dyusa' na'ljina we'we: Ew mtjeng, sa' tjā'j vitste andy ma'wē caavya'ja'tje', tyā'wēy yūune'nga jíc. ⁶Nava Dyus tashte cue'sh ju'ngu we'we pu'chsa Jesucristo selpiini' tjaacue ewa', tyāa pa'gatey Dyus tjaacue ew pu'chwa'ja's iiméj ew puuty we'wec tyā'sna selpiina ūsa'.

⁷Nyaffí puuty we'weni' ew casejvatsa', e'su qui' puuty we'wewa'j peejymeene' yu'. ⁸Nava tyā'wē ew casejpa'gamée, nasa' ewmée fi'nzepa'ga, Dyusa' na'ljic:

Israel vite' Judá yacj andya' qui' u'se puuty we'wewa'j en pa'jana,

⁹Egipto quiwejú peeygájna cutyi'jrra i'cue'sh yatsgawe'sh yacj puuty we'wetj tyā'wémée yuuna.

Tyāa ente' andy puuty we'weni's cytey yuumeeta',

Tyāa pa'gatj tjengmée nvijt.

¹⁰Nava tyāa e'su' Israelwe'sh yacj na'wē puuty we'we'nja jī'c Dyusa':

Andy jycaajnyti's tyāawe'shtyi caajiyu'jrra, ūuste fi'jrra nviitu'nja.

Sa' andya' tyāawe'sh Dyus yu'nja,

Atsa' tyāawe'sha' andy jīi yuutyna.

¹¹Dyusa's jiyucajn teechna na'wērraj caapiya'jwa'j ji'pjumeetyna,

tyāawe'sh nwe'sh vite' tyāawe'sh nyacjrráa yujtyva,

Tyāa pa'gatey le'chcuesa ma'ty yuu meerra' tjē'jsa ma'ty yuu nava tjēymée jiyuya' ājatyna andya's.

¹²Sa' tyāawe'sh pcaltyi peltunāyrra, peena yu' bagachterrāa yujva

yajcyme'nja tyāawe'sh pcaltyi's jī'c.

¹³Dyusa' qui' vite u'se puuty we'wewa'j ji'ptju jīrra', yatsíiwe'sha' selpiime' jīrrane' tyā'jī'. Atsa' selpimée yuuna pa'jsa' scjēwwa'jsana.

Dyus ūsni naa quiwetewe'sh vite' cielutewe'sh

9 ¹Dyus puuty we'wenisa nyafiíwe'sha' jycaajni ji'pjuc Dyusna neewe'wena cytey nwēese'cjan dyuus yat naa quiwetewe'shrráarrava. ²⁻⁴Tyāa yata' e'nz jwendcu tyundeni yu': nyafyte u'cana cūunisate Dyusna neewe'wena ūsni jīnisatety bela tyaaajnisate vite' pan āshni mesa vyyu bee altal incienso cambnisa tyā'wēsa ūsu'. Atsa' e'ste tyundenisate' quim yujva u'canimeesa naasáa Dyus yuurráa ūsni jīnisac yu'. Cyteea' caya vyyu bejrrarrá's jyuca scandnisac ūsu'. Tyāa caya dyiite yu' teechna vyyu bee jarru maná ji'pjsa, vite' Aaron cjaambu ye'chcu tyāa, vite' Dyus jycaajni cuet taplate fi'jni yuuc tyāaty jyaawni ūsu' caya dyiite. ⁵Tyāa vyyu bee caya cajcuete yu' Dyus angel na'wēysaty piisarra tyaaajni ūsu', Dyusa' ayte nescu yu' jīna caajiyu'jsata'. Sa' tyāawe'sh fyuu

cu'taju jyucaty apjna ũsu', na'wẽ pcalpa'ga tajcy icjrra tyã eea's jyūna cūjrra tyaja'ty tyã'sna. Nava tyã'wẽsaty ew äate pta'shwa'l'en ji'pjmeetj ächjji yu'.

⁶Sa' tyã yatte tyã'wẽ pjeu'jni nyafyte u'cana cūunite yu' pcalsa ju'ngu we'we pu'chsawe'sha' u'cana nestyi yu', ma'wẽ yūuwa'ja'sva cytey yuuna. ⁷Nava vite ajte e'ste yu' tyãawe'sh npiitstjē'j teechrrāc u'ca', añute tee dyi'jrrāa. Sa' cytee u'catsrra', perdon pējyya' tacy eea's jyūrrac u'ca', peecy pcalpa'ga vite' nasaa pcalpa'ga jii yā'jrra. ⁸Tyã'wẽ nyafyte u'canisa Dyusna neewe'wena ũsni jīnisa' selpiina nescu yu' Dyusa's neewe'wewa'l'. Nava vite ajte Dyus yuurraa ũsni jīnite u'cawa'l' dyi'j yu' pjatemeycu yu' tyã'wẽc Dyus Espiritu' caajiyu'ju'. ⁹Quījva jyuca tyã'wẽ yūunisa' ächj naa ensuwe'sha's caajiyu'jsarrāc yu'. Cytee tajcy icjrra Dyusna wechana cambnisa' tyãawe'sh pcaltiyi cjucjya' ājawa'jsame'. ¹⁰Tyã'wẽ yūunisa' Dyus yu'ptjejpacachrrāaty selpiwa'jsa yu', tyāasaty cajcucjē āacjēwe'sha'srrāa jycaaja' ũ'nisu, tundynisu, cacuete ate fi'nzewa'l' tyã'wẽsaty.

¹¹Nava ächja' pcalsa ju'ngu we'we pu'chsa tjaacue ewsa ũytjasnisa pa'cj tyã' Cristo'. Sa' tyajy yujuni' nasaa vitnisa naa quiwetewe'shmée, cielute iimēj ewsate u'carra cytee pcalsa ju'ngu we'we pu'chna selpiina ũsa'.

¹²Sa' Cristo' Dyus yuurraa ũsnite quīj pcal yujva meetec u'ca. Nava tyã' capla ee vite' claa luuch ee tyã'wẽsaty jyūrra Dyus tashte u'came'. Tyajy ee yuunac pcawrra u'ca tee dyi'j yuurraa. Nava jyucaysa bagachterrāa yujva vitumée ewte neeyūuwa'ja's vit-ya'c tyã'wẽ yūu. ¹³Na'wẽ claa ee capla ee vite' claa luucha's altalte cambnisa cjuuts tyã'wẽsaty nasaa cacuecjē pē'tsjutste', āacjē canzh pēetjeni's yaatesaa dyijte', ¹⁴Cristo ee yu' wejy tjaacue yaateya' ājawa'jsana. Tyã'wẽ yaateya' ājacajní, Dyus Espiritu ptsuwa'l'jmeesa pu'chte Cristo' peequí ya'ducjrra quīj pcal yujva ji'pjmeec tyajy eea's pcaw pcalsa pa'gate. Tyāasa tyajy eea' cue'sh ewmée ũus yaacyni dyiitewe'sha's cjucjwa'jsa', Dyus ũtyisa's selpiiya' ājacajn.

¹⁵Dyusa' cue'shtyi nwe'wewa'ja's u'se puuty we'wec tyã'sna Jesucristo' cytey yuuna ũsa', na'wẽ nyafyte Dyus puuty we'wec tyã'sna nwēese'l'jmeerra pcalte wetetja'w tyã pcalva peltunāynic yuu Cristo uupa'ga. Tyaj Jesucristo nwe'wenisawe'sha' jypa'gaya' ājatyna Dyus jii bagachterrāa yujva ptsuwa'lsamée cue'sh jīirrarrāa yuuwa'ja's nvijtcu tyã'sna. ¹⁶Nava na'wēsa's miiyajcywe: Andy uute', andy ji'pjuni's indy uweene'nga jīna puuty we'werra etste fi'jrra nviitnisa', selpiiyujuna. ¹⁷Nava tyāl'jīna nviit-sa uuterrāa tyã etsa' selpiina. Tyāl'jīna nviit-sa uumeyte yu', tyã etsa' selpi'tsme'. ¹⁸Tyajiic Dyusa' nyafii puuty we'wena fi'jrra nviitnisa'sva ee pcawrra nvijt selpiina neeyūucajn. ¹⁹Tyā'sa' na'wēc yūu Moisesa': Nasa jyucaysaty pta'shcu ley jycaajni ma'wēteva jyuca. Tyã'wẽ yūurrac cjas bej vite' ējya cu'ta yacj claa luuch ee vite' capla eete yu' ca'ndnisate acjrra Dyus puuty we'wena fi'jrra nviitni ets cajcuesu pē'tsjuts. Sa' nasatyva jyucaysaty tyã'wēycu yūu na'l'jīna: ²⁰Dyusa' na'wẽ i'cue'shtyi jycaajna puuty we'wena

fil'jrra nvijtcu tyāa etsa' āchja' i'cue'shtyi jycaajna selpiia' ājana, ee pcawni yuupa'ga jīc. ²¹ Sa' Dyusna neewe'wena ūsni yat vite' cytee quijrraj ne'ta ūsu' tyāatyva tyā'wēycu ee yacj pē'tsjuts Moisesa'. ²² Ley we'werra': Quijñava jyuca ee yacj yuurráa yaatewa'l' yuuna, atsa' ee pcawmeete yu', pcala' peltunāynimée yuutyna jīnac jycaaja'.

Cristo uuni' pcaltyi jyuca cjucjca

²³ Tyā'wē cielute ma'wēna tyā'sna caajiyu'l'jsa naa quiwetewe'shrráa yujtyva yaatena ūswa'l' peejtyti yu', tajcy icjrra tyāa ee yacj. Atsa' cielute ūswa'lsaty yaatewa'l' yu' wejycu tjaacue ewsa peejy yu', tajcy icje'ty tyā'wēsamée. ²⁴ Cristo' naa quiwete nasaa tyaa'jnisaterráa u'came'. Tyā' cielute yuuc u'ca, sa' āchja' cytee Dyus tashte cue'sh ju'ngu we'we pu'chna ūsa', atsa' Dyusna neewe'wena ūsni yat naa quiwetewe'sha' cielute ma'wēna tyā'sna tyā'wēy piisanisarráac yu'. ²⁵ Pcalsawe'sh ju'ngu we'we pu'chsa npiitstjē'jsa' aañu isa tee dyl'jrráac u'ca', Dyus yuurráa ūsni jīnisate. Nava peecy eemée, tacy eerrá'scu jyūrra u'ca', cytee pē'tsjutsya'. Nava Cristo' uurra cujus Dyus tashte u'came'. ²⁶ Tyā'wē yūuvatsa', naa quiwe's vitiyna aañu isa uuna nesne' yuuwa'jsa yu'. Nava tyā'wē yūumée, Cristo' tee dyl'j yuurráac cluuste uuya' vyaa jyucaysa pcaltyi cjucjya'. ²⁷ Tyāa pa'gac nasatyva tee dyl'jrráa jyucaysaty uuwa'jsa vitrra tyāa e'su' ma'wēsarrava Dyus tashte paswa'l' vitni yuu, ²⁸ tyā'wēy Cristova tee dyl'j yuurráac cluuste uu maanzcuēesa pcaltyiva jyuca cjucjya'. Sa' tyāa e'su' qui' vyaana, nava pcaltyi cjucjya' qui' uuya'mée, naasáa tyā'sna ūytjassaty pe'l'na u'l'jya'rráa tyā'wē vyaana.

10 ¹ Moises leya' naasáa tjaacue ewsa vyaaya' ūsu'ty tyāaty caajiyu'l'sarráaty yu' tyā' isa ewsa yā'l' yu'tsmeeta', tyāasa na'wē Dyus tashte utyaaya' aañu isa tajcy icjna nestyi yu' tyāawe'shtyi' pcal ji'pjmeesa vit-ya' bagachterrāa yujva ājawa'jsa meec yu' leya'. ² Tyāa leya' nasaty pcal ji'pjmeesa vit-ya' ājasaavatsa', na'wē pcalpa'ga maanzcuēe usva tajcy icjna nestyi yu' tyā'wē yūuna nes yuuwa'l' peejymeene' yu'. Tyāa pa'gatey pcalpa'ga tee dyl'j tajcy icjrra cambnijūyā'l' yu', pcalsatja'w sūjwa'l' peena yu' ūusutjemeena. ³ Nava tyā'wē yūupcachte, aañu isa pcalsatja'w sūjna nescu ya'yū, ⁴ tyāa tajcy icjnisa claa ee vite' capla ee tyā'wēsa' pcaltyi cjucju'tsmeeta' naa pa'ga.

⁵ Tyāa pa'gac Cristo naa quiwete pa'ljatsrra', na'l'jina we'we Dyusa's: Tajcy icjrra cambni's jypa'gameerra, andy cacue yacj uuwa'ja'sngu vit.

⁶ Pcaltyi cjucjya' tajcy icjrra cambnisaty wecha'tsmeeng.

⁷ Tyajtj na'l'jī: Dyus, iindy jytjāasnirrā's cytey yuuya' yujtj,

Andy fi'nzewa'ja's ma'wē fil'jni ūsna tyā'sa' cytey yuuya' jīc.

⁸ Na'wē Cristo we'werra': Pcaltyi cjucjya' tajcy icjrra cambnisatyi's wecha'tsmeeng, (tyā'wē yūuwa'ja's macue ley jycaajnisateva), ⁹ tyāa pa'ga:

Dyus, iindy jytjāasnirrá's cytey yuuya' yujtj jīc Cristo'. Isa ew jiyute yu', naa tajcy icjna ūsnī's iviiturra, tyāa pa'gate vite uuwa'lsatj nviitu' jīrrane' tyā'jī'. ¹⁰Jesucristo' Dyus jytjāasni's cytey yuurra tyajy cacue's peequí ya'ducjrra cluuste uuc jyucaysa pa'gate tee dyl'jrráa. Tyāa pa'gac Dyusa' cue'shtyi's tyāa jīi vit.

¹¹Pcalsawe'sh ju'ngu we'we pu'chsa judiuwe'sha' tyā'wē yuj een isa maanzcuēe usva tajcy icjrra altalte cambna nestyi yu' jycaasewa'jmée, macue tyā'wē yūunisa' bagachte yujva pcaltyi' cjucjwa'jsameeteva.

¹²Nava Jesucristo' pcalpa'ga tee dyl'j yuurráa cluuste uuni yacjrráa jyuca jyā'jnic yuu tyāarráa bagachteva selpiwa'jsa. Tyāasac cielute Dyus pucate cach. ¹³Sa' āchja' cytee ūsa', tyā'sna atsesa jyucaysa tyā'srrarráana nwēese'jwa'ja's Dyus vitna jyā'pjcach. ¹⁴Tyāa pa'gatey tee dyl'j cluuste uuní yacjrráa jyuca jyā'jnic yuu tyajy nasa yuuwa'lsawe'sh jīi bagachteva selpiwa'jsa. ¹⁵Tyā'wē Cristo tee dyl'j cluuste uunirráa bagachteva selpiwa'jsatefirráac Dyus Espirituva na'jīna we'we:

¹⁶Tyāa en scjēwniijū' na'wē yūuya' puuty we'we'nja jī'c Dyusa':

Andy jycaajnityi's tyāawe'sh ūuste cyu'acje'je'nja pechcanacajmén.

¹⁷Sa' tyā'wē yūunijū', tyāawe'sh ewmée yūuna fi'nzeni pcaltyi's bagachterrāa yujva yajcyme'nja jī'c.

¹⁸Tyā'wē pcaltyi's jyuca peltunāynijūyā'ja', peena yu' pcalpa'ga tajcy icjrra cambna ūswa'j peejyme'.

Dyus tashte utyaawa'ja's ji'ptja'w

¹⁹Tyāa pa'ga, yacjtjē'jwe'sh, āchja' quīj pcal yujvamée Dyus yuurráa ūsnite u'cawa'ja's ji'ptja'w, tyā'wē Jesucristo' ee pcawrra ²⁰Dyus tashte u'cawa'j dyl'j u'sesa's pjaandec. Cytee Dyus ūsnite' quim yujva u'cacajmén tyundenic ūsu', nava tyāa yuuc cluuste uurra cytee tyundeni's pjaande cue'sh u'cacajn. ²¹Tyāasa Jesusa' Dyus tashte we'we pu'chna ūsa' Dyus luuch jyucaysa ju'ngu. ²²Tyāa pa'ga Cristo' pu'chyujuna sūjna ūusuj jyuca yajcyrra Dyus tashte ūucjmée utyaaga, tyāa pa'gatey Cristo' cue'sh ūuste pcaltyi' jyuca yaatec, atsa' cue'sh cacueva bautismote acjnic yuu, yuuwemeesatja'w sūjnarráa yaacycajn. ²³Āchja' Dyus tashte utyaawa'ja's jiiyā'tja'w na' Dyus yacj tyutemée tyāa yacj yuurráa chjāchja fi'nzega. Tyāa pa'gatey Dyusa' cue'shtyi bagachte yujva psumée ityi fi'nzewa'ja's ūsya' puuty we'wec tyā'sa' cytey yuuna. ²⁴Sa' ew yūuna peeygājna fi'nzewa'ja's ji'pjuya' puuty ya'pu'chjiga cyteerraj. ²⁵Vite na'wēty cue'sh pcjaacjetste pa'ja'tsmée tyā'wē yūumée, wejyva teechna na'wērraj cyteerraj puuty cchjāachja'jna fi'nzega, na'wē Cristo quīiwal'j enva utyaatsyā'ja' naa pa'ga.

²⁶Tyā'wē ewsa's āate pta'shni wala ew jiirra tyā'sa' ajtsena tyute'nja'w, atsa' tyā'wē yūusa's peena yu' peltunāywa'jmée yuuna. ²⁷Naasáa iiméj seena' ūucjūucsarráac ūytjasu', Dyus castigo ipy seena'sa jyuca

iviituwa'ljsa Dyusna atsesawe'shtyi. ²⁸Ma'wēga Moises leyrráa yujva tyā'sna nwēese'lsameetyi' e'nz meerrava tecj nasa tyā'wē yūuni's jiisaty pējyrra isa dyijte', peeygāawa'lmée icjwa'jrrá's vitu'. ²⁹Atsa' Dyus Nchi'ca's ajtserra weechina, sa' tyajy eea's pcawrra uuni'sva quíjte yujva seelpimeesa na'wē weechina, sa' tyā'wēy Dyus Espiritu peeygāasa'sva atsesa', wejy seena' castigāyini yu'nja'w sūjwa'ja's mji'pjuwe, tyā'wē Jesucristo eea' Dyus puuty we'weni's cytey yu'uwa'ja's vitwa'ljsa' tyāa eefírráa i'cue'sh pcaltiyva peltunāysa' na's tyā'wē atsepa'ga. ³⁰Dyusa' na'jīnac we'we tyā'sa' mpa'yajcywe: Andyrráa castigāywa'lsatj, tyā'sa' andy jiine'tca jī'c. Sa' qui' we'werra': Andy jype'jni nasatyi's castiga'i'nja jī'c. ³¹Tyāa pa'ga seena' yuj ūucjūucja', Dyus ūtyisa cusetē castigāywa'lj wetena pa'tje'.

³²Nava tyā'wē yūuya'mée i'cue'sha' nyafiitey fi'nzeni's miijajcywe: nyafyrraj Dyus yuwe's jypa'gatsrra', wala pytjaa yuui'cue tyacue wala tjēysa pa'tjeva. ³³Sa' i'cue'sh maáí'a' wēeshuna nasaa cshavyte pāpani i'cue yuu, atsa' viteva tyā'wēy ūussawe'sh yacj ja'ndarra'j ūussa i'cue yuu. ³⁴I'cue'sha' carcelte ūssawe'sh pa'gate peeygāawa'ja's ji'pju'i'cue, sa' i'cue'sh ji'pjunity cusa'jatste', ūusachamée wechanai'cue neeyūu. Cielute bagachterrāa yujva ptsuwa'jsamée tjaacue ewsa's jiirrai'cue tyā'wē yūu. ³⁵Tyā'wēsa's jiiyā'jrra', pechcananuwe, tyāa pa'gatey tyā'wērrāa yajcyna fi'nzepa'ga tyā'wē seena' wala ewsa's jypa'gawa'lsai'cue. ³⁶Dyus jytjāasni's cytey yuuya' ūuswa'ja's wa'lmée jypa'gawa'lj ji'pji'cue. Tyā'wē yūurra', Dyus peesni seena' wala ewsa's jypa'gane'cue. ³⁷Tyā'wēme', Dyus libroute na'wēc we'we':

Wejy jytjēyuumée dund yuj quíjjana

Tyāa quíiwa'ljsa' tyachjimeena.

³⁸Atsa' Dyusrrāana yajcyna fi'nzesa' ewte neeyūuna.

Nava tyā'wē yūumée tyuteete', tyāa yacja' wēt fi'nzeme'nja jī'c.

³⁹Nava na'wē tyuteerra vituwa'tje ūsta' tyāatewe'shmeetja'w cue'sha', wejyva cue'sh ūus vitucajmén Dyusa'srrāa yajcyna fi'nzesatewe'shtja'w.

Dyusa's ūuste yaacynisa

11 ¹Dyusa's ūuste yaacysa' yafyju āate yu' uymeerrava, ūuste yu' jiic ya'fi'nze' cytey yuuyujuna sūjna ūytjasna. ²Cue'sh yatsgawe'sha' tyā'wē yaacywa'ja's ji'pjuty, tyāasaty Dyus dyi'pte ew fi'nzesa yuu.

³Sa' cue'shva tyā'wēy yaacywa'ja's ji'ptja'w, tyāasatja'w āchj na'wē quiwe ūsa' tyā'sa' Dyusa' tyajy we'weni yacjrrāa vitne' nyafíi yu' quíjwa meeteva sūju'.

⁴Abela' tajcy icjrra cambte', Dyusa' wechayujuna sūjna ūuste jiirrac tyā'wē yūu, Cain jīite tjaacue ewsa. Atsa' tyā'wē yūunisa' Dyus yacja' ewsane' yu' naa pa'ga Dyusa' jypa'gac. Atsa' Abel yu' uuni', nava Abela' tyā'wēc Dyusa's ūuste jypumbamée yajcy jīni yu' āchpa'jva ūsa'.

⁵Enocva tyã'wê Dyusa's ùuste ew jiirra Dyus yacjrráa fi'nzepa'ga, uumey pe'l'na u'l'nic yuu cielun. Tyãa pa'ga peena yu' uymeeta', tyã'sa' Dyuscu pe'l'na u'l' tyãa pa'ga. Atsa' Dyus librute Enocja's we'werra': Nyaffi uumey Dyus yacj wechanac fi'nze' jì'c. ⁶Nava ùuste Dyusa's yuurráa yaacywa'l'ja's ji'pjmeete', Dyus yacj wechana fi'nzey'a' ya'ãja'tsme', tyãa pa'ga tyajy tashte utyaasa' Dyusa' ùsna sa' tyã'sna pacuete', nwe'wena sũjwa'l'ja's ùuste ji'pjuwa'l'ja'.

⁷Noeva tyã'wêy Dyus we'weni' cytey yuuyujuna sũjwa'l'ja's ùuste jiic yu'. Tyãasac castigo nus pa'jyujuna sũjrra Dyus jycaajni's nwêese'jrra barco's vit, tyajy yattewe'shtyi jyuca nwe'weya'. Sa' Dyusa' cytey yuuyujuna sũjwa'l'ja's ùuste ji'pjupa'ga, Dyusa' cytey yuute', naa quiwetewe'sha' ya'castigäytyi atsa' Dyusa' Noea's ewsa' jĩnac we'we.

⁸Abrahamva tyã'wêy Dyusa' cytey yuuyujuna sũjwa'l'ja's ùuste jiirrac, Dyus quiwe ùsya' pa'yate', nwêese'jrra casejna u'l', nava mtee pa'l'wa'l'ja'srráa yujva jiimeec yu'. ⁹Tyã'wê Abrahana' Dyus quiwe ùsya' neeyũune' tyã'sa' bagachterráava cytey yuuyujuna sũjwa'l'ja's ùuste jiirrac maa sũjmée tyagachjĩ yu' pa'l'ja' na'werráa tultu tyajrra fi'nzena ùsu'. Atsa' Isaac, Jacob tyãawe'shva tyãa quiwe's jypa'gawa'l'sarrava, tyã'wêyrráaty pa'l'ja' na'wê fi'nzena ùsu'. ¹⁰Tyãa pa'gatey Abrahana' cielute Dyus vitni chjamba's jypa'gawa'l'ja'scu ùytjasna ùsu', tyãasac maa sũjmée fi'nze'.

¹¹Abrahana' tyã'wê Dyus we'weni' cytey yuuyujuna sũjwa'l'ja's ji'pjupa'gac Sara' tyacue wala tjê'cjue luuch ji'pjuwa'l'samée yã'jrrava, luuch ji'pju. ¹²Tyãasac Abrahana' tyajy ji'l'j iiméj wala cuj ji'pjsa yuu, cielute estrella vite' yu'pucasu cuetmusety ma'wêga isate ya'ãja'tsmée tyã'wêc cuj ji'pju, tyacue iiméj wala tjê'cjue yã'jrrava.

¹³Na'wê Dyusna yaacysa nacue wala cuj cysustja'w tyãawe'sha' Dyus ùsya' neeyũuc tyã'sa' jypa'gamey uuty, tyãasaty e'su tyachterráava Dyusa' cytey yuuyujuna sũjna wechana yaaqui'. Sa' tyãawe'sha' naa quiwete tundtewe'shrráa ne'tca'w jĩnaty we'we. ¹⁴Tyãawe'sha' tyã'wê we'werra' ew jiyute yu', vite ajte ùsya' u'l'wa'l'ja's pacuesáa ne'ta yu'. ¹⁵Tyãawe'sha' maa quiweju yuusaarrava tyã'sna yajcyna ùsvatsa', tyãa quiwení shawendwa'l'j ne'ta yu'. ¹⁶Nava tyãawe'sh ùswal'j tjaacue ewsa's ne'ta pacuesáa yu' cielutewe'shna, tyãasaty shawendmée. Tyã'wê shawendmeeta' tyãa pa'gac Dyusa' tjaame'tsmée tyãawe'sh Dyustju jĩna ya'cysuswa'l'ja's, tyãasa tyãawe'sh ùswal'j pjeu'l'ni ji'pja'.

¹⁷Abrahana' tyajy nchi'c Isaacja's icjteva Dyusa' qui' ìtyi vituna sũjwa'l'ja's ùuste jiirrac icjya' jyũna u'l'. Dyusa' Abraham qui' yũuteva jiyuya' sũjrra tyajy nchi'c teechrráasa's icj caatjeva, wa'lmée cytey yuuya'vac yu'. Macue Dyus tyãa yacj puuty we'werra': ¹⁸Lindy ji'l'j Isaactewe'sh tyã'wê wala penatyna jĩna we'weteva, icjya'vac yu'. ¹⁹Nava Abrahana' tyajy ùuste yu' uuteva Dyusa' qui' ìtyi vituna sũjwa'l'ja's ji'pju'c.

Tyãasa isa ew yajcyte yu', Abrahan nchi'ca' uusaawe'sh cshavyu qui' ãtyi yuusãa na'wẽsa'.

²⁰ Isaacva Dyusa' cytey yuuna sũjwa'ja's ùuste ew jiirrac tyajy nchi'c Jacob Esau tyãawe'shtyi' bendicion wala jypa'gane'cue jĩna we'we.

²¹ Jacobva Dyusa' cytey yuuna sũjwa'ja's ùuste ew jiirrac uutsyã'jrra', José nchi'ctyi teeche na'wẽrraj jyucaysaty wala bendecĩni yuune'cue jĩna we'we, sa' Dyusa's neewe'wec quĩtsjurra.

²² Joseva Dyus pu'chte' Israelwe'sha' Egipto quiwejú casejetyna sũjwa'ja's ùuste ew jiirrac, uuya'vayã'jrra tyãawe'shtyi neewe'we tyajy cacue's mtee jyũna u'jrra pendaawa'ja'sva.

²³ Moises neywe'shva Dyusa' nwe'wena sũjwa'ja's ùuste ew jiirraty tecj a'te uta Moisesa's sũtj, luucha' wala zhichcue yu'ne' tyãa pa'ga. Macue Egipto quiwete jycaajsa yu' icj caatjeva icjmeeta'.

²⁴ Moisesva Dyusa' pu'chjina sũjwa'ja's ùuste ew jiirrac, Egipto quiwete jycaajsa niisa nchi'c jĩna cysusni yuuwa'j yu'sa' wa'l, walaana cãjrra'.

²⁵ Sa' naa quiwete pcalte wechana fi'nzepcachte, wejyva ùucjmée Dyus tyjityjnisa yacj ja'ndarra pcyuuni yuuwa'ja'srráac yajcy. ²⁶ Tyãa pa'gatey cielutewe'sha's jypa'gawa'ja'srráac yajcyrra fi'nzena ùsu'. Tyãasac Egipto quiwete iiméj seena' wala ji'pjuni's yaaquipcachte, Cristo na'wẽy yaatseni pcyuuni fi'nzeni's ji'pjuya'rráa yajcy. ²⁷ Dyus pu'chwa'ja's ùuste ew jiirrac Moisesa' jycaajsa ùuschani yu'sa' ùucjmée Egipto quiwejú casejna u'j, sa' Dyus tashu le'chcuerráa yujva tyuteméc fi'nze, Dyusa' vyaasameeteva yafyju uyna ùs na'wẽ yajcyna.

²⁸ Dyusa' nwe'weyujuna sũjwa'ja's ew ùuste jiirrac Moisesa' Pascua fiesta's vitrra eea's vitycjẽ shũsh caaj, icjwa'jsa angel sējrrava Israelwe'sh luuch ntjẽ'jsa maa yujtyva icjcajmen.

²⁹ Israelwe'shva Dyusa' pu'chjina sũjwa'ja's ùuste ew jii yuupa'garráac, mar bejuy uycjẽwwa'j dyi'j pjaate tyãawe'sh uycjẽwcajn. Atsa' Egiptowe'shva tyã'wẽy uycjẽu'nja'w sũjrrava tyãawe'sha' ãcjtee uuty yu' afijmbte.

³⁰ Dyusa' pu'chjina sũjwa'ja's ùuste ew jiirraty Israelwe'sha' Dyus we'weni's nwēese'jrra tyã'wẽ siete enpcach Jerico chjambte muralla peecu'j tandiyina ùsu', atsa' tyã'wẽ nwēese'pja'gac muralla' wete.

³¹ Rahabva Dyusa' nwe'weyujuna sũjwa'ja's ùuste ew jiirra, Israelwe'sh e'nzsa cytee peetjengu'jya' pal'saty ewcu jypa'ga. Tyãa pa'gac uumée, Dyusa's nwēese'jsameewe'sh vite yu' uuteva.

³² ¿Quĩj jwee yu' pta'shitca? En ji'pjvats yu' pta'shwa'j yu' walafĩrráa ùsa', Gedeon, Barac, Sansón, Jefté, David, Samuel, Dyus yuwe pta'shsawe'sh tyãawe'shtyi we'wewa'j. ³³ Tyãawe'sha' Dyusa' pu'chjina sũjwa'ja's ùuste ew jiirraty maaíi yu' guerrate puiirra cnay, vite' ewtyi jycaajna fi'nze, vite' Dyus pu'chni's jypa'gaty, vite' león yuwetyva apjityi, ³⁴ vite' seena' ipy walajuva chjavymeeta', vite' icjsa cusejuva

iyuty, vite' puiiya' chjächjameecueteva cchjächja'lnisa yuurra, guerrate iiméj cujsatyva cnaytyi. ³⁵Naapcachja' u'ywe'shva tyāawe'sh luuch uunisaty qui' ityi vitni jypa'gaty. Vite' seena' wala pcyuuni yuurra uuty, qui' ityi yuuwa'ja's ji'pjurra tjaacue ewte fi'nzeyā' sūjrra, nwe'wewa'j yu'sa' jytjāasmeeta'. ³⁶Naapcachja' vite' weechna pechujcuerra tsam cadenaju tundrra carcelte tyaa'jnity yuu. ³⁷Vite' cuet wāata'atjrra icjnity yuu. Maafi yu' pyājsu pētsnity yuu. Vite' iiméj seena' wala cyūusu'jni yuuty. Vite' cchilluj icjnity yuu, naapcachja' vite' ajtserra neeuni yat ji'pjmeety pecūjnarrāa ūsu', qui'jva ji'pjmeerra piishāa cja'ty capla cja'ty tyā'wēsarrā's pā'chrā, ñuste pcyuunity fi'nzena ūsu'. ³⁸Tyā'wē pcyuunisawe'sha' nasa u'pnimée quiwesurrāaty fi'nzena ūsu' yu'cjsu, quiwe cafysu. (Nasa tyā'wē Dyus yacj zhichcue fi'nzena yacja' naa quiwe' ūswechte yuuva meena.) ³⁹Dyusa' pu'chjina sūjwa'ja's ūuste ew jiirra tyāawe'sh jyucaysa tyā'wē seena' yūuni yuurrava, Dyus ūsya' neeyūuc tyāa yu'sa' tyagachji' yu' jypa'gameeta', ⁴⁰tyāa pa'gatey Dyusa' tjaacue ewsane' ji'pju' āchj naa ensu cue'sh jii yā'jrra. Atsa' tyāawe'sha' cue'sh yacj ja'ndarra'j jypa'gawa'jsarraty tyagachji' yu' jypa'gamée.

Jesucristo yuurrá's yajcyna fi'nzega

12 ¹Dyusa' pu'chjina sūjwa'ja's ūuste yaacysawe'sh nacue wala cuj ūsta' atsa' cue'sha' tyāawe'sh cshavyte ūstja'w. Tyāa pa'ga pcal caypumba'jwa'jsa's nvijtna, qui'jva Dyus yacj fi'nzewa'ja's suwwa'jsa yu'sa' jyuca nvijtrra, macue tjēyteva Dyus yacj yuurráa fi'nzega, uu entepcach. ²Jesucristo yuurrá's pu'vitumée yajcyna fi'nzega, tyāa pa'gatey tyāa yuurráac Dyusa' pu'chjina sūjwa'ja's ūsu', sa' tyāa yuurráac Dyusna yaacyni jyuca cytey yuuna pa'pjcach pu'chji'. Tyā'wē yūuya'c Jesusa' tjaamewa'j yu'sa' yajcymée cluuste uu, tyacue wala ñusñusteva. Tyāa pa'gatey pytjaa yuuni en scjēwniijū' wēt wechana ūswa'ja's jiic yu', tyāasac cielute Dyus ūsni pucate cach.

³Jesusa' nacue wala pytjaa yuuc pcalsawe'sh cusete tyā'sna i'cue'sha' yajcyrra tyāa na'wēy ñuswa'j en pa'tjeva Dyus tashu tyutemée mfi'nzewe. ⁴I'cue'sha' pcal's nvijtrra Dyus yacj fi'nzepa'ga iiméj seena' ñusñus uuwa'j yu'sa' ji'pjumey i'cue. ⁵Sa' tyacue dund yu' pechcanawa'jmeena Dyusa' tyajy luuchtyi's na'wēc yu'cypeje' tyā'sna:

Dyus yu'cypejna castigāyni's atsenu, andy nchi'c,
Sa' juuna' we'wete', ñusna ūuschanu.

⁶Tyāa pa'gatey Dyusa' tyajy peeygāanisatyi's yu'cypeje'c ew fi'nzecaj,

Sa' tyajy luuch yuutyi's jyucaysatycu castigāi' jī'c Dyus libroute'.

⁷I'cue'sha' castigāyni's mwantaīwe, tyāa pa'gatey Dyusa' i'cue'shtyi' tyajy luuch na'wēc jype'je'. Miiyajcywe: ¿Maa luuchrrá' ney yu'cypejna castigāynimeesa ūstymañ? ⁸Dyusa' tyajy luuch yuutyi's jyucaysatycu

yu'cypejna castigaĩ', nava i'cue'sha' yu'cypejna castigāynimeesa yuurra', tyajy luuchmée vitesate luuchrra tyā'wē yuune'cue. ⁹Cue'sh le'chcuēyte', naa quiwete cue'sh tata yu'cypejte', cytey nwēese'je'tja'w na' āchja' wejy tjaacue ew nwēese'jwa'j ji'ptja'w cue'sh Tata cielutewe'sha's. Tyā'wē nwēese'jrra', ptsumée ityi fi'nzewa'ja's ji'pju'nja'w. ¹⁰Naa quiwete cue'sh tatawe'sha' tyāawe'sh ūuste ma'wēne' wejy ew ūusutje' yu'cypejna jype'jwa'ja's tyā'wētyi yūuna jype'je', naa quiwete tyachmée fi'nzewa'ja'srráava. Nava Dyusa' cue'shtyi iiméj wala selpiwa'ja's caapiya'jnac yu'cypeje', tyāava ma'wē pcal ji'pjmeena tyā'wēy yuucajn. ¹¹Āchj castigāy ína yu' wala yuj acata', tyāa pa'gatja'w jypa'gaya' wa'lu'. Nava tyāa castigo's jypa'garra ew fi'nzeya' piyate', wala yuj ewsa', jypumbamée wechanac ya'fi'nze' naa pa'ga.

Dyus we'weni's weechya'mée mpa'yajcywe

¹²Tyāa pa'ga wa'lmée chjāchja miiyajcywe, ewmeete fi'nzena ūsrrava tyāajū mcaasejwe. ¹³Tyā'wē yūurra', dyi'j ewsaju peena yu' jypumbameene'cue.

¹⁴Jyucaysa yacj ew fi'nzewa'jrrá's pa'pchuna meswe, pcalte fi'nzemée. Tyā'wē pcalte fi'nzerra', quim yujva Dyusa's uyya' ājameena. ¹⁵Dyus peeygājrra nwe'wenijüyā'ja', wala mpa'yajcywe. Tyā'wē jypa'yajcyrra yuurráa i'cue'sh maa yujva tyā'wē vitesaty caypumba'jna ewmée yūusa yuumeene'cue. ¹⁶Tyā'wēme', maafi yu' ptammeesa canzh pcal yūuna fi'nzesa vāa yuune'cue quijva ewsa's weechna ajtsena. Miiyajcywe Esaua' tyā'wēc ewsa's weechsa yuu, teech ū' plaatu pa'garráa peecy wēt fi'nzewa'ja's tyweycu. ¹⁷I'cue'sha' peecy jiine'cue Esaua' tyā'wē yūuni e'su' ney bendiciona's qui' jypa'ga wēc, nava ūsnimeec yuu. Atsa' wala ūusna ū'nec, nava tyajy tyweyni's ma'wē yūurra yujva qui' caashwendu'jni yuume'.

¹⁸Israelwe'sha' Sinaí tjā'j vitste utyaaty cyte' ipy yuurráac seena' bejna ūsu', sa' seena' yuj wala ūucjūucj chji'ndyna ūsu'c cpi'sh we'weni na'wē susna. ¹⁹Sa' corneta susni vite' tyāawe'shtyi jycaajna we'weni's wala ūucjrra jwee yu' we'we caajmeeta'. ²⁰Tyāa jycaajni' na'wēc yu': Maava naa tjā'tje teech chindarráava tyajana tyā'sa' cuet wāatatajrra meerrava we'tju yājarra icjwa'j yuuna, quij tajcy ma'c yuu nava ji'c. ²¹Seena' yuj ūucjūucsarráa vyaana ūsu'c, tyajírráac Moises yujva na'jī: Ūucjnite yayanarráa ūstju jī'c.

²²Nava i'cue'sha' tyā'wēsaterráamée tjaacue seena'sa tashte utyasáa i'cue: Teech tjā'j Sion yaasesate Dyus ityisa ūsnite, cielute Jerusalen chjambte, angeleswe'sh iiméj seena' cujsa pcjaacjerra Dyusa's tuutje'jsawe'sh tashte, ²³Dyus luuch cielutewe'sh tashte, Dyus nwe'wenisawe'sh tashte, Dyus seena' juuna' jyucaysaty jycaajsa tashte, ²⁴Dyus u'se puuty we'werra nviitni's cytey cyū'ju'jwa'jsa Jesus tashte,

Abel ee na'wēsamée Jesus ee pcawnisa' tjaacue ewsate tyā'wēsa tashte utyasáa i'cue.

²⁵Tyāa pa'ga wala mpa'yajcywe, cue'shtyi we'wesa cielujuwe'sha's weechya'mée. Miiyajcywe, Dyus jycaajna we'weni Sinaíjūwe'shrrá's weechrrava iyumeeta', atsa' cue'sha' wejy iyuya' ājame'nja'w, cielujū yuu we'weni's nwēese'jya' wa'llra'. ²⁶Dyus Sinaí tjā'j vitste we'weni' naa quiwe's quēese'cj. Nava āchja' tyā'wērráamée na'jī'c: Qui' peena tjaacue quēese'je'nja nava quiwerrá'smée, pety cielu yā'jrra quēese'je'nja jī'c. ²⁷Isa ew jiyute yu', qui' peena tjaacue quēese'je'nja jīrra', Dyus vitnisa ēsesa yu' jyuca ūshityna, atsa' ēsesaméerráa neeyūutyna jīrrane' tyā'jī'. ²⁸Nava Dyus tashte cue'sh ūswa'j yu' quēese'jnimée yuuna. Tyāa pa'ga Dyusa's wechana neewe'wega, tyajy dyi'pte ew yuurráa yūuna. ²⁹Tyā'wēme', cue'sh Dyusa' jyuca iviituwa'jsa' ipy na'wēsa.

Dyusa's na'wē wechana fi'nzewa'ja'

13 ¹Teechsa na'wērraj puuty peeygājna fi'nzewa'ja's pechcananuwe. ²I'cue'sh yat-su pa'jsaty wechana mpa'gawe. Tyā'wē yūusa' maa'ía' angeleswe'sh yujtyva jiyunimeete jypa'ga'ta.

³Preesu ūssaty peeygājna mfi'nzewe, i'cue'sh yuu preesu ūssa na'wē yajcyna. Pcyuuni fi'nzesatyva peeygājna mfi'nzewe, cue'shva cacue ji'ptja'w na' naa quiwete tyā'wēy pcyuuni yuuwa'jsatja'w sūjna miiyajcywe.

⁴Cambarra fi'nzeni' wala yuj ewsa', tyāa pa'ga cambamey yu' pcal yūunuwe. Sa' cambayā'jrra', vitesa yacj pcal yūuna fi'nzewa'jme'. Tyā'wēme', Dyusa' castigaína tyā'wē pcal yūusaty'!

⁵Vyurrá's yajcyna fi'nzewa'jme'. Ma'wēcuē ji'pjuni yacjrráava wēt mfi'nzewe, tyāa pa'gatey Dyus we'werra': Bagachte yujva i'cue'shrráa yuutyi'sa' nvijtme'nja jī'c. ⁶Tyāa pa'ga tyāa yuurrá's pi'quiga, cytey pasyujuna sūjna na'jīna:

Dyusa' quījteva jyuca tyāa yuurráac pu'chji',

Tyāa pa'ga wej yujva ūucjme'nja naa quiwete nasa ewmée yūusaty'!

⁷Dyus yuwe pta'shsa i'cue'shtyi jype'jsaty miiyajcywe: Tyāawe'sh ma'wē ne'ta Dyusa's yajcyna fi'nze tyā'wēy mfi'nzewe.

⁸Jesucristo' bagachte yujva yu'ptjejsame'. Nyaffiiva ma'wēsaga yu', sa' āchva tyāáírrá', sa' bagachteva tyāáírráa nes yuuwa'jsa'. ⁹Tyāa pa'ga i'cue'sha' fiy caapiya'jni's nwēese'jna fi'nzenuwe, wejyva Dyus peeygāanirrás ūuste jypa'garra chjāchja fi'nzeni ewsa', atsa' ū'nisu jycaajnis' bagachte yujva selpiwa'jsame' tyā'wēsaty nwēese'jsawe'shtyi's.

¹⁰I'cue'sha' ew miiyajcywe altal ji'ptja'w tyā'sa'. Tyāa altaltewe'sha's ū'we'tsmeeta' cytee selpisaawe'sha'. ¹¹Pcalsawe'sh ju'ngu we'we pu'chsa judiu' tajcy icjnisa eea's Dyus yuurráa ūsni jīnitec tyajya' jyūna u'jue' jyucaysa pcaltyi peltunāyni yuucajn, nava tacy cacue yuutyi'sa' tyajū

jiyūna u'jrra ecajuty cambu'. ¹² Jesusva tyā'wēycu chjamb ecaju casejrra uuna ūsu', tyajy eeu nasaa pcaltyi' jyuca peltunāyya'. ¹³ Tyāa pa'ga cue'shva Dyusna neewe'wena ūsni yat nyafiwe'sha's nvijrra, Jesus yacj fi'nzeyā' casejega, tyāava ma'wēga pytjaa yuu tyā'wēy yaatseni yuuya'. ¹⁴ Cue'sha' nyafii ūsni yata's nvijrra, chjamb bagachte yujva ptsuwa'lsamée ūsna tyā'sna pacuena ūstja'w, naa quiwete' bagachte yujva ptsuwa'lsamée chjamb ji'pjmeetja'w naa pa'ga. ¹⁵ Tyāa pa'ga Dyusa's tuutje'jna nes yuuwa'j ji'ptja'w Jesucristo's pi'cyrra bagachteva. Dyusa's wechana tajcy icjrra cambupcachte, cue'sh ūusuj jyuca yajcyrra tyajy yase's cysusna wechana nes yuuwa'j ji'ptja'w. ¹⁶ Tyā'wē yūusa' quijrrāava i'cue'sh ji'pjuni's vitesaty jytyujndena fi'nzewa'ja's pechcananuwe, tyāa pa'gatey tyā'wē yūuni'scu Dyusa' wechā'.

¹⁷ Sa' i'cue'shtyi caapiya'jna jype'jsatyi's cytey yuuna mwēese'jwe, tyāa pa'gatey tyāawe'sha' i'cue'sh ūustyi vītuwe'shte tjengsata'. Tyāawe'sha' cielute Dyus tashte utyaarra pta'shwa'j ji'pjta', tyāasaty tyā'wē yū'. Atsa' tyāawe'sh mjiini's weechsa na'wē yuunuwe, ewrrāa yūuwa'ja's mpa'pchuwe. Tyā'wē yūumeete', tyāawe'sh mjiini' i'cue'shtyi's quijte yujva selpiimeena.

¹⁸ Quijteva ewrrāa fi'nze wēerra bagachte yujva pcalte yu' fi'nzesameetja'w, naa pa'ga cue'sh pa'gate Dyus yacj mpuutywe'wewe. ¹⁹ I'cue'shtyi's Dyus yacj puuty we'we jypi'qui'tj, cyaj Dyusa' andya's tyachmeyna qui' caashwendu'juna i'cue'sh yacj ūsya'.

Yuwe wechaa caajni

²⁰ Jesucristo' iiměj ew tyajy nasaty jype'jsa yu'c, tyajy eec tyā'wē u'se puuty we'weni bagachte yujva yu'ptjejwa'jme's vitrra nviitni's cytey cyū'ju'jwa'jsa yuu. ²¹ Sa' Jesucristo uuteva qui' ityi vit-sa Dyusa' i'cue'shtyi's quijte yujva peejymée ewrrāa caafi'nze'jena, tyajy jytjāasni's cytey yuucajn. Sa' tyā' i'cue'shtyi ma'wē yuuwechteva cytey yuuna, Jesucristo pu'chte tyajy dyi'pte ew yūusa yu's. Jesucristo yuurraa bagachteva jytujtjesa yuuna.

²² Yacjtjē'jwe'shtyi neewe'we'tj, wa'lmée jypa'gacajn manz yuwe jyu'jmeecuē yu'cypejna fi'jni's. ²³ Sa' pta'shitstju cue'sh yacjtjē'j Timoteo' carceluj tyjweteni yā'j ūsa', sa' dund vāa pa'jana, atsa' pe'jrra yuwe'nja i'cue'shtyi puuty uyya' yujrra'.

²⁴ Dyuus yatte i'cue'shtyi jype'jsawe'shtyi' jyucaysaty yuwe meen wechawe, sa' Dyus yacj fi'nzesawe'shtyiiva tyā'wēy. Italiajūwe'shva yuwe wechaa caja'ty.

²⁵ I'cue'sh jyucaysaty Dyusa' pu'chna nes yuuna.

SANTIAGO CARTA

Israel ji'j mteeva jyuca ùssaty Santiago fi'jni

1 ¹ Israel nasa doce ji'jsa naa quiwete msuuva jyuca ùssaty wechana fi'jatstju Jesucristo vite' Dyusna selpisáa Santiago yaasesa.

Dyus yacj shiingmée fi'nzewa'ja's Dyus íírráac caajiyu'ju'

² Andy yacjtjē'jwe'sh, ñusmée meswe wechwecha yajcyna ma'wēsava tjēysa vyaateva. ³ Mjiyuwe: Dyusa's jweeíírráa chjāchja yajcyya' piyacajníírráac tyā'wē tjēysa' vya'. ⁴ Atsa' tjēysa vyaateva ùucjnuwe, tyāa tjēysa' i'cue'sh quíjte yujva shiingmée jyuca Dyus yacj chjāchja fi'nzewa'ja's caapiya'jsa'.

⁵ Maava Dyus yacj fi'nzewa'ja's shiinguutsrra', Dyusa'síírráa mpējywe, atsa' tyā' wa'lmée maatyva jyuca caajiyu'juna i'cue'sh pēynite tjaacue. ⁶ Nava cuj jwend yajcymée ūsyujuna sūjna yuurráa mpējywe. Tyā'wēme', cuj jwend yaacysa' tee jwendterráa ūsmée ícj wala's wejyaa quēese'jni na'wē yuutyna. ⁷ Atsa' tyā'wē tee jwendrráa yaacysame' Dyusa' ūsuna sūjwa'j ji'pjme'. ⁸ Maava Dyusa' pasmée váanacy sūjna e'nz jwend yajcyna pēysa' bagachte yujva Dyus yacjrráa fi'nzeya' yu' ājameena.

⁹ Maa yacjtjē'jva quíjva ji'pjmeesarrava wechwecha yajcyna fi'nzewa'j ji'pja', Dyusa' pu'chjina sūjna. ¹⁰ Atsa' tyā'wēy ji'pjsava tyajy ji'pjuni ptsuwa'j en pa'tjeva, wētwtē yaacywa'j ji'pja', tyāa pa'gatey naa quiwete ji'pjsa' quiteva ma'wēga tyachmeyna undyi' tyā'wēysarrá'. ¹¹ Sec achaate', jyūtj tasha' undyi'c, naapcachja' quiteva umbu'c, atsa' zhichcuesa' cytee ptsu'c. Tyā'wēy naa quiwete ji'pjsava tyajy ji'pjuni yacj ptsuwa'jsarrá'.

Ewmée yūuya' yaacynisa's Dyusa' ūsu'tsme'

¹² Ewmeete cweete'jwa'jsa vyaateva, tyā'sa' nwēese'jsame' wala yuj wētwtē yaacywa'j ji'pja'. Tyāa pa'gatey tyā'wē yūusa' bagachte yujva ptsumée ĩtyi fi'nzewa'ja's Dyus ūsya' neeyūuc tyā'sa' jypa'gawa'jsa' Dyusna nwēese'pja'ga. ¹³ Maava ewmeete weterra', Dyus ne' tyā'wēte wetewa'ja's vit sūjwa'jme'. Dyusa' ewmeete wetewa'ja's bagachte yujva ūsmeena. Tyā' ewmée yūusame'. ¹⁴ Wejyva peecy ūus ewmée yaacyni's

nwēese'pja'garráaty ewmeete wetena pa'ja'. ¹⁵Na'wē ewmēe ūus yaacynic pcalte cweete'je', atsa' tyāa pcalcu jweefírráa walaana u'jrra nmejte' uuwa'jrráa vitna pa'ja'.

¹⁶Yacjtjē'jwe'sh mjiyuwe: ¹⁷Na'wē Dyusa' cielute eena' cweetjsaty jyuca vitcu sa' tyā' āchpcach le'chcuerráa yujva yu'ptjejmēe ūsa', atsa' tyajy tashurrarráa yuusata' quíjva ewsa yu' jyuca. ¹⁸Tyāac cue'shtyi peeygājrra tyajy yuwe isasa's pta'shrra ewte fi'nzewa'ja's ūs, cue'sh nyafyte tyāa yacj utyasáa yuucajn.

Dyus yuwe ma'wē jycaatje' cytey yuusaarráa Dyus yacj fi'nzesa'

¹⁹Tyāa pa'ga andy yacjtjē'jwe'sh quíjva pta'shni ewsa yu'sa' bagachteva wa'lmēe jypa'gaya'rráa meswe. Nava we'wewa'j yu'sa' ūus yajcyrra jypa'yajcy mwe'wewe, sa' ūuschawa'j yu'sa' wejy wala mpa'yajcywe.

²⁰Tyā'wēme', ūuschanisa' Dyus dyi'pte ewmeesa', atsa' Dyusa' tyā'wēsa's jypa'ga'tsme'. ²¹Tyāa pa'ga quíjva ewmeesa nacue wala pejnaya' dunda' tyāa yu'sa' jyuca nvijtrra, Dyus yuwe ewsa pta'shni yuuc tyā'srráana wa'lmēe ūuste myu'acjwe. Dyus pta'shni' i'cue'sh ūusa's nwe'weya' ājawa'jsa'.

²²Nava Dyus yuwe ma'wē jycaatje' tyā'sa' cytey myuuwe. Wēse'jsarráa yu' yuunuwe. I'cue'sha' jypumbanuwe. Ī'neerráa wēse'jnisa' cyulsa'.

²³Maava tyā'wē Dyus pta'shni's cytey yuumēe ĩ'neerráa wēse'jsa', peecy dyi'pa's speejute tjengrra ²⁴cjūchte uyrrava tyāa dundtey cjucjmēe u'jyā'jrra' ma'wē pechcanacy tyā'wēysa'. ²⁵Nava wēse'jrra pechcanamēe, Dyus ley ewte nviit-sa jycaajni's cytey nwēese'jsa', jypumbamēe wēt fi'nzena Dyus jycaajni's nwēese'jna.

²⁶Maava Dyus dyi'pte ewsatj sūjrrava ma'wēwa we'weni's jypa'yacymeerra', peequírráa jypumbasáa yuuna. Atsa' Dyus dyi'pte ew fi'nzesatj sūjni' cyul yuj yuuna. ²⁷Dyus dyi'pte quíjte yujva jypumbamēe ew fi'nzesa' na'wē yūuwa'ja': Nmi' ji'pjmēe puuplesaty pu'chna ūuste fi'nzesaty cviisha'jna luuch wacchajtyva tyā'wēy yūuwa'ja', sa' naa quiwete ewmeesa peecy ūuste cjēewe'shte wala jypa'yacywa'ja'.

Nasa ma'wēsatyva tyāa na'wērrarráa ew yūuwa'ja'

2 ¹Andy yacjtjē'jwe'sh i'cue'sha' Jesucristo tyacue ewsana ūuste jypa'gayā'jrra', nasa maatyva puuty ja'ndarraj tyāa na'wērrarráa ew yūuwa'j ji'pji'cue. ²Meerrava na'wē vāa yuune'cue: I'cue'sh pcjaacjeni yatte teech pitstjē'j ropa wala ewsa atjrra, vyuu bee sultyjicja paatrra u'cana, naapcachja' viteva pa'jana quíjva ji'pjmēe ropa iishcuesa atjrra. ³Atsa' tyāa ropa ewsa ĩjyūusa's ew jypa'garra cachni ewsate cach cajane'cue. Nava quíjva ji'pjmēe pytjaacuēesa's yu': Ayte myuju meerra' cytee quiwete mcaach jīne'cue. ⁴Tyā'wē yūurra', puuty ja'ndarraj tyāa na'wērrarráa ew yūusamēe, vite yu'sa' atseyaacysarra tyā'wē yuune'cue.

⁵Andy yacjtjê'jwe'sh ew mwêese'jwe: Naa quiwete macue quíjva jì'pjmée pytjaacuéesarrava tyāawe'sha' Dyusa's yu' ma'wērráa yujva pechcanamée ūuste yajcyna fi'nzerra Dyus jycaajna ūsnitewe'sha's Dyusí ūsya' neeyūuc Dyusna yaacysatyì' tyā'sna jypa'gawa'jsata'. ⁶Tyā'wēteva, i'cue'sh yu' tyāa jì'pjmée pytjaacuéesatyì' weechrra jì'pjsarráaty i'cue ew we'we'. Nava jì'pjsaírráa i'cue'shtyi pcyuurra ¿cjuēs tashsu cuutya'jsamée váatyna? ⁷Tyāawe'shírráa Cristo yase's ¿atsewe'wesamée váatyna?

⁸Dyus ley maateva tjaacuesa we'werra': Vite nasatyva peeygāawa'ja' indy ma'wēnga ya'peeygāja' tyā'wēyrráa jì'c. Atsa' tyā'sa' cytey nwēese'jna fi'nzerra', ewsarraj tyā'wē yuune'cue. ⁹Nava maatyva jyuca tyāa na'wērrarráa ew yūumeerra', pcalte weteene'cue, sa' Dyus jycaajni leya's yuuwesa yuune'cue, leya's jyuca nwēese'pja'gamée. ¹⁰Maava Dyus jycaajni leya's ew yuj nwēese'jrrava teech ajte le'chcuērráava jypumbaana atsa' tyāa pa'garráa Dyus jycaajni ley macueteva jyucac yuuwesa yu'. ¹¹Miiyajcywe vacy Dyus leya' na'wēc we'we': Ptamsayā'ja' vitesa yacj pcal yuuwa'jme' jì'c. Sa' nasanava icjwa'jme' jīnac jycaaja'. Tyā'wē yā'tje', nasa yu's icjmeerrava, vitesa yacj yu' pcal yuuváana atsa' tyāa pa'garráa Dyus jycaajni ley macueteva jyuca nwēese'jsamée yuuna. ¹²Tyāa pa'ga i'cue'sha' we'wewa'j ma'c yuu, meerra' ūus yaacyni yacjrráa ma'c yuu, nava wala jypa'yacymeete', i'cue'shtyi nwe'wesa leya' castigaína. ¹³Vitety peeygājmée fi'nzesatyì' tyā'wēy Dyusva tyāawe'shtyi' peeygājmée castigaína. Nava vitety peeygājna fi'nzesatyì' Dyusva peeygājrra castigaímeena.

Dyusa's yaacysatj jīsa' āate caavya'ja'jwa'ja'

¹⁴Andy yacjtjê'jwe'sh miiyajcywe: Maava Dyus yacj fi'nzesatj jīrrava ew yūuna fi'nzeni yacj caavya'ja'jmeete', tyā'wē yuwejurráa we'wenírráa ¿seelpimañ? ¹⁵Na'wē ūus yaaquiga: Maa yacjtjê'jva ropa jì'pjmée tyā'wēy ū'wa'jva peejysa ūsuna, ¹⁶atsa' tyā'wēsa's i'cue'sha' uyrra': Pytjaanga yuuna fi'nze'. Nava āchja' wēemée cumamée ew mfi'nze jīrrava, tyajy cacuete peejini's quíjrráava caatu'jmeerra yuwejurráa tyā'jīni' ¿quíjrrá' selpiima'c? ¹⁷Tyā'wē Dyus yacj fi'nzesatj jīsa' āate caavya'ja'jwa'ja'. Tyā'wēme', yuwejurráa tyā'jīnisa' cyul yuja'.

¹⁸Nava na'jīváatyna: Indya' Dyus yacj fi'nzesarra', ¿ma'wē caajiyu'juqui'ng Dyus yacj yuj fi'nzesan sūjcajn? Atsa' quíjva yūumeerrava mcaajiyu'j aan ājane'nga. Atsa' andya' ew yūuna pu'chnisa yacjrráa Dyus yacj fi'nzeni's āate caavya'ja'jya' āja'nja jītya. ¹⁹Indya' teech Dyusrráa cielute ūsteva tyā'sa' ew jiine'nga ūuste. Tyā'wē yūuni' ew yuja'. Nava echtjê'jva Dyus ūste ew jiita' indy na'wēy. Tyā'wērra'fity ūucjna yaya'. ²⁰¿Ma'wētenga jiyu'tsmée? Yuwejurráa Dyus yacj fi'nzesatj jīni' cyul yuj yuuna, Dyus yacj fi'nzeni's āate caavya'ja'jmeete yu'. ²¹Cue'sh yatsgatjê'j Abrahana' Dyusna yaacyni's āate caavya'ja'jna tyajy nchi'c Isaacja's

altalte icjya'vac yu'. Tyā'wē Dyusna yaacyni's āate caavya'ja'pja'ga, Abrahana's Dyusa' yuuwemeesac vit. ²²Āchja' ħjiyungá'? Abrahana' āate caavya'ja'cj Dyusna yaacyni's sa' yuwejurráa Dyusna yaaqui'tj jímée, Dyusa's ūusuj jyuca yajcyrra āate caavya'ja'cj. ²³Abrahana' Dyusa's ūusuj jyuca yajcyrra cytey yuupa'ga, Dyus librute na'wēc fi'jni neeyūu: Abrahana' Dyus dyi'pte ewtec neeyūu jīna. Sa' tyā'wēy Abrahana' Dyus namicu' jīnic neeyūu.

²⁴Āchja' jiyui'cue, yuwejurráa Dyusa's yaaqui'tj jímée, Dyusna yaaquitsrra' āate caavya'ja'jwa'ja'. ²⁵U'y canzh yuusáa Rahabva Dyusna yaacyni's āate caavya'ja'cj na'wē yūuna: Tyajy yatte pitstjē'j peetjengu'na pa'jsaty jypa'garra', tyāa pitstjē'jty nwe'werra vītee dyi'jsuc caaj tyāa u'ya'. Atsa' tyā'wē ew yūupa'ga tyā'sa' Dyus dyi'pte ewtec neeyūu. ²⁶Cue'sh cacueva ma'wēga ūus ji'pimeerra' uuní yu', tyā'wēy Dyusna yaaqui'tj jīnisa' seelpimeesa', ew yūuna pu'chnisa yacj āate caavya'ja'jmeete yu'.

Cue'sh tjune' na'wēsa'

3 ¹Andy yacjtjē'jwe'sh, maava jyuca caapiya'jsarra' jiisatja'w sūjrra nuywe'wenuwe. Caapiya'jsarrava jypa'yajcy mfi'nzewe. Tyā'wēme', caapiya'jsafírráa tjaacue yuuwesa yu'nja'w. ²Maa yujva jiisa yu' meetja'w. Tyāasa íitja'w quíjteva jyuca jypumba'. Nava maava tyajy we'weni's jypa'yacyya' ājana tyā' ewsarraj tyā'wē yuuna. Sa' tyā'wē yūurra', tyajy cacue'sva jyuca neeweya' ājana. ³Nwēese'cjantja'w jimba yuwete frenu paatje', atsa' tyā'wē yūurra' jimba cacue's ewsu caajya' āja'tja'w. ⁴Mjiyuwe, barco tyacue seena' walasa's wejya wala fiisu jyūna u'jutsteva, barco's caajsa' timon le'chcuesajurráa tupjyna cu'lec caja'. Atsa' barco tyacue seena' walasarrava nwēese'je'c ma'wē caatjeva. ⁵Tyā'wēy cue'sh cacuete tjune wala le'chcuēesa ji'ptja'w, nava seena' yuj walasa na'wē we'weya' chjāchja'. Tyā'wēy ipy macue le'chcuēesarrava, yu'cj macue seena' walateva jyuca cambuna. ⁶Cue'sh tjuneva ipy na'wēsarrá', cue'sh cacue's jyuca suwrra naa quiweteva jyuca āawa'jsa's cue'sh cacuete qui'pni ji'ptja'w. Bagachte yujva ūchjamée infiernote ipy na'wēsa'. ⁷Yu'cj niimal vite' ēega fyusaa vite' yu'gawe'sh ech ma'wē seena' juuna'satyva nasa' caastyaja'jya' āja'ty. ⁸Nava tjune yu'sa' quim yujva caastyaja'jya' āja'tsmeeta'. Tyā' veneno icjsa', tyāa pa'ga caastyaja'jya' ya'āja'tsme'. ⁹Tyāa tjuneju Dyus cue'sh Tatanava wechana tuutje'je'tja'w, sa' tyāa tjunejuyrráa nasatyva wēeshuna ewmée atsewe'we'tja'w Dyus taqui'jrra nviitnisaty. ¹⁰Andy yacjtjē'jwe'sh, tyā'wē yu' tyāa yuwejuyrráa Dyusna tuutje'jna qui' atsewe'wena yu'wawa'jme'. ¹¹Teech yu'ítsterráa yu' shūusa casejna qui' yu' yaasava ħcasejma'c? ¹²Andy yacjtjē'jwe'sh, miiyajcywe: Shlala tasha' ħujtse yūnya' ājama'c? Atsa' utse tasha' ħshlala yūnya' ājama'c? Tyā'wēy teech yu'ítsterráa yu' e'nz jwend casejya' āja'tsme'.

Na'wē yuunisarráa quĩjteva wala jiisa yuunisa'

¹³ I'cue'sh cshavyte quĩjteva wala jiisa ũsrra', quĩjteva puimée zhichcue fi'nzewa'ja's mcaavya'ja'jwe. Tyā'wē wala jiisa' quĩjteva juuna' iwejch yajcyna fi'nzewa'jme'. ¹⁴ Nava i'cue'sh ũuste ewmée yajcyrra pui'nja sũjna yaacysa' tyā'wē wala jiitj sũjna iwejch yaacywa'j ji'pjme'. Tyā'wē yaacysa' quĩjte yujva jiimeesa ũshiisa yuuna. ¹⁵ Tyā'wē ewmée yũuwa'jrráa ũsutjenisa' Dyus caaũsutje'jnime'. Naa quiwetewe'sh peecy i'cue'sh ũus yaacynisarrá' echtjē'j caaũsutje'jnisa. ¹⁶ Mteeva iwejch yaacywa'j casejni'j puiiwa'jrráac vya'. Atsa' tyajũyā'j yu' jyuca suweena ewmeesarrarráac caseje'. ¹⁷ Nava Dyus caaũsutje'jni's ji'pjsa' quĩjteva pcal yuumée fi'nzena, ewrráa yũuna, puimée nasaty peeygājna, ũshiimée isa we'wena. ¹⁸ Atsa' puimée ewrráa yũuna fi'nzewa'ja's pa'pchusa' ew wēt fi'nzewa'ja's uyuuna.

Naa quiwetewe'sha's selpiite, na'wēc ya'yu'

4 ¹ I'cue'sh pwe'sh puui jypacuena fi'nzeni' ħmajũga caseje'? I'cue'sh ũusujc caseje', ewmée yũuwa'ja's yaacypa'ga. ² Vitee ji'pjunity iiyamu wēerrava ājameerra', icjya'rráa i'cue yaaqui'. Vite nasa quijrráava ji'pjte', tyā'sna cusa'jya' ājameerra', puiiya'rráa i'cue pa'pchu'. I'cue'sh peejinis Dyusna pējymeerra i'cue uyya' āja'tsmée. ³ Pējyrrava, jypa'gaya' yu' āja'tsmée i'cue, tyā'wē ewmeete cseelpi'jya'rráa pēypa'ga. ⁴ Dyus yacj wej yujva ewmée fi'nzesa mwēese'jwe: Naa quiwetewe'sha's selpiina fi'nzesa' Dyus yacj puinisate jiimeevá'cue. Maava naa quiwetewe'sh yacjrráa wēt fi'nzeya' yaacysa' Dyus yacj puisac yu'. ⁵ Tyā'wēteva, cue'sh ũuste nviitnisa Dyus Espiritu' wala cchjāachja'jna ũsa' jī'c Dyus librute fi'jnisa' tyā' ũshiinisame'. ⁶ Naapcachja' Dyusa' jweefirráac cue'shtyi peeygājrra pu'chji' quĩjteva. Tyajíc Dyus libru' na'wē pta'shi': Dyusa' pu'chji'tsme' iwejch yaacysatyi', nava iwejch yajcymée fi'nzesatyi' wala peeygājna pu'chjina jī'c. ⁷ Tyāa pa'ga Dyusrráana nwēese'jrra echtjē'ja's nwēese'jmée chjāchja miiyajcywe, atsa' echtjē'ja' i'cue'sh tashu ājameerra tyuteena u'juena. ⁸ Dyus tashte mutyaawe, atsa' tyāava i'cue'sh yacj utyaana. Pcalsawe'sh, ewmée yũuni cusety miiyaatewe. Tyā'wēy Dyusa'srráa yajcymée e'nz jwend yaacysa i'cue'sh ũusa's miiyaatewe. ⁹ Sa' tyā'wē ājmeene'tca'w yũu sũjna miiyajcywe, sa' shijcana fi'nzepa'ga āchja' ũnewa'ja's miiyajcywe, sa' wechana fi'nzepa'ga āchja' ũuswa'ja's miiyajcywe. ¹⁰ Āchja' Dyus dyi'pte seena' yuj ājmeecuesa myuuwe, atsa' tyā'wē yũusa's walasa vituna Dyusa'.

Yacjtjē'jwe'shtyi ewmée nuywe'weni

¹¹ Yacjtjē'jwe'sh, i'cue'sh pwe'sh puuty ewmée ya'nuywe'wenuwe. Maava yacjtjē'ja's ewmée nuywe'wesa' Dyus jycaajni ley peeygāawa'ja's we'we'c tyā'sna weechsa yuuna. Atsa' Dyus jycaajni leya's weechsa' tyāa

leya's nwēese'jepcachte leya's jycaajsa na'wēsa yuuna. ¹²Tyāa pa'gatey leya's nviit-sa' teech yuurráa ūsa'. Tyāafírráa ewmeete nviitwa'jsa' sa' tyāafírráa qui' nwe'weya'va ājawa'jsa'. Tyā'wēte!, ħindyrráa jwee quimrranga tyā'wē yacjtjē'jwe'shtyi' ewmée nuywe'we'?

Cuscuscjē' quīj yuuya'vateva jiimeec ya'fi'nze'

¹³Āchja' i'cue'sh na'wē we'we'i'cue tyā's mjiyuwe: I'cue'sh we'werra': Āchj u'ljmeerra' cuscita' u'jue'nja'w chjamb walan. Cytee pa'jrra teech añu mjiirra vyu wala cnayna ūsu'nja'w jī'i'cue. ¹⁴Nava cuscus fi'nzewa'ja's jiimée i'cue. Cue'sh ityi fi'nzeni' na'wēsarrá': Yu' ajva ma'wēga tundterráa vyaarra' ēecjēe ptsu', tyā'wēysarrá' ityi fi'nzenisa'. ¹⁵Tyāa pa'ga na'wērráa yaacywa'ja': ityi fi'nzewa'j Dyus peesuváana atsa' ma'wērráava mji'nja'w jiwa'ja'. ¹⁶Nava tyā'wē yajcymée ūuste iwejchrráa i'cue yajcyrra we'we'. Tyā'wē yajcyrra we'wenisava ewmeesafírrá'. ¹⁷Maava ew yūuwa'ja's jiirra ew yūumeerra', Dyus dyi'pte yuuwesa yuuna.

Ji'pjsawe'sh mpa'yajcywe

5 ¹Āchja' wala ji'pjsawe'sh mwēese'jwe: I'cue'sh ji'pjuni ptsuute seena' yuj ñussa pa'jana tyā'sna yajcyrra weyna mpembeewe. ²I'cue'sh ji'pjunisa' quīj yujva seelpime' jyuca wa'wani', atsa' i'cue'sh ropa ewsava tyā'wēy jyuca wes ū'ni'. ³I'cue'sh vyuu bej vyuu chijmeva jyuca inz ū'ni', atsa' tyāa vyu inz ū'nisafírráa i'cue'shtyi' seena' wala ewmée ñus quiwete acjwa'jsa'. Tyāa vyu' i'cue'shtyi iviituya'va' ipy na'wē. Naa nmej ensu' i'cue'sh ji'pjuni's iiméj wala jyaaw i'cue. ⁴I'cue'sh uutjashte mjiisa yuul pēyni's Dyus cielute jycaajna ūssa' wēse'cj, atsa' i'cue'sh piuntiyi yuulunisa tyā'wē i'cue'shtyi ewmeete nvijt-ya'va'. ⁵I'cue'sha' naa quiwete ji'pjunisa yacj wala wēt wechana fi'nze'i'cue tajcy na'wē niishna tyāa pa'ga icjwa'j en pa'jya'va'. ⁶Nasa ewmeesata' jirra i'cue'sha' ewterraj icje'i'cue yuuwemeesateva, atsa' tyāawe'sha' cyulterráa uuwa'ja's ji'pju'ty.

**Tjēysa pa'tjeva ñusmée fi'nzeni, tyā'wēy ātsa'sa
pa'gateva Dyus yacj puuty we'wena**

⁷Tyā'wē pcyuutsteva, yacjtjē'jwe'sh ñusmée chjāchja miiyajcywe, cue'shtyi jype'jsa Jesucristo naa quiwete quīpcach. Ma'wēga mjiisava ujrra' cuchwaljmée ūytjasu', nus en scjēwte', ū'a's wala pcjacje'nja sūjna. ⁸I'cue'shva tyā'wēy cuch yajcymée chjāchja yajcyna mūytjaswe. Tyā'wēme', cue'shtyi jype'jsa Jesucristo quīiwa'ja' utyaatsa'. ⁹Yacjtjē'jwe'sh, puuty ūuschawe'wena fi'nzenuwe, Dyusa' i'cue'shtyi ewmeete nviitcaymen. Tyā'wēme', yuwee cu'le'sa cjuēs pa'jwa'j en utya yā'j ūsa'. Tyā' Dyusa'. ¹⁰Tyāniitey Dyus yuwe's pta'shsawe'shva ma'wēta pytjaa yuuna fi'nzerrava Dyusrráana yajcyna fi'nze', tyā'wēy tjēysa ñuswa'j vyaateva, Dyusrráana yajcyna mfi'nzewe yacjtjē'jwe'sh. ¹¹Tyā'wē

pytjaa ñuste fi'nzesatyí Dyus yacj wēt fi'nzesata' jī'tja'w. Job pytjaa ñuste wantāyna fi'nzete', nmejte' Dyusa' wala peeygājrra pu'chni's iiwēse'ji'cue i'cue'sha'. Dyusa' peeygāasa', tyāasa pu'chya' ūsa'.

¹² Andy yacjtjē'jwe'sh, wala mpa'yajcywe. Isasa's jirra' jii'tj jīwa'jrrá', sa' jiimeerra' jiimeetj jīwa'jrrá'. Tyā'wē Dyus uyte jiimeetj jīwa'jme', sa' cielu quiwe tyā'wēsatyva cysusna pta'shwa'jme', Dyusa' ewmeete nviitcajmen.

¹³ I'cue'sh pwe'sh maava ñuste fi'nzena ūsrra', Dyusrráana neewe'wena meswe. Maava wēt fi'nzena ūsrra', Dyusa's wechana memna meswe.

¹⁴ Maava acate uuya' ūsrra', ancianowe'shtyi mpa'yawe, atsa' tyāawe'sha' Dyus cuse'te neewe'werra aceite qui'putyna. ¹⁵ Tyā'wē Dyusa' pu'chjina sūjrra oraīte', ātsa'sa pcala' peltunāyni yuute, ātsa'sa ewte neeyūuna, tyajū' Dyusa' nuycatyjina. ¹⁶ Dyus dyi'pte ājmée yūuni's puuty ya'mpeeta'shwe, atsa' Dyusa's yacjtjē'jwe'sh neewe'wete', ātsa'sa' catyjine'cue. Dyusna nwēese'jsa tyā'wē ūusuj jyuca Dyusna yajcyrra neewe'weni', quijteva jyuca pu'chwa'jsa'. ¹⁷ Ma'wēga Dyus yuwe pta'shsa Eliasva cue'sh na'wēysarráarrava, nus pa'cjamen Dyusna ūusuj jyuca yajcyrra neewe'we, atsa' nus pa'jme' tecj añu y medio ājpcach. ¹⁸ Tyajū' qui'quin Dyusna neewe'wec nus quīicajn, atsa' naa quiwete qui' nus pa'tje', uutjash chjāchjaty.

¹⁹⁻²⁰ Andy yacjtjē'jwe'sh mjiyuwe: I'cue'sh maava Dyus dyi'pte jypumbate', jypumbasame' tyāa jypumbasa's ewmée dyi'ju caashwendu'juna. Sa' tyā'wē yūurra' jypumbasá ūus jyucate vituwa'j yā'j ūsteva, nwe'wesa yuuna, sa' maanzcuēe pcaltiyiva caapeltunai'jsa yuuna.

SAN PEDRO CARTA NYAFYTE FI'JNI

Vite quiwesu u'p-ya' u'jsaty Pedro fi'jni

1 ¹ Andya' Jesucristo jycaajnis Pedro yaasetj. Naa carta's fi'jatstju vite quiwesu u'p-ya' u'jsawe'shtyi, Ponto, Galacia, Capadocia, Asia, Bitinia tyāa quiwesuwe'shtyi. ² I'cue'shtyi tyjityjwa'ja's Dyus cue'sh Tata' nyafiitey ma'wēne' pjeu'jrra ji'pju' tyā'sa' cytey yuuc. Tyāasac Dyus Espiritu' i'cue'shtyi ewmeejū tyujnderra Jesucristo eegu nuyaate Jesucristorrá's nwēese'cjan. Tyā'wē Dyus pu'chpa'ga āchja' seena' wala wēt mfi'nzewe.

Na'wēsa's jypa'gaya' ūytjasna fi'nzeni

³ Āchja' cue'shtyi jype'jsa Jesucristo Tata's wechana tuutje'jega. Tyā' cue'sh ewmeesateva peeygājrra qui' u'se upysa na'wē yuupa'garrāac tyā'wē yūu. ⁴ Tyāa pa'gac ew jii ya'fi'nze', Dyusa' cielute cue'shtyi ūswa'j jyaawni ji'pja' tyā'sa' jypa'ga'nja'w sūjna ūytjasna. Tyā' bagachte yujva ptsumeena sa' suweevameena sa' vituvameena. ⁵ I'cue'sha' Dyusa's ūuste jypumbamée yaacywa'ja's ji'pji'cue, naa pa'ga tyā' i'cue'shtyi jyaawuuna nmej en ājte i'cue'sh cielute pa'jwa'ja's pjeu'jrra ji'pja' tyā'sa' jypa'gacajn.

⁶ Tyāa pa'ga i'cue'sha' iimėj wala wechana meswe, macue maa enteya' űuswa'j en ma'wēsava pa'tjeva. ⁷ Tyāa pa'gatey űuswa'j en tjēysa pa'ja'ty tyā' Dyusa's jypumbamée jwee írrāa chjāchja yaacywa'ja's pjeu'jsata', vyuu beja'sva ew zhichcue neeyūucajn ma'wēga ipyte cambrra ya'pjeu'ju' tyā'wēy. Atsa' macue tjēysa űuswa'j en pa'tjeva Dyusa's jypumbamée yaacyni's iviitusame' vyuu bej ptsusaate jytjaacue pa'gasa yuuna. Tyā'wē yūusa' isa wechana jyutjtjesa yuune'cue naa quiwete Jesucristo quīi ente'. ⁸ I'cue'sh yafyju yu' Jesucristo's uymeerrava, peeygājrra nwēese'je'i'cue, sa' uymeerrava tyā'sna yajcyrra iimėj seena' wala ūuste wechwecha yaaqui'i'cue. Tyā'wē ūuste iimėj seena' wala zhichcue wēt wēt

yaacyni's pta'shya' ya'āja'tsme'. ⁹I'cue'sha' tyā'wē Dyusa's jypumbamée yaacywa'ja's ji'pjupa'ga i'cue'sh ūusa' ewte neeyūuna.

¹⁰Dyus peeygājrra i'cue'shtyi ewte nviitwa'ja's jiyurra pta'shsa nyafii enteywe'sha' wala paapējyina atyajty ewte neeyūuwa'l jīni's. ¹¹Tyā'wē Dyus Espiritu' tyāawe'shtyi' dyiicjēy caajiyu'cj ewte nviitwa'jsa' wala pytjaa yuurrava tyāa e'su' wala jytujtjesa yuuwa'jsa' jīna. Tyāa pa'gaty Dyusna selpisaawe'sha' jiyu wēe tyā'wē yuuwa'jsa' quimqui sa' bagachqui atsqui'c Dyus Espiritu' tyā'wē pta'shi' sūjna. ¹²Tyā'wē paapējyina ūste', Dyusa' tyāawe'shtyi pejca caajiyu'cj tyā'wē pta'shnisa' i'cue'sh jīi meea', vite ensuwe'sh jīia' jīc. Tyā'wē ewte neeyūuwa'l seena' wēt-wēt-sa's Dyus ūscu tyā'sa' angeleswe'sh yujva jweeírráa wala jiyuvatsa' sūju'ty, tyā'wē seena' zhichcuesa pa'ga.

Quīj pcal yujva ji'pjmée fi'nzecajncu Dyusa' pa'ya

¹³Tyāa pa'ga ew miiyajcywe ma'wē ew fi'nzewa'ja'sva wala jypa'yacy. Dyusa' i'cue'shtyi peeygājrra Jesucristo vyaa ente' ūsya'va' tyā'srráana ūytjasna meswe. ¹⁴Nwēese'jsa luuch na'wē myuuwe. Nyafiaa' Dyusa's jiimeerra' ma'wēcue peecy ūus yaacyni ewmeesaterráa fi'nze' tyā'wē yūunuwe, ¹⁵wejyva ūusuj jyuca ewmējū tyuteerra ūuste quīj pcal yujva ji'pjmée mfi'nzewe, tyāa pa'gatey i'cue'shtyi pa'yasa Dyusva quīj pcal yujva ji'pjmeesa' naa pa'ga. ¹⁶Tyajíic Dyus libroute na'wē we'we': I'cue'sha' quīj pcal yujva ji'pjmeesa myuuwe, andyva quīj pcal yujva ji'pjmeesatj naa pa'ga jī'c.

¹⁷Miiyajcywe Dyusa' cue'sh Tata' jīna cysusu'i'cue tyā' quim yujtyva nviitmée jyuca pēywa'jsate jiirra', ūucjna mfi'nzewe naa quiwete macue tyach ūtyi fi'nze'tsrrava. ¹⁸Yatsgawe'sh ma'wē ewmée fi'nzete', i'cue'shva tyā'wēy ewmée fi'nzenijū Dyusa' nwe'wec. Sa' i'cue'sha' ew jii i'cue tyā'wē nwe'wepa'ga quīj yujva ya'ducjme' naa quiwete ptsuwa'jsa ūsta' vyuu bej vyuu chijme tyā'wēsa yacjrráa yujva. ¹⁹Naasáa Jesucristo ee yacj yuurráac ducjnisa yuu. Tyā' piishacuē quijte yujva ātsa'meesa ewsa's icjrra pcaltyi yaateya' cambnisa na'wēc yuu. ²⁰Cristo' tyā'wē yuuwa'cj tyjityjnisa yuu naa quiwe meetey, nava naa ensurráac tyā'wē yuuya' vyaa i'cue'shtyi nwe'weya'. ²¹Cristo tyā'wē yūupa'ga i'cue Dyusa's jiyuya' āja. Dyus íic Cristo uuteva ūtyi vitrra tujtje nvijt, Dyus yuurráana yajcyna ūytjasna fi'nzecajn.

²²Āchja' i'cue'sha' Dyus Espiritu pu'chte', isa pta'shni's wēse'jrra', i'cue'sh ūustyi yaate i'cue ūusuj jyuca yajcyrra yacjtjē'jwe'shtyi peeygājya'. Tyā'wē yā'jrra', puuty teeche na'wērraj ya'mpeeygājwe ūusuj jyuca yajcyna. ²³Tyāa pa'gatey i'cue'sha' nasa naa quiwete pcalsa ji'lmée, quīj pcal yujva ji'pjmeesa ji'jī'cue yuu. Dyus yuwe bagachte yujva ptsuwa'jsame's wēse'jrra i'cue tyā'wē yuu. Dyus yuwe' bagachte yujva ptsuwa'jsame'. ²⁴Tyajíic Dyus libru' na'wē pta'shi':

Naa quiwete nasa' jyucaysa scjēwwa'jsarráata'.

Tyāawe'sha' macue seena' wala jiisarrava, jyūtj tash na'wēsarráata'.

Jyūtjva ujndyte', quiteva wete'c tyā'wēysarráata'.

²⁵ Nava Dyus yuwe' bagachte yujva psumée nes yuuwa'jsa' jī'c.

Tyāa Dyus yuwe's íc i'cue'shtyi pta'shni yuu.

2 ¹ Tyāa pa'ga ewmée yūuya' yaacyni's jyuca manvijtwe. Īshiinisa, yuwejurráa ew we'werra' ūuste yu' ewmée yaacyni, vitety atseyaacyni, e'sgarráa ewmée nuywe'weni tyā'wēsatyí' nvijtrra, ² luuch u'se casejsava ma'wēga lechi ewsarrá's jypa'ga', tyā'wēy i'cue'sh ūuste ew cchjāachja'jwa'jsarrá's mpaacuewe. Tyā'wē yūurra Dyus yacj chjāchja fi'nzene'cue ewte neeyūuya'. ³ Tyā'wē myūuwe, cue'shtyi jype'jsa ewsateva ew jiyu dyijrra'.

Cuet ītyisa na'wēsa' Cristo'

⁴ Cue'shtyi jype'jsa tashte mutyaawe. Tyā' cuet ītyisa na'wēsa'.

Tyā'sa' naa quiwete nasa' ajtsety, nava tyāaíic cuet jytjaacue ewsa Dyus

tyjityjnisa yu'. ⁵ I'cue'shva cuet ītyisa na'wē i'cue naa pa'ga Dyusa'

i'cue'shtyi' tyajy ūswa'j yat na'wēsac vitu', sa' tyā'wērráamée quīj pcal

yujva ji'pjmée tyajy tashte yuurráa selpiina ūswa'jsac vit, tyāa pa'ga tyajy

tashte utyaarra ewsa yuurrá's cytey myuuwe. Jesucristo pu'chte', i'cue'sh

tyā'wē yūuni's Dyusa' jypa'gana. ⁶ Tyā'sna we'werrac Dyus libroute na'jī':

Yat tyaajwa'j cuet tyjityjnisa iiméj ewsa nviitutstju Sion judiuwe'sh quiwete,

Atsa' tyā'sa' maava jypa'gasa' jypumbasáa yuumeena jī'c.

⁷ I'cue'sh ew jiyusa yacj yu' tyāa cueta' iiméj wala ewsa'. Nava

jiyusamée yacja' na'wērráac ya'yu' tyā'wē yūuni's Dyus libroute na'wēc we'we':

Yat tyaajsawe'sha' cueta's ajtserra wāatājteva,

E'suyā'ja' tyāaíic tjaacue ewsa yuuna pa'j jī'c.

⁸ Vite ajcē' tyāa cueta'síi we'werra':

Cueta' cyu'chafiljrra pētysarrá' jī'c.

Dyus yuwe's pta'shteva, tyāawe'sha' cytey nwēese'jsame' jypumbasaata', jiyuwa'jsamée ne'ta yu' naa pa'ga.

Nasa Dyus tyjityjnisa

⁹ Nava i'cue'sha' Dyus tyjityjnisa i'cue, tyajy tashte yuurráa selpiina

ūswa'jsa. Dyus cusetewe'shi'cue, quīj pcal yujva ji'pjmeesa. Tyāa pa'ga

Dyus tyacue wala i'cue'shtyi ewte nviitni's pta'shwa'j ji'pji'cue. Tyā'wē

yūucajncu pa'ya, jiimée jypumbana chji'ndyte ūsnijū casejrra zhichcue

eena'te pa'cjan. ¹⁰ I'cue'sha' nyafiia' Dyus jīi yu'tsmée i'cue, nava āchja'

Dyus jīi i'cue. Nyafiia' quim yujva peeygāanisamée i'cue yu', nava āchja'

Dyus peeygāanisa i'cue.

Dyusna selpiina yuurraa mfi'nzewe

¹¹ Andy yacjtjê'jwe'shtytij neewe'we': I'cue'sha' naa quiwetewe'shmée yã'ji'cue, tyãa pa'ga peecy cacue ewmée yũuya' yaacynityi's nwēese'jnuwe. Tyã'wēmē' ũusa's suwsaata'. ¹² Dyusa's jiimeesawe'sh cshavysu wala ew mfi'nzewe. Tyãawe'sha' āchjĩ yu' wala atsewe'we'ty i'cue'shtyi ewmeesa na'wē. Nava Cristo quĩi ente' i'cue'sh ew yũuni's uyrra', Dyus luuch yuj yu'ta jĩna tuutje'jetyna.

¹³ Dyusa's jii yã'jsa' jyuca mwēese'jwe naa quiwete jycaajwa'jsa nviitni ũsta' tyãawe'shtyi, jycaajsa npiitstjê'jsa ma'c yuu, ¹⁴ meerra' jycaajsa nuuchsa ma'ty yuu nava jyuca. Tyãawe'sha' Dyus caajnisata' ewmée yũusatyi' castigāyna vite' ew yũusatyi' nwe'wesa. ¹⁵ Tyãa pa'gatey Dyusa' i'cue'shtyi' ewcu yũu jytjāasu' vitety, tyã'wē yũurra atsewe'wesaty shuuna' vit-ya'.

¹⁶ Dyus nwe'wenisa yã'jrra', ew mfi'nzewe. Nava nwe'wenisa yã'tja'w atsa' quimva ma'jĩmeena sũjrra ewmée yũunuwe, wejyva Dyus cusete selpisaatja'w sũjna ew yũuwa'jrrá's yajcyna mfi'nzewe. ¹⁷ Jyucaysa yacj ewrráa mfi'nzewe, yacjtjê'jwe'shtyi peeygājna, jycaajsawe'shtyi nwēese'jna, Dyusnava tyã'wēy nwēese'jna.

Cristova ma'wēga pcyuuni yuu tyã'wēy myuuwe

¹⁸ Selpisaawe'sha' i'cue'sh patrontyi wala jypa'yacy nwēese'jna cytey myuuwe. I'cue'sh patron ewsarráaty tyã'wē yũumée, patron seena' juuna'satyva ewrráa myuuwe. ¹⁹ Quĩjva ājmée yũumeete Dyus yacj fi'nzepa'garráa patronwe'sh tyã'wē castigāyte', tyã'sa' ñuswa'jme'. ²⁰ Nava i'cue'sh ājmée yũute castigāyte', yuuwesatja'w naa pa'gaty castigāy sũjwa'jrrá'. Nava i'cue'sh ew yũupa'garráa ñuswa'j ena's ji'pjute', Dyusa' peeygājana. ²¹ Tyã'wēte fi'nzecajncu Dyusa' pa'ya, i'cue'sh pa'gate Cristo' yuuwemeesarrava pytjaa yuuc tyãa na'wēy yuuwemeesarrava pcyuuni yuucajn. ²² Tyã' quĩj pcal yujva yũume', sa' quim yujnava īshiime'. ²³ Wēeshusatyi's ca'tuva wēeshuuna pasme'. Pcyusaatyi's tyã'wē yũupa'ga i'cue'shva ewmeete neeyũune'cue jĩna pasme'. Tyã'wē yũumée wejyva Dyusrrāanac neewe'we. ²⁴ Cue'sh pcaltyi's Cristoc cluuste uurra iviitu, cue'sha' peena' yu' pcalte fi'nzemée Dyus dyi'pte ewrráa fi'nzecajncu tyã'wē yũu. Cue'sh pcala' yaateni yuucajn yu' tyã' pcyuuni pytjaa yuu. ²⁵ I'cue'sha' nyafiia' piisháa vitusa na'wē i'cue ũsu', nava āchja' Cristo tashte shawendi'cue, tyã' piisháa tjengsa na'wēc jype'je' i'cue'sh ũusty.

Ptamsa' na'wē fi'nzewa'ja'

3 ¹ U'ywe'sh iimi'sava, i'cue'sh nmi'ty cytey nwēese'jna mfi'nzewe. Tyã'wē yũute', i'cue'sh nmi' maafiia' Dyus yuwe's wēse'jya' wa'lsava

2 i'cue'sh ew fi'nzeni's uyrra', Dyusa's jiyuna pa'jatyna, Dyusa's mpaacue jīna we'wemeeteva. 3 I'cue'sha' peecy cacue āacjēwe'shrrá's tyacue wala zhichcuesa qui'pna pjeu'jwa'j ji'pjmée i'cue, 4 wejyva ūuste tyā'wē zhichcue mpjeu'jwe, ew yūuwa'jrrá's yajcyna, vitesa yacj puiimée fi'nzewa'ja'srráa pacuena. Tyāarráa tjaacue ewsa' Dyus dyi'pte. 5 Nyaffi entey u'ywe'sha' tyāawe'sh ūustety tyā'wē zhichcue pjeu'ju' Dyusrráana neewe'wena tyāawe'sh nmi'ty nwēese'jna. 6 Sara' tyā'wēsac yu'. Abrahana's ū'cue's jype'jsa' jīnac nwēese'je', atsa' i'cue'shva tyāa na'wēysa yuune'cue, tyā'wēy ew nwēese'jrra yu', ājmeetj yūu sūjna ūucj yajcyna fi'nzemeene'cue.

7 Tyā'wēy nmi'we'shva i'cue'sh nyuu yacj jypa'yacy ewrráa mfi'nzewe, u'ya' wejycuē' chjāchjameecueta' tyāa pa'ga. Sa' tyā'wērráamée, i'cue'sh na'wēyrráa Dyus yacj fi'nzesata' tyāa pa'ga tyā'wē ew mfi'nzewe, Dyus yacj puuty we'weni' cyul yuucajmen.

Ew yūupa'ga ñus cnaysáa

8 Jyucaysa i'cue'sha' ewrráa yūuna mfi'nzewe, vitesatyva teeche na'wērraj peeygājna. Weech yajcymée zhichcue puuty we'wena yacjtjē'j pwe'sh na'wē mfi'nzewe. 9 Ewmée yūusa's ca'tuva tyā'wēy ewmée yūuwa'jme', sa' wēeshute', tyā'wēy ca'tuva wēeshuwa'jme', wejyva tyā'wē yūusatyi' ca'tu yu' ewrráa myūuwe. Tyā'wē ewrráa yūucajn írráac Dyusa' i'cue'shtyi pa'yarra tyacue wala ew yūu. 10 Tyā'wē yūuwa'ja's na'wēc pta'shi' Dyus libroute:

Maava ewrráa wēt fi'nze wēerra',
Peecy tjune's ewmée we'wecajmen jypa'yacyrra
I'cue'sh yuweju īshiinuwe.

11 Ewmeejū tyuteerra, ewrráa yūuna
Puiimée fi'nzewa'jrrá's pacuerra uu entepcach tyā'wē yuurráa
fi'nzewa'ja'.

12 Tyāa pa'gatey Dyusa' jype'je'c ew yūusatyi',
Sa' Dyusa's pacuen neewe'weni's wēsē'je'c.
Nava ewmée yūusatyi' tyā'wē yū'tsme' jī'c.

13 Bagachteva i'cue'sha' ewrráa yūutste', ¿quim tyā'wē ca'tu' ewmée yūucy? 14 Ew yūuna fi'nzepa'ga ñuswa'j en ji'pjurrava, wechana wētwe'trráa meswe. Quim yujtyva ūucjnuwe cuj yajcyna, 15 wejyva i'cue'sh ūuste jycaajsa Cristorrá's wechana mneewe'wewe. Na'wē i'cue'shtyi caapiya'jni's jii i'cue tyā'sna paapēsatyi's pasya' tjaamemée meswe bagachteva, sa' ūuscha we'wemée ewrráa mpaaswe. 16 Tyā'wē ew yūurra mfi'nzewe, i'cue'sh ūuste yuuwemeetja'w sūjwa'jrráa ūusutjecajn, cyaj Cristo yacj ew fi'nzesaty e'sga ewmée nuywe'wesawe'sha' tjaameetyna, tyā'wē i'cue'shtyi ewmée nuywe'werra'. 17 Wejyva ewmée yūurra ñus cnayupcachte, ew yūupa'ga ñus cnayni wejy ewa', Dyus yuu tyā'wē jytjāas yā'tje'.

18 Cristova tyã'wëycu pytjaa yuurra uu, tee dyi'jrráa jyucaysa pa'gate. Tyã' ewshac yu', nava cue'sh ewmeesa pa'gate pytjaa yuuc Dyus tashte nuypa'jya'. Tyã' isa uuyujc cacue yu', nava ũus yu' uume'. 19 Tyãasac u'j uusaawe'sh ũus preesu ũsu'ty cytee pta'shya'. 20 Tyãawe'sha' nyafii Noé ente' nwëese'jsameety yu' Dyusa's. Tyãa ente' Noea' barco's pjeu'ju'tspcachja', Dyusa' wala yuj ũytjascu tyãawe'shtyi' nwe'weya'. Nava ocho nasarráaty yu'ju nwe'wenisa yuu. 21 Noé ente yu'a' áchj yu'te ya'bautisaĩ'tja'w ewmeejũ jyucate tyuteeya' sũjrra tyã'wëshac yu'. Nava bautismo' pcala's yaate'tsme', naasáa Dyus dyi'pte peena yu' pcalte fi'nzeyamée sũjrrarráac ya'bautisãynisa yu'. Atsa' Jesucristo uurra qui' ityi yuunisa yuurráac cue'shtyi' nwe'we. 22 Áchja' tyã' cielun u'jrra Dyus pucate jycaajna ũsa', atsa' tyã'sa' angeswe'sh ma'wësa tyã'srrarráanaty nwëese'je'.

Selpiia' ájawa'ja's Dyus ma'wë ũste' cytey yuuwa'ja'

4 1-2 Cristova ma'wëga tyajy cacuete acasa's jypa'gana pytjaa yuu, tyã'wëy i'cue'shva pytjaa yuuwa'jsatja'w sũjna meswe, tyãa pa'gatey peecy cacuete ewmée yũuya' yaacyni pcala's nvijtrra, Dyus jytjaasnirrás' uu entepcach cytey yuuya' yaacypa'gac pytjaa yuuwa'j en pa'ja'. 3 Pcala's nwëese'jmée nvijt-ya'fi nyafii entey wala yã'jne'cue nwëese'j Dyusa's jiimeesawe'sh yacj ja'ndarra. Tyãa ensu' i'cue'sha' ewmée i'cue yũuna fi'nze peecy cacueju ewmée yũuya' yajcyna, tũuna, cu'jna, pcjaacjerra tundyna, Dyus ityimeesaty neewe'wena. 4 Tyã'wë yũusai'cue yu'. Nava áchja' i'cue'sha' peena yu' tyãawe'sh yacj tyã'wë iiméj seena' ewmée yũuna fi'nze'tsmeene'cue, tyãa pa'ga ne'ta i'cue'shtyi' ewmée nuywe'wena atse'. 5 Nava tyãawe'sha' Dyusna paswa'j ji'pjutyna, ityisa ma'ty yuu meerra uuniisa ma'ty yuu nava jyucaysaty paapëywa'j ente'. 6 Uusaawe'sh ma'ty yuu nava paapëy ente' cacue ji'pjsa na'wëyrráa paapëyni yuutyna. Atsa' uute' ũus yu' Dyus na'wëyrráa ityi ũscajncu tyã'wë pta'shni yuu. Tyã'wë yuuwa'jsate írráac uusaawe'shtyiva Dyus yuwe's pta'shni yuu tyãawe'sh uumeyna.

7 Naa quiwe ptsuwa'j ena' utyaatsa'. Tyãa pa'ga i'cue'sha' wala jypa'yacy meswe, naasáa Dyus yacj yuurráa puuty we'wena mfi'nzewe. 8 Nava i'cue'sh pwe'sh puuty peeygáawa'ja's wejy jytjaacue mpa'pchuwe, tyãa pa'gatey peeygáanisa' pcal macuesanava jyuca caapeltunaĩ'cj ji'c. 9 Yacjtjê'jwe'shtyi yat mpëequi'jwe wa'lmée. 10 Teechsa na'wërraj puuty ya'mpu'chwe, i'cue'sh selpiia' ájawa'ja's Dyus ma'wëne' ũs tyã'sa' cytey yuuna. Dyusa's selpiwa'ja's nacue wala cuj jwend ũsni yuuc tyã'sa' jypa'garra', ew caaselpi'jsa myuuwe. 11 Maafia' pta'shwa'j ji'pjrra', peecy ũuste yaacyni's we'wemée Dyus we'wenirrás' pta'shwa'ja'. Maava vitety pu'chya' yaaquitsrra', Dyus macue cchjáachja'jana tyã's yu' jyuca cytey yuuwa'ja'. Quĩj yũutsrrava Dyusa's wechaawa'ja'srráa yajcyna tyã'wë

yūuwa'ja' Jesucristo's pi'cyrra, tyāa pa'gatey quījquījva jyuca Dyus jīrrarráata' bagachteva nes yuuwa'jsa.

Nuswa'j en pa'tje wechana fi'nzewa'ja'

¹²Yacjtjē'jwe'sh, Cristo's nwēese'pja'ga nuswa'j en pa'tje', fiy yuj yu'c sūjna cuj yaacynuwe, ¹³wejyva Cristo na'wēy nuswa'ja's ji'pjutstju sūjna wēt miiyajcywe. Tyā'wē yūurra', tyajy quīi ente' wechaawa'ja's wala uyuune'cue. ¹⁴Cristo yacj fi'nzepa'ga ajtsena wēeshute', i'cue'sha' nūsmée mweechawe, tyāa pa'gatey Dyus Espiritu' i'cue'sh ūuste ūsa' nūsmée wechwecha caayaqui'jwa'jsa. Cristo' tyāawe'sh yaatsenic fi'nze', nava i'cue'sh yu' tyā'sa' wechana i'cue fi'nze'. ¹⁵I'cue'sha' maa yujva nūs cnaywa'j ji'pjuwa'j ji'pjmée i'cue, na'wē yūurra: nasa icjna, pesweena, ewmée yūuna, īshiina yuwe csusu'jna fi'nzena. Tyā'wē yūurra nūs cnaywa'j yu'sa' ji'pjunuwe, wala tjaampa'sa'. ¹⁶Nava Cristo's selpiipa'ga nuswa'j en ji'pjurra', tjaamewa'jme', wejyva Dyusa's wechana tuutje'jwa'ja'. ¹⁷Tyā'wēme', macue Dyus luuchte yujva nuswa'j ena' tyāawe'sh yacj cjuē'ycu tacj na' āchj nmej ente' ¿ma'wē seena' tjaacue nūs yujcy Dyus yuwe's nwēese'jsamée yacja'? ¹⁸Dyus luuch yujva wala nūs cnayrra nwe'weni yuute', pcalsa ewmeesa yu' ¿mtee yuuya' u'juetyqui? ¹⁹Tyā'wē Dyus jytjāasnite nuswa'j en ji'pjurra', nūsmée fi'nzewa'ja' peecy ūustyi Dyus cusete neewe'wena. Tyāac cue'shtyi taqui'j na' tyāáírráa nwe'wena.

Dyus yacj fi'nzesaty yu'cypejni

5 ¹Ancianowe'shtyi yu'cypejetstju, andyva tyāawe'sh na'wēysa íírráatj, sa' Cristo pytjaa yuuni'sva uysaatj, sa' tyāawe'sh na'wēy cieluteva ūswa'jsatj. ²I'cue'sh cusete neewe'weni ūsta' Dyus luuch tyāaty jypa'yacy miipe'jwe, piisháa-tjengsa na'wē. Sa' vyuu jypa'gawa'jrrá's yajcyna tyā'wē yūumée, Dyus jytjāasnirrás cytey myuuwe, wa'lmée wechana ewrráa yūuna. ³Sa' Dyus luuch i'cue'sh jype'jnity juuna' we'wenava jycaajwa'jme', cyaj i'cue'sh fi'nzeni's piyaatyna. ⁴Tyā'wē yūurra', cue'shtyi jype'jsa jytjaacue jytujtjesa vyaate', i'cue'sha' jypa'gane'cue peesni iiméj zhichcuesa's tyā' naa quiwega peesnisa ptsu'ty tyā'wēsa meeta'.

⁵Pitstacywe'shva tyā'wēy ancianowe'sh we'weni's cytey myuuwe. Jyucaysa puuty ya'nwēese'jna fi'nzewa'ja' iweejch yajcymée. Tyā'wēme', Dyusa' pu'chji'tsme' iweejch yaacysaty's, nava iweejch yaacysameetyi's peeygājnac pu'chji'.

⁶Tyā'wē yā'tje', Dyusa's mwēese'jwe, tyajy cuseterrarráa jyuca ya'ducjna, cyaj i'cue'sh tyā'wē yūunijū', Dyusa' i'cue'shtyi' walasa vituna. ⁷Tyāa pa'ga i'cue'shtyi quīj tjēysa vyaateva, tyā'sa' jyuca Dyus cuseterrarráa manvijtwe, tyāa pa'gatey tyā' i'cue'shtyi tjengsa' naa pa'ga.

⁸I'cue'sha' jypa'yacy meswe. Tyã'wẽme', i'cue'shtyi atsesa echtjẽ'ja' quimrráanava ícjya' sũjna león na'wẽ seena' pembeena pacuena u'ju'.
⁹Nava echtjẽ'ja's wej yujva nwẽese'jnuwe Dyusa's chjächja yajcyna, tyãa pa'gategy i'cue'shrráamée tyã'wẽ pytjaa ñusna ũsi'cue, yacjtjẽ'jwe'sh msuuwe'shva jyuca tyã'wẽrrarráa pytjaa yuuna ũsta'.
¹⁰Nava i'cue'sh manz en pytjaa yuuniijũ', Dyus quiǵteva jyuca pu'chsa' cchjãachja'jana jypumbana shiingmée ew fi'nzewa'ja's pu'chna. Tyãa Dyusírráac cue'shtyi pa'ya, Jesucristo yacj bagachte yujva psumée ũswa'tje. ¹¹Tyãa pa'ga bagachteva tyã's yuurráana wechaaga.

Yuwe wechaa caajñity pta'shna fi'jni

¹²Naa carta's fi'jrra cajasttju ew fi'nzesa yacjtjẽ'j Silvano yacj. Cyteea' jyu'jmecuetj yu'cypeje', na'wẽ Dyus pu'chni's jypa'gai'cue tyã' Dyusa' peeygãasa yujna sũjwa'ja's ew caajiyu'jsata'. Atsa' tyã'wẽ ũsutjeni's pechcanamée mfi'nzewe.

¹³I'cue'sh na'wẽy Dyus tyjityjnisa Babilonia quiwete ũsta' tyãawe'shva yuwe wechaa caja'ty, atsa' andy nchi'c na'wẽsa Marcosva yuwe wechaa caja'c. ¹⁴Puuty pta'shna yuwe meen weechawe, teechna na'wẽrraj ya'peeygãjna.

Jesucristo's nwẽese'jsa i'cue'sh jyucaysa ewrráa mfi'nzewe.

SAN PEDRO CARTA E'SU FI'JNI

Dyus yacj fi'nzesaty Pedro fi'jni

1 ¹Jesucristo's selpisáa Simon Pedro yaasetj, tyajy jycaajnisá. Tyāasa naa carta's fi'jatstju, i'cue'shva cue'sh na'wēyrráa i'cue Dyusa's yaacywa'ja's ji'pju naa pa'ga. Tyā'wē yuucajnii cue'shtyi nwe'wesa Jesucristo nwe'wec. ²Dyusa's jiyui'cue sa' cue'shtyi jype'jsa Jesusa'sva jiyupa'ga, wala ew mfi'nzewe.

Dyus ma'wēsate' tyāa na'wēysa yuuna pa'jya' na'wēsaty mpaacuewe

³Tyāa pa'gatey cue'shtyi pa'yasa's jiyupa'ga tyā' jyuca ūscu cue'sh quīj peejini'sva, sa' quīj pcal yujva ji'pjmée fi'nzewa'ja'sva tyā'wēy. ⁴Tyā'wē Dyusa' quijte yujva shiingmée pu'chwa'ja's ji'pjrra írráac cue'shtyi's nwe'weya' puuty we'we. Tyā'wē yūute', i'cue'sha' naa quiwete jyuca ewmeesa canzh yajcyna fi'nzenijū tyuteerra, tyāa ma'wēsate' tyāa na'wēysa írráa yuuna pa'cjancu tyā'wē yūu. ⁵Tyāa pa'ga Dyusa' pu'chjina sūjwa'ja's ji'pjrra', jweeírráa ew fi'nzewa'ja's mji'pjuwe. Sa' ew fi'nzewa'ja's ji'pjrra', Dyusa's jweeírráa ew jiyuwa'ja's mpaacuewe. ⁶Dyusa's ew jiyuwa'ja's ji'pjrra', peecy cacue ewmée yūuya' yaacyni's nwēese'jmée fi'nzewa'ja's mji'pjuwe. Peecy cacue's nwēese'jmée fi'nzewa'ja's ji'pjrra', űuswa'j pa'tjeva chjāchja fi'nzewa'ja's mpaacuewe. Sa' tyā'wēsana ji'pjrra', Dyusa'srráa neewe'wena fi'nzewa'ja's mpaacuewe. ⁷Dyusa'srráa neewe'wena fi'nzewa'ja's ji'pjrra', yacjtjē'jwe'sh yacj ewrráa wēt fi'nzewa'ja's mpaacuewe. Tyā'wēsa's ji'pjrra', peeygāawa'ja's mji'pjuwe.

⁸Tyā'wēsaty i'cue'sha' jypa'garra jyuca nwēese'jrra', cue'shtyi jype'jsa Jesucristo's cyulterrāa jiyurra en iviit-sa yuumeene'cue. ⁹Nava maava tyā'wēsaty ji'pjmee'sa uyya' ājasamée na'wēsa yuuna, sa' Dyusa' pcaltyi's peltunāyteva pechcanasa yuuna. ¹⁰Tyāa pa'ga Dyusa' i'cue'shtyi tyjityjrra pa'yayā'tje', tyā'wēsaty i'cue'sh űuste bagachteva ji'pjuwa'jrrá's mpa'pchuwe. Tyā'wē yūurra' bagachte yujva Dyus tashu tyutemeene'cue.

11 Tyā'wē yūusatyi' tjēymée ūsni yuuna Jesucristo cue'shtyi nwe'wesa tashte u'cawa'ja's. Cyteea' bagachte yujva ptsuwa'jsame'.

12 I'cue'sha' tyā'wē yūuwa'ja's ew jiiarra āchj naa ensu isa pta'shniñũ tyutemée ūsne'cue, nava andya' tyā'wē yūuwa'ja's caayaquij'na nes yu'nja. 13 Andy uumeyrráava i'cue'shtyi' yu'cypejna nes yuuni ewna sũju'tj pechcanawe'shte. 14 Tyā'wēme', tyachmeyna andy uuwa'ja's caajiyu'cj cue'shtyi jype'jsa Jesucristo'. 15 Tyāa pa'ga nee uumey tyā'wē yūuwa'ja's yu'cypejna nes yu'nja, cyaj andy uuteva i'cue'sh ūuste neeyũute', pechcanamée cytey yuuna nes yuune'cue.

Jesucristo tyacue seena' walasa's uysáa

16 Cue'shtyi jype'jsa Jesucristo quijteva jyuca ājasa shawendna quiiwa'ja's pta'shtja'w tyā' ūus yajcyrra iishiinisameec yu'. Tyāa pa'gatey cue'sh yafyju yuu uytja'w tyacue seena' zhichcue walasa yuurra vyaate. 17 Tyā'wē Dyus cue'sh Tata' Jesucristo's wechana zhichcue eena' cweetjni'stja'w uy, sa' Dyusa' na'wēc we'we: Na' andy Nchi'c wendynisa', tyāa pa'ga wala wechana ūstju jĩ'c. 18 Cielujũ tyā'jĩna we'weni's cue'sh yuutja'w wēse'j, tjā'j vitste Dyus vyaac cyte cue'shtyi jype'jsa Jesucristo yacj ūsra'.

19 Tyā'wērráamée, vite ji'ptja'w tyāac wejy āate pta'shi'. Tyā' e'su Dyus ma'wē yūuwa'ja'sva dyiicjēy pta'shna fi'jrra nviitnisa'. Tyāa pta'shnisa's i'cue'sha' nwēese'jrra', ew yūsáa yuune'cue. Tyāaafi cus chji'ndyteva eena' cweetjsa', cjicjiitste estrella na'wēsa i'cue'sh ūuste pqui'tapcach. 20 Nava i'cue'sha' ew mjiyuwe: Dyus yuwe dyiicjēy pta'shna fi'jrra nviitnisa' maa yujva peecy ūusujrráa yajcyrra fi'jnisa yuumeeta'. 21 Tyāa pa'gatey Dyus quij yūuya'vateva dyiicjēy pta'shsawe'sha' Dyus yacj fi'nzesaty yu', sa' peecy ūusujrráa yajcyrra we'wemée, Dyus Espiritu cwe'we'tjety tyā'wē fi'jna ūsu'.

Dyus yuwe's iishiina pta'shsa

2 1 Tyā'wēteva, iishiisava ūsu'ty Dyus yuwe pta'shsatja'w jĩsa Israelwe'sh cshavysu, sa' i'cue'sh cshavysuva tyā'wēy iishiisa casejetyna. Tyāawe'sha' caypumba'jwa'jrrá's yajcyrra i'cue'sh jiyunimeete caapiya'jatyna. Tyā'wē yūuna nwe'wesa Cristo's yuu atsesa yuutyna. Nava tyā'wē yūusa' peequírráa wala dund vituwal'j ji'pjutyna. 2 Tyā'wē yũute', maanzcuēesava tyāawe'sh ewmeesa's caapiya'jnirrá's cytey yuuna fi'nzetyna, atsa' tyāawe'sh pa'garráa Dyus yuwe isasa yu' atsewe'weni yuuna. 3 Tyāawe'sha' i'cue'shtyi vyyu wala cutyil'j wēerra quijrráava iishiina caapiya'jatyna. Nava tyāawe'sh vituwal'j en pa'jana. Tyāa ente' iyumeetyna. Tyā'wē ewmeete pa'jwa'tjerráa yā'j nviitni ūsta' nyaffi.

4 Dyusa' tyajy angeleswe'sh yujtyva peltunaime' ewmée yūusa yā'tyji's. Tyāasafic infierno iiméj seena' wala chji'ndyte nvijtna ūsu' castigāywal'j

en äjtewe'sh. ⁵Dyusa' nyafii enteyva peltunaime' nasa ewmeesawe'shtyi'. Tyäsaſiic nasa ewmeesawe'shtyi iviituya' nus caajna üsu'. Naasáa Dyus yuwe pta'shsa Noé yuurraánac nwe'we vite' tyajy yattewe'sh sietesa yäljrra. ⁶Tyā'wēy Dyusa' Sodoma vite' Gomorra chjambtyi castigāyrra jyuca cjuutsrráa yuupcachcu iviitu. Tyā'wē yūunisa yu' maava nasa ewmeesa yuutyi' tyā'wērrarráa castigaī'nja jīna pta'shnisac yu'. ⁷Nava Lot yu'sa' nwe'wec, tyāa pitstjē'ja' Dyus dyi'pte wala ew fi'nzesa yu'c, tyāasac iiméj wala ewmée fi'nzesaty uyrra', wala ñusna fi'nze'. ⁸Tyāa pitstjē'j ew fi'nzesa' seena' ewmeesawe'sh yacj ūsrra', tyāawe'sh ewmée we'weni's wēse'jna ewmée yūuna fi'nzeni'sva uyrra een isac tyajy ūuste wala ñusna fi'nze'. ⁹Tyā'wēc Cristo' nwe'we', tyāa yacj utyaarra tyutemée fi'nzesa ñuste fi'nzesatyi's, sa' ewmée yūuna fi'nzesatyi's castigāywa'j vitrrac nviitu' castigāywa'j en äjtewe'sh.

¹⁰Sa' Dyusa' tyā'wērrarráa castigaīna ewmée yaacynirrá's nwēese'jrra canzh yūuna fi'nzesatyi's. Tyā'wē yūucajnī tyāawe'sha' Cristo jycaajni's weechna nwēese'jmée juuna'rráa yūusaata', sa' ūucjmeety wēeshu' ma'wēsatyva jyuca. ¹¹Naapcachja' angeleswe'sha' tyāa wēeshusaate jytjaacue chjāchja juuna'sata' naa yujva tyāa wēeshusaatyi's wēeshuna Dyus dyl'pte ewmeete nviitu'tsmeeta'.

¹²Tyā'wēteva tyāa nasa' tajcy na'wēsarráata' ew eena' yaacywa'j yu'sa' ji'pjmeeta', sa' ma'wēsava uwerra icjcajn upysarráata'. Dyusa's atsewe'wepa'ga tajcy na'wērráa uutyna. ¹³Vitety pcyuupa'ga tyāawe'shva pcyuuni uutyna. Weech weechtyi yaaqui' naa quiwete ptsuwa'jsa yacjrráa ūsrrava. Sa' tyāawe'sha' i'cue'sh yacj ūsrra', i'cue'shtyi caytjame'jna yuwe susnaty fi'nze' i'cue'sh pcjaacjenite pa'jrra.

¹⁴Tyāawe'sh ūuste ewmée yajcymée yu' neeyū'tsmeeta' u'y pu'jycjēwrra'. Pcal yūuwa'ja's watyi'tsmeeta'. Peecy cacue's achamée chjāchja pa'yacysatyi's tjēymeety pcalte cweete'je'. Vyua's iiméj wala ji'pju wēesarráata'. Tyāawe'sha' Dyus dyi'pte vituwa'jsata'. ¹⁵Ewsa's nvijtrra jypumbana ūsta', Beor nchi'c Balaan na'wēy yūsarráata'. Tyāa Balaana' ewmée yūurrac vyu's wala ji'pju wēe. ¹⁶Naa pa'ga tyajy al'jni jimba' nasa na'wēc juuna' we'we tyajy pcal yūu wēeni's. Tyā'wē yūurrac Balaan ewmée yaacyni's caanviitu'j.

¹⁷Tyāa nasa' pusu yu' ji'pjmeesa na'wēsata', sa' tāapjnava ma'wēga wejya jyūna u'jue' tyā'wēysarráata'. Tyāawe'sha' infierno iiméj seena' wala ūucjūucj chji'ndyte ūswa'jsata'. ¹⁸Tyāawe'sha' selpiiwa'jmeesarráana wala iiweych we'we'ty, sa' tyāawe'sh cacue pcal yūu wēenirrá's nwēese'jni yacj vitety pcalte cweete'je'ty, jypumbana fi'nzenijū casejrra ūssatyva. ¹⁹Tyāawe'sha' quīj yujnava nwēese'jmée fi'nzewa'ja' jī'ty, nava tyāawe'shíi yuuva cytey yuumée ewmée pcal yu'sa' pejca yujty nwēese'jna fi'nze'. Tyāa pa'gatey nasa maava quíja's wejy yaaquina na' tyā'sna nwēese'jna selpisaarra tyā'wē yuuna. ²⁰Tyā'wē nwe'wesa Jesucristo's jiyurra naa

quiwete ewmée yūuna fi'nzenijū casejsarrava, qui' tyāatyirráa nwēese'jya' shawenduuna. Atsa' tyā'wē yūusa' nyaffi fi'nzenite jytjaacue ewmeetec wetena pa'ja'. ²¹Tyāawe'sha' isa caapiya'jni's jiyumeevatsne' wejy ew yu', tyā'wē Dyus jycaajni's jiyurra qui' tyuteena ūsya'mée. ²²Tyā'wē yūusaty we'werrac na'jī': Alcu' pungarrava, qui' shawendcu tyajy punganitey. Atsa' cuchi' ew aterrava, tyity cjūchtec pēw jī'c.

Cristo shawendna quīiwa'j en

3 ¹Yacjtjē'jwe'sh, naa carta' e'su fi'jnisa yā'ja'. Nava e'nz cartatey i'cue'shtyi yu'cypejna fi'jatstju, ew jypa'yacy ūscajn. ²Na'wē Dyus yuwe pta'shsawe'sh nyafiitey we'wety nasa ewmeesa pa'jwa'ja's, naapcachja' Jesus jycaajnisawe'sha' Jesucristo jycaajni's i'cue'shtyi caapiya'jty tyāaty pechcanamée ūscajn yu'cypejetstju.

³Na'wē yūuwa'ja's cjuē'y mpa'yajcywe. Nmej en yuutste', nasa casejetyna tyāawe'sh cacue pcal yūu wēenirrá's nwēese'jrra Dyus jīi yu'sa' atsesa. ⁴Sa' na'jīna weechna paapēyityna: Cristo' shawendu'nja jīrra', ¿mteega yuu? Sa' naa quiwevatsva quīj yujva yu'ptjejnimee ūsa', nyaffi ma'wēne' pjeu'jni yuu tyā'wēesa ūsa' āchpcach jītya. ⁵Tyāawe'sha' yaaqui'tsmeeta' na'wē yu'ptjejni yuuc tyā'sa'. Nyaffi entey Dyus jycaajnite pjeu'jni yuuty cielu, quiwe, vite' yu'. Atsa' e'su yu'ptjejrira yu'a's fiic nvijt quiwenava tyā'wēy. ⁶Sa' vite ente' Dyusa' we'wena jycaajrra' nusa'scu caaj, atsa' quiwe tyāa entewe'sha' vituc yu'te. Tyā'snaty jiyumeerra yu'ptjejnime' jī'. ⁷Sa' āchj neeyūsáa ūsta' cielu vite' quiwe tyāaty' Dyus'ic we'werra nvijt nasa ewmeesaty jyuca naa quiwete iviituwa'j ente ipy naa quiwe's jyuca cambuna jīna.

⁸Yacjtjē'jwe'sh, vite na'wēsa'sva mjiyuwe: Cristo yacja' teeche ensarráa ma'c yuu meerra' mil ānusa ma'c yuu nava tyachsa yu' meea', tyāa na'wērrarráata'. ⁹Tyāa pa'gaty maafía' naa sūju': Cristo' shawendu'nja jīrrava iiméj wala tyach jytjēyutsa' jīnaty we'we'. Nava Cristo' tyā'wē jytjēyutsme'. Tyā' teechráa yujva vitumée ewmée yūuna fi'nzenijū dund shawendvatsa' sūjna ūytjasnarráa ūsa'.

¹⁰Tyāasa Cristo quīiwa'j ena' ājrráa yuuna yajcymée ūsiyna, pesweeva ma'wēga cus yaacynimeete pa'ja' tyā'wēy. Naapcachja' cielu' jyuca suweetyna seena' susniite, atsa' quījquījva jyuca ipyte chjavyna ptsuutyna. Quiweva tyā'wēy chjaviina cytee quījrraj ūstyna tyāa jyuca.

¹¹Tyā'wē seena' jyuca ptsuwa'jsa' tyāa pa'ga i'cue'sha' iiméj wala ew fi'nzewa'j jī'pji'cue, Dyus yacj utyaarra bagachte yujva tyutemée. ¹²I'cue'sha' Dyus quīiwa'j ena's wala pa'pchuna mūytjaswe. Tyā'wēme' tyāa ente' cielu' jyuca vitutyna ipyte, naapcachja' quījquījva jyuca yu'watyna ipy achate. ¹³Naapcachja' cue'sha' cielu' u'sesa quiweva u'sesa'stja'w ūytjasu', Dyusa' tyā'wēsa's ūsya' neeyūuc tyā'sna. Cyteea' quījva jyuca ewsarráa ūs yuuna.

¹⁴Tyāa pa'ga tyā'wě yūuwa'ja's ūytjasna ūsrra', wala jypa'yacy meswe, cyaj i'cue'sha' Dyus dyi'pte yuuwemeesa ew fi'nzesa yuune'cue tyāa ente'.
¹⁵Pechcananuwe na'wě cue'shtyi jype'jsa Cristo jytjēeyuutsa' nava tyāa yu' maava ewte neeyūuwa'ja's pacuecajn tyā'wě ūytjasna jytjēeyuutsa'. Cue'sh yacjtjē'j Pablova tyā'wēyrrāac we'wena fi'j Dyus caaūusutje'jni's. ¹⁶Tyajy fi'jni carta jyuca naatyirráac we'wena fi'j, nava maaíi yu' wala tjēyta' jiyuwa'j, atsa' achamée Dyus yacj chjāchja fi'nzesa' jiyumeerraty tyāa jiyunimeesaty tyāawe'sh ūuste fiy yajcyrra yu'ptjeje', tyāasaty Dyus libru ma'snava yu'ptjeje', atsa' tyā'wě yu'ptjejnisaíírrāa selpi'c tyāawe'sh vituwa'ja's.
¹⁷Tyāa pa'ga, yacjtjē'jwe'sh, wala mpa'yajcywe dyiicjēy pta'shni neeyūutsi'cue tyā'wēsaty, tyā'wě ewte yā'j fi'nzenijū tyuteerra ewmeesa īshiina caapiya'jnite weteya'mée, ¹⁸wejyva jweefírrāa cue'shtyi nwe'wesa Jesucristo's ew jiyurra peeygāawa'jrrāana ji'pjuya' mpa'pchuwe. Tyā'sa' bagachteva wechana nes yuuwal'jsatja'w.

SAN JUAN CARTA NYAFYTEWE'SH

Ītyi caafi'nze'ljwa'jsa vyaani

1 ¹ Nyafiitey ũsyā'cj yu' tyā'sna caajiyu'jna fi'jatstju i'cue'shtyi. Cue'sha' iiwēse'tja'w sa' cue'sh yafyju yuu iūytja'w. Īneerrāa uymée, cue'sh cusejuva iijya'ndytja'w Dyus Nchi'c ĩtyi caafi'nze'ljwa'jsa's. ² Ityi caafi'nze'ljwa'jsa' vyaac, atsa' uyrra' tyāa vyaani's cue'sha' pta'shi'tja'w. Tyāasatja'w āchja' i'cue'shtyiva caajiyu'ju', bagachte yujva ptsumée ĩtyi caafi'nze'ljwa'jsa Ney yacj ũssa cue'shtyi vyaapa'ga. ³ Cue'sh wēse'ljra yafyjuva uyni's āate pta'shitstja'w, i'cue'shva cue'sh yacj utyaarra fi'nzeczaj, cue'shva ma'wētca'w Dyus cue'sh Tata yacj vite' Nchi'c Jesucristo yacj utyaarra fi'nze' tyā'wēy. ⁴ Tyā'wētja'w caajiyu'jna fi'ja', i'cue'shva wechana fi'nzewa'ja's ji'pjucajn.

Dyusa' eena'sa'

⁵ Jesucristo na'wēc caapiya'lj tyā'sna i'cue'shtyi pta'shitstja'w: Dyusa' eena'sa'. Tyāa pa'ga tyajy tashte' quīj yujva chji'ndysa meea' jī'c. ⁶ Atsa' maava Dyus yacj fi'nzena ũstju jīrrava, Dyus jycaajni's nwēese'jmée chji'ndyte fi'nzerra', ĩshiisa yuuna. ⁷ Nava Dyusva ma'wē eena'te ũsna tyā'wēy cue'shva eena'te fi'nzete', cue'sh pwe'sh puuty puimée zhichcue fi'nzewa'lj casejena, atsa' Dyus Nchi'c Jesucristo eea' cue'sh pcaltyi jyuca cjucjuna.

⁸ Tyā'jīte', quīj pcal yujva ji'pjmeetja'w jīvā'nja'w na' peequfīrrāa ya'ĩshiisa yu'nja'w. ⁹ Nava tyā'wē yajcymée, pcalsayujtj sūjna Dyusa's perdon pēyi'nja'w atsa' tyā'wē yūusa's quim yujnava wa'lmée jyuca cytey peltunāyrra ewmeesa's jyuca nuyaateena. ¹⁰ Tyā'jīte' quīj yujva ewmée yūusameetja'w jī'nja'w na' Dyus we'werra': Ewmeesata' jīrra' ĩshiija'c jīsa yu'nja'w.

Dyus tashte cue'sh ju'ngu we'we pu'chsa' Cristo'

2 ¹Andy luuchwe'sh, pcalte fi'nzecajmentju pta'shna fi'ja'. Tyā'wēteva maaí yu' pcalte wetevá'cue nava Dyus tashte cue'sh ju'ngu we'we pu'chsa ji'ptja'w, tyā' Jesucristo' isasa yu's jyuca cytey yuusáa. ²Jesucristoc cue'sh pcal pa'gate vite' naa quiwete nasa jyucaysa pcal pa'gate yā'jrra ya'ducjrra uu.

³Dyus jycaajnyityi's cytey yuuna fi'nzerra yuurráa Dyusa's jiiyujtj sūjwa'ja's ya'ji'pjuna. ⁴Nava maaí yu' Dyusa's jiitj jīvāana nava tyajy jycaajnyity cytey nwēese'jsame' tyā' īshiisa yuuna. ⁵Maava Dyus jycaajnyity cytey nwēese'jena tyā' Dyus peeygāani's ūuste jyuca ji'pjsarra tyā'wē yuuna. Tyā'wē yuurráa Dyus yacj fi'nzena ūsne'tca'w sūjwa'ja's ya'ji'pjuna. ⁶Dyus yacj fi'nzena ūstju jīsa', Jesucristo na'wēy quīj pcal yujva ji'pjmée fi'nzena.

Dyus jycaajni u'sesa

⁷Andy peeygāanisawe'sh, i'cue'shtyi' Dyus jycaajni u'sesa pta'shna fi'jatsmeetj, Dyus jycaajni nyaffi pta'shte iiwēse'lyā'ji'cue tyāafírrá'. ⁸Tyā'wērrava na'wē nyaffi jycaajni's caayaqui'jna fi'jatstju tyā' u'sesa na'wē yuj caseje'c. Tyajíírráa i'cue'sha' Cristo's ūusuj jyuca peeygājrra', i'cue'sh pwe'shva tyā'wēy yūuna fi'nzetsi'cue. Tyāa pa'ga āchja' scjēuutsa' jypumbana chji'ndyte fi'nzenisa', atsa' jypumbamée fi'nzeni eena'sa vyaatsa'.

⁹Maaí' jypumbamée eena'te ūstju jīrrava tyajy yacjtjē'ja's atsena, tyā' jypumbana chji'ndyte fi'nzesarra tyā'wē yuuna. ¹⁰Jypumbamée eena'te fi'nzesa' tyajy yacjtjē'ja's ajtsemée peeygājna fi'nzena, quīj yujva pcalte cweete'jwa'j yu'sa' vitmée. ¹¹Nava tyajy yacjtjē'ja's ajtsena fi'nzesa' chji'ndyte uyya' ājamée mtee pa'jwa'ja's yuuva jiimée jypumbana fi'nzesarra tyā'wē yuuna.

¹²Andy luuchwe'sh, i'cue'sh pcala' peltunāynity yuu Jesucristo uute', tyāa pa'gatj fi'ja'. ¹³Tyā'wēy tjē'jsawe'sh, i'cue'sha' na'wē nyaffi entey Jesucristo' ūsyā'cj yu' tyā'sna jiyupa'gatj fi'ja'. Sa' pitstacywe'sh, echtjē'ja's cnayi'cue tyāa pa'gatj fi'ja'.

Andy luuchwe'sh, Dyusa's jiyui'cue tyāa pa'gatj fi'ja'. ¹⁴Tjē'jsawe'sh, na'wē nyaffi entey Jesucristo' ūsyā'cj yu' tyā'sna jiyupa'gatj fi'ja'. Sa' pitstacywe'sh, Dyus pta'shni's ūuste yu'acjrra echtjē'ja's ūucjmée cnayi'cue tyāa pa'gatj fi'ja'.

¹⁵Āchja' cyanzsay mpa'yajcywe, naa quiwetewe'sha's yajcyya'mée. Maava naa quiwetewe'sha's yaacysa' Dyusa's yaacysameerra tyā'wē yuuna. ¹⁶Tyāa pa'gatey naa quiwete' na'wē yaacynisarráa ūsta': naa cacue' canzh yūuna fi'nzeni, yafyju uyrra canzh ūus yaacyni, quījva ji'pjrra' iwejch iwejch yajcyna fi'nzenisarráa ūsta'. Tyā'wē ewmeesa

yuurrá'scu naa quiwe' ūsu', atsa' tyā'wēsa' Dyus jytjāasnisame'. ¹⁷Naa quiwete tyā'wē yūuwa'jrrāana yajcyna fi'nzesa' jyuca ptsuwa'jsata' pety naa quiwe yā'jrra. Nava Dyus jytjāasnirrá's cytey yuusa', bagachte yujva ptsumée ityi fi'nzewa'ja's ji'pjutyna.

Dyus Espiritu' caajiyu'ju'c maa īshiinisateva, tyā'wēy maa isasateva

¹⁸Andy luuchwe'sh, āchja' nmej en ājc. I'cue'sha' iiwēse'jne'cue Cristo's atsesa pa'jana jīni's. Tyāasa āchja' wala kuj ūsta' Cristo's atsesa. Tyāa pa'gatja'w jiyu' nmej en yuutsteva. ¹⁹Tyāawe'sha' cue'sh yacj ūswa'jsamée ne'ta yu', tyāasaty cue'sh cshavyuj casej. Cue'sh yacj ūswa'jsavatsa', tyuteewa'jmée ne'ta yu'. Jyucay yu' cue'sh yacj fi'nzewa'jsameetyna, tyāasaty tyā'wē tyutee.

²⁰Nava i'cue'sha' Dyus Espiritu's ūuste ji'pji'cue, tyāasa maa isasateva tyā'sa' jypumbawa'jsamée i'cue. ²¹I'cue'sha' isasa's jypumbawa'jsamée i'cue naa pa'gafirráatj fi'ja', peecy jii i'cue īshiinisa' bagachte yujva isa caseje'tsme'.

²²¿Quim tyā'wē īshiisa yuucy? Jesusa' Dyus caajnisame' jīna we'wesa tyā'wē īshiisa yuuna. Tyā'wē we'wesa' Dyus Nchi'cnava jypa'gamée yā'jrra', Neynava jypa'gasameerra tyā'wē yuuna. ²³Maava Dyus Nchi'ca's atsesa', Neynava atsesa yuuna. Nava Dyus Nchi'ca's jypa'gasa', Neynava jypa'gasa yuuna.

²⁴Tyājī nyaffi pta'shni Dyus yuwe isasa's i'cue'sh ūuste ew mjaawwe. Tyā'wē yūurra' Dyus Nchi'c yacj tyutemée fi'nzene'cue, sa' Ney yacjva tyā'wēy tyutesamée yuune'cue. ²⁵Atsa' tyā'wē yūusatyi' Jesucristo' peesya' neeyūuc bagachte yujva ptsumée ityi fi'nzewa'ja's.

²⁶I'cue'shtyi maava caypumba'jwe'shtetj pta'shi' jypa'yacyaj. ²⁷Nava i'cue'sha' Dyus Espiritu's ūuste ji'pji'cue na' maa īshiinisana atsa' vite' maa isasateva tjēmée jiyune'cue, tyāa pa'gatey Dyus Espiritu' quījteva jyucac caajiyu'ju', sa' tyajy caapiya'jni' īshiinisameeta'. Tyā'wē jiyurra', Cristo yacj tyutemée fi'nzene'cue.

²⁸Andy luuchwe'sh, āchja' Cristo yacj tyutemée mfi'nzewe. Tyā'wē fi'nzerra', tjaamemée wechana jypa'ga'nja'w Cristo' naa quiwete quījrra vyaateva. ²⁹I'cue'sha' jiiyā'ji'cue Jesucristo' quījteva jyuca ew yūusaateva, atsa' maava tyāa na'wēy quījteva jyuca ew yūuna fi'nzerra', Dyus luuchrra tyā'wē yuuna.

Cue'sha' Dyus luuch yā'tja'w

3 ¹Dyus peeygāani' seena' yuj wala' tyā'sna miiyajcywe. Tyā'wērrafic andy luuchwe'sh jīna cysusu' cue'shtyi'. Atsa' cue'sha' tyajy luuch yujtja'w. Tyāa pa'gaty naa quiwetewe'sha' cue'shtyi' jiyu'tsmée, Dyusa's jiimeeta' naa pa'ga. ²Andy peeygāanisawe'sh, cue'sha' Dyus luuch yā'tja'w. Nava Cristo quījte', ma'wē seena' zhichcue neeyūuwa'jsa

ne'tca'w tyāa yu'sa' ūus yajcyrra cpajcyya' yu' āja'tsmeetja'w. Nava Jesucristo vyaate', tyāa ma'wēsate' wej yujva fiymée tyāa na'wēy neeyūuwa'l yu'sa' jiitja'w. ³Atsa' maava tyāa na'wēy yuu wēesa' pcal ji'pjmée fi'nzena, Jesucristova ma'wē quīj pcal yujva ji'pjmeesana tyā'wēy.

⁴Maava pcalte fi'nzesa' Dyus jycaajnyity nwēese'jmée ūsrra tyā'wē yuuna, atsa' Dyus jycaajnyity cytey yuumée ūsni' pcal firrá'. ⁵I'cue'sha' jii i'cue Jesucristo' cue'sh pcaltyi tyujndeya'c naa quiwete quīj, nava tyāa yu' quīj pcal yujva ji'pjmeesac yu'. ⁶Tyāa pa'ga maava Jesucristo yacj fi'nzesa' pcalte fi'nze'tsme!. Atsa' maava pcalte fi'nzesa' Jesucristo's iuymeena, sa' tyāa ma'wēsateva jiimeesarra tyā'wē yuuna. ⁷Andy luuchwe'sh, mpa'yajcywe, i'cue'shtyi maava caypumba'jwe'shte. Jesucristo na'wēy ew yūuna fi'nzesa yuurráa, ewsa yuuna. ⁸Nava pcalte fi'nzesa' echtjē'l yacj ūssarra tyā'wē yuuna, tyāa pa'gatey echtjē'l'ja' nyafiitey pcalsac yu'. Tyajíirráac Dyus Nchi'ca' echtjē'l'j mjīini's iviituya' quīj naa quiwete.

⁹Dyus luucha' maa yujva pcalte fi'nze'tsmeeta', tyāa pa'gatey tyāawe'sh ūusa's Dyus yu'ptjerrra nviitnisata' naa pa'ga. Tyāasa pcalte fi'nzewa'jsameeta' Dyus luuch yā'ja'. ¹⁰Tyāa pa'gac ya'jiyu' maa Dyus luuchteva. Sa' maa tyā'wē echtjē'l' luuchtyiva ya'jiyu'c: Maava ewmeerráa yūuna tyajy yacjtjē'l'jwe'shtyi ajtsena fi'nzesa' tyāawe'sha' Dyus luuch meeta'.

Teechsa na'wērraj puuty ya'peeygājna fi'nzewa'ja'

¹¹I'cue'sha' Cristo caapiya'jni's iiwēse'jne'cue tyā' na'wēc yu': Teechsa na'wērraj puuty ya'peeygājnac fi'nzewa'l yu'. ¹²Echtjē'l' yacj ūssa Caina' tyajy nyacja's icju, nava cue'sha' tyāa na'wēy yuuwa'jsameetja'w. ¿Quīj yuutega icj vacy? Cain mjīini' ewmeec yu', atsa' nyacj mjīini' ewsa yu' tyāa pa'ga yuurráac icj.

¹³Andy yacjtjē'l'jwe'sh, cuj yaacynuwe naa quiwetewe'sh ajtseteva. ¹⁴Tyāa pa'gatey cue'sha' vituwa'l'ju casejrra bagachte yujva ptsumée ūtyi fi'nzewa'tje pal'satja'w, tyāasa firráatja'w yacjtjē'l'jwe'shtyi peeygāja'. Nava maava tyajy yacjtjē'l'ja's peeygāasame!, tyāa vituwa'l'ju casejsameerra tyā'wē yuuna. ¹⁵Maava tyāawe'sh yacjtjē'l'jwe'shtyi ajtsena fi'nzesa', nasa's icjsa na'wēysa firrá'. Atsa' i'cue'sha' jii i'cue nasaa icjsa' quim yujva ptsumée ūtyi fi'nzewa'ja's ji'pjumeetyna. ¹⁶Jesucristo' cue'shtyi peeygājrra nwe'weya' tyajy ūtyi fi'nzeni's iviituc. Tyāa tyā'wē peeygāani yaase!. Atsa' cue'shva tyā'wēy cue'sh yacjtjē'l'jty peeygājrra cue'sh ūtyi fi'nzeni's iviituwa'l' ji'ptja'w. ¹⁷Nava cue'sh yacjtjē'l'j peeiina ūste uyrrava quijrráava iijtyujndemeerra!, ¿ma'wē Dyus peeygāani's cue'sh ūste ji'ptja'w jīya' ājacytja'w? ¹⁸Andy luuchwe'sh, cue'sh peeygāani' yuwejurráa peeygāa we'wewa'l'jme!. Isa peeygājatsrra', āate caavya'ja'jwa'ja' quijrráava pu'chna.

**Cue'sh ũuste ewrráa ũusutjerra', Dyus dyi'pte
jypumbamée ũste tyā'wē yuuna**

¹⁹Tyā'wē yūurra', isa Dyus luuchrra tyā'wē yu'nja'w, sa' Dyus dyi'pteva jypumbamée ũsne'tca'w sūjwa'ja's ji'pju'nja'w. ²⁰Nava quījterráava jypumbaatste', cue'sh ũusrráa yujva caayaqui'ji'c atsa' Dyusa' cue'sh ũuste jytjaacue ew jiisa' atsa' tyajy dyi'pte ishiiya' ājame'nja'w. ²¹Andy peeygāanisawe'sh, cue'sh ũuste ewrráa ũusutjena atsa' Dyusa' pasuna sūjrra ²²Dyusa's pēyi'nja'w atsa' tyā' jyuca ũsuna tyajy jycaajny nweese'jrra Dyus jytjāasni's cytey yuuna fi'nzesatyi'. ²³Dyusa' na'wē yūuwa'ja'scu jycaaja': tyajy Nchi'c Jesucristo's ũuste jypa'garra, teechna na'wērraj puuty ya'peeygājnac fi'nzecaaj. ²⁴Dyus jycaajny nweese'jsa' Dyus yacj fi'nzesa yuuna, atsa' Dyusva tyāawe'sh yacj fi'nzena. Dyusa' cue'shtyi tyajy Espiritu's peescu, tyāa pa'ga cue'sha' jii'tja'w Dyusa' cue'sh yacj ũswa'jsateva.

Dyus Espiritu's ji'pjsa vite' Cristo's atsewa'j espiritu's ji'pjsa

4 ¹Andy peeygāanisawe'sh mpa'yajcywe, tyā'wē Dyus Espiritu's ji'ptja'w jisatyi' tyā'wē yujtyna sūjmée mfi'nzewe. Tyā'jisatyi' ew jiyuwa'ja' Dyus Espiritu's ũuste ji'pdyijteva jiyuya'. Tyā'wēme' naa quiwete iiméj wala penatsta' Dyus yuwe pta'shsatja'w jīna ishiiina u'jusa. ²Na'jisarráa Dyus Espiritu's ũuste ji'pjsa yuuna: Dyus Nchi'c Jesucristo' cue'sh na'wēy nasaa yuurrac vyaa jīsa yuurráa isa we'wesa yuuna. ³Atsa' Jesusa' cue'sh na'wēy nasaa yuurrac vyaa jīsame', tyā' Dyus Espiritu's ũuste ji'pjmeena, wejyva Cristo's atsesa yuuna. I'cue'sha' iiwēse'jne'cue tyā'jīna we'wesa pa'jatyna jīni's. Tyāasa ũsyā'tja' naa quiwete.

⁴Andy peeygāanisawe'sh, i'cue'sha' Dyus luuchi'cue, tyāasai'cue īshiisatyi' cnay, tyāa pa'gatey Dyus Espiritu i'cue'sh ũuste ũssa' tjaacue chjāchjasa' naa quiwete īshiisawe'sh ũuste ũssameerra'. ⁵Tyāa īshiisa' naa quiwetewe'shta'. Tyā'wērra'fity naa quiwetewe'shrráana pta'shi', atsa' nasa naa quiwetewe'sha' nweese'je'ty. ⁶Nava cue'sha' Dyus luuchtja'w, atsa' maava Dyusna jiisa' cue'sh pta'shni's nweese'je'ty. Nava Dyus luuchmeesa', cue'sh pta'shni's nweese'je'tsmeeta'. Cyaj cue'sha' jiyu'nja'w quim Dyus Espiritu's isa ũuste ji'pjteva, tyā'wēy quim caypumba'jsateva.

Peeygāanisa' Dyus tashuj yuja'

⁷Andy peeygāanisawe'sh, puuty ya'peeygājna fi'nzewa'j ji'ptja'w, tyāa pa'gatey peeygājna fi'nzewa'ja's Dyuscu pees naa pa'ga. Atsa' maava peeygājna fi'nzesa' Dyus luuchta' Dyusa's jiisa. ⁸Dyusa' peeygāasa', atsa' peeygāawa'ja's ji'pjmeesa' Dyusa's jiimeesarra tyā'wē yuuna. ⁹Dyusa' cue'shtyi peeygāani's āate caavya'ja'cj tyajy Nchi'c teechnráasanava naa quiwete caajrra, tyāa nwe'wete' psumée ityi fi'nzewa'ja's cue'sh ji'pjucajn.

¹⁰Na'wē yūunisarráa peeygāani' yaase': Cue'sha' Dyusa's atsesateva, tyāa yu' cue'shtyi peeygājrrac tyajy Nchi'c macue teechrrásateva cue'sh pcalpa'gate uuwa'jsa vitrra caaj.

¹¹Andy peeygāanisawe'sh, Dyusa' tyā'wē cue'shtyi peeygājte', cue'shva tyā'wēy puuty ya'peeygājna fi'nzewa'l jip'tja'w. ¹²Quim yujva Dyusa's uysa yu' meetyna. Nava cue'sha' puuty ya'peeygājna fi'nze'nja'w atsa' tyā'wē yūute', Dyusa' cue'sh ūuste nes yuuna, ats yuurráa cue'shva tyāa na'wēy ew peeygāasa yu'nja'w. ¹³Cue'sha' Dyus yacj nes yuute', tyāava tyā'wēy cue'sh ūuste nescu yu', tyāa pa'gaírrác tyajy Espiritu's cue'sh ūuste nvijt. ¹⁴Cue'sha' iuytja'w Dyusa' tyajy Nchi'ca's caacj naa quiwete nasaty nwe'wecajn, tyāasatja'w cue'sha' áate pta'shi'. ¹⁵Maava Jesusa' Dyus Nchi'ca' jīna we'wesa' tyā' Dyus yacj ūssarra tyā'jīna, atsa' Dyusva tyajy ūuste nes yuuna.

¹⁶Āchja' jiyutja'w Dyusa' cue'shtyi tyacue wala peeygāani's. Dyusa' peeygāasa', atsa' maava peeygājna fi'nzesa', Dyus yacj fi'nzesa yuuna, atsa' Dyusva tyāa yacj nes yuuna. ¹⁷Tyajuc cue'sh peeygāawa'ja's isa jyucate ya'jip'juna ya'pa'ja'. Tyā'wē yūunijū' castigāywa'l ente' ūucjme'nja'w, tyāa pa'gatey naa quiwete cue'sha' Jesucristo na'wēy peeygāasa yu'nja'w naa pa'ga. ¹⁸Dyus tyacue wala peeygāasa's ¿ma'wē ūucjwa'l yuucy? tyāa pa'gatey tyajy peeygāanisa' cue'sh ūucjni's jyuca iviitu'c. Atsa' ūucjsa' castigāywa'jne'tca sūjrra ūucjuna, sa' tyā'wē yaacysa' cue'shtyi Dyus tyacue wala peeygāani's acha ew jiimeerra tyā'wē ūucjuna.

¹⁹Dyus cjuē'ycu cue'shtyi peeygāj, tyāa pa'gatja'w āchja' cue'shva Dyusa's peeygāja'. ²⁰Maava Dyusa's peeygāja'tj jirrava yacjtjē'ja's ajtsena fi'nzesa', ishiisa yuuna. Peecy yacjtjē'l uyna fi'nzenisa's ajtserra', ¿ma'wē yūurra Dyus uynimeesa's peeygāja' ājacy? ²¹Dyusa' na'wēc jycaaja': Dyusa's peeygājatsrra', tyā'wēy peecy yacjtjē'jnava peeygāawa'ja' jī'c.

Dyus luucha' ewmeesa's nwēese'jmée jyuca cnayu'ty

5 ¹Maava Jesusa' Dyus tashu yuusa Cristona sūjnarráa ūuste yaacysa', Dyus luuchrra tyā'wē yaaquina. Dyusnava peeygājatsrra', Dyus luuchtyiva peeygājna fi'nzewa'ja'. ²Dyusa's peeygājna tyajy jycaajnityi' nwēese'jrra', Dyus luuchtyiva peeygāasarra tyā'wē yu'nja'w. ³Dyusna peeygāani tyā'wē tyajy jycaajnityi' nwēese'jnisa'. Tyajy jycaajni' jytjaacue yu' tjēysameeta'. ⁴Maava Dyus luucha' naa quiwete ewmeesa's nwēese'jmée jyuca cnayu'ty. Jesucristo's ūusuj jyuca yaacypa'ga yuurráac naa quiwete ewmeesa's ya'cnayu'. ⁵Maava Jesusa' Dyus Nchi'cna sūjna ūusuj jyuca yaacysa yuurráa, naa quiwete ewmeesa's nwēese'jmée cnayuutyna.

Jesucristo' Dyus nchi'cteva caajiyu'jsa' naata'

⁶Jesucristo naa quiwete quíisa' Dyus Nchi'cteva caajiyu'jsa' naata': Yu'te bautisāyni vite' cluuste uuni. Nava yu'te bautisāynijūrráa yu'

achaméec ew ya'jiyu', naasáa cluuste uuniisa yacj tyāa e'nz jwendsa yacj yuurráac isa ew ya'jiyu' Dyus Nchi'cteva. Tyā'sa' Dyus Espirituc tyā'jī'. Tyajy we'weni' isasata'. ⁷Jesucristo' Dyus Nchi'cteva jiisa cielute' tecjta': Dyusa', vite! Jesucristo' írrá', vite! Dyus Espiritu'. Atsa' tyāa tecjsa' tyāa na'wërrarráaty we'we'. ⁸Tyā'wëy Jesucristo' Dyus Nchi'cteva jiisa naa quiwete' tecjta': Dyus Espiritu, vite' yu'te bautisâyniisa vite' cluuste uuniisa. Atsa' tyāa tecjsa' tyāa na'wërrarráaty we'we'. ⁹Pitstjê'jwe'sh pta'shnirráa yujnava isa yuj we'wene' sūjnatja'w jypa'ga'. Atsa' Dyus we'weni' yu' wejy jytjaacue isasa yujna sūjna jypa'gawa'j ji'ptja'w, tyāa pa'gatey Dyus yuuc we'werra': Jesucristo' Andy Nchi'ca' jī' naa pa'ga'. ¹⁰Jesucristo' Dyus Nchi'ca' sūjna fi'nzesa', Dyus Nchi'ca's ūuste jypa'gasarra tyā'wë yaaquina. Nava Dyus we'werra': Jesucristo' Andy Nchi'ca' jīni's maava jypa'gasame', Dyusa' íshiija'c jīsa yuuna, tyā'wë Dyusa' isane' we'we' sūjmeerra'. ¹¹Jesucristo' Dyus Nchi'ca' jīna we'werra', Dyusa' cue'shtyi' ptsumée ūtyi fi'nzewa'ja's peescu jīnisa', tyāa yuurráa ptsumée ūtyi fi'nzewa'ja's ji'pjsa' naa pa'ga'. ¹²Tyāa pa'ga' maava Dyus Nchi'ca's ūuste jypa'gasa', ptsumée ūtyi fi'nzewa'ja's ji'pjsa' yuutyna. Nava Dyus Nchi'ca's ūuste jypa'gasame', ptsumée ūtyi fi'nzewa'ja's ji'pjmeesa yuutyna.

Pcal perdon ji'pjmeesava ūsta'

¹³Dyus Nchi'ca's ūuste jypa'gasa', ptsumée ūtyi fi'nzewa'ja's ji'pjne'tca'w sūjna jiyucajntju i'cue'shtyi pta'shna fi'ja'. ¹⁴Atsa' tyā'wë yaacysatyi' Dyusa' pasu'c tyajy jytjāasnirrá's pytjaa we'wena pējyte' tyā'sa' ew jiitja'w. ¹⁵Cue'sh pytjaa we'weni's Dyusa' wëse'jna ūsteva ma'wë ew jiitca'w tyā'wëy cue'sh pēyni's jypa'gawa'ja'sva ew jiitja'w.

¹⁶Yacjtjê'j pcalte fi'nzena ūsteva tyāa pcala' perdon ji'pjte uyrra', maava Dyusa's neewe'wewa'ja' tyāa pcalsa pa'gate, atsa' yacjtjê'j tyā'wë fi'nzesa's Dyusa' ūtyi fi'nzewa'ja's peesuna. Nava pcal perdon ji'pjmeesa ūsta' tyā'wëstate fi'nzena ūste yu', Dyusa's neewe'wewa'ja's jycaja'tsmeetj. ¹⁷Qujva ewmée yūuni' pcalrrarráata', nava perdon ji'pjta'.

¹⁸Cue'sha' jiitja'w maava Dyus luuch yā'ja' peena yu' pcalte fi'nze'tsme'. Tyā'wë yūuwe'shte Dyus Nchi'ca' tyajy cusetec jyaawu' echtjê'j suwcajmén. Tyāa pa'gac pcalte fi'nze'tsmée.

¹⁹Cue'sha' Dyus luuch yujtja'w, nava naa quiwete nasa jyucaysa Dyusna yajcymée fi'nzesa' echtjê'j cusetewe'shta' tyā'sa' jiitja'w.

²⁰Jiitja'w Dyus Nchi'c naa quiwete qujrra', Dyus ūtyisa's jiyuwa'ja's cue'shtyi ūscu. Tyāa pa'ga' Dyus ūtyisa Nchi'c Jesucristo yacj fi'nzena ūstja'w. Tyāa Dyus ūtyisa' bagachte yujva ptsumée ūtyi fi'nzewa'ja's cue'shtyi peessa'. ²¹Andy luuchwe'sh, mpa'yajcywe dyusmeerrá's yaacyni's.

SAN JUAN CARTA E'STEWE'SH

Dyus we'weni isasa's jiisa' peeygāawa'ja's ji'pju'ty

¹Naa carta's fi'jsa' na'wē tǵē'j jīna cysusu'ty tyāatj fi'ja', pe'sh Dyus tyjityjnisa vite' i'cue luuchtyi. Andya' tyāawe'shtyi' isa peeygāayuju'tj. Atsa' andyrrāa tyā'wē yu'tsmeetj. Dyus we'weni isasa's jiyusa yu' jyucaysaty tyā'wē peeygāja'. ²Dyus we'weni isasa' cue'sh yacj nescu yu', sa' bagachteva cue'sh ūuste nes yuuna. Tyā'wē Dyus we'weni isasa's ūuste ji'pjrratj i'cue'shtyi peeygāja'. ³Cue'sh Tata vite' tyajy nchi'c Jesucristo tyāa e'nzsa wala peeygājrra i'cue'shtyi pu'chjityna ewrrāa fi'nzecajn.

⁴Tyā'wē luuch maafi yu' Dyus cue'sh Tata jycaajni's cytey nwēese'jna fi'nzena ūste uyrra' wala wecha'tj. ⁵Sa' āchja', pe'sh, mpa'yajcywe, puuty ya'peeygājna fi'nzewa'ja's neewe'wetstju. Na'wē fi'jni' u'se jycaajnisame'. Nyaffi jiyutja'w tyāafīrrā'. ⁶Dyus jycaajnityi' cytey nwēese'jna fi'nzete', puuty ya'peeygājna fi'nzewa'j casejena. I'cue'sha' nyaffi iiwēse'jyā'ji'cue Dyus jycaajnityi' tyā' puuty ya'peeygājna fi'nzewa'ja'.

Īshiina u'jusa

⁷Naa quiwete īshiisa wala cuj casejrra u'juta'. Tyāawe'sha' Dyus Nchi'c Jesucristo' cue'sh na'wēy nasaa yuurrac vyaa ji'tsmeeta'. Tyā'wē we'wesa' īshiisa yuuna, sa' Cristo's atsesarra tyā'wē yuuna. ⁸Tyāa pa'ga i'cue'sha' mpa'yajcywe, Dyus yacj fi'nzepa'ga cielute ducjwa'ja's iviitumée, wejyva macueteva jyuca jypa'gawa'ja'srrāa myajcywe.

⁹Cristo ma'wē caapiya'tje' maava tyā'wēy caapiya'jsame' Dyus yacj fi'nzesameerra tyā'wē yuuna. Nava Cristo caapiya'jnirrá's nwēese'jna fi'nzesa', Dyus yacj fi'nzesarra tyā'wē yuuna, sa' Dyus Nchi'c yacjva tyā'wēy fi'nzesa yuuna. ¹⁰Tyā'wē maava i'cue'sh yat-su pal'jrrava Cristo caapiya'jni'srrāa pta'shsame's wechana jypa'ganuwe. ¹¹Tyā'wē wech u'jue'nga jīna tyāawe'shtyi jypa'gasa' ewmée yūuya' pu'chsa yuuna.

Pablo yuu puuty uyya' u'jya' yaacyni

¹²I'cue'shtyi wala we'wewa'j ji'ptju, nava etste tyã'wẽ we'wena fi'jya'vameetj. Andy yuu peecy yujya'vatj i'cue'sh yacj teechea na'wẽrraj puuty uyya', sa' puuty uyrra' jyucaysa wechwecha yaaqui'nja'w.

¹³I'cue yacjtjẽ'jva Dyus tyjityjnisa' atsa' tyajy luucha' yuwe wechaa caja'ty. Tyã'wẽrraa fi'jatstju.

SAN JUAN CARTA NMEJTEWE'SH

Gayo ew yūuna fi'nzeni's we'weni

¹ Tjē'j jīna cysusu'ty tyāatj fi'ja' naa carta's andy peeygāanisa Gayo's wechana.

² Yacjtjē'j peeygāanisa, andya' iindy pa'gate Dyus yacj puuty we'wena ūstju quījteva ewrrāa ātsa'mée fi'nzecajn, ma'wēnga Dyus yacj chjāchja fi'nze' tyā'wēy. ³ Indya' Dyus we'weni isasa's jypumbamée Dyus yacj ew fi'nzeni's yacjtjē'jwe'sh pa'jrra pta'shte', wala wechatj. ⁴ Andya' quīj yujnava tyā'wē yu' wecha'tsmeetj, naasāa andy luuchwe'sh tyā'wē Dyus we'weni isasa's jypumbamée ūsta' jīna pta'shni yuurraac jytjaacue ya'wecha'.

⁵ Yacjtjē'j peeygāanisa indya' bagachteva pu'vitumée selpiina ūsngu vite quiweju yacjtjē'jwe'sh cytee pa'jsaty pu'chna. ⁶ Tyāawe'sha' ayte yacjtjē'jwe'sh pcjaacjenite pta'shtyi iindy peeygājna pu'chni's. Tyāasa bagachteva meen pu'ch tyāawe'sh dyi'tje u'jwa'j peejini's Dyus wechacajn. ⁷ Tyāawe'sha' casejty Jesucristo caapiya'jni's pta'shna u'juya', nava dyi'tje u'jwa'j peejini's pēyi'tsmeeta' Dyusa's jiimeesa yuutyi's. ⁸ Tyāa pa'ga cue'sha' quīj peejiitsteva pu'chji ji'ptja'w Dyus we'weni isasa's pta'shsatyi'. Tyā'wē yūunisa Dyus yuwe's jyucaysa ja'ndarraaj mjiini yaase'.

Diótfrefes ewmée yūuna fi'nzeni

⁹ Andya' teech carta fi'tj cytee pcjaacjesawe'shtyi, nava Diótfrefes yu' nwēese'jme' cue'sh we'weni's tyāarrāa jycaajna ūs wēerra. ¹⁰ Tyāa pa'ga andya' pa'jrra tyā'sa' pa'yarra we'we'nja, tyā'wē yuwe susna cue'shtyi nuywe'wena u'jupa'ga. Tyā'wērrāa yūumée, vite ecaju yacjtjē'jwe'sh pa'jsaty jypa'ga'tsme', sa' vite jypa'ga wēesa yuutyi's ajtserra tyāa pcjaacjenijū cutyi'ji'c.

¹¹ Yacjtjē'j peeygāanisa, ewmeesa na'wēy yu' fi'nzewa'jme', naasāa ewsa ma'wē fi'nzetste', tyā'wē yuurraa fi'nzewa'ja'. Ew yūuna fi'nzesa' Dyus yacj fi'nzesa'. Nava ewmée yūusa', Dyus yacjmée fi'nzesarra tyā'wē yuuna.

Demetrio ew fi'nzeni

¹²Demetrio' wala ewsa' jĩnaty we'we' jyucaysa. Tyã'wẽ ew fi'nzete', tyajy ew fi'nzeni írráa nwe'we'c. Atsa' cue'shva jiitja'w tyã'wẽ ew fi'nzeni's. I'cue'sha' peecy jii i'cue cue'sh isa we'weni's.

Nmejte we'wena fi'jni

¹³Andya' wala puuty we'wewa'j ji'ptju, nava fi'jrra cajatsmeetj,
¹⁴dund puuty uyrra puuty we'we'nja sũjrra.

¹⁵Ayjuuwe'sh namicu indya's wala yuwe wechaa caji'ty. Cysũ namicuwe'shtyiva teeche na'wẽrraj yuwe meen wecha. Dyus yacj mfi'nze.

SAN JUDAS CARTA

Dyus pa'yanisawe'shtyi Judas fi'jni

¹ Jesucristo's selpisáa Jacobo nyacj Judas naa carta's fi'jatstju Dyus pa'yanisawe'shtyi. I'cue'sha' Jesucristo jype'jni wala ew üsi'cue. ² Tyäasa Dyus peeygääni wët yuurráa mfi'nzewe.

Íshiina fiy caapiya'jsa üsta'

³ Cue'shtyi na'wë Dyus nwe'wec tyä'srráana wejy äate caapiya'jna fi'jya'vatj yu' i'cue'shtyi. Nava tyä'wë yūumée fiy yu'cypejwa'cj casej tyä'sna wejy dund fi'jatstju i'cue'shtyi neewe'wena, na'wë Jesucristo's üuste jypa'garra nwëese'jwa'ja's caapiya'jni yuuc tyä'sa' jypa'gayä'jrra', wej yujva yu'ptjejcajmen. ⁴ Tyä'wëme' maa nasaíi yu' íshiina fiy caapiya'jsa üsyä'tja', nava tyä'wë yūusa' Dyus castigo seena'te cjëeya' u'jwa'jsata' jīna tyāniitey pta'shni yā'cj yu' Dyus librate. Tyāa nasa' wala canzh ewmeesata', tyä'wërra'ity cue'shtyi taqui'sa Dyusnava weechna naa quiwete ewmeesa yuurráana cytey yuuna fi'nze'. Sa' cue'shtyi jype'jsa Jesucristonava tyä'wëytyi weechi'.

⁵ I'cue'sha' jiiyā'jne'cue nava qui' caayaqui'jya'vatj na'wë yūuni's: Dyusa' Israelwe'shtyi Egipto quiweju cutyi'jrrava, maaíi yuutyi's iviituc nwëese'pja'gamée. ⁶ Tyä'wëy angeleswe'shva jypa'yacypa'gamée tyāawe'sh yujuni's nvijtyi, atsa' Dyusa' tyāawe'shtyi' preesul'jrra jip'ja' chji'ndy walate castigāywa'j en äjtewe'sh. ⁷ Tyä'wëy Sodoma Gomorra vite' tyāa ja'ndasuwe'sh chjambva iiméj canzh saterráaty fi'nzena üsu' peecy cacue's suwsarráana nwëese'jna. Tyä'wë canzh yūupa'ga bagachte yujva ptsuwa'jmée ipy wala seena'te castigāynity yuu tyāa angeleswe'sh na'wëy. Tyä'wë castigāynisa' caajiyu'jsata' maava tyä'wëy yūucajmen.

⁸ Tyä'wëteva tyāa nasa íshiisawe'sha' ewmée yajcyna tyāawe'sh cacue's pcaltety caafi'nze'je', sa' jycaajsawe'shtyiwa weechna wëeshuna Dyusnava weechi'ty. ⁹ Angel npitstjē'j Miguel yujva tyä'wë yu' wëeshumee'a' Moises cacue's echtjē'j jyūna u'j wëjetste, tyāa yacj puuty we'wena üsrrava. Naasáa indya's Dyus jiina jīnarráac we'we. ¹⁰ Nava tyāa pitstjē'j íshiisawe'sha' jiimeeweete ewmeety atsewe'we'. Tyāawe'sha'

tajcy na'wërráava yajcyya' ājani yu'sa' tyāawe'sh iviituwa'tje írráaty caaselpi'ji'.

¹¹ Cainva ma'wëga yuu tyā'wëyrráa yūusaata' naa pa'ga tyāawe'sha' wala yuj ñuste pa'jwa'jsata'. Vyu wala ji'pju wëerra Balaan na'wëytyi jypumba. Sa' Coréva ma'wëga ewmée atsewe'wepa'ga uu tyā'wëy vitutyna. ¹² I'cue'sh wechana pcjaacjenisu caytjame'jya' pa'jsarráata'. Tyāawe'sha' cysū pa'jrra tjaamewa'ja's ji'pjmeety ū'na tundyna fi'nze', i'cue'sh cshavyte tjaamewa'jmée. Tyāawe'sh ew fi'nzewa'jrrá'styi yaaqui' vite yuutyi's peeygājmée. Tāapja's wejya mteeva jyūna u'jnisa na'wësarráata' seelpimeesa. Fytūu tash yūnsamée na'wësata'. Tyāa fytūu tasha'sva ma'wë peena yu' ye'chcajmén pety wetse jyuca cjumbeni yuucy tyā'wësarráata'. ¹³ Mar weeswée seena' bu'chisa na'wëty yu' tyāawe'sh ewmée tjaampa' yūuni yacj. Estrella tyajy u'jwa'j dyi'ja's jypumbasáa na'wësata'. Bagachterrāa yujva casejwa'jmée ewmée seena' ñusñus chji'ndyte nviitni yuuwa'jsata'.

¹⁴⁻¹⁵ Adan ntsun sietetewe'sh Enocja' na'jíc Dyus caaūusutje'jni's: Tyā'wë ewmée yūuni's jyucaysaty paapējyrra nasa seena' ewmeesatyi's jyucaysaty castigāyya' Dyusa' tyajy nasa iiméj wala cujsa yacj yujte uytju, tyāawe'sh macuetjē'jne'ta ewmée yūuna fi'nzerra tyā'wëy Dyusnava atsewe'we tyāa pa'ga castigāyya' jī'c Enocja'. ¹⁶ Nasa tyā'wësa' e'sga nuywe'wena fi'nzesarráata', sa' peecy cacuete wēt fi'nzewa'ja'srráaty pacue', tyā'wë e'sga yu' atsewe'wetsrrava āate yu' ewrráaty we'we', tyāawe'shtyi wa'lmée pu'chcajn.

Dyus yacj fi'nzesaty neewe'weni jypa'yacycajn

¹⁷ Nava yacjtjē'jwe'sh miiyajcywe: Jesucristo jycaajnisawe'sha' nyaffi pta'shtyi na'jīna: ¹⁸ Nmej en yuutste' nasa' pa'jatyna Dyus jycaajni yu'sa' weechna tyāawe'sh ūus yaacyni ewmeesarrá's nwēese'jsawe'sh jīnaty we'we. ¹⁹ Tyāawe'sh tyā'wë nasaty caapui'jsa yuutyna, tyāawe'sh ūus yaacyni ewmeesa's nwēese'jsa, Dyus Espiritu yu's ūuste ji'pjmeesa.

²⁰ Nava yacjtjē'jwe'sh, i'cue'sha' Jesucristo's ūuste jypa'garra nwēese'jwa'ja's caapiya'jni yuuc tyā'sa' jii yā'jrra', tyāajū yu' peena casejnuwe. Dyus Espiritu's jypi'cyrra, Dyus yacj mpuutywe'wewe. ²¹ Dyus peeygāani'jū tyutemée ūytjasna meswe, cue'sh ājmeecueteva Jesucristo peeygājrra bagachte yujva ptsumée ūtyi fi'nzewa'ja's ūswa'j en ājpcach.

²² Viteva jypumbawe'shte ew mcaajiyu'jwe. ²³ Vitety peeygājrra menwe'wewe ipy walate cjēeya' yā'j ūssaty. Nava ewmeesa's jypa'yacy. Tyā'wëme' ropa yujva jyuca ewmeesarrāa pēetjenita'.

Dyusa's wechana fi'jni

²⁴⁻²⁵ Dyus cue'shtyi nwe'wesa tyāa yuurrāa quijte yujva shiingmée jype'jsa i'cue'sh ewmeete wetecajmen ewte jype'jya' ājawa'jsa'. Tyā'wë

yūurra i'cue'shtyi quīj pcal yujva ji'pjmée tyajy wechana ũsnite
nuypa'jana. Tyāa yuurrāa jytujtjesa', maateva jytjaacue walasa, quījteva
jyuca ājasa'. Tyāa yuurrāa jycaajsa'. Sa' Dyus ũsnite i'cue'sh pa'jya' ājacajn
cue'shtyi jype'jsa Jesucristo' pu'chjina. Nyafiiteyva tyā'wēc pu'ch na'
āchva tyā'wēy írrāa pu'chjina, sa' bagachteva pu'chna nes yuuna.

JESUCRISTO VYAAWA'JA'S CAAJIYU'JNI

1 ¹ Naa tyä'wē Dyus caajiyu'jnisa' Jesucristo's, atsa' Jesucristo' tyä'sna selpisaatycu caajiyu'jwa'jsa yu' naa ensu seena' yūuwa'ja's, cyajc Jesucristo' tyä'sna selpisáa Juana's caajiyu'j teech angela's cwe'we'jrra. ² Tyāa pa'gac Juana' Dyus yuwe isasa's we'we Jesucristo caavya'ja'tje uyni's jyuca, tyāasa išhīinisame'. ³ Naa pa'ga na'sna leeisa' űismée wechana yaacywa'jsata', atsa' Dyus yuwe ayte na'wē fi'jni' tyä'sna leeitste wēse'jsava isasa yujna sūjna yajcyrra cytey yuusa' wechana yaacywa'j ji'pjta'. Tyä'wēme' quíjva seena' cytey yuuwa'j ena' utyaatsa'.

Dyus nasa siete ajte pcjaacjesaty wechani

⁴ Juan yaasesa andytju fi'ja' Asia quiwete Dyus luuch siete ajte pcjaacjesawe'shtyi wechana. Dyus yacj ewrráa mfi'nzewe. Tyä' nyaffiiva tyāaírráac yu', sa' āchva tyāaírrá', sa' tyāaírráa bagachteva nes yuuna. Sa' Dyus tashte űssa siete espíritusawe'sh pu'chnityva mpa'gawe. ⁵ Sa' tyä'wēy Jesucristo pu'chni'sva mpa'gawe. Tyä' Dyus yuwe's jyuca pta'shsa' tyāac uurrava qui' ityī yuu nyafyte, sa' āchja' tyāa jycaajya' ājāwa'jsa' naa quiwete jycaajsawe'shtyi. Cristo' cue'shtyi's peeygājrra cue'sh pcaltyi's tyajy eeju pcji'cyu. ⁶ Tyä'wē yūurrac cue'shtyi's jycaajsa vite' sacerdote vitrra nvijt Dyusa's selpicajn. Sa' Cristo yuurráa quíjtea jyuca ājāsa jytujtje yuuwa'jsa' bagachteva.

⁷ Tyä'sa' mtjengwe, tāapjte yuja'. Tyä'sa' jyucaysa uyuutyna, tyä'sna cpā'vit-sava. Sa' uyrra' naa quiwete nasa jyucaysa ű'netyna. Isatj we'we', tyä'wē yuj yuutyna.

⁸ Cue'shtyi nwe'wesa' ma'wē yūuwa'ja'sva ājāwa'jsa we'werra! Andya' naa quiwe meetey űsyā'tj yu', sa' bagachteva nes yuuwa'jsatj ptsuwa'jsamée jī'c. Tyä' nyaffiiva tyāac yu', sa' āchva tyāaírrá', sa' tyāaírráa bagachteva nes yuuna.

Dyus Nchi'c nasa yuusáa vyaani

⁹ Andya' Juan i'cue'sh yacjtjē'tj. Tyāasa i'cue'sh na'wēy ja'ndarra'j pytjaa yuuwa'ja'sva jypa'gasatj, sa' Dyus jycaajni ena'sva jypa'gasatj i'cue'sh

na'wēy. Sa' Jesucristo' quiǵteva wantāywa'ja's ũscu tyā'snava i'cue'sh na'wēy jypa'gasatj. Nava naasāa Dyus yuwe's Jesucristo caajiyu'cj tyā'sna pta'shpa'ga yuurraa andya' preesutj ũsu' quiwe Patmos yaasesa yu'pyājte u'pu'c cytee. ¹⁰ Sa' teeche qui'sen ente' Dyus Espiritu apjniitj yuu, sa' andy e'ste trompeta's tucani na'wē seena' sus we'weni wēse'tj. ¹¹ Tyā' na'jī'c:

—Quij yujva meetey andya' ũsyā'tj yu', sa' bagachteva nes yuuwa'jsatj. Atsa' indy uyuutnsngu tyāatyī's etste fi'jrra mcaaj Dyus luuch siete ajte pcjaacjena ũssa Asia quiwetewe'shtyi, Efeso, Esmirna, Pérgamo, Tiatira, Sardis, Filadelfia, Laodicea tyāa chjambtewe'shtyi jīte', ¹² ¿Quimqui'c tyā'wē we'we? sūjrra yu'tjengrra', uytju bela tyaaajnisia sietety ũsu' vyuu bejrrarrāasa. ¹³ Sa' tyāa bela tyaaajnisia cshavyte Dyus Nchi'c nasa yuusāa na'wēsac ũsu', ropa chinda vitste quijsa atjrra, jytundnisava vyuu bejrrarrāasa pechute cāj tapesac ji'pju'. ¹⁴ Sa' dycjas yu' cjas ew chijme na'wēty yu', meerrava yāndy na'wē chijme. Sa' yafy yu' ipy beesa na'wēty yu', ¹⁵ naapcachja' tyajy chinda yu', tsama's ipyte aacha'jni na'wēty zhichcue cuentete'. Atsa' tyajy we'weni yu' yu'wala seena' susni na'wēc ptjūuse'. ¹⁶ Tyajy cusete yu' siete estrellatycu ji'pju', naapcachja' tyajy yuwesu yu' espada pdyi'p seena' zecsac sējna ũsu'. Atsa' tyajy dyi'p yu' sec cweetjni na'wēc eena' cjicjyna ũsu'. ¹⁷ Atsa' tyā'wē uyrra', tyajy tashga uuní na'wētj wete. Nava tyajy cuse patsuwe'sha's andy cajcuete peequinzerra na'jī'c:

—Ūucjnu, naa quiwe meetey andya' ũsyā'tj yu', sa' bagachteva nes yuuwa'jsatj ptsuwa'jsamée. ¹⁸ Uurrava qui' ityī yuusatj. Uuwa'ja's peena yu' ji'pjuya'mée andytju cnay, sa' uu quiweteva caafi'nze'jme'nja, tyāasa āchja' bagachteva ityīrrāa nes yuuwa'jsatj. ¹⁹ Na'wē indy uyngu tyāatyī' mfi'j, āchj uynisa qui' e'su vite uyuune'nga tyāatyva. ²⁰ Andy patsu cusete siete estrellaty uyngu vite' bela tyaaajni sietesaty tyā'wēsa' na'wē caajiyu'jsata': Tyāa estrella' Dyus luuch siete ajte pcjaacjena ũssaty yuweet pta'shsa angeleswe'shta', naapcachja' siete bela tyaaajnisia' Dyus luuch siete ajte pcjaacjesawe'shta' jī'c.

Efeso chjambtewe'shtyi pta'shni

2 ¹ Dyus luuch Efeso chjambtewe'shtyi jype'jsa Dyus angela's mfi'j na'jīna: Patsu cuseju siete estrellaty atrra siete bela tyaaajnisia vyuu bejrrarrāata' tyāa cshavysu u'jusa we'werra' na'jī'c: ² Dyus dyi'pte i'cue'sh ma'wē fi'nzesateva jyuca jiitj. Wala yuj chjāchja mjiina wantāyna fi'nzesa i'cue, sa' ewmeesa yuutyi'sa' jypa'ga'tsmée i'cue. Tyā'wē Jesus jycaajnisatja'w jīna pa'jsawe'shtyi'sa' jypa'gamée quimteva ew jiyuya' yuwe paapēyi'i'cue, sa' tyā'wē yūurra' Jesus jycaajnisamée īshīsateva jiyu'i'cue. ³ Wajtymée andyna selpiipa'ga wala pytjaa yuuna wantāyna mjiīwalj ji'pju'i'cue tyā'wē yūuni's andya' jiitj. ⁴ Nava i'cue'sh ājmée yūuni's we'wewa'j ji'ptju. Nyaffi na'wē i'cue wala peeegāawa'ja's ji'pju' tyāa

yu'sa' ächja' ji'pjmée i'cue. ⁵Tyāa pa'ga quíjtene'cue jypumba tyāa pcala's nvijtrra Dyus tashte mishawendwe, sa' nyaffi ma'wēne'cue peeygāasa yu' tyā'wēy myūuwe. Tyā'wē yūumeete', tund yuwe'nja i'cue'shtyi castigāyya', sa' i'cue'sh cshavyu bela tyaa'jni's jyūna u'jrra vite ajte tyaja'nja, pcaltyi nvijtrra Dyus tashte shawendmeete'. ⁶Tyā'wērrava na'wē yūuwa'j yu'sa' ew i'cue yū'. Nicolaitawe'sh fi'nzeni yu'sa' atse'i'cue tyā'wēsa yu'sa' andyva atse'tj. ⁷Cytesy nwēese'jwa'jsa ūsrra', mwēese'jwe Dyus Espiritu' na'wēc we'we' Dyus luuchtyi: Dyus ūsnite fytūu tash ūsa' bagachte yujva peejymée yūnna nes yuusa tyā' uumée caafi'nze'jsa'. Tyā'sa' puutsu'nja ewmeesa yu'sa' nwēese'jmée jyuca cnaysawe'shtyi'sa' jī'c.

Esmirna chjambtewe'shtyi pta'shni

⁸Dyus luuch Esmirna chjambtewe'shtyi jype'jsa Dyus angela's na'jīna mfi'j: Naa quiwe meetey ūsyā'cj yu' sa' bagachteva nes yuuwa'jsa uurra qui' ityī yuuc tyā' na'jī'c: ⁹Dyus dyi'pte i'cue'sh ma'wē fi'nzesateva jyuca jiitj. I'cue'sh pytjaa yuuna quíjva ji'pjmée fi'nzeni tyā'wē yūuni's jiitj. (Nava ew yajcyte yu' wala ji'pjsa i'cue.) Sa' Dyus luuch meerrava Dyus luuchtja'w jīna weech we'wesatyva jiitj. Nava tyā'wē yūusa' echtjē'j nasa yuurráata'. ¹⁰Pytjaa yuuwa'j pa'jana tyā'sa' ūucjmeene'cue. Echtjē'ja' i'cue'sh maafi'tyi's carcelte tyajana, i'cue'sh jyucaysa ma'wē yūuteva jiyuya'. Atsa' diez enpcach wala pytjaa yuuwa'j ji'pjune'cue. Nava Dyus yacj tyutemée mfi'nzewe uu entepcach, atsa' andya' ityī fi'nzewa'ja's ūsu'nja tyā'wē ew fi'nzepa'ga. ¹¹Cytesy nwēese'jwa'jsa ūsrra', mwēese'jwe Dyus Espiritu' na'wēc we'we' Dyus luuchtyi: Ewmeesa yu'sa' nwēese'jmée jyuca cnaysawe'sha' Dyus yacj bagachte yujva peena yu' puuty uywa'jmeete yu' u'jmeetyna jī'c.

Pérgamo chjambtewe'shtyi pta'shni

¹²Dyus luuch Pérgamo chjambtewe'shtyi jype'jsa Dyus angela's na'jīna mfi'j: Espada pdyi'p zecsa's ji'pjsa' na'jī'c: ¹³Dyus dyi'pte i'cue'sh ma'wē fi'nzesateva jyuca jiitj. I'cue'sha' echtjē'j jycaajna ūsni cshavyte ūsrrava, andy tashu yu' tyutemée i'cue fi'nze'. Andy caapiya'jni's pta'shsa Antipas nacue wala seena' pytjaa i'cue'sh cshavyte icjni yuuc tyāa enterráa yujva ūucjrra andy yase's cysusmée yu' yuumée i'cue, cyteec echtjē'j ūsu' nava. ¹⁴Tyā'wēteva i'cue'sh ājmée yūuni's we'wewa'j ji'ptju: Balaan caapiya'jni's nwēese'jsawe'shtyi i'cue'sha' iipe'ji'cue Pérgamo chjambte. Tyāa Balaana' Balacja's ewmeec yu'cypej Israelwe'shtyi's caypumba'cjan, tyāasac Dyus ityīmeesaty wechana tajcy icjni chicha's ūcaaj, sa' pcal canzh yuuna fi'nzewa'ja'sva caapiya'cj. ¹⁵Sa' Nicolaitawe'sh caapiya'jni's nwēese'jsawe'shtyiva iipe'ji'cue. Tyā'wēsa yuutyi's andya' atse'tj. ¹⁶Tyāa pa'ga pcala's nvijtrra Dyus tashte mishawendwe. Tyā'wēme' andya' dund i'cue'sh tashna yujrra, tyā'wē ewmée fi'nzesawe'shtyi castigai'nja espada

pdyl'p zecsa ji'ptju tyāaju. ¹⁷Cytesy nwēese'jwa'jsa ūsrra', mwēese'jwe Dyus Espiritu' na'wēc we'we' Dyus luuchtyi: Ewmeesa yu'sa' nwēese'jmée jyuca cnaysawe'shtyi's ūsu'nja maná ū'nisa jyaawni ūsa' tyā'sna. Sa' teeche cuet chijme ūsu'nja, sa' tyāa cuette yu' yase u'sesa's fi'jni yuuna quim yujva jiyunimeesa naasáa tyāa cueta's jypa'gasa yuurráa jiyuna jī'c.

Tiatira chjambtewe'shtyi pta'shni

¹⁸Dyus luuch Tiatira chjambtewe'shtyi jype'jsa Dyus angela's na'jīna mfi'j: Dyus Nchi'c yafy ipy beeni na'wēsa ji'pjsa tyajy chinda tsam na'wē cuentetesa ji'pjsa na'jī'c: ¹⁹Dyus dyi'pte i'cue'sh ma'wē fi'nzesateva jyuca jiitj. I'cue'sh peeygāani, ūuste jypumbamée Dyusa's yajcyna fi'nzeni, wa'lmée selpiina fi'nzeni tyā'wē yūuni's jiitj. Sa' nyaffi meerra' āchja' tjaacue mjiina ūsi'cue. ²⁰Nava i'cue'sh ājmée yūuni's we'wewa'j ji'ptju: Tyāa u'y Jezabela's ma'jī'tsmée i'cue, tyāa u'ya' Dyus cwe'we'jni'stju pta'shi' jirra andyna selpisaaty caypumba'ja'cj pcal canzhsate caafi'nze'jna, sa' tajcy icjrra Dyus ityīmeesaty wechawa'ja' jīnac caapiya'ja'. ²¹Andya' tyāa u'ya's en ūstju tyāa pcala's nvjtrra Dyus tashte shawendcajn. Nava tyā'wē yūuya' wa'lrira tyāa pcal canzhsateyrráac fi'nze'. ²²Tyāa pa'ga andya' tyāa u'ya's castiga'ī'nja, atsa' tyāa u'y caapiya'jni's nvjimeerra', tyāawe'shva seena' yuj pytjaa yuuwa'j ji'pjutyna. ²³Sa' tyāa u'y luuchtyi's icje'nja. Tyā'wē yūute Dyus luucha' jyucaysa jiyutyna andya' tyāawe'sh ūs dyiiju yaacyni's jyuca jiyusateva. Sa' i'cue'sh teeche na'wērraj quīj yūusateva, ca'tuva tyā'wēy yu'nja. ²⁴Nava Tiatira chjambte ūssa maava tyāa u'y caapiya'jni's nwēese'jsamée vite' na'wē echtjē'j caapiya'jni quim yujva jiyunimeesa jī'ty tyā'snava nwēese'jsameewe'sha' andy yu'cypejwa'j peejymeei'cue. ²⁵Nava ew fi'nzewa'ja's pechcananuwe andy shawendpcach. ²⁶Sa' ewmeesa yu'sa' nwēese'jmée quijteva jyuca cnayrra andy jytjāasnirrá's nmej entepcach cytesy yuuna fi'nzesa yu'sa' nasa mteewe'shtyiva jyuca jycaajya' ājāwa'ja's ūsu'nja, ²⁷andy Tatava ma'wēga andy jycaajya' ājāwa'ja's ūs tyā'wēy. Atsa' nasa jyucaysaty seena' yuj juuna' yuuna jycaajana, quiwee mityj achamée ewsa's ma'wēga ya'undu' tyā'wēyrráa yuuni yuutyna. ²⁸Sa' cjicjiitste cāasa estrella'sva ūsu'nja. ²⁹Cytesy nwēese'jwa'jsa ūsrra', Dyus Espiritu' na'wēc we'we' Dyus luuchtyi tyā'sna mwēese'jwe jī'c.

Sardis chjambtewe'shtyi pta'shni

3 ¹Dyus luuch Sardis chjambtewe'shtyi jype'jsa Dyus angela's na'jīna mfi'j: Dyus tashte ūssa sietesaty jycaajsa tyajy cusete yu' siete estrellaty attrra ūssa na'jī'c: Dyus dyi'pte i'cue'sh ma'wē fi'nzesateva jyuca jiitj. Ityī ūstja'w jīna jytujtje i'cue fi'nze', nava uunfi na'wē ūsi'cue. ²Chjāchja fi'nzewa'ja's miiyajcywe. Tyā'wēme', Dyus yacj fi'nzewa'j yu'sa' quījnava jyuca iviituwa'tjerráa yā'j ūsi'cue. Iiuytju Dyus dyi'pte

i'cue'sha' ewmée i'cue fi'nze!. Pcala's nvijtrra Dyus tashte mishawendwe. ³Sa' i'cue'shtyi ew caapiya'jni's yajcyrra tyā's yuurráana cytey yuuna mfi'nzewe. Tyā'wē jypa'yacymeete!, andya' cus peswée na'wērráa pa'ja'nja i'cue'sh tashte, quim yujva jiyunimeete. ⁴Tyā'wērrava cytee Sardis chjambte manz nasa yu' atjni ropa cjūuchji'lnimeesaty ji'pji'cue, atsa' tyāawe'sha' andy yacj fi'nzetyna ropa chijmesa atjrra, tyāawe'sha' tyā'wē fi'nzewa'jsata!. ⁵Ewmeesa yu'sa' nwēese'jmée quijteva jyuca cnaysawe'sha' ropa chijmesa caatje'jni yuutyna. Atsa' tyāawe'sh yasetyi's cjucjme'nja bagachte yujva uuwa'jmée ityi' fi'nzewa'j libruju, wejyva tyāawe'sh yasetyi's pta'shna caajiyu'ju'nja andy Tata vite! tyajj angeleswe'sh dyi'pte. ⁶Cytey nwēese'jwa'jsa ūsrra', Dyus Espiritu' na'wēc we'we' Dyus luuchtyi tyā'sna mwēese'jwe ji'c.

Filadelfia chjambtewe'shtyi pta'shni

⁷Dyus luuch Filadelfia chjambtewe'shtyi jype'jsa Dyus angela's na'jina mfi'j: Jycaajsa David llavi's ji'pjsa tyāa pjandeyā'tje!, quim yujva apja'tsme!, sa' tyāa apite!, quim yujva pjande'tsme! tyā'wē isasa's pta'shsa' na'ji'c: ⁸Dyus dyi'pte i'cue'sh ma'wē fi'nzesateva jyuca jiitj. I'cue'sh fi'nzewa'j dyi'ja's pjangerra nvijttju tyā'sa' quim yujva apjya' ājāmeena. I'cue'sha' Dyus dyi'pte achamée i'cue chjāchja fi'nze!, nava andy pta'shni yu'sa' cytey yuuna ūsi'cue andy yu'sa' ajtsemée. ⁹Atsa' tyāa pa'ga i'cue'sh tashte peejyūcucacaj caja'nja echtjē'j nasa judiumeerrava judiutja'w jina īshīsawe'shtyi, cyaj tyāawe'sha' jiyutyna andya' i'cue'shtyi's peeygāasateva. ¹⁰Quijteva jyuca wantāywa'ja's andy jycaajni's cytey nwēese'ji'cue, tyāa pa'ga andya' jyaawu'nja i'cue'shtyi's naa quiwete jyucaysawe'sh ma'wē yūuteva jiyuya' ūuswa'j en pa'jana naa quiwe uta tyāa ente. ¹¹Tyachmey shawendu'nja. Ew fi'nzeni's mpa'yajcywe, cyaj tyā'wē fi'nzepa'ga i'cue'shtyi ūsua'j ūsa' tyā'sna quim yujva cusa'jmeena. ¹²Ewmeesa yu'sa' nwēese'jmée quijteva jyuca cnaysawe'shtyi's andy Dyus tashtewe'sh seena' chjāchjasa vitu'nja, atsa' bagachte yujva casejmeetyna tyāajū. Sa' tyāawe'sh cacuete fi'jrra qui'pu'nja andy Dyus yase vite! andy Dyus yujuni chjamb yase Jerusalem u'sesa cielutewe'sh tyāaty. Sa' andy yase u'sesa'sva tyāawe'sh cacuete yuu fi'jrra qui'pu'nja. ¹³Cytey nwēese'jwa'jsa ūsrra', Dyus Espiritu' na'wēc we'we' Dyus luuchtyi tyā'sna mwēese'jwe ji'c.

Laodicea chjambtewe'shtyi pta'shni

¹⁴Dyus luuch Laodicea chjambtewe'shtyi jype'jsa Dyus angela's na'jina mfi'j: Īshīsamée quijteva jyuca isasarrá's we'wesa quij yujva meetey ūsyā'cj yu' tyā' na'ji'c: ¹⁵Dyus dyi'pte i'cue'sh ma'wē fi'nzesateva andya' jyuca jiitj. Dyusa's ūusuj jyuca yaacypa'gamée finzeva meei'cue, sa' achava meei'cue. Tyā'wē yā'jrra!, jyucate finze yuuvats wejy ewna,

meerrava acha yuuni ewna. ¹⁶Nava finzeva meei'cue, sa' achavamée wejcuërráa bajyi'cue, tyāa pa'ga andy yuwejū i'cue'shtyi pungaya'vatj. ¹⁷I'cue'sha' wala ji'pjsarra quīj yujva peejymée wala ewrráa fi'nzena ūstja'w ji'i'cue. Nava quīj yujva ji'pjmée sūpyrráa uyya' ājāmée nuste wētmeete yuurráa fi'nzeni yu'sa' jiyumée ūsi'cue. ¹⁸Tyāa pa'gatj na'wē yu'cypeje': Wala ji'pjsa yuu wēerra', andya'srrarráa mweywe vyuu bej ew pjeu'jnisa. Sūpyrráa fi'nzeya'mée atjwa'j ropa chijmesanava mweywe. Sa' yafytewe'sh yu'tseva mweywe. ¹⁹Andy peeYGāanisatyi's juuna'tj we'wena yu'cypeje' jyucaysaty. Tyā'wē Dyus yacj chjāchja fi'nzeya', pcala's nvijrra Dyus tashte mishawendwe. ²⁰Mwēese'jwe, andya' vityte pa'yana ūstju. Atsa' maava andy we'weni's wēse'jrra ca'ga'tje', cytee u'carra tyāa yacj fi'nze'nja, atsa' tyāava andy yacj fi'nzena. ²¹Ewmeesa yu'sa' nwēese'jmée quījteva jyuca cnaysawe'shtyi's andy jycaajna ūsnite ij ūswa'jsa vitu'nja, andyva ma'wēta ewmeesa's nwēese'jmée jyuca cnayrra andy Tata jycaajna ūsni pucate cach tyā'wēy. ²²Cytee nwēese'jwa'jsa ūsrra', Dyus Espiritu' na'wēc we'we' Dyus luuchtyi tyā'sna mwēese'jwe ji'c.

Dyusa's cielute wechana ūsni

4 ¹Tyāa e'su' qui' tjengrra' uytju cielute vity pjaterra ūste. Atsa' nyaffi we'weni na'wēy we'weni qui' wēse'tj trompeta's seena' sus tucani, sa' na'jī'c:

—Ay ēete myuj, cytee caavya'ja'jya'vatj naa e'su quījrra yuune'tjeva tyāaty.

²Tyā'jītspcachja' tyāa dundtey Dyus Espiritu apjniitj yuuna pa'j, sa' uytju cielute jycaajna ūsnisa's. ³Tyāa jycaajna ūsnite yu', teeche cachrra u'pu'c, sa' cytee u'psa yu' iiméj seena' zhichcue zmeena' cuj jwend cjcijyna u'pu'c. Sa' tyāa peecu'jsu yu' cytjūs iiméj zhichcue cweetjna ūsu'c. ⁴Tyāa jycaajna ūsni pucasu yu' vite jycaajna ūsni veinticuatro ājtj ūsu', atsa' cysū yu' Dyus luuchtyi jycaajsa veinticuatro'saty u'pu', ropa chijme atjrra dyictjesu yu' vyuu bee corona ji'pjsa. ⁵Tyāa jycaajna ūsnijū yu', cpi'sh cuenenen na'wēsac casejna ūsu' seena' susna, sa' jycaajna ūsni dyi'pte yu' siete ipy pqui'tanity bejna ūsu' tyāa yu' Dyus tashte ūssa siete espiritusawe'shtyi yu'. ⁶Tyāa dyi'pteyrráa mar na'wēsac zhichcue cjcijyna ūsu'.

Tyāa jycaajna ūsni pyājsu vite' peecu'jsu yu' Dyus vitnisa ityāsa pajnztyi ūsu', cacuete jyuca yafyrrarráa ji'pjsa. ⁷Tyāa pajnzsa nyafytewe'sha' león na'wēc yu'. E'stewe'sha' tulu na'wēc yu'. Tecjtewe'sha' nasa na'wēc dyi'p ji'pju'. Atsa' pajnzte'sha' uj na'wēc fyuusa yu'. ⁸Tyāa Dyus vitnisa pajnzsa' teeche na'wērraj seis fyu cu'taty ji'pju', sa' yafyrrarráa cacuete jyucaty ji'pjsa yu'. Tyāawe'sha' cus ma'c yuu en ma'c yuu nava bagachte yujva wajtymeety na'jīna ūsu':

Dyus iiméj seena' walasa,

Quij pcal yujva ji'pjmée iiméj seena' atesa,

Nyaffiiva tyāac yu', sa' āchva tyāāfirrá',

Sa' tyāāfirráa bagachteva nes yuuna jīnaty we'wena nes yu'.

⁹Sa' cytee jycaajna ūsnite cachrra bagachterrāa yujva uumée nes yuuwa'jsa's Dyus vitnisa tyā'wē tuutje'jna wechaatspcachja', ¹⁰Dyus luuchtyi jycaajsa veinticuattosawe'sha' bagachterrāa yujva uumée nes yuuwa'jsa tashte peejyūcuerra tyāawe'sh coronaty tyajy tashte qui'prra na'jīnaty wechana tuutje'je':

¹¹Cue'sh Dyus indy yuurráa jypa'gawa'jsang wechana tuutje'jni's, Tyāa pa'gatey indyrraráang qui'nava jyuca vit, Atsa' iindy peegyājrra taqui'jnissarraráa ūsta' jī'ty.

Libru's pjandewa'jsa

5 ¹Jycaajna ūsnite cachrra u'psa' patsu cuseju teech ets fi'jnisa atrra u'ptetj uy. Tyāa ets yu' ecaju dyiiju jyuca fi'jrra wala ew pelrra siete sello yacjcu apjni yu'. ²Sa' teech angel iiméj seena' chjāchjasa ūste uytju, tyāa yu' na'jīnac paapēyi' sus we'wena:

—Tyāa ets siete sello yacj apjnisa's ¿quim sunderra pjandeya' ājācy? jī'c.

³Nava cielutewe'sh, naa quiwetewe'sh, naa quiwe dyiijuwe'sh quimrrāa yujva tyāa etsa's pjandeya' ājāwa'jsameety yu', sa' tjengya'rrāa yujva ājāwa'jsameety yu'. ⁴Tyā'wē tyāa etsa's pjanderra tjengya'rrāa yujva ājāwa'jsamée yuupa'ga, andya' wala ū'nena ūsu'tj. ⁵Atsa' cytee jycaajna ūssa teehsa' na'jī'c:

—Jwee yu' ū'nenu. Teech ūsa' Juda nwe'sh, jycaajsa David ji'tjewe'sh wala jytujtjesa tyā' ewmeesa's jyuca cnaycu, tyāa siete selloty sunderra etsa's pjandeya' ājāya' jī'c.

⁶Tyājū' jycaajna ūsni pyājte vite' Dyus vitni ūtyāsa pajnz ūsu'ty vite' Dyus luuchtyi jycaajna ūssawe'sh tyā'wēsawe'sh cshavyte Piishacuē na'wēsa yujurra ūste uytju. Tyāa yu' cpā'vitrra icjni sñalva ji'pju'c, sa' siete caachu siete yafycu ji'pju'. Tyāa siete yafy yu' na'wē Dyus tashte ūssa siete espirituty naa quiwete jyuca caajni yuuty tyāaty yu'.

⁷Tyājū' tyāa Piishacuē jīnisa' u'jrra jypa'gac na'wē jycaajna ūsnite u'psa' patsu cusete ets yaat yu'c tyāa etsna. ⁸Tyājū' tyāa etsa's jypa'gatspcachja', Dyus vitni pajnz ūtyāsa vite' Dyus luuchtyi jycaajsa veinticuattosawe'sha' peejyūcuety tyāa Piishacuē jīnisa tashte. Tyāa jycaajsaawe'sha' teehsa na'wērraj tucani arpa ji'pju'ty, sa' vyuu bee copava ji'pju'ty. Tyāa vyuu bee copasū yu' dyuus yatte cambnisa inciensorrarrá's uta ambnisa'styi ji'pju'. Atsa' tyāa yu' Dyusa's pechcanamée puuty we'wena ūsni jīnisac yu'. ⁹Sa' memtyi teech mem u'sesa na'jīna:

Indya' tyāa etsa's jypa'garra selloty sundeya' ājāwa'jsang,

Tyāa pa'gatey icjni yuurra iindy eeju cue'shtyi's weyngu

Maa nasa ma'wēsa, yuwe ma'wē we'wesa, mteewe'shva jyuca Dyus luuch yuuya' ājācajn.

¹⁰ Sa' cue'shtyi's jycaajwa'lsang vitna pa'j vite' sacerdote cue'sh Dyus tashewe'sh,

Atsa' naa quiwete jycaajya' ājā'nja'w jī'ty.

¹¹ Tyājū' qui' tjengrra' wēse'tj angeleswe'sh iiméj seena' cujsa we'weni's. Tyāawe'sh yu' jycaajna ūsni peecu'jsu vite' Dyus vitni ityāsa vite' Dyus luuchtyi jycaajna ūssawe'sh peecu'jsuty ūsu'. Tyāawe'sha' iiméj seena' wala cuj yu'ty. ¹² Sa' na'jīnaty sus we'we':

Piishacuē na'wē icjni yuunisa's bagachteva pu'vitumée wechana tuutje'jna ūswa'ja'.

Sa' tyāarrarrāa jyuca jypa'gawa'jsa', jycaajsa yuuwa'j, wala seena' ji'pjsa yuuwa'j.

Quijteva jyuca jiisa, iiméj chjāchjasa tyā'wē yuuwa'jsa' jī'ty.

¹³ Sa' Dyus taqui'jni cielutewe'sh, naa quiwetewe'sh, naa quiwe dyiijuwe'sh, martewe'sh cytee quijrraj ūstyna tyā'wēsa jyuca na'jīna we'weni'sva wēse'tj:

Wechana tuutje'jwa'ja' jycaajna ūsnite cachrra u'psa's vite' Piishacuē na'wē icjni yuuc tyā'sna.

Sa' jyutjtje jycaajya' ājāwa'jsa' bagachteva jī'ty.

¹⁴ Atsa' tyā'jitspcachja', Dyus vitni ityāsa pajnzsa':

—Tyā'wē cytey yuuna jī'ty. Naapcachja' Dyus luuchtyi jycaajsa veinticuatroswa'sha' peejyūcuerra wechana tuutje'je'ty bagachterráa yujva uumée nes yuuwa'jsa's.

Siete selloty sundeni

6 ¹ Tyājū' uytju Piishacuē jīnisa' siete sello nyafytewe'sha's sundetste, sa' wēse'tj Dyus vitni ityāsa teecha' seena' sus na'jīna:

—Yujrra mtjeng jīni's. ² Atsa' tyā'wē wēse'jrra', tjengrra uytju teech jimba chijmesa's, cytee a'jsa yu' cusete ūpanisa arco yaasesa'scu ji'pju'. Tyājū' tyā'sa' teech coronac ūsni yuu, atsa' tyāa yu' quijteva jyuca puiiya' jiisac casej, mteeva puiirra cnaywa'jsa.

³ Tyājū' Piishacuē jīnisa' vite sello's sundec e'stewe'shna, atsa' wēse'tj Dyus vitni ityāsa e'nzsatewe'sh na'jīna:

—Mtjeng jīni's. ⁴ Sa' uytju vite jimba bejsa casejetste, atsa' cytee a'jsa yu's jycaajnic yuu, naa quiwete wēt fi'nzeni's iiviute nasaa pwe'sh puuty icjna u'cjan. Sa' teech espada wasasac ūsni yuu.

⁵ Tyājū' Piishacuē jīnisa' vite sello's sundec tecjtewe'shna, atsa' wēse'tj Dyus vitni ityāsa tecjsatewe'sh na'jīna:

—Mtjeng jīni's. Atsa' uytju vite jimba cjūchsa's atsa' cytee a'jsa yu' cusete isanisa balansa yaasesa'scu ji'pju'. ⁶ Sa' wēse'tj Dyus vitni ityāsa cshavyu teech na'jīna we'weni's:

—E'nz libra scuutyjrráana teen mjiinite äjpa'ga tyweywal'j yuuna, sa' seis libra cebada'sva tyacuey pa'gate tyweywal'j yuuna. Nava aceite vino tyä'wësa yuutyi'sa' iiviitupu'n jī'c.

⁷Tyajū' Piishacuē jīnisa' vite sello's sundec pajnztewe'shna, atsa' wëse'tj Dyus vitni ityīsa pajnzatewe'sh na'jīna:

—Mtjeng jīni's. ⁸Atsa' tyä'wë wëse'jrra' tjengrra uytju teech jimba seena' üucjüucjsa's, atsa' cytee a'jsa yu' Icjsa jīna cysusni yasec ji'pju'. Naapcachja' tyāa e'ste' uusaawe'sh yujuni jīnisac vyaa. Tyāa jimbate a'jsa yu'sa' jycaajnic yuu naa quiwete nasaty puupyājn āatuw icjajn guerra vitrra wējē caapa'ja'jrra weeva tyä'wëy caapa'ja'jrra yu'cj ech juuna'sava caapena'jrra.

⁹Tyajū' Piishacuē jīnisa' vite sello's sundec tajstewe'shna. Atsa' Cristo's selpiipa'ga icjni yuuty tyāawe'shrrarrāa altal tashte üstetj uy. ¹⁰Sa' tyāawe'sha' na'jīnaty sus we'we':

—Cue'shtyi jype'jsa atesa indya' quišteva cytey yuusāa ŷmacue tyach jytjēyuyua'vanga, cue'shtyi ajtserra icjtyi tyāawe'shtyi castigāyya'? jīte', ¹¹pasrra':

—Ächjī yu' üuchcue uytjāsna jycaasena meswe, Cristo's selpiipa'ga i'cue'sh na'wëy icjni yuuwal'j peejyta' tyāawe'shtyi cytey yuuna jyä'pjcach jīrra', ropa chijmesaty caatje'jni yuu.

¹²Tyajū' Piishacuē jīnisa' vite sello's sundec seistewe'shna. Atsa' uytju seena' ejnd u'juetste seca' jyuca cjüch cājc cweetjmeepcach, a'teva jyuca ee na'wëc bej yuu. ¹³Naapcachja' cielute estrella' üshity naa quiwete, fytü yūnva ma'wëta wejya chjāchja quēese'tje jyuca üshi' tyä'wëty yuu.

¹⁴Atsa' cielu' ets na'wë jyuca pelni yuurra vyaame'. Naapcachja' tjā'j vits vite' icj pyājsu quiwe u'psa jyuca upenity yuu ēse'sete. ¹⁵Atsa' naa quiwete jycaajsawe'sha' wala üucjrra quiwe cafysu vite' cuet cafysu jyuca jysūutjtyi, walasawe'sh, ji'pjsawe'sh, npiitstjē'jwe'sh, jytujtjesawe'sh, vite' patron cusete selpiina fi'nzesawe'sh vite' patron ji'pjmée wēt fi'nzesawe'sh jyucaty tyä'wë yūu. ¹⁶Sa' tyä'wë yūurra tjā'j vits vite' cuet peñaty na'jīnaty we'we':

—Cue'shtyi jyuca acaachrra caavya'ja'jnu na'wë jycaajna u'pa' tyajy dyi'pte, vite' Piishacuē jīnisa seena' yuj castigāyya' ūsa' tyä'wësa dyi'pte. ¹⁷Tyä'wëme', tyä'wë seena' castigāywa'j en ājc, atsa' ŷquim cyte' wantāyya' ājācy? jī'ty.

Israelita ji'jwe'sh iisawa'jniity yuu

7 ¹Tyāa e'su' pajnz angeleswe'shtytj uy, tyāawe'sha' naa quiwe peecu'tje puuty pajnz ajtety yujurra ūsu', naa quiwete pajnz ajū wejya casejsaty ca'ga'jmée yupna, naa quiwete, marte, yu'cjsu mtee yujva wejyacajmen. ²Sa' vite angel uytju tyāa yu' sec cāani ju'nguc yuj yu', Dyus ityīsa sello's atrra. Tyāa Dyus angela' suscu we'we

pajnz angeleswe'sh ūsu'ty naa quiwe vite' mar tyāaty suwwa'jsaty na'jīna:

³—Naa quiwe, mar, yu'cj mtee yujva āchjī yu' suwnuwe, Dyusna selpisaawe'sh dyictjesu cue'sh iisawa'jmeyna yu' jī'c.

⁴Tyājū' wēse'tj Israelita ji'jwe'sh iisawa'jnisa jyuca yu' ciento cuarenta y cuatro miltiyi yu'. ⁵Judá ji'j, doce mil; Rubén ji'j, doce mil; Gad ji'j, doce mil; ⁶Aser ji'j, doce mil; Neftalí ji'j, doce mil; Manasés ji'j, doce mil; ⁷Simeón ji'j, doce mil; Leví ji'j, doce mil; Isacar ji'j, doce mil; ⁸Zabulón ji'j, doce mil; José ji'j, doce mil; Benjamín ji'j, doce mil; tyāawe'shtyi jyucarraj yu' tyanzcuēe yu'.

Maa nasava Dyus nwe'wenisawe'sh

⁹Tyāa e'su' qui' tjengrra' nasa iiméj wala cuj uytju. Tyāawe'sha' maa nasa ma'wēsa majūwe'shva jyucaty yu', yuwe fiyfiyrraj we'wesa. Sa' Piishacuē jīnisa jycaajna u'pni peecu'jsuty yujurra ūsu'. Tyāawe'shtyi' quim yujva isaya' ājāmeeta', iiméj wala cuj yu'ty tyāa pa'ga. Sa' ropa chijmesa atjrra cusesu yu' lamus etsnaty yaat yu'. ¹⁰Tyāawe'sh jyucaysa na'jīnaty sus we'we':

Cue'sh Dyus jycaajna u'pa' vite' Piishacuē jīnisa tyāawe'sh yuurráaty ewte neeyūuwa'ja's ūs jī'ty.

¹¹Atsa' Dyus jycaajna ūsni peecu'jsu vite' Dyus luuchtyi jycaajsawe'sh peecu'jsu vite' Dyus vitni ityīsa pajnz ūsu'ty tyāa peecu'jsu angeleswe'sh yujurra ūssa' jycaajna ūsni ju'ngu quiwete pa'j quīitsjurra Dyusa's na'jīnaty neewe'we':

¹²Wechana tuutje'jwa'ja' cue'sh Dyusa's.

Tyāarrāa quījteva jyuca jiisa'.

Tyā' bagachteva chjāchjasa jytujte jycaajya' ājāwa'jsa' jī'ty.

¹³Tyājū' Dyus luuchtyi jycaajsa teeche'sa' na'jīnac andya's pējy:

—Na'wē ropa chijme atjrra ūsta' tyāawe'sha' ¿quimtyna, sa' majū yuusatyna? jīte':

¹⁴—Tyāawe'shtyi' indyīrrāa jiine'nga jīnatj pas. Atsa' tyā' na'wēc pta'sh:

—Tyāawe'sha' iiméj seena' wala nūste scjēwsaata', sa' tyāawe'sh atjni ropatyi's tjetjrra Piishacuē jīnisa icjni yuuc tyajy eete yaatesata'.

¹⁵Tyāasa Dyus jycaajna ūsni tashte ūsta', en ma'c yuu meerra' cus ma'c yuu nava bagachteva selpiina nes yuuwa'jsata'. Atsa' cytee jycaajna u'psa yacj ūssa' quījte yujva peejymée fi'nzetya. ¹⁶Tyāa pa'ga tyāawe'sha' āchja' pytjaa yuumeetyna wēena yū'wēena. Sa' secteva chjavyna yaachana fi'nzemeetyna, ¹⁷tyāa pa'gatey Piishacuē jīnisa jycaajna ūsni cshavyte ūsa' tyajy jype'jni yuutyna. Sa' yu' bagachte yujva ptsuwa'jmeesa's yusni yuutyna. Atsa' Dyusī tyāawe'sh ū'neni yafy yu'tyi's cjucjuna jī'c.

Sello sietetewe'sha's sundeni

8 ¹Tyajũ' tyāa Piishacuē jīnisa' vite sello's sundec sietetewe'shna. Naapcachja' cielute quij yujva susmée shuuna'c yuu, media ora ājpcach. ²Tyā'wē yūuni scjēwniijũ' siete angeleswe'shtyi' uytju Dyus tashte yujurra ūste, atsa' tyāawe'shtyi'sa' jyucaysaty tucani trompeta ūsnity yuu. ³Tyā'wē yuutspcachja' Dyus angel vite cūjc vyuu bee copa's attrra, sa' altal tashtec yuju. Atsa' seena' wala ūsni yuuc tyāa vyuu bee copate ambrra cambwa'ja's. Tyāa yu'sa' vyuu bee altal ūsu'c jycaajna ūsni tashte cytee cambwa'cj yuu, Dyus luuch jyucaysawe'sh Dyus yacj puuty we'wetspcachja' cambcajn. ⁴Atsa' Dyus angel tyā'wē cambte', tyāa aj yu' Dyus tashte pa'cj tejca, Dyus luuch jyucaysawe'sh Dyus yacj puuty we'weni yā'jrira. ⁵Tyajũ' tyāa Dyus angela' tyāa vyuu bee copate utac chjā'chja ipy jī'pjsa's āsh cytee altaltewe'shna, sa' tyā'wē yūurrac quiwe cajcuesu ēesu yajta. Atsa' tyā'wē yuutspcachja', cpi'sh seena' cwejnena sus we'wena, ejndva tyā'wēc seena' u'j.

Siete angeleswe'sh trompetaty tujcaya' yujuni

⁶Tyajũ' tyāa siete angeleswe'sha' trompetaty tujcaya' yujuty.

⁷Atsa' Dyus angel nyafytewe'sha' tyajy trompeta's tujcac, naapcachja' naa quiwete cuetumba āshcu ee ca'ndnisa vite' ipy yā'jrira. Atsa' naa quiwe pyājn āatuwcu chjavy, yu'cjva tyā'wēy jyuca.

⁸Tyajũ' Dyus angel e'ntzewe'shva tyajy trompeta's tujcac, naapcachja' tjā'j vits wala na'wēsa ipyrrarrāac bejna ūsu' tyā'snac marte acjni yuu. Tyā'wē yuute', mara' pyājn āatuwcu eerrarrāa yuu. ⁹Atsa' cytee quijrraj ne'ta ityīsa ūsu' tyāa yu' jyuca uuty mar eerrarrāa yuunisatewe'sh yu'. Atsa' barcova pyājn āatuwtyi vitu.

¹⁰Tyajũ' Dyus angel tecjtewe'shva tyajy trompeta's tujcac, naapcachja' cieluju teeche estrella seena' walasa wetec ipyrrarrāa bejna. Yu'walasu vite' yu'le'chcuēsuva naa quiwete pyājn āatuwcu pēetjajna wete. ¹¹Tyāa estrella' Seenā Yaasac yaase yu', atsa' naa quiwete pyājn āatuwtyi yu'a' yaasarrarrāa yuu. Atsa' nasa' seena' wala uuty, tyā'wē yu' yaasarrarrāa yuupa'ga tundyya' ājāmeerra.

¹²Tyajũ' Dyus angel pajntewe'shva tyajy trompeta's tujcac, naapcachja' secva puupyājn āatuwcu cweetjmée neeyūu. Atsa' a'te, estrellava tyā'wēyrrāaty puupyājn āatuw cweetjmée neeyūu. Atsa' tyāa suwenisa yu' cweetjmeeta'. Atsa' en yu' wejcuē yuurráac cjicjyna neeyūu, naapcachja' cus yu' jweeírrāac seena' chji'ndysa yuu.

¹³Tyajũ' tjengrra' uytju Dyus angel cielusu fyujna u'juetste seena' sus we'wena na'jīna:

—Dyus angel tecjsawe'sh trompeta's tucani susutspcachja', seena' yuj ūucjūucjsa yuuna naa quiwete ūssa yacja' jī'c.

9 ¹Tyajũ Dyus angel tajstewe'shva tyajy trompeta's tujcac, naapcachja' uytju cieluju estrella naa quiwete weteetste. Atsa' tyāa wetesa estrella's llavi's ũsnic yuu, cafy seena' dyiisatewe'shna. ²Tyajũ tyāa cafy seena' dyiisa's pjandec, naapcachja' orno walate aj na'wēc casej, sa' tyāa aja' jyuca nuychji'ndycu secna vite' ēesu jyuca. ³Tyāa ajte yu' cjā'shtyi casej naa quiwete jyuca fyujna. Atsa' tyāa cjā'sh yu' yājaya' ājāwa'jsaty yu', usmity ma'wēta aca yāja' tyā'wē. ⁴Nava naa quiwete fytũ tash, jyũtj tash tsēysa yu'sa' quīj yujnava suwwa'jsameety yu', naasāa Dyus sello's dyictjesu maa yujva ji'pjmeesarrarrá'styi yājawa'jsa yu'. ⁵Nava nasaty icjwa'jsa yu' yu'tsmeeta', naasāa tajts a'te ājpcach seena' wala caaca'jwa'jsarráaty yu'. Sa' tyāa acasa yu' usmity yājani na'wē seena' aca yuuwa'jsaty yu'. ⁶Tyāa ensu' nasa' uuwa'ja's pacuerrava, uymeetyna. Macue uuwa'ja's pacueteva, tyāawe'shtyi' uu en pa'jmeena.

⁷Tyāa cjā'sha' jimbaty guerrate puiiya' u'juetsrra pjeu'jnisa na'wēty yu'. Dyictjesu yu' vyuu bee corona na'wēsaty ji'pju', sa' dyi'pa' nasaa dyi'p na'wēty yu'. ⁸U'y na'wēty ya'iindycjas yu', sa' tyāawe'sh qui'tja' león qui'tj na'wēsaty ji'pju'. ⁹Tyāawe'sh cacue yu' tsam na'wēsarrarrá'styi ya'iipjupj yu', sa' tyāawe'sh fyujatste susni yu' carretilla jimba wenzhnisa cujsa u'juetsrra ma'wē susucy tyā'wēty susu'. ¹⁰Sa' tyāawe'sh menz yu' usmity menz na'wēty yājawa'j ji'pju', nasaty yājarra tajts a'te uta caaca'jwa'jsa. ¹¹Tyāa cjā'sha' teech ne'jue'sh ji'pju'ty, cafy seena' dyiite ũssa. Tyāa ne'jue'sha' hebreo yuwete yu' Abadoncu yaase yu', sa' griego yuwete' Apolioncu yaase yu' meerrava Iviitusa jīnisa.

¹²Tyajũ Juan we'werra':

—Nyafyte seena' ũucjũucjsa yu' scjēwcu, nava e'nzíi peejyta' jī'c.

¹³Tyajũ Dyus angel seistewe'shva tyajy trompeta's tujcac, naapcachja' Dyus tashte vyuu bee altal pajnz vitssu we'weni ptjũusec. ¹⁴Sa' Dyus angel seistewe'sh trompeta ji'pju'c tyā'sa' na'jīnac jycaajni yuu:

—Pajnz angeleswe'sh tundni ũsta' Eufrates yu'wala pucate tyāawe'shtyi' mityjwete jīna.

¹⁵Tyajũ tyāa angeleswe'shtyi'sa' tyjwetenity yuu, nasa naa quiwetewe'shtyi puupyājn āatuw icjcajn. Tyā'wē yūuwa'jsa ne'ta pjeu'jni ũsu', quīj ora, maa ente, quīj a'te, maa añute tyā'wē yuuwa'jsarrava tyāa en ājtewe'sh. ¹⁶Tyajũ tyāa jimba seena'su a'jsaty jiyutj. Tyāawe'sha' seena' wala cuj yu'ty, dos cientos millones.

¹⁷Na'wē jimba seena'saty uytju, atsa' tyāa jimbate a'jsa yu' puiiwa'j tyāawe'sh pechusu ya'pjupjnisa ji'pju'ty tecj jwend, teechsa' bej, vite' tsēy, vite' lemsa. Atsa' jimba yu' león na'wēty ya'iindyictjej yu', sa' yuwesu yu' ipy vite' aj vite' asufre tyā'wēsaty casejna ũsu'. ¹⁸Atsa' naa quiwete nasa puupyājn āatuwtyi uu, tyā'wē jimba yuwesu tecj jwend casejrra icjpa'ga. ¹⁹Tyāa jimba' yuweju vite' menzujty ewmée yūuwa'ja's

ji'pju'. Tyāawe'sh menza' ul na'wēty yu' dyictjé ji'pj, tyāasaty tyāaju icjya' ājā'.

²⁰Nava tyāa ewmeesa vyaaty tyāate uusaamée nasa yu' tyāawe'sh ewmée yūuna fi'nzeni's nvijtmeeta'. Ehtjē'j jycaajni'sva pechcanamée nwēese'jna nestyi yu'. Sa' vyuu bej, vyuu chijme, tsam, cuet, fytū, tyāatytyi nasa na'wē piisarra neewe'wena nes yu'. Tyāa piisanisa' uysaavameeta', sa' wēse'jsavameeta', u'juya'va āja'tsmeeta'. ²¹Sa' icjna fi'nzeni'sva nvijtmeeta', sa' dyijyuuna, canzh pcal yuuna, pesweena tyā'wē yūunisatyva nvijtmeeta'.

Dyus angel cuseté libru ji'pjsa

10 ¹Tyājū' Dyus angel vite uytju seena' chjāchjasa cieluju tāapj pyājte quījatste, sa' dyictjete yu' cytjūuscu ji'pju'. Tyajj dyi'pa' sec na'wēc cweetje', sa' tyajj chinda yu' ipy na'wērrarráaty yu'. ²Cuseté yu' libru le'hcuesas'cu pjanderra ji'pju', sa' patsu chindaju yu' martec yuju, sa' jembu chindaju' quiwetec yuju. ³Tyā'wē yūurrac sus we'we león pembeerra ma'wē sus seena' pembeecy tyā'wē. Sa' tyā'wē seena' pembeetspcachja', siete cpi'sh we'wenic ptjūuse. ⁴Tyā'wē siete cpi'sh we'weni's jiyurra', fi'jya'vatj yu'. Nava cielujū na'jīna we'weni'stju wēse'j:

—Tyāa siete cpi'sh we'wenity jiyung tyāatyi's quim yujtyva pta'shna fi'jnu jī'c.

⁵Tyājū' tyāa Dyus angel marte vite' quiwete yujurra ūssa' patsu cuse's cielute quīsrra ⁶jurāycu bagachte yujva uumée ityī fi'nzewa'jsa na'wē quījquījtyva jyuca vitcu tyajj yase's cysusrra na'jīna:

—Āchja' jwee yu' jytjēyuumēena. ⁷Dyus angel sietetewe'sh tyajj trompeta's tujcaya' tacjetspcachja', nmej ente ma'wē yūuwa'ja's ne' Dyusa' pjeu'jrra ji'pju' tyā' jyuca cytey yuuna. Sa' Dyus yuwe's pta'shna selpisaawe'shtyi ma'wēne' pta'sh tyāa yu' jyuca cytey yuuna jīc.

⁸Cielujū we'werra' etste cuch fi'jnu jīc tyā' qui' we'wec andy yacj na'jīna:

—Dyus angel na'wē patsu chinda's marte tyajrra vite chinda's quiwete tyajrra ūssa' cuseté libru ji'pja' tyāa libru's jypa'gaya' me'j jīte', ⁹Dyus angel tashte utyaarra tyāa libru's pējytju. Atsa' na'jīnac pta'sh:

—Jypa'garra mē'. Nava iindy yuwete yu' mil na'wē ñusha pēetjējena, naapcachja' iindy tutyjte yu', wala seena' yajana jī'c.

¹⁰Tyājū' Dyus angel cuseju jypa'garra libru's ū'tj, atsa' andy yuwete yu' mil na'wēc ñusha pēetjēej, nava andy tutyjte yu' seena' wala yaac.

¹¹Tyājū' na'jīnac jycaaj andya's:

—Na'wē Dyus caajiyu'cj tyā'sa' pta'shya' qui' u'juene'nga, chjaamb iisa, nasa msuuwe'shva, fiyfiy we'wesa, jycaajsawe'sh tyā'wēsaty jī'c.

E'nz pitstjē'j Dyus yuwe's pta'shya' caajnisá

11 ¹Tyajū' isani cīj ūsrra na'wēc jycaaj:
 —Dyuus yat vite' altal tyāa macueteve jiyuya' miisa, sa' Dyusna neewe'weya' cytee u'casa maanzcuēeteve jiyuya' miisa. ²Nava Dyus yatte patyu ecajuwe'sh yu'sa' isanu. Tyā'wēme' tyajuwe'sha's vite nasatycu ūsni yuu, atsa' tyāawe'sha' jyuca suwuutyna Dyus chjamb atesa's cuarenta y dos a'te ājpcach. ³Naapcachja' andyna selpisáa e'nz cajú'nja, andy yuwe's mil doscientos sesenta en ājpcach pta'shna ūscajn. Tyāawe'sha' nasa uute űnsna atjnisa ropa cjūchsa ji'pj yuutyna.

⁴Tyāa e'nzsawe'sha' e'nz olivo fytū tash ūsu'ty tyā'wēsata', vite' bela tyaa'jni e'nz ūsu'ty naa quiwete Dyus tashte tyā'wēsáírráata'. ⁵Tyāawe'shtyi' maafí yu' pcyuu wējēváatyna, nava tyāawe'sh yuwesu ipy casejrra jyuca cambuna atsesawe'shtyi's. Atsa' tyā'wē yūute', maava pcyuu wēesa' uu en ji'pjutyna. ⁶Atsa' tyāa selpisaawe'sha' cielu's apjya' ājāwa'jsata', Dyus yuwe's pta'shwa'j en ptsuupcach nus pa'cjamen. Sa' yu'a'sva eerrarráa vit-ya' ājārra seena' wala cyūusu'jwa'jsata' naa quiwete quīj weeva nuypa'jna, tyāawe'shtyi ma'wē yūuwechteve tyā'wē yūutyna. ⁷Nava tyāawe'sh mjīia's jyā'jatspcachja', ech iiméj seena'sa cafy seena' dyiijū cájrra tyāawe'shtyi puiirra cnayrra icjena. ⁸Tyāawe'sh uuníi cacue's na'wē cue'shtyi jype'jsa cluuste uuc tyāa chjamb wala cllicjunsu wāataani yuutyna. Tyāa chjamba's Sodoma vite' Egipto na'wēsa' jī'ty. ⁹Atsa' tecj en ēēpyāj ājpcach nasa maa chjambuwe'sh, ma'wēsa fīyfiy we'wesa, maa quiwejuwe'shva jyucasa tyāa uuníi cacueti's uyuutyna, nava caapenda'j yu' meetyna. ¹⁰Tyajū' nasa naa quiwetewe'sha' seena' wala wechaatyna tyā'wē uupa'ga, sa' tyā'wē wechaweete tyāawe'sh ji'pjuni's puuty peesutyna. Tyāawe'sh yacj yu' iiméj seena' wala ewmeesa na'wēsa yuutyna tyāa e'nz pitstjē'jsa Dyus yuwe's pta'shna ūssawe'sha', tyāa pa'ga uute' wala wechaatyna. ¹¹Nava uuníi tecj en ēēpyāj scjēwniijū', Dyusa' ityī vitcu atsa' qui' quiitety. Tyā'wē yūute', iiméj seena' wala ūucjtyi jyucaysa uyna ūssawe'sha'. ¹²Tyajū' tyāa e'nz selpisaawe'sha' wēse'jty seena' sus we'weni cielu'jū na'jīna:

—Ayte cielute ēete myujwe jītspcachja', tāapj pyājte u'jrra cielute tejcaty, tyāawe'shtyi atsesawe'sh uyna ūste. ¹³Tyā'wē yuutspcachja', seena' wala ejnd u'jrra tyāa chjamba's ma'wē yu' suwrra ejy jyūna u'cj, atsa' siete mil nasaty uu tyāa ejnd u'pja'ga. Tyā'wē yūute', nasa neeyūusa' iiméj seena' wala ūucjrra Dyus cielute ūssa's pytjaa we'wena tuutje'jty.

¹⁴Tyajū' Juan we'werra': Seena' ūucjūucjsa e'nztewe'sh yu' scjēwcu, nava jytjēyumeena tecjtewe'shva jī'c.

Trompeta sietetewe'sh

¹⁵Tyajū' Dyus angel sietetewe'shva tyajy trompeta's tujcac, atsa' seena' sus we'wenisa ptjūuse'ty cielujū na'ljīna:

Naa quiwete jycaajna ūsnisa' jyuca cue'sh Tata vite' tyajy Tyjityjnisa Cristo tyāawe'sh jūirrarráaty yuuna pa'j.

Atsa' āchja' tyāarrarráa jycaajana bagachteva jīnaty we'we.

¹⁶Tyajū' Dyus luuchtyi jycaajsa veinticuatroawe'sh Dyus jycaajna ūsnite ūssa' quiwete quīitsjurra Dyusa's neewe'wety na'ljīna:

¹⁷Cue'shtyi jype'jsa indya's wecha'tja'w, Dyus iiměj seena' walasang. Indya' nyafiiva indyírrráang yu', sa' āchva tyāáírrráang, sa' bagachteva indy yurráa nes yuuwa'lsang.

Tyāa pa'gatey quījiteva jyuca ājāwa'ja's indyrrarráa ji'pjngu, Tyāasa āchja' jycaajna ūsngu.

¹⁸Naa quiwete nasa' indya's ajtsety, nava tyāawe'shtyi castigāywa'j ena' ājc.

Atsa' tyā'wēy uusaawe'shtyiva castigaīne'nga.

Sa' walasa ma'ty yuu meerra' le'chcuesa ma'ty yuu nava indy yacj tyutemée fi'nzerra iindy yase's atsewe'wesameewe'shtyi' deweene'nga ew yūuna iindy yuwe's pta'shna selpiina fi'nzepa'ga. Naapcachja' naa quiwete suwna ūssawe'shtyi's ca'tu' iviītune'nga jīnaty we'we.

¹⁹Tyajū' cielute Dyus ūsni pjatec, atsa' na'wē Dyusa' nasa yacj puuty we'wec tyāa puuty we'weni's fi'jrra cajate jyaawni yuuc tyāa caja' vyaac. Naapcachja' cpi'sh cwejnerra seena' suscu cuetumba seena' wala āshna, atsa' ejndva u'cj.

U'ya's ech seena'sa icj wēeni

12 ¹Tyajū' ēe walaju na'wēc seena'sa vyaa: teech u'y tyajy cacuete yu' seccrarráa ji'pjsa a'tete yujurrac ūsu', sa' dyictjete yu' teech corona doce estrella ji'pjsa'scu ji'pju'. ²Tyāa u'ya' nasatec ātsā'ats yu', sa' seena' wala pytjaa yacana pembe'c.

³Tyāa e'su' ēe walaju qui' vite na'wēc vyaa: ech bejsa iiměj seena'sa siete dyictjé ji'pjsa, diez caachuc ji'pju', sa' dyictjé iisa teech coronac ji'pju'. ⁴Tyajy menzu yu' estrellaty puupyājn āatuwcu suwrra naa quiwecjé pūsh. Sa' tyāa ech seena'sa yu' u'y nasa casejya' ūsu'c tyāa yatstec ūytjasna yuju, nasa casejtspcachja' luucha's ū'ya'. ⁵Tyajū' tyāa u'ya' teech luuch pijtsu ji'pju, tyāac naa quiwete jyuca jycaajwa'jsa yu' iiměj wala juuna'. Tyajū' tyāa luucha's cusa'jrra, Dyus jycaajna ūsnitec jyūna u'jni yuu. ⁶Atsa' tyāa u'ya' nasa u'pnimée quiwetec ūpjna u'j, tyāa jīi Dyus pjeu'jrra ji'pjune' cytee ūsya'. Cytee pa'tje', mil doscientos sesenta en ājpcach sāl'jīni ūswa'jsa'.

⁷Tyāa e'su' cielute puiiwa'cj u'pu', atsa' Dyus angel npiitstjē'jsa Miguela' tyajy angeleswe'sh yacj puiity ech seena'sa yacj. Atsa' ech seena'sava tyāa yacj ūssawe'sh yacj casejc puiiya'. ⁸Nava echa' cnayme', sa' tyāawe'sha' cielute ūswa'j ji'pjmeety neeyūu. ⁹Tyāa pa'ga ech seena'sa's ecaju wāataanic yuu, tyāa'ic tyāniitey ul jīnisa yu', naa quiwetewe'sh jyucaysaty īshīina caypumba'jsa Ehtjē'cj yaase yu'. Tyāa ehtjē'j vite' tyāa yacj ūssa jyucaysaty naa quiwecjē wāataanity yuu.

¹⁰Tyājū' cieluju sus we'wena na'jīni'stju wēse'j:

—Ewte neeyūuwa'j en pa'cj, cue'sh Dyus tyāarrarrāa jycaajwa'j en vite' Dyus tyjityjnisa Cristova tyā'wēy jycaajwa'j en. Tyāa pa'gatey cue'sh yacjtjē'jwe'shtyi ewmeesata' jīna pāatyjī'cjna ūssa's ecaju wāataanic yuu, tyāa'ic bagachteva pu'vitumée nes yu' cue'shtyi pāatyjī'cjna.

¹¹Tyā'wēteva, cue'sh yacjtjē'jwe'sha' ech ewmeesa's cnaytyi, na'wē Piishacuē jīnisa icjni uuc tyajy eeju vite' tyajy caapiya'jni's pu'vitumée pta'shna fi'nzepa'ga. Tyāawe'sha' Cristo's selpiipa'ga uu en pa'tjeva tyā'sa' ūsmée uuya'rrāaty ūsu'. ¹²Tyā'wē ewmeesa's cnaypa'ga wechwecha miiyajcywe, cielute fi'nzesawe'sh jyuca. Nava seena' yuj wala ūucjūcja' naa quiwete mteewe'shva jyucaysa yacja'. Tyā'wē ūucjūcuj yuucajnīi ehtjē'ja' i'cue'shtyi pcyuuya' quīj seena' wala ūusachana, sa' cuj enmée ūswa'ja's jīia' tyāasa tyā'wē ūusachana ūsa'.

¹³Sa' tyāa ech seena'sa' quiwecjē wāataani yuurra', tyāa u'y luuch ji'pjusa's icjya' pacuec. ¹⁴Nava tyāa u'ya's uu'j wala fyū cu'ta na'wēsa's ūsni'c yuu, ech seena'sa tashu iyuna u'jrra nasa u'pnimée quiwete tyajy ūswa'tje fyujna u'cjan, cyteea' tecj añu pyājtepcach sāl'jīnic fi'nzewa'jsa yu'. ¹⁵Tyājū' tyāa echa' yuwesuc yu' nuysēj, yu'a's seena' wala nuywalaarra tyāa u'ya's yu' jyūna u'cjan. ¹⁶Nava tyāa ech yuwesu yu'sēesa's quiwe' jyuca chanzharra tyāa u'ya's nwe'wec. ¹⁷Tyā'wē yūute', tyāa ech seena'sa' tyāa u'ya's jweēīrrāac seena' wala ūusacha. Sa' tyāa u'y ji'l'jwe'sh yacj puiiya'c u'j Dyus jycaajnityi's nwēese'jna Jesucristo caapiya'jni's jypumbamée nwēese'jsawe'sh yacj.

E'nz ech seena' ūucjūcjsa

13

¹Tyāa e'su' mar pucatej yujurra ūsu', sa' uytju ech seena' canzh ūucjūcjsa mar pyājū casejetste, sa' siete dyictjē ji'pjrra diez caachuc ji'pju', caachu iisa teech coronac ji'pju'. Sa' tyāa dyictjesu yu' Cristo's seena' canzh atsewe'wenac fi'jni yu'. ²Tyāa ech seena' canzh ūucjūcjsa' tyiclli na'wēc jyajcue yu', chinda yu' oso na'wēty yu', sa' yuwe yu' león na'wēc yu'. Atsa' ehtjē'ja' tyāa ech seena' canzh ūucjūcjsa's quīj yūuya'va ājāwa'ja's ūsrra tyajy jycaajna ūsni'sva ducju, sa' quījteva jyuca pu'chya'c neeyūu. ³Tyāa ech seena' canzh ūucjūcjsa dyictjē teehsa yu' uupchājc cpā'yuuni yu', nava tyāa cpā' yu' wēetniyā'cj yu', atsa' naa quiwete nasa jyucaysa tyāa ech seena'

canzh ũucjũucjsarrá'styi wechana utyaarra neewe'we. ⁴Sa' echtjê'ja'sva wechana neewe'wety, tyã'wẽ ech seena' canzh ũucjũucjsa's jycaajwa'jsa vitrra qui'ppa'ga. Sa' ech seena' canzh ũucjũucjsa yu'sa' na'jĩnaty neewe'we':

—¿Quim naa na'wẽy seena'sa ũsqui, sa' quim tyãa yacj puiiya' chjächjacy? jĩ'ty.

⁵⁻⁶Sa' ech seena' canzh ũucjũucjsa's cwe'we'jnic yuu, Dyusa's wẽeshuuna atsewe'wecajn. Atsa' cytey yuurra, Dyusa's wẽeshuurra atsewe'wena Dyus ũsni'sva atsewe'wec, cielute ũssawe'shtyiva tyã'wẽycu atsewe'we. Sa' tyãac jycaajwa'jsa yuu cuarenta y dos a'te ajpcach. ⁷Sa' Dyus luuchtyi ajtserra guerra'sva vit caajnic yuu cnaypcach. Tyãasac naa quiwete jyucaysawe'shtyĩ jycaajwa'jsa yuu, nasa ma'wẽsava maa chjambuwe'shva fiyfiy we'wesava jyucaysaty. ⁸Atsa' na'wẽ Piishacuẽ jĩnisa icjni yuuc tyã' libru ji'pja' bagachte yujva uuwa'jsamée yasety fi'jni, atsa' naa quiwetewe'sh jyucaysa tyãawe'sh yase's naa quiwe's vitiynarráa yujva tyãa librute fi'jnimeesa' jyucaysa tyãa ech canzh ũucjũucjsa's neewe'wety.

⁹Tyãa ente' na'wẽ seena' yuutyna tyã'sa' mwẽese'jwe: ¹⁰Nasaty preesu'jsa' tyãawe'shva preesu'jni yuutyna. Atsa' nasaty cchilluj icjsa' tyãawe'shva cchilluj icjni yuutyna. Tyãa pa'ga Dyus luucha' Dyus yacj yuurráa chjächja fi'nzewa'ja's ji'pjuwa'j peejyta'.

¹¹Tyãa e'su' vite ech seena' canzhsa quiwe dyiijũ cãjatste uytju. Tyã' piisháa caachu na'wẽsa e'nzcu ji'pju', nava tyãa ech seena' canzh ũucjũucjsa na'wẽycu Cristo's atsewe'we'. ¹²Sa' ech canzhsa nyafytewe'sh na'wẽy jycaajya' ajāwa'ja'scu ji'pju', tyãasac naa quiwete nasa jyucaysaty jycaaja', ech na'wẽ dyictjete cpā' seena'sa ji'pjurrava wēetcu tyā'sna neewe'wecajn. ¹³Sa' quĩjqũjva seena'sa'sva caavya'ja'jya' ajā'c, cielujũ ipy wala seena'sa caaquĩji'jna naa quiwete nasa uyna ũste. ¹⁴Ech canzhsa nyafytewe'sh tashte seena'sa's caavya'ja'jya' ajārra, naa quiwete nasa jyucaysaty caypumba'cj Dyus yuwe pta'shsa na'wẽ quĩjva caavya'ja'jrra. Sa' seena' dyictjete cpā' ji'pjrrava uumée chjächjac tyãa na'wẽysa piisacaacj ityĩmeesa. ¹⁵Sa' ech canzhsa quiwe dyiijũ cāasa' tyãa piisanisa ityĩmeesa's ityĩ vit-ya' ajāwa'ja's ji'pju'c. Atsa' tyãa ityĩ vitnisa's neewe'wesamée yuutyi'sa' quiwe dyiijũ cāasa echa' quicje'jwa'jsac yu'. ¹⁶Tyajũ' ech quiwe dyiijũ cāasa' na'wēc yũu jyucaysaty: le'hcuesa, walasa, ji'pjsa, ji'pjmeesa, patron ji'pjsa, patron ji'pjmeesa, teeche yujva nvijtmée jyucaysaty iisawa'cjaacj patsu cusete meerrava dyi'pte. ¹⁷Sa' tyãa ech quiwe dyiijũ cāasa yaseju iisawa'jni's meerrava tyãa yase numero's ji'pjmeesa yu', quĩj yujva weyya' ajāmeetyna, sa' tyweyya'va ajāmeetyna maa yujva. ¹⁸Sa' tyãa ech canzhsa numero' cue'sh jiyunisa'. Atsa' tyã'sa' jiyuwa'jsa ũsrra', ũus miiyajcywe: tyãa numero' seiscientos sesenta y seisa'.

Ciento cuarenta y cuatro mil nasa memniisa

14 ¹Tyāa e'su' uytju Piishacuē jīnisa Sion tǵā'j vitste yujurra ūste. Tyāa yacj vite ūsu'ty, ciento cuarenta y cuatro mil nasa, tyāawe'sh dyictjesu yu' Piishacuē jīnisa yase vite' tyajy Tata yase's ji'pjsa. ²Tyājū' cielujū susni ptjūusec yu'wala cujsa susni na'wē vite' cpi'sh chjāchja we'weni na'wē susni, iiměj wala cujsa tyāawe'sh arpa tucani na'wēc ptjūuse'. ³Tyāa nasa' mem u'sesaty memu', Dyus jycaajna ūsni vite' Dyus vitni ityīsa pajnzsa'we'sh vite' Dyus luuchtyi jycaajsawe'sh tyāawe'sh tashte. Tyā'sa' quim yujva piyaya' āja'tsmeeta', naasāa naa quiwetewe'sh cshavyu ewte neeyūusāa ciento cuarenta y cuatro mil tyāawe'sh yuurráaty ājā'. ⁴Tyāawe'sha' Dyus yuurráana selpiina fi'nzesaty yu', sa' tyāawe'sha' nasaa cshavyu nwe'wenity yuu Dyus jīi vite' Piishacuē jīnisa tyāa jīi yuuwa'jsa, nyafyte nwe'wenisa. Tyāasaty Piishacuē jīnisa icjni yuuc tyāa mtee u'tjeva tyāa yacj ja'nda u'jue'. ⁵Sa' quījrrāa yujva īshīisa yu'tsmeeta', sa' Dyus jycaajna ūsnite quīj pcal yujva ji'pjmée ūsta'.

Dyus angeleswe'sh tecjsa pta'shya' casejni

⁶Tyājū' Dyus angel fyujna u'juetstetj uy ēe wasasu. Sa' ewte neeyūunisa bagachte yujva ptsuwa'jsame's pta'shwa'ja'scu ji'pju' naa quiwetewe'sh mtee mteewe'shtyiva, nasa ma'wēsa, fiyfiyrrāa we'wesa, maa chjambsuwe'shtyiva jyuca. ⁷Sa' na'jīnac sus we'we':

—Dyusa's mtuutje'jwe ūucjna. Tyā'wēme' jyucaysaty castigāywa'j ena' ājyā'cj. Mneewe'wewe' cielu, quiwe, mar, yu', quījquījna yuca vit-sa's jī'c.

⁸Tyājū' Dyus angel vite na'jīnac sus we'we':

—Babilonia chjamb tyacue chjāchjasarrava, Dyus castigo's jypa'gawa'tje yā'j ūsa'. Tyā'wē yuucajnīi naa quiwete nasa mteewe'shtyiva jyucaysa pcal canzhte fi'nzewa'ja'scu caapiya'j naa pa'ga jī'c.

⁹Tyājū' Dyus angel tecjtewe'shcu na'jīna sus we'we':

—Maava ech seena'sa vite' tyāa na'wēy piisani yuuc tyāaty neewe'werra, tyajy iisawa'jni's caaqui'pu'juna dyi'pte meerrava cusete na', ¹⁰tyā'wē yūusa' Dyus castigo seena' nūssa's jypa'gatyna tyā'wē yūupa'ga. Sa' seena' yuj castigāyni yuuna asufre ipy walate, Dyus angeleswe'sh vite' Piishacuē jīnisa icjni yuuc tyāawe'sh dyi'pte. ¹¹Castigāyni ipy wala aja' bagachte yujva psumée shi'tana nes yuuna. Atsa' cyteea' en ma'c yuu cus ma'c yuu nava bagachte yujva jycaasewa'ja's ji'pjumeetyna, tyā'wē ech seena'sa vite' tyāa na'wēy piisani yuuc tyāaty neewe'werra tyajy yaseju iisawa'jni's caaqui'pu'pja'ga. ¹²Tyāa pa'ga Dyus luucha' tyajy jycaajni's cytey nwēese'jna Jesus yacj yuurráa chjāchja fi'nzewa'ja's ji'pjuwa'j peejyta' jī'c.

¹³Tyājū' qui' wēse'tj we'weni cielujūwe'sh, tyā' andya's na'jī'c:

—Naa scjēwniijū Cristo's jypa'garra uusaawe'sha' wala yuj wēt̃wēt̃ fi'nzesa yuutyna jīni's mfi'j jīte', Dyus Espiritu pasrra': Tyā'wē yuja', tyāawe'sha' jycaaseetyna Dyusna selpiina pytjaa yuuna fi'nzenijū, sa' cielute uyuutyna tyāawe'sh mjīini's jī'c.

Scuutyj uvaty pcjajcni

¹⁴Tyajū' tjengrra uytju tāapj chijme cajcuete nasa yuusāa na'wēsac teeche cachrra u'pu'. Dyictjete vyuu bee coronac ji'pju', sa' cusete yu' scuutyj wacani zecsa'scu ji'pju'. ¹⁵Cielute Dyus ūsnijū vite angel sus we'wena casejc tāapjte cachrra u'psa's na'jīna:

—Scuutyja's wacarra mepcjajc. Tyā'wēme' jyuca tjē'cj atsa' pcjajwa'j en ājc jīte', ¹⁶tāapjte cachrra u'psa' naa quiwete scuutyja's wacarra jyuca pcjajcu.

¹⁷Tyajū' cielute Dyus ūsnijū vite angelva casejc uva undeni zecsa's attrra. ¹⁸Naapcachja' Dyus altaluj vite angel casejc tyā' ipya's caajwa'jsac yu'. Sa' uva undenisa's ji'pjsa's na'jīnac sus we'we:

—Uva's ujnderra mepcjajc. Tyā'wēme' jyuca tjē'jni yā'j ūsta' naa quiwete jīte', ¹⁹Dyus angela' naa quiwete uva's jyuca ujnderra pcjajcu, sa' teeche ajterrarrāac jyuca āsh cytee cu'sya'. Tyāa yu' Dyus castigo' na'wē seena' yuuwa'jsa' jīnisac yu'. ²⁰Tyāa uvatyi's chjamb ecajc cu'sni yuu, atsa' eerrarrāac uwu jimba frenusu cājpcach, tres cientos kilómetro peecu'jsu pcachcu tyā'wē uta.

Dyus angeleswe'sh siete castigoty ji'pjsa

15 ¹Vite seena' ūucjūucjsa cielute uytju: siete angeleswe'sha' siete castigo's pta'shsaty yu'. Tyāa siete castigosa' nmejsaty yu' Dyus castigo.

²Mar ipy ca'ndni na'wēsa zhichcue speeju na'wē cjicjyna ūste uytju. Atsa' ech seena'sa vite' tyāa ech na'wēy piisani yuuc vite' tyajy yase numero tyā'wēsaty nwēese'lsameewe'sh yu' tyāa mar pucate yujurraty ūsu', tucani arpaty Dyus ūscu tyāaty attrra. ³Sa' Dyusna selpisāa Moises mema's memu'ty, vite' Piishacuē jīnisa'sva wechana memu'ty na'jīna:

Dyus, quījteva jyuca ājāsa,

Seena' yuj wala pu'chngu quījteva jyuca.

Naa quiwete jyuca jycaajsa iindy mjīini' jyuca ewrrarrāata'.

⁴Cue'shtyi jycaasang atsa' ġindyas quim ūucjmée yuucy?

Sa' ġquim indya's tuutje'jmée yuucy?

Indy yuurraa pcal ji'pjmée atesang, atsa' maa quiwejuwe'shva jyuca indyrrarrā's neewe'wetyna,

Tyāa pa'gatey indy ew yūunisa' āatec yuu jīnaty memu'.

⁵Tyā'wē yūunijū' qui' vite uytju, cielute Dyus ūsnite Dyus leytyi jyaawni vity pjateetste. ⁶Atsa' tyāa Dyus ūsnijū yu' siete angeleswe'shtyi

casej, siete castigo seena'saty jyūrra. Tyāawe'sha' atjni ropa ate cuentetesaty ji'pju'. Sa' jytundnisa yu' vyuu bejrrarráa pechun cājsaty ji'pju'. ⁷Tyajū' Dyus vitni ityīsa pajnzsatewe'sh teeche'sa' vyuu bee copa ūscu teeche'sa' na'wērraj tyāa siete angeleswe'shtyi. Cytee yu' castigo seena'sarrarráa utaty ji'pj yu' Dyus bagachteva nes yuuwa'jsa caajni. ⁸Atsa' tyāa Dyus ūsnite yu' jyuca ajrrarráa utac, Dyus quījteva jyuca ājāwa'jsa tashu yuusac yu'. Atsa' cytee yu' quim yujva u'caya' ājā'tsmeeta', siete castigo siete angeleswe'sh ji'pju'ty tyāa ptsumeyna yu'.

Siete copa Dyus castigo's ji'pjsa

16 ¹Tyajū' siete angeleswe'shtyi na'jīna sus we'weni wēse'tj Dyus ūsnijū:

—Dyus caajni castigo seena'saty siete copate ji'pji'cue tyāaty me'jwe pcawya' quiwete jīte', ²Dyus angel nyafytewe'sha' u'jrra tyāa copatewe'sha's quiwete pcawcu. Atsa' tyā'wē yūute', nasa jyucaysa ech seena' canzhsa vite' tyāa ech na'wēy piisani yuuc tyāaty neewe'wesawe'shtyi's cacuete wā'jy seena' acasa pa'cj.

³Dyus angel e'stewe'sha' tyāa copatewe'sha's martec aw, atsa' tyāa mara' nasaa ee na'wērrarráac yuu jyuca. Tyā'wē yūute', tyāa marte ūssa ityīsa jyuca uuty.

⁴Tyajū' Dyus angel tecjtewe'sha' tyāa copatewe'sha's yu'walasu vite' yu'le'chcuēsu cysūuc aw, atsa' yu' ma'wēsava jyuca eerrarráaty yuu.

⁵Tyajū' Dyus angel yu'a's tjengsa' na'jīna we'weni'stju wēse'j: Dyus, nyafiiva indyngu yu' sa' āchva tyāaírráang, Dyus atesa. Tyāasang tyā'wē castigaí'. ⁶lindy yuwe's pta'shpa'ga ajtserra indy yacj fi'nzesawe'shtyi ee pcawtyi, tyāa pa'gang tyā'wē yūsatyi's ca'tuva ee yusu'. Tyāawe'sha' castigo's jypa'gawa'j ji'pj yujta' jī'c.

⁷Naapcachja' Dyus altaluj na'jīna vite we'weni'sva wēse'tj:

—Dyus quījteva jyuca ājāsa indya' peecyrráa castigaímée, isang castigaí' jīnic ptjūuse.

⁸Tyajū' Dyus angel pajnztewe'sha' tyāa copatewe'sha's sectec aw. Tyā'wē yūute', seca' nasaty iiméj wala acha cweetjcajncu tyā'wē yuu.

⁹Atsa' jyucaysa iiméj seena' wala chjavytyi. Nava pcala's nvijtrra Dyus tashte yu' shawendmeeta' tyā'sna neewe'weya'. Tyā'wē Dyusna yaaquipcachte, jweeírráaty tyā'sna atsewe'we' tyā'wē seena' castigāyya' ājāsa's.

¹⁰Tyajū' Dyus angel tajtstewe'sha' tyāa copatewe'sha's ech seena' canzh ūucjūucjsa jycaajna ūsnitec aw, atsa' tyāa jycaajna ūsni quiwe' chji'ndyterrác yuu. Tyā'wē seena' yuute', nasa' ūuschaniite tjune's ya'wa'qui'ty castigo tyacue seena'sa pa'pja'ga. ¹¹Macue tyā'wē yuuteva, tyāawe'sh ewmée yūuna fi'nzeni yu'sa' wej yujva iviitu'tsmeeta'. Tyā'wē wā'jy seena' acasa pa'tjeva, jweeírráaty cielute Dyusa's atsewe'we'.

¹²Tyajü' Dyus angel seistewe'sha' tyāa copatewe'sha's Eufates yu'walatec aw. Atsa' tyā'wē yūute', tyāa yu'wala' ujnndycu jycaajsawe'sh sec cāani ju'ngu yuusa uycjēwya' ājācajn.

¹³Tyajü' na'wēsaj vite uy: Echjtē'j yuwejū vite' ech seena' canzhsa Cristo's atsewe'wesa yuwejū vite' ech canzhsa Dyus yuwe pta'shsa na'wē quijva caavya'ja'jrra caypumba'jsa yuwejū tecj echtyi casej sap na'wēsa. ¹⁴⁻¹⁶Tyāa ech sap na'wēsa yu' quijquijva seena'saty caavya'ja'jya' ājā'ty, sa' tyāawe'sha' naa quiwete jycaajsa jyucaysaty pcjajya' u'jty, nmej ente Dyus tyacue chjāchjasa yacj puiiya' sūjrra. Sa' jycaajsawe'sh jyucaysaty pcjajtyi hebreo yuwete Armagedón jī'ty teech ajte cytee. Cristo we'werra': Yajcymée ūsiyna, peswée na'wērrāa pa'ja'nja, atsa' tyāa ente tjaamena ūsya'mée, Dyus yacj tyutemée fi'nzesa' wala yuj wētwt neeyūutyna jī'c.

¹⁷Tyajü' Dyus angel sietetewe'sha' tyāa copatewe'sha's ēesuc pcaw, naapcachja' Dyus ūsni cielujū na'jīnisac sus we'weni ptjūuse tyajj jycaajna ūsnijū:

—Na' Dyus castigo nmejtewe'sha' jī'c.

¹⁸Tyajü' cpi'sh cwejnena we'weni seena' suseu, atsa' ejnd iiméj seena' chjāchja u'cj, naa quiwe yuuiyna bagachte yujva tyā'wē yu' ejnd chjāchja u'juetsmeene'. ¹⁹Tyā'wē ejnd u'pja'ga naa quiwete chjamb jyuca ptsuuty. Atsa' chjamb iiméj seena' walasava tecj ajsuty upe. Atsa' Dyusa' yajcycu Babilonia chjamb wala's jyucate castigāyya', seena' ewmée yūupa'ga. ²⁰Tyajü' mar pyājsu quiwe u'psa vite' vits wala jyuca vituty. ²¹Naapcachja' cielujū cuetumba nasaa cajcuecjē ūshity seena' walasa pajnz arroba āj dujsa. Atsa' tyā'wē seena' yūute', nasa yu' jweefirráaty Dyusa's atsewe'we', tyā'wē castigo seena'sa's caapja'ga.

U'y canzh pcal yūusa's iiviituni

17 ¹Tyajü' siete angeleswe'sh na'wē siete copa jī'pju'ty tyāatewe'sh teehsa's uytju, atsa' andya's na'wēc we'we:

—Ayte myuj, na'wē u'y canzh yūuna fi'nzesa mar cajcuete cachrra u'pa' tyā'sna castigāywa'ja's pta'shya'vatj. ²Maa quiwete jycaajsawe'shva tyāa u'y yacjrrarráaty canzh pcal yūuna fi'nze', atsa' naa quiwete nasa' tyāa canzh fi'nzewal' yuurráanaty piyana ūsu'.

³Tyajü' andya' Dyus Espiritu apjniitj yuu, atsa' Dyus angela' andya's pe'jna u'cj nasa u'pnimée quiwete. Cyteea' teech u'y ech bej seena' canzhsa cajcuete al'jrra u'ptetj uy. Atsa' tyāa ech seena' canzhsa cacuete yu' Dyusna atsewe'wena fi'jnisarrāa utac jī'pju', sa' siete dyictjé diez caachuc jī'pju'. ⁴Tyāa u'ya' atjni ropa iiméj ew bejsac jī'pju', vyuu bej vite' cuet zhichcuesa vite' perla iiméj pa'gasa tyā'wēsa atyjcū iijyū yu'. Sa' cusete yu' vyuu bej copa ewmée canzhsarrarrāa uta jī'pjsa'scu jī'pju'. ⁵Sa' dyictjete yu' na'wēc fi'jni yu': Babilonia chjamb canzh jyutjtjesa canzh yūuwa'ja's caapiya'jsa jīnac fi'jni yu'. ⁶Tyajü' jiyutj, tyāa u'ya' tūunic

yu' Dyus luuchwe'sh ee vite! Jesus caapiya'jni's pta'shpa'ga icjni yuuty tyāawe'sh ee yacj. Sa' u'y tyā'wēsa's uyrra', wala üucjtju.

⁷Tyājū' Dyus angela' na'lī'c:

—¿Quī yūurra üucjna üsnga? Caajiyu'jya'vatj tyāa u'y ma'wēsateva vite! tyāa ech seena' canzhsa tū'sna u'juetsa' siete dyictjé ji'pjrra diez caachu ji'pja' tyā'sna. ⁸Ech seena' canzhsa's uyngu tyā' nyaffi yu' üsu'c, nava āchja' meea'. Tyā'wērrava cafy iiméj seena' dyiisajū casejena vituya'. Atsa' naa quiwetewe'sh jyucaysa tyāawe'sh yase's bagachterrāa yujva uuwa'jmée ityī fi'nzewa'j librute fi'jnimeesa yu' wala yuj üucjutyna tyāa ech seena' canzhsa qui' vyaana tyā'sna uyrra.

⁹Na'sa' jiyuwa'jsa üsrra', mjiyuwe: U'y cachrra u'pa' tyāa ech dyictjé sietesa' siete vits walata'. ¹⁰Sa' tyāa dyictjéirráa siete jycaajsata'. Tyāa jycaajsawe'sha' tajtssa yu' vituyā'jty, atsa' āchja' seistewe'sha' jycaajna üsa', nava nmejtewe'sh sietesa yu' jycaajya' tacjmeya'. Nava tyāa nmejtewe'sha' jwee yu' tyachmée jycaajana. ¹¹Ech seena' canzhsa nyaffi yu' üsu'c nava āchja' meea' tyā' jycaajsa sietesac yu'. Nava ew jiyute yu', tyāafírrāa jycaajsa ochotewe'sh yuuwa'jsa'. Tyāa e'su isa jyucate vituna.

¹²Sa' diez caachu uyngu tyāa yu' diez jycaajsawe'shta'. Nava tyāawe'sha' jycaajya' tacjmeyta'. Nava jycaajsa yuuwa'ja's jypa'gatyna wala tyachmeecuerrāa, ech seena' canzhsa yacj ja'ndarraj. ¹³Tyāa diez jycaajsawe'sha' ma'wē yūuwa'ja'sva cyanzlí ja'ndarraj puuty we'werra üsta'. Tyāasa ech seena' canzhsa's cchjāachja'jatyna cyteerraj jycaaj pu'chna. ¹⁴Tyā'wē yūurra Piishacuē jīnisa yacj puiityna. Nava Piishacuē jīnisa yuj pejca cnayuuna tyāawe'shtyi', tyāa pa'gatey tyā' Maateva Jytjaacue Chjāchjasa', sa' Maa Jycaajsateva Jytjaacue Jytujtjesa'. Atsa' tyāa yacj üssa' Dyus peeygājrra nwe'wenisata' tyāa yacj tyutemée fi'nzesa.

¹⁵Tyājū' Dyus angela' vite na'wēsa'sva pta'shcu:

—Na'wē u'y canzh pcal yūuna fi'nzesa cachrra u'pni mar uyngu tyā' naata': maa quiwete chjambva jyuca, nasa majūwe'shva fiyfiyrraj we'wesa tyāata'. ¹⁶Sa' ech seena' canzhsa dyictjesu diez caachu uyngu tyā' jycaajsa yuuwa'jsata', sa' u'y canzh pcal yūuna fi'nzesa's ajtserra süpyrrāa wāatajatyna. Tyā'wē yūurra, cacuete chich yu'sa' ū'rra ipyte cambutyna. ¹⁷Tyāa u'ya's tyā'wē yūurra iviitucajn, Dyus ne' jytjāas. Tyāa pa'ga tyāa jycaajsawe'sha' ech seena' canzhsa's cchjāachja'j pu'chrra tyā'wē yūutyna, Dyus we'weni' cytey yuucajn. ¹⁸Atsa' u'y cachrra u'pte uyngu tyāa yu' Babilonia chjamb canzh jytujtjesa', naa quiwete jycaajsa jyucaysaty tyāarrarrāa jycaajna üssa.

Babilonia vituni

18 ¹Tyāa e'su' Dyus angel cielujū quījatstetj uy seena' juuna' jycaajwa'jsa, naa quiwete zhichcue eena' cweetjna. ²Sa' na'līnac sus we'we:

—Babilonia chjamb tyacue chjächjasarrava, Dyus castigo's jypa'gawa'tje yā'j ūsa'. Sa' āchja' echtjē'j jycaajni espiritu ewmeesa vite' vichacue canzhsarrarrāa ūswa'j yuuna pa'cj. ³Tyā'wē yūucajni maa chjambva jyucaysa tyāa pcal canzhsaterrarrāaty fi'nzena ūsu'. Atsa' naa quiwete jycaajsa jyucaysawe'sh pcal canzh yūuwa'ja's yuurráaty piya. Tyā'wēy tyweysawe'shva wala ji'pjsa yuuty, pcalte fi'nzewa'jrrá's tyweyna ji'c.

⁴Tyājū' cielujū na'jina we'weni wēse'tj:

—Andy nasa yā'ja' tyāa chjambu mcaasejwe, tyāa pcalsawe'sh yacj ūsya'mée, cyaj tyāa chjambte castigo' i'cue'shtyi's cpajcymeena. ⁵Na'ji'tj na': tyāawe'sh pcala' iiméj seena' walani' cielute cājpcach, cyajc Dyusa' tyāa chjamba's castigāyya' yajcy tyā'wē canzhsapa'ga. ⁶Tyāava vitety ma'wēga ewmée yūu tyā'wēy ewmée myūuwe ca'tuva. Sa' tyāava ma'wēga vitety juuna' yūu, tyāate e'nz us tjaacue juuna' myūuwe. ⁷Pcyuuna macyūusu'jwe, tyāava macuega iiweych yajcyna pcalte fi'nzena ūsu' tyāatey āj. Sa' tyā' na'wēc yaaqui' tyajy ūuste: Ayte jycaajsa na'wē cachrra u'ptju. Nmi' ji'pjmeesameetj, sa' pytjaa yuuna fi'nzeme'nja sūjnac iiweych yaaqui'. ⁸Tyāa pa'ga teeche enterrāa castigo pa'jatyna na'wēsa: ūuswa'j, wējē, uu en, sa' ipyte cambni yuuna. Tyāa chjamba's Dyus chjächjasa' jyuca iviituna.

⁹Atsa' naa quiwete jycaajsawe'sh tyāa chjambte canzh pcal yūuna fi'nzena' wala ūus we'wena ū'netyna, tyāa chjavyni aja's uyrra. ¹⁰Sa' tyā'wē castigāyni's ūucjrra, jyujurrāa tjengutyna na'jina:

—Seena' yuj pytjaa yuuc, Babilonia chjamb tyacue seena' chjächjasa. Naa dundte jyuca vitunic yuu jityna.

¹¹Naa quiwete tyweyna fi'nzesawe'shva tyāa chjamba's yajcyrra wala pytjaa we'wena ū'netyna. Tyā'wē yūucajni āchyā'ja' peena yu' quim yujva weymeetyna macue tū'sna pa'tjeva: ¹²vyyu bej, vyyu chijme, cuet zhichcue wala pa'gasa, tela zhichcuesa iiméj pa'gasa, fytūu wēt putasá, marfil zhichcuesa, fytūu ewsa wala pa'gasa, bronce yaasesa, hierro yaasesa, marmól yaasesa, quījquījva tyā'wē zhichcue vitnisa. ¹³Vite' ū'nisate wēt pēetjēsa, cambte wēt putasá, wēt putacajn cacuete shūshnisa, vino, aceite, scuutyj ū'we ewsa. Vite' tajcy ctū'sel'jnisa, piisháa, jimba, carretilla jimba wenzhnisa. Vite' nasa tyweynisa quīj yujnava ya'tyweymeena. ¹⁴Sa' tyāa chjamba's na'jityna:

—¡Tyacue wala wechana fi'nzeni's ji'pjmeéc neeyūu, sa' tyacue zhichcue ji'pjuni'sva jyucate iviituc! jityna.

¹⁵Tyāa chjambte quījquījva tyweyrra wala ji'pjsa yuusaawe'sha' jyujurrāa tjengna neeyūutyna castigāyni's ūucjrra. Sa' wala ūus we'wena ū'netyna ¹⁶na'jina:

—¡Tyāa chjamb tyacue walasa seena' yuj yuuc! Nyafii yu' u'y na'wēc zhichcue iijyūrri fi'nze', ropa iiméj pa'gasa, vyyu bej qui'pna yuunisa,

cu et zhichcuesa iiméj pa'gasarrarráaty tyā'wēsaty yu' iijyū'. ¹⁷Nava tyāa ji'pjunisa naa dundte jyuca ptsuuc jityna. Tyā'wēy barco namuwe'sh, vite' cytee mjiisawe'sh jyucaysa jyu'jurráa tjengna neeyūutyna. ¹⁸Sa' tyāa chjamb chjavyna shi'tasa aja's uyrra', na'jina sus we'wetyna:

—Mtee yujva naa chjamb na'wēy walasa yu' meea' jina, ¹⁹ñusweete dyictjecjē quiwe ya'fijmbna sus ū'nena na'jityna:

—Seena' ñusñus cnaycu chjamb tyacue walasa tyajy ji'pjuni yacj wala ji'pjsa vitcu barco ji'pjsa yuutyi' jyucaysaty. Nava naa dundte jyuca vitunic yuu jityna.

²⁰Nava cielute ūssawe'sh wala yuj mweechawe tyāa chjamba's castigāyni's uyrra, Jesus jycaajnisawe'sh vite' Dyus yuwe pta'shsawe'sh, Dyus yacj fi'nzesawe'sh jyucaysa. Tyāa pa'gatey Dyusa' tyāa chjamba's castigāyyā'cj, i'cue'shtyi ewmēe yūupa'ga jinic ptjūuse.

²¹Tyajū' Dyus angel teeche'sa' seena' wala chjāchjasa ū'cjni cuet na'wēsa's quisrra, marcjēc wāataj na'jina:

—Babilonia chjamb tyacue walasa tyā'wē wāataaní yuuna, atsa' tyā'sa' bagachte yujva peena yu' uymeetyna. ²²Atsa' tyāa chjamb cllicjunsu tucani música arpa, cuvy, trompeta tyā'wēsa ptjūusemeetyna. Sa' tyāa chjambte quij mjiisa yujvamēe yuutyna, sa' ū'cjni'rráa yujva ptjūusemeena. ²³Cytee pqui'tanirráa yujva cweetjmeena, sa' boda fiesta vitna susniva peena yu' ptjūusemeena. Tyāa chjamba' tyweyna ūssawe'sh wala yuj chjāchjasaty ji'pju'c, sa' naa quiwetewe'shtyi jyuca caypumba'cj dyijyurra. Nava āchja' quij yujva ji'pjmēe yuuna jī'c. ²⁴Tyā'wē yuucajnī Dyus yuwe pta'shsawe'sh vite' Dyus yacj fi'nzesawe'sh vite' naa quiwete mtee mteeva icjnisawe'sh eea' jyuca tyāa chjambterrarráac ūs yu'.

Dyusa's cielute wechana ūsni

19 ¹Tyāa e'su' cielujū nasa wala cujsa sus we'weni wēse'tj na'jina: Cue'sh Dyus chjāchjasa tyāa yuurráa ewte nviit-sa',

Sa' tyāa yuurráa jytujtjesa',

Tyāa pa'ga cue'sh Dyusa's wechaaga.

²Tyāasafic chjamb tyā'wē canzh yūuwa'ja'srráa caapiya'jsa's castigāy, Naa quiwete canzh yūuna suwna ūssa's.

Sa' Dyusna selpisaaty icjpa'ga ca'tuva Dyusa' castigāy yu' jī'ty.

³Tyajū' qui'quin we'wety na'jina:

—Cue'sh Dyusa's wechaaga. Tyāa chjamb chjavyni aja' bagachte yujva ptsumēe shi'tana nes yuuna jī'tspcachja', ⁴veinticuatro jycaajsawe'sh vite' Dyus vitni ityīsa pajnzawe'sha' Dyus jycaajna u'psa tashte peejyūcuerra wechaty na'jina:

—Tyā'wē yuj ew yuuc. Tyāa pa'ga Dyusa's wechaaga jī'ty.

⁵Tyāa e'su' Dyus jycaajna u'pnijū teeche na'jina we'wenic ptjūuse:

Cue'sh Dyusa's mtuutje'jwe, tyā'sna selpisaawe'sh

Le'chcuesa ma'c yuu meerrava walasa ma'c yuu nava tyã'srráana
nwēese'ljna jyucaysa jī'c.

Cielute boda fiesta āani

⁶Tyājū' nasa wala cujsa we'weni na'wēsa'stju wēse'lj tyāa yu' cuj yu'
susni na'wēc ptjūuse', vite' cpi'sh sus we'weni na'wē. Sa' na'ljī'ty:

Dyusa's wala yuj wechaaga, tyāa pa'gatey cue'sh Dyus quījteva jyuca
ājāsa tyā' jycaajya' tacjyā'cj.

⁷Atsa' seena' wala wechana tyā'sa' tuutje'jega, tyāa pa'gatey

Piishacuē jīnisa nyuu yuuwa'lja' ya'pjeu'cj,

Atsa' boda fiesta ena' ājyā'cj.

⁸Tyāa nyuu yuuwa'lja' ropa iiméj zhichcue chijmesa's caatje'jnic yuu
jī'ty.

(Tyāa ropa ewsa yu', Dyus dyi'pte jypumbamée ew fi'nzeni jīnisa'.)

⁹Tyājū' Dyus angela' na'ljīnac fi'cjaaj:

—Piishacuē jīnisa boda fiestate pi'cynisawe'sh yacja' wala yuj wecha
yuja' jīna cfi'ja'jrra', na'ljīnac we'we:

—Na'wē we'wenisa' Dyus cwe'we'jnisas isasata' jīte', ¹⁰andya' Dyus
angel tashte neewe'weya' peejyūcuetj. Nava tyāa yu' na'ljī'c:

—Andya's peejyūcueni. Andya' Dyusna selpisāa indy na'wēysafirraátj,
iindy yacjtjēljwe'shva ma'wēta Jesus caapiya'ljni isasa's jypumbamée
pta'shna pecūjū' tyā'wēysatj. Atsa' Dyusrráana mneewe'we. Na'wē quījva
yūuna jīna caavya'lja'tj tyāa yu' Jesus ma'wēsateva caajiyu'jsata' jī'c.

Jimba chijmete a'jrra casejsa

¹¹Tyāa e'su' cielu pjaterra ūstetj uy, atsa' teech jimba chijmesac vyaa.
Cyte a'jsa yu': Isasarrá's Cytey Yuusāa jīnac cysusni yu', tyāa pa'gatey
isasa yu'sa' jyuca cytey yuuna puiirra cnaycu naa pa'ga. ¹²Sa' tyajy yafy
yu' ipy beesa na'wēc eena' cweetje'. Dyictjete yu' wala cuj corona ji'pju'c,
sa' vite yase fi'jni ji'pju'c tyāa yase's tyāa yuurraac jiisa yu'. ¹³Tyajy
atjni ropa yu' eete acjnisa'scu jyaatj yu'. Sa' tyāa yu' Dyus ma'wēsateva
tyā'sna caajiyu'jsa' jīnisac yu'. ¹⁴Atsa' tyāa yacj u'jsa yu' cielutewe'sh
jyucaysa jimba chijmesatety a'jrra u'juets yu', ropa ewsa chijme atesa's
atjrra. ¹⁵Sa' tyajy yuwesu yu' espada seena' zecsac sējna ūsu', tyāa yacj
maa quiwetewe'shtyiva cnaywa'lja. Tyā'wē yūurrac maa quiweteva jyuca
juuna' yuuna tyāarrarrāa juuna' jycaajwa'lja yu'. Sa' ewmeesa yuutyi's
seena' castigaīna cyūusu'ljna, uvaty cu'ssava ma'wēga seena' yū' tyā'wēy
yūuna Dyus quījteva jyuca ājāsa tyā'wē seena' castigaīna. ¹⁶Sa' tyajy
atjni ropate vite' jī'mbesu na'ljīna fi'jnic ji'pju': Maa Jycaajsateva Jytjaacue
Jytujtjesa', sa' Maateva Jytjaacue Chjāchjasa' jīna.

¹⁷Tyāa e'su' Dyus angel secte yujurra ūstetj uy, tyā' na'ljīnac sus we'we
uuniisa chichtyi's ū'sa vichacuēty:

—Jyucaysa pcjaacjerra myujwe ũ'ya' i'cue'sh ũ'wa'lj Dyus ũscu tyā's. ¹⁸Sa' ũ'wene'cue uusaawe'sh chich, jycaajsawe'sh ma'c yuu, npiitstjē'jwe'sh ma'c yuu, nasa iiméj jytujtjesa ma'c yuu, jimba uuniisa ma'c yuu, jimbate a'jsa uusaawe'sh ma'ty yuu, patron ji'pjasa ma'c yuu meerra' patron ji'pjmeesa ma'c yuu, le'chcuesa ma'c yuu walasa ma'c yuu nava tyāaty jyuca pcjacjrira mē'we jīnac we'we.

¹⁹Tyajū' uytju ech seena' canzhsa vite' naa quiwete jycaajsawe'sh tyajy nasa yā'jrira jyucaysa pcjaacjerra tyāa jimbate a'jsa yacj vite' tyajy nasa yā'jrira pdyi'purra puiiya' ũste. ²⁰Nava ech seena' canzhsa Cristo's atsewe'wesa vite' ech canzhsa Dyus yuwe pta'shsa na'wē quījva caavya'ja'jrira caypumba'jsa tyāa yacj e'nzīi tundnity yuu, tyā'wē Cristo's atsewe'wesa iisawa'jni's caaqui'pu'jna ech seena'sa piisani yuuc tyā'snava neewe'wecajn caypumba'pja'ga. Tyajū' tyāa e'nzīity ipy wala asufre yacj bejna ũsa' tycjēe wātāanity yuu ityītey. ²¹Tyajū' jimbate a'jsa yuwesu espada seena' zecsa sējna ũsu'c tyāa espadaju icjnity yuu nasa ewmeesa yuutyi's, atsa' uuniisa chichtyi's vichacue' tyiepcachtyi ũ'.

Naa quiwete mil añupcach Cristo jycaajwa'j

20 ¹Tyāa e'su' Dyus angel cielujū quījatste uytju, cafy iiméj seena' dyiisatewe'sh llavi's attrra, vite' tsam cadena walasa'scu ji'pj yu'. ²Sa' tyāa angela' echtjē'ja's tundcu mil añu ājpcach. Tyā' tyāniitey ul weeswēe Satanascu yaase yu'. ³Tyā'wē yūurra cafy seena' dyiisate cyuupjrira vityte yu' selloc qui'p, maa quiwetewe'shtyiva peena yu' īshīiya' casejajmén mil ānu ājpcach. Tyāa mil añu ājte', tyjweteni yuuna tyachmeerrāava.

⁴Tyajū' jycaajna ũsnisatyjtju uy, atsa' cysū yu' castigāyya' ājāwa'jsaty cachrra u'pu'. Vite' Jesus caapiya'jni's nwēese'jrira Dyus yuwe's pta'shna fi'nzepa'ga dyictje's spē'tjrira icjni yuuty tyāawe'shtyiva uytju. Tyāawe'sha' ech seena' canzhsa vite' tyāa ech na'wēysa piisani yuuc tyā'sna neewe'wesameety yu', sa' tyāa ech iisawa'jni's dyictjesu meerrava cusesurrāa yujva caaqui'pu'jsameety yu'. Tyāawe'sha' qui' ityī yuurra mil añuty jycaajna ũsu' Cristo yacj ja'ndarra. ⁵Tyāawe'sha' uurrava qui' ityī yuusaata' nyafyte, nava vite uusaawe'sh yu' ityī yuumeeta' tyāa mil añu scjēwpcach. ⁶Dyus yacj yuurrāa fi'nzerra uunijūva tyāawe'sh cjuē'y nyafyte ityī yuusāa yacja' seena' yuj wecha yuja'. Tyāawe'sha' bagachte yujva Dyus yacj puuty uywa'ljmeete yu' u'ljmeetyna. Tyāa pa'ga tyāawe'sha' mil añupcach jycaajna ũsutyna, Dyus vite' Cristo tyāawe'sh tashte selpiina.

⁷Mil añu scjēwnijū' echtjē'ja' tundnijū tyjweteni yuuna, ⁸sa' īshīina caypumba'jya' casejena naa quiwetewe'shtyi jyuca, Gog vite' Magog tyāawe'shtyi. Tyā'wē yūurra puiiya' pcjacjena Magogwe'sh nasaty. Tyāawe'sha' iiméj seena' cujta' cuetmuse na'wē. ⁹Tyāasaty quiwe

macueteva jyuca ãjrráa cyaanduu Dyus luuchtyi vite' Dyus peeygãani chjambnava. Naapcachja' Dyusa' cielujũ ipy caajrra tyãawe'shtyi' jyuca cambcu. ¹⁰Sa' echtjẽ'j ishĩisa's ipy wala asufre yacj bejna ũsu'c cyteec acjni yuu, na'wẽ ech canzhsa Cristo's atsesa vite' Dyus yuwe pta'shsa na'wẽy yuurra caypumba'cj tyãawe'shtyi acjni yuuty cytee. Cyteea' en ma'c yuu cus ma'c yuu nava bagachterrãa yujva caasewa'jmée chjavyna nes yuutyna.

Castigãywa'ja's pta'shya' cuutya'jni

¹¹Tyajũ' jycaajna u'pni chijmesa seena' walasa'stju uy, vite' cytee cachrra u'psa's. Tyajy yafyju tjengniterrãa quiwe vite' cielu wantaĩmeerra jyuca vituty, sa' peena yu' vyaameeta'. ¹²Tyajũ' uusaawe'shtyi uytju, walasa ma'c yuu le'chcuesa ma'c yuu nava jyuca Dyus tashte yujurra ũste. Atsa' libruty pjandenity yuu, vite' bagachte yujva uuwa'jmée ityĩ fi'nzewa'j libru yã'jrra. Tyajũ' uusaawe'shtyi Dyus tashte cuutya'jnity yuu, tyãawe'sh ma'wẽ yũuna fi'nzesateva librute ma'wẽne' fi'jni ũsu' cytee tjengrra castigãywa'ja's pta'shya'. ¹³Yu'cjẽ cjẽerra uusaava ityĩ yuurra quiitety, naapcachja' quiwe dyiiga pendanisava ityĩ yuurra quiitety. Atsa' jyucaysaty teechea na'wẽrraj ma'wẽ yũuna fi'nzesateva pta'shrra castigãywa'jty yuu. ¹⁴Tyajũ' uu en vite' uusaawe'sh yã'jrra infierno ipy walate acjnity yuu. Tyãa infierno ipy walate cjëenijũ' bagachte yujva Dyus yacj peena yu' puuty uywa'jme'. ¹⁵Atsa' cyteety acjni yuu bagachte yujva uuwa'jmée ityĩ fi'nzewa'j librute tyãawe'sh yasety fi'jnimeesatyi's.

Cielu u'sesa quiweva u'sesa uyni

21 ¹Tyãa e'su' cielu u'sesa vite' quiweva u'sesatj uy. Tyã'wẽ yuucajnĩ nyafiitey cielu vite' quiweva nyafiiteywe'sha' scjẽwniity yuu, atsa' quĩj mar yujva meec yuu. ²Juan yaasesa andya' uytju Dyus chjamb Jerusalen u'sesa tyã'wẽ Dyus tashu cielujũ quĩjatste. Tyãa chjamba' seena' ew pjeu'jni yu'c, novia iimi'ya' pjeu'jrra ũytjãsna ũs na'wẽ. ³Sa' cielujũ sus na'jĩna we'weni wẽse'tj:

—Mtjeng, ãchja' Dyusa' nasaa cshavyte ũsa' tyãawe'sh yacj fi'nzeya', atsa' nasa' Dyus jĩi yuutyna. Dyusa' tyãawe'sh Dyus yuuya' tyãawe'sh yacj fi'nzena. ⁴Tyãasa Dyusa' quĩj ñusniijũva jyuca nwe'wena, atsa' peena yu' uuwa'jmée yuuna. Ũ'newa'j enva pa'jmeena, ñus we'wewa'jva pa'jmeena, acasava pa'jmeena, tyãa pa'gatey nyafĩ fi'nzeni ena' scjẽwcu jĩ'c.

⁵Tyajũ' jycaajnite cachrra u'psa' na'jĩ'c:

—Mtjeng, quĩjtyva jyuca yu'ptjejrãa u'serrarrãatj vit jyuca jĩrra', qui' na'wẽc we'we:

—Na'wẽ we'wenisaty' mfi'j, tyãa pa'gatey tyã' isa cytey yuuwa'jsata' jĩrra', ⁶qui' we'wec:

—Andy we'weni' jyuca cytey yuunic yuu. Andya' naa quiwe meetey ũsyā'tj yu', sa' bagachteva nes yuwa'jsatj ptsuwa'jsamée. Atsa' maava yūwēesa's quīj yujva vyuu pa'gamée ũsu'nja yu' bagachte yujva uumée caafi'nzel'jwa'lsana. ⁷Maava ewmeesa yu'sa' nwēese'jmée jyuca cnaysawe'sha' quījva Dyus jīi yu'sa' jyuca tyāawe'shrrarráa jypa'gatyna. Atsa' andya' tyāawe'sh Dyus yu'nja, naapcachja' tyāawe'sha' andy luuch yuutyna. ⁸Nava maa nasava Dyusa's chjāchja yaacysamée yā'ja' ya'scarra fi'nzesa, quījteva canzhrráa yūuna fi'nzesa, nasa icjsa, canzh pcal yūuna fi'nzesa, dyijyuuna fi'nzesa, Dyus ityīmeesaty neewe'wesa, īshīisa tyāawe'sha' infierno ipy wala asufre yacj bejna ũsa' cytee cjēeya' u'jwa'j ji'pjutyna, bagachte yujva Dyus yacj peena yu' puuty uyya'mée.

Jerusalen u'sesa's uyni

⁹Tyajū' Dyus angel sietesawe'sh na'wē Dyus castigo nmej sietesaty ji'pju'ty siete copate tyāa sietesawe'sh teeche'sa' cūjrra na'wēc we'we:

—Myuj tjengya', pta'shya'vatj Piishacuē jīnisa nyuu yuwa'jsa's jī'c.

¹⁰Naapcachja' Dyus Espiritu apjniitj yuu, atsa' Dyus angela' pe'jna u'cj, teeche tjā'j vits seena' wala ēete. Sa' cytee cājrra', caavya'ja'cj Jerusalen chjamb wala Dyus tashu cielujū quīisa's. ¹¹Tyāa chjamba' zhichcue zmeena'c cweetjna ũsu', Dyus cweetjniyu. Sa' tyāa zmeena' cweetjnisa yu' cuet iiméj zhichcue cuentetesa na'wēc yu'. ¹²Sa' tyāa chjamb peecu'j yu' cuetrrarráac upjni yu', wala ēete jyu'j umnisa, sa' doce vitycu ji'pju'. Sa' tyāa vity iisa teeche angelyi ũsu'. Tyāa vitysu yu' Israel ji'j docesawe'sh yasety fi'jnity u'pu'. ¹³Sec cāani ju'ngu tecj vitytyi u'pu'. Sec cjēeni ju'nguva tecj vitytyi u'pu'. Sa' tjacue ju'nguva tecj vitytyi u'pu', vite' tashu ju'nguva cyanz vityí. ¹⁴Tyāa chjamb peecu'j doce cuet qui'prra tyāa cajcuesuc cuet upjni yu' tyāa iisa doce yasety fi'jni yu', na'wē Piishacuē jīnisa jycaajnisas docesawe'sh yasety.

¹⁵Andy yacj we'wesa Dyus angela' ji'pju'c isani metro vyuu bejrrarráasa tyāa chjamba's isawa'j, vite' cytee vity vite' tyāa cuet upj tyā'wēsaty isawa'j. ¹⁶Chjamba' puuty tyacjuerrarráac yu' jyu'jya'va tyacjuēy, tapeya'va tyacjuēy. Atsa' Dyus angela' tyāa chjamba's isani metro yacj isate', dos mil doscientos kilómetro ji'pju'c jyu'jya' tyacjuēy, tapeya'va tyacjuēy, cjēete ēeteve tyacjuēy, puuty tyacjuerrarráaty yu'. ¹⁷Tyajū' cuet upja'scu isa, atsa' sesenta y cuatro metroc ji'pju' cjēete ēete. Cue'sh isani metro jiitja'w tyāa yacjīrráac Dyus angela' isana ũsu'.

¹⁸Tyāa upja' cuet jaspe yaasesa yacjrrarráac umni yu', atsa' chjamb yu' vyuu bejrrarráac yu', tyāasac seena' zhichcue zmeena' vya'. ¹⁹Cuet upja's caachinda'jnisa cuet yuutyi'sa' cuet fiyfiy zhichcuesa yacjrrarráaty pjeu'jni yu' tyā' naata': nyafytewe'sha's, jaspe yaasesa yacj; e'stewe'sha's, safiro yaasesa yacj; tecjtewe'sha's ágata yaasesa yacj; pajnzte'wese'sha's, esmeralda yaasesa yacj; ²⁰tajtstewe'sha's, ónice yaasesa yacj;

seistewe'sha's, cornalina yaasesa yacj; sietetewe'sha's, crisolita yaasesa yacj; ochotewe'sha's, berilo yaasesa yacj; nuevetewe'sha's, topacio yaasesa yacj; dieztewe'sha's, crisoprasa yaasesa yacj; oncetewe'sha's, jacinto yaasesa yacj; docetewe'sha's amatista yaasesa tyā'wēsa yacjtyi scandni yu'. ²¹Doce vitysa yu', perlarrarráaty yu', teech perlarráa teech vityte ājc yu'. Atsa' chjambte cliicjun wala yu' vyuu bejrrarráac yu', tyāasac zhichcue zmeena' vyaana nes yu'.

²²Cyteea' pcjaacjeni dyuus yat uymeetj, tyāa pa'gatey cue'sh Dyus quĩjteva jyuca ājāsa tyāa chjambte jyuca ājrráac ūsu', Piishacuē jīnisava tyā'wēy. ²³Tyāa chjamba' sec, a'te, tyā'wēsa eena' cweetjwa'jsa peejymeec yu', tyāa pa'gatey Dyus zmeena' cjicjyni yacjrráa jyucac eena' cweetje', atsa' vite zmeena' cweetjsa' Piishacuē jīnisafírráac yu'. ²⁴Maa quiwetewe'shva Dyus nwe'wenisa' tyāa chjamb eena' cweetjnisu fi'nzetyna, atsa' maa jycaajsawe'shva tyāa chjamba's wechana wala tuutje'jetyna. ²⁵Tyāa chjambte vitya' maa enterráa yujva apjni yuumeena, tyāa pa'gatey chji'ndywa'j enva mée yuuna. ²⁶Cyteea' wala yuj tyāa chjamba's wechana tuutje'jetyna maa quiwejúwe'shva. ²⁷Nava canzhsa yu' quĩj yujva u'cameena, ajtsena ishīisa quĩjquĩjva ewmée yūusa. Naasáa Piishacuē jīnisa libru ji'pja' tyāa librute tyāawe'sh yasety fi'jnisa yuurráa u'catyna bagachte yujva uuwa'jmée ityī fi'nzewa'jsa.

22 ¹Tyajú' Dyus angela' teech yu'wala seena' zhichcue chijme atesa's pta'shcu, bagachte yujva uumée caafi'nze'jwa'jsa's. Sa' tyāa yu'a' Dyus jycaajna ūsni vite' Piishacuē jīnisa tyāawe'sh jycaajna ūsnijūc casejna ūsu'. ²Chjambte cliicjun walasa pyājte vite' yu'wala pucate puuty pdyi'p fytūutash bucharra walaana cājty, bagachte yujva uumée caafi'nze'jwa'jsa. Sa' tyāa fytūutasha' a'te iisac yūnna nes yu', tyāasac añute' doce veces yūnu', naapcachja' ets yu' yu'tsec selpi' maa quiwejú nasatyva jyuca. ³Cyteea' ewmeesa yu' quĩj yujvamée yuuna. Tyāa chjambte' Dyus vite' Piishacuē jīnisa tyāawe'sh jycaajna ūsutyna, naapcachja' tyāawe'shtyi selpisaawe'sha' wechana neewe'wena nes yuutyna. ⁴Cyteea' Dyus yacj pdyi'purra puuty uyya' ājātyna, sa' Dyus yase's tyāawe'sh dyictjesu ji'pjsa yuutyna. ⁵Cyteea' chji'ndywa'j enmée yuuna, atsa' cytee fi'nzesa' pqui'tawa'jva peejimeetyna, sa' sec cweetjniva peejimeena, tyāa pa'gatey eena' cweetjsa' Dyusírrá'. Atsa' cytee ūssa' bagachteva wechana nes yuutyna.

Jesucristo quíiwa'j en utya ūsa'

⁶Tyajú' Dyus angela' andya's na'jīnac we'we:

—Na'wē pta'shnisa' isa cytey yuuwa'jsata', atsa' tyāatyī's isasa yujtyna sūjna wa'lmée jy'paga'ja'. Tyāa pa'gatey nyafíi tyajy yuwe's pta'shsawe'shtyi caaūsutje'cj tyāa Dyus írráac āchva tyajy angela's caaj,

na'wě quĩjva yũuya'va' jwee yu' jytjēyuumée tyāaty caajiyu'cjan āchj naa ensu selpisaawe'shtyi.

⁷Tyājū' Jesus we'werra':

—Tyachmey yuwe'nja, atsa' naa librute Dyus yuwe's fi'jni ūsta' tyāaty cytey yũusa' seena' wechana neeyūutyna jī'c.

⁸Juan yaasesa andya' tyā'wēsatytyj uyna wēse'jna yuu. Sa' tyā'wē uyna wēse'jrra', Dyus angel caavya'ja'cj tyajy tashte peejyūcuetj neewe'weya'.

⁹Nava tyāa yu' na'wēc we'we andya's:

—Andya's peejyūcuenu. Andya' indy na'wēysafirráatj, iindy yacjtjē'jwe'shva ma'wēta Dyus yuwe's pta'shna fi'nze' tyā'wēsaj, vite' Dyus librute fi'jni ūsa' tyā'sna cytey yuusawe'sh na'wēysafirráatj Dyusna selpisáa. Atsa' wejyva Dyusnarráa mneewe'we jī'c.

¹⁰Tyājū' qui' we'wec na'jīna:

—Naa librute Dyus yuwe's fi'jni ūsa' tyā'sa' pta'shmée yu' yuunu. Tyā'wēme' cytee we'wenisa cytey yuuwa'j en ājya'va'. ¹¹Atsa' tyāa en āanijuyā'ja', pta'shni's nwēese'jsamée yu' jwee'fírráa ewmée canzh yuuna fi'nzetyna, naapcachja' pta'shni's nwēese'jsa' jwee'fírráa Dyus yacj tyutemée chjāchja fi'nzetyna.

¹²Tyājū' Jesus qui' we'werra':

—Tyachmey yuuyuju'nja. Sa' teechna na'wērraj quĩj yũuna fi'nzesateva tyā'wē fi'nzepa'ga deweni's jyūrra yuwe'nja. ¹³Andya' naa quiwe meetey ūsyā'tj yu', sa' bagachteva nes yuuwa'jsatj. Andytyj nyafyte ūsya' tacj, sa' jyuca scjēwteva andy írráa neeyūuwa'jsatj ptsuwa'jsamée.

¹⁴Maava atjni ropas yaattera ji'pjsa yacja' wala yuj wecha yuja', Dyus chjambte vityte u'carra cytee fytūutash bagachte yujva uumée caafi'nze'jwa'jsa's ū'ya' u'casa yacja'. ¹⁵Nava canzh ewmeesawe'sh, dyijyuuna fi'nzesa, canzh pcal yũuna fi'nzesa, nasa icjsa, Dyus ityīmeesaty neewe'wesa, quĩjteva jyuca íshīiwa'jrrá's yajcyna fi'nzesa tyā'wē yũusawe'sha' u'caya' ājāmeerra ecaju neeyūutyna.

¹⁶Jesus qui' we'werra': Andya' andy tashte selpisáa angela's caatj, Dyus luuchwe'shtyi tyā'wēsa's jyuca pta'shcajn. Andya' nyafytewe'shtju, sa' jycaajsa David ji'tje casejsatj. Sa' cjicjiitste estrella zhichcue eena' cweetjsatj jī'c.

¹⁷Atsa' Dyus Espiritu vite' Piishacuē jīnisa nyuu tyāawe'sha' pi'qui'ty:

—Myuj jīna.

Atsa' tyā'wē pi'cyni's wēse'jsa' jweeju mpa'yawe. Atsa' yū'wēesa' utyaarra mpa'gawe yu' bagachterrāa yujva uuwa'jmeete caafi'nze'jsa's, quĩj yujva vyuu pa'gamée.

¹⁸Dyus yuwe naa librute fi'jni ūsa' tyā'sna nwēese'jsa jyucaysaty andya' na'wētj yu'cypeje': Dyus yuwe naa librute fi'jni ūsa' tyāate quĩjrráava yutyaváatyna atsa' tyā'wē yũusatyi's na'wē naa librute castigo fi'jni ūsta' tyāaty jypa'gawa'j vituna Dyusa'. ¹⁹Meerrava Dyus yuwe naa librute


fi'jni ũsa' tyã'sna quiĩrráava iviituváatyna atsa' tyã'wẽ yũusatyi's Dyusa'
puutsmeena tyãa fytũutash bagachte yujva uumée caafi'nze'jwa'jsa's. Sa'
na'wẽ pta'shna fi'jni yuuc tyãa chjambteva ca'ga'jmeena.

²⁰ Tyã'wẽ yũuwa'jsa' na'jĩ'c:


—Tyachmey yuuyuju'nja jĩte', passa':

—Tyã'jĩvatsrráava, wẽt yuuna. Nava dund myuj, Jesus.


²¹ Cue'shtyi jype'jsa Jesucristo' i'cue'sh jyucaysaty pu'chjina.



PRIMER VIAJE MISIONERO DE PABLO



SEGUNDO VIAJE MISIONERO DE PABLO




TERCER VIAJE MISIONERO DE PABLO




VIAJE DE PABLO A ROMA

El Templo en el tiempo de Jesucristo



Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines

